

int. sc. 1. pt. 3.



— ARA 2007



SCOTUS ACADEMICUS

SEU

Univerſa Doctoris Subtilis Theologica

DOGMATA

R. P. F. CLAUDII FRASSEN *Ord. Min. de Obſervantia
Sacrae Theologiae Doctoris.*

JUSSU

R.^{MI} P. MAGISTRI F. CAROLI JACOBI ROMILLI

Sacrorum Rituum Congregationis Conſultoris,
ac totius Ordinis Minor. Conventualium

Miniſtri Generalis iterum edita,

ET IN XII. TOMOS DISTRIBUTA.

TOMUS IV.

Tractatum DE ANGELIS *complectens.*



ROMÆ,

Apud ROCCHUM BERNABÒ, Anno MDCCXXI.

SUPERIORUM LICENTIA.

250000

OF THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

I N D E X

DISPUTATIONUM, ARTICULORUM, SECTIONUM, ET QUESTIONUM,

Quæ in hoc Quarto Tomo continentur.

TRACTATUS PRIMUS

De Angelorum Natura, Operationibus, & Præcellentiis. pag. 3.

DISPUTATIO PRIMA.

De Angelorum Existentia, Natura, & Ordine. 4

ARTICULUS PRIMUS.

De Angelorum existentia. 5
QUESTIO I. *An reverà conflet Angelos exiſtere?* ibid.

QUESTIO II. *Quo tempore, & loco creati fuerint Angeli?* 12

ARTICULUS SECUNDUS.

De Natura, & Subſtantia Angelica. 17

QUESTIO I. *An Angeli ſint omnino incorporei, & prorsus immateriales?* 18

QUESTIO II. *An, quomodo Angeli ſint incorruptibiles, & immortales?* 29

QUESTIO III. *An, & quomodo Angeli ab Anima rationali diſtinguantur?* 34

ARTICULUS TERTIUS.

De numero, & ordine Angelorum? 39

QUESTIO I. *An certò cognosci poſſit multiplex Angelorum numerus.* ibid.

QUESTIO II. *An inter Angelos plures ſint ſpecie, & ſolo numero diſtincti.* pag. 44

QUESTIO III. *Quid, & quot ſint Angelorum Hierarchie, & Ordines?* 54

QUESTIO IV. *An ſinguli Angeli propria habeant nomina?* 62

DISPUTATIO SECUNDA.

De Facultatibus, & Operationibus Angelorum. 63

ARTICULUS PRIMUS.

De Intellectu, & Cognitione Angelorum. ibid.

QUESTIO I. *Quis, & qualis ſit intellectus Angelicus?* 64

QUESTIO II. *An, & qualiter Angeli res intelligant per earum ſpecies?* 73

QUESTIO III. *Quodnam ſit obiectum cognitionis Angelicæ?* 83

QUESTIO IV. *An, & quomodo Angeli ſibi invicem loquantur.* 101

QUESTIO V. *An, & qualiter unus Angelus alterum illuminare poſſit?* 112

ARTICULUS SECUNDUS.

De Voluntate Angelica. 117

QUESTIO I. *An Angelica voluntas reverà ſit libera, & mutabilis.* 118

QUESTIO II. *An, & qualiter Angelus Deum, ſeipſum, & alia diligit?* 126

AR-

INDEX.

ARTICULUS TERTIUS.

- De potentia Motrice, & Executiva Angelorum.* 135
- SECTIO I. *De Loco Angelorum.* 136
- QUESTIO I. *An, & per quid Angeli constituantur in loco.* ibid.
- QUESTIO II. *Qualiter Angeli existant in loco?* 149
- SECTIO II. *De Motu Angelorum.* 158
- QUESTIO I. *An, & per quid Angeli localiter moveri dicantur?* ibid.
- QUESTIO II. *Qualis, & quotuplex distinguatur motus Angelicus?* 169
- QUESTIO III. *An Angelus possit transire de uno loco ad alium non transiendo per spatium intermedium?* 181
- QUESTIO IV. *An, & quæ sit Angelorum durationis mensura?* 186
- SECTIO III. *De Activitate Angelorum erga corpora.* 203
- QUESTIO I. *An, & qualiter Angeli soleant in assumptis corporibus apparere?* ibid.
- QUESTIO II. *An, & quas Angeli operationes vitæ edere possint in corporibus assumptis?* 215
- QUÆRES 1. *An etiam ex viro incubo, & Demone succubo filii nasci possint?* 225
- QUÆRES 2. *An Demones possint animalia per se producere?* 226
- QUÆRES 2. *An Demones possint corpora in aliam speciem mutare?* ibid.

DISPUTATIO TERTIA.

De Angelorum gratia, merito, & demerito. 230

ARTICULUS PRIMUS.

- De Gratiâ Angelis concessâ.* 231
- QUESTIO I. *An, & in qua Beatitudine creati fuerint Angeli?* ibid.
- QUESTIO II. *An, & qualem gratiam ha-*

- buerint Angeli.* 239
- QUESTIO III. *An, & quomodo Angeli gratiam sanctificantem, & suam beatitudinem ex propria operatione, & merito fuerint affecti?* 250
- QUÆRES 1. *Qualis fuerit via Angelorum duratio?* 258
- QUÆRES 2. *Quomodo ingressit Angelotum via.* 260

ARTICULUS SECUNDUS.

- De Officiis sanctorum Angelorum erga homines, & Obsequiis hominum erga Angelos.* ibid.
- QUESTIO I. *An omnes omnino Angeli ad hominum obsequia interdum deputentur?* 261
- QUESTIO II. *An, & qualiter Angeli sancti ad hominum custodiam deputentur.* 270
- QUESTIO III. *Quanam beneficia per suam custodiam nobis impendant Angeli, quæque ob eam eis rependat Deus, nosque eis rependere debeamus.* 283

ARTICULUS TERTIUS.

- De Angelorum peccatis, & pœnis.* 294
- QUESTIO I. *An, & qualiter Angeli peccare potuerint?* 296
- QUESTIO II. *Quodnam, & quale fuerit primum, & capitale Diaboli peccatum.* 311
- QUESTIO III. *An voluntas Dæmonum ita sit in malo obfirmata, ut nec possit aliquatenus refrenari, nec bonum aliquod operari?* 319
- QUESTIO IV. *An, & quali pœna Dæmones cruciuntur?* 342

APPENDIX.

- De infestatione, & cruenta Dæmonum in humanum genus sevitia.* 357

TRA-

DIVO LUDOVICO TOLOSATUM
PONTIFICI

*Regalis Sacerdotii ornamento singulari
Quod Angelicam in terris vivendi
Rationem iniverit .*

*Angelorum Coetui in Coelis adscripto
Tomum hunc Scoticae Theologiae
Angelorum naturam ; ac munia
Subtiliter explicantem
Inscribimus .*

THE UNIVERSITY OF CHICAGO

LIBRARY

540 EAST 58TH STREET, CHICAGO, ILL. 60637

THE UNIVERSITY OF CHICAGO PRESS

530 N. Dearborn Ave., Chicago, Ill. 60610

THE UNIVERSITY OF CHICAGO PRESS

530 N. Dearborn Ave., Chicago, Ill. 60610

THE UNIVERSITY OF CHICAGO PRESS

530 N. Dearborn Ave., Chicago, Ill. 60610

CHICAGO, ILL. 60610

IN SECUNDUM LIBRUM SENTENTIARUM PRÆFATIO.



MOYSES Deum aliquando enixè deprecatus, ut sui divini vultus intuitum concederet, hoc ab eo responsum audit: Videbis posteriora mea, faciem autem meam videre non poteris: Simile quid in præsentiarum nobis accidit; quippe omnem nostram operam hæcenus impendimus, ut Deum intra se subsistentem, operantem, & producentem, primum librum Sententiarum explanando, detegere, & inspicere liceret: At imbecillis, & cæcutiens nostræ mentis acies immensam illam Divinitatis lucem, nec suscipere, nec sustinere valuit. Quocirca, Moysis instar, ad ipsius Deitatis posteriora, nempe externa illius Opera lustranda, jam devolvitur, ut divini illius Solis splendorem in Creaturis, tanquam refractum, & velut radium in aquæ guttulis benignius emicantem intueri queat: Dei quippe posteriora sunt, inquit Nazianzenus orat. 34. ea quæ post eum extiterunt, nobisquæ ipsius Numen declarant. Non secus videlicet, ac Solis in aquis umbræ, ac simulacra infirmis oculis Solem repræsentant; quandoquidem eum obtueri non possumus, utpote lucis puritatem sensum omnem superantem.

Itaque à Dei contemplatione non recedit; nec quæ Theologi sunt minùs exequitur, qui miranda ipsius Deitatis opera scrutatur, & investigat; utpote eam ipsa mirè lucentem præferant Dei speciem, in seipsis impressam, ut in sigillis, expressam ut in speculis, ut in radiis effusam, ut in effigie delineatam: Invisibilia enim ipsius Dei, ait Apostolus ad Romanos 1. à creatura mundi per ea, quæ facta sunt intellecta conspiciuntur, sempiterna quoque ejus virtus, & Divinitas.

Hæc autem omnia creata opera triplicem in ordinem justa lance, ac sapientis nomenclatura libravit, ac distinxit rerum omnium Arbitrator, & Opifex Deus. Angeli namque, utpote omnino spirituales, Creaturarum fastidium meritò occupant: sunt enim primarii, ac præcellentes Deitatis defluxus, in quibus Deus seipsum, & expressis clarioribus, & signavit perennibus. Corporea quæque, seu viventia, seu vitæ expertia, quibus nulla rationis, & intelligentiæ lux affulget, extremum locum tenent; hæc enim solam Dei entitatem adumbrant, illa verò infima tantum ipsius vitæ participatione gloriantur. At Homo veluti medius inter hæc extrema dissidentia positus, utramque naturam, spirituales, ac corpoream in se felici vimine compingat.

Nam ut eleganter rem expendit Nazianzenus Orat. 38. Mens jam, & sensus, sic inter se discreta finibus suis se continebant: nondum autem utriusque temperatio ulla erat, aut contrariorum mixtura, quæ sublimioris Sapientiæ, ac circa naturarum creationem varietatis, & excellentiæ specimen exhiberet. Hoc igitur cum artifice verbo ostendere placuisset; animal unum ex utroque, hoc est ex invisibili, ac visibili natura, hominem fabricatur.... Velut alterum quendam mundum in parvo magnum, in terra collocat; Angelum alium, mixtum adoratorem, & visibilis naturæ spectatorem, intellectualis Mysten; eorum quidem, quæ in terra sunt Regem; superis autem subditum; terrenum, & cœlestem, caducum, & immortalem, visibilem, & intelligibilem, medium inter magnitudinem, & humilitatem, eundem spiritum, & carnem, spiritum propter gratiam, carnem ob superbiam vitandam.

His itaque tribus creatorum entium gradibus, nempe purè spiritualium, purè corporæorum, ac partim è materia, & partim è spiritu concretorum, cum divini opificii universitas integretur, & illustretur: Hinc sapienti consilio Petrus Lombardus, & quotquot eximii fuerunt illius Commentatores, & Interpretes, in ordinando Sententiarum libro id unicum auspicantur, ut explicato hoc triplici Creaturarum ordine, ineffabilem Dei creatis, & extra se producentis virtutem, ac sapientiam commendent.

Quamquam autem de corporeæ Creaturæ molitione, natura, & præcellentis jam satis superque dixisse videamur in Academica nostra Philosophia; nihilominus, ut hoc nostrum opus omnibus suis partibus constet, nonnulla hic, sed alia dissertatione revolvenda proponemus. Itaque illa omnia, quæ in secundo Sententiarum libro à Subtili Doctore discutiuntur, tres in Partes, seu Tractatus distribuemus, juxta triplicem Creaturæ purè intellectualis, videlicet Angelicæ, purè corporeæ, nempe totius Universi, & partim corporeæ, partim spiritualis, putà Humanæ notitiam assequendam.

Prima itaque pars Angelorum excellentias, & operationes intra ordinem Naturæ, & Gratiæ complectetur; Secunda, totius mundanæ molitionis ordinem, & formationem delineabit: Tertia verò mirandum hominis opificium, Variamque ejus sortem aperiet.





TRACTATUS PRIMUS

DE ANGELORUM NATURA, OPERATIONIBUS, ET PRÆCELLENTIIS.



Est Angelorum naturæ dignitas, & originis præstantia, ut sit divinæ generationis velut æmula, Cum Deus (sui divini Verbi instar) ante universam Creaturam, mente conceperit, & produxerit Angelicas potestates, ait Anastasius Synaita de Opificio diei sextæ. Inde meritò apud Jobum cap. 1. Filii Dei quin, & Dei primogeniti à SS. Patribus appellantur: quodque summum eis est laudis encomium, ipso etiam divino nomine *Yehovah* insigniri solitant in sacris Bibliis.

Nec mirum, *Angelus enim*, inquit S. Dionys. cap. 4. de divin. Nominib. est divinæ bonitatis radius, imago Dei, latentis lucis declaratio Et ut addit cap. 5. collocatus in ipso vestibulo super substantialis Trinitatis, hoc est, propius quàm aliæ res creatæ ad Deum accedens. Hinc S. Gregorius Nazianz. Orat. 34. *Angeli sunt primi luminis æterni radii, primi- que splendoris administri, supernæ glo-*

ria spectatores, & testes; superexcelsi, & purissimæ naturæ, ad malum immobiles, vel certè non facillè mobiles, perpetuos choros circa principem illam causam agitantes, purissimo splendore illine perfusi, & à summa illa pulchritudine adeo informati, ut ipsi quoque alia lumina efficiantur, ac puræ primi luminis influxiones, & communicationes ut alios illuminare possint. Hi sunt, ut scribit Ezechiel, signaculum similitudinis Dei Signaculum, inquam, non solum suæ naturæ, ac sanctimonie dotibus, Dei majestatem adumbrans, & referens; sed etiam illam resculpens in hominum mentibus: dum (ait S. Ambr. lib. 12. in Lucam) bonum odorem sanctificationis aspirant; Omnes namque sunt administri Spiritus in ministerium missi propter eos, qui hereditatem capiunt salutis.

Hinc profundè Tertullianus libro de anima cap. 37. Nos (inquit) divina Officia Angelos credimus. Et reverà quidem, Dei namque munia præstant, & exequantur, quod attinet ad res humanas; quippe divinam auctoritatem suo

nutnere exprimunt (inquit Sophronius in sanctorum Angelorum encomio): Unde luculenter sanctus Hilarius in Psalm. 129. illos Dei oculos, aures, & manus, & pedes appellat. *Si forte* (inquit) *hos esse oculos, vel aures, vel manus, vel pedes Dei intelligere voluerimus, non habemus auctoritatem improbabilem*: Sic namque perspicaces sunt ad prævidendum, & providendum, quod nostrum interest; sic misericordes ad compatiendum nostris ærumnis, sic actiuosi, & veloces ad ministranda nobis divina subsidia, ut meritò Dei oculi, manus, pede, & aures vocitentur.

Haud difficile nobis esset per eorum laudes, & encomia latius excurrere, si hoc ipsum ab instituto nostro non foret alienum. At illorum definire naturam, proprietates, explicare, referare operationes, & dotes, ac ordines investigare, res sanè ardua, & longè mortali homine major. Nam (inquit sanctus Dionysius de cælesti Hierarchia cap. 6. quot, & qui sunt cælestium naturarum ordines, & quemadmodum eorum Hierarchia consecrentur, solum eorum Dei-

scum mysteriorum Principem, certo scire judico; & præterea eos nosse nimis sumam atque illustrationes, sacrumque suum, & mundo superiorem bonum ordinem: Nos enim cælestium Mentium mysteria, sanctissimasque earum perfectiones intelligere non possumus; nisi forte ea contendat aliquis nos intelligere, quæ nos per eas, ut quæ sua præclarè cognita habeant, Divinitas ipsa docuit.

Igitur ut aliqualem sublimium illorum Spirituum noticiam, tum ex sacrarum Scripturarum fonte, tum ex sanctorum Patrum doctrinæ rivulis hauriamus, præsentem secundi Libri Sententiarum partem, quatuor Disputationibus absolvemus: Quarum prima Angelorum existentiam, naturam, & ordinem aperiet; Secunda eorum facultates, operationes, & dotes referabit; Tertia ipsis divinitus concessa supernaturalia beneficia, eorumque meritum, ac demeritum explicabit. Quarta denique perduellium Angelorum malitiam, damnationem, illorumque in Deum odium, & in homines sævitiam referet.

DISPUTATIO PRIMA.

De Angelorum Existentia, Natura, & Ordine.

ANGELORUM nomine intelligimus naturas illas intellectuales medias inter Deum, & homines: Deo quidem inferiores, sed hominibus superiores, quas Gentiles Philosophi *Intelligentias*, *Genios*, *Deos secundarios*, *Cælorum Animas*, & *Species separatas* appellarunt. Quamquàm *Angeli* nomen, si ethymon attendas, non naturæ cujuscumque, sed officii significativum sit, idem exprimens quod Latine *nuncius*, & legatur, à Græco ἄγγελος id est *nuncio*. Unde S. Augu-

stinus Psalm. 103. *Spiritus* (inquit) *Angeli sunt*; & cùm *Spiritus* sunt, non sunt *Angeli*; cum verò *mittuntur* sunt *Angeli*. *Angelus* enim officii nomen est, non naturæ. *Quærit nomen hujus naturæ?* *Spiritus* est: *Quærit officium?* *Angelus* est. Concinit sanctus Dionysius qui cap. 4. de cælesti Hierarchia, ait, cælestes illos *Spiritus Angelorum* præcipuè nomine appellari; *Propterea*, quod *primùm* eis *infit divina illustratio*; ac per eos ad nos *transportentur* ea, quæ *naturam* nostram *superant* *patefactiones*;

Hoc

Hoc autem Angelorum ministerium, expressit sanctus Paulus ad Hebræos 1. *Omnes, inquit, sunt administratorii Spiritus in ministerium missi, &c.*

Unde Olympiodorus cap. 1. in Job, ait, *Existimare possumus Angelum quempiam divina mandata exhaurientem; ac si Angelorum quisvis pia aliorum æmulatione exambiat, ne quid aliis jubeatur, sed uni sibi totum: Unde eorum quisque agillimò obsequiò mandatum in momento perficit, ut ferè absque ulla mora, iterum adsit Deo, ut ita ipse solus, si fieri posset, divina mandata exhauriat. Quare Isaias cap. 6. videt Angelos ignitos charitate Dei, & hominum, stantes ante solium Divinitatis, & simul volantes. Volant ocysimè ad exequenda mandata circa hominum curam; & unà stant ante Dei solium, ut nova imperia capeant, & sic divina mandata exhauriant. Sententiosè ergo dicuntur Angeli, Psalmo 102. facientes verbum ejus, ad audiendam vocem sermonum ejus: Sic namque æstuant charitate in Deum, sic sunt impigri ab amore in homines, sic diligenter peragunt divina humanaque negotia, ut vix citiùs audierint divina mandata, quàm impleverint.*

Cæterùm de cælestibus illis Spiritibus sic usurpatis, & nominatis, tria in sequentibus Articulis veniunt discutenda: quorum *Primus* Angelorum existentiam, & rationes, quibus ipsa firmetur, ac probetur aperiet: *Secundus* illorum naturam explicabit: *Tertius* denique eorum numerum, & ordinem explanabit.

ARTICULUS PRIMUS.

De Angelorum existentia.

MIRUM est, inter Judæos, hoc est, in electo illo genere, Deique populo charissimo, tot Prophetarum oraculis instructo, repertos fuisse ali-

quos, qui tanto minùs, quàm externi, ac Gentiles divinis, ac cælestibus in rebus saperent, negantes ullum esse spiritum, ac substantiam materiæ expertem, uti de Sadducæis refert sanctus Lucas Act. 23. *Qui neque resurrectionem fore credunt, neque Angelum esse, neque Spiritum;* cùm tamen hanc ipsam veritatem compertissimam habuerint veteres Philosophi, eamque notitiam assecutus fuerit Aristoteles ipsa ratiocinationis vi; nam *ostendit philosophorum librò, & duodecimò Metaphysicorum, id ipsum argumentando colligit, maxime autem ex orbium Cælestium, agitatione: quorum conversionibus ad perpetuitatem incitandis, ac gubernandis præesse docuit absolutas à corporum concrectione substantias, quas seperatas appellat. Sed longè stupendum magis, etiam irradiante Evangelii lumine, non solum plurimos extitisse olim Hæreticos, ut legere est in Hæreticorum appendice præfixa primo Volumini nostræ Theologiæ: imò etiam nunc temporis extare plurimos hujusmodi Tenebriones, qui præter corpora nullam substantiam materiæ expertem existere asseverant. Quocirca operæ pretium est in præsentì Articulo Angelorum existentiam omnibus, quibus fieri poterit, tum fidei, tum ratiocinationis naturalis momentis suadere, quatenus illa nemini amplius indubium veniat: Deinde aperire à quo, quando, & ubi creati fuerint.*

QUÆSTIO PRIMA.

An reverà constet Angelos existere?

Notandum 1. Quòd cùm Angeli nomen secundum ethymon, non naturæ, sed officii vocabulum sit, idcirco triplicem habet attributionem, & significationem. *Primo* namque convenit iis omnibus, qui à Deo deputantur ad aliquod munus implendum; nam, inquit

Inquit Tertullianus lib. adversus Judæos cap. 9. *Deus eos vocare consuevit Angelos, quos virtutibus Ministros prefecit*; Quà ratione Sacerdotes Angeli vocantur Malach. 2. *Labia Sacerdotum custodiunt scientiam, quoniam Angelus Domini exercituum est*. Sic pariter S. Joannes Baptista Matth. 21. dictus est à Christo Domino *Angelus Domini*; juxta illud Malach. 2. vaticinium: *Ecce ego mitto Angelum meum, &c.* Quinimò ipsemet Christus Dominus Isaia 9. juxta versionem 70. Interpretum *magnum consilium Angelus appellatur*; Et Malach. 3. *Angelus Testamenti*: at officii, non naturæ vocabulū, inquit Tertullianus lib. de carne Christi cap. 14. Pari ratione qui à Dæmonum principibus aguntur ut hominum salutem obstant, eorum Angeli dicuntur. Sic Matth. 25. *Qui paratus est Diabolo, & Angelis ejus*.

Secundò hujus nominis strictior usurpatio solam designat eam substantiam intellectualem, spiritualem, completam, nullum cum terrena, ac materiali concrectione commercium habentem, cujuscumque status sit, ordinis: quā ratione *Angeli* vocabulum non solum beatis mentibus, sed etiam perditissimis Dæmonibus convenit.

Tertiò tandem hoc nomen solito usurpant Theologi ad significandas illas spirituales Intelligentias, quæ tertium ordinem in ultima Hierarchia implent, & à Deo ad hominum custodiam deputantur. Hic autem tantum nobis sermo est de Angelis juxta utramque, posterioriorem usurpationem dictis.

Notandum 1. Quodd cum duplex sit demonstrationis genus: Alia nempe quam dicunt à priori, quā videlicet effectus per causam innotescit; Altera quam à posteriori subnominant, quā nimirum causa per effectum apparet: inde queritur an alterutrā, vel earum utraq̃ue Angelorum existentia suaderi queat. Certum est autem illam non

posse demonstrari à priori: Siquidem illa demonstratio colligit existentiam, effectus ab existentia causæ illius productivæ, propter strictam, eamque necessariam inter utrūque habitudinem: At nulla potest assignari, nec excogitari causa, quā necessariò Angeli dicuntur existere: Illa enim esset, vel intrinseca, vel extrinseca: Nulla autem eis esse potest intrinseca necessariò existendi ratio; quippe solus Deus ex se, & in se habet necessitatem essendi, cætera verò ab eo entia omnino contingentia sunt, possuntque esse, vel non esse. Nulla pariter assignari potest hujus necessariæ productionis causa extrinseca; cum Deus omnium entium extra se sit liberrimus Opifex, possitque pro nutu, & arbitrio res producere, vel æternam deferere improductas: Ideoque sola superest libranda questio de demonstratione petenda ab Angelorum effectibus si qui sint ab illis editi.

Notandum 3. Tres potissimum assignari posse effectus ex quibus colligat Angelorum existentia: videlicet motum Cælorum, quos ab Intelligentiis perpetuò agitari docuit Aristoteles lib. 1. de Cælo cap. 9. Item stupenda illa opera, quæ à Magis fieri conspiciuntur; Denique miranda illa, quæ ab Arreptitiis, & Energumenis hominibus eorum vires excedentia fieri conspiciunt. Certum est autem regulatum Cælorum motum leve esse argumentum ad demonstrandam Angelorum existentiam; tum quodd eos à propria forma regulatè moveri plures Philosophi non abs re contendunt: tum quodd longè plures sunt Intelligentiæ, quàm Cæli; adeoque eorum existentia à Cælorum motu, & numero congruè nequit inferri: tum denique quodd Deus ipse ordinatum Cælis motum, sicut, & terræ firmam stabilitatem per se indere potest.

Restat ergo determinandum, an ex duplici altero capite ita sufficienti momento evinci possit Angelos existere,

ut huic veritati refragari nequeat rationis compos. Duo igitur hac in Questione veniunt determinanda. *Primum*, an fide constet Angelos existere. *Secundum*, an idipsum ratione demonstrativa, aut saltem valde probabili etiam suaderi queat.

CONCLUSIO PRIMA,

Fide constat existere naturas spirituales homine superiores, ac præstantiores, quas ANGELOS dicimus. Idque firmatur innumeris Scripturæ textibus, tum in Veteri, quum in novo Testamento. *Primo* namque Scriptura inducit illos cum Deo, & hominibus colloquentes de rebus divinis, & sensum superantibus, ut videre est Genesis 18. Judic. 2. Isa. 6. & totis fere libris Danielis, Tobie, & Apocalypsis 2. & sequentibus; adeoque indicat illos esse intellectu præditos. *Deinde* asserit illos esse Deo subiectos, à quo mittantur in ministerium; quemque velut Dominum, & Deum suum laudent, colant, adorent. Heb. 1. vers. 14. Psalm. 99. vers. 7. Daniel. 3. vers. 58. Apocal. 22. vers. 9. & alibi. *Tertio*, asserit illos esse superiores, & præstantiores hominibus, 2. Petr. 2. vers. 11. ubi de malis Angelis dicitur, *Angeli virtute, & fortitudine cum sint majores*: Et Psalm. 18. *Ministi cum paulò minus ab Angelis*, quod etiam de Christo ipso secundum naturam humanam spectato, & sic Angelis inferiore, interpretantur S. Paulus Hebr. 2. vers. 9. S. August. in Tract. de Cantico novo cap. 7. *Quarto*, quoties Scriptura homines præ cæteris ob singularem aliquam prærogativam extollit, toties eos cum Angelis velut perfectioribus comparat. Sic 2. Regum cap. 14. mulier Davidem alloquens, ait: *Tu Domine mi Rex sapiens es sicut sapientiam habet Angelus Dei*: Sic Actorum 6. *Judei viderunt faciem ejus* (Stephani) *tanquam faciem Angeli*: Sic S. Paulus ad Galatas 4. *Sicut Angelum Dei excepisti me*.

CONFIRMATUR insuper ex eo, quòd Scriptura sacra varias proprietates, & actiones tribuit Angelis, quæ non nisi in creaturam spirituales cadere possunt: Una est videre Deum, Matthæi 8. *Angeli eorum semper vident faciem Patris mei, qui in Cælis est*: Alia est benedicere, & laudare Deum, quod passim Scriptura Angelis tribuit. Sic Psalm. 148. *Laudate eum omnes Angeli ejus, laudate eum omnes Virtutes ejus*. Tertia est custodire homines. Sic Psalm. 90. & Matthæi 4. *Angelis suis Deus mandavit de te, ut custodiant te*: Ad quod etiam spectat homines dirigere, defendere, illuminare, docere, instruere, & loqui, quod Angelis utique pluries Scriptura sacra tribuit, maxime Exod. 23. *Ecce ego mittam Angelum meum, qui præcedat te, & custodiat in via, & introducat in locum, quem paravi: observa eum, & audi vocem ejus, &c.* Quarta denique Angelorum proprietas, est esse liberi arbitrii facultate donatos, quippe cum peccare possint, & fieri poena digni, uti de facto per duellibus Angelis contigit, juxta illud 2. Petri 2. *Angelis peccantibus non pepercit Deus, &c.* quæ omnia, & his similia soli Creaturæ intellectuali tribui possunt.

Adeoque Angelos existere comperitissimum est ex Scriptura sacra, necnon & omnium sanctorum Patrum calculò, ac Conciliorum oraculis, maxime Concilii Lateranensis sub Innocentio III. capite firmiter, ubi inter cætera, dicitur, quòd *Deus fit Creator omnium visibilium, & invisibilium, spiritualium, & corporalium, qui condidit utranque naturam, spirituales, & corporeas, Angelicam videlicet, & mundanam*.

Nec refert, quòd quidam reponant Concilium hæc quidem proponere, ac referre per modum doctrinæ, non verò tanquam de fide statuere, & definire. Id inquam, non obstat, tum quia cætera, quæ in eodem capite proponit, reverà sunt de fide: quidni ergo etiam de

de fide est Angelorum existentia, & spiritualitas? Adde quòd licet id referat, & proponat per modum doctrinæ, supponit saltem hanc doctrinam ab Ecclesia esse probatam, ac determinatam, innumerisque Scripturarum, ac sanctorum Patrum oraculis confirmatam.

Dices: Si ex præfatis Scripturæ textibus suaderi posset Angelorum existentia, maximè quia significant aliquam esse Creaturam spirituales, homine superiorem, & præstantiorem: At hæc nulla est, quod probat S. Augustinus libro de Quantitate animæ c. 34. *Quemadmodum, inquit, fatendum est animam humanam non esse Deum, ita præsumendum nihil inter omnia, quæ creavit Deo esse propinquius:* Et inferius docet aliquid esse deterius anima hominis, scilicet animam bruti, aliquid par, ut Angelus, melius autem nihil: Et lib. 3. de libero arbitrio, ait, *Animas rationales superioribus Potestatibus esse officio impares, naturâ verò pares:* Et lib. 83. qq. quæst. 54. *Nihil est melius rationali anima nisi Deus:* Idemque repetit lib. 3. contra Maximinum ca. 25. ubi videtur illum arguere, quòd dixerat, *Majores esse Angelos Christo secundum formam hominis.* Ipsi subscribit S. Bernardus lib. 5. de Consideratione cap. 3. *Spiritus est Deus (inquit) sunt & Angeli, & hi super te: sed Deus naturâ, Angeli gratiâ superiores sunt:* Ergo ex præstantiori supra homines Creaturæ gradu, non rectè infertur Angelos existere.

Respondet 1. Præfatos Patres Angelorum existentiam non impugnare, sed asserere, ut ex laudatis eorum verbis aperte constat. *Secundò*, benignè intelligi possunt, vel quòd velint nihil esse propinquius Deo in ratione substantiæ spiritualis, quam anima, quippe hac ratione Angelus est par: vel quòd Angelus non competat esse superiores hominibus in visione, ac fruitione Dei; aut in aliis officiis, quæ erga homines

præstant; sed ex speciali Dei beneficio, & gratia, quod utique hominibus simili liberalitate concedere potest.

Non ergo eorum sensus est, Angelos non esse naturâ homine præstantiores; quippe hominem paulò minus ab Angelis minoratum affirmat Regius vates; *Psalms. 8.* ut supra dictum est, & malos Angelos fortitudine, ac virtute, homine esse majores testatur S. Petrus 2. cap. 2. Et Job. 48. de Satana ait, *Non est potestas super terram, quæ comparatur ei.* Sicut ergo potestate, ita etiam naturæ perfectione homines excellit. Quod ipsum docet S. Augustinus Tractatu 110. ubi ex peccato irremissibili Angelorum, naturæ eorum excellentiam supra homines colligit, *Quòd tantò (inquit) damnabilior iudicata sit culpa, quanto erat natura sublimior:* Unde lib. 11. de Civit. cap. 5. ait, *Angelica natura omnia cetera, quæ Deus condidit naturæ dignitate præcedit;* Adeoque priores ipsius textus in objectionem positi benignè debent explicari, ne sibi contradicere videatur S. Augustinus. Adde quòd libro 1. Retractationum, cap. 26. recognoscens verba præfate quæstionis 54 illa videtur emendare; *Ubi dixi (inquit) quòd omni anima melius, id Deum dicimus; magis dici debuit omni creato spiritu melius.*

Instabis: In omni rerum genere, quod habet rationem finis, longè præstantius est eo, quod similem rationem non obtinet: sed in genere creaturarum homo habet rationem finis, non ita Angelus; siquidem omnia propter homines; imò etiam ipsi Angeli, quippe cùm omnes sint administratorii Spiritus in ministerium missi propter eos, qui capiunt hereditatem salutis: Ergo etiam secundum naturalia homo est præstantior Angelo.

Respondet Seraphicus Doctor in 2. Disp. 1. quæst. 2. aliquid habere rationem finis dupliciter: scilicet aut ad *supplendam indigentiam*, sicut domus propter ho-

hominem, aut ad suscipiendam ejus influentiam; sic homo propter Deum: Quod autem ultimo modo habet rationem finis, nobi lius est, non verò quod primo modo; quia enim homo omnibus indiget, Angelus nullo, nisi Deo; ideo omnia propter hominem, non autem propter Angelum, in cuius rei signum Angelus conditus est in principio, homo verò die sexto.

Unde Angelus dici potest propter hominem, & homo propter Angelum: Nam, inquit ibidem Seraphicus Doctor, homo habet habilitatem ad labendum frequenter, & possibilitatem ad resurgendum: Angelus verò stans, perpetuitatem in stando, & cadens, impossibilitatem in resurgendo. Ideo Angelus stans, sustentat hominem, sive infirmitatem humanam: & homo resurgens, reparat ruinam Anglicam. Ideo quodammodo Angelus propter hominem, & homo quodammodo propter Angelum; adeoque pares sunt secundum ordinationem ad finem; quia uterque ordinatur ad æternam felicitatem. Sunt verò impares secundum naturæ dignitatem, quippe cùm Angelus sit omnimodè spiritualis, homo verò partim spiritualis, partim corporeus.

CONCLUSIO SECUNDA.

Sufficienter colligitur Angelorum existentia ab experientia Magorum, & Energumenum petita: multa namque conspiciuntur in dies fieri, tum à Magis, tum ab Energumenis, & Arreptitiis eorum vires prorsus excedentia; adeoque refundenda in causam aliquam superiorem, quæ ipsos ad talia patranda moveat: Sed hæc alia esse, nequit, quàm Angelus. Probatur. Si quæ præter Angelum illorum operum causa motrix posset assignari, maximè vel Deus, vel ipsi homines, vel animæ separatae, vel denique Creaturæ aliquæ irrationales, & hominibus inferiores: sed neutrum eorum potest asseri.

NON QUIDEM Deus, quippe ab ipsis
Tom. IV.

Magis nefaria pleraque, & turpissima, à Deo prohibita, Deoque indignissima in perniciem hominum, & odium, atque injuriam ipsius Dei patrantur. *Insuper* ad invocationem divini Numinis frequenter in fumos abeunt Magorum conatus, eorumque maleficia dissolvuntur. Similiter Arreptitil, & Energumeni medicamentis interdum, ac musicà, saltem per aliquod intervallum, sanantur, ut legimus 1. Regum c. 16. quoddã *quandocumque Spiritus Domini malus arripiebat Saul, David tollebat citharam, & percutiebat manu sua, & resocillabatur Saul, & levius habebat; recedebat enim ab eo spiritus malus*: Quod utique signum est Dæmonem Arreptitios non torquere; nisi pravos eorum humores concitando, quibus nisi uteretur, nec eos vexare posset, nec tam stupenda in eis operari: Sed si Deus illorum omnium esset Artifex; non egeret humoribus corporum; ac proinde nec medicinà, nec musicà, aut altero corporeo remedio ejus effectum posset præpediri.

Adde quodd illæ substantiæ, quibus Magi in suis perficiendis maleficiis utuntur, plerumque sordidissimæ sunt, mendacissimæ, ac improbiissimæ: quippe aliquando bufonibus, & aliis hujusmodi rebus turpissimis, & horrendis suis maleficia absolvunt, quibus ad summa scelera sollicitant, ad Dei contemptum, & odium, ad blasphemias, ad veneficia, & alia similia, quæ in Deum sanctissimum refundere grande crimen esset.

NON ETIAM HÆC REJICI POSSUNT IN HOMINES IPSOS: Quippe cùm pleraque illorum operum longè humanas vires superent, putà ad præsentiam faxorum, & statuarum responsa de rebus petitis proferre, in speculis, & aqua res absentes repræsentare, revelare occultissimis, enuntiare, quæ sunt in locis remotissimis, momento tempestates excitare; domo egredi januis clausis, & fores sine ullo contactu suppositici emingere; lo-

qui linguis peregrinis nullo usu, nullave disciplinâ comparatis, & alia id genus exequi; quæ fusissimè refert Delrio in *disquisitione magica*, quæque nullatenus refundi possunt in homines ipsos; adeoque rejici debent in Dæmones.

Nam, inquit Lactantius lib. 2. de origine erroris cap. 15. *Magorum ars omnis, ac potentia bonum Dæmonum aspirationibus consistit, a quibus invocati, visus hominum præstigiis obsecantibus fallunt, ut non videant ea, quæ sunt, & videre se putent illa, quæ non sunt. Hi, ut dico, spiritibus contaminati, ac perditæ per omnem terram vagantur, & solatium perditionis suæ percipiendi hominibus operantur. Itaque omnia insidiis, fraudibus, erroribus complent. Adhærent enim singulis hominibus, & omnes ostiatim domos occupant; ac sic GENIORUM nomen assumunt. Sic enim Latino sermone dæmones interpretantur. Hos in suis penetralibus consecrant, his quotidie merum profundunt, & secentes dæmones venerantur quasi terrestres Deos, & quasi depulsores malorum, quæ ipsi faciunt, & irrogant. Qui quoniam sunt spiritus tenues, & irreprehensibiles, insinuant se corporibus hominum, & occultè in visceribus operati vitiant, morbos excitant, somniis animos terrent, mentes furoribus quatunt; ut homines his malis cogant ad eorum auxilia recurrere.*

NEQUE ETIAM HEC OMNIA OPERA TRIBUI POSSUNT CREATURIS IRRATIONALIBUS: Quia, quæ diximus, sine rationis usu non fiunt; nam, v.g. quodd Energumenus idiota loquatur de repente, & expeditè idiomate alieno, aut de rebus procul positis, præteritis etiam abditissimis, manifestando omnes circumstantias, nec non de scientiis, & artibus quibuscvis, non potest fieri sine substantia intellectiva, quæ per eos homines loquatur, distincta ab anima ipsorum: nam anima ipsorum per se sola, aut per quamlibet humorum alterationem physicam, imò per applicationem

cujuscvis causæ physice non intelligentis nequit assequi talem notitiam, quæ tanto studio humano indiget. Adde, quodd quæ à Magis fieri solent, parvis quibusdam rebus admotis, verbis quoque prolatis, vim omnem verborum, & eorumque ejuscvis substantiæ manifestè superant.

Insuper: Magorum opera fiunt ad signa quædam, & per pacta, & fœdera juxta eorum voluntatem, qui ipsis utuntur: ac signa non movent, nisi potentias cognoscentes, quibus aliquid significant; pacta quoque, & fœdera spectant ad causas intelligentes. Nam quæ intellectu, & ratione carent, nec pacta norunt, nec quando sit operandum ex pacto. Adde quodd spiritus illi Magici eligunt ad Magorum arbitrium in quid agent. Ut quando in quempiam remotissimum à Magis designatum, morbum, aut soporem immitunt, vel ejus vultum representant in speculo, relictis intermediis, qui æquè, imò magis deberent sic affici, si per causas naturales, & necessarias sine electione, voluntaria id fieret. Etenim causæ naturales operantur magis in corpora sibi magis vicina, & subjecta, atque eodem modò afficiunt, quæ sunt ejusdem effectus capæia, neque eligere possunt, ut è pluribus æquè subjectis, & capæiebus, hoc potius, quàm illud representent, aut morbo, vel sopore afficiant. Ergo stupenda hæc à Magis, vel Energumenis præstita opera in Creaturas irracionales, quibus utitur, refundi nequeunt.

NEC ETIAM POSSUNT AB ANIMA SEPARATA FIERI: Tum quia non videtur habere plus virtutis naturalis ad movendum, aut immutandum aliquid corpus, dum à corpore solvitur, quàm cum illud informat; Naturalis enim virtus agendi sequitur conditionem naturalem agentis: at naturalis conditio animæ rationalis est, quodd sit forma corporis, ad cujus reunionem etiam ab ea sejuncta habet appetitum, ut pars ad com-

ompartem, adeoque hujus virtus non videtur major extra corpus, quàm in corpore, alioquin ei longè melius esset ab omni corpore separari, quàm illud informare, sicque unionem cum illo non optaret; quippe quæ sibi foret contranaturalis, eam videlicet destituens eximia virtute sibi debita. *Tum quia* licet animam separatam neque omni vi motiva localiter sui-ipsius, & aliorum privatam existimem, Deo nimis supplente id quod deest ex parte contactus, & organi; non tamen putarem eam tanta donari intelligendi, & movendi virtute, ut nosse posset actus internos, saltem imaginationis, quos nullo dato externo indicio Magi, & Energumeni produunt; nec-non, & movere immania pondera, quæ vix centum homines sublevare valerent; & domos ingentes urbesque integras, ac terram ipsam concutere; ut plerumque faciunt ii Spiritus dum è corporibus obsessis virtute precum, ac exorcismorum Ecclesiæ recedere coguntur. *Tum denique* quia Spiritus illi quoties ab Exorcistis premuntur, ut suum prodant nomen, semper se dæmones confitentur: Quis ergo illos animas è corpore solutas existimabit?

Dices 1. Quod etsi Aristoteles præter Intelligentias orbium cælestium motrices, alias quoque esse doceat; Dæmones tamen, seu malignos Angelos non admittit: Imo Sectione 3. problem. q. 1. sermonem faciens de iis qui divino spiraculo instigari dicuntur, aut spiritu lymphatico infervescunt; asserit ex naturali intemperie id accidere; ita quod gravi melancholia laborantes, id totum exequi valeant, quod cernimus ab Energumenis præstari.

Respondet: Ipsum longè à vero exorbitare, nam præter quàm quòd Plato in Sympol. Trismegistus in Pimandro, & Alii veteres philosophiæ Principes, Dæmones esse confitentur; certum est hominem infirmum, & imbecillum

quàcumque alteratione per melancholiam, aut alios humores facta, non posse peritè loqui peregrino idiomate sibi antea ignoto, nec quæ procul aguntur certò referre, nec alia exequi, quæ Energumeni solitò præstant; proindeque necessarium est, Energumenum, agitari aliquo Spiritu, qui aliunde ista noverit, & exequi possit.

Instabis: Ille qui Energumenus dicitur, incidere potuit in eam imaginatitinis temperiem, quâ linguarum peregrinarum institutores affecti tunc erant, cum eas in usum vocarent, & instituerent; adeoque nullo exteriori agitante Spiritu, ipsemet idiomate peregrino, & prius ignoto loqui poterit. *Insuper.* Ea potest esse interdum humoris biliosi defæcatio, & igneus vigor, ut organorum ruditatem, & tarditatem solvens, jam linquat liberum animum, & velut ab organis solutum, quò fiet ut veritatem quamlibet sensibus imperviam, & sibi prius ignotam detegat, aperiatque, ut nonnumquam contingit æstuantis febre laborantibus, qui dum animi evagationem patiuntur, mira interdum proferunt, & ignoto sibi prius idiomate sensa exprimunt. *Denique,* Contingit haud rarò Energumenos ad certas Lunæ periodos acrius torqueri, quod sanè indicium est eos vitiato tantum humore laborare: adeoque ex eis leve, & prope nullum est argumentum ad suadendam Angelorum existentiam.

Nego consequentiam, & ad primum instantiæ membrum dico, illam qualemcumque humoris temperiem nullum habere commercium cum cujuscumque vocis prolatione, & significatione; siquidem nos eas voces formamus prout volumus, & per eas significati notitiam accipimus, non obstante varia humoris nostri temperie; adeoque illa Energumeni idiomatum peregrinorum locutio non provenit ex ejus humorum affectione. Adde quòd cujusque idiomatis institutiones plures fue-

rint, idque diversis temporibus nunc hæc, nunc illa vocabula ad hoc, aut illud significandum usurpando; & consequenter variam habuerunt humorum temperiem, quam nullus hominum referre potest.

Ad secundam instantiæ partem, Dico tam strictam, & tenacem esse animæ rationalis cum sensuum organis colligationem, ut nisi vel prorsus à corpore solvatur, vel illam Deus per extasim divinitus edoceat, quidquam absque sensuum beneficio valeat percipere, ut continuata omnium hominum sæculò quòvis experientia testatur: Quidquid enim in contrarium de febricitantibus interdum decantatur à Medicis, figmentum prorsus, ac anilem fabulam ducet omnis, qui infirmos frequentare consuevit.

Ad tertiam denique instantiæ partem, Repono mitum non debere videri, quòd ad diversas Lunæ perodos Energumeni variè afficiantur; cum enim ipsis insidens Spiritus nequam eos torqueat per acerbam humorum affectionem, faciliùs in eos rabiem implet cum humores nimium, aut redundant, aut deficiunt. Adde quòd hæc sit assueta Dæmonum astutia, ut sub aliis creaturis lateant, quatenus nempe non sibi, sed vel externæ alteri causæ morbi acerbitas tribuatur. Quod eleganter indicat S. Chrysologus homil. 52. ubi sermonem faciens de illo Lunatico, quem Christus Dominus sanavit, ait; *Dæmon quod suæ artis erat, voluit tunc videri, aptans Lunæ curfibus hominis passionem: vexabat corpus lunaribus incrementis, ut esse Lunæ crederetur, quod erat diabolici criminis, & furoris. Sic homines illust, circumvenit ignaros; infamavit apud infides Creaturam, quæ lumini tantum condita, ledere nescit homines, quos continua magis juvare cogitur servitute.* Ipsi præluserat Tertullianus Apologet. 22. dicens; *Dæmones sumen-*

lantur Divinitatem, dum furantur divinationem.

QUÆSTIO SECUNDA.

Quo tempore, & loco creati fuerint Angeli?

NOTANDUM 1. Fide constare Angelos à Deo fuisse productos. Scriptura namque sacra apertè tradit Deum unicum esse, à quo cætera omnia sint condita: Sic Joannis 1. *Omnia per ipsum facta sunt, & sine ipso factum est nihil.* Et Romanorum 11. *Ex ipso, & per ipsum, & in ipso sunt omnia.* Quippe ut legitur Esther 13. *Tu fecisti Cælum, & Terram, & quidquid Cæli ambitu continetur; Dominus universorum tu es.* Quod speciatim testatur Apostolus de Angelis, quos inter Dei opera recenset ad Colossenses 1. *In ipso condita sunt universa, sive Throni sive Dominationes, &c.* Hinc Regius Vates postquam Psalm. 145. dixisset: *Laudate eum omnes Angeli ejus*, subdit, *Quoniam ipse dixit, & facta sunt, ipse mandavit, & creata sunt.* Mitto Concilia generalia, & fidei Symbola quibus asseritur Deum esse factorem Cæli, & Terræ, visibilium, & invisibilium. Hanc namque veritatem nedum naturalis ratio demonstrat, ut significavimus in primo Tom. Tract. 1. Disp. 1. Sect. 1. ubi probatum est necessariò admittendum esse aliquod ens à se, à quo sunt cætera omnia, sed etiam ipsamet experientia suadet, quippe constat Angelos Deo subijci, eique famulari; bonos quidem sponte, malos autem invitos, ut apparet in Exorcismis Energumenorum: At si Angeli essent à se, non ita Deo subijcerentur; ens enim à se nullatenus ab alio pendet, nec ipsi potest subijci.

Notandum 2. Angelos triplicem ob finem à Deo fuisse conditos. *Primo* quidem propter divinarum laudum concentum, unde Plato eos Syrenes appellat,

Iat, S. Bernardus *Cæli cantores*; Gregorius, *divinarum laudum præcones*; Athanasius, *Hymnum indefinentem, & laudem irrequiescentem magnificentiae Dei*: Hinc ipsemet Deus Jobum alloquens, ait; *Ubi eras cum me laudarent astra matutina, & jubilarent omnes Filii Dei?* Secundò, Angeli creati sunt, ut mundum corporeum administrarent, Divina namque Providentia regere solet inferiora per superiora, & corporea per spiritualia administrare: Unde Angeli mundi rectores, divinæ Providentiæ administri, orbemque portare dicuntur, juxta illud Job. cap. 9. *Deus cuius iræ nemo resistit, sub quo curvantur, qui portant orbem.* Quam etiam veritatem novit Seneca, ait namque apud Lactantium libro 1. Divinarum Institutionum cap. 5. *Deus cum prima fundamenta molis pulcherrimæ jaceret, & hoc ordiretur, quo neque majus quidquam novit natura, nec melius, ut omnia sub Ducibus suis irent, quamvis ipse per totum se corpus intenderat, tamen ministros regni sui Deos (idest Angelos) genuit.* Tertiò, creati sunt Angeli ut hominibus opitulentur, eosque regant, ac custodiant, juxta illud ad Hebræos 1. *Omnes sunt administratorii Spiritus in ministerium missi, propter eos, qui capiunt hereditatem salutis.*

Notandum 3. Reverà Angelos, non esse de facto ab æterno creatos; non, quod ab æterno creati nequiverint: Si quidem Deus ab æterno quamlibet Creaturam maximè Angelum producere potuit, ut fusè demonstravimus in nostra Physica: Sed quia Deo ita placuit Creaturas quascumque producere post earum non existentiam, ac proinde non ab æterno. Nec etiam diu post formatum mundum fuerunt conditi. Siquidem Job 38. dicuntur laudasse Deum quando fundabat terram: Ergo jam tunc erant in lucem editi. Difficultas ergo superest examinanda, an Angeli creati fuerint ante illud momen-

tum, de quo dicitur, *In principio Deus creavit Cælum, & Terram*: Circa quam maximè duæ sunt oppositæ Authorum sententiæ. Prima quidem plurium Patrum Græcorum, qui cum Origene Tractatu 9. in Matthæum, contendunt, *Angelos esse antiquiores, non solum homine post creato, sed, & omni Creatura propter eum condita*; quam sententiam Cassianus Collatione 8. cap. 7. indubitatam apud omnes fideles affirmat: Reclamât nihilominus omnes penè Scholastici cum plurimis è sanctis Patribus tam Græcis, quàm Latinis, ut aperiet.

CONCLUSIO PRIMA.

Reverà Angeli non fuerunt creati ante mundum corporeum, sed una cum ipso. Hæc veritas videtur esse determinata in Concilio Lateranensi cap. firmiter, ubi legimus: *Unum est universorum Principium, Creator omnium visibilium, & invisibilium, spiritualium, & corporalium, qui sua omnipotenti virtute simul ab initio temporis utramque de nihilo condidit creaturam, spiritualem, & corpoream, Angelicam scilicet, & mundanam: & deinde humanam quasi communem ex spiritu, & corpore constitutam, Loquitur autem Concilium de similitudine temporis, ut patet ex illis verbis; Deus simul ab initio temporis: Nam licet alioqui particula, simul, accipi posset in sensu collectivo, non verò temporali, quasi diceret (Deus pariter seu æquè condidit utramque Creaturam;) qualiter fuit in quibusdam aliis Scripturæ locis, puta simul inficiens, & stultus peribunt; idest æquè peribunt, eodem nempe genere mortis corporeæ, licet non simul tempore, & eodem instanti: Non posse tamen illam particulam, simul, à Concilio scriptam aliter accipi, quàm de similitudine temporis, sufficienter declaratur ibidem, quia Concilium non dicit tantum, quod Deus condidit simul, sed addidit, simul ab initio temporis utramque condidit*

didit Creaturam. Infuper statim subiungit, & *deinde humanam* &c. Sed particula *deinde* nihil aliud significare potest, quàm posterioritatem temporis, quia Creatura humana condita est tantum sexto mundi die, cum primo fuerint creati Angeli simul cum Cælo, & Terra: Ergo sicut particula, *deinde*, necessariò significat posterioritatem temporis, ita & particula, *simul*, denotat ejus simultatem.

Hoc ipsum probatur etiam ex Concilio Constantinopolitano actione 11. ubi lecta fuit, & approbata epistola Sophronii, in qua Deus dicitur omnia invisibilia, & visibilia condidisse, Creaturam spiritualem; & corporalem, & omnibus temporale constituisse principium.

Hoc ipsum indicat Scriptura sacra. Genesis cap. 1. *In principio creavit Deus Cælum, & Terram*, quo loci particula, *in principio*, idem sonat, ac antequam quidquam faceret, quemadmodum sumitur Proverb. 8. cap. ubi Sapientia ita loquitur, *Dominus possedit me in initio viarum suarum, antequam quidquam faceret a principio*: Sic enim eandem particulam explicat S. August. lib. 11. de Civitate Dei cap. 6. *Deinde ex 20. cap. Exodi, Sex diebus fecit Deus Cælum, & Terram, & omnia, quæ in eis sunt*: Quæ postrema particula more loquendi sacræ Scripturæ comprehendit, & ipsos Angelos: Nam Psalm. 148. Angeli annumerantur iis, quæ sunt in Cælis.

Hoc ipsum edocent sancti Patres: Ex Græcis quidem S. Epiphanius hæres. 65. ubi ait clarè indicare Scripturam Angelos non fuisse ante Cælum, & Terram: *Cum palam, inquit, intransmutabile sit verbum hoc, quod ante Cælum, & Terram nihil erat ex creatis*. Consentit Theodoretus quæstione 3. in Genesim, etsi non satis probanda utatur ratione: scilicet quia Angelus indiget loco, in quo reciperetur: *Quia si non sit, inquit, in rerum natura, quod com-*

prehendat, quomodo erit, quod comprehendatur: Procopius item præfatione in Genesim utramque referens sententiam, hanc profert, dicitque Moysen nomine, *Cæli*, comprehendisse Angelos cum dixit, *In principio creavit Deus Cælum, & Terram*. Ubi continens pro contento ponitur.

Ipsi concinit Beda tom. 4. in Exameron, dicens Angelos in principio cum Cælo, & Terra conditos esse, & ideo Moysen de terra dixisse in principio fuisse inanem, & vacuum, quia fructibus, & habitatoribus carebat: Non dixisse autem id de Cælo; *Quia mox creatum suis incolis, hoc est, beatissimis Angelorum Spiritibus repletum est*: Unde subdit Moyses; *Perfecti sunt Cæli, & omnis ornatus eorum*. Quippe debitos incolas habebant.

Huic etiam sententiæ subscribunt plurimi è SS. Patribus Latinis cum sancto Augustino lib. 11. de Civit. cap. 6. & libro imperfecto super Genesim cap. 3. maxime S. Gregorius libro 32. Moral. cap. 9. Beda in Exameron, &c.

Potest quoque hæc veritas Theologica ratione suaderi. Primò quidem à priori, illa scilicet congruitate, quam profert S. Thomas quæst. 61. art. 3. Nempe quòd Deus hunc Universum condidit per modum opificii præstantissimi, absolutissimi: ut autem perfectum sit, ex spiritualibus, & corporalibus constare debet; igitur utramque hanc partem Universi simul producere debuit, non verò unam post alteram, ne scilicet priore longè ante alteram producta, Universum non flaret integratum; nec suis partibus constans.

Potest verò sic probari à posteriori: Dum peccaverunt Angeli, jam Cæli extabant, siquidem statim in rebellantes factum est prælium magnum in Cælo; nam Michael, & Angeli ejus pugnabant cum Dracone puta Lucifero Apocalips. 12. ipseque perduellis Lucifer cum perditissimis suis Asseclis è

Cæ-

Cælo statim post peccatum fuit deturbatus, juxta illud Lucæ 10. *Videbam Satbanam tanquam fulgur de Cælo cadentem*. Quod omnes penè sacri Interpretes de ruina, & lapsu Angelorum explicant: sed probabilius est peccasse Angelos paulò post eorum formationem; non enim fit verisimile malos diu in gratia stetisse, eò quòd credibile sit statum viæ Angelorum breviori spatio finiri, quàm hominum; cùm Angeli suapte naturà promptiores sint in operatione, & electione, quàm homines; Constat autem Adam non ita diu innocentem stetisse: Ergo multò minori temporis intervallo videtur Dæmonem in gratia perseverasse.

Confirmatur ex eo quòd Angelis peccantibus paratus sit ignis æternus, ut constat, tum ex illo Matth. 25. *Ite in ignem æternum, qui paratus est Diabolo, & Angelis ejus*; Statim ergo ac peccaverunt, reatus sui penas dederunt: Tum ex 2. Petr. 2. *Si enim Angelis peccantibus Deus non peperciit, sed rudentibus inferni in Tartarum tradidit cruciandos*; igitur jam tunc erant Tartarei loci cùm primùm Angeli peccaverunt.

Dices 1. Scriptura sacra non ita obscure insinuat Angelos jam extitisse, cùm Deus Universum condidit: Ergo cum ipso non fuerunt creati. Probatur antecedens. Primò ex cap. 38. Job, ubi Deus; eum alloquens, ait: *Vbi eras quando ponebam fundamenta terre...* cum me laudarent simul astra matutina, & jubilarent omnes Filii Dei? hoc est, Angeli. Item cap. 40. de Behemoth dicitur, *Ipse est principium viarum Domini*, id est Creaturarum: Ergo Lucifer, qui per peccatum factus est Behemoth, & Diabolus, fuit prius productus, quàm cætera creaturæ, idemque de cæteris Angelis dicendum. Denique ad Titum 1. de Incarnatione Verbi dicitur *quam promissit, qui non mentitur Deus, ante tempora secularia*: Oportuit ergo

ante mundum conditum fuerint Aliqui, quibus fieret incarnandi Verbi promissio; non Aliis certè, quàm Angelis: Ergo tunc stabant.

Nego anteced. & ad primam ejus probationem dico, Angelos astrorum creationi adesse potuisse, maxime cum Sol, & Luna, cæteraque Astra non primo die fuerint condita. Adde quòd ipsi Angeli cùm fuerint creati cum omnibus Intelligentiæ dotibus, statim ab eorum formatione Deum nosse, ac laudare potuerunt.

Ad secundum textum dico, quòd per, *Behemoth*, ad litteram intelligitur Elephas, aut animal aliud terrestre ex genere Draconum; sicut, *Leviathan*, significat aut cete maris, aut genus aliud quod piscis: Rectè autem dicitur principium viarum Dei; non quòd duratione cætera opera antecederet, sed quia virtute corporis, magnitudine, ac fortitudine cæteris belvis præstat. Si autem ista de Dæmone accipias; reponam cum Beda quæst. 9. ex variis, Luciferum primum extitisse, ordinis prælatione, non temporis quantitate.

Ad tertium contextum dico, quòd verbum illud *promissit*, non significet promissionem aliquam verbo factam, sed æternam Dei prædestinationem, ut explicat SS. Chrysostomus, & Anselmus in eum locum; Eò scilicet modò, quò loquitur 2. ad Timoth. 1. *Secundum propositum suum, & gratiam, quæ data est nobis in Christo Jesu, ante tempora secularia*; quod enim hic *propositum*, ibi *promissionem* appellat.

Dices 2. Plurimi è sanctis Patribus apertè docent Angelos reverà nedum ante mundi creationem extitisse, sed etiam Aliqui contendunt illos fuisse ab æterno conditos: Sic S. Basiliius Homilià primà Exameron; *Erat sanè, inquit, status quidam mundi generationis superior, abstractis illis à concretionem, materie potentiis mundo præstantioribus, pro decoro accommodatus, temporis etiam*

etiam conditione anterior, eternus nimirum, ac perpes. Sic S. Hieron. super Epist. ad Titum cap. 1. *Sex millia nondum nostri temporis complentur annorum, & quantâ tempora quantasque seculorum origines fuisse arbitrandum est, in quibus, Angeli, Throni, Dominationes, ceterique Ordines Deo servierunt?* Cui subscribit S. Damasc. lib. 2. de Fide, *Quidam dicunt, quod ante omnem creationem geniti sunt Angeli, ut Theologus dicit Gregorius. Primum quidem Deus excogitavit Angelicas virtutes, & celestes, & excogitatio opus ejus fuit.* Ex Latinis Patribus significat S. Clemens Papa lib. 8. Constitut. cap. 12. dicens, *Deus, qui ante omnia, Cherubim, & Seraphim fecisti, & Sacula, & Exercitus Virtutesque, & Potestates, Principatus, & Tronos, Archangelos, & Angelos: & qui fabricatus est post hæc omnia hunc mundum, qui cernitur, & omnia, quæ in eo continentur:* Ergo certum est ex eorum mente, Angelos ante mundum fuisse creatos.

Respondeo revera quidem laudatos sanctos Patres in ea fuisse opinione, quod Angeli ante res corporeas creati fuerint: Verum contraria est plurium aliorum Patrum sententia, jamque magis invaluit apud sacros omnes Doctores, videturque conformior Scripturæ sacræ, ut constet ex textibus à nobis supra laudatis.

Ad sanctum autem Basilium, qui videtur super mundanas substantias, quas *potentias* appellat, asserere ab æterno extitisse, censeam eum sic esse intelligendum, quod Angeli, in ejus opinione, creati fuerint ante Cælorum motum, quem tæpus appellamus, ante quod censet fuisse intervallum quoddam imaginarium tempore, & generatione vetustius, in quo creatos Angelos ipse putat; quodque idcirco æternum dicit, quod nullo vero tempore præcedatur.

Dices 3. Non videtur rationi consen-

taneum, credere Deum tot seculis ante creationem corporeæ creaturæ fuisse otiosum: Ergo asserere debemus Deum suam bonitatem communicasse spiritualibus creaturis, antequam corporeas creaturas produceret.

Respondet Theodoretus *Quæstione* 3. in *Genesim*, rationem illam inanem, & futilem esse, nam si alicujus momenti esset, probaret utique Angelos ab æterno productos fuisse à Deo, ne per æternam durationem Deus esset otiosus. Nam quomocumque Spiritus creasset ab initio, etiam si ante corpoream creaturam illos produxisset, sequeretur per æternam durationem ante illorum productionem Deum otiosum fuisse: Hoc autem nemo Catholicorum non existimabit absurdum.

Dices 4. Si Angeli creati fuissent cum mundo corporeo, creationis, illorum mentionem aliquam fecisset Moyses: At nullam mentionem illorum fecit, cum de creatione mundi corporei loqueretur; Signum igitur est eos non fuisse cum mundo corporeo creatos.

Respondet S. Augustinus *libro de Genesi ad litteram*, & cum eo Beda in *Exameron*; Angelorum creationem à Moyse non fuisse prætermisam, sed expressam nomine *lucis*, quam primo dierum omnium formavit Deus. Arbitrantur Aliqui revera quidem Angelos à Moyse prætermisos fuisse, idque consultò, ne videlicet Judæis ad Idololatriam pronis ansam præberet illos pro Diis colendi. Verum, hac, ratione eorum nusquam meminisse debuisset, quippe ille de Angelis sermo eandem idololatræ occasionem præbuisset. Existimare igitur verius dicendum, ideo Moysen creationis Angelorum, non meminisse, quia sui instituti ratio id non postulabat: ut enim scribit S. Hieronymus, Epistola 139. solim voluit Moyses ordinem creationis rerum corporalium describere, aut ut quidam putant, quia populus ille rudis erat;

erat; aut quod verius est, quia solum in rebus corporeis creandis fuit illa series, & varietas dierum, quæ explicatio ne indigebat: Angelos verò fuisse à Deo productos satis constat in unico temporis momento; quippe cum sint spirituales substantiæ, nullam in suo esse successionem involuentes.

CONCLUSIO SECUNDA.

Probabilius est Angelos fuisse creatos in Cælo Sydereo, quod empyreo proximum est.

Probatur 1. auctoritate S. Hieronymi lib. 6. in Isai. cap. 14. ubi expendens illa verba, *In Cælum ascendam*, quæ de Angelorum lapsu posse intelligi prius dixerat, interrogansque, *Si adhuc in Cælo positus, quomodo dicit, Ascendam in Cælum?* respondet, *Sed quia legimus COELUM COELI DOMINO, cum esset in Cælo, id est, in Firmamento, in Cælum ubi solum Domini est, supiebat ascendere.*

Suadetur pariter ex eo quòd hac ratione facile intelligi possunt ad litteram omnes illi Scripturæ sacræ textus, quibus constat Luciferum cum Angelis cecidisse de Cælo, & appetuisse ascendere in Cælum. Sic etiam apperet Angelos habuisse locum suæ dignitati naturali correspondentem, & postmodum obtinuisse condignum pro suis meritis, ita quòd fideles, & in Deum observantes evecti fuerint in Cælum empyreum, Perduelles verò in Tartarum detrusi.

Dices. Lucifer dicitur Ezech. 28. in delictis Paradisi fuisse: at Cælum quod est Paradisus, non est Sydereum, sed empyreum: Ergo non in illo, sed in hoc creati fuerunt, & steterunt Angeli. Deinde Angeli creati debuerunt in loco omnium nobilissimo, & supremo; locus enim semper dignitati locati respondet, ut patet in ipsis rebus corporeis, quæ quantò nobiliores sunt, tantò superiorem locum obtinent: Non est autem locus nobilior, & sublimior empy-

Tom. IV.

reo: Ergo Angeli in ipso debuerunt creari. Denique; cum Angeli sint substantiæ incorruptibiles, & consistentes, formari debuerunt in loco consistente, & immobili: at tale non est Cælum Sydereum, sed empyreum: Ergo in hoc, non in illo formari debuerunt Angeli.

Respondeo ad primum, Paradisi nomine hic non significari locum illum amenissimum; quem occupant beatae mentes; quique sedes Beatorum vulgò nominatur; in eo namque Diabolum aliquando stetit nullus Theologorum admittet: sed intelliguntur illa celestium charismatum dona, quibus Lucifer cum aliis Angelis illustratus, & ditatus fuerat, in illo nempe Cælo Sydereo, propterea Paradisi nomine insignito quòd fuerit non solum astris micantibus, sed etiam Angelis illustratus.

Ad secundum, dico falsum esse, locum superiorem rei nobiliori convenienter assignandum, homo namque in rebus corporeis primatum tenet; attamen inferiorem locum incolit.

Ad tertium denique respondeo, Angelum non necessariò moveri ad motum Cæli, cum locum corporeum non occupet, nec ipsi adhareat: adeoque immoti stare potuerunt in mobili. Adde quòd nullum appareat inconveniens, quòd Angeli cum Cælo Sydereo moti fuerint; siquidem ubique Deum habebant presentissimum.

ARTICULUS SECUNDUS.

De Natura, & Substantia Angelica.

ET SI Angeli sunt quasi divini silentii Interpretes, & tanquam perspicua, ac micantia Deitatis lumina, quæ eum, qui in abditis latet, indicant, inquit S. Dionysius lib. de Divinis Nomin. cap. 4. nihilominus tam longè nostros mortales obtutus fugit eorum substantia, ut nisi suorum Interpretum fieret ipsemet Deus interpres, nobisque per

C

Sci-

Scripturarum, Concillorum, & SS. Patrum oracula illorum naturam, ac præstantiam aperiret, hæc certe nos omnino lateret. Inde mirum nemini videri debet, si tam pugnantis, tamque aliena à veritate, quæ modò nobis affulget, dixerint, & scripserint nonnulli Philosophiæ, ac Theologiæ Proceres, dum Aliqui volunt eos materia, ac spiritu concretos; è contra contendunt. Alii esse corporis cuiuslibet expertes; Nonnulli ipsos, nisi Deus singulari beneficio servaret, mortalitati, ac defectioni obnoxios putant, dum Cæteri naturam immortales, & indefectibiles prædicant. Imò etiam non desunt, qui eos ab anima rationali indistinctos censeant, dum aliqui nullam inter eas substantias concordiam affirmant. Quid autem in tam multiplici tamque diversa Authorum sententia verius dicendum sit; ut appareat, tria maxime hoc in articulo sunt discutienda. *Primum*, an reverà Angeli sint omnino spirituales, & incorporei: *Secundum*, an incorruptionem ex natura sua exigant: *Tertium*, an & qualiter ab anima rationali distinguantur.

QUÆSTIO PRIMA.

An Angeli sint omnino incorporei, & prorsus immateriales?

Notandum 1. nomen *Spiritus* omnium pene equivocorum esse, maximum, & variè tum à Philosophis, quàm à Theologis usurpari. *Primo* quidem pro re tenuissima, & subtilissima, sive illa sit accidens, sive substantia: sic rerum imagines ab objectis ad facultates emissæ, vocatur species intentionales; sic pariter tenuissimæ, ac puriores sanguinis partes, per quas vegetandi, sentiendique vis manat in reliquis, dicuntur spiritus, vel animales, quatenus à cerebro ad motus, ac sensus officia per nervos effunduntur, aut vitales,

quando per arterias à corde propagati insitum calorem recreant, quo animantis vita continetur. *Secundò*, accipitur pro vento, aere, exhalatione, &c. hinc *spirare, respirare*, &c. idem est quod aerem trahere, & ventus nimio impetu irruens, *spiritus procellarum* vocatur. *Tertio*, pro anima, sive rationali, sive sensitiva: Sic Eccles. 3. *Quis novit spiritus filiorum Adam ascendat sursum; & si spiritus iumentorum descendat deorsum*. Quarto, pro substantia, incorporea, qualiter opponitur corpori crasso, & carne, ac ossibus compacto. Sic Christus Dominus Lucæ 24. veritatem suæ resurrectionis coram Discipulis astruens, dicit: *Palpate, & videte quoniam Spiritus carnem, & ossa non habet: Quia ratione antiquissimi quique Theologi arbitrati sunt Angelos constare corporibus aereis, seu ita subtilibus, ut nec tangi, nec ullo sensuum, percipi possint; adeoque nihil prohibere quominus cum hoc aereo corpore Spiritus possint appellari. Quintò* denique, nomen *Spiritus* significat naturam intellectualem nullâ materiâ constantem, nulloque corpore, quamvis etiam tenuissimo, concretam.

Notandum 2. plurimum variare tum Veteres, tum Recentiores circa definitionem substantiæ omnino spiritualis. *Primo* namque non-nulli ex sanctis Patribus spirituale idem, ac increatum putant; quia ratione quidquid creatum est, corporeum esse, solumque Deum corporis expertem docuerunt. Sic S. Hilarius Canon. 5. in Matth. *Nihil est (inquit) quod non in substantia, & creatione corporeum sit, sive in Cælo, sive in terra, sive visibilium, sive invisibilium elementa formata sunt; nam & animalium species, sive obtinentium corpora, sive corporibus exulantium, corpoream tamen naturam suam substantiam sortiuntur: quia omne quod creatum est, in aliquo sit necesse est.*

Secundò, nonnulli incorporeum idem,

ac

ac illimitatum acceperunt . Sic Elias in Orat. 1. Nazianz. *Solus Deus*, inquit, circumscriptiois expert est : quia solus propriè corpore vacat ; circumscripti autem Angeli, quia nec incorporei propriè sunt , etiam si nostri respectu incorporei dicantur . Ipsi concinit Faustulus quidam, ejus liber habetur Tomo 4. *Bibliotheca sanctorum Patrum*, in quo demonstrare conatur Angelos, & animas esse materiales eo, quòd locis circumscribantur . Tertiò, nonnulli incorporeum pro incommutabili usurparunt, ut videre est apud S. Augustinum Epistola 28. ubi cum statuisset animam esse incorpoream addit : Ne verbi controversiam , vel superflue faciam , vel inotius patiar . Si corpus est omnis substantia , vel essentia , vel si quod aptius nuncupatur , id quod aliquo modo est in seipso , Corpus est anima . Item si eam solum placet incorpoream appellare naturam, que summè incommutabilis, & ubique tota est, corpus non est anima , quoniam tale aliquid ipsa non est . Porro si corpus non est, nisi quod per loci spatium aliqua longitudine, latitudine, altitudine ita sistitur, vel movetur, ut majori sui parte majorem locum occupet, & breviori brevior, minusque sit in parte, quàm in toto, non est corpus anima .

Denique non desunt ex Recentioribus ; qui putent spirituale propriè dictum, idem esse ac penetrare corpora, & penetrationem pati : vel idem ac non pendere à materia : vel idem ac esse incommutabile , & ubique totum . Verùm aberrant à conceptu spiritus , seu rei spiritualis ; quippe juxta primam definitionem, formæ materiales, substantiales, & accidentariæ, spirituales essent ; siquidem tum materiam ipsam, tum corpora, quæ efficiunt, aut efficiunt, penetrant, ac pervadunt . Juxta secundam, materia ipsa dicenda esset spiritualis, quia non pender à materia : juxta tertiam, verò Deus solus esset reipsa spiritualis .

Itaque Spirituale , vel incorporeum , melius videtur posse definiri per negationem materialis, ac crassæ entitatis, quæ corpora constant : ita quòd substantia, vel entitas spiritualis sit purior, tenuior, & subtilior, quàm quæcumque materialis creata, vel creabilis, sive sit divisibilis, sive sit indivisibilis . Juxta hanc autem vocabuli Spiritus acceptionem queritur primò, an Angeli sint omnino spirituales ; secundò, an sint naturæ simplices, aut compositæ .

Notandum 3. Ex Seraphico Doctore in 2. dist. 3. art. 1. quæst. 1. Angelum non habere essentiam omnino simplicem, per privationem cujuslibet compositionis . Certum enim est, quòd Angelus compositus est compositione multiplici : Potest enim, inquit, considerari in comparatione ad sui principium, & sic in tantum est compositus, in quantum habet ad ipsum dependentiam ; Simplicissimum enim absolutum est, & omne dependens hoc ipso cadit in aliquam compositionem, quia in illo differt quo est, & quid est . Secundò, considerari potest in comparatione ad suum effectum, & sic componitur ex substantia, & potentia . Tertiò, potest considerari per respectum ad ens in genere, & sic metaphysicè componitur ex actu, & potentia ; Logicè verò ex genere, & differentia : Quartò denique considerari potest secundum suam entitatem, & sic quantum ad esse actuale est in ipso compositio entis, & existentiz : Quantum ad esse essentiale componitur ex quo est, & quod est ; quantum ad esse individuale, seu personale in illo reperitur quod est, & quid est, seu natura, & persona . Cum ergo Angelica essentia dicitur simplex, non propterea excludit præfatas omnes compositiones ; sed tantum illam, quæ fit, vel ex natura corporali, & spirituali, vel ex partibus quantitativis, vel heterogeneis, aut tandem ex materia, & forma corporea, & elementari . An autem

admittat aliquam compositionem ex diversis naturis, vel ex materia, & forma aliqua purissima, ut docere videntur, tum Alenfis, tum S. Bonaventura, hic est resolvendum, sed prius sit.

CONCLUSIO PRIMA.

Angeli sunt omnino incorporei, & pure spirituales.

*Probat*ur 1. Ex Scriptura sacra illis omnibus Oraculis; quibus Angeli Spiritus dicuntur. Sic Psalmo 103. *Qui facit Angelos tuos Spiritus*; hoc est qui eos, quorum natura, & substantia spiritalis est, ministros tuos, & nuntios instituit, & mandatorum tuorum executores, ut explicat S. Gregorius Nazianzenus *Orat.* 34. & Damascenus *lib. 2. de Fide cap. 3.* Quod utique confirmat S. Paulus ad Hebr. 1. *Omnes sunt administratorii Spiritus in ministerium missi, &c.* Idem de bonis Angelis sapienter legitur in Evangelio, nec non, & de Dæmonibus. Sic Matth. 8. *Ejiciebat Spiritus*; Et Lucæ 10. *Spiritus subijcitur vobis*; Et cap. 11. *Assumit alios septem Spiritus nequiores se.* Sed nomen Spiritus sic usurpatum in Scriptura, propriè rem incorpoream significat; quod utique patet ex supremo, & infimo Spiritu Deo nempe, & anima rationali, quibus hoc nomen tribuitur; Deo quidem absolute, & per antonomasiam, ut Joannis 4. *Spiritus est Deus*, animæ verò quia distinguitur à corpore. Sic 1. Corinth. 4. *Tradere in jusu Satiæ in interitum carnis, ut spiritus saluus fiat in die Domini*: hoc est, ut anima salvetur. Ergo pari modo Angelis, qui inter Deum, & hominem medium tenent, idcirco dicuntur Spiritus, quia sunt incorporei.

*Probat*ur 2. Ex definitione Concilii Lateranensis cap. *firmiter* jam à nobis laudato, quo statuitur; *Unum est universorum Principium, Creatorem omnium spiritualium, & corporalium, qui sua omnipotenti virtute simul ab initio temporis utramque de nihilo condidit*

creaturam, spiritualement, & corpoream Angelicam videlicet; & mundanam, & deinde humanam, quasi communem ex spiritu, & corpore constitutam. Quibus verbis Concilium asserit, *Primò* Angelos esse creatos ex nihilo: Ergo non sunt formati ex aere, ut vult Rupertus; nec ex aliqua materia, ut aliqui conjiciunt.

Affermat insuper Angelos esse Spiritus, quemadmodum anima hominis Spiritus dicitur: Sed constat animam rationalem esse purè spiritualement, & incorpoream, ut sanctum est in altero Concilio Lateranensi sub Leone X. Ergo Angeli sunt omnino spirituales, & incorporei. Denique docet hominem, esse substantiam inter Angelicam, & corporalem creaturam, quia homo constat spiritu, & corpore: Ergo cum Angeli non sint mediū inter creaturam spiritualement, & corporalem, debent esse omnino incorporei.

Confirmari potest ex eo, quod in Concilio Generali Nicæno 2. *actione 5. ex libro Joannis Thessalonicensi*, anime rationales, & Angeli ponuntur in eodem ordine intellectualium, seu quod idem est, spiritualium substantiarum: Atqui anime rationales sunt purè spirituales, & incorporeæ, ut vidimus supra sanctum fuisse in Lateran. sub Leone X. Ergo pariter Angeli sunt purè spirituales, & incorporei. *Item* in professione fidei Synodi septimæ generalis, seu Nicæne 11. *actione 4.* sancti Angeli vocantur incorporei, quod falsum esset, si ex corpore partim, & spiritu constituerentur: *Veneramur*, inquit, *imagines sanctorum, & incorporeorum Angelorum, utpote qui tanquam homines figuram humanam jussu apparuerunt.*

*Probat*ur etiam ex sanctis Patribus. Primò namque Ignatius in Epistola ad Trallenses vocat Angelos incorporeas naturas: & S. Dionysius lib. de celesti Hierarchia cap. 1. illos Spiritus simplices, & Intelligentias nullis figuris adum-

umbratas appellat; *Ad simplices*, inquit, nullisque figuris umbratas cælestium rerum intelligentias, assimilationesque subiebamur; Et cap. 4. de divinis Nominibus Deum ait, *Incorporeales omnino, atque materiâ carentes intelliguntur*, & tanquam spiritus supra mundanum intelligunt modum. Et cap. 6. affirmat Deum tribuere super cælestibus vitis, idest Angelis, immortalitatem, immaterialem, & divinæ similem, hominibus verò conmixtam. Nec aliter sentit de Dæmonibus, licet cap. illo 4. tribuat illis furorem, concupiscentiam, imaginationem protervam: Per hæc enim significare voluit pravam Dæmonum affectionem, ut patet, quia ibidem asserit mali originem non ex corpore esse desumendam; quandoquidem Dæmones summâ sint malitiâ inquinati, nec tamen corpore consent.

Ipsi subscribunt plures alii sancti Patres. Ex Græcis quidem Gregorius Nyssenus Epistola ad Eustachium, quæ est inter Epistolas Basilii octogesima, ubi ait: *Natura hominis ex anima, & corpore est complexa; Angelica verò incorpoream naturam sortita est*. Et Oratione 4. in Dominicam orationem: *Omnis, inquit, natura rationalis dividitur in corpoream, & incorpoream naturam: incorporea porro, est Angelica creatura, altera nos sumus*. Subscribit Nazianz. orat. 34. ubi disertè Angelos dicit esse incorporeos, & ad Deum proximi accedentes. His planè consentit S. Chrysostomus Homilia 22. in cap. 6. Genesis, ubi probat Angelum fuisse lapsum, priusquam homo in Paradisum fuisset deportatus, quia ipsi invidit: *Aliàs, inquit, quomodo rationi consonum est Angelum incorporeum, & in tali dignitate constitutum homini invidere corpore circumamictò? Sed invidit, quia à superna gloria in extremam ignominiam dejectus est, licet esset incorporeus*. Ad stipulatur S. Damascenus lib. 2. de fide cap. 3. ubi Angelum definit *Substantiam*

intelligentem, materiæ, atque corporis expertem: Tametsi eum Deo comparati, materiales, & corporei sint habendi.

Eandem veritatem probant ex Latinis plurimi. Sic S. Leo Papa Epistola 93. scribit, *Fides vera, quæ est Catholica, omnium creaturarum sive spiritualium, sive corporalium, bonam consistit substantiam*. Subscribunt alii plurimi, qui illud Apostoli ad Hebræos, *Omnes sint administratorii Spiritus* interpretantes, Angelos omnino esse incorporeos pronunciant: sic sancti Ambrosius, & Hieronymus in illa verba.

Suaderi etiam potest ratione Theologica. Primam quidem subministrat Alensis noster. *quæst. 20. membro 1.* Deus potuit creaturam omnino incorpoream producere, convenientique fuit ad universi complementum illius Creaturæ productio: Ergo affirmandum est illam ita esse conditam: at illa creatura omnino incorporea, dicitur Angelus: Ergo reverà Deus ipsam formavit. *Patet major*, quantum ad primam partem; siquidem Deus produxit animam rationalem, incorpoream, & intellectualem, tanquam substantiam incompletam, ut esset forma corporis; quidni ergo poterit etiam producere integram, & completam substantiam intellectualem, & incorpoream, absque ulla habitudine ad corpus? *Minor* etiam constat, etenim ad Universi complementum spectat, ut in eo sint omnes rerum gradus: ergo sicut in illo est gradus substantiæ corporeæ completæ, & incompletæ; sic pariter debuit esse gradus non solum substantiæ spiritualis incompletæ, qualis est anima rationalis, sed etiam completæ, qualis est Angelus.

Deinde ubi datur unum extremum, & medium, convenient est etiam dari aliud extremum: Quemadmodum enim (inquit Guillelmus Parisiensis secunda parte de Universo) datur oximel, quod ex melle, & aceto compositum est: consequens est etiam dari acetum à melle se-



sejunctum, & mel ab aceto separatum in rerum natura inveniri: Sed in ordine entium, datur aliquid omnino materiale, ut corpora, & aliquid medio modo se habens, sicut homo, qui partim corporeus, partim spiritualis est: Ergo debet etiam admitti aliud extremum, nempe substantia purè spiritua- lis, quàm Angelum dicimus.

Denique, Si Angeli haberent aliquod corpus, maximè ex aere compactum, ut volunt illi, qui illos corporeos sentiunt: Sed Angeli corpus non potest dici aereum: Tum quia in eo organa, nervi, & alia id genus necessaria ad motum, & operationem vitæ corporeæ, requirunt commixtionem quatuor primarum qualitatum, quæ corpus aereum caret: Tum quia corpus Angeli deberet esse humano corpore præstantius: sed corpus purè aereum, non est perfectius humano corpore: imò minùs perfectum; nam omne corpus elementare imperfectius est corpore mixto: Tum denique quia corpus Anglicum deberet esse solidissimum, & omnino indissolubile, alioqui interitui esset obnoxium, nec possent Angeli tam miranda patrare opera, quæ ab ipsis fieri ratio, & experientia docet: sed corpus aereum non potest esse omnino solidum, & indissolubile, aer namque facillè cedit, & dissolvitur: Ergo Angelus nequit habere corpus aereum.

Confirmari possunt ex præfatæ rationes ex eo, quod ab uno homine Dæmonum legionem pulsam esse Christi Domini imperio Scriptura sancta referat Lucæ 8. Legio autem continet sex millia sexcentum sexaginta sex: Porro, inquit Richardus Victorinus libro 4. de Trinit. *si tot ab uno homine ejecti sunt, tot in ea ante ejjectionem fuerunt. Si Dæmones corpora habent, ubi quæso in eo fuerit? in spiritu, an in corpore? Constas autem, quia omne corpus longitudinem, latitudinem, altitudinem, locales videlicet dimensiones habet, & eo ipso si-*

ne locali capacitate subsistere non valet, qualem quidem Spiritus omnino non habet: Ergo non in spiritu: sed in corpore fuerunt. Sed quomodo, vel in qua hominis parte tot corpora habitabant? Sed quantumcumque subtilia duo ejusdem præsertim quantitatatis corpora unum, eundemque locum occupare non valent: Cujus ergo quæso exiguitatis putas Anglicum corpus esse, si credas vel solam hominis pellem corpori detrahiam tot Angelica corpora posse comprehendere.

Nec refert: quod S. Augustinus Epistola 115. de aereis, æthereisque animalibus, & corporibus disputans, idest, de Angelis, & Dæmonibus, scribat, *Nequaquam absurdum est eos, qui aereo, vel æthereo corpore aliquid in operibus agunt, quæ naturali ordine penetrant, longè majore uti facilitate ad movendum quidquid volunt, &c.* Hoc enim est verum corpus non esse, cum corpori cui libet quantitas impenetrabilis naturaliter conveniat; nec ab eo nisi per miraculum separari queat.

Dices 2. Generatio sensibilis, & corporea corpus supponit: sed Scriptura sacra corpoream generationem tribuit Angelis: Ergo in eis esse corpus supponit. Major constat: Minor probatur ex illo Genesis 6. *Videntes Filii Dei filias hominum quod essent pulchre, acceperunt sibi uxores ex omnibus, quas elegerant, &c.* Quo loci, ubi nostra versio habet particulam *Filii Dei*, septuaginta Interpretes legunt *Angeli Dei*. Unde plurimi ex sanctis Patribus, quos refert Petavius libro de Angelis cap. 2. maximè Clemens Alexandrinus, Lactantius, & Tertullianus, existimant primum peccatum Angelorum fuisse, impuram illam commixtionem cum filiabus hominum. Unde Tertullianus libro de velandis Virginibus cap. 7. expendens illud Apostoli 11. *Mulieres in Ecclesia debere velari propter Angelos*, exinde colligit multo-magis Virgines obvelari debere; *Si enim*, inquit, *pro-*

propter Angelos, scilicet quos legimus à Deo Caelo excidisse ob concupiscentiam, & seminarum, quis præsumere potest tales Angelos, maculata jam corpora, & humana libidinis reliquias desiderasse, ut non ad Virgines potius exarserint, quarum flos etiam humanam libidinem excusas? Concludit. Debet ergo adumbrari facies tam periculosa, quæ usque ad cælum scandala jaculata est. Eidem sententiæ favere videtur S. Ambrosius lib. 1. de Virginibus, ubi ait: *Castitas Angelos fecit, qui enim eam servavit, Angelus est, qui perdidit, Diabolus.*

Nego minorem, Ad cujus probationem dico in textu Hebraico, & in 70. sicut & in vulgata legi *Filios*, non *Angelos Dei*, ut constat in exemplaribus correctioribus, sicut observat S. Augustinus lib. 15. de Civit. Dei cap. 23. nomine autem *Filiorum Dei*, convenientissime intelliguntur filii Seth, & Enos, qui divino cultui præ cæteris hominibus maximè dediti. Filii Dei dicebantur à pietate, aut paterna, aut propria, qui cum filiabus hominum, hoc est, mulieribus oriundis à Caino, & ejus posteris, hominibus maximè terrenæ, ac corporeæ voluptati dediti, commixti genuerunt Gigantes. Vel nomine *Filiorum Dei* intelliguntur homines statura præceri juxta Scripturæ consuetudinem, quæ res cellissimas nomine Dei appellat phrasi Hebraica, ut *cedri Dei*, *montes Dei*. Vel denique nomine *Filiorum Dei* intelliguntur filii Magnatum, & Principum, juxta Hebræum, *Elobim*: quod non solum Deo, sed etiam Principibus, ac iudicibus Scriptura sacra tribuit *Exodi* 7. & *Psal.* 81. quorum filii commixti cum filiabus plebis, & ignobilibus progenuerunt Gigantes, hoc est homines cæteris robustiores, & ad libidinem promptiores; ut interpretantur SS. Chryl. Aug. Cyril. Alexandrinus. Huicque expositioni favet Scriptura: Siquidem subdit diluvium esse à Deo immisum propter ho-

minum peccata, maximè propter illam commixtionem Filiorum Dei cum filiabus hominum; Igitur illa commixtio non de Angelis, sed de hominibus intelligenda est.

Hinc apparet quantum à vero exorbitaverint, qui censuerunt primum Angelorum peccatum fuisse libidine, corpoream, quæ diluvium procuravit: jampridem enim Angeli lapsi fuerant; nam eorum Princeps non multò post mundi creationem primos parentes tentavit, & seduxit.

Adde quod Christus Dominus disertè pronuntiat Angelos esse generationis incapaces; dicit enim Lucæ 20. in laudem Virginitatis, *Filii hujus sæculi nubunt, & traduntur ad nuptias, illi verò qui digni habebuntur sæculo illo, & resurrectione ex mortuis, neque nubent, neque ducunt uxores: neque enim ultrà mori poterunt.*

Dices 2. Scriptura sacra affirmat Angelos sensibus humanis esse perceptibiles, & in figura humana Patriarchis, ac Prophetis apparuisse, nam tres ex eis Abraham convivio excepit, Jacob cum Angelo luctatus est per totam noctem, vidit etiam Angelos ascendentes, & descendentes, ut refertur *Genesis* 18. 19. 28. 32. & in libro *Tobie* Angelus Raphael comes fuit Tobie juniore in via: cum ipso manducabat, eumque docuit, quòd jecore piscis combusto fugarentur Dæmones, ut videre est cap. 6. & 8. Denique Dæmones cruciantur igne inferni, *Matth.* 25. vinculis captivantur, *Jude* 6. detrahuntur rudentibus in Tartarum 2. *Petri* 2. ex quibus omnibus liquet Angelos esse corporeos.

Resp; Ad priora Angelos hæc omnia præstitisse non in corpore proprio, sed in assumpto, & formato, vel ex aere, vel ex alia materia tenui, & subtili: possunt enim Angeli sibi formare corpora, & illa movere localiter, ac in eis sese præbere visibiles, & cum hominibus conversari, licet in eis corporibus ope-

ra vitæ corporeæ non exerceant verè, sed tantùm secundùm apparentiam, juxta illud Tobia 12. *Videbar vobis manducare, & bibere: sed ego cibo invisibili utor. & potu, qui ab hominibus videri non potest.* Id est, visione beatifica, quæ in Scripturis explicari solet metaphora convivii. Ut autem igne inferni crucientur physicè, aut moraliter, non est opus eos esse corporeos: nam, & animæ separatæ, licet purè spirituales, eo torquentur. Jecur verò piscis combustum Tobia 6. fugavit Dæmonem moraliter, quia nempe religiosa fumigatio erat precibus, & usui castitatis adjuncta, & insuper Christum piscem sacrum, in Passione amoris igne combustum præsignabat; ut exponunt Aug. serm. 4. de sanctis Petro, & Paulo, & Prosp. lib. de Propositionibus, parte 1. cap. 39. Sic & in exorcismis fumigationes adhibita Dæmones torquent moraliter, aut impediunt, vel quia sacra, vel quia in eorum contemptum facta, vel quia humoribus temperandis apta, ut iis minus commodè uti possint; Rudentes denique, & vincula, quibus dicuntur alligari, intelliguntur tropicè, prout exigit natura Spiritus, pro coercionem spirititali, & alligationem ad certum locum: quæ detentio per res corporeas, saltem moraliter exerceri potest.

Dices 3. In Concilio Nicæno secundo actione quinta, approbatur sententia Joann. Episcopi Thessalonicensis asserentis Angelos esse pingendos, non verò Deum ipsum. *Quippe*, inquit, *revera Deus incorporeus, & incircumscriptus est: intelligibiles verò Creaturæ non penitus incorporeæ sunt, & invisibiles, ut Deus. Ideo in loco sunt, & circumscribuntur. Si ubi autem incorporeos appellari Angelos invenias, aut Dæmones, aut animas, idcirco sic appellantur, quod ex materialium quatuor elementorum permissione non consent: nec ejusmodi sint corpora crassa, & solida, qua-*

lia nobis circumfusa sunt. Etenim, ut verè dicam, est respectu ad nos habitus, invisibiles sint, tamen à plerisque visi sunt, sensuque percepti in specie propriorum corporum: Visi, inquam, sunt ab iis, quorum Deus oculos aperuit: ac cum loco circumscripti sint, satis ostenditur; non eos omnino incorporeos esse perinde, ut est Deus. Quam utique sententiam videtur Synodus approbasse, siquidem cum eam retulisset Tharasis Concilii Præses, universa Synodus dixit; Etiam Domine.

Respondeo Concilium approbasse tantùm Conclusionem ex præfata sententia excerptam, nempe *Angelos posse depingi, quia hominibus apparuerunt aliquando in specie humana; non vero illam, quod sint corporci.* Quod utique patet, tum quia Concilium id tantum approbavit, quod ex libro Joannis Thessalonicensis excerptum, & proposuit Tharasis: at ille sapienter prætermisso errore de Angelorum corporeitate (de qua tunc non erat quæstio, sed tantum de cultu sanctarum Imaginum) proposuit tantum Angelos posse depingi: juxta sententiam Joannis Thessalonicensis, eo quod in specie humana apparuerunt: *Ostendit*, inquit, *Pater, etiam Angelos oportere pingi, quoniam circumscripti sunt, & hominum specie multis apparuerunt: Quibus auditis statim subjecit Synodus, Etiam Domine.*

Itaque acclamatio illa Concilii cadit tantum in id quod proximè dixerat Tharasis, qui in referenda Joannis sententia id unum arripuit, nempe Angelos posse pingi, quia sunt circumscripti, id est, definiri certo loco, & humanà formà apparuerunt: Consultò autem prætermisit alteram rationem à Joanne prolatam, nempe quia corporei sunt, & quia in proprio corpore apparuerunt. Tum etiam quia Concilium actione quarta refert, & approbat sententiam S. Athanasii asserentis Angelos esse incorporeos: Imò ibidem hæc fidei pro-

professio legitur, *Veneramus Imagines sanctorum, & incorporeorum Angelorum, qui tanquam homines figurâ humanâ instructi apparuerunt*. Adeoque ex hoc Concilio nihil contra assertum nostrum evincitur.

Dices 4. Ea probanda est sententia, quam communi calculo sancti Patres edocent, & propugnant: Sed omnes penè tam Græci, quàm Latini Angelos esse corporeos edocent: Ergo tales esse dicendi sunt. Probatur minor: Primò namque Methodius martyr, Angelis corpus ex aere puro, & igne assignare videtur: *Quia, inquit, puro ex aere, igneque mole est constata, & ejusdem est cum Angelis substantia, non potest habere qualitatem terræ*. Subscribit S. Basiliius libro de Spiritu sancto c. 16. ubi cum dixisset sanctos Angelos esse Spiritus aereos, aut igneos, subdit: *Ideo & in loco sunt, & sunt aspeclabiles in specie propriorum corporum, iis qui digni sunt, apparentes*. Consensit S. Ephrem Sermone de natura Dei minimè scrutanda. Approbat, & Casarius Dialogo primò in interrogatione 48. *Incorporei quidem, ait, Angeli sunt secundum nos, corpus verò secundum se; quemadmodum ventus, aut ignis, aut fumus, aut aer, sunt enim tenuia, & immaterialia corpora, à nostra crassitudine secreta*.

Addipulantur etiam ex Latinis Patribus plurimi, nam S. Ambrosius lib. 11. de Abraham cap. 8. Peripateticorum opinionem refellens, qui cælum quintam esse substantiam à quatuor elementis diversam, & inpositam asserbunt, sic universè præscribit: *Nos autem nihil materialis compositionis immune, atque alienum putamus, præter illam solam venerandæ Trinitatis substantiam, quæ verè pura, & simplex, sincera, impermixtaque naturæ est*. Censet ergo etiam Angelos elementari substantia constare.

Idem sentit S. Augustinus, pluribi Tom. IV.

docens corporeos esse Angelos. Sic secundo de Trinitate cap. 7. ait. *Illos corporis summa, cui non subduntur, sed subditum regunt in species, quas velint, accommodatas, atque aptas, actionibus suis mutare, atque vertere; secundum attributam sibi à Creatore potentiam*: Et libro 3: de Genesi ad literam docet, *Dæmones aerea esse animalia, quoniam corporum aereorum naturâ vigent, & propterea morte non dissolvuntur, quia prævalet in eis elementum, quod ad faciendum, quàm ad patiendum est aptius*. Idem habet Epistola 175. ubi respondens Nebridio interroganti quomodo Angeli possint bonas, vel malas cogitationes nobis inferere, ait: *Nequaquam est absurdum eos, qui aereo, vel æthereo corpore aliquid in corporibus agunt, quæ naturali ordine penetrant, longè majore uti facilitate ad movendum quidquid volunt*. Merito ergo S. Fulgentius in libro de Trinitate concludit: *Angeli esse, planè ex duplici substantia asserunt magis, & docti viri, id est, ex spiritu incorporeo, quo à Dei contemplatione nunquam recedunt, & ex corpore, per quod ex tempore hominibus apparent*. Corpus verò æthereum, id est igneum eos dicunt habere Angeli verò malos, id est Dæmones corpus aereum:

Respondeo, Reverà quidem plures è Sanctis Patribus, maximè Græcis, sensisse Angelos habere corpus, vel aereum, vel æthereum. Verùm reclamant plurimi, ut supra diximus numero 8. Inde neganda est minor: Siquidem nusquam fuit hac in re communis, & concors Ecclesiæ doctrina, neque illi, qui Angelos corporeos sentiunt, id vel ex Scriptura, vel majorem traditione confirmant, ut fatetur ipsemet Origenes libro secundo de principiis c. 8. ubi cum scripisset; *Non videri absurdum de sanctis Angelis, cæterisque cælestibus virtutibus, vel dicere, vel sentire illos animas habere*: subdit; *tamen id ex nullius autoritate Scripturæ constat*.

D.

Ad-

Addo plurimos ex his variare, & accipites hac in re definienda videri: Primò namque Origenes Ipſe lib.6. eòtra Celſum, Angelos corpore carere dicit: *Nor, inquit, corpoream ſubſtantiam putamus igne non conſiſſagrarè, neque ignem reſolvi hominis animam, vel Angelum.* Similiter S.Baſilius lib.4.contra Eunomium, *Angelorum naturam corpore carentem, & ratione præditam affirmat.* Quantum verò ad S. Auguſtinum, conſtat eum hac in re nihil certò determinafſe, ut ex plurimis ejus ſcriptis liquet, maxime verò in Enchiridio cap.58. ubi ait, ſe ignorare an ad Principatus, & Poteflates pertineant Sol, & Luna, & cuncta ſydera tanquam eorum corpora. Imò lib. 1. Retractationum cap.11. & lib.2.cap.14.revocat quod alibi ſcripſerat, nempe Angelos eſſe animas, atque dicendos non animas, ſed *ſpiritus*, quibus fatetur ipſos corpore non ſupervestiri, cùm animæ rationem non habeant.

Dices 5. cum Cajetano, & nonnullis Recentioribus, Angelos corporeos eſſe affirmantibus, quòd omnes gradus viventium concedendi ſunt, utpote neceſſarii ad perfectionem Univerſi: Ergo ſicut dantur vegetantia ſine ſenſu, & ſentientia ſine motu progreſſivo: ſic dari debet intelligentia ſine ſenſu, cum ſolo motu progreſſivo, quales erunt Angeli præditi corporibus æthereis, vel æreis: Ergo tales ſunt concedendi.

Nego conſequentiam: Licet enim ad Univerſi perfectionem requiri videatur ut in eo ſint omnes gradus eſſendi poſſibiles, ſcilicet eſſe, vivere, & intelligere; non tamen neceſſum eſt, ut omnes modi, quibus haberi poſſunt tales gradus, de facto exiſtant. Quare licet non implicaret exiſtere formam intellectualem, quæ informaret corpus non ſentiens quævis minimè ueretur ſenſibus ad excipiendas ſpecies intelligibiles, ſed tantùm ad motum, & alios quoidam effectus; non tamen ſequitur

illum modum habendi intelligentiam ſine ſenſu, neceſſariò deſiderari: Tum quia non omnes viventium gradus ſpecifici, aut generici, qui exiſtere poſſunt, debent eſſe reiſpſa, quippe cùm perfectio Univerſi non tanta ſit quanta eſſe potuit, ſed quantam Deus voluit: Tum quia ratio intelligendi ſine ſenſu, & cum ſolo motu progreſſivo non conſtituit ſpeciale gradum entis; ſed tantùm eſt ſpecialis modus habendi gradum entis intellectualis.

Dices 6. Angeli, præſertim mali, habent aliquam cum quibuſdam rebus corporeis ſympathiam, & antipathiam. Sic ad pulſum citharæ Davidis Dæmon à Saule receſſit. Sic *Tobie* 6. verſ.8. & cap.8. verſ.2. dicitur ſumò jecoris pilcis cujuſdam fugatum fuiſſe Dæmonem, ejuſque maleficiũ depulſum. Imò variis ſubinde pharmacis, & amuletis corporeis Dæmones arceri, eorumque inſeſtationes impediri videmus. Eandem Dæmones exagitandi, & expellendi vim, ut ait Delrius lib.2. q.30. ſect.3. tribuunt nonnulli rutæ, balneis, ſtercori caprino, & flagellationi: Ergo quafdam in ſe habere videntur qualitates corporeas, earum rerum qualitatibus contrarias.

Reſpondeo: Hæ effectus non oriri ex vi naturali, & oppoſitione inter res ipſas, & Dæmones; ſed ex eo quòd Deus interdum rebus naturalibus, & corporeis ad Dæmones abigendos veluti instrumentis ad hoc aſſumptis utitur; ut patet exemplis allatis. *Addo quòd* Raphaelis virtus, & Davidis ſanctitas ad hoc ſe ſpiritus compeſcendos conduxerit. Fateor tamen quafdam res naturales vi ſua ad Dæmonem compeſcendum, & inſeſtationes ejus impediendas, ac mitigandas conducere; dum ſcilicet hominis à Dæmone vexati humores noxios removeat, quibus maxime Dæmon inſidet, iſque utitur ad hominem inſeſtandum.

CONCLUSIO SECUNDA.

Angeli non componuntur ex materia, & forma physica. Hæc sequitur ex præcedenti: Probaturque his omnibus sanctorum Patrum textibus, quibus docent Angelos esse incorporeos, & omnino simplices, quantum ad naturam; nam constat eos esse compositos tum ex substantia, tum ex accidentibus spiritualibus, puta Intellectione, volitione, & similibus, quale compositionis genus nemo in Angelis negaverit. Patet insuper, eò quod præstantior, & nobilior sit natura Angelica, quam anima rationalis: sed anima rationalis, ut diximus supra, est simplex, & immaterialis: Ergo multò magis Angeli.

Dices 1. Sanctus Augustinus lib. 7. de Genesi ad litteram c. 6. affirmat Deum ab initio creasse materiam aliquam spirituales ex qua humanam animam, eduxit, & à qua habet anima, quòd sit mutabilis à virtute ad vitium, & è contra, sicut corpus est mutabile ad infirmitatem. Vel, ut subdit, *Sicut caro in natura vel proficit ut pulebra; vel deficit ut deformis sit; habuit etiam materiam, id est, terram, de qua fieret ut omnino caro esset; sic fortasse potuit, & anima, antequam ea ipsa natura fieret, quæ ANIMA dicitur (cujus vel pulchritudo virtus, vel deformitas vitium est) habere aliquam materiam pro suo genere spirituales, quæ nondum esset anima: sicut terra de qua caro facta est, jam erat aliquid, quamvis non esset caro.* Ipsi subscribit Boetius libro de Unitate, & Uno, ubi docet eandem esse materiam rerum corporearum, ac spiritualium: *Quia igitur (inquit) materia in supremis formata, est intelligentiæ forma, & forma rationalis animæ; deinde postea forma animæ sensibilis; deinde forma naturæ: ad ultimum autem est forma corporis; hoc non accidit ex diversitate virtutis agentis, sed ex aptitudine materiæ susci-*

pientis. Ac demum cum de Unius variis generibus agit, inter alia quoddam esse ait, *Simplicium cognitionum unum, ut Angelus, & anima, quorum unum quodque est unum conjunctione materiæ, & formæ.* Ipsis consentit Rupertus lib. 2. de victoria Verbi Dei cap. 12. ubi Angelos de materia creatos existimat.

Respondeo 1. sanctum Augustinum non affirmando, sed potius tentando, ac dubitando illa protulisse. Deinde nomine materiæ non intelligit materiam primam, quæ est omnium formarum physicarum susceptiva; sed informitatem, seu potentialitatem quandam proportionaliter communem materiæ corporeæ, & substantiæ spirituali: quemadmodum enim materia prima ex se informis est, ita Angelus prius est creatus secundum naturalia quam converteretur ad Verbum à quo illuminatur; adeoque dicitur productus in potentia intelligibili, proportionaliter ad materiam, quæ est in potentia ad formas. Vel denique dico ipsum fortè loquutum in sententia Platoniorum, de ideis, & intelligibilibus formis, quales à corporibus abstractas constituebant Plato, & in quibus materiam esse volebant Platonici, cui formæ illæ intelligibiles inessent; Nam; inquit Plotinus Enn. 2. lib. 4. cum plures in illis ideis sint species, commune sit in iisdem aliquid oportet; sed, & proprium, quòd aliud ab alio discrepet. Hoc igitur proprium, ac differentia illa discernens, forma est propria. Quòd si inest forma, est, & formatum circa quod differentia est. Subsc: itaque materia, quæ illam formam recipit. Quo pariter sensu loquutus videtur Rupertus supra laudatus.

Ad Boetium dico, ipsum in libro de duabus naturis, & una persona Christi, asserere nullam in rebus corpore, carentibus esse materiam, Omne (inquit) corpus quod in generatione, & corruptione subsistit, communem videtur habere materiam, sed non omne ab omni, vel

in omni, vel facere aliquid, vel pati potest: Corporea verb in incorporea nulla ratione poterunt permutari, quoniam nulla communi materia subiecta participant, quæ susceptis qualitatibus in alterutram permutetur: omnis enim naturæ incorporeæ substantia nullo materiali nititur fundamento. Itaque vel in seipsum militat Boetius, vel locò in objectione laudatò materiam usurpat in mente Platoniorum, nimirum pro idea, quæ materiæ instar, spiritibus formandis præexistit in mente divina, à qua habent; primò ut sint; deinde ut tales sint, hoc est, viventes, & intelligentes.

Ita docet sanctus Maximus in scholio quinti libri de Divinis Nominibus; Invisibiles (inquit) & supremæ mentes, primùm essentiæ, vel existentie fuerunt participes, ac deinde vitæ, atque sapientiæ, ut enim in nobis prima est producta materia ex qua sumus; sic in mentibus corpore earentibus instar materiæ intelligitur ea, quæ est uniuscuiusque per vitam formæ, & per quam substantiatum est ad vitam, & sapientiam, & similitudinem.

Dices 2. cum S. Bonaventura, nullum mutabile est simplex: sed Angelus ex sua natura est mutabilis: Ergo non est simplex, sed compositus: At quod est compositum, & mutabile constat materia, quæ est principium mutabilitatis, & compositionis; Nam (inquit S. Augustinus 12. Confessionum) omne mutabile insinuat notitiæ nostræ quandam informatæ, quæ forma capitur, vel mutatur, vel vertitur: Et Boetius libro 3. de Trinit. Nihil quod est verè formæ, accidentibus potest subijci.

Concedo totum argumentum, sed nego subsumptum: Angeli enim sunt mutabiles secundum perfectiones accidentales; & sic habent compositionem, non solum ex essentia, & existentia, sed etiam ex subiecto, & accidente; quia intellectio, & volitio perficiunt intel-

lectum, & voluntatem Angeli, & consequenter intellectus, & voluntas sunt in potentia ad illas. Sicque explicari possunt Augustinus, & Boetius à sancto Bonaventura laudati, nempe quòd in Angelis sit ratio potentiæ, & subiecti per respectum ad formam accidentalem, quæ Angelis inest; Unde Angeli non sunt actus simplices, quatenus simplicitas negat omnem compositionem realem, qualis est simplicitas divina: sed tantum quatenus simplicitas opponitur compositioni ex materia, & forma physica.

Dices 3. Nihil idem, & secundum idem agit, & patitur: sed idem Angelus agit, & patitur, nempe illuminat inferiores Angelos, aut homines, & illuminatur à superioribus Angelis, & à Deo: Ergo habet aliud principium secundum quod agit; & aliud secundum quod patitur: Sed principium secundum quod agit est forma, & principium secundum quod patitur est materia: Ergo in Angelo est compositio ex materia, & forma.

Respondeo, Angelum agere, & pati intentionaliter penes eandem entitatem, & facultatem, diversimodè se habentem, vel ad effectum, quem producit, vel ad principium, à quo aliquid recipit: ut à simili constat de intellectu humano, qui licet sit una simplex, & individualis facultas, tamen denominatur, & est agens, & patiens, ut constat ex Physicis.

*Hic itaque observandum quòd licet difficile, videatur definire quid voluerit S. Bonaventura; arbitror tamen, ipsum nihil aliud intendere, quàm quòd Angelus habeat compositionem ex materia, & forma metaphysica, idest, ex genere, & differentia; nam quæstione prima, sic ait, *Essentia omnis creaturæ composita est ex diversis naturis, & illæ due se habent per modum actualis, & possibilis, & ita per modum materiæ, & formæ; & ideo illa positio videtur prior esse,**

esse, scilicet quòd in Angelis compositio ex materia, & formâ. Clarius autem id indicat quæstione 2. dum ait; Dato quòd Angelus habeat compositionem ex materia, & forma, largè sumpta nomine MATERIÆ ad omne potentiale, quòd cum alio venit ad constitutionem, tanquam fundamentum rei. Non igitur loquitur de materia physica, & strictè dicta; sed de gradu generico, qui dicitur materia metaphoricè, & per quandam proportionem, quam habet cum materia, ut dictum est in Logica.

QUÆSTIO SECUNDA.

An, & quomodo Angeli sint incorruptibiles, & immortales?

NOTANDUM 1. Incorruptibile illud dici, non solum quòd defacto corruptioni non subjacet, sed quòd nec subiacere potest. Corruptio autem dupliciter potest accipi: *Primò* quidem latius, pro quacumque defitione rei quæ ab esse transit ad non esse; quò sensu corruptio idem significat ac defitio seu defectio, & incorruptibile idem ac indefectibile. *Secundò*, strictius pro destructione aut dissolutione compositi substantialis materia, & forma constantis: sicut generatio illi opposita est productio, & effectio compositi substantialis.

Notandum 2. Aliquid triplici modo dici naturaliter indefectibile. *Primò* quidem absolute quòd sit talis natura ut per nullam potentiam destrui possit, & in nihilum abire: *Secundò*, quòd juxta Dei potentiam ordinariam agentis, nempe secundum exigentiam naturalium causarum destrui non debet; vel quia nulla est è causis naturalibus quæ rem illam destruere possit; vel quia nulla illius destructionem exigat. *Tertiò* denique illud dicitur naturaliter incorruptibile, quòd ex principiis suis intrinsecis existit nunquam de-

ficere: sed ubi semel accepit esse, illud in perpetuum servare postulat.

Notandum 3. circa præsentis quæstionis resolutionem triplicem esse sententiam. *Primò* namque Hæretici nomine *Libertini*, negarunt Angelos, & rationales animas esse immortales, ita quòd sicut initium sic, & exitum sint habituri, quippe solius Dei propriam esse immortalitatem volunt, cujus creatæ res participes esse nequeunt. *Secundò*, nonnulli sunt qui affirmant Angelos esse naturaliter, & intrinsecè defectibiles, solumque Dei beneficiò sicut cætera entia perseverare, quia cum ex nihiloeducti fuerint, etiam in nihilum abire ex se postulant. *Tertiò* denique contendunt Alii, illos naturaliter incorruptionem exigere; ita quòd per solam extraordinariam Dei potentiam destrui possint, & annihilari. Tria itaque hic sunt statuenda. Primum, Angelos nusquam interituros: Secundum, quòd per absolutam Dei potentiam deficere possint: Tertium quòd ex suis principiis intrinsecis postulent in perpetuum subsistere.

CONCLUSIO PRIMA.

Angeli sunt in perpetuum exituri, nullique interitui subiacent unquam. Hæc est de fide; & colligitur ex his omnibus Scripturæ sacræ textibus, quibus constat bonos æternum perseveraturos in gloria, malos verò in pœna, ut legitur Math. 25. Lucæ 10. Judæ Apostoli *versu* 6. ubi dicitur Angelos, qui non servaverunt suum principatum, esse vinculis æternis sub caligine reservatos.

Confirmatur pariter ex Epistola Sophronii recitata in sexta Synodo generali *actiōe* 11. & approbata *actiōe* 13. ubi hæc legimus, *Deus suis operibus prædens, principumque omnibus temporale constituens, sensibilia quidem finit temporali supposuit, intellectualia verò, & invisibilia hæc meliori dignitate dignatus est; & nullatenus quidem moriuntur,*

itur,

tur, neque corrumpuntur juxta quod sensibilia desinunt atque pertranseunt, sed gratiam eis largitus est a corruptione ea, & a morte coercitum. Sic hominum animæ permanent incorruptæ, sic Angeli immortales perseverant.

Idem colligitur ex Concilio Lateranensi sub Leone X. in quo sess. 8. tamquam unus ex erroribus ab Ecclesia, semper explosis, damnatur eorum assertio, *Qui aut sunt dicere animam rationalem esse mortalem*. Et subdit; *Sacro approbante Concilio damnamus, & reprobamus omnes asserentes animam intellectivam mortalem esse; cum illa non solum verè, & per se, & essentialiter humani corporis forma existat, verum, & immortalis*. At si immortalitas competat animæ rationali quæ tam affine cum mortali corpore habet commercium; multo magis tribuenda est Angelo, qui cum materia nullam habet affinitatem.

Hoc ipsum probant SS. Patres qui cum S. Dionysio cap. 4. de divin. Nomin. fatentur, *Angelos habere vitam sempiternam, & que imminui non potest, ab omni interitu, & morte solutam, & liberam*: Vel cum S. Athanasio Tract. de definitionibus, Angelum, & animam appellari posse æternos; *Quia*, inquit, *licet initium habuerint, immortales sunt, & æternum vivunt*: Vel cum S. Basilio in Psalm. 44. dicente Angelos non esse mutabiles in suo esse, *quia in quo statu creantur, in eo perpetuo remanent, servata simplici, & eadem immutabili propriæ naturæ substantia, &c.* Quibus omnibus constat communem Ecclesiæ fidem, ac doctrinam esse quod Angeli sint incorruptibiles, & immortales.

Dices: Deus solus in sacris Scripturis dicitur immortalis 1. ad Timot. 6. *Qui solus habet immortalitatem*: Ergo immortalitas nec Angelis nec rationalibus animabus convenit.

Respondeo: Vocabula mortale, & immortale trifariam posse accipi. Primo

quidem pro re mutabili ab uno statu ad alterum, quò sensu S. Augustinus Epist. 28. animam hominis partim mortalem, partim immortalem esse demonstrat: *Anima*, inquit, *hominis immortalis est secundum quendam modum suum, non enim omnimodè sicut Deus, de quo dictum est, QUIA SOLUS HABET IMMORTALITATEM*; Nam de animæ mortibus sacra Scriptura multa commemorat, quale est illud SINITE MORTUOS SEPELIRE MORTUOS, &c. Unde secundo de Trinitate cap. 9. *Ipsa*, inquit, *mutabilitas non inconvenienter mortalis dicitur, secundum quam & anima dicitur mori; non quia in corpus, vel in alteram aliquam substantiam mutatur, & vertitur; sed in ipsa sua substantia quidquid aliò modò nunc est, aut fuit, secundum id quod desinit esse, vel quod erat, mortale deprehendatur*.

Secundò, immortale dicitur; quod non à se, sed aliunde habet ut mori non possit; qua ratione Angeli partim mortales, partim immortales dicuntur à nonnullis sanctis Patribus, quia licet ex se sint incorruptibiles; possunt tamen vi divina in nihilum redigi.

Tertiò denique illud immortale dicitur, quod nec ex se, nec per alium deficere potest: quo sensu solus Deus est immortalis.

CONCLUSIO SECUNDA.

Angeli non sunt absolute incorruptibiles, & respectu potentie extraordinariæ Dei. Ita Doctor Subtilis in 1. distinct. 8. quest. 5. num. 22. ubi affirmat nullum ens præter Deum esse necessarium; *Dico*, inquit, *quod nihil aliud à Deo est immutabile, loquendo de mutatione quæ est verso, quia nihil aliud est formaliter necessarium*. Cum itaque Angelorum existentia non sit absolute necessaria, sed contingens; quippe Deus potuit eos non producere; idcirco dici nequeunt absolute incorruptibiles; sicut enim ex nihilo formati fuerunt, ita per extraordinariam Dei po-

potentiam iterum potuerunt in nihilum abire.

Hoc ipsum probat sanctus Cyrillus lib. 20. Thesauri, ubi demonstrat Filium Dei Angelis esse præstantiorem, quod ille necessario, & immutabiliter existat; illi verò volente Creatore possint in nihilum redigi. Nam cū, inquit, Angelus immortalis quædam res est, propter ita constitutam de eo Conditoris voluntatem, & gratiam: nihilominus quoniā existendi principium habet, possit utique finem etiam fortiri. naturales enim prærogative habentibus quidem valide sunt; non autem earum opifici Deo. Quæmadmodum ignis urendi vim habet, sed non Deo; & Angelus immortalis est quidem sed non Deo. Quibus verbis Cyrillus duo intendit. Primum, quod sicut ignis naturaliter ita est combustivus, ut ejus vis à nullo agente creato suspendi possit, sed tantum à Deo: Sic Angelus ita est immortalis, ut à nullo alio quàm à solo Deo possit impediri ne perpetuo sit. Secundum, quod licet Angelus ex natura sua sit incorruptibilis, tamen Deo volente destrui possit, nempe si ab eo conservando Deus desisteret; Nam (inquit S. Augustinus Epistola 56.) non ob aliud res habent deficere vel posse deficere; nisi quod ex nihilo factæ sunt: ut quod in eis est quod sunt, & manent. . . . ad ejus bonitatem omnipotentiamque pertineat, qui summus est, & Conditor.

Idem docent plurimi de sanctis Patribus, qui Angelos non naturā, sed solā Dei gratiā, immortales esse docent, quia ut initium per divinam potentiam, sic, & exitum habere possunt; quippe solius Dei propriam esse immortalitatem volunt, cujus creatæ res sunt participes quandiu Deo placitum fuerit. Quod egregie docet sanctus Ambrosius lib. 3. de fide cap. 2. Nec, inquit, Angelus immortalis est naturaliter, cujus immortalitas in voluntate est Creatoris. Subscribit Sanctus Damascenus lib. 2. cap. 3. Immortalis est, inquit, An-

gelus, non naturā, sed gratiā; nam, quidquid initium habuit, & finire suapte naturā potest. Favet etiam S. Hilarius in Psalm. 148. ubi explicans illud; Præceptum posuit, & non præteribit, ait; Ut hoc quod sunt (Angeli, & anime rationales (id est, maneat in æternum, non naturæ suæ esse intelligant, sed præcepti ejus sit qui potens sic rebus ex nihilo constitutis naturam æternitatis asserre; non enim, inquit, præteribit præceptum, id est, mandati ejus non erit finis: in æternum manent, quibus æternitatem virtus æternitatis indulsit.

Hæc veritas etiam Philosophos Platonicos non latuit; Nam ipse Plato in Timæo introducit Deum summum, Deos minores, nempe Angelos, sic compellantem. Hæc vos qui Deorum fati orti estis, attendite quorum operum ego parens effectorque sum, quæ per me facta, non sunt dissoluta me invito. Quamquam omne colligatum solvi potest. Sed baudquaquam boni est, ratione vinculum velle dissolvere: sed quoniam orti estis, immortales vos quidem esse, & indissolubiles non potestis. Neutiquam tamen dissolvemini, nec vos ulla mortis facta periment, nec fraus valentior, quàm consilium meum; quod majus est vinculum ad perpetuitatem vestram, quàm illa, quibus estis tum, cum gignamini colligati.

CONCLUSIO TERTIA.

Angeli sunt incorruptibiles, & immortales ex suis principiiis intrinsicis. Hæc Conclusio sequitur ex præcedentibus Probat per insuper. Illud est incorruptibile ab intrinseco, quod intrinsecè non constat materia quæ est principium corruptionis: sed ut dictum est in priori questione, Angeli sunt omnino immateriales: Ergo, & incorruptibiles.

Secundò, Illud omne quod nihil habet in se, ratione cujus postulet destrui, nihilque potest accipere quod ejus existentiam evertat, est incorruptibile

ab

ab intrinseco: Sed Angeli nihil habent in se ipsis, ratione cujus postulent destrui, quia non constant aliquibus contrariis, vel subiecto admittente qualitates contrarias suæ substantiæ corruptivas, cum sint prorsus incorporei; nec possunt etiam quidquam recipere, quod eorum destruat existentiam, quia non possunt ullam recipere qualitatem disponentem ad formam substantialem cum Angelica forma in eodem subiecto incompatibilem: Sic enim constare deberent materiâ, quæ idcirco dicitur principium corruptionis, quatenus habens propensionem ad omnes formas, potest admittere contrarias qualitates quæ præsentem formam destruant, & ad alterius introductionem præparent: igitur Angeli sunt ab intrinseco incorruptibiles.

Tertiam rationem subministrat sanctus Maximus martyr in Opusculo de animæ immortalitate, ubi probat animam esse immortalem, ex eo quod sit simplex. Quod utique sic probat: *Nulla res, inquit, omnino se ipsam potest corrumpere, alioqui ne omnino quidem constituta fuisset: quæ enim corrumpuntur, ex contrariis corrumpuntur; ideo omne quod corrumpitur, dissolubile est, quod autem dissolubile est plures habet partes; quod verò ex partibus componitur, nimirum diversis iis constat: Iam quod diversum est, non est idem. Quamobrem anima cum sit simplex, neque ex differentibus constans partibus, non est composita, neque dissolubilis, ideoque corruptionis erit experta, & immortalis.* Quæ omnia multo-magis de Angelis dici possunt, eum excellentiore natura consent.

Dices 1. SS. Patres laudati supra num. 7. affirmant Angelos esse immortales, non naturâ, sed gratiâ: Ergo censent eos non esse naturaliter, & intrinsecè incorruptibiles.

Respondet: Particulam *ex natura* dupliciter posse accipi. *Primò*, ut significet idem quod *ex vi suæ essentiae*, & à se ac

independenter à cujuscvis alterius influxu, quò sensu Angeli dici nequeunt immortales ex natura sua, hoc enim, esset dicere, eos esse omnino independentes, quod est hæreticum. Idcirco huic sensui opponunt SS. Patres esse per gratiam, hoc est per beneficium creationis, & conservationis quæ quia gratis à Deo conceditur; etiam gratia vocatur à Patribus Cœcilii Africani apud S. Augustinum Epistola 95. *Non improbanda ratione dicitur gratia Dei quâ creati sumus ut non nihil essemus. . . quia non præcedentium aliquorum operum meritis, sed gratuita Dei bonitate donata est.*

Nec refert quòd concursus conservativus Angeli videatur ipsi naturaliter debitus, si sit naturâ immortalis; nam exinde non sequitur eum non posse gratiam appellari, quippe cum sit quid sequens ad creationem quæ fuit gratuito, & sine ullis præcedentibus meritis concessa; quæ enim ad donum gratuitum sequuntur, gratia etiam interdum nominantur: Sic quamvis gloria æterna debeatur ut merces bonis operibus; eam nihilominus gratiam appellat Apostolus ad Rom. cap. 6.

Secundò, Vocabulò *ex natura*, ut significant naturalem inclinationem, & exigentiam ad semper subsistendum, & nusquam deficientium; quò sensu non negant SS. Patres Angelos esse naturâ suâ indefectibiles: Siquidem cum sint incorporei, nullumque corruptionis, & defectionis in se principium includant, naturaliter exigunt perpetuò subsistere, ita quòd interitus, & defectio ipsis esset omnino contra naturam, sicut igni violenta foret à nativo calore spoliatio, & causis secundis privato concursus divini ipsis naturaliter debiti ad operandum.

Insitabilis: Ideo sancti Patres affirmant Angelos esse naturâ corruptibiles, quia creati fuerunt ex nihilo, & ad nihilum naturâ suâ propendent: at quod ita ad nihilum vergit, dici nequit esse incorrupti-

ruptibile secundum inclinationem naturalem, nec interitus ipsi potest esse contra-naturalis, & violentus, imò conformis est ipsius naturæ, propensione: Ergo, &c.

Distinguo majorem: Quod ad nihilum propendet ex aliquo principio intrinseco corruptioni, & defectui obnoxio, potestque vel à causis corruptivis destrui, vel desinere per negationem ulterioris concursus Dei agentis secundum existentiam causarum secundarum, dici nequit intrinsecè incorruptibile, concedo: quod solum destrui potest per extraordinariam potentiam Dei utentis suo supremo in creaturas Dominio etiam contra earum naturalem ordinem, & existentiam, ita dici nequit incorruptibile, nego. Fateor itaque quod Angeli naturæ suæ sint in potentia obediunt ut à Deo possint destrui: At nego quod hæc destructio foret conformis eorum principiis intrinsecis, & eis connaturalis; adeoque reverà semper dicendi sunt natura suâ incorruptibiles.

Urgebis 1. Quod est alicui naturale, infert secum in eo repugnantiam ad oppositum: Sed Angelus non habet repugnantiam, ut per extraordinariam Dei potentiam possit deficere, & interire: Ergo immortalitas, & indefectibilitas non est ei connaturalis. Major constat, quia enim vis calefactiva est igni connaturalis, ideo ignis habet repugnantiam ad non calefaciendum: Ergo à pari si immortalitas esset Angelo connaturalis, inferret in eo repugnantiam, ut mori, & deficere posset, etiam per extraordinariam Dei potentiam, quæ enim repugnant, etiam divinitus fieri nequeunt.

Distinguo majorem, infert repugnantiam ad oppositum, quod accidat rei per causas agentes juxta naturæ ordinem, & existentiam, concedo: Quod accidat via præternaturali, nego: Itaque immortalitas, quæ est Angelo con-

naturalis, infert in eo repugnantiam, ut deficere possit, vel à se, vel per causas extrinsecas naturaliter illius corruptivas; non tamen propterea dicit repugnantiam, ut à Deo præter naturam agente destrui possit, & annihilari. Sicut enim ignis licet habeat vim calefactivam innatam, tamen potest non calefacere, si nempe Deus cum eo ad calorem producendum non concurrat: Ita à simili, poterit Angelus deficere, si Deus eum ultro non conservare statuatur, licet aliunde vim innatam ad incorruptionem habeat.

Subsumes. Angeli non habent repugnantiam, ut à Deo annihilentur: Sed hæc non repugnantia est vera potentia naturalis saltem passiva ad non esse: Ergo ex natura sua possunt deficere; adeoque non sunt naturaliter indefectibiles.

Nego minorem: Hæc enim non repugnantia solum infert potentiam obediuntalem, quæ quælibet Creatura subditur Deo, ad hoc ut in ea vel ex ea faciat quidquid contradictionem non implicat. Unde sequitur quod Deus Angelum annihilando non faceret illi violentiam, quia licet tunc ageret contra inclinationem particularem, quam habet Angelus ad semper durandum; non tamen ageret contra inclinationem universalem; quam ut pars Universi habet ad obediendum Creatori: Sicut gravia non dicuntur pati violentiam, dum sursum petunt, ut vacuum impediant: quia licet juxta suam particularem inclinationem non agant, subserviunt tamen bono Universi, ad quod magis, quàm ad suum particulare commodum inclinantur.

Urgebis denique, Non repugnantia, seu potentia Logica in Angelo, ut producat, sufficit ut possit naturaliter à Deo creari: Ergo eadem non repugnantia ad destructionem sufficiet, ut possit naturaliter annihilari.

Nego consequentiam: Et ratio disparitatis

tatis est, quod Angelus ante productionem non exigebat ex natura sua, ut produceretur, quippe tunc nihil erat: at ubi semel productus est purè spiritualis, ex se postulat, & exigit perpetuò subsistere, & à Deo conservari, quippe cum nullum in se habeat principium corruptionis, & defectionis; qua de causa illius productio fieri potest naturaliter, non ita annihilation.

QUAESTIO TERTIA.

An & quomodo Angeli ab Anima rationali distinguantur?

NOTANDUM 1. Nos hic non inquirere, an Angeli hominibus antecellant; certò namque certius est Angelos secundum naturalia hominibus longè esse præstantiores, quippe S. Paulus ipsum etiam Christum Dominum, qua homo est, *Paulominus ab Angelis minoratum* affirmat, ad Hæbræos 1. Unde S. Petrus 2. cap. 2. docet *Angelos virtute, & fortitudine esse majores*, nempe hominibus; nam ut ait S. Hieronymus eum textum expendens, *Tanta est dignitas Angelorum, ut omnis natura humana illis comparata, pueritia nuncupetur*. Hinc S. Augustinus lib. 9. de Civit. cap. 13. *Homo medium quoddam est inter pecora, & Angelos, inferior Angelis, superior pecoribus, habens cum pecoribus mortalitatem, rationem cum Angelis*: Quibus oraculis ipsa etiam ratio Theologica suffragatur: Tum quia Angeli majorem cum essentia divina habent affinitatem, nullum enim eis est cum materia commercium, suntque omnino simplices, omnimodamque compositionem, & componibilitatem Physicam Dei instar excludunt; non sic homo qui terrena simul, & cælesti parte constat, anima videlicet immortalis, & corpore corruptibili. *Insuper*, ut superiori quæstione probatum est, Angelus incorruptionem, & perpetuam

durationem exigit: Homo verò ait Job. *Quasi flos egreditur, & conteritur, & fugit velut umbra, & nusquam in eodem statu permanet*. Denique Angeli rerum omnium naturalium noticiam à sua origine habuerunt, nihilque tam abstrusum, & nobis impervium (si futura, & cordium secreta excipias) quod penitus simè non conspiciant; inde volunt efficaciter, immobiliter eligunt, & tanta celeritate moventur, ut in momento Cælum, terramque obtineant. At homo profususimbellis, stolidus, & rudis, sibi dum vivit semper dissimilis, nec usquam idem vesperè, qui manè fuerat. Summa igitur est Angelicæ naturæ suprà humanam dignitas, & præstantia.

Notandum 2. Naturam humanam in pluribus donis gratuitis, & supernaturalibus Angelicæ esse superiorem. Ista namque ad unionem hypostaticam, erecta fuit, & assumpta à Verbo divino, quod, ut loquitur Apostolus ad Hæbr. 2. *Nusquam Angelos apprehendit, sed semen Abrahæ*. Unde meritò Angelus Joannis Evangelistæ Rector, & Doctor, Apocal. 19. noluit ab eo adorari. *Cave*, inquit, *ne feceris, confervus enim tuus sum*: quod expendens S. Ambrosius ait, *Pertimescit Angelus adorari ab homine, qui super se adorabat hominem Deum*. Insuper non Angelis, sed hominibus Sacerdotalem dignitatem Deus contulit quâ, autoritatem habent in triplex Christi corpus videlicet Morale, Mysticum, & Naturale. Habent, inquam, Sacerdotes autoritatem in corpus Christi morale, nempe animas, quas censuris ligare possunt, & solvere à peccatis. *Secundò*, Jurisdictionem obtinent in corpus Christi mysticum, videlicet Ecclesiam, illam enim illustrent, perficiunt, & veluti deificent: idcirco à S. Dionysio in libris de Eccles. Hier. Sacerdotes dicuntur *Theurgi*, id est, Deos facientes. *Tertiò* denique Sacerdos in Christi verum corpus,

pus, & naturale imperium tenet. Ipsum namque conficit sacramentaliter, & ad ejus verba præsens alteri sistitur Ipsum Dei Verbum, per quod omnia facta sunt *Obediente Deo voci hominis*, ut dicitur Josue 10. Hinc S. Ephrem Sacerdotium appellat. *Omnium ornamentorum præstantissimum, bonorum omnium, quæ in hominibus sunt apicem, divinum quoddam; & omnium, quæ inter homines expetuntur oculus extremam metam.*

His ita præmissis, solum hic superest discutiendum, an & qua ratione Angeli ab anima rationali distinguantur, quod ut fiat planius.

Notandum 3^o Speciem dupliciter spectari posse. Primò propriè, pro re, quæ per se, ac directè ponitur sub genere, & quæ de pluribus numero differentiibus prædicatur in quid, v.g. homo, qui sub genere animalis constituitur, & de singulis hominibus dicitur in quid. Secundò, sumitur minùs propriè, pro re quæ per se non reponitur sub genere, sed in prædicando se habet ad modum speciei, sic materia, & forma, ut seorsum considerantur, sub nullo genere reponuntur, cum sint tantùm partes compositi; sed solum ad modum specierum in prædicando se habent, nam materia in universum considerata, dicitur de hac, & illa materia; & forma materialis de hac & illa forma; sicque dicuntur species prædicabiles solum, & non subijcibiles.

CONCLUSIO PRIMA.

Angeli specie differunt ab anima rationali. Hæc est Doctoris in 2. dist. 1. quæst. 5. cum cæteris Theologiæ Principibus, quia inquit Doctor, *Formæ ejusdem rationis habent eandem rationem perficiendi, vel non perficiendi: sed anima naturaliter est perfectiva corporis ut forma: Angelus autem naturaliter est non perfectio alicujus materiæ: igitur &c.* licet autem invicem conveniant Theologi de veritate hujus conclusionis, differunt tamen in assignanda

primaria ratione illius specificæ distinctionis.

Primò namque S. Bonaventura existimat rationem esse petendam ex eo, quòd anima sit unibilis materiæ, vel corpori, Angelus verò non ita. *Verum* hanc rationem impugnat Doctor; eo quòd non sit à priori; illa namque unibilitas denotat aptitudinem, quæ essentialiter rei præsupponit, & ideo nequit esse primaria ratio distinctionis specificæ, licet à posteriori eam denotet sicut proprietates rerum differentias specificas plerumque indignant. Quæ utique Doctoris replica videtur optima, si fiat sermo de unibilitate formali, & prout est respectus aptitudinalis resultans ex natura animæ; secus autem foret si fieret sermo de unibilitate radicali, quia illa unibilitas radicalis est ipsamet differentia essentialis animæ, ex qua sequitur aptitudo ad unionem; sicut è contra non unibilitas radicalis Angeli, consistit in aliquo prædicato essentiali ipsius, ad quod sequitur negatio unibilitatis tam radicalis, quàm formalis.

Videtur autem S. Bonaventura de radicali unibilitate loquutus, dum eam in primariam rationem specificandi distinctionis animæ ab Angelo assignavit, ait enim; Hoc quod est animam uniri corpori humano, sive vivificare corpus humanum, non dicit actum, accidentalem, nec dicit actum ignobilem. Non accidentalem, quia ratione illius anima est forma substantialis; non ignobilem, quia ratione illius anima est nobilissima forma omnium, & in ipsa stat appetitus totius naturæ; corpus enim humanum nobilissima complexione, & organizatione, quæ sit in natura, est organizatum, & complexionatum, ideo non completur, nec natum est compleri, nisi nobilissima forma, sive natura: illud ergo quod anima est unibilis corpori tali, dicit quid essentialiter respiciens, quod est

„ nobilissimum in anima : & ita penes
 „ illud rectè sumitur specifica diffe-
 „ rentia secundum quam differt anima
 „ à natura Angelica. Quibus verbis
 Seraphicus Doctor videtur loqui de uni-
 „ bilitate radicali, siquidem illam appel-
 „ lat nobilissimam, & essentialem; talis
 autem non est unibilitas formalis, adeo-
 que de ipsa non est intelligendus, sic-
 que valida, & efficax est ejus ratio,
 coincidentque cum ratione Doctoris in
 sequenti conclusione proferenda.

Alteram rationem hujus distinctio-
 nis profert Henricus *Quod lib. 12. qu. 8.*
 ex diverso modo intelligendi Angeli,
 & animæ, quam etiam plurimi Thomis-
 tæ amplectuntur. Nam inquirunt, For-
 mæ intellectuales, quæ sic se habent,
 quodd una in intelligendo discurret, &
 alia non discurret, non sunt ejusdem
 speciei: sed anima in intelligendo di-
 scurret, Angelus verò minimè: ergo
 non sunt ejusdem speciei. *Confirmatur*
 à simili, quia anima sensitiva non vide-
 tur distingui in brutis, nisi penes diver-
 sos gradus sentiendi, & tamen ibi est
 differentia specifica: igitur debet col-
 ligi specifica differentia inter Angelum,
 & hominem penes diversos intelligen-
 di modos, & gradus, quodd videlicet
 anima in intelligendo discurret, non
 verò Angelus.

Hanc rationem impugnât Doctor:
 tum quia non est à priori, nam diversi
 gradus, & modi intelligendi in anima,
 & Angelo sunt aliquid posterius ipso-
 rum essentis; specifica autem entium
 distinctio petenda est ex naturis. Insuper
 prius res distinguuntur secundum
 facultates, & actus primos, quam in
 ordine ad actus secundos; sed intelli-
 gere cum discursu, & non intelligere
 cum discursu, sunt actus secundi tan-
 tum, qui præsupponunt in Angelo, &
 anima facultatem, & vim intellectivam
 diversam: ergo ab eis primariò non est
 desumenda eorum specifica distinctio.
 Tum quia illa ratio non etiam conclu-

dit à posteriori, quia inquit Doctor, si
 discurrere, & non discurrere arguunt
 diversas naturas intellectuales, cum
 anima discurret circa conclusiones,
 quas infert ex principiis per se notis,
 non autem discurret circa eadem prin-
 cipia, sequeretur animam esse à se ipsa
 specie distinctam. Insuper anima bea-
 ta circa objectum beatificum non di-
 scurret: discurret autem circa objectum
 naturaliter cognitum, igitur si à vir-
 tute discurrendi, vel non discurrendi
 colligenda esset specifica distinctio ani-
 mæ ab Angelo; sequeretur animam
 beatam à seipsa specie distingui, quippe
 circa unum objectum discurret, non ita
 circa aliud.

Nec exemplum allatum in confirma-
 tione quidquam juvat; bruta enim non
 distinguuntur per varios gradus magis
 aut minùs sentiendi; sed per formales,
 & specificas differentias, quæ cum nobis
 ut plurimum ignotæ sint, cogimur
 eas explicare per diversas earum pro-
 prietates, diversosque sentiendi modos.
 Hic autem proprietates Angelorum ab
 animabus peculiare non inquirimus,
 sed essentielles differentias quibus invi-
 cem specie discrepant, quas contendimus
 à virtute discurrendi vel non di-
 scurrendi nullatenus inferendas.

Tertiam denique rationem profert
 Alensis *quæst. 20. memb. 5.* quodd Ange-
 lus sit substantia libera vertibilis immu-
 tabiliter, anima verò sit vertibilis mu-
 tabiliter. Deus namque (inquit) est
 essentia libera invertibilis in bonum, &
 malum: Angelus verò, & anima ratio-
 nalis est essentia libera vertibilis in
 utrumque: sed in hoc differunt essen-
 tialiter, quia intelligentia Angelica ubi
 vertitur in bonum vel malum, ad id de-
 terminatur ex natura sua, & idcirco An-
 gelus malus non est capax pœnitentiæ,
 quia non est avertibilis à malo; anima
 verò rationalis vertibilis in bonum, &
 malum, post suam ad alterutrum con-
 versionem semper remanet libera, &
 idco

ideo est convertibilis, & pœnitentiæ capax. Verum huic rationi quamquam eximie non fudit ipsemet Alensis, subdit enim, *Hoc dicitur sine præjudicio posteriori sententiæ: si quis enim in esse Theologico potuit convenientiorem differentiam invenire, quiescendum est; cum res hujusmodi sint altissimæ speculationis.* Igitur hæc ratio differentiam specificam Angeli ab anima rationali non melius indicat quàm præcedentes; siquidem illa vertibilitas aut invertibilitas, seu mutabilis vel immutabilis, & invariata adhæsiō voluntatis alicui objecto vel proposito, sequitur tantum ad operationem intellectus, & voluntatis Angeli, & animæ; adeoque supponit facultates eorum, & essentias diversas: alia igitur inquirenda est ratio à priori specificæ distinctionis Angeli ab anima, quam aperiet.

CONCLUSIO SECUNDA.

ANGELUS, & anima rationalis specificè differunt ex propriis eorum naturis, quia nempe Angelus est natura completa, & anima natura incompleta. Ita Doctor loco laudato numero 4. Probaturque. Quod habet secundum se speciem, non potest esse ejusdem speciei cum eo quod non habet secundum se speciem, sed est pars speciei: at verò Angelus habet per seipsum speciem, anima autem tantum est pars speciei humanæ, & non dicitur species, nisi secundò modò, ex his quos in tertio notabili assignavimus, hoc est, species prædicabilis solum, & non subijcibilis; sicut sunt materia, & forma; ergo impossibile est quòd anima sit ejusdem speciei cum Angelo; sed differt ab illo sicut pars speciei à specie. Adeoque primaria ratio eorum distinctionis petenda est ex eo quòd anima sit natura incompleta, & Angelus natura completa.

Deinde: Ex eo præcisè petenda est distinctio specifica Angelorum ab anima rationali, quòd positò, cæteris etiam non

intellectis, reverà percipiuntur esse diversæ speciei: Sed posita ratione naturæ completæ in Angelis, & incompletæ in animabus, sufficienter intelliguntur speciem differre, etiamsi non percipiatur unibilitas vel non unibilitas &c. Ergo primaria ratio eorum specificæ distinctionis petenda est à conceptu naturæ completæ vel incompletæ. Major constat. Minor probatur: sive enim Angelus, & anima concipiuntur intuitivè, sive abstractivè, certum est quòd qui apprehendit Angelos esse naturas completas, nullum ad aliud dicentes ordinem cum quo totum aliquid constituent, reverà percipiat ipsos speciem differre ab anima quæ ex sua natura est incompleta, dicitque habitudinem ad corpus cum quo hominem constituat; etiamsi non apprehendat eos esse discursivos vel non discursivos &c. Ergo primaria ratio distinctionis eorum desumitur à conceptu naturæ completæ vel incompletæ.

Denique illa dicenda est primaria ratio utriusque distinctionis, ex qua oriuntur proprietates speciei distinctæ: Sed Angeli, & animæ proprietates diversæ proveniunt ex eo quòd anima sit natura incompleta, Angeli verò natura completa; inde enim sequitur quòd anima sit unibilis corpori, Angelus verò ipsi non sit unibilis: ergo &c.

Dices 1. contra utramque conclusionem: Angelus, & anima sunt in natura pares: ergo sunt ejusdem speciei. Consequentia patet, quæ enim speciem differunt, diversam habent naturam, adeoque non sunt natura pares. Probatur antecedens ex S. Augustino lib. 3. de libero arbitrio, ubi ait animas rationales superioribus potestatibus esse officiò impares, naturà verò pares: ergo &c.

Nego antecedens, & ad ejus probationem dico S. Augustinum dixisse Angelum, & animam esse naturà pares, non per respectum ad prædicata quibus constituuntur, sed per ordinem ad beatitu-

itudinem in quam ordinantur, tum quia unus plus habet de beatitudine ex natura sua quam alius: tum quia etsi non sint ejusdem perfectionis naturalis, possunt tamen æqualem habere beatitudinem: tum denique quia habent idem objectum beatificum in quo solum quietari possunt, & satiari; adeoque ex natura sua æquè ordinantur ad Deum videndum, & amandum.

Dices 2. Operationes, & potentie Angeli, & animæ rationalis sunt ejusdem speciei: ergo similiter Angelus, & anima specie non differunt. Sequela patet, potentie enim, & operationes consequuntur naturas rerum quarum sunt; operari enim sequitur esse, non solum secundum ordinem existentie, sed etiam secundum rationem essentię, & entitatis dignitatem.

Respondet Doctor num. 6. bifariam: *primò* quidem quod si Angelus, & anima considerentur absolute, & secundum proprias naturas, reverà specie differunt; non tamen propterea intellectus, & intellectio Angeli specie distinguuntur ab intellectu, & intellectioe animæ; non enim implicat (inquit) quod aliqua specie differant secundum naturam, non verò secundum potentiam, & operationem; siquidem anima bovis, & aquilæ invicem specie differunt, non tamen potentia visiva, & visio bovis differt specie à visione, & potentia visiva aquilæ dum versantur circa Solem v. g. quia sunt circa idem objectum. Hinc possibile est quod continentia aliqua differant, licet contenta invicem non discrepent; animal enim in homine, & bruto idem est, licet brutum, & homo specie differant.

Respondet 2. potentiam intellectivam Angeli, & animæ differre specie ex parte fundamenti, non tamen ex parte objecti dum circa idem objectum versantur, sicque actus possunt esse diversi quando proveniunt à naturis, & fundamentis distinctis potentialium; licet sint

eiusdem speciei in quantum dependent ab objectis circa quæ versantur; ideoque intellectio Angeli, & hominis dici possunt ejusdem speciei ex parte objecti, diversæ verò ex parte fundamenti. Cum autem diversitas ex parte fundamenti sit diversitas simpliciter; identitas verò ex parte objecti non sit identitas simpliciter, sed secundum quid; quæcumque enim differentia sufficit ad distinguendum, sed non quæcumque identitas sufficit ad perfectam identitatem aliquorum: hinc dicendum est quod intellectio Angeli, & hominis, etiam de eodem objecto, & similiter eorum potentie intellectivæ specie differant.

Dices 3. Si Angelus, & anima esset diversæ speciei, sequeretur quemlibet Angelum esse perfectiorem qualibet anima, & consequenter quod capacitas cujuscumque Angeli respectu beatitudinis esset major capacitate cujuscumque animæ: sed beatitudo satiat totam capacitem naturæ: Ergo major beatitudo tribui debet majori capacitati: & consequenter beatitudo cujuscumque Angeli esset major beatitudine cujuscumque hominis; quod tamen falsum esse non solum Theologi, sed etiam sancti Patres affirmant.

Respondet Doctor cōcedendo utramque sequelam, & negando subsumptum; nam beatitudo (inquit) non datur cum proportionem ad naturam præcipuè, sed ad merita; & consequenter non satiat totam capacitem naturalem animæ aut Angeli, quia possent habere majorem beatitudinem, si nempe haberent ampliora merita, licet æqualem capacitem naturalem obtinerent: Posset etiam negari consequentia secunda. Angelus enim majorem habere posset perfectionem naturalem, quamvis non haberet majorem capacitem ad beatitudinem.

ARTICULUS TERTIUS

De numero, & ordine Angelorum.

MIRABUNDUS ajebat aliquando sapientissimus Sirachi filius Eccli. 2. *Arenam maris, & pluvie guttas, & dies sæculi quis dinumeravit?* At certè majori laborare debet insitià humana mens in definienda ingenti ac stupenda Angelorum multitudine: Nam inquit Sapiens c.9. *Si difficile æstimamus quæ in terra sunt; & quæ in prospectu sunt invenimus cum labore: quæ in Cælis sunt quis investigabit?* Quoniam tamen cæteris Theologis morem gerentes suscepimus aperiendam Angelorum naturam, multitudinem, ordinem, operationem, & excellentiam: Idcirco declarata, quantum licuit, ipsorum naturà, jam investigandus est eorum numerus, & diversus ordo delineandus. Quocirca tria in præsentî Articulo sunt determinanda. *Primum*, an, & quæ sit ingens Angelorum multitudo: *Secundum*, qualiter invicem differant: *Tertium*, quis, & qualis sit eorum Ordo.

QUESTIO PRIMA.

An certò cognosci possit multiplem Angelorum numerus.

Notandum 1. Angelos maximò esse numerò, ingentique ac prorsus stupenda multitudine passim in Scripturis doceri: Sic Daniel.7. cap. *Millia millium ministrabant ei, & decies millies centena millia assistebant ei.* Apocalipsis 5. *Audivi vocem Angelorum multorum, & erat numerus eorum millia millium:* Et ad Hebræos 12. *Accessistis ad multorum millium Angelorum frequentiam;* Constans ergo est veritas ingentem esse, ac maximam Angelorum multitudinem.

Valdè autem conveniens fuit creari Angelos maximò numerò: Tum ut

Deus liberalissimè perfectioribus creaturis sese communicaret. Tum etiam ut omnipotentiam suam magis ostenderet, tot simul spiritus, tamque nobiles unico instanti creando: quod utique animadvertens S. Chrysost. hom.2. de Luca præ. ait; *Dena sunt millia myriadum Angelorum supra, & decies centena millia Archangelorum:* Item Throni, & Dominationes, & Principatus, & Potestates, & infiniti populi corpore carentium Virtutum, ac gentes innumerabiles; & tamen has omnes Virtutes tantâ facilitate condidit, quantam sermo nullus assequi potest. Accedit alia ratio congruentissima, quòd Principem summum ac potentissimum Imperatorem deceat habere numerosissimam familiam, & copiosum exercitum; Nam prov.14. *In multitudine populi gloria Regis, & in paucitate plebis ignominia Principis:* Sed Deus est Rex maximus, nempe Rex Regum, & Dominus Dominantium, Apoc. Decuit ergo ipsum plurimos habere sibi assistentes Angelos.

Notandum 2. Dupliciter inquiri posse quantus sit numerus Angelorum. *Primo* absolute, & præcisè: *Secundò* comparative, putà sit nè major tota multitudine hominum, vel etiam omnium substantiarum corporearum. Certum est autem Angelorum numerum non posse absolute, & præcisè à nobis designari. Scriptura enim verbis supra relatis cum certum ponit numerum Angelorum, non loquitur de omnibus, bonis aequè ac malis: & determinatum numerum ponit pro indeterminato, ut Interpretes, & sancti Patres ibidem agnoscunt: Alia verò traditio certa nulla proferitur: Imò ipsimet sancti Patres fatentur numerum illum præcisè nobis esse ignotum, & ita ingentem, ut respectu nostri innumerabilis, & infinitus dici possit, ut infra patebit: Restat ergo investigandum, an sciri possit determinatus Angelorum numerus ex factâ, comparatione, tum cum hominibus, tum

tum cum cæteris entibus creatis.

Notandum 3. Circa hanc determinationem, variam, & multiplicem esse Authorum sententiam. Sunt enim qui putant Angelos esse numerò infinitos: Volunt aliqui eos esse plures omnibus Creaturis corporeis, tam in specie, quàm in individuo consideratis. Refert etiam Author questionum ad Anthioicum, (quæ inter Athanasii opera extant) quosdam existimare Angelos ita haberi ad homines, ut nonaginta novem ad unum, ex parabola *centum ovium*: Alios sic, ut novem ad unum, secundum alteram parabolam *Drachmarum decem*, Alios denique æquali ambobus esse numero putant. Sunt etiam qui electos ad æternam felicitatem homines totidem fore censent, quot Angeli prolapsi sunt. Quid autem in tam multiplici, & ancipiti sententia verius nobis appareat, ut distinctè aperiamus, tria sunt in hac questione determinanda. *Primum*, an Angelorum numerus reverà sit infinitus: *Secundum*, an plures sint Angeli quàm res omnes corporeæ, tum in specie, quàm in individuo consideratæ: *Tertium* denique, an saltem numerus hominum excedat.

CONCLUSIO PRIMA.

ANGELI non sunt numerò infiniti. Hæc est communis apud Theologos, eamque egregiè probat Guillelmus Parisiensis *par. 2. secundæ partis de Universo cap. 17.* Ex eo quòd rerum Creatarum numerus necessariò sit determinatus ac limitatus. *Primò* quidem (inquit) ipsa determinatio adeò essentialis est numero, ut omni additione, vel diminutione nova ipsius speciei constituitur. Verbi gratia, si ternario unitatem addideris, alius numerus quàm sit ternarius, & alterius speciei constituitur, videlicet quaternarius: Si verò ei unitatem detraxeris, alius numerus, & alterius speciei, ex eo relinquitur, videlicet Binarius. Hæc igitur determinatio,

quæ essentialè dixi, prohibet omnem numerum recipere magis, & minus, & majoritatem, & minoritatem.

Secundò, Hæc determinatio constituit unumquodque numerorum in sua specie. Quapropter ubi determinatio mutatur, & species numeri cujuscumque mutatur, id est, alia est à priori: quia igitur necesse est unumquemque numerorum in aliqua specie numeri, vel sub aliqua esse, ut pote individuum: necesse est unumquemque numerorum determinatum esse, & limitatum, & esse binarium vel ternarium vel aliquem aliorum determinatorum: Quapropter impossibile est modis omnibus esse numerum aliquem infinitum.

Tertiò si esset numerus hujusmodi substantiarum infinitus, cum esset numerus, esset ex necessitate vel par, vel impar: Quòd si esset par, haberet medietatem, quæ vel esset finita, vel infinita: Si finita, totus numerus igitur esset finitus, cum esset aggregatus ex partibus finitis: Si infinita esset, non esset minor toto suo, quoniam non esset reperire numerum vel etiam cogitare, qui excederetur à toto suo.

Quartò omne quod recipit additionem super se est finitum, & terminatum additione hujusmodi, cum totum sit citra eam, & nihil omnino habens ultra: Quia igitur numerus omnis recipit additionem unionis supra se, vel etiam numeraliterius speciei, necesse est omnem numerum finitum esse. Quare impossibile est hunc numerum esse infinitum.

Quinò necesse est omnem numerum, & omnem mensuram genere esse quantitatem, quantitas autem est omne faciens quantum, & numerus est faciens quot; totus igitur cætus hujusmodi substantiarum, & numerò quantus est, & numerò quot, id

id est aliquot; quemadmodum non est aliquis, de quo non est assignare vel respondere *quis* neque *qualis*, neque *aliqualis*, de quo non est assignare, & respondere interroganti *qualis*. Quia igitur non potes assignare vel respondere de toto cœtu sive de universitate substantiarum de quibus agitur, quantus est vel quantum est numero, vel quot est; manifestum est non esse numerum aliquem hujusmodi substantiarum, non est igitur numerus infinitus.

Sexto Creator omnia formavit in pondere, numero, & mensura; quæ autem in numero sunt, numerabilia sunt, & quæ numerabilia sunt, in aliquo numero determinato sunt; neque enim intelligibile est aliqua esse in numero, & esse innumerabilia. Cum igitur numerus infinitus repugnet, etiam repugnat res creatas esse número infinitas. Adde quod Angelorum infinita multitudo nec ex Scriptura sacra, nec ex SS. Patribus, aut aliqua ratione fuaderi queat.

Dices 1. Job cap. 25. ait *numquid est numerus militum ejus?* Ac si diceret, non est numerus militum ejus, nempe Angelorum, quos idcirco Dei milites appellat, quia pro Dei gloria hominumque salute adversus Demones pugnant ab eo tempore quo factum est prælium magnum in cœlo a fidelibus Angelis contra perduelles: Ergo cum Angelorum numerus non sit determinatus, necessario cenferi debet infinitus. *Diffinguo* antec. Angelorum numerus non est determinatus respectu nostri concedo: respectu Dei nego; nam inquit S. Gregor. magnus in præfatum textum Jobi, *In cognitione humanæ rationis supernorum spirituum numerus non est, quia quanta sit illa frequentia invisibilis exercitus nescit.* & lib. 27. Moral. c. 9. confers præfatum textum Danielis, cum hoc supradicto addit, *Supernorum spirituum numerus infinitus est, & definitus*

Tom. IV.

est, & exprimitur; ut qui Deo numerabilis est, esse hominibus innumerabilis demonstratur. Fateor itaque illum ingentem Angelorum numerum à solo Deo determinatè posse cognosci, & idcirco nobis quasi infinitum apparere, uti etiam non rarò à SS. Patribus nominatur; quamquam reverà in se sit determinatus ac finitus.

Dices 2. Si finitus esset Angelorum numerus, maximè quia limitatus, & determinatus fuisset vel ex parte Dei creatoris, vel ex parte Angeli creabilis, vel ex utroque: at ex neutra parte videtur necessariò Angelos produci debuisse in certo ac determinato numero. Non quidem ex parte Creatoris; id enim proveniret vel quia non potuit, vel quia noluit Angelos infinito número producere: at neutrum rectè videtur asserendum; nullus enim (ait Guillelmus supra laudatus) adeò imbecillis, & brevis intellectus fuit, qui de virtute, & potentia Creatoris cogitaverit, quin ipsa sit in ultimitate tam amplitudinis, quam fortitudinis, quam libertatis; & propter ultimitatem fortitudinis incogibilis, ad id quod non vult, & improhibilis ab eo quod vult similiter infatigabilis, & indefectibilis. Ipsa etiam coarctatio seu determinatio non provenit ex parte bonitatis ipsius; cum enim æquè facilis fuerit ei creatio multarum, ut paucarum hujusmodi substantiarum, & infinitarum ut finitarum, quis hunc finem imposuit Creatori? quis cum sic limitavit, & stare fecit in numero finito? quis eum prohibuit in infinitum extendi? quis vel modicæ largitatis, si eadem facilitate posset dare magna, quæ parva, & multa, quæ pauca, & infinita, quæ finita, præsertim cum laudabiliter omnia dare posset, restringeret se, & arctaret, ad bona finita? Quanto fortius igitur largitas Creatoris dare non potuit in nu-

F

me-

mero aliquo vel etiam quantitate donabilem.

Non etiam illa limitatio, & determinatio repeti potest ex parte Angelorum, cum inter eos nulla esset contrarietas aut adversatio qua sese invicem ullatenus impedirent. Non enim apud eos est, quemadmodum apud substantias corporeas, loci angustatio, qua fit ut se-se invicem expellant.

Respondet idem Guillelmus id equidem provenire non ex parte Creatoris, sed Creature, quemadmodum (inquit) non defuit Creatori virtus sive potentia, ut mundum infinitum creare posset, sed mundo defuit potentia, cujus defectu infinitum creari non potuit; defuit enim ei receptibilitas infinitæ magnitudinis. Corpus enim aliquod non potest esse infinitæ magnitudinis, igitur mundus corporeus ut corpus esset, vel aggregatum ex corporalibus, necesse habebat esse finitus. Non igitur fuit attributa divina potentia, ut maiorem ei magnitudinem præstare non posset. Sed cum videret eum non posse recipere infinitam, providit ei finitam naturæ suæ congruentissimam, quæ omnia alia corpora capere sufficeret, & inter se continere. Sic etiam providit omnibus aliis corporeis naturis suis congruentissimas quantitates. Non enim sine causa formicam minorem esse voluit Elephantem, & muscam tam longè à magnitudine gruis vel aquilæ. Si tamen multitudo infinita esse non posset, ex parte multitudinis fuit ista finitio: quapropter stetit largitas, & bonitas Creatoris in numero determinato, quoniam indeterminatus esse non poterat seu infinitus.

CONCLUSIO SECUNDA.

ANGELI numero plures sunt quam species corporeæ, & præstantiorum specierum individua: Non videntur au-

tem tot esse quot individua specierum corporearum minus nobilium. Hæc videtur esse probabilior quantum ad utramque partem. Primam indicat sanctus Dionysius cap. 14. de celesti hierarchia ubi ait: *Multi sunt beati caelestium mentium exercitus, qui infirmum, & contractum numerorum corporeorum quibus utimur modum superant, & transseunt, atque scienter definiuntur à sola earum summa, caelestique intelligentia, ac scientia, quæ eis abundantissimè conceditur à Divinitate, & infinitæ cognitionis causa, quæ simul universarum rerum modo naturam superante principium est, & causa deficiens essentia, & vis continens, & completens determinatio.* Additque ibidem Dionysius Scripturam numerum Angelorum maximis numeris in se replicatis, & Myriadum Myriadibus explicare solere. Subscribit Æneas Gazæus tomo 2. biblioth. Græc. cujus in Theophrasto verba sunt ejusmodi. *Atqui intelligibilibus virtutibus plenum est cælum univèrsum, plena sunt terra, mare, & quæ sub terra sunt omnia, & quod quidam, nostris Sapientibus dixit, nihil est vacuum, ne tantillum, quidem ut vel arista, & pilus immitti possit.* Adeo ut etsi velit Deus ad decem annorum millia hominum propagare vitam, non tamen æquales numero futuras putem hominum animas, Angelorum, Demonumque multitudini.

Probatur etiam ratione Theologica: Quia cum perfectio Universi fuerit à Deo præcipue intenta in creatione rerum, quanto aliqua sunt magis perfecta, tantò in majori excessu fuerunt creata. Quare sicut Deus corpora caelestia incorruptibilia, & perfectiora, sublunaria in eo modo essendi condidit, ut essent in mole infinites penè majori, quàm sublunaria: sic Angelos incorruptibiliter creavit longè majori quantitate: non quidem continuâ, sed discretâ, id est majori numero, quàm cætera omnia ipsis inferiora.

Secunda pars etiam constat; Quis enim in animum inducet Angelos esse plures omnibus arenis maris, atomis aeris, olerum, & arborum foliis, culicibus, muscis, formicis, & omnibus fluvi-
orum, marisque piscibus, nec-non omnibus granis tritici, hordei, & omnium leguminum, quorum ingens numerus propè in infinitum vergit.

CONCLUSIO TERTIA.

PROBABILIS est numerum Angelorum excedere multitudinem hominum, qui sunt, fuerunt, & exituri sunt. Probatur primò ex illa parabola boni Pastoris, qui relictis nonaginta novem ovibus, quæsitum abijt unam deperditam, & inventam humeris reportat; ut legimus Lucæ 15. nam ovis illa unica, humana dicitur esse natura: Angeli verò undecentæ reliquæ. Sic S. Hilarius in Mathæum: Ovis (inquit) una, homo intelligendus est, & sub homine, uno, universitas sentienda est; sed in unius Ade errore omne hominum genus aberravit: ergo nonaginta novem non errantes, multitudo Angelorum celestium opimanda est, quibus in Cælo est lætitia, & cura salutis humanæ. Subscribit S. Amb. lib. 7. ad cap. 15. Lucæ; Dives igitur pastor (inquit) cujus omnes nos celestium portio sumus; habet Angelorum, Archangelorum, Dominationum, Potestatum, Thronorum, aliorumque innumerabiles greges, quos in montibus dereliquit, qui quoniam sunt rationabiles, non immeritò hominum redemptione lætantur.

Cyrillus quoque Hierosolymitanus cath. 15. non solum ex illa parabola idem colligit, sed hoc insuper argumento utitur, quòd ex loci magnitudine, incolarum multitudo æstimari debeat: est autem universa terra puncti iustar in unius cæli medio, in quo Angeli demorantur: Nam pro locorum magnitudine (inquit) hominum incolatus cogitandus est, quòd si hæc terra nostra est tanquam centrum in medio cæli, &

tantum habet multitudinem: quantum habebit multitudinem cælum, quòd terram ambit, & cæli cælorum! Immensam certè habent multitudinem.

Suffragatur etiam alia ratio petita, ex communi sententiâ Theologorum affirmantium singulis hominibus à Deo deputari custodem Angelum ex infimo ordine; ita quòd unusquisque hominum qui fuerunt à mundi primordio, & ad finem sunt exituri, peculiarem suum habuerit, aut habiturus sit Angelum; imò legimus in Revelationibus S. Briggæ lib. 4. cap. 11. tot esse in illo infimo ordine S. Angelos, ut ex illo pluraquam decem singulis hominibus in custodiam deputari possent. Cum autem plures sint in superioribus ordinibus Angeli, haud dubium est eos omnes longè numerum hominum excedere.

Dices: Homines salvandi tot sunt, quot Angeli mali, quia tot erunt beati homines quot ceciderunt Angeli, ruinam eorum ex pari numero reparaturi: Sed constat quòd tertia pars Angelorum cecidit, quando Draco tertiam partem stellarum traxit. Apoc. 12. homines verò, qui beatitudine donabuntur non sunt tertia pars hominum, siquidem Multi sunt vocati, pauci verò electi: ergo videntur esse plures homines, quàm Angeli; siquidem homines damnandi longè plures sunt, quàm salvandi, qui tertiam Angelorum partem exæquabant.

Respondeo 1. Falsum esse homines tantum ex accidenti ruinæ Angelorum, & non per se fuisse salutis destinatos; ideoque totidem præcisè salvandos.

Secundò incertum est, an illæ Angelorum sedes sint per homines tantum in eodem numero, & secundum eandem proportionem instaurandæ. Fortasse enim (inquit S. Augustinus in Enchiridio cap. 29.) Civitas illa celestis, nulla civium suorum numeroestate fraudabitur, sed uberiore etiam copia fortasse regnabit. Quia non scimus quantus sit

fit vel salvandorum hominum, vel malorum Angelorum numerus.

Tertiò denique dico incertum esse, an Lucifer tertiam partem Angelorum præcisè traxerit: nam Apoc. 12. numerus certus ponitur pro incerto. Et sensus litteralis est de Antichristo inducturo in errorem, & perniciem magnam partem fidelium etiam doctiorum, & præstantiorum, qui stellarum instar, in firmamento Ecclesiæ fulgent, ut docent Interpretes capituli citati, maxime Richardus lib. 4. in Apocal. Noster Liranus in eundem locum, & plurimi Recentiores postippos.

Dices 2. Tot sunt homines, quot Angeli: ergo Angeli hominum multitudinem non excedunt. Probaturs antecedens ex illo Deuteronomii 32. *Constituit terminos populorum juxta numerum Angelorum Dei*, ut legunt septuaginta Interpretes: nam pro eo quod est in Vulgata *juxta numerum filiorum Israel* legunt *filiorum Dei*, quibus Angeli possunt intelligi, ita quòd Deus constituerit numerum multiplicationis hominum juxta numerum Angelorum.

Respondet lectionem Vulgatam esse præferendam, ut colligitur ex Hebræo septuaginta interpretum, ut testantur Origenes, & alii. Sensusque est Deum cum Babylonæ linguas confunderet, & in varias terræ partes homines dispergeret; jam tunc terram Chanaan filiis Israel destinasse in sufficientem, & commodam habitationem: Tum etiam, quia licet propriè legatur, *juxta numerum filiorum Dei*; Inde solum colligunt antiqui Patres humana Regna, & Imperia divina esse, juxta numerum Angelorum, qui ad illorum custodiam deputati sunt, ut exponit Theodoretus orat. 10. in Daniele circa verba ista; *Princeps regni Persarum restitit mihi, &c.* Et juxta eundem sensum dixit Clemens Alexandr. lib. 7. Strom. parum à principio: *Sunt jussu divino, & antiquo per Gentes distributi Angeli.*

QUAESTIO SECUNDA.

An inter Angelos plures sint species, & solo numero distincti.

NOTANDUM 1. Ex Doctore Subtili duplicem in re qualibet creaturæ repiriri differentiam, nempe specificam, & individualem. Prima est inter illa, quæ differunt essentialiter, ut inter hominem, & equum, & hujusmodi differentia solum invenitur inter species distinctas, vel individua diversarum specierum: etiam inter ea, quæ nec specie, nec genere proximo conveniunt, ut inter hominem, & albedinem. *Secunda* est inter duo individua, ut inter duos homines, vel inter duos lapides, & universaliter inter ea, quæ conveniunt inter se specie specialissima, quæque plurificantur per differentias individuales. A quo autem sit petenda hæc differentia numeralis, variè invicem dissentiunt Authores, ut constat ex nostra Logica quæst. 2. de differentia individuali: Quidam enim eam repetunt ab existentia rei: Aliqui, cum S. Thoma, ex materia sive affecta quantitate, & aliis accidentibus, sive tantum secundum se considerata; Alii aliter sentiunt. Doctor verò Subtilis in 2. distinct. 3. docet eam differentiam esse aliquam entitatem ipsitivam, sed indistinctam formaliter à natura, quæ individuatur.

Notandum 2. Quòd etsi Angelus non sit physicè compositus ex materia, & forma, nec ex partibus quantitativis; tamen reverà compositus est Metaphysicè ex actu, & potentia, sive ex genere, & differentia, sive ex natura, & supposito. Nulla enim præter naturam divinam est substantia, quæ sit purus actus: hoc namque soli Deo convenit ex summa illius singularitate, & necessitate essendi; cum ipsum constituent in ultima actualitate, & unitate: inde essentia divina non est determinabilis, nec contrahibilis ad plura individua, quem-

quemadmodum naturæ specificæ in rebus creatis. Hinc implicat eam concipi, ut indifferentem ad plures Deos. An autem natura Angelica ita etiam sit singularis, ut non possit multiplicari in varia individua, controversatur apud Theologos.

Notandum 3. Circa præsentem questionem tres esse Theologorum sententias. *Prima* est S. Thomæ quæst. 50. art. 4. & in quæst. de spiritualibus creaturis act. 8. Cajetani de ente, & essentia c. 5. quæst. 9. & Aliorum affirmantium omnes Angelos differre specie inter se: esseque impossibile dari plures Angelos solo numero diversos. Impossibile, inquam, vel absolute, & simpliciter, ut sentiunt Cajetanus, & Alii per eum citati, vel de potentia ordinaria, quod videtur sentire S. Thomas Opusculo 16. *Secunda*, priori contraria, vult omnes differre solo numero. *Tertia* sententia, & media inter præcedentes, affirmat Angelos partim specie, partim numero solo differre.

CONCLUSIO PRIMA.

Admittenda est distinctio specifica inter Angelos. Probatur primò ex S. Dionysio cap. 5. de cælesti Hierarchia, ubi ait, *Enuntiant sanctorum voluminum traditiones, superiores substantiarum esse graduum inter se celsitudine differentes*. Differentia autem gradualis ad minus significat diversitatem specificam: nam plura individua solo numero differentia, non differunt inter se diversis gradibus, seu graduum celsitudine: Ergo ex S. Dionysio inter Angelos potest esse distinctio specifica.

Conclusionem probat Alensis in 2. Quæst. 20. membr. 6. Angeli de suprema Hierarchia plus differunt respectu eorum, qui sunt in infima, quam ab eis, qui sunt in suprema Hierarchia: sed illi, qui sunt in eadem Hierarchia, vel specie inter idem, vel idem genere, & differunt specie; Ergo Angeli, qui sunt in superiori

Hierarchia, cum plus differant ab his, qui sunt in infima, differunt specie. Item qui sunt in ordine Seraphico, plus conveniunt inter se, quam conveniant cum illis, qui sunt de ordine Cherubin, aut Thronorum; Ergo cum illi, qui sunt de ordine Seraphim inter se conveniant in specie, & differant secundum numerum, vel conveniant secundum genus, & differant specie; ita illi, qui sunt de ordine Seraphim differunt ab his, qui sunt de ordine Cherubin. Præterea ordines distinguuntur secundum officia; officia autem sunt differentia genere, vel specie: Ergo, & Angeli.

Probatur insuper: Id maximè asserendum est Deum constituisse, quod magis cedit in ipsius divinæ potentia, ac sapientiæ commendationem, & Universi pulchritudinem, quodque ex natura sua non repugnat: sed plures Angelos esse specie distinctos, nullatenus repugnat, idque maximè vergit in Dei commendationem, & Universi ornatum; Ergo &c. Probatur minor quantum ad primam partem, nempe quòd non repugnet, etenim illa repugnantia repetenda esset, vel ex parte Dei, vel ex parte Angeli: At ex parte Dei nulla potest excogitari: Siquidem Deus est infinitus in ratione substantiæ spiritualis, quemadmodum in omni alia perfectione: Ergo in tali ratione est infinita varietate participabilis, & imitabilis; adeoque conveniens est, ut à pluribus speciebus substantiæ spiritualis participetur: Adde quòd incredibile videtur tantam specierum varietatem, & multitudinem in rebus corporeis creari potuisse: In gradu verò spiritali completo, unicam tantum.

Non etiam repugnat ex parte Angelorum; Hæc enim repugnantia, si quæ esset, repetenda foret ex eo quod non possit explicari quænam esset illa diversitas specifica unius Angeli ab altero; sed hæc ratio nulla est, possunt enim

facile concipi habere differentias específicas, quibus invicem distinguuntur: Sicut enim differunt plusquam specificè, tum à Deo, tum ab anima rationali, utpote qui à Deo superantur perfectione substantiali intellectiva plusquam specificè, ipsique animas rationales excedunt, etiam quatenus spirituales, & intellectivæ sunt; Sic alii alios excedere possunt specificè in gradu intellectuali completo, & consequenter in operatione, itaut plura simul, & nobilius, perfectiusque intelligent: Unde etiam species, sive infusæ, sive acquisitæ habeant ampliores, & consequenter majori polleant volendi, & operandi facultate: Quod utique firmatur ex eo, quod Theologi passim cum S. Damasceno lib. 2. de Fide cap. 3. docent Angelos accepisse gratiam proportionatè ad sua naturalia, quatenus scilicet juxta naturarum differentiam, gratias Deus ampliores, aut minores ipsis contulerit.

Id etiam maximè conducit ad Universi pulchritudinem, quemadmodum enim specierum corporalium diversitas mundum visibilem, & sensibilem mirum in modum exornat; sic substantiarum spiritualium varietas mundum spirituale, & intellectualem illustrat.

Dices: Plurimi S. Patres affirmant Angelos esse ejusdem naturæ, & speciei: sic Athanasius, vel quisquis est Author questionum ad Authiochum qu. 3. affirmat eandem esse Angelorum, & Dæmonum essentiam, sicut, & hominum: At homines specie non differunt: Ergo nec Angeli. Subscribunt Damascenus lib. de Decretis cap. 1. Anselmus lib. 2. *Cur Deus homo*, cap. 21. Et Basilii lib. 3. contra Eunomium, dicens, *Prioritatem in Personis non impedire unitatem essentiae: Angeli enim priores sunt alii aliis, & tamen sunt ejusdem essentiae.*

Respondet: SS. Patres nomine essentiae, naturæ, vel speciei, intelligere gradum speciei subalternæ, nempe spi-

ritualitatem, & intellectualitatem, in quibus omnes Angeli univocè conveniunt, quæ ratione omnes creaturæ corporeæ dici possunt ejusdem naturæ, habent quippe rationem corporis, & materiæ communem.

Dices 2. Omnes animæ rationales sunt ejusdem speciei: Ergo etiam, & omnes Angeli; Consequentia videtur optima à paritate rationis; sicut enim animæ rationales in gradu rationalitatis, ita, & omnes Angeli in gradu purè spiritualitatis, & intellectualitatis conveniunt.

Nego paritatem, & ratio disparitatis hæc proferri potest, quod animæ rationales cum sint formæ naturæ suæ ordinatæ ad informandum corpus, ut cum eo constituent hominem, qui ex se mortalis est; idcirco, ne Universum unius, aut alterius hominis interitui, privaretur tota aliqua specie, vel pluribus, debuit tota hominum multitudo esse unius, & ejusdem speciei. Non sic autem est de Angelis, cum enim unusquisque ex natura sua sit incorruptibilis, nec ad sui conservationem indigeat multiplicatione, aut aliqua propagatione individuorum in sua specie infima: Hinc est, quod Angeli potuerunt esse diversæ speciei.

Dices 3. Tota distinctio, quæ inter Angelos statuitur, nobis tantum appareret, vel ex donis ipsis à Deo concessis; vel ex officiis, ad quæ deputantur; Sed hæc subsistere possunt in Angelis ejusdem naturæ, & speciei: Ergo nulla inter eos videtur esse specifica distinctio.

Respondet: Equidem Angelorum distinctionem ex illis assignatis capitibus apparere, & colligi à posteriori, & quasi per quemdam locum extrinsecum: At verò longè melius nobis insinuatur illa Angelorum specifica diversitas, ex illis rationibus superius à nobis designatis.

CONCLUSIO SECUNDA.

Probabilius est Angelos plures esse ejusdem speciei, & solo numero differentes. Hæc est Doctoris, & omnium penè Theologorum paucis demptis Thomistis, qui contrarium cum Cajetano propugnant. Eam prius docuerat Seraphicus Doctor in *dist. 3. prima parte distinctionis, artic. 2. quest. 1.* ubi ait; Quidam dixerunt, quod in Angelis est discretio personalis, sed nunquam purè, imò sunt tot species, quot individua, similiter dicunt in luminariibus. Sed licet hoc probabilitatem habeat in corporibus cœlestibus, non tamen videtur rationabile in spiritibus, ut nullus communicet cum alio in natura spiritali, & specifica: Sicut enim innotescit per Scripturam, multi Angeli ad idem officium ordinantur, & communem videntur habere operationem eandem: Non autem per Scripturam, nec per dicta Sanctorum, nec per officia innotescit tanta diversitas: Ideo non videtur, nisi præsumptio hoc dicere, maximè cum non appareat in promptu aliqua ratio cogens, alia est positio sobria, & Catholica, quæ in Angelis, distinctionem ponit quantum ad personalitatem tantummodo, aut in omnibus, aut in aliquibus.

Subscribit etiam S. Thomas Opus. 16. de unitate intellectus contra Averroistas, ubi ait: Sic ergo intellectus, si naturaliter esset unus omnium, quia non haberet naturalem causam multiplicationis, posset tamen sortiri multiplicitem ex supernaturali causa, nec esset implicatio contradictionis: Quod non tantum dicimus propter propositum: sed magis ne hæc argumentandi forma ad alia extendatur: Sic enim possent concludere, quod Deus non potest facere, quod mortui resurgant, & quod cæci ad visum reparentur.

Nec valet reponere cum Gonetio, intentum Angelici Doctoris in prædicto loco, esse tantum, quod non repugnet intellectualem naturam, ex eo quod intellectualis est, multiplicari, dummodo dicat ordinem ad materiam: De Angelis autem, inquit, nihil ibi tractat, quia repugnantia multiplicationis eorum non oritur ex natura intellectuali, ex eo quod immaterialis, & incorporea est, sed ex eo quod omnino separata, & irreceptibilis sit, ita quod nec materiam includat, nec ordinem dicat ad illam. Hæc, inquam, replica nulla est: siquidem Angelicus Doctor absolute pronuntiat, quod si intellectualis substantia non haberet naturalem causam multiplicationis, posset tamen fortiri multiplicationem ex supernaturali causa. Hoc est, etsi non diceret ordinem ad materiam, quæ in ejus mente est causa naturalis individuationis, posset tamen virtute supernaturali multiplicari numero, quia id contradictionem non implicat: quidquid autem contradictionem non implicat, fieri potest à Deo.

Adde quod anno 1325. à sacra Facultate Parisiensi agente Stephano Episcopo, proscripti sunt, & damnati sequentes articuli 1. *Quia intelligentia non habet materiam, Deus non potest facere plures ejusdem speciei*: 2. *Dens non potest multiplicare individua sub una specie, sine materia*. 3. *Formæ non recipiunt divisionem, nisi secundam materiam*. Et meritò quidem præfati tres Articuli fuerunt proscripti: Non est enim denegandum aliquid divinæ potentia, quod manifestam contradictionem non involvit; quia non est impossibile apud Deum omne verbum? Quamvis autem plenè, & evidenter non percipiamus quomodo distinguerentur illi duo Angeli intra eandem speciem; nihilominus plura novit Deus facere, quam nos intelligere; nam Philolophi reputant, quod à privatione perfecta,

&

& consummata ad habitum non est possibilis regressus; At Deus non docuit mortuos posse resurgere, & cæcos ad visum reparari. Philosophi etiam impossibile reputant accidens posse esse sine subiecto, & quod Deus fieret homo, quod pateretur &c. attamen philosophis licet reclamantibus, hæc omnia postmodum Deus opere complevit.

Probat conclusionem Doctor Subtilis loco laudato numero 3. Nulli speciei infimæ repugnat communicari posse pluribus: Ergo nec repugnabit habere sub se plura inferiora solo numero distincta; subindeque poterit Deus plures Angelos numericè distinctos sub eadem specie atoma producere. Consequentia patet; Probatur antecedens: Si alicui speciei infimæ repugnaret communicari pluribus, vel hæc repugnantia proveniret ex perfectione, vel ex imperfectione talis speciei: Non ex perfectione, quia communicabilitas convenit naturæ sive quidditati divinæ, quæ tamen est summè perfecta: Non etiam ex imperfectione, quia communicari pluribus, convenit speciebus infimis substantiæ corporeæ, quæ tamen sunt imperfectiores speciebus infimis naturæ Angelicæ: Ergo nulli speciei infimæ pluribus communicari repugnat; adeoque nec Angelicæ repugnabit.

Huic rationi ut respondeant Recentiores Thomistæ, observant cum Cajetano *Opusculum de ente, & essentia cap. 5. quæst. 9.* Triplicem esse speciei infimæ sive quidditatis communicabilitatem. *Prima* est, quæ fit cum limitatione ipsius ad certum gradum suæ perfectionis, & dicitur communicabilitas naturæ universalis respectu suorum inferiorum. *Secunda* est, quæ fit absque limitatione naturæ ad certum gradum suæ perfectionis, quo pacto natura, sive quidditas divina dicitur communicabilis tribus Personis. *Tertia* denique est illa, quæ fit per assumptionem alicujus naturæ ad hypostaticam unionem, &

ita natura humana dicitur communicabilis tribus Personis divinis, in quantum videlicet quælibet ex illis potest illam assumere ad unionem hypostaticam. Quibus præmissis, negant antecedens de quocumque ex illis tribus modis accipiatur; Nam si primo modo, est falsum, quia essentia divina non est communicabilis primo modo. Si secundo modo, etiam falsum est, quia nulla Essentia sive quidditas, vel species infima creata, est communicabilis hoc modo: Si denique antecedens intelligatur de tertia communicabilitate, falsum, est etiam, ut patet exemplo naturæ divinæ, quæ non potest assumi à pluribus suppositis ad unionem hypostaticam.

Contrà: Ratio Doctoris rectè procedit; fundatur enim in illa maxima: *Quidquid competit generi sive prædicato, competit speciei sive subiecto:* Nam communicabile in illo antecedenti, accipitur in communi, & quatenus est indifferens ad illos tres modos: quasi diceret Doctor, omnis quidditas est communicabilis; Natura angelica est quidditas; Ergo est communicabilis, quod argumentum est optimum, quia est à toto, ut genus, ad species, nam quidditas est genus, & essentia angelica est una species illius: Ergo prædicatum, quod competit illi generi, nempe quidditas, debet competere quoque ejus speciebus; ex quo sequitur, quod cum natura angelica sit quidditas, etiam sit communicabilis altero illorum modorum; cum autem primo modo sibi repugnet communicari, à sufficiente divisione sequitur, quod secundo modo communicetur, vel sit communicabilis. Nam licet à superiori ad inferius affirmativè non valeat consequentia; Non enim sequitur *est animal:* Ergo *est homo:* benè tamen à superiori descendendo ad inferius per distributionem. Sequitur enim optimè *Petrus est animal:* Ergo *est homo, vel brutum, sed non est brutum:* Ergo *est homo:* Ita in propositione.

fito, naturæ angelica, quæ est species, est communicabilis pluribus: Ergo vel sine divisione, seu distinctione numerica sui, vel cum ea: sed non sine divisione numerica sui, quia hoc soli divinæ naturæ competit: Ergo cum divisione sui numerica.

Probat secundò Doctor: Omnis natura, quæ potest intelligi sub ratione universalis absque contradictione, est plurificabilis numero; Si enim esset de se hæc, repugnaret ei intelligi sub ratione universalis, sicut repugnat essentia divinæ, quod intelligatur sub ratione universalis, quia essentia divina est de se hæc: sed omnis natura creata potest intelligi sub ratione universalis absque contradictione: quia nulla est de se hæc, alioqui per potentiam Dei absolutam non posset multiplicari, etiam specificè, Ergo, &c.

Confirmatur: Licet enim Sol, v.g. sit unus numero in sua specie, tamen intelligitur in universali, siquidem de eo assignatur definitio, quæ competet aliis individuis Solis, si darentur: Ergo omnis natura creata est multiplicabilis numero.

Reponunt Thomistæ aliquid posse dici *universale* duobus modis, scilicet vel ex parte rei, vel ex parte intellectus: Primò modo, quando res, quæ dicitur universalis, reverà est in pluribus, ut animalitas in homine, & bruto, vel humanitas in Petro, & Paulo. Secundo modo quando res illa ab intellectu percipitur secundum se, & absque eo quod invenitur in pluribus, sed solum representetur sine conditionibus individuantes, quæ sunt materia, & quantitas: Quibus præmissis, dicunt naturam angelicam non posse intelligi sub ratione universalis primo modo, sed tantum secundo modo, quia illa quidditas angelica intelligitur tantum sine conditionibus individuantes, non tamen invenitur in pluribus individuis; unde non habet fundamentum univer-

salitatis primo modo: Illa autem propositio major, est vera in primo sensu, sed tunc minor est falsa, in secundo autem sensu minor est vera, sed major est falsa.

Contra: Omne ens creatum, vel est universale, & commune, vel particulare, aut individuum: sed quidditas Angeli non est de se hæc, & individua; Ergo est universalis, Major est clara. Minor probatur: Ubi non est ratio, & causa individuationis, ibi non est individuatio, nec talis res est individua; sed in quidditate Angeli, ut volunt Thomistæ, non est principium individuationis: Ergo illa quidditas non est individua, neque de se hæc: Ergo est universalis. Præterea, si esset de se hæc, esset, ut essentia divina, implurificabilis etiam per divinam potentiam in plures species, quod est absurdum. Consequentia etiam patet, siquidem inter universale, & individuum non est medium, quia universale est id, quod est in multis, & dicitur de multis, singulare verò dicitur de uno solo, scilicet de se ipso. Ex quo infero, quod non solum ex parte intellectus, sed etiam ex parte rei, quidditas Angeli est intelligibilis sub ratione universalis, quia ex parte rei non est de se hæc, & individua: Ergo est universalis, sive communis, & consequenter multiplicabilis in plura numero distincta.

Deinde (inquit Rada) distinctio Cajetani implicat, quia de ratione universalis est posse de pluribus dici, & in pluribus esse: Ergo dividere universale in illud, quod est in pluribus, & in illud, cui repugnat esse in pluribus, est dividere universale, in se, & in oppositum sui.

Confirmatur. Non potest intellectus verè applicare alicui intentionem universalitatis, nisi reperiatur in re fundamentum, aliàs enim ita bene posset secunda intentio speciei applicari naturæ generice, sicut specificæ, & inteu-

tio generis individuo sicut generi: Ergo necessum est aliquid esse in re fundamentum ad hoc, ut intellectus rem sub ratione universalis concipiat: Ergo cum intellectus concipit naturam Angeli Michaelis, v.g. sub ratione communis, vel communicabilis pluribus, fundamentum in ipso invenit, & absque contradictione, & repugnantia ei potest secundam speciei intentionem applicare.

Probat tertio Doctor, potest Deus annihilato uno Angelo ejus speciem reproducere in alio individuo. Non eodem, qui erat antea, quia idem numero Angelus annihilatus, non potest reproduci, in sententia Thomistarum asserentium, quod si eadem numero anima non remaneret incorrupta, sed simul cum ipso corpore anima destrueretur, non posset idem numero homo resurgere, ut expressè docet S. Thomas in 4. distinctione 44. art. 2. quest. 2. ad tertium: Ergo in diverso individuo ab eo, quod fuerat prius, subindeque possibilia sunt plura individua sub eadem specie ultima naturæ angelicæ, saltem de potentia Dei absoluta.

Respondent Thomistæ concedendo, quod Deus annihilato uno Angelo possit ejus speciem reproducere in aliquo individuo: Negando tamen, quod illud individuum non esset illud idem, quod fuisset annihilatum, sed diversum. Ad probationem in contrarium dicunt, quod licet non possit idem numero homo, annihilata anima rationali ipsius resurgere, bene tamen iterum creari sive reproduci: Et ratio disparitatis est, inquit, quia resurrectio non verò reproductio, sive iterata creatio hominis, existentiam partis ipsius, scilicet anima rationalis requirit.

Contra primò: Doctor Subtilis arguit ad hominem contra S. Thomam, nempe quòd fieri non possit reproductio alicujus, nisi subsisteret ejusdem pars aliqua incorrupta; si autem desineret esse

Angelus, cum ipsius nulla pars incorrupta subsisteret, non posset Deus eundem reproducere: Deberet ergo alium ab ipso numerò distinctum creare: Et sic verum esset quòd eadem natura specifica duobus Angelis numerò distinctis esset communis. *Deinde*, Vel Deus potest creare alium Angelum ejusdem speciei cum Gabriele, vel non: Si sic, habetur intentum; si non: Contra, Deus potest quidquid non implicat contradictionem: At duos Angelos esse ejusdem speciei non implicat contradictionem: Ergo, &c. Assumptum probatur, si quæ esset contradictio, proveniret ex eo quòd differentia numerica petenda esset à materia: sed hoc est falsum: Tum quia unus Angelus non solum differt specie ab alio Angelo, sed etiam numero: Sed nullus Angelus habet materiam: Ergo differentia numeralis in Angelis non sumitur à materia. Tum quia animæ rationales à corpore separatæ distinguuntur numerò, nec tamen materiam habent. Tum denique quia, duo lumina gloriæ, duæ visiones beatificæ, duo actus intellectus aut voluntatis angelicæ circa idem objectum simili modo tendentes; similiter duo habitus supernaturales fidei, aut spei, aut charitatis, numericè differunt, & tamen carent materia.

Respondunt Thomistæ, quòd licet illa non consent materia, eam tamen connotant, & respiciunt: Nam animæ rationales dicunt ordinem ad diversa corpora quæ informant, accidentia verò spiritualia ad subjectum cui inhaerent, quod licet immateriale sit, gerit tamen vices materiæ quatenus illa recipit, & sustentat.

Contra: Si multiplicabilitas numeralis animæ oriretur ex habitudine illius ad corpus, sequeretur quòd data illa habitudine poneretur etiam illa multiplicabilitas: Sed hoc est falsum, nam si possibile esset unica anima, haberet habitudinem ad corpus, nec tamen

ef-

esset ab alia numero distincta. Deinde inclinatio ad corpus, est aptitudo unius ad alterum: Ergo supponit aliquid prius, adeoque animæ substantia prius concipi debet numero distincta ab alia anima, quàm concipiatur dicere ordinem ad corpus. Denique si animæ sint numero distinctæ, quia possunt informare diversa corpora; sic etiam poterunt dari diversi numero Angeli, quia possunt esse in diversis locis, & habere diversas operationes.

Confirmat Has rationes Doctor Subtilis autoritate S. Augustini in Enchiridio, ubi ait, *Placuit itaque universæ creaturæ Creatori atque Moderatori Deo, ut quoniam non tota multitudo Angelorum Deum deferendo perierat, illa quæ perierat, in perditione perpetua remaneret; quæ autem cum Deo, illa deserente, perlitterat, de sua certissimè cognita semper futura felicitate gauderet. Alia verò creatura rationalis, quæ in hominibus erat, quoniam peccatis atque suppliciis, & originalibus, & propriis tota perierat, ex ejus parte reparata, quod Angelicæ societati ruina illa Diabolica minuerat, suppleretur.* Ex quibus sic arguo: Ista totalitas, & partialitas in Angelis, non potest salvari nisi quia aliqua species Angelica quantum ad omnia individua non perierat totaliter, & ita aliqui de quacunque specie corruerunt, & aliqui persisterunt: Ergo in eadem specie, non solum possunt esse plura individua, sed de facto videntur esse plura.

Dices primò: Repugnat quòd forma simplex, id est à materia, tam actu quàm aptitudine separata, seu quæ nullum dicit ordinem ad materiam, solò numero multiplicetur: Talis est natura Angelica: Ergo repugnat illam intracandem speciem solò numero multiplicari. Minor patet ex dictis art. 1. Major verò quam negant Adversarii multipliciter ostenditur ex Aristotele. *Meta. cap. 6. circa finem* dicente, *Alia numero,*

alia specie, alia genere, alia analogiè unum sunt.

Respondeo cum Doctore quòd Aristoteles ibi accipit *materiam* pro illa entitate individuali, quæ constituitur in esse materiali, non autem in esse formali, pro ut *quidditas* dicitur forma, quia ista entitas non est quidditativa: Patet, & ista expositio, per illud quod subdit, *Specie unum sunt quorum ratio est una;* Ratio enim ibi sumitur pro quidditate, quæ dicitur forma respectu esse individualis; quemadmodum enim materia non est præcipua pars compositi Physici; ita differentia individualis, non est præcipua pars in composito Metaphysico, Natura enim specifica est tota individui natura.

Respondeo secundò; Quòd etsi reverà Aristoteles loquatur de materia Physica, propterea non est audiendus à Theologis; vera quidem esset illatio secundum ejus principia, nempe quòd non possent Angeli multiplicari numero in eadem specie, quia docet substantias immateriales esse entia necessaria, & consequenter illas habere actu quiddi ipsi competere potest: Unde si possent habere plura individua, illa necessario haberent: Cumque nulla sit ratio cur habere non possint infinita (si, ut putat Aristoteles, essent entia necessaria) si plura habere possint individua, etiam, & infinita possent habere, & sic necessario darentur infiniti Angeli: Quòd cum sit absurdum, etiam absurdum est ex principiis Philosophi, quòd natura Angelica sit multiplicabilis numero. Cum autem principium ex quo talem illationem inferi sit falsum, nempe quòd omnis quidditas, carens materia Physicà sit necessario existens, etiam, & conclusio ex eo illata omnino falsa est, nec à Theologis usurpanda?

Dices secundò; Omnis differentia formalis est specifica: sed Angeli invicem differunt differentia formali, quia sunt formæ distinctæ: Ergo necessario omnes

differunt specie, adenque inter eos nulla differentia numerica.

Respondet Doctor, differentiam formalem posse bifariam accipi. Primò quidem pro differentia quæ fit per formam: Secundò, pro differentia formarum, seu pro formis ipsis quæ differentiam efficiunt. Primò modò major est vera; sed minor falsa: Secundò autem modò major est falsa. *Ad probationem* autem quæ sic posset formari, Angelus differt ab Angelo quæ est forma: Ergo habent inter se differentiam formalem. Dicit Doctor ibi esse fallaciam consequentis: Non enim sequitur, formæ differunt; ergo formaliter seu per formam differunt: sicut non sequitur, plures homines invicem distinguuntur, igitur per humanitatem differunt, invicem enim differunt per suas differentias individuantes ab aliis, non per suam humanitatem. Unde aliud est aliquid distingui, & aliud esse rationem distinctionis: Petrus enim per humanitatem distinguitur à Bucephalo, non verò est ipse ratio distinctionis, sed ipsius humanitas.

Dices tertio: Omnis forma separata à materia habet totam perfectionem suæ speciei: Sicut albedo si esset ab omni subiecto separata, haberet totam perfectionem albedinis: sed Angelus est forma separata à materia: Ergo habet totam perfectionem debitam suæ speciei; adeoque non possunt esse plures Angeli numero distincti in unica specie. Probatur major: Si totam perfectionem suæ speciei debitam non haberet, deberet eam participare: sed id fieri nequit; quia ut participaret ipsa forma deberet habere rationem materiæ perfectibilis, siquidem perfectibilis esset per illam perfectionem quam acciperet. Quam rationem materiæ cum non habeat, etiam non potest participare perfectionem suæ speciei; adeoque debet illam omnimodam perfectionem suæ speciei in se continere, sicque non po-

test esse alius ejusdem speciei Angelus.

Negat majorem Doctor, cum sua probatione; ex eo enim quòd aliquid careat materia, non sequitur præcisè quòd debeat habere omnimodam perfectionem suæ speciei, cum enim illa natura specifica sit multiplicabilis in infinitum, si unum ejus individuum deberet habere totam perfectionem suæ speciei, necessario haberet perfectionem infinitam, saltè extensivè, quod est absurdum.

Respondet secundo, Negata majore, distinguendo ejus probationem: Si participaret perfectionem speciei, deberet habere rationem materiæ primæ Physicæ quæ ordinatur ad formam Physicam, negat: Materiæ Metaphysicæ, hoc est, naturæ specificæ, quæ ordinatur ad formam Metaphysicam, nempe ad differentiam individualem per quam contrahitur, & determinatur ad esse individui, concedit: sed exinde nihil inferitur contra veritatem conclusionis.

Dices quarto: In entibus perfectis, qualis est Angelus, nihil est quod non intendatur per se à natura: sed pluralitas numerica non intenditur per se à natura, quia pluralitas talis, quantum est ex se, potest esse infinita; Infinitum autem non potest per se intendi à natura, quia natura non intendit quod producere nequit: Cum autem sit limitata in entitate, & operatione sua, nequit infinitum producere.

Respondet Doctor negando minorem, cum consequentia probationis: Quamvis enim pluralitas numeralis possit esse infinita, non tamen necessario debet esse infinita, & consequenter quamvis non intendat natura per se pluralitatem infinitam; non sequitur quin intendat pluralitatem aliquam quæ non sit actu infinita, qualis reverà est Angelorum multitudo, ut probatum est in præcedenti quæstione.

Dices quinto: Multitudo individuum solùm intenditur propter conformationem speciei, quæ in corruptibili-
bus

bus deficeret, nisi propagaretur in pluribus individuis, ut ait Aristot. 2. de anima: sed hæc ratio nulla est de Angelis: Cum enim sint immateriales, & incorruptibiles, salvari posset species in unico.

Confirmatur: Intra genus substantiæ corporeæ incorruptibilis, Deus unicum numero individuum produxit, puta unum Solem, Lunam unicam, & stellas singulas specie ab invicem distinctas: Ergo à pari idem dicendum de Angelis, qui sunt substantiæ spirituales incorruptibiles.

Negat majorem Doctor, Cum enim, inquit, rerum omnium Artifex præcipue intendat bonum, & ordinem Universi in rerum formatione, non solum debet intendere earum diversitatem secundum speciem, sed etiam multitudinem secundum individua; quia utrumque maxime conducit ad ordinem, & pulchritudinem Universi; Nam, inquit S. Augustinus lib. 19. de Civit. Dei. cap. 13. *Ordo est parium, & imparium rerum, unicuique sua loca distribuent congrua dispositio:* Ubi per res impares, intelligit rerum essentias, quæ in perfectione quidditativa æquari nequeunt, alias non essent species, & essentiæ diversæ: Per res pares autem, intelligit individua sub eadem specie atoma contenta; quæ ob id dicuntur paria quia eandem omnino perfectionem essentialem participant. Adde quod, inquit sanctus Damascenus in Elementario cap. 12. congruum fuit plures Angelos in eadem specie producere, *Ut communicantes ad invicem naturam, gaudeant invicem; & naturali beatitudine copulati, ad invicem securè, & amicabiliter disponantur.*

AD CONFIRMATIONEM nego antecedens: Verisimilius enim est Cælos omnes, & stellas plurimas esse ejusdem speciei, quamvis etiam aliquæ specie differant, ut ex eorum influxu vario ac diverso colligi potest. Vel nego conse-

quentiam: Disparitas enim est quod productio plurium individuorum in illis rebus cælestibus, aut esset inutilis, aut officeret Universo: esset, inquam, inutilis, cum quidquid luminis præstari posset per duos Soles, v. g. sufficienter per unicum profundatur: officeret etiam Universo: Illi enim duo Soles, cum non possent lucere simul, oportere ut occidente uno alter oriretur, siquæ nulla esset dierum ac noctium alternatio, nec proinde tempus quietis pro animalibus, nec refrigerationis pro terrenis, quippe cum alternantes Solis æstus omnia torrerent. Non sic autem de Angelis, qui cum distincta habeant munia erga diversos homines regendos, & varias res administrandas, etiam diversi esse possunt cum summa Universi utilitate.

Hæc omnia luculenter expendit, & confirmat Guillelmus Parisiensis in 2. parte primæ partis de universo cap. 21. Non est verisimile (inquit) sapientissimum Creatorem omnes simplices spirituales substantias creasse per omnia æquales, & in omnibus similes: Quemadmodum neque in aliqua specie sensibilium substantiarum hoc ei facere placuit, sicut neque omnes homines, neque equos, & eodem modo se habet in aliis omnibus speciebus substantiarum sensibilium, Prævidit enim atque prænovit sapientia, & bonitas Creatoris, quod ex ipsa inæqualitate, dissimilitudine, atque varietate augetur inestimabiliter ipsa speciositas illius præclaræ ac nobilissimæ Civitatis suæ supercælestis. Quemadmodum enim ipsam multiti-
 „ tiam ornat atque decorat diversitas,
 „ & quemadmodum frequentiam ministrorum ac ornatum varietas efficit spectantibus gratiorem: Sic donorum naturalium, hoc est, scientiarum, & virtutum, multifortis speciositas militias illas substantiarum simplicium atque spiritualium spe-

„speciosiores efficit, & universitati
 „ipsarum plurimum delitiæ tribuit, &
 „decoris; instar amœnissimi prati, cui
 „florum quantum major est diversitas,
 „ac multiformior varietas, ac multi-
 „formior speciositas, tanto est oculis
 „spectantium magis grata, ejusdem-
 „que præstantior pulchritudo. Sic in
 „veste se habet colorum varietas. Sic,
 „& in picturis, & in omnibus aliis que
 „fiunt ad pulchritudinem, & deco-
 „rem. Evidens autem de hoc exem-
 „plum est Cœli stellarum fixarum va-
 „rietas, quæ tantam pulchritudinis
 „speciem ei præstat.

QUÆSTIO TERTIA.

*Quid, & quot sint Angelorum Hierar-
 chia, & Ordines?*

NOTANDUM 1. HIERARCHIÆ voca-
 bulum Græcum esse, quod sacrum
 principatum sonat, seu collectionem
 personarum aliquo modo sacrarum sub
 aliquo Principe. Triplicem autem Hier-
 archiam distinguit sanctus Dionysius
 lib. de cœlesti Hierarchia cap. 3. *Prima*
 (inquit Hugo Victorinus in explana-
 „tione ejusdem libri,) principalis om-
 „nium, & forma, & exemplar reliqua-
 „rum summa, & ineffabilis potestas
 „est Trinitatis: Simplex, & una, &
 „uniformis, sine gradu, & differen-
 „tia, & comparatione, summa, &
 „æterna, & perfecta, & vera, in om-
 „nia opera sua condenda, & regenda,
 „propria virtute omnipotens; nihil
 „externum suscipiens, nihil suum
 „amittens. *Secunda Hierarchia* in An-
 „gelica natura formata est, adoptione,
 „& participatione, & dignatione
 „à prima, & suprema, & ad primam
 „secunda similitudine sublimis gra-
 „dum habens, & differentiam susci-
 „piens, & comparationem admittens;
 „Post summam Trinitatem secunda
 „emulatione, trina divisione distin-

„ta. *Tertia, & ultima Hierarchia*
 „in humana natura ordinata est: Se-
 „cundam primò, & primam secundò
 „loco imitans, & imaginem summam,
 „& super excellentem similitudinem
 „per media participantia suscipiens,
 „& referens per id ipsum ut ab uno
 „totum sit, & ad unum totum, & to-
 „tum unum.

Adverte tamen in Deo non esse pro-
 priè Hierarchiam, cum nec inter tres
 divinas Personas sit principatus, nec
 ordo, nec superioritas aut inferioritas
 dignitatum. Unde ibidem docet S. Dio-
 nysius, *Deum esse extra, & supra om-
 nem Hierarchiam; nam omnis Hierar-
 chia ad illius imitationem, & similitudi-
 nem existit.*

Notandum 2. Triplicem à SS. Patri-
 tribus, & Theologis distingui Angelo-
 rum Hierarchiam, nempe supremam,
 mediam, & infimam, quarum quælibet
 tribus distinctis ordinibus integratur.
Prima namque, inquit, noster *se Petit*
 cap. 6. de Angelis, complectitur Sera-
 phinos, Cherubinos, & Thronos: *Seraphini*
 sic dicuntur, ab ardore dilectio-
 nis, & ferventissimo Dei amore in quo
 alios excedunt, & ad quem inferiores
 excitant; ita ut continuo sint ardentes,
 inflammati, & accensi amoris igne quo
 excellenti modo Deum prosequuntur,
 dum eum contemplantur proximiores
 tantæ, & admirabili ejus majestati, ut
 scribunt S. Gregorius, S. Dionysius,
 S. Thomas, &c. *Cherubini* dicuntur ob
 scientiæ plenitudinem, & excessum quò
 alios inferiores excedunt, illudque
 splendidissimum lumen tanquam luci-
 dissimi Soles in alios effundunt. *Thro-
 ni* sic appellantur, quia in illis Deus pla-
 cidiori quodam modo specialiter quie-
 scit; unde dicuntur sedes Dei ad divinos
 fulgores in se suscipiendos, & alios in-
 feriores transfundendos. *Secunda Hierar-
 chia* comprehendit Dominationes
 Principatus, & Potestates. Dicuntur
 autem *Dominationes* ob excellentiam
 Do-

Dominii, quia videlicet alios excedunt in imperatione rerum agendarum, *Principatus* sic vocitantur, quia Regnis, & Provinciis præfunt, & respectu inferiorum Angelorum principes dici possunt, eos instruunt, illuminant, & movent in his quæ ad salutem omnium hominum pertinent, juxta Dei voluntatem sibi manifestatam. *Potestates* sic dicuntur, ob magnam, quâ pollent, potentiam, & potissimum ad coercendos infernales Spiritus, ne incommoda hominibus inferant.

Tertia Hierarchia complectitur Virtutes, Archangelos, & Angelos: *Virtutes* sic nominantur, quia ad illos spectat patrare miracula, & signa ac prodigia facere; nam licet omnes Spiritus miracula facere possint; hoc tamen Virtutibus spiritualiter tribuitur: Illo præterea donantur nomine, quod mascula quadam fortitudine hi Spiritus prompti, & expediti ad divinum sunt obsequium; & etiam opem largiuntur aliis Angelis se inferioribus. *Archangeli* hominibus ex præscripto Dei majora nuntiant, & graviora expediunt negotia, & personas graves custodiunt: *Angeli* verò, quia minora nuntiant negotia vel ea perficiunt, quia peculiare aliquod nomen non habent, communi nomine omnibus aliis Spiritibus donantur: eorum munus est homines custodire.

Notandum 3. Quod licet præfata nomina singulis Angelorum ordinibus peculiare characteres exprimant, nihilominus interdum accipiuntur ut omnibus communia, ita ut nomen proprium unius ordinis tribuatur Angelis alterius ordinis: Sic promiscuè omnes illos beatissimos spiritus *Angelos* appellat S. Chrysostomus Homilia 3. contra Anomæos: Hilarius quoque *Virtutes* universè sic accipit lib. 3. *Virtutes*, inquit, in Cælo plures sunt, & efficientes, & æternæ; sed unus Unigenitus est Filius. Cur autem Angeli, & Virtutes sic omnes appellentur; prioris appella-

tionis causam profert S. Gregorius Homil. 34. in Evangelia, quod per eos aliquid nuntiantur, nam non extremi tantum ordinis Spiritus, sed supremi etiam non-nunquam, ad homines, & nuntiorum fungi munere plures existimant. *Virtutes* autem omnes Angeli dicuntur, inquit, S. Dionys. cap. 11. quod beata illæ mentes, hæc tria habent *essentiam* sive substantiam, *vim* sive virtutem, & *efficientiam*.

Hæc disertè explicat S. Gregorius magnus homilia 34. in Evangelium. *Plerumque*, inquit, *ipsi beatorum Spirituum ordines, vicinorum sibi ordinum vocabula sortiuntur*: Thronos etenim *scilicet sedes Dei, specialem beatorum Spirituum ordinem diximus*, & tamen per *psalmistam dicitur QUI SEDES SUPER CHERUBIM APPARE*: quia videlicet dum in ipsi distinctionibus agmina Cherubim Thronis junguntur, *sedere etiam super Cherubim Dominus ex vicini agminis æqualitate perhibetur*. Sic enim in illa summa civitate specialia quedam singulorum sunt, ut tamen sint communia omnium, & quod in se ex parte quisque habet, hoc in alio ordine possidet: Sed idcirco uno eodemque vocabulo communiter continentur, ut ille ordo vocari privatus uniuscujusque rei nomine debeat, qui hanc in munere plenius accepit. His prælibatis determinandum est quibus momentis constet dari tres illas hierarchias, & novem Angelorum ordines.

CONCLUSIO UNICA.

Reverà sunt tres Hierarchie, & novem distincti sanctorum Angelorum Ordines. Hæc est communis apud SS. Patres, & Theologos, eamque S. Dionysius expendit, & explicat toto libro de Cælesti hierarchia ubi cap. 6. ita loquitur de divinis illis Intelligentiis, Has inquit, divinus noster sacrorum initiator, S. Paulus, in tres terniones distribuit atque distinguit: ac primum quidem vult esse eorum qui semper Deum circum-

„ cumstant, & de quibus traditum est,
 „ cum eo toto animo, & præceteris
 „ nulla re interjecta conjungi, nam,
 „ & sanctissimos Thronos, & quæ
 „ multos oculos, & quæ multas alas
 „ habent, Cherubim, & Seraphim,
 „ Hæbreorum sermone vocata, quam
 „ proximè Deum circumstare, scriptis
 „ divinis proditum esse dicit. Hanc
 „ igitur quæ ex tribus constat distin-
 „ ctionem ut unam, & ejusdem gene-
 „ ris, ac verè primam Hierarchiam
 „ clarissimus Præceptor noster tradi-
 „ dit, quæ non est altera Deo similior,
 „ & quæ in primis Divinitatis in agen-
 „ do illustrationibus, sine intervallo
 „ majore studio occupatur. Alteram
 „ esse dicit eam quam Potestates, Do-
 „ minationes, Virtutesque expleant.
 „ Tertiam in extremis celestibus Hier-
 „ archiis Angelorum, Archangelo-
 „ rum. Principatuumque descriptio-
 „ nem.

Eandem veritatem lueulenter expo-
 nit S. Bernardus lib. 5. de considera-
 tione cap. 4. ubi cum enumerasset om-
 nes beatorum Angelorum ordines, ita
 „ scribit. Quid ergo sibi vult gradua-
 „ lis distinctio hæc? putemus *Angelos*,
 „ dici, nisi tu convenientius aliquid
 „ considerasti, qui singuli singulis ho-
 „ minibus dati creduntur: *Missi in mi-
 „ nisterium* secundum Pauli doctrin-
 „ nam propter eos qui *hereditatem capi-
 „ unt salutis*. De quibus Salvator:
 „ *Angeli eorum semper vident faciem*
 „ *patris*. Putemus his præesse *Archan-
 „ gelos*, qui consicj mysteriorum,
 „ divinarum, non nisi ob præcipuas,
 „ & maximas causas mittuntur; e qui-
 „ bus magnus ille Archangelus Ga-
 „ briel missus legitur ad Mariam; ob
 „ causam utique quæ major esse, non
 „ potuit. Putemus super istos *Virtutes*
 „ esse, quarum nutu vel opere signa, &
 „ prodigia in elementis, sive ex ele-
 „ mentis facta apparent ad communi-
 „ cationem mortalium. Inde est fortas-

„ sis quod eum in Evangelis legas
 „ *Erant signa in Sole, & Luna, & stel-
 „ lis*: paulò post habes: *Nam Virtutes*
 „ *celorum movebuntur*. Hi nimirum
 „ Spiritus per quos signa fiunt. Putem-
 „ us *Potestates*, superiores istis, qua-
 „ rum virtute potestas tenebrarum,
 „ comprimitur, & coercetur maligni-
 „ tas aeris hujus, ne quantum vult
 „ noceat, nec malignari nisi ut profit,
 „ possit. Putemus *Principatus* his quo-
 „ que prelatos, quorum moderamine,
 „ & sapientià omnis in terris princi-
 „ patus constituitur, regitur, limita-
 „ tur, trasfertur, mutilatur, mutatur.
 „ Putemus *Dominationes* adeò cunctis
 „ supereminere præfatis ordinibus ut
 „ respectu horum cæteri videantur
 „ omnes administratorij Spiritus, &
 „ ad istas tanquam ad Dominos re-
 „ ferri regimina Principatuum, & ta-
 „ mina Potestatum, operationes Vir-
 „ tutum; revelationes Archangelorum,
 „ curam, & providentiam Angelorum.
 „ Putemus *Thronos* alto etiam ab his
 „ evolasse recessu, qui ex eo quòd se-
 „ dent, Throni dicuntur, & ex eo se-
 „ dent, quòd sedet in eis Deus. Neque
 „ enim sedere in eis, qui non sederent,
 „ posset. Quæris quid illam sentiam
 „ sessionem; summam tranquillitatem,
 „ placidissimam serenitatem, pacem,
 „ quæ exuperat omnem intellectum.
 „ Talis est qui sedet in Thronis Domi-
 „ nus Sabaoth, judicans omnia cum
 „ tranquillitate, placidissimus, seren-
 „ issimus, pacatissimus. Et tales sibi
 „ constituit Thronos, simillimos sibi.
 „ Putemus *Cherubim* ex ipso sapien-
 „ tiæ fonte ore Altissimi haurientes, &
 „ refundentes fluentia scientiæ univer-
 „ sis civibus suis. Et vide an is sit, quem
 „ Propheta loquebatur *fluminis impe-
 „ tus lavificans civitatem Dei*. Putemus
 „ *Seraphim* Spiritus totos divino igne
 „ succensos, succendere universa, ut
 „ singuli cives singule sint lucernæ ar-
 „ dentes, & lucentes, ardentes cha-
 „ rita-

ritate, & lucentes cognitione.

Hanc ipsam veritatem ex sacra Scriptura ita probat, & concludit S. Gregorius Papa, homilia 34. Novem (inquit)

Angelorum, ordines diximus, quia videlicet tot esse, testante sacro eloquio, simul Angelos, Archangelos, Virtutes, Potestates, Principatus, Dominationes, Thronos, Cherubim atque Seraphim novimus. Esse nam-

que *Angelos*, & *Archangelos* pene omnes sacri eloquii paginae testan-

tur. *Cherubim* verò atque *Seraphim* sæpe, ut notum est, libri Prophetarum loquuntur. Quatuor quoque

ordinum nomina Paulus Apostolus ad Ephesios enumerat dicens supra

omnem PRINCIPATUM, & POTESTATEM, & VIRTUTEM, & DOMINATIONEM. Qui rursus ad Colossenses scri-

bens ait *sive* THRONI, *sive* DOMINATIONES, *sive* PRINCIPATUS, *sive* POTESTATES, Dominationes verò, &

Principatus ac Potestates jam ad Ephesios loquens descripsit. Sed

ea quoque Colossensibus dicturus præmisit *Thronos*, de quibus nec

dum quidquam fuerat Ephesiis loquutus. Dum ergo illis quatuor quæ

ad Ephesios dixit, idest Principatibus, Potestatibus, Virtutibus at-

que Dominationibus, conjunguntur Throni, quinque sunt ordines, qui

specialiter exprimiuntur. Quibus dum Angeli, & Archangeli Cherubim at-

que Seraphim adjuncti sunt, proculdubio novem esse Angelorum

ordines inveniuntur.

His constar quàm sædè hallucinentur Erasmus, & Beza in Scollis ad 8.

cap. epist. ad Rom. dum negant illos Angelorum diversos ordines ex Apostolo posse colligi; nam præfatis verbis à S. Gregorio laudatis, certos gradus

Angelorum, & ordines, omnes SS. Patres tam Græci quàm Latini summa

consensione docent. Imprimis verò S. Ignatius epist. ad Trallianos; Ego

Tom. IV.

(inquit) quia intelligere possum celestia, & Angelicos ordines, nec-non Angelorum, & exercituum differentias, ac Virtutum, & Dominationum discrimina, Thronorumque, & Potestatum varietates, & eorum magnitudines, Cherubim & Seraphim excellentias. . . Hæc, inquam, quis cognosco, non propterea penitus sum perfectus, &c.

S. Irenæus pariter eosdem ordines numerat si Seraphinos, & Cherubinos excipias, ait enim libro 2. cap. 54. Dicunt nobis quæ sit invisibilium natura, enarrant numerum Angelorum, & ordines Archangelorum, demonstrant Thronorum Sacramenta, & docent divestites Dominationum, Principatum, Potestatum atque Virtutum.

S. Basiliius in sua liturgia hoc ordine eos recenset. Te laudant Angeli atque Archangeli, Throni, Dominationes, Principatus, Potestates Virtutes, & multi-oculi Cherubim, tibi assistant in circuitu Seraphim. Similiter S. Athanasius pluribi idipsum docet, sed maximè libro de communi essentia. Quemadmodum, inquit, discernim in supernis Virtutibus agnovimus; ita, & stationis ac cognitionis. Throni quidem, & Seraphim, & Cherubim immediatè à Deo discunt, tamquam superiores omnibus, & Deo propinquiore. Hi porro docent inferiores ordines, & ita deinceps superiores docent inferiores. Infimus autem ordo est Angelorum, qui, & hominum sunt magistri.

Subscribunt etiam Latini. S. Augustinus libro contra Priscilianistas, & Origenistas cap. 10. expendens illud Apostoli ad Coloss. 1. *Sive* Throni, *sive* Dominationes, &c. ait, Esse itaque Sedes Principatus, Dominationes, Potestates, in celestibus apparatus firmisimè credo, & differre aliquid indubitata fide teneo. Sed qui me contemnas, quem putas magnum esse doctorem, quemam ipsa sint, & quid inter se differant, nescio. Fateor tamen hac in re definienda flu-

H

Atuale

Quasse Augustinum, nam in Psalm. 79. Cherubinos à Virtutibus, & Potestatibus non separat cum ait, *Cherubim sublimis esse celorum Potestates atque Virtutes*, quasi omnes Angelorum ordines sub quatuor à S. Paulo memoratis comprehendi putaret.

In eadem ancipiti Sententia videtur fuisse S. Hieronimus, liquidem cum libro 11. contra Iovinianum septem, numerasset Angelorum ordines putà Angelos, Archangelos, Thronos, Dominationes, potestates, Cherubim, & Seraphim subdit, *Et omne denum quod nominatur, non solum in presenti seculo, sed etiam in futuro*; rem indefinitè complexus, quasi innumerabiles alij essent gradus Angelorum, & graduum nomina. Quod clariùs indicat in comment. ad cap. 1. Epist. ad Ephesios, ubi cum inquisivisset unde Paulus acceperit inter Angelos esse Principatus Virtutes Potestates, & Dominationes, dixissetque id quod de regibus atque Principibus, Ducibus quoque, Tribunis, & Centurionibus innumeris, & in Regnorum libris refertur, imaginem aliorum Principum Regumque cognovisse subdit, *Quod scilicet in celestibus sint Principatus, sint Potestates, sint Dominationes atque Virtutes, & cetera ministeriorum vocabula quæ nec possumus nominare; nec ipsum Paulum puto, ut in gravi corpusculo constitutum, enumerare valuisse. Quasi diceret nec S. Paulum compertos habuisse, nec enumerare potuisse omnes beatorum Angelorum ordines.*

In eadem dubitationem ivit S. Christostomus homil. 4. de incompr. ubi carpens Hæreticorum audaciam qui temerè Dei naturam inquireunt; *Cogitate inquit, animo quanta sit Hæreticorum insolentia; servorum ne appellationes quidem scimus, & illi Domini substantiam curiosius quidem inquireunt. Sunt enim Angeli, & Archangeli, & Throni; & Dominationes, & Principatus, & Po-*

testates: sed non soli isti sunt ceteri in celestibus, verum infinitæ gentes, & nationes ineffabiles, quas explicare non potest oratio. Quod probat ex illo Apostoli ad Ephes. 1. Sedere ipsum fecit supra omnem Principatum, & Potestatem, & Virtutem, & omne nomen, quod nominatur non solum in hoc seculo, sed etiam in futuro, ex quibus inferit, Videtis ut sunt aliqua nomina, quæ manifesta illis erunt, cum sint ignota modo: nam propterea dixit, non solum, quæ nominantur in hoc seculo, sed etiam in futuro. His constat Angelorum ordines à plurimis SS. Patribus non fuisse definitos.

Quæ tamen non officiant nostræ conclusionis certitudini, quippe constanter alij SS. Patres contrarium edocent, & jam id indubitatum habemus ab omnibus Theologis, qui ipsam veritatem, variè probant. In primis enim eam disertè deducit Guillelmus Parisiensis in 2. p. 2. partis de Universo cap. 112. comparatione facta celestis Regni cum Ministris, Assclis terreni Regis. Visum est mihi (inquit) quod proximi ac laterales Regis, necessarii debent constitui tres ordines hominum, quos necesse est indefinenter, & lateraliter assistere ipsi Regi. Primus ergo est Amantissimorum, hoc est, maxime Regem amantium, & amore ipsius super omnes ferventium; & manifestum est, quia hæc est consuetudo Regum omnium, scilicet, ut, & velint habere, & habeant juxta se, & proximos sibi, quos sibi credunt amicissimos. Secundus est ordo Sapientum, quò ordine nihil Regi convenientius, nihil decentius, præsertim cum ipsa sapientia dicat, *quia per me Reges regnant*, & ille Rex Hæbreorum sapientissimus, omnibus aliis donis sapientiam prætulit; aliisque postpositis illam singulariter petierit. Tu quoque scis, quàm necessarii sint sapientes gubernationibus regnorum, sicut, & ille idem sapientis-

simus Rex dixit, quia multitudo sapientum, salus est orbis terrarum. Nosti etiam, quia per sapientiam conduntur leges, & statuta salutaria, hominibusque perutilia eduntur. *Tertius* ordo est iudicum, videlicet qui iura reddant, qui controversias, & lites dirimant. *Quartus* ordo est Excellentissimorum, atque Magnatum; inter quos sunt Regis subditi, & tributarii Regis, vel illi, qui solent dici Proceres regni, & Barones, in quibus consistit magna pars fortitudinis, & potentie Regni. *Quintus* ordo, Praefides provinciarum. *Sextus* ordo, Duces legionum, atque bellicorum instructores, & Capitanei acierum. *Septimus* ordo Centurionum, videlicet Ministrorum, qui vindictas, & iustitias exequentur. *Octavus* magnorum Nunciorum, qui legati usu aliter nominantur, videlicet, quia magna nuntiant, & aliis nunciis non revelanda, & de magnis rebus, atque Negotiis deferunt, ad quos Rex iusserit. *Nonus*, & novissimus ordo est minorum Nunciorum per totum Regnum discurrentium, sive equitum, sive peditum, iussa Regis, & mandata deferrentium.

Quia igitur iste numerus ordinum, & ista dispositio eorum, & Regni terreni tota huiusmodi dispositio decentissima est, atque pulcherrima, & omnis Rex bonus exemplum est, & similitudo primi, ac summi Regis, qui est Creator benedictus, erit necessarius; & omne Regnum bene dispositum exemplum, & similitudo regni illius, & ordinatio huius ordinationis, & ordines huius ordinum ipsius. Apparet etiam hoc evidenter in similitudine, & proportionalitate, atque comparationibus partium sive ordinum ad partes, sive ordines, primi, ac nobilissimi ipsius. Ordo enim primus, scilicet ordo amore Regis ferventissimorum, ordini *Seraphin*

assimilatur, atque proportionatur, sicut apparet ex ipsa cognominatio-
ne ipsius, quae est *totus ardens*, sive *incendium amoris*: & ordo Sapientum, qui est secundus ordo, per similitudinem, & proportionem respondet ordini *Che Rubin*, quod ostendit ejusdem cognominatio ex Hebræo in Latinum interpretata, quae est *plenitudo scientiae*, vel *susceptio sapientiae*. Similiter, & tertius ordo, qui est iudicum, assimilatur, & proportionatur ordini tertio praefati illius, ac nobilissimi Regni, qui *Throni*, vel *Sedes* cognominatur; in illis enim tanquam in regno regalis excellentie suae sedet Rex ille, & Dominus saeculorum, & inde per illos iudicia sua exercet. Quartus ordo Potentissimorum, honoreque, ac sublimitate potestatis in regno praesentium, respondet per easdem vias quarto ordini regni antedicti, qui cognominatur *Dominationes*, quoniam in illis maxime relucet dominatio super eminentissima Creatoris, quem admodum in ipsa potentia, & gloria Magnatum maxime apparet regni terreni potentia: Praefides vero provinciarum, per quos scilicet provinciae reguntur, *Principatibus* similitudine convenientissima comparantur. . . . Sexto ordini, qui est *Potestatum*, rectissime comparantur Duces legionum, instructores acierum, & Principes militiarum, quoniam per eos in potestatem Regis reducuntur, & rediguntur, qui a potestate recesserunt, vel eidem rebellant. Septimus ordo, qui est vindictas exercentium, & iustitias sive iudicia exequentium, quales solent esse Centuriones, aptatur ordini *Virtutum*, qui adeo inimici debent esse vitiis, ut in mortem eorum conjurati appareant, & eo usque adversarii videantur vitiis, ut non solum *Virtuosos*, sed etiam *Virtutes* nominari

„digni sint. . . . Novissimi verò ordi-
 „nes duo, qui scilicet sunt majorum
 „Nunciorum, atque minorum, evi-
 „dentissimam habent proportionem,
 „atque similitudinem Angelorum, &
 „Archangelorum.

Probant aliqui diversitatem Hierar-
 thiarum in Angelis ex Hierarchicis o-
 perationibus, qui sunt *purgare, & pur-
 gari, illuminare, & illuminari, perfi-
 cere, & perfici*, ut ait S. Dionysius c. 3.
 juxta enim hoc triplex munus, Angeli
 tres in Hierarchias rectè distribuuntur.
Prima enim Hierarchia à solo Deo pur-
 gatur, illuminatur, & perficitur, &
 mediam inde purificat, illuminat, &
 perficit: *Media* verò à superiori pur-
 gata, illuminata, & perfecta; in infe-
 riorem eisdem divinos effectus præstat.
 Vel *prima* à nulla alia Hierarchia supe-
 riore purgatur, illuminatur, ac perfi-
 citur, sed inferiores purgat, illuminat,
 & perficit; *Secunda* purgatur à supe-
 riore, illuminatur, ac perficitur, &
 tertiam purgat, illuminat, & perficit:
Tertia, & ultima nullam aliam, nisi
 humanam perficit, illuminat, & puri-
 ficat.

Hæc autem purificatio non est acci-
 pienda quasi fiat à peccato, vel ab erro-
 re, vel ab ignorantia; Hæc enim in
 Angelis sanctissimis, & Deum clarè, ac
 intuitivè videntibus locum habere non
 possunt; sed fit à nescientia, quæ in il-
 lis reperitur. Quippe omnes veritates
 supernaturales non cognoscunt per a-
 ctivitatem suam naturalem, nec per
 ipsam visionem beatificam, quæ tan-
 tummodò terminatur ad objectum bea-
 titudinis, videlicet ad essentiam divi-
 nam, divinasque ejus præcellentias;
 non verò ad ea, quæ sunt externa, quæ-
 ve pertinent, vel ad Universi disposi-
 tionem, vel ad Ecclesiæ regimen, vel
 ad mysteria gratiæ, quæ inferiores An-
 geli à superioribus discere possunt, &
 Superiores à Deo ipso, ut Guillelmus
 Parisiensis *parte secunda primæ partis*

de Universo cap. 198. eruditè hunc ferè
 in modum istud explicat; Inter Ange-
 los alii sunt splendidiore alii, ac di-
 vino lumini propinquiore, adeoque
 puriores, non eo quod vel minus, vel
 nihil omnino sordium habeant: sed
 quod ab inexhausto lucis fonte largio-
 res, ac liquidiores veritatis haustus ex-
 ciipiunt: Quemadmodum si Soli objecta
 sunt aliquot crystallæ, vel specula, quæ
 non eodem situ collocentur, sed illius
 radios plenius, ac directius aliis alia
 capiant; sic cùm Angelorum aliqui
 Deus ceteris perfectius contemplantur,
 uberiore, quàm isti luce superfundun-
 tur, eoque puriores sunt illis, & eos-
 dem abundantia sui luminis illustrant;
 quæ quidem communicatio luminis
 copiosioris, *purgatio* dicitur; Non quòd
 tenebrarum insit aliquid, & caliginis,
 quod majoris appulsu luminis extin-
 guatur, sed quia lucis ut dixi ad lucem
 fiat accessio.

Non enim luminis remissio, tene-
 brarum admisione constat; uti neque
 motus tardatio quietis, neque visus hæ-
 betudo cecitatis, ex quibus exemplis
 secundum maximè ad rem pertinet; si-
 quidem cælestes orbes, non omnes pa-
 ri celeritate torquentur, sed supremum
 inter illos, quod primum mobile voca-
 tur, rapidiori motu concitatur, ac cæ-
 teri deinde uti quisque proprius est, aut
 remotior, ita velocius agitentur, aut
 lentius. Quod si minor illa celeritas
 quietis parte aliqua constaret, nusquam
 verus, ac simplex motus esset; quoniam
 & suprema illa, ac celerissima conver-
 sione, celerior alia vel fingi à nobis,
 vel à Deo procreari potest: quamobrem
 sine ulla contrariæ quietis adjunctione
 motus alter altero est tardior; itidem
 Lux una, altera splendidior, nulla ca-
 liginis parte temperata. Ad eum itaque
 modum purgari dicitur Angelus cum
 novam quamdam cognitionis lucem
 accipit, qua carebat antea: & id ipsum
 quod deerat tanquam privatio quadam
 est,

est, quam adveniens noticia pellit; ut ei propterea purgationis vocabulum sit inditum.

Quæres primò, An singuli Angeli propria habeant nomina?

Respondeo: Verisimiliùs videri singulis quibusdam Angelis assignata fuisse à Deo propria nomina; non quidem, ut per illa ab aliis Beatis cognoscantur, ut docet S. Gregorius; *Homilia de centum ovibus*, sed ut inter colloquendum illis utantur Beati, nam post iudicii diem alii Beati de aliis, & de Angelis loquentur; Ergo eorum nomina usurpent necesse est, & nunc tam animæ Beatæ, quàm Angeli, de quocumque loquantur, egerant nominibus ob eandem causam. Et quod de Angelis bonis dicimus, idem de malis iudicandum, aliàs frustra quemdam dæmonem interrogasset Christus quodnam effet ejus nomen.

Sanctorum autem Angelorum tantùm septem sunt, quorum nomina memorantur à Catholicis Scripturibus, suntque *Michael, Gabriel, Raphael, Uriel, Salathiel*, sive *Sealtiel, Jebudiel, & Barachiel*, ut probant Serarius in 12. cap. Tobie, & Salmeron tom. 3. Hi pluribus appellationibus mysticis designantur à sacra Scriptura; nam Apocal. 4. dicuntur, *septem lampades ante thronum Dei*; quia summa claritate resurgent, & eos ad quos mittuntur insigni quodam splendore collustrant, cujus rei Symbolum exhibuit Angelus, qui cum assistit Petro, *Lumen refulsit in habitaculo*, Act. 12. Et in eadem Apocal. S. Joann. ait, *Vidi agnum stantem tanquam occisum, habentem cornua septem, & oculos septem, qui sunt septem Spiritus Dei, missi in omnem terram*. Dicuntur autem *cornua*, quia sunt fortissimi ad profigandos Dæmones, ad tutandam Ecclesiam, ad patranda miracula, ad defensionem iustorum, & vindictam

impiorum: lidem vocantur *oculi*, quia perspicacissimi sunt, & vigilantissimi ad Dei voluntatem cognoscendam, & explendam, ad Ecclesiæ, & hominum salutem procurandam; Unde de his dicitur apud Zach. 4. *Septem isti oculi sunt Domini, qui disturrunt in universam terram*: De his quoque habetur in eadem Apocal. cap. 8. *Et vidi septem Angelos stantes in conspectu Dei*. Et alibi ejusdem libri, septem Angeli memorantur quasi curam habentes universæ terre. Hinc Tobie 2. Raphael se ex illis septem dicebat: *Ego sum*, inquit, *Raphael Angelus, unus ex septem; qui adstantus ante Dominum*. Dicuntur autem adstare ante Dominum, vel in conspectu Dei metaphorice, ad eum modum quo Ministri præsto sunt Principi, & parati ad ejus mandata excipienda, & obeunda, & hoc etiam indicat quantum sint Deo familiares, adstare enim, videtur familiaritatem quandam significare, nam de familiaribus Salomonis Regina Saba in lib. Reg. 3. cap. 10. dicit, *Beati servi tui, qui stant coram te semper*; quia proprium est familiarium, & stipatorum adstare Principi, Principis verò sedere. Ista omnia confirmat Clem. Alex. lib. 6. Strom. ad finem. *Septem, inquit, sunt, quorum est maxima potentia, primogeniti Angelorum Principes, ob sua munia nomen Dei secum præferentes*.

Horum autem nominum peculiaris significatio ita deducitur, MICHAEL interpretatur *quis ut Deus*; quod quidem nomen fuit illi impositum postquam, generoso animo Luciferum debellavit, & à Cælo empyreo cum suis malis expulit, & pro hominibus contra illum, quotidie pugnat, & quia etiam Dei honorem, maximamque ejus gloriam defendit, & tuetur, nec permittit de eaque quidquam quamvis minimum sit detrahi. Aliqui Alii addunt ipsum præesse precibus, & oblationibus fidelium, & ob eam rationem vocari Michaelē, idē,

idest, *quis ut Deus?* quasi diceret, solius Dei est exaudire preces pœnitentium, eorumque peccatis propitiari, nec-non illos iustificare, & salvare.

GABRIEL, idest, *fortitudo Dei*, quia fortia Dei gesta, & bella annuntiavit Danieli, beatæ Virgini, &c. Rursus Gabriel dicitur Hebraicè *Geberel*, id est *vir Deus*, quasi diceret Deus incarnabitur, eritque homo quantum ad naturam, ac ætatis, & corporis progressum: Idem tamen erit vir, quia à primo conceptionis instanti, anima ejus erit plena omni scientia, gratia, fortitudine, &c. juxta illud Jeremie 31. *Femina circumdabis virum.*

RAPHAEL, idest *Medicus*, vel *medicina Dei*, quia præest sanitati corporum. Unde Tobie cæcitatem curavit, & medelam spiritualem, & corporalem nobis potest impetrare.

URIEL, idest *lux*, vel *ignis Dei*, quia homines Dei cognitione illuminat, & amore inflammat. Salathiel, sive Scathiel, idest *oratio Dei*, quia pro hominibus orat, illosque ad adorandum excitat.

JEHUDIEL, idest *Confessio*, seu *laus Dei*, quia homines ad confessionem, & laudem Dei exhortatur.

BARACHIEL, idest *benedictio Dei*, quia beneficia Dei nobis procurat, nosque ad Dei benedictionem, & gratiarum actionem impellit.

Tres ultimi nulla traditione notantur, sed ab Hebræo accepta ad nos pervenerunt. Urielis mentio est apud Esdræ lib. 4. sed hic liber non recensetur inter Canonicos, Salathiel, Gehudiel, & Barachiel, ab Antonio Duca viro egregio, qui floruit tempore Pauli tertii Pontif. Max. in Hymno de septem Angelis assistentibus celebrantur. Verum sive illis, sive aliis nominibus sint appellandi, certo certius est, quod sunt septem Angeli principes aulæ cœlestis, qui stant in conspectu Dei, & quibus cura universæ terræ demandatur.

Hi porrò S. Angeli excitant nos ad amplectendas virtutes septem, totidem peccatis capitalibus oppositas, quæ sunt, humilitas, patientia, liberalitas, castitas, temperantia, diligentia, & charitas; & quia septem præcipui illi Angeli sunt ex ordine Seraphinorum, ut statim dicemus; propterea eorum speciale munus, & officium est septem præcipuos Dæmones è Cœlo lapsos compescere, qui ad septem illa capitalia peccata perpetranda continuis suggestionibus nos inducunt, & heu sæpe illis nos succumbere faciunt. At quinam sunt illi Principes Angeli mali à Lucifero deputati ad tot suggerenda mala. S. Bern. in serm. 13. in Psalm. *qui habitat*, eos recenset. *Primus*, inquit, est Leviathan, Princeps superbiæ; *Secundus* Beerith, Princeps iræ; *Tertius* Mammon, Princeps avaritiæ; *Quartus* Beelzebuth, Princeps invidiæ; *Quintus* Asmodeus Princeps luxuriæ; *Sextus*, Beelphegor Princeps gulæ, & *Septimus* Astaroth Princeps acediæ, seu pigritiæ: Cum igitur hæc ita sint, Deus qui sua benignitate, & ineffabili bonitate vult omnium nostrorum salutem, totidem Principes ex Angelis bonis seligere, & instituire voluit, ut impios horum septem Dæmonum adversum nos impetus retunderent.

His adde, quod ultra quatuor primos Angelos ex septem prænominatis, venerabilis Beda in collectaneis, duorum aliorum, videlicet *Rumielis*, & *Pbanielis* meminit, seipsūque eis commendat his verbis: *Gabriel esto mihi lorica; Michael esto mihi balteus, Raphael esto mihi scutum; Uriel esto mihi protector, Rumieli esto mihi defensor, Pbaniel esto mihi securitas*: Præter ista autem nomina addunt aliqui *Nurielelem, Zamaelem, Zadeielem, & Caphzielem*. Sunt etiam aliqui ex præmemoratis, nec-non, & alii nominati in libro secundo Sybillinorum versuum, qui referuntur in tomo secundo Bibliothecæ Sanctorum Patrum.

Tunc

¶ Tum Eromiel, Uriel, Samiel, Azraelque,
*Quæ mala quisque hominum patrauerit,
 ante-fcientes*

E terribis animas tenebris caliginis omnes

*Judicio silent, ad formidabile patris,
 Magni immortalis solium.*

Verum quoniam hæc nomina, nec ex Scripturis inferuntur, nec à SS. PP. referuntur, idcirco nec usurpanda, nec invocanda sunt; maxime cum vobis novitates proscripserit S. Apostolus, & Concilium Romanum celebratum anno Domini 745. sub Zacharia summo Pontifice, damnaverit orationem ejusdam Aldeberti, in qua octo nomina Angelorum invocans dicebat, *Precor vos, & conjuro vos, & supplico me ad vos An-*

gelus Uriel, Angelus Raguel, Angelus Tabuel, Angelus Michael, Angelus Adimis, Angelus Tubuai, Angelus Sa- baorb, Angelus Limibel. Quæ lecta, oratione dixit Zacharias Papa: hæc nomina præter Michaelis, omnia sunt nomina Dæmonum. Quid aliud, agendum nisi ut omnia quæ lecta, sunt igni concrementur; annuerunt, quæ omnes Episcopi dicentes; Non plusquam trium Angelorum nomina, agnoscimus, idest, Gabriel, Michael, Raphael. Ita legimus in Actis Concilii. Atque hinc infert Baronius perspicuum intelligi librum quartum Eisdæ nomine vulgatum, in quo frequens est mentio Angeli Urielis, ab Ecclesia Romana proscriptum penitusque rejectum.

DISPUTATIO SECUNDA.

De Facultatibus, & Operationibus Angelorum.

CUM Angeli rerum omnium creatarum fastigium, & primas teneant, Deique majestatem, & præcellentias in se delineatas perfectius referant; etiam Dei instar triplici facultate, & operatione donantur; nimirum Intellectiva, Volitiva, & effectiva; per quarum primam, veritatem omnem, tam creatam quam increatam percipiunt: per secundam circa bonum quodlibet avidissime feruntur, illoque veluti divino nectare recreantur; Per tertiam verò tam seipsum quam cetera à se distincta movent, & locum occupant, ac per quolibet spatia quam citissime feruntur. Ut itaque harum facultatum, & operationum Angelicarum quantumcumque notitiam possimus assequi, præsentem Disputationem tribus Articulis absolvemus. *Primus*, Angelorum vim intellectivam perspicacemque eo-

rum cognitionem referet. *Secundus*, eorum voluntatem ejusque actus explicabit. *Tertius* denique, virtutem motivam quæ seipsum, & alia movere possunt, ac subinde ipsorum motum localem, & ipsius motus terminum, nempe locum, seu ipsorum ubificationem, & consistentiam in loco declarabit.

ARTICULUS PRIMUS

De Intellectu, & Cognitione Angelorum.

NEMINI dubium esse potest Angelos esse præditos intelligendi virtute, quippe cum sint substantiæ immateriales, liberi arbitrii compotes, perfectæ beatitudinis capaces, Deique imaginem, & similitudinem præstantissime referentes, quæ tot sunt veluti

demonstrationes, & argumenta quibus in eis virtutem intellectivam esse suadetur, & evincitur. Constat pariter tantam esse tamque eximiam eorum sapientiam, & scientiam, ut non immerito Sophronius eos vocaverit *cognitionis fontes, & fecundiores*, quorum comparatione, exigua sanè (quamquam sublimis videatur) est omnium hominum notitia. Etenim hæc etiam ipsa quæ nos scire arbitramur, parum profundè, imperfectè, & tantum in cortice vel superficie percipimus, nec-non cum magna ingenii tarditate, & diuturno labore, ac non modica molestia modicum illud imperfectæ nostræ scientiæ assequimur. Hinc Hypocrates doctissimum librum suum Aphorismorum, longa rerum experientia, & observatione conscriptum his verbis exorditur: *Vita brevis ars longa, tempus præceps, experimentum difficile*: Angelicus verò intellectus summa facilitatè, celeritatè maxima ac incredibili perspicacitate rerum omnium notitiâ plenissimè obtinet; & quæ tot Philosophi multis exantlatis laboribus non fuerunt adepti, ille sine labore assequitur. Quapropter nominè *intelligentiæ* Angeli doquantur à Philosophis, nihil enim est in mundo cum materia concretum vel ab ea sejunctum, incorruptibile aut caducum, tempore finitum aut sempiternum, quod non intimè distinctè, & penitissimè intelligant ac percipiant.

Itaque non opus est ampliori commendatione Angelicum intellectum illustrare, solùmque nobis incumbit ejus delineare characteres, & operationes: Quapropter præsens Articulus quatuor potissimum questionibus absolvetur, quarum *Prima* ipsius intellectus Angelici vim aperiet: *Secunda*, modum operandi illius declarabit: *Tertia*, objectum cognitionis Angelicæ proponet: *Quarta* denique diversas ejusdem cognitionis species explanabit.

QUAESTIO PRIMA.

Quis, & qualis sit intellectus Angelicus?

CONVENIUNT omnes Auctores Angelos esse cognitione intellectuali præditos; dissentiunt verò circa principium ejus intellectus: Quidam enim volunt Angelos intelligere per ipsammet suam substantiam, & essentiam ut docuisse videtur Commentator 12. Metaph. text. 52. ubi affirmat quod in substantiis separatis essentia, & operatio non est quid distinctum, ac proinde quod intelligere Angeli sit ipsamet ejus substantia. Durandus verò in 12. distinct. 3. quæst. 5. asserit quod licet intellectio ista, quæ Angelus intelligit alia à se realiter, distincta sit ab ejus substantia; illa tamen quæ seipsum cognoscit, prorsus est indistincta. Thomistæ contendunt intelligere Angelicum esse distinctum realiter ab ejus substantia; quippe cum sit purum accidens: Verùm Subtilis Doctoris Discipuli cum eo volunt intellectum Angelicum sicut, & humanum esse virtutem formaliter solum distinctam à substantia ipsius Angeli vel animæ, elicivam tamen intellectus realiter distinctam. Quocirca tria maximè sunt in præsentis quæstione resolvenda. *Primum*, quod Angelus non intelligat per suammet substantiam, sed per vim intellectivam formaliter à sua substantia, & essentia distinctam. *Secundum*, quod illa vis intellectiva habeat rationem intellectus agentis, & possibilis. *Tertium*, quod intellectus Angelicus fiat intelligens formaliter per verbum mentis à se productum.

Notandum 1. Hoc esse discrimen inter intellectum, & intellectionem, quod ille sit actus primus intelligendi, seu virtus, & activitas substantiæ spirituales ad percipiendum, & cognoscendum objectum intelligibile; Hæc autem est actus secundus, seu ipsamet operatio sub-

substantia spiritualis, quæ de facto objectum intelligibile percipit. Ille autem dicitur *actus primus*, quia nimirum est prima ratio cur substantia spiritualis sit, capax percipiendi objectum intelligibile. Hæc verò dicitur *actus secundus*, quia nimirum emanat ab ipsamet vi, & capacitate intelligendi velut effectus à causa. Unde prior non solum dicitur *actus*, sed etiam *potentia*, eo quod ordinetur ad ulteriorem actum qui ab eo emanat, & cum ultimo perficit. Posterior verò simpliciter *actus* nominatur, quia nimirum est ipsius virtutis intellectivæ quasi forma eam ultimo perficiens in ratione intelligendi.

Notandum 2. Duobus modis intellectum agentem dici posse. *Primo* latè prout est facultas quomodocumque activa, sive productiva propriorum actuum, sive specierum vel habituum intellectualium; & hoc sensu nemo Theologorum negat esse in Angelis intellectum agentem. *Secundo*, stricte, prout est facultas solum, & immediate productiva specierum intelligibilium in intellectu possibi i carente illis, sive abstrahendo species illas à phantasmate, sive agendo aliter. Similiter intellectus *possibilis* vel patiens dupliciter accipitur. *Primo* latè, pro facultate quomodocumque passiva, & receptiva, vel existente in potentia ad patiendum, & recipiendum. Sicque intellectus Angelorum est passibilis quatenus est in potentia ad actus proprios, & species, & habitus intellectuales, qui ex ipso educuntur, & in eodem recipiuntur. Atque eo sensu S. Bonaventura in *secundo distin.* 3. intellectum Angelorum possibile vocat. *Secundo* stricte prout sumitur ab Aristotele lib. de anima c. 4. pro facultate quæ sit prius nuda potentia in genere intelligibilium, posteaque fiat omnia intelligibilia per susceptionem specierum vel verbi mentis.

Notandum 3. Intellectionem inchoative consistere in illa intellectus actio-

Tom. IV.

ne quæ producit eam qualitatem quæ *verbum mentis* dicitur; *consummative* autem in ejusdem qualitatis receptione: In eo siquidem formaliter consistit intellectio, quod intellectum assimilat rei intellectæ, eumque formaliter intelligentem efficit: sed id præstatur inchoative per actionem illam verbi mentis productivam, completè verò per ejusdem verbi receptionem; illa siquidem qualitas, cum sit rei intellectæ expressa similitudo, proculdubio intellectum informando, & ei adhærendo cum objecto cognito assimilabit, ac proinde completè intelligentem efficit. Est autem verbum mentis *actus intelligentiæ* productus à memoria secunda non habens esse nisi dependenter ab actuali cognitione, ita Doctor in primum dist. 27. quæst. 3. Dicitur primo *actus intelligentiæ*, quia constituit animam formaliter intelligentem, sicut calor constituit calidum: Secundo à *memoria secunda*, id est, ab intellectu informato, & quasi gravido specie intelligibili objecti. Tertiò non habens esse nisi dependenter ab actuali cogitatione, quia est ipsamet completa intellectio.

CONCLUSIO PRIMA.

Angelus non intelligit per suammet substantiam, sed per virtutem ab ipsa substantia saltem formaliter distinctam, quam intellectum appellamus. Hæc duas partes complectitur, quarum probatur prima, primò quidem auctoritate SS. Patrum, nam S. Dionysius lib. de ecclesiæ Hierarchia cap. 11. distinguit in summis Spiritibus substantiam, virtutem, & operationem, *In tria*, inquit, *omnes divine Mentes ecclesiæ ratione sua divise sunt, in Essentiam in Virtutem, & in Actionem.* Et S. Anselmus libro de conceptione originali cap. 4. Hæc tria similiter distinguit. Et libro de casu Diaboli cap. 8. affirmat voluntatem Angeli non esse substantiam, licet sit aliqua essentia: Et S. Augustinus lib. 6. de Trinitate cap. 6. Dicit animam humanam

I

defi-

deficere à simplicitate divina, propter multitudinem operationum, & virtutum.

Probatur etiam ratione, Si substantia Angeli esset suum intelligere, esset etiam actus purus, quia sibi identificaret ultimam actualitatem ordinis intellectualis, ac proinde nihil haberet potentialitatis admixtum: Sed nulla substantia creata potest esse actus purus: Ergo substantia Angeli non potest esse suum intelligere.

Secundò, Si substantia Angeli esset ei ratio cognoscendi omnia, sequeretur quod Angelus semper, & necessariò intelligeret omnia; at certum est ut patebit infra, Angelum non omnia intelligere vel necessariò, vel semper, & aliqua posse fugere cognitionem ejus: Ergo Angelus non intelligit omnia à se ipso distincta per suam substantiam. *Tertiò* denique, si Angelus per suam substantiam esset sui ipsius intellectio, etiam per suam substantiam foret sui ipsius amor; etenim inter intellectiōnem, & amorem, naturalis est proportio: Sed Angelus esse nequit essentialiter ac substantialiter sui amor: Ergo nec sui intellectio. Minor probatur: Si enim Angelus esset amor sui per substantiam, talis amor esset essentialiter ac invariabiliter rectus in Angelo: sed hoc dici nequit: Ergo nec illud. Sequela majoris patet; tota siquidem substantia Angeli est creata à solo Deo; quæ autem à solo Deo sunt, necessariò, & essentialiter ordinata sunt. Minor verò suadetur; nam Angelus mali non habet rectum, & ordinatum sui amorem; cum rectus, & ordinatus sui amor non possit subsistere cum peccato, & odio Dei; unde Psalmus 10. dicitur *qui diligit iniquitatem, odit animam suam*: Ergo in Angelis amor sui, non est essentialiter, & invariabiliter rectus.

Probatur secunda pars à Doctore in secundum distinct. 15. ubi demonstrat facultates animæ non esse realiter ab

ipsa distinctas, illis omnibus rationibus Philosophicis, quas in nostra Philosophia *questione 3. conclusione 2. de Anima* jam expendimus. Sufficit itaque, nunc illam veritatem firmare S. Patrum oraculis. In primis itaque S. Augustinus lib. 1. de Trinitate cap. 11. hæc habet, *Hæc tria igitur, memoria, intelligentia, & voluntas, quoniam non sunt tres vite, sed una vita, nec tres mentes sed una mens; consequenter utique nec tres substantie, sed una substantia*: Ergo illæ facultates non sunt accidentia seu qualitates realiter ab anima diversæ, ut volunt Thomistæ. Insuper S. Bernardus sermone 11. super Cantica dicit *Quedam in anima intueor, memoriam, intelligentiam, & voluntatem, & hæc tria ipsa anima sunt*: Sed quod est distinctum realiter ab anima, non est ipsa anima. Denique Hugo Victorinus lib. de Spiritu, & anima, hæc habet, *Anima secundum sua opera, variis nominibus nomen patitur, dicitur namque ANIMA dum vegetat, SENSUS dum sentit, ANIMUS dum sapit, MENS dum intelligit, &c.* Illa verò non differunt in substantia quemadmodum, & in nominibus, quoniam omnia una essentia, proprietates quidem diversæ. His constat intellectum humanum reverà ab essentia anime esse distinctum; non quidem realiter nec nominatenus; adeoque est tantum formaliter ab animæ substantia diversus. Sed eadem est ratio de intellectu Angelico ut patet, adeoque constat ipsum non realiter sed formaliter esse distinctum ab essentia.

Dices primò: Angeli sunt puri actus, & intellectivi essentialiter: Ergo nihil distinctum à sua substantia possunt recipere quod cum illorum intellectu efficiat cognitionem rerum ab illis distinctarum; sed sola eorum substantia supplebit ejusmodi medium.

Distinguo Angeli sunt puri actus, puritate excludente solam materiam, cum qua rectè potest aliqua forma spiritalis.

ritica-

vitalis in illis recepta consistere, quam cum illorum intellectu efficiat in illis cognitionem rerum omnium ab illis distinctarum. Similiter sunt essentialiter cognoscitivi, & intellectivi in actu primo, & radicali, concedo: Sunt actus puri puritate excludente potentialitatem facultatis, similiter sunt in actu proximo, & in actuali cognitione, quæ sit de intrinseco conceptu illorum, nego; hoc enim esse nequit ex præcisa ratione creaturæ, quam Angeli intrinsecè includunt, & quæ necessariò admittit compositionem ex actu, & potentia.

Dices secundò. Idcirco anima nostra non intelligit per substantiam nec est sua intellectio, quia est intelligens solum. In potentia, eo quod ita sit conjuncta corpori, & ita ab ipso pendeat in operando, ut non nisi eo mediante rerum species acquirat, & per eas constituitur intelligens: Ergo cum Angelus non sit intelligens solum in potentia, sed actu, consequens est: ut sit ipsa sua intellectio, seu quod sit intelligens per se ipsum.

Respondeo concessio antecedente, negando consequentiam, natura enim intellectualis tripliciter se habere potest ad suam intellectionem, *Primò*, itaut sit intelligens solum in potentia; *Secundò*; itaut actu intelligat, sed per actum distinctum ab ipsa; *Tertiò*, per actum, qui sit eadem natura intelligentis. Primum, & secundum conveniunt animæ nostræ, & Angelis: Tercium verò est proprium Deo, qui est actus purus. Unde negari debet consequentia simul cum ipso antecedente.

CONCLUSIO SECUNDA.

Admittendus est in Angelo intellectus Agens, & Patiens propriè dictus, hæc est Doctoris in secundum distinctione tertia quæst. 11. num. 4. Eamque sic probat 1. Omnis activa potentia, quæ absque imperfectione tribuitur naturæ inferiori, non est deneganda superiori; Sed intellectus agens in

hominibus, qui sunt Angelis inferiores, est ejusmodi: Ergo non est Angelis denegandus. Major, & consequentia per se constant. Minor probatur, maxima est perfectio in qualibet natura, quod habeat in se virtutem, & principium, quo sibi convenientem perfectionem possit acquirere, si eam aliunde non habeat: Sed intellectus agens est principium, per quod homo potest assequi veram notitiam, & scientiam, quæ est summa sui intellectus perfectio: Ergo perfectionis est in homine habere intellectum agentem.

Confirmatur. Natura nobilissima debet in se eas complecti virtutes, quibus suam assequi possit perfectionem, si aliunde eam non habeat; Ergo natura Angelica, quæ omnium rerum creaturarum primas tenet, debet in se habere principium, quo possit sibi comparare cognitionem rerum universalium, si eas ab initio suæ formationis jam non novisset per sibi inditas à Deo earum species, quo pariter possit acquirere cognitionem plurium rerum singularium, quarum notitiam non habet congenitam. Patet antecedens, nec-non, & consequentia; rerum etenim cognitio est Angeli perfectio, quam non nisi intellectus agentis beneficio sibi comparare potest.

Reponunt Thomistæ majorem argumenti esse quidem veram de perfectione simpliciter, quæ nullam in suo conceptu imperfectionem includit, & præsupponit, falsam autem de perfectione illa, quæ tantum comparatur ad suppleendam imperfectionem: Intellectus autem agens (inquiunt) non est perfectio simpliciter, sed tantum conceditur in homine ad suppleendam in eo imperfectionem, nempe carentiam cognitionis rerum, quam tenetur emendicare à rebus ipsis dependenter à phantasmatibus, qua imperfectione cum careant Angeli, etiam in eis non est admittendus ille intellectus agens,

sicut nec admittitur in eis generatio, quæ tamen in hominibus perfectionem importat, nempe speciei propagationem.

Contra: Qua ratione admittitur intellectus agens in hominibus, eadem concedi debet in Angelis; quamquam enim rerum præstantissimarum habeant species sibi concreatas, tamen rerum omnium, maximè singularium, notitiam sibi congenitam non obtinent; adeoque vel eam sibi comparare possunt, & sic egi intellectus agente; vel si non possint, haud dubiè sunt deterioris conditionis, quàm homines; nam illa natura perfectior censenda est, quæ eùm non habeat ab intrinseco suam perfectionem, habet tamen facultates, & vires naturales, quibus eam possit acquirere. *Deinde*, quamvis Angeli ab eorum formationis exordio habuissent sibi concreatas rerum omnium etiam materialium, & singularium species, non minùs tamen habere deberent intellectum agentem, & passibilem; nam (inquit Doctor) licet Christus Dominus rerum omnium cognitionem habuerit ab instanti suæ conceptionis, omniaque viderit in Verbo, nihilominus habuit intellectum agentem, & passibilem, alioqui perfectus homo non extitisset, quippe cum non habuisset utrumque illud intellectum, quem in omnibus hominibus etiam Adversarii concedunt; *Denique* actio quæ agens superioris ordinis prævenit operationem agentis inferioris, non aufert ab eo potentiam activam respectu suæ operationis; si enim Deus nunc crearet aquam; cui calorem inderet, eumque continuò servaret, non propterea diceretur aquam spoliassè suam virtute frigefactiva; etenim si Deus decerneret eum calorem conservare, statim aqua ex se sibi naturaliter debitum frigus compararet non minori facilitate, quàm ipsum frigus repetit, ubi semovetur ab igne, qui in eam calorem induxerat,

Ergo à simili, quamquam Deus indiderit Angelis species rerum statim ab eorum creatione, non propterea dici debet eis abstulisse intellectum agentem, quibus eas possent comparare, si tales species in eis conservare desineret.

Nec quidquam juvat exemplum de generatione, siquidem imperfectio, ad quam tollendam, vel supplendam conceditur generatio, nempe corruptibilitas, non reperitur in Angelis, adeoque nec reperiri debet illius reparativa generatio. Secus est autem de intellectu agente; siquidem imperfectio, quam tollit, & supplet, nempe carentiam notitiæ plurium rerum maximè singularium, & materialium, æquè reperitur in Angelis, ac in homine. Ergo in utrisque est admittendus.

Reponunt 1. Præfatum Doctoris subtilis argumentum concludere quidem in rebus, quæ non habent perfectiones sibi coævæ, non tamen in eis, quæ ex natura sua, & à sua origine perfectiones sibi vendicant, quales sunt Angeli: quod probant exemplo cælorum, qui cum habeant naturales perfectiones sibi congenitas, frustra ponerentur in eis virtutes, & instrumenta, quibus ipsas possent assequi.

Verùm hæc responsio, Doctoris Subtilis argumentum nec infirmat, nec frangit; aliquid enim potest dici habere sibi coævam suam perfectionem alterutro ex his tribus modis. Primò scilicet quia talis perfectio ex ejus natura, & principiis intrinsicis emanat, sicut ex natura hominis risibilitas oritur, & ex substantia animæ facultates erumpunt: Secundo, quod cum talis perfectio ab aliqua virtute naturali produci nequeat necessariò exigat causari ab Authore naturæ cum ipsa re, quæ producitur; sicut v. g. Cælorum qualitates, quæ à causis naturalibus produci nequeunt, ab ipsorum Administratore, & Authore cum Cælis ipsis formari debuerunt: Tertiò denique, aliquid dici

potest habere cœvam sibi perfectionem ex beneplacito Creatoris volentis ipsi tribuere illam perfectionem ab ipso formationis exordio, quam tamen res ipsa propriis viribus, & temporum decursu sibi posset comparare: Sicut anima Christi habuit sibi cœvam rerum omnium cognitionem ab ipsius conceptionis initio per infusas sibi divinitus species, quas successu temporis potuisset sibi comparare, Quibus permittis.

Dico, quod natura, quæ vel primo, vel secundo modo habet sibi cœvam suam perfectionem, non indiget equidem mediis, vel instrumentis, quibus eâ possit assequi, quippe cùm perfectiones illæ, vel ab ipsius substantia oriuntur, vel ab Authore naturæ fuerint ipsi concessæ: Quæ verò tantùm hanc perfectionem tertio modo obtinèt, nempe ex beneplacito, & arbitrio Authoris naturæ eam pro libito concedentis, quam tamen res aliunde posset sibi vindicare, nego quod ad eam obtinendam res ipsa habere non debet facultates, & virtutes intrinsecas, quibus illam perfectionem sibi vindicare posset, si ab Authore naturæ primitus non fuissent concessæ. Cùm igitur Angelus habeat notitiam rerum universalium sibi cœvam tantùm hoc tertio modo, non videntur ipsi denegandæ facultates, quibus illam possent assequi, si Deus illi hanc notitiam non indidisset.

Probat secundò Doctor conclusionem ratione ipsa, qua S. Thomas oppositum conclusionis stabilitæ contendebat, quam verò Doctor deducit in oppositum. Objectum adæquatum intellectus Angelici vel est quid singulare, vel quid universale per prædicationem; ita quod complectatur sub se omnia prorsus intelligibilia; non primum, Res enim singularis creata quantumvis perfecta continere nequit formaliter, aut eminenter omnia intelligibilia ab Angelo: Objectum autem primum, & adæquatum alicujus facultatis om-

nia, quæ ab ipsa percipi possunt continere debet formaliter, aut eminenter, adeoque objectum intellectus Angelici necessario debet esse aliquid universale, & commune per prædicationem, & attributionem: ita quod sub se contineat omnia intelligibilia ab Angelo, si ve immaterialia, si ve materialia: sed objecta sensibilia non sunt proximè, & actu intelligibilia: Ergo ut illa percipiat Angelus, necessario indiget intellectu agente, cujus virtute, & operatione possit à rebus ipsis materialibus species excipere, easque proximè, & actu intelligibiles efficere.

Reponunt Thomistæ: Objectum adæquatum intellectus Angelici non esse, quid abstractum à sensibilibus, sed tantùm speciem universalem naturaliter inditam intellectui Angelico, qua percipere potest res singulares, si ve materiales, si ve immateriales.

Contra: Primo, falsum est dari tales species universales ejusmodi rerum singularium expressivas, ut infrà demonstrabimus. Secundò, objectum adæquatum intellectus Angelici, quod est commune per prædicationem iis omnibus, quæ ab Angelo cognosci possunt; vel sic est commune, ut conveniat omnibus rebus intelligibilibus, si ve materialibus, si ve immaterialibus; vel quod tantùm rebus immaterialibus quadret. Non secundum, quia sequeretur res materiales, & corporeas, v.g. Cælos, & elementa non posse ab Angelis cognosci: Nulla enim facultas versatur circa id, quod sub objecto suo adæquato non comprehenditur. Si verò primum admittas, cum sensibilia, & materialia non sint per se proximè, & actu intelligibilia, quia non sunt proportionata objecta facultati purè intellectuali, necessum erit ad ea percipienda, quòd Angelus habeat intellectum agentem, quo mediante species à rebus ipsis materialibus excipiat, & earum ope res ipsas materiales cognoscere possit.

possit, si earum notitiam aliunde sibi inditam non haberet.

Probat tertio Doctor. In Angelo admittendus est intellectus possibilis; Ergo & intellectus agens. Patet consequentia; Intellectus enim non dicitur passibilis, nisi respectu agentis: Ergo admissio uno, alter est necessario admittendus. Probatur antecedens; Intellectus Angeli recipit species, quas Deus ab initio suæ formationis indidit; Ergo habet in se potentiam, & facultatem earum specierum receptivam, Antecedens admittunt Thomistæ; Necessum est ergo etiam consequentiam admittant, omne siquidem recipiens formam aliquam opus est habere potentiam receptivam ejusdem formæ; Nec refert, quod recipiens non præcedat duratione, sed tantum natura, formæ receptionem; nam si Deus animæ nostræ concreasset species omnium intelligibilium, nihilominus in ea esset potentia receptiva, quam intellectum patientem appellamus; adeoque non est necessum, quod recipiens tempore præcedat formam in se receptam, ut dicatur habere facultatem ejus receptivam.

Reponunt Thomistæ: Quod licet in Angelis admittatur illa facultas receptiva specierum, vocari tamen non potest intellectus possibilis, quia est semper sub actu, & nunquam sub statu potentie ad ipsum actum ordinatæ.

Contra: Angelus revera potest recipere species plurium rerum, putà singularium, quas à primordio suæ formationis non habuit: Ergo saltem respectu ipsarum habebit potentiam, quæ Intellectus possibilis appellatur. Consequentia patet ex terminis: Antecedens probabitur inferius; Suadeturque nunc ex eo, quod Deus potuit non tot concedere species infimo Angelo quot superiori contulit; adeoque inferior ille Angelus illas species sibi non coevas de novo recipere poterit, vel ab ipso Deo,

vel à superioribus Angelis ipsum illuminantibus, & consequenter respectu earum habebit potentiam receptivam, quia verè erit in potentia ad notitiam illarum rerum, quarum species de novo excipit: sicque habebit verè intellectum possibilem. Deinde non opus est ad hoc ut potentia propriè dicatur receptiva, quod aliquando non fit sub actu: seu quod actualiter non habeat formam, ad quam ordinatur: sed sufficit quod naturaliter illa forma destitui possit. Etenim materia Cæli, & Elementorum est coeva suis formis, nec usquam exitit sine illis, nullus tamen dixerit eam in se non habere potentiam receptivam illarum formarum: Ergo à simili quamvis Angelus habuisset ab ab initio suæ creationis sibi coevas species rerum omnium, non minus propterea dicendus esset habere potentiam earum receptivam, adeoque etiam intellectum possibilem, & consequenter intellectum Agentem.

Dices 1. Ideo anima nostra dependet in operando à corpore, quia dependet ab ipso in essendo; sed Angelus non dependet in essendo à corpore; Ergo nec in operando; At accipere species à rebus ipsis corporeis est operatio pendens à corpore; Ergo illam elicere non potest Angelus, nec consequenter habere intellectum agentem, cujus primum munus est species cudere, & sua corporeitate defecare, easque spirituales efficere.

Distinguo majorem. Ideo solum dependet à corpore in operando, quia dependet in essendo ab ipso; nego majorem: ideo dependet in operando ab ipso mediantibus sensibus, & phantasmatibus, concedo majorem, & concessa minore, similiter distingo consequens, Angelus non dependet à corpore in operando, quasi necessario operari deberet mediantibus sensibus, & phantasmatibus corporeis: concedo; non dependet in operando à rebus cor-

po-

poris, ut ab eis excipiat species, quam ope res illas corporeas intelligat, nego. Itaque Angelus dependet à corpore non tanquam à principio, & concausa suæ cognitionis, sed tanquam ab objecto, à quo cognitionem rei materialis debet excipere.

Dices 2. Intellectus agens, & passibilis solum ita nominantur, & distinguuntur per comparisonem ad phantasmata: sed in Angelo non sunt ulla phantasmata: Ergo nec admitti debent illi intellectus.

Nego maiorem: Proprium enim munus intellectus agentis est cudere species spirituales rerum quas intelligit; Unde quando objecta intelligibilia corporea sunt, possuntque solum species corporeas emittere, necessario Angelus ad earum specierum materialium præsentiam spirituales debet effingere, quarum beneficiis res ipsas materiales percipiat, nec ad id opus est ullo phantasmate, sicut contingit in nobis, qui cum nihil percipere possimus nisi dependenter à sensibus, hinc est quod intellectus noster phantasmatibus egeat ut ad eorum conspectum rerum intelligibilium imagines spirituales effingat.

Cætera quæ possent obijci dissolventur in questione sequenti.

CONCLUSIO TERTIA.

In intellectus Angelicus discurrere potest, & ex rebus cognitis alias ignotas legitime discursu concludere. Hæc est Doctoris quest. 4. & 5. prologi; & in 2. dist. 1. qu. 1. numero 3. & dist. 7. nu. 7. ubi asserit non videri probabile Angelis esse denegandum omnem discursum: Contra S. Thomam qui 1. p. q. 58. art. 3. & alibi docet intellectum Angeli non esse discursivum, ita ut procedat à principiis ad conclusiones seorsim eas intelligendo.

Probat conclusionem Doctor. Ideo Angelus non esset discursivus, vel quia non haberet virtutem deducendi conclusiones ex præmissis, ex hypothesi

quod conclusiones non essent ipsi notæ; vel quia omnes conclusiones ipsi fuissent notæ ab initio suæ creationis; vel denique quia saltem habitualiter eas novisset ab ipso suæ formationis exordio; Sed nullum horum rite potest affirmari: Non quidem primum, esset enim imperfectio in Angelo, si non haberet virtutem colligendi ignotum ex cognitis deducibile: Non etiam secundum, falsum enim esset quod Angelus actu omnes conclusiones simul intellexerit, aliàs infinita penè cognovisset virtute naturalis; infinitæ siquidem sunt propemodum conclusiones ex rebus creatis deducibiles: Angelum autem infinita cognoscere implicat. Non denique tertium, quinquam enim habitualiter omnia novisset ab initio, quatenus nempe habuisset habitum ac species divinitus inditas, quibus mediantibus posset pro libito quacumque cognitionem intelligere; tamen inde non sequeretur quod ex se non esset discursivus; sicut à pari homines non minùs forent discursivi, licet omnes conclusiones per inditas sibi species cognoscerent, ut constat de anima Christi, quæ etsi habuerit notitiam omnium rerum sibi divinitus inditam, non minùs verè discursiva extitit, seu vim discurrendi habuit, alioquin per omnia nobis non esset assimilatus in naturalibus.

Probat 2. Doctor: si Angelus discurrere non posset maxime quia in illa virtute discursiva sequeretur nullum inter ipsum, & animam rationalem esse discrimen: Sed hæc ratio nulla est: Ergo concedenda est Angelis virtus discursiva. Major est præcipua, & fundamentalis ratio S. Thomæ; Minor vetò probatur. Quamquam Angeli, & anime rationales in virtute discursiva convenirent invicem, non minùs aliunde possent specificè distingui: Ergo ex eo quod vis discurrendi utrique tribueretur, non sequitur nullum inter utrumque fore discrimen. Probatur antècedens,

dens, licet Angeli in Sententia Adversariorum non discurrant, non minus invicem specie distinguuntur in ratione intellectivi: Ergo à simili licet Angeli, & anima invicem non discrepant per virtutem discursivam, non minus aliunde habere possent differentiam specificam: non enim est major ratio cur intra gradum intellectivi absque discursu possint admitti variae species distinctæ, quàm admittantur intra gradum intellectivi cum discursu.

Obijciēs 1. SS. Patres expressè negantes in Angelis discursum, eisque simplicem notitiam attribuentes. Sic S. Dionysius cap. 7. de divinis nominibus ait *Simplices, & beatas Intelligentias non indivisibilibus aut divisibilibus, sive sensibus, sive verbis, & rationibus divinam colligere scientiam; & infra Purè spiritualiter, & extra materiam unice divisibile penetrant*. Ergo negat in eis esse multiplicitatem actuum qui in discursu desiderantur. Unde postea de anima nostra subdit: *Per divinam item sapientiam, & animæ ratiocinandi vim habent discursione, & longo habitu ad rerum veritatem adnitescentes, atque in eo singularibus illis Spiritibus inferiores*. Quibus verbis satis apertè discrimen inter animam, & Angelum videtur constituere, quòd anima discurrendo, Angelus verò simplici modo scientiam obtineat. Subscribit S. Bernardus serm. 5. in Cantica ubi docet Angelos non cognoscere spiritualia ex corporalibus sicut nos ea cognoscimus, sed inquit *sola sua virtute ac vivacitate naturæ, summa, & infima penetrant*.

Respondēdo ex iis SS. Patrum sententiis solum inferri quòd Angeli non intelligent divina ex corporalibus, modo corporeo, nempe per phantasmata, nec ea laborant difficultate quàm nos plerumque desudamus in colligenda veritate, vel effectuum ex causis, vel causarum ex effectibus, propterea quòd utriusque necessaria connexio nobis

apertè non affulgeat. Secus autem est de Angelis, nam ut subdit S. Bernardus locò laudato *Ed ille cælestium habitator ingenita subtilitate ac sublimitate sua, omni velocitate facilitateque pertingit*.

Obijciēs 2. In hoc maxime distingui videntur intellectus Angelicus, & humanus, quòd hic discurrendo, ille simplici intelligentia seu intuitu rerum, veritatem deprehendat: Unde nostri spiritus rationales solent nominari, Angeli verò sublimes intelligentiæ: Ergo revera Angelus non est discursivus.

Nego Antecedens in quo certè petitur principium, Angeli enim inter se specie distinguuntur, quamquam in sententia Adversariorum non sint discursivi; quidni ergo etiam specie distinguerentur ab anima, quamvis eandem cum ipsa discurrendi virtutem haberent?

Obijciēs 3. ita comparantur Angelici spiritus ad humanos, sicut cælestia corpora ad sublunaria: Ergo sicut corpora cælestia distant à terrenis quòd hæc sine motu suam perfectionem obtineant, illa verò per motum eam adipiscantur, sic homines indigent discursu, qui est veluti spiritualis motus, ut ad veritatis cognitionem perveniant; Cælestes verò Spiritus sine discursu illam intuentur.

Distinguo Antecedens comparantur quoad omnia nego, quantum ad aliqua transeat, possunt enim invicem comparari vel in incorruptibilitate vel in aliqua alia proprietate. Cæteræ rationes D. Thomæ vel petunt principium, vel faciliè ex præcedentium solutione dissolvi possunt.



QUAESTIO SECUNDA.

An, & qualiter Angeli res intelligant per earum species?

C Elebris est inter Angelici, & Doctoris subtilis Discipulos controversia hac in resolvenda quaestione: licet enim subtilis Doctor in 2. d. 3. q. 10. & 11. concedat Angelum a suae formationis exordio habuisse sibi divinitus infusas rerum universalium species, imo, & eorum individuum quae cum ipso tunc temporis extabant, ac proinde eas non acceperit ab ejusmodi objectis; contendit tamen species illorum singularium, quae decursu temporis producuntur, nec ipsis ab initio fuerunt cognita, mutuari ab ipsismet individuis: imò quod posset etiam Angelus indita sibi intelligendi virtute omnes omnino species ab objectis desumere si aliunde sibi eas non haberet infusas. Contrariam verò sententiam docet Angelicus Doctor in 2. d. 3. qu. 2. art. 1. & 2. contra Gentes c. 96. quem sequuntur omnes ipsius Discipuli. Ut autem evidentior appareat hujusce quaestionis resolutio, praesensque controversia faciliori calculo dirimatur.

Notandum 1. Duplicem solitò distinguere rerum cognitionem, Intuitivam videlicet, & Abstractivam. Intuitiva est cognitio rei praesentis, & moventis ut praesens est in sua actuali existentia. Abstractiva verò est cognitio objecti moventis secundum quod abstrahit ab omni praesentia, & existentia actuali. Hanc autem duplicem cognitionem Angelis inesse fatentur omnes. Primò namque res aliquae sunt illis praesentes in sua actuali existentia easque intuitivè cognoscunt, nec indigent aliqua specie ad eas percipiendas, sufficienter enim ad illam intellectionem concurrunt objectum praesens ut causa efficiens cum intellectu, juxta illud vulgare effatum; ab objecto, & potentia paritur omnis

notitia. Res verò quae non sunt praesentes nec per suam actualem existentiam debite proportionatam movent intellectum Angelicum ad sui notitiam, eas Angelus tantum abstractivè cognoscit, nempe in specie impressa rem ipsam representante. Ut enim objectum concurrat simul cum potentia, inquit Doctor quaest. laudata 10. debet esse praesens vel in se, vel in alio: Objectum autem respectu cognitionis abstractivae cum non sit in se praesens, necessarìò debet praesens effici per sui speciem, & imaginem. Unde cognitio intuitiva praecise est cognitio rei existentis, & moventis intellectum ad sui notitiam quatenus praesens est: Abstractiva verò est cognitio objecti praesentis tantum in specie, & imagine per quam representatur.

Notandum 2. Seu resumendum ex his quae diximus sect. 2. q. 1. de visione beatifica: Duplicem solitò distinguere speciem objecti representativam: Aliam enim dicitur impressa, alia verò expressa. Prior est virtualis similitudo alicujus objecti, seu qualitas quaedam intentionalis effectivè concurrens cum intellectu ad producendam cognitionem, complendo nimirum ipsam potentiam, & illam determinando ex parte objecti ad hanc cognitionem producendam. Dicitur *similitudo*, quia representat objectum, illudque potentie cognoscenti praesens exhibet; dicitur *virtualitè*, non enim representat objectum formaliter, sed virtualiter, quia vice objecti concurrat ad cognitionem formandam. Cum enim cognitio omnis ex potentia, & objecto nascatur, potentia quidem per seipsam semper concurrat ad formandam cognitionem, objectum verò interdum per vicariam sui speciem, ut jam dictum est. Dicitur *qualitèr intentionalis*, quia ordinatur ad cognitionem, & intellectum, cujus operatio interdum intentio appellatur.

K.

Poste-

Posterior species nimirum expressa, est terminus internus cognitionis, qui in intellectu dicitur *Verbum* mentis, in imaginatione *phantasma*, estque ipsa ab intellectu, & objecto concurrente formata ut ipsius objecti imago, & expressio.

Notandum 3. omnes Theologos concedere Angelis fuisse concretas rerum saltem universalium species, nec-non, & præstantiorum individuorum quæ Deus vel formaverat vel formaturus erat: Hæc enim veritas deducitur primo ex Sacra Scriptura quæ Ecclesiastici cap. 17. affirmat Deum primos Parentes replevisse disciplina intellectus, creasse illis scientiam spiritus, & sensu implevisse cor illorum: æquum autem est idem sentire de Angelis, de quorum uno nempe Principe SS. Patres interpretantur allegoricè illud Ezechielis 28. *Tu Cherub... signaculum similitudinis, plenus sapientia, & profusus decore in deliciis paradisi Dei fuisti, &c. Tu Cherub extensus, & protensus... perfræsis in visis tuis à die conditionis tuæ, donec inventa est iniquitas in te.* Hinc S. Dionysius c. 5. & 7. docet rationes rerum, & exemplaria fuisse à divina Mente Angelis indita, & communicata; Et S. Augustinus lib. 4. de gen. ad litteram c. 24. expressè docet prius tempore vel natura quam conderentur res materiales, Angelos habuisse rerum omnium notitiam, non solum in Verbo sed etiam in genere proprio seu per ipsarum rerum species.

Quod utique firmari potest hac ratione S. Thomæ qu. 55. art. 2. Ita proportione servata se habere debuit intellectiva potentia ad formas intelligibiles, sicut materia prima ad formas substantiales, utraque enim est de se pura potentia, indigetque forma per quam reducatur ad actum: Ergo quemadmodum materia rerum inferiorum, & corruptibilium non semper sub actu existit, sed successivè actuatur per diversas

formas; materia verò corporum cælestium incorruptibilium accepit ab initio suas formas substantiales sibi congenitas: sic Angeli cælestes spiritus, & immortales, species seu formas intentionales ad suam perfectionem necessarias ab initio habuerunt sibi congenitas: Humanì verò intellectus sensum eas à rebus accipiunt.

His prælibatis tria maximè veniunt hac in questione determinanda. *Primum*, an Angeli necessariò opus habeant speciebus intelligibilibus ad res quaslibet percipiendas: *Secundum*, an habuerint singularum rerum singulas species, an verò per unicam, aut non ita plures species universales, res omnes perceperint. *Tertium*, An excipere potuissent species rerum ab objectis, si Deus eas non indidisset; possintque de novo aliquas à rebus ipsis individualibus, quæ in dies formantur, mutuari. *Quartum*, An seipsos per suam substantiam, vel per species intelligant.

CONCLUSIO PRIMA.

Angelus indiget speciebus impressis ad cognitionem abstractivam rerum Possibilium, aut Præteritarum, aut Futurarum, aut non sufficienter præsentium: Non verò ad cognitionem præsentium. Hæc est Doctoris in 2. dist. 3. qu. 10. num. 16. quantum ad utramque partem, quarum.

PROBATUR 1. Ad rerum possibilem, & non debite præsentium notitiam intellectus humanus exigit species intelligibiles: Ergo, & Angelicus. Probatur consequentia, quia facilis apparet qualiter intellectus humanus posset determinari ad earum rerum cognitionem absque specie, quam Angelicus. Ergo si hoc non obstante admittantur species in intellectu humano, multo magis in Angelico sunt admittendæ. Probatur antecedens; si Intellectui humano non adessent species intelligibiles, dici posset ad rerum notitiam determinari per species phantasticas: Nihil

hil autem assignari potest in Angelo quod seclusis speciebus determinaret ejus intellectum ad rerum notitiam: Ergo si necessariæ videantur species in intellectu humano respectu rerum abstractivè cognoscendarum, multo-magis erunt necessariæ in intellectu Angelico. *Deinde*, objectum omne debet influere in facultatem, & eam ad cognitionem determinare, vel per se, vel per aliquid aliud ipsius vices gerens, illudque repræsentans: Sed res illæ abstractivè cognoscendæ per seipsas movere nequeunt intellectum, cum nec sint realiter existentes, nec ipsi debite præsententur: Ergo, &c.

Denique, Angelus non intelligit necessario omnia possibilia, hoc enim absque dubio infinitam in eo virtutem argueret: Ergo ut aliquod eorum intelligat, debet admitti aliquod determinativum illius, quò rem illam possibilem percipiat: Sed illud determinativum non potest esse res possibilis secundum se, quia res possibilis ut talis, est necessario possibilis, & quantum ex natura sua eodem modo semper applicatur: nec aliud determinativum assignari potest præter speciem impressam: Ergo est concedenda.

Idem ferendum judicium de rebus absentibus. Quòd enim Angeli res corporeas existentes videre non possint in quacumque distantia, insinuare videtur Scriptura sacra pluribi maxime Job. 1. v. 7. *Circuivi terram, & perambulavi eam, &c. Numquid considerasti servum meum Job?* Et Matth. 12. v. 43. ubi Christus ait, quod Spiritus immundus, idest Diabolus, cum exierit ab homine ambulat per loca arida ad requiem captandam, eaque non inventa revertitur in domum quâ exierat: *Et veniens invenit eam vacantem, & opus mundatam, & ornatam. Tunc vadit, & assumit septem alios Spiritus nequiores se, & intrantes habitant ibi, & sunt novissima hominis illius (energumeni) pejora, prioribus.*

Quibus patet, Angelis res non esse compertas in quacumque distantia: Si enim, inquit Martinonius disp. 36. Dæmon undique videt omnia, poterat Jobum considerasse attentè, terra non peragrata, cujus tamen peragrationis præsuppositæ causâ vel occasione Deus dæmonem interrogat num Job servum suum consideraverit. Neque erat quòd alter locum aridum peteret ad requiem quærendam, si antequam eò se conferret, videre poterat non esse ibi quieti locum; nec ut reverteretur ad antiquum hospitium, cognitaque ipsius dispositione comoda rediret ad socios, illique assumptis in illud simul iterum intraret. Quid enim tot peregrinationibus, si ex arido loco poterat hospitii dispositionem cernere, indeque socios advocare, tamque simul in illud se recipere? Nec obest quod opponunt aliqui, Divitem epulonem ex inferno vidisse Abrahamum, & Lazarum existentes in limbo. Nam vel hæc distantia, magna non fuit physicè, licet moraliter sit magnum chaos interjectum propter impossibilitatem comæatus vel opis. Aut potius hæc visio non fuit naturalis quoad modum, sed supernaturalis, sicut alia multa ad justiciam divinam, & Beatorum ac damnatorum statum pertinentia.

Dices: Quamvis Angelus haberet species plurium rerum, non deberet necessario ferri circa objecta istarum specierum, nec ea necessario intelligeret: Ergo ad ea speciatim intelligenda determinari deberet per aliquid aliud distinctum à speciebus: Sed illud aliud determinativum, tam posset ipsum intellectum determinare seclusis speciebus quàm ipsis præsentibus: Ergo illæ species non videntur necessariæ. Patet antecedens, Si enim Angelus necessario res intelligeret quarum habet species, cum omnium penè rerum species habeat inditas: sequeretur eum res omnes simul intelligere, quòd certè majore

rem quàm intellectum Angelicum deceat, perfectionem importaret. Consequentia pariter est evidens: Cùm enim intellectus sit facultas, & potentia ex se velut indifferens, & indeterminata ut versetur circa hoc vel illud objectum, non potest uni præ ceteris intelligendo applicari, nisi ad hanc cognitionem per aliquid determinetur.

Disp. antec. Non deberet necessario ferri circa objecta quorum habet species, quando species illæ ipsi intellectui debite præsentantur, & in eo relucet actu, ipsique dilucide obversantur tamquam imagines rerum, quarum sunt species, nego: Cùm enim intellectus sit facultas naturalis, etiam naturaliter, & necessario fertur in cognitione rerum sibi debite præsentium, vel per se, vel per sui speciem: Non fertur necessario circa objecta quorum species ita in se actu relucens non habet, concedo antec. & nego consequ. Quamquam enim intellectus noster plurium rerum species in se reconditas habeat; quia tamen non omnes, sed solum aliquas in eo alternante successu actu relucens apparent, ipsique conspiciendæ obversantur, inde fit quòd solum aliquarum, non verò omnium rerum, quarum species complectitur, notitiam habeat. Idem à pari dicendum de intellectu Angelico, qui licet plurium rerum species sibi divinitus inditas complectatur conservetque; quia tamen omnes ejus intuitu non æquè obijciuntur conspiciendæ, inde fit quòd non omnia simul objecta percipiat, quorum species in se complectitur.

Instit. Idcirco noster intellectus omnes quas in se reconditas species complectitur, actu non percipit; quia nempe à phantasmatibus, & objectis de novo apposis determinatur ad unius præ alio cognitionem: At hæc dici nequeunt de intellectu Angelico, quippe ut diximus, nihil præter spe-

cies habet à quo moveri, & determinari possit ad objecti notitiam: Ergo, &c.

Respondeo. Concessa majore, distinguendo minorem: nihil simile corporeum, & sensibile habet intellectus Angelicus, concedo, Immateriale, & spirituale, nego. Cùm enim Angelicus intellectus sit finitæ entitatis, nec possit omnia simul cognoscere, necessum est quòd alternante conceptu objecta percipiat, vel per eorundem objectorum præsentiam de novo ipsi exhibitam, vel per excitationem specierum quæ fit aut à superioribus Angelis illustrantibus; aut à voluntate ejusdem Angeli; quæ cùm sit semper illustrata, & summè libera, nec ut nostra veluti offuscetur, & captivetur per phantasmata, aut per sensum tam internorum quàm externorum operationem, pro libito movere potest intellectum Angelicum, ut hoc vel illud objectum in specie quam ipsi obijcit, intueatur.

Dices 2. Si Angelus haberet species, vel ipsas acciperet à rebus, vel à Deo inditas: sed neutrum potest asseri. Ergo, &c. Major constat: Minor probatur: Si species illas Angelus à rebus exciperet, deberet moveri ab objectis externis ad illas species excipiendas: Sed objecta ipsa per se sufficienter concurrere possent cum intellectu Angelico ad sui cognitionem etiam seclusa specie: Ergo hac ratione non videntur admittendæ. Non etiam videntur illæ species à Deo infusæ; nam vel illæ species productæ ab initio cum Angelo, ipsi fuissent divinitus inditæ; vel sicut debite perfectiones naturæ Angelicæ, aut sicut formæ fluentes ab ejus substantia ad modum proprietatis: Primum non videtur admittendum, sequeretur enim quòd Deus posset Angelis species negare absque ullo naturæ Angelicæ prejudicio; nec violentum, & imperfectum foret Angelo nullius rei cognitionem habere, sicut violentum ipsi non

non est Deum non videre naturaliter, licet alio lumine supernaturali illum possit intueri.

Nego min. Etenim Angelus species illas posset à rebus excipere, ut mox probabimus, vel eas habere à Deo sibi divinitus inditas: Nec inde sequeretur ipsas supernaturales formas esse dicendas; siquidem formæ naturalitas vel supernaturalitas præcisè non attenditur ex parte principii producentis; nam si Deus de novo produceret calorem in aqua, calor ille non propterea diceretur forma supernaturalis, nec specie distinctus ab eo, qui ab igne produceretur: Sed attenditur, vel penes potentiam receptivam, quæ ex natura sua talem formam non exigit ad perfectionem, & operationem suam, vel ex parte finis, & objecti naturæ vires transcendentes, quod videlicet virtute sua naturali nequaquam posset attingere. Hæc autem dici nequeunt de speciebus rerum Angelis à Deo inditis: Siquidem species illæ possent naturaliter acquiri ab intellectu Angelico, si aliunde eas sibi inditas non haberet: nec sunt præter statim naturalem ipsius, cum enim sit naturaliter intelligens, etiam rerum cognitionem tamquam naturalem suam perfectionem exigit, & illa cognitio, quam mediantibus speciebus habet de objectis, purè naturalis est.

PROBATUR SECUNDA PARS: Nempe quod ad cognitionem rerum existentium, & præsentium Angelus non egeat speciebus: Objecta enim sive corporea, sive spiritualia sint, sufficienter movere possunt, ac determinare intellectum Angelicum, sive per modum causæ partialiter concurrentis ad formandam cognitionem, sive per modum termini, vel conditionis, sine qua non: Ergo ad eorum objectorum notitiam non videntur necessariò desiderari species. Consequenter patet: Si enim sint frustraneæ, nihil necessitatis est eas concedere; quippe nihil vacuum, & fru-

straneum natura patitur. Prob. anteced. Qua ratione objectum præsens concurrere posset ad producendam sui speciem quando intellectui Angelico præsens fissitur, eadem virtute posset concurrere ad producendam, seu terminandam sui ipsius cognitionem: Ergo ad illius notitiam non videantur species desiderandæ.

Dices 1. Si absque specie posset Angelus objecta præsentia intelligere, Angelus inferioriorem, vel superior inferiorem cognosceret per se; Sed neutrum potest affirmari. Non quidem primum, quia principium determinativum ad cognitionem, debet commensurari potentie, nec ipsam excedere in immaterialitate; hac enim ratione essentia divina videri nequit ab Angelo naturaliter: Sed Angelus superior non est commensuratus inferiori: longè enim ipso est immaterialior, seu perfectior, adeoque non potest cum ipso naturaliter ad cognitionem concurrere. Non etiam secundum; quia objectum natum concurrere cum facultate intellectiva ad cognitionem sui, debet esse æquè immateriale, ac ipsamet intellectus; sed Angelus inferior non est æquè immaterialis, ac superior.

Nego minorem. Quæ enim ratione objectum non posset concurrere cum potentia, quæ esset magis, vel minus materialis, etiam non posset cum ipsa concurrere ad sui speciem producendam, nec talis intellectus ejusmodi speciem naturaliter exigeret; Hoc autem nemo dixerit; Ergo nec quod exinde sequitur admitti debet. *Vel dico;* Probationem illius minoris esse distinguendam: objectum debet esse ejusdem perfectionis, & æquè immateriale, ac potentia secundum entitatem suam, negos: Debet esse immateriale, & commensuratum secundum modum operandi, ita quòd scilicet ad operationem spiritualement objectum quantumlibet perfectum aut imperfectum debet concurrere jux-

ta modum facultatis operantis, & ipsi ita attemperari, ut objectum præstantius eum minus perfecta facultate præstantiorem operationem non efficiat, quam efficeret minus perfectum, concedo. Dignitas enim operationis non ex parte objecti tantum, sed etiam ex parte facultatis operantis deducenda est.

Inflabilis. Si unus Angelus posset determinare immediatè intellectum alterius Angeli ad sui cognitionem (idem dicendum de quolibet alio objecto) necessarium esset, ut menti ejus illiberetur, quippe cum ei deberet fieri intimè præsens, ipsumque realiter inmutare: sed nulla creatura potest alteri creaturæ inflabi: hoc enim soli Deo proprium est ratione sue divinæ immensitatis: Ergo, &c.

Nego majorem. Etenim ut objectum moveat potentiam, non debet illi fieri præsens substantialiter, & per illapsum substantiæ: sed sufficit, quod fiat præsens per intimam, & immediatam sui motionem, etiam si hæc fiat per solam objecti externam appositionem, & præsentiam. Adde quod, ut unus Angelus alterum determinare possit, & movere, non requiratur ea præsentia, quæ fiat veluti per modum contactus physici, qualis esse debet intima corporum præsentia: Etenim Angelus cum non dependeat à medio materiali, ut in alterum suam virtutem exerat, potest etiam ab ipso physice, & substantialiter distans, eum movere, ac determinare ad sui noticiam, ut plenius infra docebitur agendo de locutione Angelica.

Dices 1. Ut objectum causet intellectum cum intellectu, debet esse unum cum ipso, adeoque forma ipsius; At non potest objectum esse tale secundum se immediatè, sed solum mediantè specie: Ergo necessario requiritur species objecti.

Nego majorem. Quemadmodum enim phantasma cum intellectu agente po-

test concurrere ad speciem impressam, quamvis non sit forma ipsius, nec unum cum ipso, nisi eo modo quo duæ causæ partiales dici possunt esse una causa, ad quod non requiritur, ut una sit in altera, aut sit forma alterius: ita planè in proposito dicendum est, quod ut objectum proportionatum causet cum intellectu possibili ipsam intellectionem immediatè, non sit necesse, ut alio modo faciat unum cum intellectu, aut sit in ipso tamquam forma ipsius.

CONCLUSIO SECUNDA.

Angelus non habet species universales quibus plura distincta cognoscere possit, sed ad rerum diversarum notitiam diversis eget speciebus. Ita Doctor laudatus qu. 10. num. 8. probat 1. Nulla res creata potest esse ratio cognoscendi plura numero infinita, sed species universalis si daretur esset ratio cognoscendi plura infinita numero; Ergo, &c. Minor constat, cum enim individua specierum sint possibilia numero infinita, consequens est, quod si detur species universalis, v.g. omnium hominum tam existentium, quam futurorum & possibilium, repræsentativa, illa debet habere vim repræsentandi infinita. Probat majorem Doctor. Implicat aliquam admitti posse creaturam, quæ sit infinitæ perfectionis; sed species repræsentativa infinitorum, necessario deberet habere perfectionem infinitam; nam ubi pluralitas numeralis perfectionem importat, major pluralitas majorem perfectionem connotat; adeoque infinita pluralitas, perfectionem infinitam arguit. Etenim si virtus capax portandi duas libras sit perfectior, quam quæ potest portare unicam, & capax portandi sex, perfectior quam quæ duas portat: Consequens est, quod quæ infinitas portare potest, infinitæ erit perfectionis: Ergo à simili cum species repræsentativa duorum sit perfectior ea, quæ tantum unicum refert; consequens est, quod ea quæ habet vim repræsen-

tan-

tandi infinita, etiam foret infinita perfectionis. *Confirmat*: à simili, quia ex eo quod essentia divina sit representativa omnium intelligibilium, colligimus eam esse infinitam: Ergo à pari si aliqua species posset representare infinita, reverà foret etiam infinita perfectionis.

Probat 1. Si aliqua species representare posset plura distincta, maxime species naturæ communis, v.g. species naturæ hominis, quæ omnes omnino homines representaret: sed id dici nequit: Probatur, ut species naturæ humanæ representare posset omnes omnino homines, oporteret ut omnes homines in natura humana continerentur: sed hoc est falsum. Probatur; Si natura humana contineret omnes omnino homines sibi inferiores, maxime, vel formaliter, vel eminenter: sed neutrum dici potest. Non quidem primum, quod enim continet aliquid formaliter, est etiam formaliter illud ipsum: Sed nulla natura est formaliter omnia sua individua: Ergo illa non continet formaliter; Non etiam secundum: Contineens enim eminenter longe præstantius est eo quod continet; Si ergo aliqua natura eminenter contineret omnia sua individua tam existentia, quam possibilia, cum hæc numero sint infinita, sequeretur ipsam naturam esse infinite perfectam; hoc autem implicat: Ergo & illud unum de sequitur. Deinde ut aliquid representet aliud perfectè, debet omnes ejus characteres, & gradus involvere, alioquin tantum ex parte, & imperfectè illud representabit: Sed nulla species naturæ universalis potest referre omnes characteres inferiorum. Probatur. Non potest aliud nec aliter ulla species naturæ universalis representare, quam quod ipsa in se entitativè continet, & representandum exhibet: Sed nulla natura communis, vel universalis entitativè continet omnes gradus suorum inferiorum, quippe individua addunt distinctam entitatem, & differentiam su-

pra naturam specificam: Ergo cum gradus individualitatis non contineatur in natura specifica, etiam per eam non poterit representari.

Probatur 3. Species illæ universales videntur inotiles, & superflue: Ergo non sunt admittendæ. Probatur antecedens: Quidquid posset Angelus intelligere per speciem universalem, longe præstantius cognoscere posset per speciem particularem illius: Perfectius enim species rei particularis ipsam representat, quam representaret species tantum communis. Ergo ad id non videntur utiles species universales. Deinde per illas species universales, vel Angelus necessàriò intelligeret omnia, quorum species habet, vel non intelligeret omnia simul, sed nunc hæc objecta nunc illa, prout vel à sua voluntate, vel aliunde movebitur, ac determinabitur. Si primum, certum est, quod species particularis tam perfectè id posset præstare, quam species universalis. Si secundum, longe facilius intellectus poterit ab uno objecto ad aliud intelligendum divertit ubi varia illa objecta per diversas species representantur, quam si per unicam; qualiter enim fieri posset, ut intellectus unam, eandemque entitativè speciem intuenso, quantum esset representativa albedinis, v.g. jam amplius ipsam non ut albedinem referentem intueretur: sed ut nigredinem, cum illa, eademque species ipsi invariata exhibetur præsens.

Probatur 4. Illæ species Angelo sunt ascribendæ, quæ videntur ipsi magis connaturales; sed species particulares sunt ejusmodi: Ergo &c. Major patet: Naturæ namque præstantissima qualis est Angelus, concedendæ sunt perfectiones, quæ naturalem ejus activitatem, & entitatem deceant. Minor probatur. Illæ species videntur magis connaturales Angelo, quas Angelus ipse virtute propria sibi comparare posset, si aliunde eas sibi non haberet inditas: sed

sed Angelus posset sibi comparare species particulares ab ipsis rebus, sicut de facto acquirit illas species rerum particularium, quæ ipsi non fuerunt concretæ; non posset autem ullatenus species universales acquirere: volunt enim Thomistæ esse tales in entitate sua, ut nec ab ipsomet Angelo, nec ab ulla alia causâ creatâ produci possint: Ergo species particulares sunt magis connaturales, quàm universales.

Dices 1. Illæ species concedendæ sunt Angelo, quæ magis ejus naturam decet: sed species universales magis naturam Angelicam decet, quàm particulares; Ergo, &c. Probatur minor. Angeli sunt in supremo gradu substantiarum creaturarum intellectualium: Ergo maximam debent habere efficaciam & virtutem intelligendi, adeoque intelligendi plura per unam speciem: Virtus enim unita perfectior est divisa: Præstantior ergo erit virtus intellectiva Angelica, si plura per speciem unicam percipiat, quàm per plures species rebus diversis correspondentes.

Nego minorem, & ad ejus probationem dico, maximam intelligendi virtutem Angelorum ex eo non esse repetendam, quòd plura per unam speciem intelligere posset potius, quàm per plures species, sed ex eo quòd evidentius, & perspicacius res intelligant, quàm naturæ intellectivæ sibi inferiores, vel quòd plura cognoscere possent, quàm homines sive illa cognoscant per plures species, sive per unicam. Adde quòd non majoris foret perfectionis in Angelo plura per unam speciem intelligere, magis, quàm per plures, nisi illa cognitio, quæ fieret per unicam perfectior esset illa, quæ fieret per plures? Sed non apparet qualiter perfectius sit per unicam speciem intelligere res diversas, v. g. albedinem, & nigredinem, quàm per particulares earum species, ut jam diximus. Ad id autem, quod additur virtutem unitam esse perfectio-

rem non unità: equidem verum est, quando defectu unionis, seu unitatis sequeretur minor applicatio intellectus ad objectum, quod non contingit in præsentī, siquidem tam perfectè imò efficacius applicaretur intellectus ad intelligenda plura objecta per distinctas eorum species, quàm per unicam.

Dices 2. Idcirco videntur proscribendæ species universales: quia maximè repræsenterent omnia ejusdem naturæ inferiora: sed exinde nihil sequitur absurdum: Ergo propterea non debent negari. Major patet ex dictis. Minor prob. Si non posset species aliqua naturæ communis repræscentare omnia ejusdem naturæ individua, maximè quia illa finita est; hæc verò numero infinita; Infinitum autem per finitum repræscentari nequit, quippe cum repræscentans debeat repræscentato assimilari: sed hæc ratio nulla est. Siquidem Deus perfectè, & distinctè repræscentatur per speciem, aut qualitatem creatam, & finitam, nempe per lumen gloriæ, aut speciem impressam essentia divinæ repræscentativam, quam possibilem esse probavimus in Disput. de Visione beatifica: Ergo, &c.

Nego minorem, & ad ejus probationem dico nullam esse paritatem: *Tum quia* hic sermo est de repræsentione naturali, non autem de supernaturali, quæ sit per medium supernaturale, putà per speciem illam impressam divinæ Essentia, quæ à Deo supernaturaliter agente crearetur, & infunderetur, vel per lumen gloriæ, quod est superioris ordinis, & divini: Hæc autem repræsentionis infinitorum individuorum, supponitur omnino naturalis, & fieri in intellectu Angelico naturaliter operante: adeoque inter utramque repræsentionem non est paritas. *Tum quia* facilius repræscentari, & videri potest objectum entitativè infinitum numero unicum, quàm infinita numero, & secundum entitatem finita; quia, inquit

Do-

Doctor in 1. dist. 2. quæst. 2. Cognitio
eo perfectior est, quod plura cognos-
cit, cognoscere enim aliqua est per-
fectio, cognoscere autem plura so-
nat maiorem perfectionem, & spe-
ciem impressam perfectionem: Ergo
cognoscere infinita dicit infinitam
perfectionem: Non sic autem quan-
do obiectum est unicum numero,
sed entitate infinitum, quia tunc
percipitur tantum sub ratione ob-
iecti infiniti, non verò secundum om-
nes gradus infinitæ perfectionis.

CONCLUSIO TERTIA.

Angeli possunt aliquid de novo cogno-
scere, & species à rebus externis
excipere. Hæc est Doctoris in 2. d. 3.
quæst. 11. num. 11.

Probatur conclusio: Primò quidem ex
Scriptura sacra, nam S. Paulus ad Ephesios 3. ait, *Misit me illuminare omnes
quæ sit dispensatio Sacramenti abscon-
diti à sæculis in Deo, qui omnia creavit,*
hoc est ut annuntiarem mysterium In-
carnationis non solum hominibus; Sed
etiam, inquit, *ut innotescat Principati-
bus, & Potestatibus in cælestibus per
Ecclesiam multiformis Sapientia Dei.*
Quasi diceret se à Deo deputatum, ut
Incarnationis mysterium, non solum
homines, sed etiam Angelos doceret;
Nam, inquit S. Chrysostomus in ipsum
locum, *Mysterium illud ignorabant An-
geli: nam si Principatus ignorabant, uti-
que multo magis Angeli. Unde ergo co-
gnituri? quo revelante? quando videli-
cet illud cognovit Paulus, tunc per illum
& isti: Paulus Angelorum Evangelista,
-ie eos illuminavit. Cui concinit S. Am-
brosius in eundem locum, dicens quod
Deus Paulum non solum magistrum de-
dit Gentibus, sed etiam Angelis.* Sub-
scribit Cyrillus Alexandrinus, affirmans
quod Paulo prædicante, Evangelii my-
steria didicerunt Angeli. Favet etiam
huic veritati S. Augustinus lib. 12. cap. 7.
ubi docet quod dum res aliqua sit de
novo, afficiantur sensus carnales homi-
num, & animalium, nec non & cæle-
stis Angelorum. Deus, inquit, non ad
tempus videt, nec aliquid novi fit in ejus
visione, atque scientia cum aliquid tem-
poraliter geritur. Sicut inde afficiuntur
sensu, vel carnales animas, & ho-
minum, vel etiam cælestes Angelorum;
Sed hæc nova affectio Angelorum fieri
nequit à rebus illis, nisi Angeli ab ipsis
species excipiant: Ergo, &c.

Probat conclusionem Doctor: Primò
Angelus habet intellectum agentem,
& passibilem: Ergo potest acquirere,
& in se recipere de novo species à rebus
ipsis. Antecedens probatum fuit supe-
riori quæstione. Consequentia verò per
se est manifesta: Intellectus enim agens
est facultas acquisitiva specierum, pas-
sibilis verò potentia earundem rece-
ptiva.

Probat secundò: Si Angelus à Deo
crearetur in puris naturalibus, nullis vi-
delicet speciebus intelligibilibus dona-
tus, & illustratus, vel posset aliquid
aliud à se cum universali, & comuni
Dei concursu per proprias vires cogno-
scere, vel non. Si primum: Ergo An-
gelus suæ naturæ relictus posset à re-
bus ipsis cognitionem, subindeque spe-
cies mutuari. Si Secundum: Ergo An-
gelus secundum proprias vires natura-
les imperfectior erit anima nostra, quæ
eum communi Dei influentia potest re-
rum cognitiones per exceptas ab eis
species intelligibiles sibi comparare.

Nec reponas eum Thomistis non esse
mirum quod Angelus in eo casu nihil
perciperet, essetque minus perfectus,
quàm anima nostra, quippe careret ali-
quo suæ naturæ debito: sicut non esset
mirum, quod anima nostra sine intel-
lectu agente, & viribus sensitivis crea-
ta nihil posset intelligere, subindeque
esset secundum se vilior bruto. Hæc
enim replica vim rationis non infir-
mat, quippe falsum est species Angelis
eodem jure deberi, quo intellectus
agens, & facultas sensitiva homini.

L

Si-

Tom. IV.

Siquidem hæ facultates sunt de intrinseca perfectione, & constitutione hominis, & ab ejus anima realiter distinctæ: Species autem illæ intelligibiles Angelis sunt adventitiæ, & ab extrinseco inditæ, adeoque ipsis seclusis salva, & integra stare potest Angelica natura secundum substantiam, & facultates operativas: adeoque absentibus illis speciebus ejus intellectus est in pari statu quo humanus, sed ut dictum est, humanus intellectus speciebus intelligibilibus non illustratus potest eas sibi comparare: Ergo multo-magis Angelicus.

Confirmatur: Quæ sunt in inferioribus dicentia perfectionem, potiori jure in superiori existere fatendum est: Sed abstrahere species à rebus sensibilibus importat perfectionem in anima rationali, quæ intellectus agentis beneficio omnem rerum naturalium cognitionem sibi vendicare potest: Ergo multo-magis illa virtus Angelo est tribuenda.

Probat 3. Angelus potest cognoscere Petrum, & Paulum, & quodlibet aliud individuum de novo productum: Sed non potest ipsa cognoscere per species aliquas infusas: Ergo vel illa cognoscit immediatè, vel per species ab eis mutatas. Major patet. Quis enim affirmaret, quod intellectus Angelicus aliqua individua de novo producta, & sibi debite præsentia non posset cognoscere? Probat minor: Si cognosceret illa, absque speciebus à se comparatis, cognosceret maximè vel per species universales naturæ communis illorum individuum, vel per species particulares, quibus ipsa singularia, & individua repræsentantur: Sed neutrum dici potest: Non quidem primum; Tum quia ut superiori conclusione probatum est, species illæ universales omnino sunt proscribendæ: Tum quia sicut natura universalis non continet sub se determinatè Petrum, & Paulum magis

quàm reliqua individua naturæ humanæ, ita species ejus non potest determinare, & movere ad cognoscendum Petrum, & Paulum magis quàm singulares alios homines: Ergo ut intellectus Angelicus intelligat Petrum, & Paulum determinatè, debet habere aliud motivum, & determinativum, quàm speciem naturæ humanæ. Non etiam secundum dici potest, quamquam enim Adversariis concedatur, quod Angeli habeant sibi species divinitus inditas quorundam individuum, non videtur probabile eis fuisse concreatas species omnium prorsus individuum quovis tempore extitutorum. Cum enim possint Angeli objecta per se sufficienter præsentia intueri sine adminiculo species, vel ab eis species mutuari, dum ipsis præsentia sistuntur, quid opus fuit Deum illis ab initio infundere species repræsentantes omnes ventorum status, motus foliorum, marinos fluctus, omnia quorumlibet idiomatum genera, omnesque verborum significationes, & similia, quæ Angelos nosse certum est? Adde quod cum Angelus cognoscat futura, quando existunt, omnesque eorum circumstantias temporis & loci, sequeretur quod si horum omnium species ab initio creationis inditas habuisset, non minus certò potuisset cognoscere futura libera, sicut & intueretur præsentia, potestque recordari præteritorum, quorum speciem retinet: Sed contra fidem est Angelos naturaliter prænosse certò, & plusquam conjecturaliter futura contingentia antequam existant, ut probabitur infra: Ergo, &c.

Probat 4. Quod quamvis Angelus haberet species infusas, quibus intelligeret singularia, tam materialia, quàm spiritualia, illæ species non sufficerent ipsi ad cognoscendam eorundem objectorum realem existentiam; sed deberet illam notitiam, vel à rebus ipsis immediatè, & sine specie, vel mediatè, & per

per speciem accipere : Ergo revera potest à rebus species accipere , & aliquid de novo cognoscere . Probatum antecedens, Existentia actualis non necessario , sed tantum contingenter conjungitur cum re singulari: Petrus enim, v.g. non existit necessario: Ergo species quæ repræsentat Petrum , ut est tale individuum naturæ humanæ , non repræsentat necessario ipsum ut existentem , & consequenter ut sic repræsentetur intellectui Angelico, necessario requiritur aliquid , quo moveatur ille intellectus ad cognoscendum Petrum nunc existentem, quem antea solum ut futurum noverat : Sed hoc determinativum, aliud esse non potest , quàm species de novo acquisita , vel ipsamet res individualis, quæ per sui speciem moveat intellectum Anglicum ad cognitionem suæ realis existentiae : Ergo , &c.

Reponunt Thomistæ cum S. Bonaventura in 2. parte 2. primæ quæstionis , quod dum res est præsens , & existens , potest Angelus dirigere aspectum suum ad eam , & sic mediante speciebus infusus cognoscere ipsam realiter existentem, quàm solum, ut futuram prius noverat .

Contra: Eatenus potest dirigere aspectum in rem præsentem quatenus habet species, quæ ipsam repræsentant, ut realiter existentem ; Sed species ipsis concreatæ non possunt repræsentare rem illam existentem , siquidem ab initio mundi species Petri, v.g. non producti repræsentabat eum tantum ut futurum: Ergo ut Angelus qui per sibi concreatam speciem Petrum tantum , ut futurum prius videbat , necessario opus habet aliquo determinativo , & motivo quo possit eum ut præsentem intueri : Alias ejusmodi rationes profert Doctor quas brevitas causa referre superse- deo .

Dices 1. Corpora cælestia habuerunt sibi concreatas qualitates omnes , & perfectiones , quas habere possunt: Er-

go pariter Angeli à suæ formationis initio habuerunt omnem sibi debitam perfectionem, & cognitionem, adeoque nihil de novo nosse possunt .

Respondet Doctor primò retorquen- do argumentum hoc modo : Corpora cælestia non debuerunt habere sibi concreatas, nec à solo Deo inditas perfectiones quas vel ipsa , vel aliæ causæ secundæ in illis producere poterant ; Ergo pariter Angeli non debuerunt habere species , aut cognitiones à Deo infusas, quas ipsi comparare , & de novo acquirere poterant . *Deinde* si paritas statuenda sit inter corpora cælestia , & Spiritus quantum ad propositum , inferendum est quod quemadmodum , nullum est ex corporibus cælestibus , quod perfectiones sibi naturaliter debitas concreatas non habuerit, ita à simili nullus spiritus esse deberet, qui sibi debitam naturalem perfectionem ab initio suæ formationis inditam non vendicaret ; subindeque anima nostra cum sit revera Spiritus , omnimodam perfectionem sibi compossibilem ab initio habere debuisset. *Denique* idcirco corpora cælestia habent suas perfectiones sibi concreatas , quia nempe perfectiones illæ ab earum substantia velut proprietates emanant ; At Angeli non habent similem virtutem productivam , & emanativam specierum , & cognitionum : Ergo non est ibi paritas .

Respondet 2. Doctor : Distinguo consequens , Angeli debent habere omnes perfectiones sibi concreatas , quas non possunt facile , & promptè acquirere , concedit : Quas sibi possunt comparare absque negotio , negat .

Dices 2. Non potest Creatura intellectualis desumere species ab objecto materiali, nisi sensus habeat , & phantasiam ; Sed Angelus caret illis potentiis ; Ergo ab objectis materialibus species non potest desumere . Major probatur ; Non potest virtus creata naturaliter transire de extremo ad extre-

num, nisi per medium, quod à natura inter utrumque constitutum est: Atqui si creatura intellectualis carens sensibus & phantasia defumeret speciem, & cognitionem ab objecto materiali, tale objectum transiret ab uno extremo in aliud, non transeundo per medium inter illa à natura constitutum. Probat, esse imaginabile, sive phantasticum est medium à natura constitutum inter esse omnino sensibile, quod à sensibus corporeis percipitur, & esse intelligibile quod ab intellectu potest attingi: Atqui si creatura intellectualis carens sensibus, & phantasia reciperet species ab objecto sensibili, jam ejusmodi objectum transiret ab esse materiali, & sensibili quod habet in se, ad esse intelligibile, quod habet in intellectu Angelico non transeundo per esse medium, & phantasticum: Ergo fieret transitus de extremo ad extremum, absque transitu per medium à natura constitutum.

Negat majorem Doctor, & minorem illius probationis distinguit: Esse imaginabile est medium inter sensibile, & intelligibile quantum ad intellectum humanum transeat; quantum ad Angelicum negat. Potest enim, inquit, contingere ut aliquid sit medium respectu unius virtutis, non verò respectu alterius, v.g. posset esse aliquod calefactivum minoris virtutis, quod inducere non valeret octo gradus caloris in subiectum simul, & semel, & nisi prius sensibilibiter calefaciat ut unum, postea ut duo, sicque gradus illi intermedii usque ad octavum erunt veluti media respectu illius octavi producendi: Verum posset dari aliud calefactivum tantæ virtutis, ut statim, ac applicaretur subiecto produceret octo illos gradus caloris, non efficiendo prius ipsum sensibilibiter calidum, ut duo vel ut tria, sicque respectu illius duo vel tres gradus caloris non censentur esse medii: Ergo à pari, esse imaginabile, & phantasticum, potest esse medium respectu intel-

lectus humani, non verò Angelici.

Quod utique confirmat Doctor: Si enim imaginabile esset medium absolute transeundum ab esse sensibili ad esse intelligibile, vel esset tale medium ex natura ipsius objecti, vel ex natura potentie cognoscentis. Primum dici nequit, alias nullus intellectus etiam divinus posset cognoscere esse sensibile, nisi prius haberet esse imaginativum. Si secundum dixeris, exinde etiam sequitur, quod Angelus nullo modo poterit intelligere res materiales, quippe cum esse imaginabile, & phantasticum non possit exire. Adde quod etsi illud imaginabile sit medium necessarium respectu potentie inferioris debilioris, quæ sensibus alligatur, non inde sequitur quod etiam debeat esse medium respectu potentie superioris, & vegetioris à corporea concretionem prorsus im-

Reponunt Thomistæ: Posse quidem percipi objectum sensibile absque eo, quod habeatur esse imaginativum, & phantasticum, non posse verò immittre sui speciem in intellectum, nisi transeundo per imaginationem; Ex quo sequitur, inquit, quod sicut potest intellectus divinus, & Angelicus ipsum objectum sensibile cognoscere absque eo quod immitat ejusmodi species, ita potest perfectam de illo habere notitiam, absque eo quod prius tale objectum habeat esse in aliqua imaginatione, vel phantasia.

Contra; Objectum sensibile idcirco non posset immittre sui speciem immediate in intellectum à corpore separatum, quia nempe purè corporeum est; & materiale; nullum autem materiale recipi potest, nec attingi immediate à spiritali: At hæc ratio nulla est, siquidem illud esse phantasticum, & imaginabile reverà corporeum est; Est enim objectum phantasie, & sensus communis reverà corporei, attamen percipitur immediate ab intellectu humano, siquidem

dem ad ejus intuitum intellectus agens eundem species intelligibiles ; Quidni ergo pariter intellectus Angelicus attingere posset objecta corporea , & ad eorum intuitum species intelligibiles eundem . Idcirco autem intellectus humanus non potest immediatè versari circa objecta externa , quia cum sit alligatus sensibus , nec possit nisi ab eis dependenter operari , inde non mirum si esse sensibile prius debeat fieri imaginativum , & phantasticum , quàm fiat intelligibile ab intellectu humano .

CONCLUSIO QUARTA .

Angelus potest seipsum cognoscere , per suam essentiam , & nulla mediante specie intelligibili : Posset tamen seipsum per sui speciem , & abstractivè cognoscere . Ita Doctor dist. 3. quæst. 8. num. 8.

Probatur 1. Omne agens actione immanente habens causam totalem aliquis effectus productivam potest ipsum producere cæteris quibuscumque seclusis : Sed Angelus habet in se causam totalem suæ intellectionis , habendo solum suum intellectum , & suam essentiam , seclusis quoviscumque extrinsecis , & speciebus : Ergo potest seipsum per suam essentiam intelligere . Major constat . Probatur minor : Qui habet intellectum nativæ suæ activitate præditum , & objectum intelligibile ipsi intellectui in ratione objecti proportionatum , & unitum , reverà potest illud intelligere ; Sed ita est de Angelo respectu cognitionis sui ; ipsius namque intellectus non minoris est activitatis respectu cognitionis sui , quàm cæterorum ; ipsius pariter essentia est actu intelligibilis , & intellectui proportionata , quippe sunt ejusdem ordinis in gradu spiritualitatis , est etiam ipsi intimè unita , & approximata , nec ulla potest esse major unio cujusvis speciei cum ipso intellectu , quàm sit unio ejusdem essentiae cum illo , sunt enim idem realiter ; species autem , & intelle-

ctus realiter invicem distinguuntur : Ergo , &c.

Deinde : Species impressa , in qua objectum tantum continetur secundum suum esse diminutum , seu intentionale , sufficit cum intellectu ad producendam cognitionem objecti ; Ergo multo magis ipsum objectum debitè applicatum , & proportionatum sufficiet ad eandem formandam cognitionem : Sed essentia Angeli , ut diximus , est debitè proportionata intellectui ejusdem : est enim in eodem ordine immaterialitatis cum eo , & consequenter sufficiet ad formandam cognitionem ipsius Angeli .

Denique : Si aliqua ratione essentia Angeli non posset esse ratio cognoscendi seipsam , maximè quia est forma per se existens , & non inhærens intellectui : Sed hujusmodi per se existentia , vel non inhærentia non obstat : Ergo potest esse ratio cognoscendi se in proprio intellectu . Major est nota : Minor probatur . Imprimis illa per se existentia non obstat , quia essentia divina est magis per se existens , & tamen est ratio intelligendi in intellectu divino , & creato beato .

Insuper , Ut aliqua forma , vel quid se habens admodum formæ sit principium operationis physiciæ , non est necesse , quòd inhæreat : Calor enim , qui esset in subjecto solum per assistentiam , tam expedite posset illud calefacere , ac si ipsi inhæreret : Ergo à simili , ut aliquid sit principium operationis in genere intelligibilium , non opus est , quòd intellectui inhæreat , sed sufficit , quòd ipsi objiciatur , & proportionetur intimèque uniatur . Tandem omnes fatentur Angelum posse res sibi intimè præsentis , & proportionatas cognoscere absque ulla specie ; Sed illæ res sic cognite non possunt inhærere intellectui Angeli eas cognoscentis : Ergo , ut aliquid sit ratio cognoscendi , non opus est , quòd intellectui inhæreat .

Dices 1. Id quòd est ratio cognoscendi

di debet subordinari intellectui: Sed essentia Angeli per se subordinari nequit ejus intellectui: Ergo, nec per se ab eo cognosci. Minor constat, quia subordinatio dicit dependentiam: Essentia autem Angeli ab ejus intellectu pendere nequit: Imò hic ab illa pendet tamquam proprietas, & facultas emanans ab illa essentia, quæ est fons, & radix omnium suarum proprietatum, & facultatum. Minor probatur. Principium quo subordinatur principio quod: sed ratio cognoscendi est principium quo, intellectus verò principium quod: Ergo illa huic debet subordinari.

Distinguo minorem: Quando ratio cognoscendi est quid accidentale receptum in intellectu, & ab eo realiter distinctum, concedo: Quando est aliquid substantiale, & indistinctum realiter ab intellectu, nego: Divina essentia enim divino intellectui non subordinatur, licet sit ratio cognoscendi seipsam, & alia omnia: Ergo à simili, essentia Angeli non debet intellectui sui-ipsius subordinari, quia ab eo est realiter indistincta, & ejus fons, & origo.

Dices 2. Si Angelus se-ipsam agnosceret per suam essentiam, sequeretur, quòd semper esset in actu cognitionis sui-ipsius, Itaut non posset ab ea cessare: At consequens videtur absurdum, & contra modum agendi liberrimum Angelorum: Ergo, &c.

Nego sequelam majoris: Quamquam enim Angelus suam substantiam semper debite applicatam sub ratione objecti præsentem habeat; potest tamen eam, si velit, non intueri: poterit siquidem ad voluntatis imperium à suæ substantiæ intuitu revocari Angelus, ut alia objecta proposita sese applicet, quemadmodum intellectus noster ab uno objecto præsentem avocatur ad alterius intuitum: Poterit etiam cessare ab ea cognitione per non applicatio-

nem, sicut, v.g. contingit, quòd interdum oculos habeamus apertos, & objectum debite præsens, & illuminatum, nec tamen illud videamus, eò quod potentia, & facultates, tum sensitivæ, tum rationales aliunde occupentur, & detineantur.

PROBATUR SECUNDA PARS: Superior Angelus cognoscere potest inferiorem per ipsius speciem: Ergo pari modo inferior ille Angelus poterit se-ipsam cognoscere. Antecedens patet: Norunt enim se invicem Angeli per species sibi divinitus inditas, ut fatentur omnes: Quamquam etiam seipsos nosse possint immediate per sui præsentiam. Probatur consequentia: Dum intellectus perfectior potest imperfectam habere cognitionem de objecto aliquo, intellectus minus perfectus parem habere poterit: Ergo si superior Angelus possit habere cognitionem abstractivam (quæ est imperfectior intuitiva) de inferiori Angelo, quidni parem de seipso poterit habere Angelus inferior. *Deinde* Angelus quilibet cognoscibilis est, & intelligibilis per speciem ab intellectu capace receptionis illius speciei: Sed ipsius intellectus reverà capax est receptionis illius speciei emittendæ à sua substantia; imò ad eam recipiendam cæteris videtur aptior: Siquidem ipsi substantiæ emissivæ speciei est intimior, ipsamque, & omnia, quæ ab ea profluunt melius, quàm quilibet alter penetrat, & concipit: Ergo potest illam speciem à se emissam excipere, subindeque seipsum abstractivè cognoscere.

Dices 3. Essentia Angeli necessario jungitur cum ipsius existentia: Ergo non potest cognosci secundum essentiam, quin cognoscatur ut existens: Sed non potest cognosci per speciem, ut existens, nisi intuitivè: Ergo nullatenus Angelus cognoscere potest se-ipsam abstractivè.

Nego sequelam majoris: Sicut enim dari posset species propria hominis, quæ

quæ repræsentaret ipsum, ut est animal, absque eo, quod ipsum repræsentet quatenus rationalis; quamquam animal, & rationale sint duo gradus intimè uniti in homine: ita dari posset species repræsentativa substantiæ Angelici, absque eo, quod repræsentet gradum existentiz, maxime si Deus suum suspendere velit concursum, ne dum essentia suam speciem emittit, existentia pariter in ejusmodi emissionem influat.

Instabis: Eò ipso quò Angelus cognoscit seipsum, ut est res talis singularis, debet cognoscere se-ipsam, ut ipse est. Ergo si est in se existens, debet cognoscere se-ipsam, ut existentem, & consequenter intuitivè. Probatum consequentia, quia in re actu existente, non distinguitur existentia ab essentia singulari.

Distinguo antecedens: Ut in se est quoad naturam singularem, concedo; Ut in se est quoad reliqua omnia, quæ competunt ipsi, & non necessariò involvuntur in conceptu naturæ singularis talis. Nego antecedens, & consequentiam, cum suam probatione. Et sanè mirum est, quod nonnulli existiment conceptum existentiz non esse, distinctum in re existente à conceptu naturæ singularis, cum certum sit nos de facto habere cognitionem de aliquo homine singulari, qui existit; etiam si non cognoscamus an existat, nec-ne: Adde quod unus Angelus sine dubio posset habere conceptum de alio Angelo singulari existente saltem in absentia magna, quin cognoscat ipsum, ut existentem formaliter.

Dices 3. Angelus per eandem speciem invariata in actu primo, cognoscit rem singularem existere quando existit, & non existere, quando non existit: Ergo quoties cognoscit quidditativè alium Angelum, aut seipsum, necessariò cognoscit intuitivè. Probatum antecedens; Nam eo ipso, quo con-

templatur rem singularem, & non videt ipsam existentem, cognoscit, quod non existit: Ergo per eandem speciem invariata cognoscit utrumque.

Respondet Poncius in Commentario ad 2. Scoti dist. 3. quæst. 8. Primò quidem negando consequentiam: Quamvis enim posset per eandem speciem aliquam cognoscere rem singularem, existentem, & non existentem; non tamen hoc deberet verum esse de omni specie, sed de specie sufficienti ad cognitionem intuitivam; ut valeret autem consequentia, deberet esse verum de omni specie.

Respondet Secundò negando antecedens: Nam illa species, quæ nata est repræsentare rem ut singularem, & existentem, semper determinabit, nec potest aliter rem illam repræsentare: quod si habens talem speciem contempletur illam rem quando non existit, & non videat ipsam existentem; non videbit ipsam sic mediante illa specie; sed mediante alia, & non poterit cognoscere, quod non existat cum certitudine, quia sic potest discurre: Hæc res posset esse reverà existens, quamvis non cognoscatur à me esse existens. Imò quamvis eadem species, quæ repræsentaret rem existentem, etiam repræsentare posset, quando non existeret, attamen etsi Angelus non videret eam existere, inferre non posset, quod ipsa res non existeret; dubitare namque posset videndo ipsam non existere; quod fortè vel à Deo alibi esset translata, vel quod sibi denegaretur divinus concursus ad illius rei existentiam deprehendendam.

COROLLARIA.

EX his collige 1. Animam rationalem à corpore solutam, posse seipsam per suam etiam substantiam intelligere; quippe tunc cognosceret modo Angelico, nec indigebit speciebus acceptis à rebus sensibilibus, aut conversione ad phantasmata: Setus autem est

est dum corpori alligatur; cum enim sit ipsius forma, nec possit quidpiam cognoscere, nisi sensuum beneficio, inde fit, quod indigeat specie quadam accidentali, quâ ad sui-ipsius cognitionem moveatur per discursum assequendam, removendo nempe à sua substantia omnes rerum corporearum defectus, & se immortalem, ac immaterialem cognoscendam.

Collige 2. Quod quamquam Angelus seipsum per propriam suam substantiam agnoscat, quæ omnino similis est substantiæ alterius Angeli; nequit tamen alterum Angelum per intuitum, suæ propriæ substantiæ, tamquam per speciem abstractivè cognoscere. Species enim est formalis, & perfectâ similitudo objecti: Substantia autem unius Angeli non perfectè assimilatur substantiæ alterius secundum omnes omnino gradus. Quamquam enim essent ejusdem speciei, & solo numero discrepant; quilibet eorum habet characteres proprios, & gradus individuales, quos alter non obtinet, adeoque unus alterum perfectè referre non potest. Adde quod ut unum objectum sit ratio cognoscendi alterius, debet illud continere, vel formaliter, vel eminenter: at neutro modo substantia Angeli alterum continet: Non quidem formaliter, quippe cum habeant formas distinctas, & varios characteres personales; Nec etiam eminenter, hæc enim eminentialis contentia rerum secundum earum entitatem, & perfectionem soli Deo congruit, ratione scilicet infinitæ suæ entitatis, & principii omnium entium.

Collige 3. Quod cum species rerum, universalium, & præstantiorum individuorum Angelis à Deo concessæ fuerint: Consequens est illas ab ipsorum substantia non emanare; Species enim cum sint semen objecti; vel ab ipso objecto, vel eo deficiente, à rerum omnium Opifice produci debent. Deinde

qua ratione ab essentia Angeli emanarent aliquarum rerum species, emanarent quoque species cæterarum, etiam possibilem, adeoque infinitarum. *Denique* par ratione dici posset, quod ab essentia Angeli emanarent ipsæmet rerum cognitiones.

Collige denique. Quod etsi species illæ divinitus fuerint inditæ, non propterea tamen censeri debent supernaturales quantum ad substantiam; sed tantum quoad modum acquisitionis; non secus, ac fuit scientia primis parentibus, & Salomoni à Deo concessa; Illæ namque species fuerunt omnino similes eis, quas ipsi Angeli comparare potuissent ad præsentiam objectorum, si aliunde sibi inditas non habuissent; Nec fuerunt ultra sortem, & exigentiam naturalem ipsius Angeli, quippe cum eorum nativa virtus cognoscendi id ex se naturaliter exigit, quod conducere potest ad suam naturalem perfectionem: Species autem illæ ita conferunt, adeoque non debent censeri præternaturales.

QUAESTIO TERTIA.

Quodnam sit objectum cognitionis Angelicae?

SUPPONO 1. Tamquam certum Angelum plura cognoscere naturaliter, puta seipsum, alios Angelos, & objecta quæque corporea sive per se, sive per sui species Angelicum intellectum ad sui cognitionem moventia, imò & Deum ipsum, cognitione nedum abstractiva, quæ fit per discursum, quaque nedum Dei existentia, sed etiam ejus divinæ præcellentiæ ex rebus creatis colliguntur ab omnibus, subindeque longè perfectiori modo colligi possunt ab Angelis: sed etiam ea cognitione abstractiva, quæ fieret per speciem divinæ essentiæ repræsentativam: Nam, inquit Doctor in 2. dist. 3. quæst. 9. n. 7.

,, talem speciem representantem ef-
 ,, sentiam divinam intellectui Angeli-
 ,, co , non videtur inconveniens po-
 ,, nere intellectui Angeli inditam esse
 ,, à principio : Ita quòd licet ipsa non
 ,, sit naturalis intellectui hoc modo :
 ,, quòd iste intellectus possit ex natu-
 ,, ralibus suis eam acquirere : Neque
 ,, etiam , quòd possit eam habere ex
 ,, actione alicujus objecti agentis na-
 ,, turaliter , quia non potest eam habere
 ,, præsentialitate alicujus objecti fi-
 ,, niti moventis , nisi essentia! divinam
 ,, tantum , quæ nihil aliud à se causat
 ,, naturali causatione : Tamen sicut
 ,, perfectiones datæ Angelo in sua
 ,, prima creatione , licet non necessa-
 ,, riò sequantur naturam ejus , dice-
 ,, rentur naturales , distinguendo con-
 ,, tra merè supernaturales , scilicet grati-
 ,, æ , & gloriæ : Ita ista perfectio data
 ,, intellectui Angelico , qua essentia-
 ,, divina esset ei præsens distinctè , li-
 ,, cèt abstractivè , potest dici naturalis ,
 ,, & ad cognitionem naturalem Ange-
 ,, li pertinere : Ita quòd quicquid co-
 ,, gnoscit Angelus de Deo , virtute hu-
 ,, jus speciei , aliquo modo cognoscit
 ,, naturaliter , & aliquo modo non
 ,, naturaliter ; naturaliter , in quantum
 ,, ista non est principium actus gra-
 ,, tuiti , nec gloriosi ; non naturaliter
 ,, autem quantum , quòd ad istam non
 ,, posset pertinere ex naturalibus , ne-
 ,, que aliqua actione naturali . Hoc
 ,, est , illa species distinctè representativa
 ,, divinæ essentia , quam esse possibilem
 ,, demonstravimus agendo de visione
 ,, beatifica sectione 2. quæst. 2. esset natu-
 ,, ralis , quantum ad substantiam , quippe
 ,, non esset ejusdem ordinis cum qualita-
 ,, tibus , quæ sunt ordinis gratiæ , vel glo-
 ,, riæ ; Esset autem supernaturalis quan-
 ,, tum ad modum , quia nec ab intellectu
 ,, exigeretur naturaliter tamquam perfe-
 ,, ctio ipsius naturali complemento de-
 ,, bita , nec posset ab eo propriis viribus
 ,, obtineri .

Tom. IV.

Hanc autem speciem Angelo fuisse
 inditam à primordio suæ formationis ,
 sibi persuadet Doctor hinc rationibus ,
 1. Quia naturalis felicitas Angeli
 præstantior fuit , quàm extiterit nativa
 hominis felicitas : Sed verisimile est
 hominem ante peccatum habuisse natu-
 ralem Dei notitiam allqualiter distin-
 ctam : Ergo Angelus perfectiorem ,
 nempe quidditativam habere debuit .
 2. Talis species possibilis non excedit
 capacitatem naturalem receptivam ip-
 sius Angeli , summèque confert ad ejus
 perfectionem , quæ maximè ex verita-
 tis cognitione integratur , subindeque
 præstantior est , quæ colligitur ex veritate
 præstantissima , qualis est distinctio
 Dei cognitio . 3. S. August. lib. 4. de
 Gen. ad litteram cap. 21. tribuit Ange-
 lis omnibus ante lapsum cognitionem
 matutinam rerum creatarum in Verbo
 præter cognitionem vespertinam earum-
 dem rerum in seipsa : Illa autem
 cognitio rerum in verbo , vel fuit cum
 cognitione Dei intuitiva , vel cum ab-
 stractiva , & per speciem : Primum dici
 nequit , alioquin etiam dæmones intuiti-
 vam Dei cognitionem habuissent , sic-
 que fuissent reverà beati , maximè in-
 sententia Thomistarum , qui formalent
 beatitudinem in visione beatifica con-
 stituunt . Hoc autem nullus Theologo-
 rum admittit , adeoque necessum est
 fateri cognitionem illam rerum in Verbo
 extitisse simul cum cognitione ab-
 stractiva Dei per speciem . *Insuper* ex
 illo actu cognitionis potuit remanere
 notitia habitualis , & species ipsius me-
 moriam causans , qualem habuit S. Pau-
 lus dum recordabatur eorum , quæ ad
 tertium Cælum raptus audiverat , &
 viderat .

Hic itaque solùm inquirimus , an An-
 gelus naturæ viribus cognoscere possit
 Deum , ut Authorem naturæ , & gratiæ ,
 nec-non , & ea , quæ intra utrumque
 ordinem continentur , seu quæ super-
 naturalia sunt tam quoad substantiam ,

M

v. g. gra-

v. g. gratia, lumen gloriæ, &c. quàm quoad modum, v. g. resurrectio mortuorum, aquæ in vinum mutatio, &c.

Suppono 2. Futura contingentia esse triplicis generis: Quædam enim necessariò proveniunt ex causis naturalibus, nec ullo modo pendent à libero arbitrio, ut motus corporum cælestium, & cursus astrorum, imò etiam omnes eventus naturales, qui in his inferioribus sunt, sive à Cælorum influxu, sive ab aliis causis inferioribus naturalibus, ubi nullo modo liberum intercedit arbitrium. Alia sunt futura, quæ non necessariò, sed ut plurimùm ex suis causis sequuntur absque ullo etiam liberi arbitrii interventu, ut sanitas ex tali medicina. Alia denique futura sunt, quæ omnino contingenter, & à causis liberis sunt, aut eveniunt. *Certum* est autem Angelos naturaliter cognoscere necessaria, quæ continentur in causis naturaliter ad eorum productionem determinatis, atque de lege ordinaria à Deo rerum omnium Opifice non impediendis. Habent enim Angeli universalem, & mirabilem causarum naturalium scientiam, & consequenter effectuum ex illis naturaliter, & necessario provenientium. *Certum* pariter Angelos posse futura contingentia, & libera, id est à causis contingentibus, & liberis provenientia, percipere cognitione quadam conjecturali, & aliquibus indiciis; idque quatuor modis, ut ex S. Augustino lib. 5. de Gen. ad litteram de Dæmonibus docet Seraphicus Doctor in 2. part. art. 2. quæst. 3. videlicet: Vel ingenii acrimoniâ, aut multa experienciâ, aut dolosa cautelâ, aut aliena doctrinâ: Sensus acrimoniâ, ut quando vident diligenter, ac considerant ad quid inclinetur affectio nostra, vel quæ sint inducentia, vel retrahentia. Experienciâ temporum, quia ex talibus vident accidere talia. Dolosâ cautelâ quando proponit aliquid fa-

ctum, & prædicit, quoddam aliquid: sit facturus. Aliena doctrinâ, quando iusto Dei iudicio permittitur addiscere ab Angelis.

Suppono 3. Maximam apud Theologos versari difficultatem, an Angeli naturaliter cognoscere possint secreta cordium, seu affectus, & cogitationes, vel ab hominibus, vel ab aliis Angelis liberè elicitas. Quamquam enim consentiant omnes contra Durandum, illos internos, & liberos affectus, non solum futuros, sed etiam præsentis reverà Angelis de facto occultari, & soli Deo patere; quippe qui hanc notitiam sibi soli reservavit; tamen varias secundum in partes quantum ad virtutem, & activitatem naturalem intellectus Angelici; an videlicet ex se sufficienti virtute polleat, quâ posset hos liberos affectus, hæcque internas cogitationes deprehendere. Id communiter negant omnes Thomistæ. Affirmant verò Doctoris subtilis Discipuli cum ipso in 2. dist. 9. num. 27. & in Reportatis dist. 10. Observandum autem cum Seraph. Doctore in 2. dist. 2. part. 2. quæst. 6. ex S. Augustino lib. 12. de Genesi ad litteram cap. 17. Quoddam sicut substantiæ corporales habent aliqua velamenta, quibus se alienis aspectibus occultant, sic, & habent substantiæ spirituales suo modo. Quod quidem, obstraculum non debet intelligi per interpositionem alicujus naturæ opacæ, sicut est in visu nostro corporeo, vel obscure, vel minus clarè; sed abscondere in eis, idem est, quod nolle manifestare. Et licet non sint ibi diversitates plicarum ex compositione diversarum naturarum, sunt tamen in anima gradus potentialium, & statuum secundum quos quedam dicuntur esse animæ magis intima, utpote, quæ respiciunt potentias superiores, & simpliciores, sive puriores, secundum quas anima magis in se colligitur, & ei quod

sum-

„ summè unum est unitur, & simplifi-
 „ catur ; & penès has minimè residet
 „ conscientiae secretum . Inde supra
 „ intulit, quòd nulla creatura, nec hu-
 „ mana, nec Angelica potest conscien-
 „ tiae humanae nosse secreta, nisi per
 „ signa, & conjecturas, vel nisi illa
 „ noverit Dei revelatione, aut hominis
 „ denuntiatione . Et quoniam pauca
 „ sunt ita secreta, quin prodeant la-
 „ opera exteriora, vel appareant per
 „ signa exteriora faciei, vel per signa
 „ cordis, quod movetur diversimodè
 „ secundum diversitatem actionum :
 „ Hinc est, quòd multae cogitationes,
 „ & affectiones nostrae deprehendi
 „ possunt à malignis spiritibus, nisi ar-
 „ ceantur Dei virtute ; Hæc autem
 „ cognitio potius est conjecturae,
 „ quàm certæ scientiæ .

His itaque sic prælibatis : *Primò*, de-
 terminandum est, an Angeli virtute
 naturali cognoscere possint, quæ su-
 pernaturalia sunt quantum ad entita-
 tem, & quantum ad modum . *Secundò*,
 utrum futura contingentia à causis li-
 beris omnino pendentia, certò possint
 apprehendere . *Tertiò*, an cogitationes
 internas, & affectus liberos cum An-
 gelorum, tum hominum, non solùm
 ex conjectura, sed etiam ex certa scien-
 tia nosse queant .

CONCLUSIO PRIMA,

Angelus res in entitate supernaturali, quæ verè sunt intra ordinem gratiæ, & gloriæ cognoscere non potest viribus naturæ : Benè verò eas, quæ supernaturalia sunt tantum penès modum . Hæc est receptissima apud Theologos quantum ad utramque partem : quarum probatur prima ex illo primæ ad Corinth. 2. Quis hominum scit, quæ sunt hominis, nisi spiritus hominis, qui in ipso est ? ita, & quæ Dei sunt nemo cognovit nisi spiritus Dei ; Quasi diceret, quæ ex sola Dei, & libera voluntate pendent, nullus nisi illo tribuente cognoscit : Itaque subinde hæc Apostolus

addit, *Non autem non Spiritum hujus mundi accepimus ; sed Spiritum, qui ex Deo est, ut sciamus, quæ à Deo donata sunt nobis* . Ubi Spiritum mundi rectè Theodoretus interpretari videtur de creato Spiritu . Hoc enim Apostoli propositum est, nempe Christianæ fidei mysteria nullam creaturarum rerum intelligentiam etiam Angelorum potuisse consequi, sed solo Dei revelante Spiritu fuisse cognita . Deinde spiritum mundi Dei spiritui opponit ex adverso . Quam in rem faciunt Ambrosii verba in commentario ad eum locum, *Sensum Dei nemo novit, nisi qui de Deo est Spiritus Dei* . Inferiora enim non possunt superiorum scire consilium, neque creatura Conditoris sui dignoscere voluntatem .

Probari pariter potest ex illo ad Ephesios 3. ubi idem Apostolus ait, *Sibi datam hanc esse gratiam ; uti illuminaret (idest instrueret, & doceret) quæ sit dispensatio Sacramenti absconditi à sæculo in Deo, qui omnia creavit, ut innotescat Principatibus, & Potestatibus in celestibus per Ecclesiam multiformis Sapientia Dei* : Quæ enarrans S. Chrysostomus copiosè demonstrat, ab Apostolis arcana illa detegentibus Illustratos esse Principatus, & Potestates, hoc est supremos Angelorum ordines, & quæ hactenus ignorabant hoc ab illis didicisse . Id autem potissimum verum fuit de cognitione mysterii Incarnationis, ut disertè expendit Gregorius Nyssenus hom. 8. in Cant. Etenim, inquit, hactenus simplicem, & uniusmodi potestatem Dei, & efficientiam intelligebant Angeli, qui una, & simplici Dei voluntate, ac solo verbo omnem illam conditarum rerum varietatem extitisse viderant . Varium autem illud, & multiplex genus Sapientiæ, quod ex contrariis rebus invicem nexis, aptisque constat, per Ecclesiam manifestè cognoverant : Quæ admodum Verbum caro factum est, utpote quoddam vita cum morte miscetur : quomodo livore suo nostra vulnera persanat ;

quomodo crucis infirmitate vires hoſtis evertit: quemadmodum id quod aſpectabile non eſt, in carne manifeſtatur, ut qui captivos redimit, idem ille, qui emptor eſt, & pretium; tum quemadmodum mortem ſe obiit, ut à vita non recederet.

Favet etiam Anſelmus in Cōmentariis ad Epistolam Pauli, ubi ait, *Per Eccleſiam profeciſſe in cognitione huius ſapientie etiam Angelicos Spiritus aſſertur*; quia dum eam Chriſtus vel per ſe, vel per Apoſtolos inſtitueret, plurima ſecreta didicerunt Angeli, quæ ignorabant.

Mirandum quid magis loquitur Ambroſius lib. 4. de init. cap. 7. dum ait, *Dubitaverunt etiam Angeli cum reſurgeret Chriſtus, dubitaverunt Poſteſtates cælorum videntes, quòd caro in Cælum aſcenderet*; denique dicebant, *Quis eſt iſte Rex gloriæ?* & cum alii dicerent *Tollite portas &c.* alii dubitabant dicentes, *Quis eſt ille Rex gloriæ &c.*

Verum minimè induci poſſum, ut credam Angelis tunc temporis incognitum fuiſſe Incarnationis myſterium; nam ipſemet S. Paulus ad Hebr. 1. ſcribit, *Et cum iterum introduciſſet primogenitum in orbem terræ dicit, & adorent omnes Angeli Dei*; Eo itaque momento quo in terram, id eſt, in carnis confortium inductus eſt Filius: hunc Pater Angelis ſuis propoſuit adorandum. Deinde non ſolum Gabriel naſciturum illum Dei, ac Virginis Filium nuntiat, ſed etiam cæteri natum eundem poſtea frequentia, & feſtis acclamationibus celebrarunt apud Lucam, ac Paſtoribus ortum illius indicarunt: *Quia natus eſt vobis hodie Salvator, qui eſt Chriſtus Dominus, in Civitate David.* Denique multò antequam carnem aſſumeret, Angelis cognitum eſſe perſuadet iſta ratio, quòd cum Prophetæ Deum, hominemque venturum eſſe prædixerint velut Iſaias, non ſic credibile hoc Angelos latuiſſe, qui cœleſtium vaticinationum Adminiſtri ſerè atque Interpretes erant.

Quæ quamquam de ſanctiſſimis Spiritibus vera ſint, veriſimilius tamen apparet hoc myſterium Incarnationis Dæmonem latuiſſe: Id namque apertè declarat S. Auguſt. de Civit. Dei cap. 21. ubi de Angelorum, ac Dæmonum ſcientia, ejuſque diſcrimine loquens: *Tantum, inquit, eis innotuit, quantum voluit: Tantum autem voluit, quantum oportuit: ſed ſic innotuit, non ſicut Angelis ſanctis, qui ejus ſecundum id quoddam Verbum eſt, participata æternitate perfruuntur; ſed ſicut eis terrendis innotefcendum fuit, nimirum per quædam temporalia ſue virtutis effecta, & occultiſſima ſigna præſentia, quæ Angelicis ſenſibus etiam malignorum Spirituum, potiùs, quàm infirmitati hominum poſſent eſſe conſpicua.* Denique quando ea paululum ſupprimenda judicavit, & aliquando altius latuit, dubitavit de illo Dæmonum Princeps, cumque tentavit, an Chriſtus eſſet, &c.

Huic veſitati ſuffragatur, quod ſcribit Apoſtolus 1. ad Cor. 2. cum de incarnata Sapientia ait, *Quam nemo Principum huius ſæculi cognovit.* Si enim cognoviſſent, numquam Dominum gloriæ crucifixiſſent: Principes enim ſæculi, Dæmones intelligunt plurimi Patres, maxime verò S. Leo, ſerm. de Paſſione, ubi de Chriſto Domino ita ſcribit, *Qui ut humanum genus vineulis mortiferæ prævaricationis abſolveret, & ſcientiæ Diabolo potentiam ſuæ majeſtatis occultavit, & humilitatem noſtræ infirmitatis objecit.* Si enim crudelis, & ſuperbus inimicus conſilium miſericordiæ Dei noſſe potuiſſet: *Judeorum animos manſuetudine potiùs temperare, quàm injuſtis odiis ſtatuiſſet accendere: ne omnium captivorum amiſſet ſervitutem, cum nihil ſibi debentis perſequitur libertatem.*

Hoc ipſum probat ratio Theologica, 1. Quidem Angelus id ſolum noſſe poteſt, quod ſuæ virtuti naturali proportionatum eſt; At myſteria gratiæ non ſunt.

sunt proportionata activitati naturali intellectus Angelici, quippe cum sint altioris, & superioris ordinis, nec aliunde dicantur supernaturalia, quam quia omnimodè excedunt vires agentis naturalis. *Deinde* cum mysteria omnia ex mera Dei voluntate pendeant, cognosci nequeunt per eorum species nativas, nec per aliquid, quod habeat cum eis connexionem: Species enim illas, vel à rebus ipsis exciperet intellectus Angelicus, vel à Deo sibi divinitus infundente: Non primum, cum enim res illæ sint inferioris ordinis, ad quem se se applicare non potest nativa Angelorum virtus; multò minùs poterit ab eis species mutuari. Si secundum: Ergo illas species non possunt naturaliter sibi vindicare, adeoque nec illa mysteria naturæ viribus cognoscere.

Dices 1. Dæmones reverà cognoverunt Incarnationem Verbi, non per revelationem, nec per speciem sibi divinitus inditam: Ergo, &c.

Respondent sacri Interpretes illos adulatoriè loquutos fuisse, ut veritatem elicerent, an esse Dei Filium, & Messias in mundum missus, nec-ne; non tamen inde sequi illos viribus naturalibus cognovisse Incarnationis mysterium.

Dices 2. Ens creatum non excedit activitatem intellectus Angelici; atqui entia illa supernaturalia sunt creata: Ergo, &c.

Distinguo majorem: Non excedit activitatem intellectus Angelici sub quacumque ratione consideratum, nego; sub aliqua, concedo. Est enim terminus, & objectum facultatis intellectivæ, quatenus ens est limitatum, & finitum, & sub hac ratione proportionatum cuicumque intellectui creato, & limitato, non verò quantum ad gradum supernaturalitatis, penes quem excedit virtutem, & activitatem ejusdem facultatis, ac proinde non mirum si non possit ab ea attingi.

Patet etiam secunda pars: Nempe

quòd supernaturalia quantum ad modum non excedant vim naturalem intellectus Angelici. *Quæ* reverà sunt intra ordinem rerum naturalium, possunt ab intellectu Angelico faciliè percipi: sed quæ tantum supernaturalia sunt penes modum, secundum suam entitatem reverà sunt intra ordinem naturalem rerum ut constat: Ergo &c. Nec refert quòd habeant gradum, & modum supernaturalitatis: Cum enim Angelus perspectum habeat omnipotentiam divinam, noveritque Deum plura posse, quæ causarum naturalium activitatem omnimodè superant, nullò modò entitatem naturalem effectus producti cognoscendo, etiam modum supernaturalem illius productionis saltem arguitivè cognoscere poterit. Videndo namque hominem, qui priùs cæcus extiterat, nunc donari visu; non solum hunc visum restitutum intelligere poterit, quippe cum visus ille secundum suam entitatem sit purè naturalis; verum, etiam poterit judicare eum divinitus esse restitutum; siquidem perspicaciùs novit Angelus, quam Philosophi, à privatione ad habitum non dari regressum naturæ viribus, adeoque necessum fuit, ut homo ille oculis orbatus eos donante virtute supernaturali receperit. Hac ratione poterit Angelus nosse naturaliter Christi Domini humanitatem carere proprià subsistentià, & accidentia Eucharistica privari inhæsione, & Christum esse sub speciebus modo indivisibili. Hæc enim quantum ad entitatem naturalia sunt, licèt fiant modò supernaturali.

Dices: Si possit Angelus detegere Christi Domini humanitatem propria subsistentia spoliari; poterit etiam cognoscere eam subsistere divinà, quod est præternaturale quantum ad substantiam; sed hoc est contra primam partem: Ergo oportet alterutra sit falsa.

Nego sequelam majoris: Cum enim Deus conservare possit substantiam omni

ni subsistentiâ, ut volunt Aliqui, spoliâtam, cùmque saltem suspendere possit suum concursum, ne Angelus videndo humanitatem videat etiam ejus subsistentiam ab ea realiter distinctam, si contingat Angelum videre Christi Domini humanitatem propria spoliâtam subsistentia, exinde colligere non potest eam subsistere divinâ, quippe dubitare poterit num sibi Deus suum denegat concursum, ne videndo humanitatem videat pariter subsistentiam.

CONCLUSIO SECUNDA.

Angeli de factis non cognoscunt secreta cordium: Possent tamen ea percipere nisi Deus prohiberet.

Probatur prima pars illis omnibus Scripturæ textibus, quibus secretorum cordis notitia soli Deo reservari significatur, sic 3. Regum 8. *Tu solus nosti cor omnium filiorum hominum*: Et 2. Paralip. 6. *Redde unicuique secundum vias suas, quas nosti cum habere in corde suo; tu enim solus nosti corda filiorum hominum*, ait Salomon Deo: Et Jerem. 17. *Præterit cor hominis, & inscrutabile; quis cognoscet illud? Ego Dominus scrutans cor, & probans renes*. Quæ interrogatio ejusque responsio videtur cuilibet alteri, præterquam soli Deo, negare noticiam cordis humani, & ejus agnoscendi difficultatem, non in Dei placitum, sed in ipsammet Dei naturam refundere.

Hanc ipsam veritatem præter Scripturarum testimonia etiam SS. Patres nos docent, imprimis Origenes Homilia 7. in Genesim, ubi negat Angelos propositum mentis nostræ cognoscere; *Verbi causa*, inquit, *propositum habeo martyrii, non ex hoc dicere ad me Angelus poterit, quia nunc cognovi, quod tu times Deum*. Deo enim soli cognitum est propositum mentis: Si verò accessero ad agone, protulero bonam confessionem, quæ inferuntur constanter cuncta suscepero, tunc potest dicere Angelus velut confirmans me, & corroborans;

NUNC COGNOVI, QUOD TU TIMES DEUM.

Subscribit Hilarius in Psalmum 139. *Cogitationes cordis*, inquit, *nosse non nostrum est, sed ei de quo dictum est, SCRUTANS CORDA, ET RENES DEUS: ejus quoque qui dixit, SCIENS COGITATIONES EORUM, QUID COGITATIS MALA IN CORDIBUS VESTRIS? Ille oculator omnes malignorum cordium sensus penetrabili, atque pervio aditu absente natura virtutis suæ contectur*.

Hoc ipsum suadent alii S. Patres, dum probant Christum fuisse verum Deum ex eo quod internas mentis cogitationes cognoverit: Si autem cognoscere secreta cordium non esset actio Deo propria, & alteri quàm Deo conveniret, non bene ex ea inferretur Christum esse Deum: Ergo cognoscere secreta cordium est actio Deo propria, quæ nulli creaturæ humanæ, vel Angelicæ competit. Probatur major ex Joann. 2. ubi dicitur, quod Christus non credebatur semetipsum aliquibus, qui in ipsum se credere profitebantur, quia eorum corda à se aliena esse cognoscebat. Ex quo infert Evangelista indicans Christi divinitatem; *Opus ei non erat, ut quis testimonium perhiberet de homine, ipse enim sciebat, quid esset in homine*: Ad quæ Cyrillus 2. in Joann. *Hæc quoque dignitas*, inquit, *ut, & cæteræ quæ sunt in Christo, Deo competit; nec inest ulli rei creatæ. Soli enim vero Deo ipsam tribuit Psalmista dicens: Qui finxit sigillatim corda eorum, qui intelligit omnia opera eorum*. Hinc Ambrosius in caput 5. Lucæ; *Dominus*, inquit, *salvos volens facere peccatores, & oculorum cognitione Deum se esse demonstrat. Quibus subscribit S. Chrysologus serm. 5. ubi Phariseum alloquens cujus cogitationem Christus detexerat Lucæ 7. Cape*, inquit, *ejus Divinitatis insignia, audi cum pectoris tui penetrasse secretum: aspice eum ad cogitationum tuarum latebras pervenisse. Intellige eum cordis tui tacita nudare consilia*. Et serm. 94. *Dum Pharisei cordis patefecit arcum, seip-*

seipsum fuisse totius Prophetiae demonstrat Authorem.

Quibus omnibus constat reverà Angelis negare secretorum cordis cognitionem, quippe soli Deo propriam.

Dices 1. Nonnulli etiam SS. Patres affirmant Angelos suos invicem affectus naturaliter nosse, nec-non, & hominum cogitationes. Sic Philippus Presbyter in commentariis ad librum Job, existimasse videtur Angelos intimas suas cogitationes, & affectus invicem cognoscere. Non enim, inquit, quidquam affectuum suorum ab invicem latere Spiritus possunt, Simples enim creaturae nullum habentes quasi obstaculum corpulentiae, perspicuae sibi sunt. Ita pariter sentire videtur S. Gregorius lib. 18. moralium cap. 27. In beatitudine resurgentium, inquit, perspicabilis alteri sicut ipse sibi; & cum unusquisque intellectus attenditur, simul conscientia penetratur. Unde concludit, Civitatem Beatorum allegoricè vocari vitrum mundum. Et immediatè post subjicit: Nunc autem corda nostra quandiu in hac vita sumus, quia ab altero in alterum videri non possunt, sed intra lutea vascula concluduntur. Subscribit etiam Beda libro 2. in Job. c. 7. ubi ait: Non enim quidquam affectuum suorum ad invicem latere Spiritus potest; Simples enim creaturae nullum habentes, quasi obstaculum corpulentum, perspicuae sibi sunt.

Resp. 1. SS. Patres intelligendos esse vel de cognitione conjecturali, quam habere possunt Angeli, maximè ex hominibus per quamdam corporis eorum concitationem, qualiter S. August. lib. de divinatione Dæmonum, aliquando dixerat, Angelus hominum dispositiones non solum voce prolatus, verum etiam cogitatione conceptas, cum signa quaedam exprimuntur in corpore, tota facilitate perdiscere. Quod deinde retractavit 2. Retract. cap. 30. Rem, inquit, dixi oculissimè audaciorè assero, quàm debui; nam pervenire ista ad notitiam

Dæmonum, per nonnulla etiam experimenta compertum est: Sed utrum signa quaedam dentur ex corpore cogitantium, illis sensibilia, nos autem latentia; an alia vi, & à spiritali ista cognoscant; aut difficillimè potest ab hominibus, aut omnino non potest inveniri.

Respondeo 2. SS. Patres laudatos solum velle, quòd Angeli non impediuntur propter membrorum corpulentiam, sicut homines, ne alter alterius mentem penetrent.

Obijcies 2. Experientià constat, quòd Angeli etiam mali plerumque cognoscant, & prodant cogitationes internas, & secreta cordium. Nam Magi, & Energumeni aperiunt interdum, quid homines inter se deliberaverint, aut cogitaverint; ut de Alberico quodam Mago testatur S. August. lib. 1. contra Academicos cap. 6. Alia etiam refert Delrio lib. 4. disquisitionum magicarum cap. 2. quæst. 2.

Respondeo: Dæmones hæc quidem cognoscere, & aperire ex conjectura propter concitationem quam vident in corpore; vel ex eo quòd illi interni affectus mentis, & cordis represententur in phantasmate, aut in appetitu sensitivo propter motus internos concitato; Nam ut 2. suppositione observatum est ex S. Bonaventura, possunt Dæmones quatuor modis res abditas, & occultas, de tegere, vel ut addit ibidem: Dico, quòd nulla creatura, nec humana, nec Angelica potest conscientiae humane nosse secreta, nisi per signa, vel conjecturas, vel nisi noverit Dei revelatione, aut hominis denuntiatione. Et quoniam pauca sunt ita secreta, quin prodeant in opera exteriora, vel appareant per signa exteriora faciei, vel per signa cordis, quòd moveret diversimodè secundum diversitatem affectionum: Hinc est quòd multæ cogitationes, & affectiones nostræ deprehendi possunt à malignis spiritibus, nisi arceantur

„ tur Dei virtute ; Hæc autem cogni-
 „ tio potius est conjecturæ, quàm cer-
 „ tæ scientiæ ;

PROBATUR SECUNDA PARS : Nempe quòd Angelus posset virtute naturali detegere secreta cordium , nisi Deus præpeditet , ut asserere videtur Doctor in 3. dist. 9. quæst. 9. numero 27. & in dist. 10. qu. 8. Omne objectum actu intelligibile , & proportionatum , at sufficienter præsens intellectui Angelico , potest ab eo naturaliter percipi : Sed secreta cordium , & affectus mentis sunt ejusmodi : Ergo , &c. Major est evidens : Minor probatur . Illud est actu intelligibile , & proportionatum intellectui Angelico , quod reverà est existens , omne enim ens reale est actu intelligibile , quodque continetur intra ordinem naturalem : sed illi mentis affectus , ac secreta cordium supponuntur actu existere : Sunt etiam intra ordinem naturalem , non enim sunt supernaturales actus , ut supponitur , adeoque proportionantur intellectui Angelico .

Reponunt Aliqui illos affectus mentis esse quidem naturaliter cognoscibiles ab intellectu Angelico , nisi per voluntatem alterius Angeli tales affectus habentis occultarentur : Cum autem uniuscujusque Angeli voluntas sit libera , & domina suarum actionum , eos potest prohibito occultare , vel manifestare : adeoque non posset alter Angelus detegere quacumque virtute naturali , nisi consentiat Alius .

Contra , inquit Doctor , non est potior ratio , cur Angelus posset per volitionem suam occultare mentis affectum , & cogitationem internam , quàm essentiam : sed efficere nequit ut alter Angelus suam essentiam non videat : Ergo nec impedit quominus videat suos affectus . Major est evidens : Illi namque affectus tam reales sunt , quàm essentia , subindeque sunt æquè intelligibiles . *Deinde* , Illa volitio per quam

diceretur occultare suos affectus , est etiam ens naturale , & actualiter intelligibile , adeoque vel pateret simul cum eo , quod occultare dicitur , vel deberet occultari per alteram volitionem , & illa rursus per aliam , & sic fieret processus in infinitum .

Reponunt 2. Thomistæ intellectum Angelicum posse quidem naturaliter attingere omnem entitatem naturalem spectantem ad ordinem physicum , non verò eam , quæ spectat ad ordinem moralem . Actus autem liberi , inquit , pertinent ad ordinem moralem , non autem ad ordinem physicum ; adeoque non mirum si ab intellectu Angelico non possint naturaliter percipi . In tantum enim , inquit , Intellectus Angelicus potest aliquod objectum percipere , in quantum est pars Universi ; ea autem quæ ad lineam moralem , & liberam pertinent , non sunt partes Universi , sicque non sunt intra objectum proportionatum intellectus Angelici .

Contra 1. Omne ens reale , five sit Physicum , five Morale , est ex se actu intelligibile , eo modo quòd ens reale est , five sit ordinis Physici , five Moralis : sed illi affectus mentis sunt entia realia naturalia : Ergo naturaliter intelligibilia , subindeque naturaliter possunt cognosci : Ens enim naturaliter cognoscibile potest naturaliter cognosci . *Deinde* , Concedunt ipsi Thomistæ quòd Michael , v. g. possit naturaliter cognoscere suos proprios affectus , suasque internas cogitationes : Ergo pari jure eas poterit cognoscere Gabriel ; tam enim illæ cogitationes sunt naturaliter cognoscibiles respectu Gabrielis , quàm respectu ipsius Michaelis : adeoque qua ratione Michael illas concipit virtute naturali , licet sint intra lineam moralem , pari ratione eas percipere poterit Gabriel , *Denique* , unus Angelus potest percipere affectus alterius Angeli eos sibi revelantis ; nam , ut constabit infra , Angeli sibi invicem loquendo promere possunt inter-

internas cogitationes, & mentis affectus: Ergo ratio illa entis moralis, non impedit quomius illæ cogitationes, & mentis affectus possint naturaliter cognosci si fiant debite præfentes; sive interim manifestentur voluntarie, sive non. Reverà itaque unus Angelus cognoscere posset internos mentis affectus alterius, nisi Deus præpediret, . . . Quod autem Deus illam cognitionem prohibeat, colligitur tum ex Scriptura, tum ex SS. Patribus supra laudatis.

Dices 1. Præfatæ Scripturæ, ac SS. Patrum sententiæ simpliciter affirmant non posse internos mentis affectus ab alio, quàm à Deo cognosci: sed hic loquendi modus verus non esset si naturaliter cognosci possent, ut asserimus: Ergo hæc nostra sententia tam Scripturæ, quàm SS. Patribus videtur adversari. Probatur minor: *Primo*, Quia quod naturaliter fieri potest, dicitur absolute fieri posse; quamquam enim Deus præpedire possit ignem ne comburat, nihilominus reverà ignis dicitur posse comburere, quia vim comburendi naturalem habet: Ergo si dici potest simpliciter, quod illi interni affectus possint cognosci naturæ viribus, propositiones contradictoriæ fieri poterunt, nempe quod possint cognosci naturaliter, & non possint cognosci naturaliter. *Secundo*, Quia si naturaliter intellectus creatus videre posset alienæ mentis affectus, sequeretur illum semper esse in statu violento, ferique miracula perpetuâ; sicut miraculum esset si ignis debite applicatus non combureret, quod certe videtur minus congruum, maxime cum Deus non videatur privare concursu connaturaliter debito totum aliquod genus causæ (saltem à principio suæ formationis) ad aliquam actionem, ad quam habet naturalem inclinationem, & virtutem proportionatam: aliàs illa inclinatio, & virtus essent frustranæ. *Tertio* de-

Tom. IV.

nique, Quia ex locutionibus SS. Patrum, quibus Deus asseritur absolute invisibilis, non posset colligi quod non videri queat naturaliter. Simili namque ratione diceretur Deus invisibilis, non quia non possit naturaliter videri, sed quia Deus non decrevit concurrere ad sui visionem, nisi post hanc vitam: At consequens videtur absurdum: Ergo, & antecedens.

Nego minorem, & ad ejus primam probationem dico, Quod licet Angelus de facto non percipiat alienos mentis affectus, ad quos tamen cognoscendos naturalem habet cognitionem, & virtutem, exinde non sequitur dicendum illum posse naturaliter illos mentis affectus percipere, quod esset contradictorium. Etenim ut propositiones sint reverà contradictoriæ, debent fieri de eodem, eodemque modo spectato, quod non occurrit impræfentiarum. Dum enim concedimus Angelos habere vim ad percipiendos alienos mentis affectus, concedimus in eis facultatem, & potentiam solum in actu primo expeditam ad hanc operationem eliciendam: dum verò negamus eos mentis affectus de facto percipere, etiam negamus illam nativam cognoscendi facultatem esse ad hanc operationem expeditam in actu secundo propter negatum sibi divinum concursum: Adeoque nostra affirmatio, & negatio licet sit de eodem, non est tamen de eodem eodemmodo se habente. Affirmatio enim est de potentia Angeli in actu primo; negatio verò de eadem potentia in actu secundo considerata; & sic illæ propositiones non sunt reverà contradictoriæ.

Ad secundam probationem nego minorem: Res enim non censetur esse in statu violento nisi dum suspenditur, & præpeditur ejus naturalis virtus omnimodè, non verò tantum quantum ad aliquam operationem; plura namque possumus naturaliter exequi juxta nativam propensionem appetitus rationa-

N

lis,

lis, & sensitivi; quæ tamen Deo prohibente non facimus; nec propterea dicimur esse in statu violento: Nec congruè diceretur Deus nobis vim facere, dum ut supremum suum in nobis dominium demonstret, nostramque erga se reverentiam, & observantiam obtineat, plura fieri prohibet, ad quæ naturalis appetitus propensionem iniecit. Sic à simili quamquam Deus suum Angelo denegat concursum ad detegendos alienos mentis affectus, non idcirco dicendus est ei vim inferre, quippe cum liberum eum faciat ad cætera, quæque cognoscenda. Nec pariter inde sequitur frustraneam illam esse virtutem intellectivam naturalem; non enim necesse est, ut virtus aliqua ingenerata non dicatur frustranea, quod exeri possit circa quæcumque objecta, & in quibuscumque subjectis: Nam inclinatio, quam Deus Angelis, & hominibus initio indidit ad beatitudinem, non impletur in Dæmonibus, & damnatis, nec tamen dicitur inutiliter indita, sufficit enim, inquit Doctor, quod impleatur in aliquibus individuis naturæ Angelicæ, & humanæ, ut reverà sit in beatis Angelis, & sanctis mentibus.

Ad tertiam probationem, nego sequentiam; Ratio namque disparitatis est, quod Deus absolute, & simpliciter dicatur naturæ viribus invisibilis, quippe cum ejus intuitiva cognitio non sit intra lineam ordinis naturalis, sed supernaturalis, adeoque quando dicitur invisibilis, sufficienter intelligitur eum esse extra spheram activitatis mentis creatæ, nec ab ea posse attingi, nisi illustretur, & roboretur indito sibi divini auxilio: Secus autem est de affectibus mentis ab Angelo cognoscendis; cum enim sint intra lineam ordinis naturalis, nec excedant activitatem ingeneratam mentis creatæ, ex eo quod ab ea naturaliter possint percipi, nec tamen percipiantur, non sequitur eos esse naturaliter imperceptibiles, sicut sequi-

tur Deum esse invisibilem, non præcisè quia non videtur naturæ viribus, sed quia non potest videri, propterea quod non sit intra lineam, & ordinem naturalem, sed supernaturalem.

Dices 2. Quotiescumque nullum individuum alicujus speciei habet de facto aliquem effectum, quantumvis ita expeditè sese habeat ad illum sicut se habere potest ad alios effectus producendos, affirmari non debet ad eum effectum habere vim naturalem, nisi aliunde constet ratione, vel autoritate negationem productionis ejus effectus, non ex ejus activitate naturali, sed ex negato sibi divinitus concursu provenire; Sed nullus intellectus Angelicus quamvis suas vires exerat ad percipiendum alienum mentis affectum, ipsum usquam percipiet, absque voluntaria, alterius manifestatione, vel speciali Dei revelatione: Ergo si ratione, vel autoritate aliunde non constet hanc cognitionis negationem oriri solum ex negato divino concursu, fatendum erit illam provenire ex impotentia Angeli cognoscentis, qui ad eos mentis affectus percipiendo nativam activitatem non habet: sed hoc suaderi nequit, nec autoritate, nec ratione; Ergo, &c.

Concedo primum Argumentum, sed nego subsumptum: Siquidem ratione sufficientem probatum est Angelos habere sufficientem vim naturalem ad percipiendos alienos mentis affectus: cumque autoritatibus tum Scripturæ, tum SS. Patrum constet etiam apertè illos de facto tales mentis affectus non percipere: Consequens est, quod illa non perceptio proveniat, non ex impotentia virtutis intellectivæ, sed ex negato sibi divinitus concursu.

Dices 3. Ex dictis constat SS. Patres probasse Christi Domini Divinitatem, ex eo quod noverit secreta cordium, & internos mentis affectus: Ergo signum est eos censuisse talem cognitionem soli Deo esse propriam, nec alteri ullatenus pos-

posse competere, alioquin nulla certe foret eorum illatio.

Nego consequentiam; Sicut & ejus illationem, etenim ad efficacitatem argumenti sanctorum Patrum sufficiebat, quòd ex Scriptura constaret Deum solum habere de facto cognitionem cogitationum cordium; quam cum etiam Christus de facto haberet, Consequens erat, quòd esset Deus. Adde quòd illud argumentum Christi Divinitatis videatur quidem sufficiens, sed non efficax; Nam etsi non fuisset revera Deus, potuisset tamen internos mentis affectus nosse, nempe per revelationem divinam uti contigit pluribus Prophetis, maxime cum illius cognitionis modum, esse vel naturalem, & proprium, vel supernaturalem, & aliunde acceptum Scriptura sacra non explicet.

CONCLUSIO TERTIA.

Futura contingentia à causis liberis pendencia Angeli non cognoscunt. Probatur 1. Ex Scriptura sacra, maxime ex illo Isaia 41. *Annuntiate quæ ventura sunt in futurum, & sciemus, quia Dii estis vos*: Et cap. 46. *Ego sum Deus, & non est ultra Deus, nec est similis mei annuntians ab exordio novissimum, & ab initio, quæ nondum facta sunt dicens*. Et Daniel 2. *Est Deus in Cælo revelans mysteria*. Idem docent SS. Patres communiter. Hilarius in libro 9. *Proprium Deo quid est, quam cognitio futurorum*? Cyrillus quoque libro 4. in Joan. Nulli, inquit, alii quam uni, ac soli naturali Deo futura nosse convenit. Et Hieronymus expendens illud Isaia 46. ubi fuit probat Dæmones non potuisse per idola futuros rerum eventus prædicere, quippe cum nec templorum suorum ruinam præciperint. Quocirca certè Origenes libro 6. contra Celsum, meritò concludit, *Divini sermonis characterem esse futurorum prædictionem*. Et S. Damascenus lib. 2. de Fide cap. 4. affirmat non solum Dæmonibus, sed etiam sanctis Angelis negari futuro-

rum ex libertate pendentium præscientiam; Angelos quidem bonos illa nosse posse ex Dei revelatione, Dæmones autem ex sola conjectura.

Hanc veritatem probat Seraphicus Doctor, *dist. 7. quest. 3.* Hæc futura contingentia, aut cognoscuntur ab Angelis in causis, aut in seipsis: Non in causis, quia liberum arbitrium ex se indifferens est ad unam, & ad alteram partem, & æquè respicit unam, atque alteram: Ergo ex illo non magis intelligitur eventus futurus, quam non futurus. Non in seipsis, quia hoc solius Dei videtur proprium, qui ut est æternus, æternitate sua omnia tam futura, quam præterita habet præsentia. Unde, inquit, divina cognitio non pendet à re aliqua: imò omnia, quæ novit, secundum modum suæ veritatis novit, & quia veritas sua est certissima, certissime cognoscit contingentia, ut necessaria, & sicut certissime novit, ita potest certitudinaliter denuntiare, & revelare; Ideo hæc præcognitio futurorum, vel Dei est, vel à Deo; & ideo cum talia prædicuntur, prædictio dicitur *Divinatio*, quia talis est actus divinus; Et quia Dæmones superbi maxime desiderant honorari ut Deus, maxime conantur ostendere hoc in se habere, & hoc ideo dicere, quod dæmones per se-ipsos futura contingentia præsciant certitudinaliter, hoc est eis attribuere, quòd Dei est; Ideo est ibi infidelitas, & infidelitati frequenter annexa idololatria; ideo Divinatio est prohibita. Verum hæc ratio, quæ communis est apud omnes Theologos sua dære potest quidem Angelos de facto non cognoscere illa futura, quæ ex libero Dei, vel Creaturæ rationalis arbitrio pendent; verum efficaciter non demonstrat ad eorum cognitionem Angelos naturalem activitatem non habere. Licet enim voluntas libera sit, tamen necessario determinata est veritas alterutrius po-

postionis rei venturæ, illaque veritas cum sit intra limites ordinis naturalis, non videtur capum Angelicum transcendere, ideoque ratio cur ipsam veritatem rei futuræ Angelus non cognoscat, non est aliunde petenda, quam ab ipsa Dei voluntate sibi reservante, cognitionem rei futuræ, quam pro libito Creaturis interdum denuntiat, & revelat.

Dicitur Experientia constat Dæmones, vel per se, vel per homines, quos inspirant multa liberè futura denuntiare, puta bellorum exitus, regnorum permutationes, & alia his similia, quæ à liberis hominum voluntatibus pendent; sed hæc à Deo revelante non excipiunt; Ergo sua virtute naturali prævidere possunt futura contingentia.

Respondet ad majorem: Reverà quidem Dæmones interdum hæc denuntiare, sed ea vel à Deo accipiunt, qui malis, & impiis multa revelat, ut per Balaam, & Caypham, & Sybillas Gentiles, & idololatras olim multa prædixit; sicut docet Augustinus lib. 2. de Genesi ad litteram cap. 17. quique dæmones interdum alloquio suo dignatur, ut patet ex cap. 1. & 2. Job. iidemque velut justitiæ suæ ministris potest aliqua futura revelare per seipsum immediatè, vel per sanctos Angelos. Vel dico Dæmones vera prædicere per revelationes non sibi factas; sed sanctis hominibus, quas ex eorum vel dictis, vel scriptis excipere possunt. Nam, inquit Tertullianus in Apolog. cap. 22. dispositiones etiam Dei, & nunc Prophetis concionantibus excerpunt, & nunc lectionibus resonantibus carpunt. Ita & hinc sumentes quasi ante temporum sortes, æmulantur divinitatem, dum furantur divinationem. Vel tertio dico cum sancto Augustino lib. 2. de Genesi ad litteram cap. 17. Quod aliquando nefandi Spiritus etiam, quæ ipsi saluti sunt velut divinando prædicant: quapropter bono Christiano sive mathematici, sive quilibet impiè di-

vinantiam maximè dicentes vera, cavendi sunt, ne consortio Dæmoniorum animam deceptam patto quodam societatis irreciant. Quarto denique dico, Dæmones aliquando cognoscere futura ex conjecturis, & syderum influentiis, quas optimè norunt; Nam, inquit Tertullianus ibidem, Habent de incolatu aeris, & de vicinia syderum, & de commercio nobis celestes sapere paraturar: ut & pluvias, quas jam sentiunt repromittant. Cum autem aliunde sciant maximam hominum partem sequi magis passiones influentiis syderum excitatas, quam rationem, frequenter vera dicunt, licet non certò, sed tantum conjecturaliter illa cognoscant.

Adde quòd Deus in vindictam impiæ curiositatis consulentium interdum, permittat, ut vel Dæmones, vel Magi vera prædicant: Nam, inquit S. Augustinus lib. 2. de Doctrina Christiana cap. 23. fit ut occulto quodam judicio divino capidi futurarum verum homines tradantur illudendi, & decipiendi promeritis voluptatum suarum, illudentibus eos, atque decipientibus Angelis; quibus illusionibus, & deceptionibus evenit, ut istis superstitiosi, & perniciosi divinationum generibus multa præsentia, & futura cognoscantur, nec aliter accidunt, quam dicant, multa secundum observationes suas eveniant, quibus implicatè curiosiores fiant, & sese magis, magisque inferant multiplicibus laqueis perniciosi erroris.

Obijcies 2. Anima rationalis pluram etiam aliquando interdumendum, & quando sit libera ab operatione sensuum, maximè exteriorum, futura detegit; plura namque in somniis cogitamus, quæ postmodum eventu verum fuisse cogitata probantur. Irgo id multo magis tribuendum Angelis ab omni corpore defæcatis.

Respondet Seraphicus Doctor super pra laudatus, quod quintuplicis generis sunt Somnia, Quædam contingunt

gunt ex dispositione corporis : quædam ex sollicitudine mentis : quædam ex illusione diabolica : quædam ex revelatione Angelica : quædam ex visione divina . Prima duo Somnia sunt præfagia futurorum , quæ habent causam in nobis , ut Somnia , quæ contingunt ex causis corporis , sunt signa infirmitatis : Somnia , quæ contingunt ex sollicitudine mentis , sunt signa eorum , ad quæ facienda , vel deideranda nostra inclinatur affectio . Alia verò non sunt signa de se , imò si de se alia applicentur , potius præbent occasionem errandi , quam præsciendi Somnia , quæ sunt à diabolica illusione nullius sunt roboris sicut , nec divinationes Aruspicum . Somnia verò , quæ sunt ab Angelis bonis , aut à Deo , sunt in nobis signa vera , & recta , & ita ex hoc non habetur , quod præcognitio futurorum , contingentium aliter habeatur , quam à Deo .

QUAESTIO QUARTA .

An & quomodo Angeli sibi invicem loquantur .

NOTANDUM 1. Quod locutio est intelligentis naturæ cogitatio ad notitiam alterius certo indicio producta . Quo fit ut tribuatur non solum hominibus , sed etiam Angelis , & ipsi Deo ; Verum diversa longè ratione ; nam ut observat S. Gregorius lib. 2. Moralium cap. 5. *Aliter loquitur ad Angelos , aliter Angeli ad Deum , aliter Deus ad sanctorum animas , aliter sanctorum animæ ad Deum , aliter Deus ad Diabolum , aliter Diabolus ad Deum .* Nam quia spiritalis naturæ ex corporea appositione , nihil obstat , loquitur Deus ad Angelos sanctos eo ipso quo eorum cordibus occulta sua invisibilia ostendit , ut quidquid agere debeant , in ipsa contemplatione veritatis legant : ut velut quædam præ-

cepta vocis sint ipsa gaudia contemplationis . Quasi enim accidentibus dicitur , quod videns inspiratur . Tum quibusdam interpositis , Deus ergo Angelis loquitur , cum eis voluntas ejus intima videnda manifestatur . Angeli autem loquantur Domino cum per hoc , quod super semetipsos respiciunt , in motum admirationis surgunt . Et cap. sequenti , *Animarum verba , ipsa sunt desideria ; Nam si desiderium sermo non esset , Propheta non diceret : DESIDERIUM CORDIS EORUM AUDIVIT AURIS TUA .*

Notandum 2. Fide tenendum esse Angelos sibi invicem loqui manifestando proprios conceptus , & affectus ; id namque Scriptura sacra pluribus indicat , sic Isaia 6. *Seraphim clamabant alter ad alterum : Zacharia 1. Respondit Angelus Domini , & dixit , Domine Deus exercituum usquequò tu non misereberis Jerusalem ?* Et apud Judam in sua Canonica Michael cum Diabolo disputat de Moyse corpore ; Disputatio autem nequit intelligi absque aliquo genere locutionis : Hunc Angelorum sermonem lingue vocabulo apud Apostolum intelligi plerique omnes existimant , qui sic 1. cor. cap. 13. scribit . *Si linguis hominum loquar , & Angelorum , &c. Quem ad locum scribit ita Chrysostomus . Linguam Angelorum hic appellat , non corpus Angelis attribuens , sed ejusmodi est quod ait : Quamvis ita loquar , ut Angeli inter se colloquantur , &c. Subscribit Theophylactus , Angelis , inquit , porro lingua est intellectiva , vis nimirum illa , quæ sibi mutuo divinarum rerum intellectum , ac divinas contemplationes impertit .* Consentit etiam Theodoretus in eundem textum ita scribens , *Angelorum linguas dicit , quæ non sensu , sed quæ intelligentia percipiuntur ; per quos , & universum Deum laudant , & inter se differunt .* Eos enim laudantes audierunt Isaia , & Ezechiel , quin etiam Daniel inter se loquentes , & Zacharias , & Michæas .

Suf.

Suffragatur etiam ratio; nam si Angeli sibi mutuò non loquerentur, nulla inter eos esset, nec esse posset societas; hæc enim communicatione comparatur, & sine illa constare nequit; Dicere autem Angelos societatis capaces non esse absurdum est; Nam aptitudo naturalis ad societatem videtur esse proprietas naturæ rationalis; Aut sanè in aliud majus absurdum incidamus oportet, ut dicamus Angelos non indigere communicatione, & sermone, quia omnia secreta unius cuicumque alteri manifesta sunt, quod supra falsum esse demonstravimus. Adde quod Angeli ad hoc à Deo conditi fuerint, ut divinas ejus perfectiones continuis laudibus celebrent, quoties *cæli cantores, cælestes aves, & divinarum laudum præcones* à SS. Patribus maxime Gregorio magno in caput Job. 38. appellantur. Qualiter autem divinas laudes perficere possent si facultate loquendi carerent, nec possent invicem sacra miscere colloquia? Certum ergo est, ac prorsus indubitatum Angelos revera sibi invicem loqui; qualiter autem id fiat ibi difficultatis cardo, & summa.

Notandum 3. Circa modum locutionis Angelicæ declarandum gravem esse apud Theologos controversiam, miramque sententiarum varietatem. *Sunt* enim, qui putant Angelos loqui inter se per signa quædam corporea, & sensibilia ab ipsis in aliquo corpore exarata sicut nos in aere, vel carta voces, & litteras edimus, quam opinionem refert Durandus in 2. dist. 11. quest. 2. quod arbitrantur fieri alterutro ex his duobus modis. Unus est, quod illa signa sensibilia sint figuræ in cælo exarata habentes peculiarem significationem Angelis notam, Alius est quod illa signa, quibus invicem loquuntur Angeli sint quidam soni sensibiles in aere formati instar vocis, vel sint nutus, & signa facta in corporibus assumptis, sicut homines sibi invicem loquuntur: Priorem

modum improbat Durandus; posteriorem verò approbat utpotè necessarium sicut existimat ad propriè dictam locutionem. *Aliqui* volunt Angelos sibi invicem loqui per signa quædam spiritalia, ita quod Angelus loquens possit efficere signum repræsentativum illius verbi, quod de re cognita formavit; quodque signum ex natura sua non est occultum, sed notum aliis, & ideo formatio illius signi est sui conceptus expressio, & locutio. In quam sententiam propendit Vasquez. *Sunt* qui asserunt locutionem Angelorum consistere in sola ordinatione conceptus loquentis ad eum, cui loquitur absque eo quod loquens quidquam efficiat in audiente. Ita pœnè omnes Thomistæ cum Angelico suo Doctore. *Denique* sunt, qui affirmant Angelum loquentem sui conceptus notitiam actualem in intellectu audientis producere per formatam in eo, seu directam ad eum speciem sui conceptus expressivam. Ita subtilis Doctor in 2. dist. 9. quest. 2. Cum suis omnibus discipulis. *Quæ* sententia tamquam verior, & certior firmabitur, sed prius sit.

CONCLUSIO PRIMA.

Angeli sibi invicem nō loquuntur per signa corporea, nec per spiritalia.

PROBATUR PRIMA PARS 1. Quidem autoritate S. Gregorii Nysseni cap. 12. libri contra Eunomium dicentis, *Inexperte materia, & intelligibili natura, mentis alio sermo est nequaquam materiali utens organorum ministerio. Est enim in humana natura nihil opus habere verborum, ac nominum usu si nudos animi motus mutuo demonstrare possemus; Nunc cum interiores mentis nostræ notationes, pro eo quod carnis involucri natura circumscribitur, palam fieri nequeant, necessariò facimus, ut certas nominum impositiones tanquam signa rebus affigentes illarum ope mentis nostræ motus invicem vulgemus.* Rem dilucidè explicat Scotus Erigena in commentariis ad

ad Dionysium de celesti Hierarchia, cap. 25. *Quis, inquit, mortalium dignè concipiat modum spiritualis sermocinationis eorum? Noli ergo in eis fingere formam humanorum, lineamenta membrorum, linguæ corporalis officium, distinctiones sonorum. Talia enim in eis non sunt, nisi spiritaliter tantum, nec corporali indigent locutione: quoniam conscientias suas spiritaliter invicem contemplantes, ad alterutrum quodammodo sine voce loquuntur, dum alter alterum videndo intelligit, nam & post resurrectionem futuri corda nostra erunt sibi invicem claritate fulgentia, & puritate translucencia, ipsa quippe eorum claritas sibi mutuo in alternis cordibus patebit. Et cum unusquisque vultus attendetur, simul, & conscientia penetrabitur. Ibi namque unusquisque mentem ab alterius oculis corpulentia non abscondet: sed patebit animus, patebit, & corporalibus oculis ipsa corporis harmonia: Sicque erit tunc unusquisque conspicabilior alteri, quàm nunc sibi. Cum ergo de nobis hoc indubitanter speremus, similia de illis, qui nobilioris, & subtilioris substantiæ sunt, intelligamus.*

Probatum etiam hæc veritas ratione Theologica; Ageli mutuam inter se societatem, & conversationem naturæ suæ spirituali correspondentem exigunt; Sed loquutio per signa corporea nullatenus eorum naturæ quadrat; Ergo hic loquendi modus non est eis tribuendus. Minor constat, siquidem loquutio pendens à rebus corporeis naturæ spiritali non correspondet; Major probatur nam Angeli intra gradum suæ intellectualitatis, & spiritualitatis sibi invicem sociantur, adeoque debent habere modum connaturalem, quo suos conceptus, & affectus promere possint; Constat autem, quod signa sensibilia non sint connaturalia substantiæ spiritali, subindeque ad Angelorum loquutionem nullatenus possunt deservire.

Deinde, Etiam si nullas res corporeas Deus creasset, reverà tamen strictissimam invicem amicitiam, & sociatam Angelì habuissent, subindeque loquutionem, & manifestationem conceptuum, utpote sine qua vera amicitia, perfectaque societas non possit subsistere; Ergo hujusmodi Angelica loquutio fieri potest independentè à signis sensibilibus.

Denique; Idcirco Angeli in corporibus assumptis, hominibus loquuntur per signa sensibilia, quia nempe anima rationalis sensibus illigata, non potest objecta percipere, nec aliorum nosse conceptus, nisi moveatur, & immutetur à phantasmate; sed in Angelis non sunt phantasmata, nec ulla naturalis connexio sensuum cum intellectu; ergo nec inter eos potest sensibilis sermo habere vim loquutionis, quæ ad intellectum immutandum perveniat; Nam, inquit S. Damascenus lib. 2. de fide c. 3. Non lingua, atque auribus opus habent; verum citra sermonis adminiculum cogitationes suas, atque consilia inter se communicant. Cui quadrat illud S. Basilii homilia 3. dictum, affirmans hominibus datum esse sensibilis sermonis usum, propter corporis impedimentum; Si enim, inquit, ipsi viveremus, anima omnium oculis conspicua, & nuda inter nos mox conveniret per mutuam cogitationum intelligentiam.

Probatum etiam secunda pars: Nempe quodd hæc loquutio Angelica fieri nequeat per signa spiritualia: vel enim illa signa essent naturalia, vel ex instituto; sed neutrum dici potest. Non quidem primum; tum quia si essent signa naturalia, maximè essent quædam qualitates; ad nullum enim aliud prædicamentum congruè possent reduci, at nulla qualitas potest esse signum naturale conceptus Angelici. Probatum, nihil potest esse signum naturale alterius nisi quatenus est illi simile vel Physicè, vel intentionaliter, at talia esse-
ne-

nequeunt : non quidem Physicè , quia reverà essent diversæ rationis: Deinde licet unus homo sit alteri Physicè similis , non tamen dicitur eum repræsentare; ergo multò minùs hæc species repræsentaret . Non etiam intentionaliter : quia nihil habet talem similitudinem , nisi species impressa , vel expressa alterius : sed illæ qualitates non essent tales species conceptûs : Ergo sic eos non repræsentarent . Tum quia si essent signa naturalia , deberent esse publica , & communia , subindeque omnibus Angelis manifesta; & sic unus Angelus non posset alteri loqui , quin cæteri conceptum ejus intelligerent , quod valdè Angelorum dignitati , & libertati detraheret , cum nullum privatum possent alteri intimare secretum .

Non etiam secundum, quia si illa signa essent ex instituto , & significarent ad placitum , maximè quia essent ordinata ex communi Angelorum consensu , adeoque omnibus essent nota ; ergo adeoquæcumque unus Angelus tale signum usurparet ad manifestandum , alteri suum conceptum , cæteri quique Angeli hoc ipsum signum manifestativum cognoscentes , etiam conceptum significatum intelligerent . Deinde illa signa communi omnium Angelorum consensu institui non potuissent sine prævia loquutione , quæ nempe invicem convenirent ut hanc rem ad hoc significandum usurparent : Ergo antecederet ad illius signi institutionem potuissent loqui , adeoque loquutio Angelorum necessariò non exigit fieri per aliquam signa . Secundum etiam dici nequit : illa enim usurpatio privata , & particularis institutio signi , quæ fieret ab aliquo Angelo , non poterit alteri Angelo intimari nisi per loquutionem : Ergo absque signi manifestativi conceptus usurpatione potest unus Angelus alteri loqui , sicque eorum loquutio non censenda est fieri per ulla signa , vel corpora , vel spiritualia .

Dices 1. Glossa in illud Apostoli ad Corinthios 13. *Si linguis hominum loquar, & Angelorum*, affirmat Angelos sibi invicem loqui nutibus , & signis : Ergo Angelorum loquutio sit per aliqua signa .

Respondet : Angelos in tantum dici posse loqui nutibus , & signis , in quantum ad se invicem dirigunt suos conceptus , vel conceptuum species , quibus nempe significant alteri , quod prius in mente latens habebant ; qua ratione pariter nonnulli sunt explicandi sancti Patres , qui Angelos per signa quædam invicem loqui significant .

Dices 2. Ut unus Angelus alteri dicatur loqui , intellectus Angeli audientis debet per aliquid immutari , & moveri , quo percipere possit conceptum loquentis : Sed nihil aliud excogitari potest ad id exequendum magis congruum , quàm signum aliquod spirituale ad cuius præsentiam Angelus audiens advertat , & percipiat conceptum loquentis ; ergo hæc signa sunt admitenda .

Nego minorem : Illa namque Angeli audientis advertentia , & perceptio longè faciliori modo concipitur fieri per impressam sibi notitiam objecti , de quo fit loquutio , ut statim dicemus : Ergo hæc signa minùs sunt congrua , immò sunt prorsus frustranea .

CONCLUSIO SECUNDA.

Angelica loquutio non fit per simplicem conceptus manifestationem , & ordinationem ad audientem absque aliqua in audiente mutatione reali .

Probatur 1. Per loquutionem unus Angelus debet alterum excitare ad audiendum : sed per illam manifestationem , & directionem non potest Angelus de non audiente fieri audiens : Ergo , &c. Major constat . Minor probatur , ut Angelus de non audiente fiat audiens , necessariò debet immutari , & moveri , non enim semper est in actuali consideratione eorum omnium , quæ

co-

cognoscere potest: sed per illam simplicem manifestationem, & directionem non potest Angelus, qui diceretur audiens, realiter immutari. Probatur: Nihil immutatur realiter, nisi per aliquid reale in se receptum, vel à se productum: sed per illam simplicem manifestationem, & directionem Angelus audiens nihil in se reale recipit, nec quidpiam producit: Ergo, nec dici potest realiter immutari, subindeque, nec de non audiente fieri audiens.

Deinde: Illa simplex manifestatio, & directio potius est actus voluntatis, quam intellectus, non solum quia est actus liber, quippe cum unus Angelus alteri non nisi liberrime loquatur: sed etiam quia est ordinatio quædam, & directio ad aliquod extrinsecum, quæ fit per ipsam voluntatem Angeli dirigentis; nihil enim loquens aliud præstaret, quam volendo ut suus conceptus tali, vel tali fiat manifestus: at locutio Angelica non est actus voluntatis, sed intellectus, ut probatum est superiori conclusione ex SS. Patribus; Idque, apertissime tradit Theodoretus in illud Apostoli: *Si linguis hominum &c.* ait enim, *Angelorum lingua dici debet intelligendi vis, per quam, non quæ sensu, sed intelligentiâ percipiuntur, manifestantur*: Ergo nec illa locutio est simplex directio.

Denique: Si locutio illa Angelica esset simplex directio, non posset unus Angelus manifestare privatum suum conceptum, & affectum alicui particulari cui loqui diceretur, quin omnibus eum pariter manifestaret, quamvis ipsis non censeretur loqui; Siquidem in tantum audienti diceretur suum indicare conceptum, in quantum exponeret illum, ut facile percipiatur ab Angelo in ipsum advertente; at ex hypothesi, quod essent tres Angeli simul, Michael, v.g. non posset manifestare suum conceptum Gabrieli quin Raphael in Michaelem advertens eum pariter conce-

ptum agnosceret: sed hoc vergit in præjudicium libertatis Angelicæ, quod non possit uni aliquid intimare quin ab altero conciperetur: Ergo, &c.

Obijciunt Thomistæ: Loqui alteri nil aliud est, quam suæ mentis conceptum manifestare, & aperire: sed unus Angelus per hoc solum alteri manifestat suum conceptum, quod voluntate sua ipsum ad illum dirigit: Ergo per hoc præcisè eum alloquitur. Majorem supponit Gonet ut veram; Minorem, verò sic probat, ut conceptus unius Angeli manifestetur alteri, sufficit, quod ab eo possit cognosci: Sed ex eo præcisè, quod unus Angelus conceptum suum voluntariè ordinat ad alterum, ut ei innotescat, potest ille alter Angelus cognoscere: Ergo per talem ordinationem, seu directionem manifestatur. Majorem supponit, ut evidentem: Minorem probat. Ut actu conceptus liber unius Angeli possit ab alio cognosci, sufficit, quod incipiat pertinere ad eum, qui debet illum cognoscere, cum enim quilibet Angelus natus sit per species, quas in se habet sine ulla impressione, vel actione objecti in ipsum, intelligere quicquid ad se pertinet, eo ipso quo Angelus loquens ordinat suum conceptum ad alium, ut illi possit innotescere, eo inquam ipso reddit hujusmodi cogitationem pertinentem ad illum ad quem eam dirigit: Ergo hoc ipso facit, quod illa cogitatio possit ab eo cognosci.

Respondeo 1. negando majorem; Locutio enim non est sola rei manifestio, alioquin qui velum, quo tabella aliqua obtegatur subduceret, ut imaginem in ea depictam alteri cernendam exhiberet, diceretur per hanc exhibitionem, & manifestationem loqui: & quotiescumque aliquid conspiciendum nobis ab altero subjicitur, toties ille nobis loqui diceretur, quod certè nullus dixerit; siquidem mutus potest taliter rem videndam exhibere, nec propterea

dicitur loqui, adeoque locutio non est simplex rei cognoscendæ manifestatio: maximè in sententia Thomistarum, qui locutionem omnem per signa fieri posse denegant, ut etiam docet ipse Gonetus, qui disp. 13. art. 3. affirmat locutionem Angelicam non fieri per signa corporea, aut spiritualia; itaque ad locutionem non sufficit simplex rei manifestatio, sed insuper requiritur, ut idem conceptus loquentis, vel alius in audiente formetur.

Respondeo 2. negando minorem; Nam ut reverà unus Angelus alteri suum conceptum manifestet, non sufficit, quòd ipsum dirigat, & ordinet ad illud per suam voluntatem, sed ultrò requiritur ut Angelus ille ad quem talis conceptus dicitur dirigi, in se recipiat aliquid, quo moveatur, & exciteatur, ut advertat in illum Angelum, qui vult ipsi conceptum denudare, & manifestare. Quantumvis enim Raphael, v. g. velit suum conceptum liberum aperire Gabrieli, nullatenus in eum advertat Gabriel, maximè si alteri objecto cognoscendo detineatur, nisi recipiat in se aliquid, quò amoveatur à consideratione, & cognitione prioris objecti ut suum cogitatum in Raphaelem transferat. Intellectus enim unius Angeli non est secundum se sufficienter constitutus in actu primo ad cognoscendos actus liberos alterius, alias posset pro libito, & independentè ab alterius locutione, & voluntate eos cognoscere: Ergo ut fiat potens in actu primo ad illos liberos actus cognoscendos necessariò debet compleri per receptionem alicujus speciei à loquente ad ipsum directæ, vel per productionem conceptus à loquente in ipso formati.

Obijciunt 2. Ideo actus liber unius Angeli est ex natura sua ante consensum ipsius incognitus alteri Angelo, quia ipse Angelus qui eum libere elicit habet ex vi suæ libertatis domi-

nium in talem actum, & jus sibi connaturale notitiam ipsius reservandi quandiu voluerit: sed ex eo præcisè quòd dirigat ad alterum Angelum ejusmodi conceptum ut ei possit innotescere, eò ipso, inquit Gonetus, cedit dominio, & juri quod habet prædictum conceptum occultandi: Ergo eò ipso incipit manifestari illi Angelo ad quem dirigitur: Subindeque Angelus sic suum conceptum manifestans, censetur sufficienter alterum Angelum alloqui.

Respondeo concedendo totum Argumentum, & negando illationem ex eo consequentem; nam, ut supra dictum est, locutio non est simplex rei manifestatio, adeoque falsum est quòd Angelus liberè exponens suum conceptum videndum, quantumvis cedat juri, & dominio quod habet occultandi prædictum actum, non propterea censendus est alteri loqui. Si enim nullus sit qui in eum conceptum advertat, nulla illius erit perceptio, & notitia; subindeque præter manifestationem conceptus ex parte loquentis, necessariò etiam ab eo produci debet, & transmitti aliquid in ipsum quem alloqui intendit, ut nempe de non advertente, & non audiente fiat advertens, & audiens.

Obijciunt 3. In hoc differt locutio humana ab Angelica, quòd homo non censeatur alteri loqui ex eo præcisè quòd ad illum suum conceptum voluntariè dirigat; duplici namque obstaculo, inquit S. Thomas, illius conceptus velut obtegatur ne alteri innotescat: Primo quidem ipsà libertate voluntatis, quà homo internos suos motus sibi ipsi reservare potest: Secundò crassitie corporis, ratione cujus homo debet uti aliquo signo sensibili, ut alteri homini suum conceptum manifestare queat: Conceptus autem unius Angeli undumtaxat velamine obtegatur, nempe solo libertatis dominio quo pro libito potest, vel occultare, vel suos conceptus

ptus alteri manifestare: Ergo h c ips  qu d tollitur ipsum velamen, qu dque tali dominio cedit, & ad alium suos conceptus dirigit, censetur ipsi loqui.

Nego consq. Quia ut jam pluries dictum est, locutio pr ter declarationem conceptus exigit non solum ut dirigatur moraliter, sed etiam phisic  in audientem, qu  nempe de non advertente, & non audiente fiat advertens, & audiens. Nec valet reponere cum Gonet , ad id sufficere illam directionem moralem: Siquidem illa directio moralis est actus pur  internus Angeli loquentis, quippe cum sit tantum ejusdem volitio, qua vult suum conceptum alteri manifestari, & consequenter per illum actum internum nihil productur in eo ad quem talis conceptus dirigitur, ut ad ejus intuitum possit moveri, & determinari. *Insuper*, Motio moralis supponit facultatem jam advertentem ad objectum, vel finem cognoscendum aut amandum: Intellectus autem Angeli ad quem dirigitur conceptus loquentis non supponitur advertere in Angelum loquentem: Ergo illa directio vel motio moralis, qu  se tenet ex parte Angeli loquentis non sufficit, ut determinet audientem ad ipsius conceptus manifestati cognitionem.

CONCLUSIO TERTIA.

Probabilis est unum Angelum alteri loqui producendo in eo conceptum objecti de quo loquitur, ita ut Angelus audiens passiv  se habeat ad notitiam rei, de qua fit locutio.

H c est expressa Doctoris Subtilis sententia loc  laudat  quam sic probat: Loquens intellectualiter intendit eum cui loquitur deducere in cognitionem rei, de qua fit locutio: Ergo si possit tamquam causa totalis, & absque ullo medio eam cognitionem producere in audiente, rever  censendus est eam de facto producere: Sed cert  id potest; Ergo ejus locutio fit per formationem notiti  illius rei de qua fit ser-

mo. Major constat, Ad id enim unic  ordinatur locutio ut audie ns rem cognoscat, & apprehendat, de qua   loquente fit sermo. Minorem probat Doctor, intellectus Angeli loquentis cum specie intelligibili objecti concurrentis ad sui notitiam, est causa effectiva ad quata sufficiens ad producendam talem notitiam in quocumque intellectu debit  applicato, & capaci talis cognitionis: sed intellectus Angel  audientis est capax talis cognitionis habend , & sufficienter censetur applicari quoties est in potentia ad eam cognitionem habendam, qualiter est dum habet rationem audientis: Ergo tunc intellectus Angeli loquentis potest causare in ipso cognitionem illam.

Major constat, Quidquid enim est potens producere effectum alicum in uno subjecto capaci ad recipiendum eundem effectum, rever  potest eum effectum in eo producere: Ergo cum intellectus Angeli informatus specie intelligibili ab objecto excepta possit effectiv  illius objecti cognitionem producere in seipso, poterit etiam illam producere in quocumque intellectu capaci ad recipiendam talem cognitionem, Probatur minor: Ut intellectus censeatur capax percipiend  cognitionis alicujus, duo tantum requiruntur: Primum qu d habeat vim intellectivam, qu  possit objectum sibi representatum percipere quoquo modo in eo fiat illa objecti representatio, & receptio, nempe vel   seipso, vel   Deo, vel ab altero Angelo: Secundum, qu d ita non detineatur circa cognitionem actualem alicujus objecti, ut nullatenus ab ea possit removeri, nec aliam suscipere: At quilibet Angelus audiens taliter se habet, quippe nullus est Angelorum, qui facultatem intellectivam expeditam non habeat: nullusque, qui non possit ab uno objecto conspiciendo subduci, ut ad alterius notitiam, & intuitum deducatur. Non enim de facto,

& actu Angeli noſcunt ea omnia quorum cognitionem habere poſſunt, alioquin ſumma, & immenſa foret eorum cognoscendi, & intelligendi virtus; ſubindeque capaces ſunt cognitionis excipiendæ à quocumque illa inge-
ratur.

Quod autem Angelus capax ſit cognitionis recipiendæ ab alio quàm à ſe formate, patet: Tum quia unus Angelus ab altero illuminatur, ut ſequenti quæſtione probabitur; Illuminatio autem ſit per impreſſam notiſiam objecti ab illuminante Angelo cogniti: Tum quia nemo diſſiteri poteſt Deum poſſe producere in quolibet intellectu creato notiſiam, non ſolum habituaſem, ſed etiam actuaſem objecti cujuſlibet tam naturalis quàm ſupernaturalis: Ergo neceſſum eſt ut intellectus ille capax ſit ſuſcipiendæ talis notiſiæ ab externo principio productæ.

Obijciat 1. Supradictum Doctoris Subtilis fundamentum videri omnino falſum, etenim ſi omne principium productivum alicujus effectus in ſeipſo, eſſet etiam productivum ejusdem effectus in quolibet alio capaci ad eum recipiendum; Sequeretur *primò*, quod oculus Petri, qui producit in ſe viſionem parietis albi, poſſet eandem viſionem producere in oculo Pauli circa parietem non occupato. *Secundò*, ſequeretur quòd Angelus beatus producere poſſet viſionem beatificam in intellectu alterius Angeli non beati. *Tertiò*, quòd intellectus Angeli abſque omni ſuæ voluntatis concurſu poſſet cognitionem ſuam in intellectu alterius producere; Siquidem ſecluſo omni actu voluntatis poteſt intellectus cum ſpecie impreſſa producere in ſe intellectionem objecti, cujuſ ſpeciem habet; ſed hæ illationes ſunt abſurdæ, & improbandæ: Ergo abſurdum pariter principium quo noſtra ſententia nititur.

Reſpondeo negando majorem: Fundamentum enim Doctoris non ita debet

accipi univerſaliter quaſi velit, quòd omne principium productivum effectus in ſe ſit etiam productivum in alio; ſed ſolum quando principium producens, & paſſum recipiens effectum productum invicem proportionantur, ita quòd unum ſit ſuſceptivum effectus alterius ejusdem ordinis, & rationis.

Unde ad primam rationem dico, Nullam eſſe paritatem inter intellectum Angelicum, & oculum corporeum, intellectus enim Angelicus longè majorem habet activitatem quàm quælibet potentia corporea, adeoque plura poteſt quàm oculus qui cum ſit facultas materialis, & omnino corporea, nec ſufficienter alteri oculo applicata; inde non mirum ſi cum in ſe materiæ ſit expers nullique corpori illigatus, ſeſe intimè præſentem alteri Angelo ſistere poſſit, & in ejus intellectum ſuam ſecunditatem exerere; quippe cum nullo prorsus corporeo obſtaculo præpeditur, & alter Angelus poſſit ab alio in ſe productam notiſiam reverà recipere; ſiquidem Deus in intellectu Angelicum non ſolum ſpecies rerum, & omnes habitus ſupernaturales, ſed, & quamlibet cognitionem etiam ipſam viſionem, beatificam producere poteſt; adeoque nulla apparet repugnantia, nec ex parte Angeli loquentis, nec ex parte audientis, quòd unus in alium ſuam notiſiam ingerere poſſit. Secus eſt autem de facultate corporea qualis eſt oculus, quia nec ſufficienter in aliam eſt activa propter defectum ſufficientis applicationis v. g. ad alterum oculum in quo deberet operari.

Ad ſecundam illationem dico, Nullam eſſe paritatem. Principium enim Doctoris Subtilis tantum intelligitur de facultate propriis nature viribus operante, quæque ſit veluti ex ſe ſuorum actuum domina, nec egcat ullo ſupernaturali auxilio ad illos eliciendos, qualis non eſt intellectus beatificus reſpectu viſionis, quæ cum à lumine glo-

rie

riæ tanquam à supernaturali principio pendeat, adeoque supernaturalis sit in entitate; inde fit quod non possit recipi, nec exeri in intellectu purè naturaliter se habente, qualiter se haberet, si illam ab alio productam unus Angelus non beatus exciperet .

Ad tertiam illationem dico, Plura requiri ut intellectus producat aliquid extra se quàm in se; licet enim sit facultas naturalis, voluntati tamen subordinatur, & ad ejus imperium potest suum actum non primarium, sed secundarium, qualiter voluntas statuerit, elicere : Unde licet in se primariam rei intellectiõnem ad ejus præsentiam, vel cum illius specie possit absque voluntatis imperio producere, tamen non posset eandem actionem in aliud edere nisi ex imperio voluntatis : Cum enim illa actio ad extra omnino sit libera, opus est ut à voluntate dirigatur .

Obijciat 1. Cognitio est actus vitalis: Sed hic ita exigit essentialiter produci à principio intrinseco in quo residet ut non nisi per miraculum ab alio posset effici, imò etiam nonnulli id divinitus fieri posse denegant : Ergo multò minus poterit produci ab uno Angelo, in intellectu alterius merè passivè se habente .

Respondet 1. Noster Herrera Disp. 11. quæst. 7. dici posse, quod Angelus audiens non tantum passivè se habeat ad actum quo cognoscit, & intelligit, id de quo alius loquitur, sed etiam quod revera concurrat ad formandam notitiam unà cum specie verbi prolata, vel cum verbo ipso prolato à loquente, & ad intellectum audientis directo; ita quod loquens se habeat activè, & operativè respectu illius speciei, vel verbi ad audientem directi, & audiens se habeat receptivè, & passivè ad exceptionem illius speciei, vel verbi à loquente directi: sed concurrat effectivè cum ipso verbo, vel cum ejus specie ad formandam notitiam, adeoque hæc no-

titia qua audiens percipit objectum, de quo fit locutio reverà est actus vitalis, quippe produclitur ab ejus intellectu effectivè concurrente cum verbo transmissio à loquente ad formandam illam notitiam .

Verùm cum hæc responsio aliena videatur à mente Doctoris, ut patet ex his, quæ ibidem maxime num. 20. subijcit, ubi resolvit quod loquens notitiam sui conceptus ingerere possit in audientem tribus modis. Primò si audiens non habet speciem objecti, de quo loquendum est, tantum in eo causat actum notitiæ. Secundò, si non habeat speciem, audiens potest accipere à loquente speciem, & actum. Tertiò, si habeat notitiam actualem de illo objecto, tantum à loquente accipit speciem, qua moveatur ut attendat ad conceptum ab ipso loquente formatum. Censet ergo Doctor posse interdum loquentem causare solum actum intelligendi in audiente. Idcirco .

Respondet negando minorem : Non enim ad rationem actus vitalis requiritur, quod producat ab ipsomet vivente, sed sufficit quod per eum tendat vitaliter, & quatenus est potentia vitalis in objectum, si interim talis actus producat ab ipsa vitali potentia, siue non. In tantum enim dicitur actus vitalis, in quantum per ipsum potentia vitaliter objectum suum percipit, nec ad rationem vitalis quidpiam videtur aliud desiderandum. Quod si contingat interdum actum illum, qui vitalis dicitur, ita exigere produci à potentia, in qua residet, ut à nulla alia videatur procedere posse, id non est repetendum ex parte vitalitatis, sed vel ex eo quod nulla adsit causa secunda, quæ talem actum producere, & in potentiam vitalem eum transmittere valeat : Vel quia per eum sufficientissima fit ad eum actum producendum, congruentius actus illius productio videtur esse tribuenda potentie, quæ per eum actum

ope-

operatur, quàm alienæ etsi ab aliena potentia etiam posset produci.

Si quis autem necessariò exigat ad rationem vitalis actus, quod à potentia, quæ per eum operatur produci debeat, illud absolūtè negabo: nec arbitror contrarium sentientes ulla ratione sufficienti id posse evincere.

Obijciat 3. Notitia illa in audiente producenda formaretur vel ab intellectu, vel à voluntate loquentis: Neutrum dici potest: Non quidem ab intellectu, hic enim non est principium productivum actionis vitalis extrinsecum, ipsius namque operatio tota immanens est, quippe cum operetur, non ut se communicet, sed ut se perficiat; nec circa objecta effundatur quemadmodum voluntas, sed omnia ad se pertrahat. Non etiam secundum, Voluntas namque non potest esse principium intellectus, nec in suo, nec in alieno intellectu.

Nego minorem; Nam affirmari potest, quòd illa notitia in audiente producta formetur ab intellectu, & à voluntate Angeli loquentis. Ab intellectu quidem efficienter, à voluntate verò imperativè: Quod proveniat ab intellectu, constat ex probatione Conclusionis; licet autem intellectus sit facultas immanenter operativa respectu suæ propriæ notitiæ, & perfectionis, inde non sequitur, quod non posset etiam esse operativa, & productiva respectu notitiæ, & perfectionis alterius. Quis enim contrarium evincet? Quod etiam ad eam cognitionem formandam concurrat voluntas Angeli loquentis; docet Doctor ibidem num. 23. & ex eo Ponticius dicens, quod quavis intellectus, & species impressa objecti, de quo fit locutio, sit causa totalis immediata cognitionis productæ in audiente, tamen dependet in productione illa ab imperio voluntatis, ita ut sine ipso nequeat producere, quod patet à posteriore, quia alias Angelus necessariò lo-

queretur omnibus Angelis applicatis, & non impeditis per attentionem ad alia objecta, quod est inconveniens. Quod autem posset intellectus habere huiusmodi subordinationem ad voluntatem, etiam patet, quia sicut intellectus habens cognitionem alicujus objecti, tamen à voluntate pendet quantum ad conservationem talis cognitionis, quippe cum ipsum avocare possit voluntas ab ipso objecto considerando, & ad alterius notitiam deducere; ita pendere potest à voluntate in productione cognitionis in intellectu alterius Angeli.

Observat pariter ibidem Doctor, quod quavis Angelus loquens prius debeat formare in se ipso notitiam objecti, quàm eam producat in intellectu audientis; Illa tamen prior formata notitia non concurrat tanquam conditio sine qua non, quæ prærequiritur in loquente ad hoc, ut possit velle alteri proklam suam notitiam ingerere: *Quia*, inquit Doctor, *in effectibus subordinationis, quæ sunt ejusdem rationis, & quarum uterque natus est gigni à causa æquivoca, non oportet priorem esse causam posterioris; sed utrumque causari à eadem causa æquivoca, & hoc specialiter est in proposito; quia intellectio actualis non ita habet rationem parentis sicut memoria. Unde Pater in divinis gignit memoria non intelligentia.*

Obijciat 4. Quamvis Angelus posset producere cognitionem objecti à se intellecti in alio Angelo, attamen non, propterea diceretur ipsi loqui: Ergo locutio non consistit in huiusmodi productione. Probatur antecedens. Locutio importat necessariò distinctam significationem conceptus loquentis de re, de qua fit locutio: sed per productionem cognitionis de objecto non significaretur conceptus Angeli producentis ipsam; siquidem Angelus habens illam notitiam in se productam, nesciret quis eam produxisset: Ergo per

id formaliter non diceretur ipsi loqui.

Respondeo : Ad veram locutionem non necessarium requiri, [quod audiens cognoscat distincte quis cum alloquatur. Fieri enim potest, ut quis nobis loquatur aliquo interposito obstaculo, quem idcirco nosse non poterimus, nec propterea minus vera, & proprie dicta erit ejus locutio : Ergo à pari poterit Angelus loquens revera loqui suum significando conceptum audienti, quamvis audiens propter aliqua impedimenta, vel ipsum non videat, vel nesciat loquelam ab ipso provenisse. Unde neganda est sequela antecedentis, nec non & major probationis illius, ad veram enim, & perfectam locutionem sufficit, ut cognoscatur illa res, de qua fit locutio, nec necessum est ut loquens etiam distincte ab audiente sit cognitus.

Obijciat 5. Si Angelus alteri loqueretur producendo in eam suam notitiam, sequeretur quod Angelus malus loquens alteri non posset mentiri : sed falsum consequens : Ergo & antecedens. Major patet : Non enim posset in altero alium formare conceptum, quam omnino conformem ipsi, quem in se haberet, & consequenter non loqueretur contra, sed juxta mentem propriam : Minor etiam constat ; nam Angeli mali re ipsa sunt spiritus fallaces ; pleni dolo, & omni malitia, & de diabolo dicitur Joannis 18. *Quid homicida erat ab initio, & in veritate non fletit ; quia non est veritas in eo ; cum loquitur mendacium ex propriis loquitur, quia mendax est, & pater ejus, nempe mendacii.*

Nego sequelam majoris : Quamquam enim Angelus per productionem suæ notitiæ alteri loqueretur, non minus ea posset mentiri : Siquidem posset in se formare unam notitiam oppositam, & contrariam primæ, quam habuerat de objecto, & ipsam secundam notitiam alteri significare quasi revera esset pri-

ma notitia, quam habuisset de objecto, cum tamen non esset prima, nec primæ conformis, sicque apparet quod mentiretur.

Dices 6. Si Angelica locutio fieret per productionem notitiæ in intellectu audientis, sequeretur unum Angelum non posse loqui alteri in quacumque distantia posito : sed hoc videtur absurdum : Ergo & id unde sequitur. Probatur major. Non potest fieri ulla actio in distans, nisi prius agatur in medium ; medius autem aer, vel aliquid aliud corporeum inter utrumque Angelum, non est medium locutionis Angelicæ receptivum : corporeum enim non potest esse subjectum rei spiritualis : Ergo, &c.

Negat majorem Doctor mm. 16. & ad ejus probationem respondet Angelum posse sui conceptus notitiam in altero Angelo distante producere absque eo quod producat aliquid in medio : Siquidem ut probatum est in Physicis, fieri potest aliquando actio corporea in distans absque ulla prorsus actione in medium, maxime verò quando medium non est productivum similis qualitatis productæ : Ergo multo magis etiam fieri poterit actio spiritualis in distans.

Respondeo 2. Quod si revera non posset fieri actio in distans, quin fieret productio similis in medio, non erit absurdum concedere, quod Angelus non possit loqui Angelo distanti ; neque exinde sequitur ulla imperfectio in Angelis ; sicut nec est imperfectio in hominibus, quod unus alteri non possit loqui in maxima distantia posito, adeoque negari potest Minor.

Hæ autem, & cæteræ quæque difficultates faciliiori negotio dissolveret, qui Subtilis Doctoris sententiam ita interpretaretur, quod velit Angelum loquentem non absolute producere notitiam totalem, & adæquatam in intellectu audientis, sed tantum speciem, & imaginem conceptus à se formati : Ita quod illa species recepta in intel-

lectu audientis cum ipso effectivè concurrat ad formandam notiam de objecto de qua fit locutio ; quæ est ipsissima sententia Alensis 2. parte quæst. 27. membro 7. Nec-non, & Seraphici Doctoris in 2. dist. 10. art. 3. quæst. 1. ubi ait : *Ad loquendum sufficit ipsi Angelo ipsa species intelligibilis, quæ ex virtute intellectiva ipsius Angeli per vim voluntatis potest ad alterum protendi. Et sicut illa species dum eam sibi, & in se contuebatur intellectus, erat verbum interius, sic dum eam protendit ad alterum, efficitur quasi nutus, & verbum exterius : Et quia tam illa species, quàm virtus protendens illam ad alterum, & ipsa protensio spiritualis est, ideo non indiget corporali medio deferente : Sed quia virtus illa finita est, necesse est ad hoc quoddam unus Angelus intellectum alterius Angeli loquendo, hoc est illam speciem protendendo excitet, quod finita distantia ad invicem distent. Quorum utique sententiam saltem ex parte tueretur Doctor, quippe ut supra dictum est, docet aliquando Angelum loquentem solum, producere speciem in intellectu audientis. Dum autem asserit Angelum loquentem esse causam totalem notitiæ productæ in intellectu audientis dici posset eum loqui de cognitione objectiva, nempe de specie quam ad audientem dirigit, & cum qua per modum objecti concurrat.*

QUÆSTIO QUINTA.

An & qualiter unus Angelus alterum illuminare possit ?

NOTANDUM 1. Ex sancto Dionysio cap. 3. de cœlesti Hierarchia, quod cum Hierarchia sit, *Sacer Ordo scientia, & actio quæ ad Divinitatis similitudinem quantum fieri potest accedit, & proportionem illustrationum quæ ei divinitus date sunt ad Dei imitationem traducitur.* Ejus finis est Dei imitatio ;

medium autem quò divina similitudo formari potest est participatio divinæ lucis, quâ Angeli supremi Deo propinquiore divinam lucem plenius excipientes, divinasque veritates penitus influentes inferiores illuminant, & sedocent : Quocirca in medio ejusdem capituli affirmat ordinem Hierarchiæ postulare : *Ut alii purgentur atque purgentur : Quidam luce doctrinæ illustrentur, quidam illustrentur : Et aliqui perficiantur alii perficiantur :* Non quòd superior tantum Hierarchia inferiorem illuminet, & purget ; sed cum in eadem Hierarchia unus ordo superior sit, alius inferior, inferiores Angeli à superioribus illustrantur. Quorum autem, inquit, est illustrare, id est ut mentes clariores, & ejusmodi quæ, & lumen recipere, & aliis impertiri propriè possent, & distissimè sacro splendore offusum lumen, illud, quo undique circumfusi sunt in eos, qui illo digni sunt derivant.

Notandum 2. ex Doctore Subtili in 2. dist. 9. quæst. 2. num. 27. *Quod illuminatio Angelica est quædam locutio de vero perfectiva in esse secundo.* Primò dicitur locutio : Omnis enim illuminatio est locutio Angelis ad alium, licet omnis locutio non sit illuminatio, adeoque illuminatio differt à locutione tamquam species à genere : Siquidem locutio est de re qualibet, sive perfectiva intellectus audientis, sive non perfectiva, & indifferenti ; siquidem unus Angelus potest alterum alloqui de re cujus noticiam jam habebat, in quo casu locutio non est perfectiva intellectus Angeli audientis : Siquidem novam noticiam, & perfectionem non ingeret. Additur de verò, non quod ad illuminationem sufficiat manifestatio, & declaratio cujuscumque veritatis, alioqui à locutione simpliciter non discreparet : Sed, inquit Doctor, fieri debet de re divinitus revelata Angelo superiori, & prius ignota ipsi Angelo qui dicitur illuminari. Denique dicitur perfectiva in esse

secundo, siquidem actualem Angelo illuminato notitiam ingerit alicujus veritatis quam ipse propriis naturæ viribus acquirere non posset, quamque nec per species sibi concreatas, nec per visionem beatificā prius noverat: Cum autem omnis veritatis notitia sit perfectiva intellectus, hinc meritò Angelus illuminatus per revelationē veritatis supernaturalis prius ignotæ merito dicitur perfici in esse secundo, seu actualiter.

Notandum 3. Circa præsentis Quæstionis resolutionē plurimū variari Theologiae Principes. Quidam enim contendunt illuminationē fieri per simplicem propositionē veritatis, de quā fit illuminatio, absque eo quod quidpiam imprimat Angelo illuminato, non secus ac contingit inter homines dum Magister discipulum edocet, & illuminat, proponendo ei veritatem discendam, absque ulla efficiētia in ejus intellectu; ita S. Thomas, & ejus Discipuli: Alii verò contendunt per illuminationem aliquid causari in intellectu Angeli illuminati; ita quod illuminans quoddam lumen in intellectum Angeli illuminati inferat; qualiter autem id fiat non conveniunt omnes. Quidam enim volunt istud lumen esse supernaturale, & infundi Angelo illuminato, quò fiat potens ad intelligendam veritatem sibi revelatam, Sunt qui putent Angelum illuminari ab alio per derivationem, radii cujusdam spiritualis ab illuminante in illuminatum, per quem sic excitetur ad audiendum, & quò mediante formet in se similitudinem rei revelatæ, de quā à Superiore instruitur, & illuminatur. Quidam dicunt per illuminationem fieri tantum intentionem luminis Angeli inferioris qui dicitur illuminatus. Cæteri denique, cum Doctore Subtili affirmant illuminationem non fieri per simplicem propositionem rei revelatæ, & absque productione alicujus effectus in intellectum Angeli illuminati, neque per

causationem novi luminis, sive naturalis, sive supernaturalis, per quod Angelus illuminatus fieret vegetior, & potentior ad videndam veritatem sibi revelatam, sed contendit, quod illa Angelica revelatio fiat eodem modò quò locutio, nempe producendo notitiam veritatis revelatæ in intellectu Angeli cui fit illa revelatio.

CONCLUSIO PRIMA.

Reverà Angeli quidam alios illuminant: idque imprimendo eis notitiam rerum supernaturalium, quas per specialem revelationem noverunt. Ita sentiunt omnes Theologi contra Durandum, qui in 2. dist. 11. quæst. 3. Affirmat omnes Angelos illuminari à Deo immediatè. Patet conclusionis veritas ex S. Dionysio laudato in primo notabili, eamque veritatem pluribi edocet in libro de cœlesti Hierarchia, maxime verò cap. 7. ubi de Seraphinis ait: *Quod inferiora agmina ad sui similitudinem potentissime suborbant, lucida illuminantque proprietate totius obscuritatis expulserit.* Et ibidem de Cherubinis dicit, *Quod indultam sibi sapientiam in sequentia, & inferiora transfundunt.* Hinc circa medium capitis, *Hoc Theologi planè credunt, inferiores cœlestium naturarum ordines à superioribus ritè divina operà explicantes scientias discere: summos autem à Deo ipso pro suo capto doceri mysteria.* Quosdam enim earum inducunt ritè à prioribus hoc discere, *Dominum esse virtutum cœlestium, Regemque gloriæ eum, qui in Cælos, ut hominem docuit, assumptus est.* Unde cap. sequenti docet, quod *Media cœlestium Spirituum distinctio, quæ divinas has proprietates in se continet, purgatur quidem, & illustratur, atque perficitur, ut distum est à divinis illustrationibus, quæ ei secundo loco dantur per primā Hierarchiæ distinctionem, ac per mediam illam secundo loco transportantur.*

Insuper subscribunt alii plurimi Patres, præsertim S. Athanasius libro de

communi essentia, ubi ait, *Cherubim, & Seraphim sine ullo mediatore, ac interprete à Deo condiscunt, & ab his erudiuntur inferiores ordines, atque ita deinceps cæteri pro suo gradu.* Sophronius in Encomio de Angelis ad Seraphinos ait: *Splendorem quantum fas est absque ullo medio excipitis, & exceptumque cæteris mentibus, & intelligentiis communem facitis.* Similiter S. Damascenus libro secundo cap. 3. *Illud quidem, inquit, perspicuum est eos, qui præstantiores, sublimioresque sunt, splendoremque, & cognitionem inferioribus impertiri.* Tandem S. Bernardus sermone quinto de Consideratione cap. 4. de Cherubinibus ait: *Ex ipso sapientiæ fonte ore Altissimi haurientes, & res fluentes, fluentia scientiæ universis civibus suis.*

Nec valet reponere cum Durando præfatos SS. Patres solum velle, quòd Deus illuminet inferiores Angelos mediantibus superioribus, non mediatione causalitatis; sed dignitatis, quatenus nimirum prius illuminat superiores, & postmodum alios. Non valet, inquam, hæc responsio; siquidem ex verbis sanctorum Patrum constat, quòd divinæ illæ irradiationes prius fiant superioribus Angelis, & per eos ad inferiores deportentur.

Probari etiam potest conclusio hac ratione: Illuminare alterum, nihil aliud est, quàm ignotam veritatem ipsi manifestare: sed Angeli superiores ignotam inferioribus veritatem edocent, & manifestant: Ergo eos illuminant. Major admittitur ab omnibus: Minor verò probatur. Superior Angelus, cum Deo sit propinquior, longè clariùs, & uberius, quæ Dei sunt percipit, quàm inferior, quippe cum sit minoris activitatis, & virtutis: Cum autem inter eos maxima, perfectissimaque vigeat amicitia, quæ bonorum mutuam communicationem exigit, congruum est, ut illam divini luminis plenitudinem in inferiores effundant.

Deinde hic ordo in universo rerum statu à Deo præscriptus est, ut inferiora per superiora regantur, & perficiantur; unde superiora corpora lucida illuminant inferiora; & in Ecclesia superiores dicuntur illuminare inferiores, juxta illud ad Ephesios 3. *Mihi omnium sanctorum minimo data est gratia illuminare omnes, &c.* Merito ergo, inquit sanctus Dionysius cap. 4. de cœlesti Hierarchia, *Statuit summus ille, ac super substantialis omnium ordo per singulas distinctiones primos, & medios, extremosque esse ordines, atque virtutes, ut scilicet inferiorum spirituum excellentiores, quique Præceptores, ac Duces sint: ubi nomen Ducis, ac Præceptoris evidenter causalitatem unius in alium per modum doctrinæ, & illuminationis ostendit.*

Denique: Quemadmodum licet Deus omnia per seipsum immediatè possit producere, non tamen ita vult, quatenus hanc producendi virtutem creaturis tribuit; ita pariter non vult omnes Creaturas intellectuales per seipsum, immediatè illuminare, sed aliquas aliarum beneficiò, ut illius illuminativæ virtutis participes fient: Unde Regius Vates Psalmo 65. *Illuminant tu mirabiliter à montibus æternis; Hoc est non solum animas nostras, sed etiam inferiores Angelos à superioribus, qui metaphoricè idcirco montes appellantur; quia sicut montes primos Solis radios excipiunt, & inferioribus mundi partibus demum illos communicant; Ita, supremi Angeli divinas illustrationes immediatè à Deo recipiunt: Ubi autem, inquit Dionysius cap. 3. Indultum sibi sacratissimum iubar assatim haurerint, hoc ipso postmodum absque invidia sequentibus fundunt.*

Verùm, inquit Guillelmus Parisiensis parte secunda secundæ partis de Universo c. 52. Hæc illuminatio Angelica ita accipienda est non per modum influentiarum corporalium, & na-

„ & naturalium : Illæ enim per neces-
 „ sitatem , & quandam servitutem ,
 „ fiunt , istæ verò per voluntatem , ac
 „ libertatem ; non enim est in potestate
 „ solaris lucis , ut minus luceat , quàm
 „ lucet , vel ut aliquem ex radiis suis
 „ retineat , sed quasi impetu , & vio-
 „ lentia divine largitatis toto posse
 „ luminositatis suæ lumen circumqua-
 „ que diffundit . Istæ verò luminosæ
 „ substantiæ , prout volunt , & quantum
 „ volunt lumina revelationum infun-
 „ dunt , similiter , & retinent ; & lu-
 „ minositatem suam habet unaquæque
 „ plenissimè in libera potestate sua .

SECUNDA PARS Sufficenter probata
 manet ex dictis in priori questione ,
 cum enim illuminatio sit loquutio , ut
 diximus in 2. Notabili , cumque loquu-
 tio fiat per productionem notitiæ a lo-
 quente in intellectum audientis , meri-
 to concludit Doctor num. 25. *Dico quòd*
Angelus superior , cui ubi secundum ,
communem cursum revelatur primò ali-
quid particulare , causat in inferiori con-
ceptum quandam de illo revelato , qui
dicitur auditio : Et hoc causare , quod est
quoddam speciale loqui , est illuminare .
 Vult itaque Doctor , quòd Angelus illu-
 minans efformet in illo , quem illumi-
 nat ipsummet conceptum formalem ,
 seu actum secundum , quo ille cogno-
 cit rem , de quo fit illuminatio ; itaut
 illuminatus non efficiat , sed recipiat
 tantum illam cognitionem rei , de qua
 illuminatur . Quæ hanc adversus par-
 tem possent objici jam soluta sunt in
 priori questione ; idcirco hic solum su-
 persunt solvendæ rationes , quæ contra
 primam partem possunt formari .

Obijciat 1. Loquutio , & illuminatio
 ieri debet per productionem notitiæ
 illius rei , de qua fit illuminatio , vel
 loquutio in intellectu Angeli illumina-
 ti , seu audientis : sed Angelus beatus
 non potest talem cognitionem , quam
 ipsemet habet de objecto sibi divinitus
 revelato , v. g. de futuritione Antichri-

sti , producere in intellectu alterius An-
 geli : Ergo nec ipsum illuminare : Pro-
 batur minor : Angelus , qui dicitur illu-
 minans , non habet aliam cognitionem
 de tali objecto , quàm quæ dicitur co-
 gnitio in Verbo : sed talem nequit com-
 municare alteri Angelo ; Tum quia illa
 est visio beatifica , quam unus beatus
 producere nequit in alio : Tum quia
 Doctor Subtilis expressè hic negat co-
 gnitionem in Verbo ab uno Angelo
 posse alteri tribui .

Nego minorem : Necnon , & minorem
 illius probationis , non enim omnis vi-
 sio rei in Verbo est visio beata , neque
 negat Doctor omnem visionem in Ver-
 bo posse communicari ab uno Angelo
 alteri . Potest enim aliquid videri in
 Verbo dupliciter , Priori modo quando
 per visionem beatam Verbi , non solum
 ipsum Verbum , seu Essentia divina vi-
 detur ; sed etiam videntur objecta se-
 cundaria aliqua , quæ in ipsa relucet :
 Posteriori verò aliquid videri potest in
 Verbo , quatenus per visionem distin-
 ctam à visione beata posset videri co-
 gnitio Verbi , quatenus nempe termi-
 nabatur ad aliquod objectum particu-
 lare extrinsecum , putà ad futuritionem
 Antichristi , quæ ut sic non videbatur
 per ipsam visionem beatam : Quando
 autem Angelus videt aliquid de novo
 in Verbo , non dicitur videre priori
 modo , sed tantum posteriori : unde
 prior cognitio communicari nequit al-
 teri Angelo , posterior verò sic .

Obijciat 2. Hierusalem cœlestis Apo-
 calypsis 24. dicitur , *Non egere Sol , ne-*
que Luna , hoc est lumine creato , quia
claritas Dei illuminabit eam : Ergo cum
 Angeli sint cives illius supernæ civita-
 tis à solo Deo dici debent illuminari .
 2. Solus Deus beatificat Angelos tam
 beatitudine essentiali , quàm accidenti-
 ali ; Illuminatio autem est quedam
 beatitudo accidentalis : Ergo solus Deus
 illam efficit in omnibus Angelis . 3. Il-
 luminatio fit proponendo objectum , &
 P 2 con-

confortando intellectum, quia talis illuminatio cognitionem gloriosam, confert ad quam natura non sufficit nisi à Deo robur, & vires accipiat: Sed solus Deus potest proponere supernaturale objectum, & confortare intellectum cujuslibet Angeli: Ergo solus potest immediatè Angelum illuminare.

Respondeo ad primum, verba illa Apocalypsis intelligenda esse de his, quæ spectant ad visionem beatam, & ipsius Deitatis manifestationem, quam solus Deus efficere potest, & conferre, non autem de illa illuminatione, quæ spectat ad quasdam veritates supernaturales, quas Deus uni Beatorum revelare potest scorsum ab alio; Unde distinguendum est consequentia: Angeli non illuminantur nisi à Deo, illa illuminatione, quæ est divinæ essentiae intuitiva, claraque manifestatio, concedo, quæ est declaratio cujusdam veritatis supernaturalis uni Angelo specialiter à Deo revelata, nego.

Ad secundum Distinguo majorem: Beatificare essentialiter tam effectivè, largiendo scilicet lumen beatificum, quo illustretur, elevetur, & confortetur intellectus creatus ad visionem beatificam eliciendam, quàm objectivè ipsam visionem terminando, spectat ad solum Deum, concedo: Beatificare, accidentaliter non quidem primariò, sed per modum cujusdam appendicis, manifestando nempe quamdam veritatem, quæ conferre potest aliquam perfectionem intellectui beatifico, ad solum Deum pertinet, nego: Nullum enim est inconveniens, quod superiores Angeli aliquo modo cooperentur ad actus pertinentes ad beatitudinem accidentalem inferiorum Angelorum; quippe cum homines viatores cooperare possint ad sanctificationem aliorum hominum, quæ præstantior est, quàm sit ipsa accidentalis beatitudo.

Ad tertium Nego majorem; siquidem ordinariè Angelus illuminatus in sen-

tentia Doctoris, merè passivè se habet ad excipiendam illuminationem, quæ tota producitur ab Angelo illuminante, aut saltem tantùm concurrit effectivè cum specie emissà ab Angelo illuminante ad percipiendam illam rem de qua fit illuminatio, & consequenter non alia in eo requiritur virtus, quàm quæ ipsi est ordinaria.

Obijciat 3. Nullus Angelus beatus tenebris offunditur: ergo nullus potest illuminari.

Distinguit antecedens Doctor, quantum ad carentiam cognitionis illius rei quæ spectat ad ejus beatitudinem, concedit: Quantum ad carentiam cognitionis alicujus alterius objecti, negat. Sicut enim non est inconveniens, quod Angeli beati sint in potentia ad aliquam cognitionem, quæ habeat rationem luminis, ita nec incongruum est, quod sint in potentia ad carentiam cognitionis alicujus, quæ vocari possit obscuritas, non positivè, sed negativè.

Obijciat denique. Si Angelus superior inferiorem illuminaret, cum majorem habeat lucem, ipsum à sua operatione præpediret, sicut lux Solis, quæ stellarum luce longè major est, earum effectum impedit, quo fit ut lucente Sole stellæ non fulgeant: ergo unus alterum illuminare nequit.

Nego antecedens; Ad cujus probationem dico Solis lumen stellarum lucem non extinguere, siquidem etiam in meridie stellæ videri possunt in profundis puteis; adeoque quamvis longè superior sit vis Angeli illuminantis, quàm illuminati, non propterea ille hujus lucem extinguit, nec operationem præpedit. Adde quod inquit Doctor numero 26. Non valeat paritas de lumine, sensibili respectu oculi ad lumen intelligibile respectu intellectus. Nam, ex Aristotele, tertio de anima textu 7. *Post excellentia intelligibilia, non minùs intelligimus alia, sed magis: Post verò excellentia sensibilia minùs sentimus alia* sen-

sensibilia, quia potentia, vel organum debilitatur.

CONCLUSIO SECUNDA.

Angeli non solum superior inferiori, sed etiam inferiori superiorem illuminare potest. Ita Doctor loco laudato numero 15. Dico, inquit, quod Deus de potentia sua absoluta posset aliquid revelare Angelo inferiori, quod non esset revelatum, vel notum superiori, & tunc ille inferior posset loqui aliquo modo superiori de hoc, quod superior ignoraret, & illa locutio esset aliquo modo illuminatio; Tamen non potest habere tantam efficaciam super intellectum superioris, sicut super intellectum inferioris, & ideo non posset iste necessarii facere superiorem audire, sicut & converso, quia si superior consideret aliquid in genere proprio, iste inferior non faceret ipsum audire simpliciter. Simpliciter autem superior potest facere inferiorem audire, & potest impedire intelligentiam ejus de aliquo intelligibili: De facto tamen verisimile est, quod Deus ordinatè distribuat suas illuminationes, sicut distribuit Angelos in ordinibus suis. Primum quidem superioribus, deinde inferioribus.

Quibus Doctor fatetur de via quidem ordinaria inferiores Angelos per superiores illuminari; posse tamen de via extraordinaria superiores ab inferioribus lumen accipere. Cum enim Deus suorum donorum sit liberrimus distributor, pro libito cuique Angelo potest revelare ea, quæ cæteris etiam sibi propinquissimis addita sunt, & velle ut rem declaratam ab inferiori, cæteri etiam superiores Angeli cognoscant: quemadmodum in Ecclesia militante, nedum quæ ventura sunt, sed etiam veritates altissimas sanctissimis viris licet idiotis, & plebeis interdum revelat, ut eas Ecclesiæ Prælati, & Doctoribus notas faciant.

ARTICULUS SECUNDUS.

De Voluntate Angelica.

VOLUNTATEM Angelis inesse, nullus Theologorum dubitat; quippe Scriptura sacra voluntatis operationes frequenter eis tribuit; putà cum dicuntur Dei ministri, qui faciunt voluntatem ejus, Psalm. 102. Quod certè dici nequit nisi de his, qui voluntatem habent, & voluntariè serviunt. Unde Apoc. 7. Unus Angelus ad alios tanquam voluntate libera donatos clamabat, Nolite nocere terræ, & mari &c. Id ipsum confirmat S. Petrus Epist. 1. cap. 1. Docens in eis esse desiderium, quod est voluntatis actus; In quem, inquit, desiderant Angeli prospicere; ubi autem sunt actus, potentiam pariter inesse necessum est. His adde quod cum Angeli sint naturæ intellectualis, haud dubium est eos potentia volitiva esse donatos; omni namque rei naturaliter sua inest inclinatio, seu appetitus ad bonum sibi proportionatum, in animalibus quidem appetitus sensitivus, & consequenter rationali debet etiam inesse suus appetitus rationalis, quem voluntatem dicimus. Et quidem valde inconveniens foret, longèque ab ordinata divinæ providentiæ constitutione alienum, quod naturæ intellectualis posset bonum, & pulchrum conveniens intellectu percipere, nec tamen illud amare, & in eo quiescere vel delectari, & gaudere posset, vel quod posset malum nosse, & pati, nec tamen illud fugere averfando valeret.

Certum itaque, & prorsus indubitatum est, Angelos habere facultatem appetitivam, qua bonum possint prosequi, & malum averfari, quemadmodum habent intellectivam, quæ verum à falso discernere queant.

Quoniam autem de voluntatis operibus, & dotibus supernaturalibus in sequenti disputatione nobis erit sermo, nem-

sempe de Angelorum meritis, & de meritis, hic solum suscipimus examinandum quinam sint, & quales Angelicæ voluntatis nativi characteres.

QUESTIO PRIMA.

An Angelica voluntas reverà sit libera, & mutabilis.

Notandum primò cum nostro Alensi ex S. Bernardo lib. de libero arbitrio; quòd triplex est libertas. Prima est libertas à Coactione, sive à necessitate, secunda est libertas à Peccato, de qua scriptura ait: *Ubi spiritus Domini ibi libertas, si filius vos liberavit, verè liberi eritis.* Tertia est libertas à Miseria, de qua, ipsa creatura liberabitur à servitute corruptionis in libertatem gloriæ filiorum Dei. Dicimus ergo, quòd secunda libertas, & tertia non æquè sunt in homine, & in Angelo, sed maxima est in Angelo bono, minor in homine bono, minima in homine malo, nulla in Dæmone. Sed prima libertas, quæ est à coactione, est æquè in homine, & Angelo tam bono, quàm malo; Unde Bernard. *Libertas à necessitate, nec peccato, nec miseria amittitur, nec per oppositum augetur, nec plenior est in homine, quàm in Angelo.* Et subjungit: *Hac prerogativa Conditor rationalium creaturam insignivit, ut sicut sui juris, suæque voluntatis, non coactionis erat, quòd bonus est, ita & sui juris existeret, ut non nisi quæ vellet, bona, vel mala faceret.*

Notandum 2. Cum Doctore subtili quest. 16. quodlibetica, triplicem rursus distingui libertatem: Prima dicitur *libertas Contrarietatis*, seu specificationis, qua voluntas pro nutu potest in aliud objectum tendere, vel in aliud oppositum, & qua potest elicere actum amoris, vel odii. Secunda dicitur *libertas Contradictionis*, seu quoad exercitium, qua nimirum voluntas potest

actum elicere, vel non elicere, in objectum tendere, vel non tendere. Tertia denique est *libertas Essentialis*, qua voluntas cum ex intrinseca sua ratione, sit indifferens, & indeterminata, censetur semper ex se liberè actum suum elicere, & in objectum tendere, quamquam ab extrinseco moveatur, & determinetur.

Hanc autem libertatem essentialem colligit Doctor ex S. Augustino in Enchiridio cap. 105. ubi ait. *Oportebat prius hominem sic à Deo fieri, ut bene velle posset, & malè; postea verò, id est, in beatitudine, sic erit, ut malè velle, non possit, neque enim libero carebit arbitrio; multò quippe liberius erit arbitrium, quod omnino servare non poterit peccato: neque enim culpanda est voluntas, aut voluntas non est, qua beati esse sic volumus, ut esse miseri non solum nolumus, sed nequaquam prorsus velle possumus:* Quibus verbis S. Augustinus affirmat necessitatem non peccandi in Beatis stare cum eorum libertate. Non quidem cum libertate contrarietatis, aut contradictionis, qua voluntas potest aliquid appetere, vel non appetere contra voluntatem Dei, & consequenter, qua potest peccare; sed cum libertate essentiali, seu radicali, & entitativa ipsius voluntatis, quæ est facultas semper ex se entitativè, & intrinsecè, ac radicaliter remanens libera, etiam si interdum ab alio extrinseco ita necessitetur, & efficaciter alliciatur ad ejus amorem, ut nec ab eo amando possit cessare, nec oppositum amoris actum, nempe odium, circa illud objectum, elicere.

Notandum 3. Quòd etsi omnes Theologi conveniant Angelos esse libero arbitrio donatos, quo in bonum, vel malum tendere possint, atque in contraria, suapte conditione, mutabiles sint; eorum tamen sententiæ discrepant in explicando ejusdem liberi arbitrii usu: etenim S. Thomas prima parte quæstio-
ne

ne 64. ad 1. ejusque universa Schola, voluntatem Angeli ante electionem, ad utrumvis esse liberam existimat: post electionem verò immobiliter adhærere ad id, quod amplexata fuerit: atque hanc causam, cur Dæmones in suscepta pravitate mentem obfirmant, nec in melius vertantur, quod ipsum ex cogitationis, sive ut vocat apprehensionis illius cognitione fieri putat: *Differt enim (ait) apprehensio Angeli ab apprehensione hominis in hoc, quod Angelus apprehendit immobiliter per intellectum, sicut & nos immobiliter apprehendimus prima principia, quorum est intellectus: Homo verò per rationem apprehendit mobiliter discurrendo de uno ad aliud, habens viam procedendi ad utrumque oppositorum. Unde & voluntas hominis adheret alicui mobiliter, quasi potens etiam ab eo discedere, & contrariò adhaerere: Voluntas autem Angeli adheret fixè, & immobiliter, & ideo si consideretur ante adhesionem, potest liberè, & huic, & opposito, in his scilicet, quæ non naturaliter vult: Sed postquam jam adhefit, immobiliter adheret. Et ideo consuevit dici: quod liberum arbitrium hominis flexibile est ad oppositum, & ante electionem, & post; liberum autem arbitrium Angeli est flexibile ad utrumque oppositum ante electionem, sed non post, sic igitur, & boni Angeli semper adherentes justitiæ sunt in illa confirmati, mali verò percalescentes in peccato oblinati.* Hæc S. Thomas, quæ quidem improbat Doctor subtilis, & cum ipso communiter Theologi docentes voluntatem Angelicam non esse ex seipsa immutabilem, sed posse actum semel electum non ponere, vel positum retractare, ut patebit conclusione secunda.

CONCLUSIO PRIMA.

Angeli reverà libero arbitrio donati sunt. Hæc est de fide, siquidem Scriptura sacra pluribi affirmat Angelos esse capaces præcepti, & peccati propter quod pœnam merentur: nec

non susceptivos esse sanctitatis, & justitiæ, & meriti apud Deum, quæ omnia liberum arbitrium supponunt, & denotant, ut constat tum ex dictis in morali Philosophia, tum ex dicendis in tractatu de gratia.

Hoc ipsum aperte edocent sancti Patres, qui Angelos esse mutabiles probant 1. ex eorum potentia ad peccandum: Sic S. Basilius libro de sancto Spiritu cap. 16. Ubi de sanctis Angelis ait. *Habentes in eligendo liberum arbitrium, nunquam ab eo, qui verè bonus est, consortio excident; & de Malis ait, Quorum defectio comprobatur, quod dicimus virtutes invisibiles esse sui arbitrii: Quasi diceret, de merito, & demerito Angelorum, liberum eorum arbitrium legitime concludi.*

Alia ratione non minus efficaci utitur S. Gregorius Nyssenus libro de oratione Dominica ubi demonstrat, de virtute consultandi in intellectu, sequi potestatem eligendi in voluntate, & ideo communem esse Angelo, & homini libertatem, eo ipso quod in intellectu, seu ratione conveniunt. Boni, inquit, & boni studium æqualiter utriusque naturæ essentia simul insitum, & attributum est. Plenamque item, ac summam in se ipsa potestatem, & ab omni necessitate liberam voluntatem in utroque parem; eorum universarum Præfati effecit, ut animi libero quodam arbitrio, atque proposito regatur, quidquid ratione pariter, ac mente honoratum est. Subscribit S. Augustinus libro 22. de Civitate cap. 1. Ubi cum dixisset Deum in mundo nihil melius creasse, quam spirituales naturas, cui intelligentiam dedit: subdit, *Qui liberum arbitrium eidem intellectu naturæ tribuit tale, ut si vellet deferere Deum, continuò miseria esset secutura.*

Idipsum probant pariter cæteri quique Patres, qui unanimi calculo Angelos libertate donatos affirmant, eorumque liberum arbitrium colligunt ex spi-

spirituali ipsorum natura. Unde merito S. Damascenus libro secundò cap. 3. Angelum definit dicens, *Est Angelus natura sua intelligens, arbitrii libertate præditus, ac sententia ratione immutabilis* &c. Et rationem subdit, *Quoniam*, inquit, *id omne quod ratione utitur, libertate quoque præditum est.* Quæ sanè ratio valida est: Libertas enim arbitrii sequitur intelligentiam seu rationem: sed Angeli habent perfectam rationem seu intelligentiam: ergo, & libertatem. Minor constat ex dictis: Major verò probatur inductione; etenim suprema intellectualis natura, nempe Divina, eo ipso quòd intellectualis est, libera est; infima etiam rationalis natura, videlicet humana, libertate donatur ex eo quòd intelligentia, & ratione polleat: Ergo idem dicendum de natura intellectuali media, quæ est Angelica. *Tum quia* hæc eandem habet radicem libertatis, nempe naturam intellectualem. Tum quia capax est boni prosequendi, & mali averfandi, nec non meriti, & demeriti. *Tum denique quia* libertas spectat ad perfectionem naturæ intellectualis, alioqui Deo non inesset: Ergo natura intellectualis Deo vicinior, & propinquior, qualis est Angelica, illà maximè donari debet.

Dices, Si hoc argumentum quidquam urgeret, sequeretur Deum non posse aliquam creaturam intellectualem condere quæ libera non esset, & ad bonum aut malum indifferens: sed falsum consequens: Ergo, & antecedens. Majoris veritas apparet ex mox dictis: minor vero probatur, sicut enim Deus creavit voluntatem ita determinatam ad bonum amandum in communi, ut non possit illud odisse, ita creare posset voluntatem aliquam determinatam ad bonum in particulari, ut ad ejus amorem necessariò determinaretur, nec ab illo cessare posset: Ergo &c.

Nego minorem, Et ad ejus probatio-

nem dico; repugnare quòd voluntas ita determinetur ad bonum ex necessitate volendum semper, necessariò in particulari, & ab intrinseco; quæ omnia requiri videntur, ut facultas aliqua non dicatur libera. Fateor equidem quòd voluntas absque suæ libertatis præjudicio possit esse necessariò determinata ad aliquod objectum primum, & commune, libera tamen, & indifferens circa objecta secundaria, & particularia; qualiter voluntas divina determinatur ab essentia sua, quam invariabiliter, necessariò diligit; indifferenter verò fertur circa objecta secundaria, nempe circa creaturas odio vel amore liberè prosequendas, prout earum perfectiones, aut defectus morales divinum amorem aut odium promerentur. Potest etiam esse determinata circa objectum aliquod in communi, saltem quantum ad specificationem actus; qualiter voluntas creata determinatur in communi ad amandum bonum; ita ut illud sub ratione boni odisse nequeat. Denique etiam determinari potest ab extrinseco ad aliquod objectum particulare ita diligendum, ut ab ejus amore revocari non possit; qualiter Beatorum voluntas allicitur, & determinatur ad amandum Deum: sed hæc determinatio prorsus est extrinseca; subindeque non officit libertati voluntatis, quæ non obitante illa extrinseca determinatione non minùs liberè propendet in illud objectum. Idcirco repugnat voluntatem aliquam ita creari posse, ut sit ab intrinseco determinata circa objectum aliquod particulare necessariò amandum, siquidem voluntas secundum se est facultas indifferens, vel indifferentià contrarietatis, vel contradictionis, ut amplius declarabit.

CONCLUSIO SECUNDA.

Angelica voluntas non est immutabilis, nec ex se naturaliter ita determinata ad unum, ut semel electum non possit retrahere, & revocare. Hæc est Do-

Doctōris in 2. dist. 6. quæst. 2. n. 17. Ubi ait. *Dico quod quando peccavit Angelus secundo peccatō, adhuc fuit in via; & per consequens quando peccavit secundo peccatō potuit pœnitere de primo peccatō; & ita primum peccatum ex se non fuit irremediabile, quia si pœnitisset, invenisset veniam, & misericordiam &c.* Idem docet dist. 7. quæst. 20. & in 4. dist. 46. q. 4. num. 6. Contra Thomistas: Idque probatur 1. Authoritate S. Patrum, maxime S. Hieronymi Epistolâ 146. ad Damascenum. *Deus, inquit, solus est in quem peccatum non cadit, cetera enim sunt liberi arbitrii, juxta quod, & homo ad imaginem, & similitudinem Dei factus est, in utramque partem suam possunt sciltere voluntatem.* Subscribit S. Gregorius Nyssenus oratione 5. in orationem Dominicam, ubi loquens de utraque natura humana, & Angelica, parem arbitrii libertatem ambobus attribuit ut supra dictum est. Consentit etiam supra laudatus S. Damascenus, qui eam dixisset Angelos propōitō, & sententiâ mutabiles esse, idque ex se, & suapte sponte, rationem hanc profert: *Quippe, inquit, creatum omne etiam mutabile est: Solum autem id quod increatum est, mutare convertique non potest: Porro rationale omne potestate liberum est: quare in eo ipso quod rationalis est, & intelligens, liberi est arbitrii: Ut autem creata, mutabili potestatem habet manendi, & procedendi in bono, & in deterius prolabendi.* Tum statim adjicit, *Minime capax est pœnitentiæ, quoniam corporis experti: Nam homo propter corporis imbecillitatem pœnitentiam est consequutus. Quibus aperte edocet Angelos haud esse capaces pœnitentiæ, non quod digredi non valeant ab eo, quod semel elegerunt, ut vult S. Thomas, sed quia destituti sunt divina gratia, quæ ipsis nusquam est tribuenda, propterea quod cum corpore caruerint, excusationem imbecillitatis, ut homines, in peccati*
Tom. IV.

veniam prætexere non possunt, ob idque longè gravius quàm homines intolerabiliusque peccaverunt. Unde de bonis Angelis subdit, *Difficiliter in malum mobiles, sed non immobiles: Nunc verò, & immobiles non naturâ, sed gratiâ, & adhesionem ad id quod solum bonum est.*

Eandem electionis firmitatem, & stabilitatem in bonis, non nativæ obfirmationi, sed Dei beneficio tribuunt ceteri SS. Patres. Sic S. Augustinus librò 12. de civitate Dei cap. 1. *Casum, inquit, Angelorum voluntarium iustissimam pœnam sempiternæ infelicitatis obstrinxit: atque in eo summo permanentibus ceteris, ut de sua fine sine permutatione certi essent, tamquam præmium suæ permanentis, dedit.* Censet ergo S. Augustinus S. Angelos illam firmitatem in bono non habere ex natura sua. Idem sentit S. Prosper in libro primo de vita contemplativa cap. 3. *Voluntatis, inquit, sanctorum Angelorum fuit quoddam malis sponte cadentibus, ipsi in sua dignitate manserunt: Et divino iustoque judicio alium est, ut quæ, fuit cum Deo suo permanendi voluntas, fieret permanendi voluntaria, scilicetque necessitas.* Unde Gennadius cap. 62. de Ecclesiasticis dogmatibus. *Virtutes, inquit, Angelicæ, quæ in divino amore fixæ persisterunt, lapsi: superbientibus Angelis, hoc manere retributionis acceperunt, ut nulla jam rubigine surripientis culpæ ledantur.* Non ergo censent S. Patres Angelos beatos naturâ suâ esse immobiles, sed tantum divinò beneficio, Nam ut loquitur S. Isidorus, *Si naturâ incommutabiles essent, Diabolus non utique cecidisset.*

Hanc veritatem præ ceteris appertissimè docet S. Fulgentius librò de fide ad Petrum cap. 3. qui humanam libertatem cum Angelica conferens, ait: *Si possibile esset, ut humana natura postquam à Deo aversa bonitatem perdidit voluntatis, & seipsâ rursus eam habere potuisset, multò possibilis hoc natura*
Q. habet.

haberet Angelica: quæ quantò minus gravatur terreni corporis pondere, tantò magis hæc esset prædita facultate: Sed ostendit Deus unde bona voluntas hominibus detur, quam sic amiserunt Angeli cum haberent, ut amissam deinceps habere non possint. Subscribit Rupertus lib. 5. in cap. 5. Joannis; Nam, & Angelica natura inquit, malum potuit facere, & fecit, & facit: & humana natura, malum potuit facere, & fecit. Et quidem S. Angeli firmati sunt, quia malo quidquam à seipso faciente, id est, malum faciente, ipsi Deo principi suo adhaerere maluerunt, in hoc remunerationem acceperunt, ut deinceps malum facere non possint, quia cum possent facere, noluerunt. Verùm hoc non est per naturæ ipsorum potentiam, sed per divinæ voluntatis remunerationem gratiam.

Potest etiam suaderi veritas Conclusionis ex pugna illa inter se bonorum Angelorum, & conflictu qui ex sacris libris colligitur, ut legimus apud Danielem 10. cap. ubi juxta explicationem Pelusiotæ Epistolæ 85. Persarum Angelus agrè ferens, quod Judæi pessimis suis factis iram Dei, ac servitutem perpetuam mereri pergerent, eos à captivitate liberari volebat: Huic verò Angelus alter obstabat, qui justitiæ Dei bonitatem anteponebat, cuique favit Deus juxta ejus desiderium, sententiam ferens: cui sententiæ uterque Angelus assensum præbuit. Non igitur ad id quod intelligentia, & voluntate semel arripuerit, immobiliter Angelus adhærescit.

Probatur insuper ratione Theologica: Dum Angelus eligit aliquid verè est liber, & operatur liberè: quippe cum possit rem eligere vel non eligere: sed post factam electionem nihil est quod ipsum necessitet, ut non possit electionem factam revocare, & sententiam mutare: Ergo etiam post electionem verè est mutabilis. Major patet ex priori Conclusionem: Minorem probat

Suares lib. 3. cap. 10. & ex eo Martino: Si Angelus non posset propositum mutare, illa immutabilitas esset repetenda, vel ex parte Dei Angelum necessariò ad unum actum determinantis; vel ex propria Angeli natura, quæ propter suam dignitatem, & perfectionem fugi posset immutabilis in sua electione, sicut Deus propter suam naturæ præstantiam est omnino invariabilis: vel ex actu ipsius voluntatis, qui hanc invertibilitatem ex natura sua exigeret: vel ex habitu, aut alia dispositione addita voluntati, & ex actu relicta: vel denique ex parte intellectus, & modò intelligendi, quò voluntas erga unum objectum ita dirigeretur, ut ad aliud non posset determinari: sed ex neutro capite hæc immutabilitas repeti potest.

Non quidem primò ex parte Dei: Tum quia Deum non deceret necessitate voluntatem in actu malo: Tum etiam, quia loquimur hic de Angelo spectato naturaliter, ut Deo subest, veluti causæ primæ naturaliter operanti secundum exigentiam causarum secundarum; ac proinde non necessitatis, nisi sit aliquid quod id exigat ex parte causæ secundæ.

Neque etiam illa immutabilitas provenit ex natura ipsius voluntatis: Tum quia non est fingenda major mutabilitas voluntatis Angelicæ quàm judicii: atqui potest variari, & corrigi judicium Angelorum sicut, & falli: Tum etiam quia licet in voluntate, quæ non potest à bono deflectere, immutabilitas in proposito, & electione sit magna perfectio; non tamen ita in voluntate quæ deficere potest: Imò magna foret imperfectio non posse corrigi, & à malo desistere; quemadmodum intellectui erroris capaci, magna esset imperfectio non posse errorem deduceri, & abjicere: atqui voluntas Angelici peccare potest ut, & intellectus errare: Ergo esset ei imperfectio summa si suum actum, revocare non posset. Tum denique quia

quia talem Angelorum naturam, & perfectionem non agnoverunt sancti Patres.

Nec etiam ex parte alius voluntatis: Quippe cum hic nec liget, nec potentiam astringat, quoniam illum naturam præcedit, & ab illo non constituitur in actu primo, secundum quem tantum est potens aut impotens, sive ut primum actum producat, sive ut productum, conservet. Quod autem dicunt aliqui necessitatem immutabilitatis oriri ex impetu quo voluntas Angelica in suos actus erumpit: Vanum est: gratis enim supponunt Angelos summo quodam conatu semper operari. *Deinde*, licet toto conatu voluntas operetur, tota libera est, & potest actum non elicere, vel elicere oppositum: Potest item deponere postquam elicit: Quidni ergo mutare in oppositum, & quidem toto conatu, si sit opus. Sanè ex hac sententia Adversariorum sequeretur Angelum posse naturaliter reddere se impeccabilem in futurum; potest enim amare Deum toto conatu super omni actu naturali, itemque detestari toto conatu omne peccatum; ad id enim suppetit, & cognitio, & voluntas: Ergo si aliunde non possit mutare talem electionem, constitueret se impeccabilem.

Neque etiam ex parte habitus, & dispositionis ex actu relicta: Tum quia habitus, & dispositio præcedens actum electionis non necessitat ad electionem, sed in hoc subditur voluntati, sponimus enim Angelum liberè eligere non obstante quocumque habitu vel dispositione prævia: Ergo neque necessitare potest ad perseverandum in electione jam facta. Tum quia talis habitus vel dispositio non potest efficacius influere in conservationem actus quam in primam productionem. Tum etiam quia talis habitus, vel dispositio nunquam potest privare voluntatem sua naturali, & intima potestate suspendendi influxum suum, vel perseverandi

liberè in actu, quem liberè elicit: Potest ergo non obstante tali habitu vel dispositione, liberè cessare ab illo actu, & iterum eligere liberè; quidni ergo, si velit, ad contrariam electionem transire; Adde quod non videatur credibile in primo instanti gigni posse à quolibet actu tam intensum habitum in voluntate Angeli, ut cum nequeat superare, cum etiam inveteratos habitus homines superent, & evellant. Deinde habitus tantum inclinant potentiam ut facilè possit similes actus, non autem ut possit oppositos edere.

Non denique ex parte intellectus, & modi intelligendi: Tum quia Angeli mutare possunt iudicium, & jam amore indignum existimare id quod antea putaverunt esse amabile, atque re ipsa amaverunt. Insuper, Angeli naturaliter possunt falli, maxime quando iudicant ex conjecturis, & signis incertis, & obscuris, fallunturque non rarò Demonones circa tentationum exitus, & eventus liberè futuros, & circa mysteria, & dispensationes gratiæ: ergo ex parte iudicii seu modi intelligendi, non est ratio persistendi necessariò in electione prius facta, sed potius est ratio eam prudenter mutandi in contrarium. Tum quia, etiamsi idem omnino semper staret iudicium quod habuit quando liberè elegit, exinde tamen non sequeretur voluntatem non posse actum suum mutare; etenim sicut iudicium illud non prædeterminavit physicè voluntatem, sed illò positò, & stante voluntas liberè elegit id quod amplexata est, potuitque non eligere etiam in sensu composito, id est, componere non electionem cum tali iudicio: Ita non prædeterminat ad actum continuandum, sed voluntas omnino ex se manet libera ad continuandam electionem vel deponendam.

Denique Angeli de facto mutarunt voluntatem, mali videlicet, qui cum cæteris aliquo tempore fuerunt boni, &

Deum amarunt. Immo quotidie tam boni, quam mali Angeli mutant suas voluntates: Hi dum desistunt tentare, videntes tentationes potius prodesse, quam obesse: Isti dum tandem desierunt, quos à vitiis frustra avocare studuerunt.

Obijcies primò, intellectus Angeli immobiliter adhæret eis, quæ intelligit, & judicat: Ergo voluntas similem habet immutabilitatem in suis electionibus: Patet antecedens, Angelus enim apprehendit conclusiones in principiis, unde judicat de rebus cognitis, quemadmodum homo de primis principiis: sicut ergo homo primis principiis immobiliter adhæret; ita etiam Angelus adhæret omnibus, quæ apprehendit, & judicat: Consequentia etiam est evidens, voluntas enim sequitur intellectum, & modum illius operationis imitatur.

Respondeo primò negando antecedens: Falsum est enim Angelum invariabiliter adhære eis, quæ cognoscit. Falsum pariter ipsum cognoscere conclusiones in principiis, quippe virtutem habet discurrendi, & revcrà ejus cognitio discursiva est.

Respondeo 2. negando consequentiam: Sicut enim non obstante illa intellectus determinatione, voluntas in prima sua electione fuit libera, ita etiam facta illa electione remanet adhuc libera ad eam relinquendam, aut aliam eliciendam; quippe cum intellectus in utraque reperiat sufficientem rationem quâ possit appeti. Adde quòd voluntas sit intellectus Domina, eoque longè liberior; subindeque non obstante intellectus judicio, potest quod sibi placuerit eligere.

Obijcies secundò Adhæsiò ad finem ultimum, seu intentio illius consequendi, est principium omnium electionum: Sed Angelus immobiliter adhæret fini ultimo, quem sibi destinavit: Ergo etiam immobiliter adhæret omnibus aliis re-

bus quatenus ad illum finem ordinantur.

Distinguo minorem, immobiliter adhæret fini ultimo per determinationem extrinsecam, nempe dum finis ultimus ita efficaciter movet voluntatem per sui propositionem claram, & evidentem, qualiter Deus intuitivè videndus determinat beatas mentes ad sui intuitum, & amorem, concedo: per determinationem extrinsecam, quæ proveniat ex immobili electione voluntatis apprehendendis finem ultimum verum, vel apparentem, nego. Quamquam enim Beati immobiliter Deo adhæreant, & Dæmones obdurentur in illa voluntate, quâ divinam æqualitatem tanquam finem ultimum sibi proposuerunt, nihilominus hæc determinatio non provenit præcisè ab intrinseco, sed ab extrinseco, in Beatis quidem ab objecto clarè apprehenso, in Damnatis autem ex negata gratia, qua possint revocare sententiam, & penitentiam agere.

Dices 3. Quò voluntas est perfectior, & liberius eligit, eò vehementius, & majori affectu adhæret rei electæ; sed voluntas Angeli est perfectissima, & liberrimè eligit, quia non ducitur ex passione, sed ex se sola se determinat; ergo in eligendo ita afficitur circa rem electam, ut ab ea non possit amoveri.

Nego majorem: Non enim est necesse, quòd voluntas liberior majori affectu feratur circa objectum suum: imò quòd liberior est, eò magis poterit suum affectum moderari, & temperare. Adde quòd etiam si summo affectu feratur erga suum objectum, inde non sequitur, quòd invariabiliter in ipso affectu subsistere debeat; etenim pro eadem libertate poterit ab eo cessare, & præcipere intellectui, ut alia consideret, quibus ab illius objecti amore dimoveatur, & in aliud tendat.

Dices 4. Si Angeli essent vertibiles, & mutabiles, essent pariter capaces pen-

ni-

nitentiæ : sed falsum consequens ergo, & antecedens . Major constat , ille enim est capax pœnitentiæ, qui pravam voluntatem potest abjicere, & revocare : Minor etiam patet, si enim capaces essent pœnitentiæ, haud dubium est, quòd aliquando pœnitentiam egissent, aut saltem eorum aliquis resipuisset .

Nego majorem, Defectus enim pœnitentiæ in Angelis non provenit ex eorum voluntatis immutabilitate, sed ex negato sibi divinitus auxilio supernaturali absolute necessario ad veram pœnitentiam agendam, & ex eò, quòd sint in termino ; si enim in statu viæ, & ante indictam eorum æternæ damnationis sententiam, gratiam pœnitentiæ ipsis concessisset Deus, reverà pœnitere potuissent, & veniam impetrare : Quoniam autem sunt in termino, nec ullo divino ad pœnitendum auxilio donantur, ideo pœnitere non possunt .

Dices 5. Angelus est subtilissimus in natura, necnon est vehementissimus in operando, subindeque ejus voluntas totaliter se immergit objecto, quod elegit, & cui adhæret, & ab eo non potest revocari : Ergo post primum actum est immutabilis .

Nego consequentiam : Quantumcumque enim Angelica voluntas in via existens objectum appeteret, & quantumcumque conatu in illud tenderet, posset tamen pro libito illud abjicere, ut supra diximus .

Dices 6. Electionis mutatio provenit vel ex eò quòd eligens aliter disponitur, vel quia rem aliter apprehendit post electionem, quàm antea : sed neutrum habet locum in Angelis : Non primum, quia non habent passionem, nec ab extrinseco suam internam dispositionem accipiunt : Non etiam secundum, quia Angelus habet perfectissimum lumen, adeoque primò apprehendit id omne, quod cognoscibile est, maxime circa intentionem, & electionem ultimi finis ; cum enim ea res sum-

mi sit ponderis, & momenti, verisimile est, quòd Angelus omnem suam intellectivam virtutem impendat in hac cognitione formanda .

Nego minorem : Quamquam enim Angelus perfectissimè illustraretur, nihilominus potest errare, uti de facto erravit apprehendendo equalitatem cum Deo sibi esse possibilem, & illam appetendo : Electio enim mali semper præsupponit errorem, vel saltem inconsiderationem ex parte intellectus, maxime quando non peccatur ex certa, & determinata malitia ; adeoque potest non esse plena apprehensio ex parte intellectus ubi est error, vel inconsideratio . Itaque dici potest, quòd Angeli mali habuerint ista duo judicia simul : Primum, quòd bonum esset Deo subjici, & ipsi obtemperare ; Secundum, quòd propria excellentia esset bonum appetibile : Unde factum est, quòd etiam stante priori judicio, nihilominus moti sunt ad sequendum posterius, videlicet ad eligendam propriam excellentiam : & sic non obstante cognitione medii, & finis debiti, potuerunt alium sibi finem, nempe propriam suam excellentiam appetere .

Instabis : Quòd præstantius est lumen intellectus, eò tenaciùs voluntas objecto adhæret : sed Angelici intellectus lumen fuit præstantissimum : Ergo illorum voluntas ita firmiter adhæsit objecto electo, ut nullatenus ab eo potuerit removeri . Minor constat : Probatur major experientia qua patet, eos qui habent miùs perfectum intellectum, putà pueros, & mulieres, etiam facilè a propria sententia dimoveri .

Respondet ad majorem : Quòd licet adhærio voluntatis sequatur illustrationem intellectus, & eò firmius voluntas objecto electo adhærat, quò majus in eo bonum deprehendit ; tamen inde non sequitur, quòd ipsum non possit abjicere pro sua libertate . Ad minorem autem dico, inde quidem sequi

qui, quod Angeli non tanta facilitate quanta homines propositum, & electionem n. utare possint; Non tamen sequitur, quod absolute non possint utrumque revocare, propter rationes à nobis expressas.

CONCLUSIO TERTIA.

Voluntas Angelica est etiam libera libertate contradictionis, & quantum ad exercitium: Hæc pariter est Doctoris, & probatur. Nihil assignari potest quo necessarius Angelica voluntas determinetur ad persistendum semper sub actu: Ergo revera potest ab actu cessare. Patet antecedens ex superiori conclusione, si enim ab aliquo posset necessitari ad persistendum sub actu suo, maximè, vel ex parte Dei, vel ex nativa sua dignitate, vel ex actu suo, vel ex parte intellectus illam necessarius semper ad actum determinantis, vel ex aliquo alio principio: sed neutrum horum potest affirmari, ut supra probatum est: Ergo, &c.

Deinde ad libertatem, quoad exercitium sufficit potestas suspendendi actum per puram privationem, seu negationem influxus; ita ut non sit necessarium velle non elicere actum, sed satis sit, non velle elicere, seu non elicere ex certa scientia, & potestate, ac dominio supra suum actum, seu influxum: Sed voluntas est domina absolute sui influxus: Ergo non necessitatur quoad exercitium etiam ad totam collectionem actuum sibi possibilem.

Denique, Sicut nullus actus voluntatis Angelicæ in particulari est absolute necessarius, sed ad quemlibet elicendum voluntas sese liberè determinavit; ita pariter cessare potest à quolibet in particulari elicendo, adeoque, & ab omni actu cessare; quia eadem est ratio libertatis in tota actu collectione, quæ in singulis actibus reperitur: Ergo quemadmodum nullus actus particularis est necessarius Angelo ad bonum suum, ita etiam nec unus, vel

alius, & sic de aliis disjunctim sumptis.

Dices: Si esset aliquis actus volendi in particulari, in quo nulla ratio mali inveniretur, nec in ejus carentia ratio boni apprehendi posset, non posset voluntas à tali actu cessare, sed esset in particulari necessarius quoad exercitium; hæc enim ratione amor Dei in patria est necessarius quoad exercitium: sed in carentia omnis actus voluntatis nulla ratio boni cogitari potest, nec in actuali exercitio alicujus velle indefinitè sumpti potest inveniri aliqua ratio mali, quia in tota latitudine actuum non possunt non esse multi convenientes: at verò melius est actu operari, quàm ab operatione cessare; imò illud est de se bonum, & perfectum; non operari autem simpliciter est imperfectum: Ergo non potest voluntas talem cessationem formaliter, aut virtualiter velle, ac proinde ad velle aliquid, saltem indefinitè necessitatur.

Nego minorem, In carentia enim illa voluntaria omnis actus deprehenditur summa voluntatis libertas, quæ pro libito potest agere, vel non agere, sicque suprema fit domina suorum actuum, quos potest ad nutum ponere, vel non ponere, quod sanè maximam arguit perfectionem, summumque bonum, connotat, ut patebit ampliùs in Conclusionem tertia sequentis Questionis.

QUESTIO SECUNDA.

An, & qualiter Angelus Deum scipsum, & alia diligit?

NOTANDUM I. Duplicem impræsentiarum distingui posse amorem, Naturalem videlicet, & Supernaturalem; prior ita dicitur ad quem elicendum sufficit ipsa naturalis facultas, prævio solo lumine intellectus eam illustrante, & ad objectum amabile determi-

minante, ei aperiendo ac manifestando eas omnes perfectiones, quæ in tali objecto relucet: quæque tot sunt amoris stimuli, & incentiva: Posterior dicitur ille, quem voluntas elicere nequit absque beneficio, & auxilio gratiæ supernaturalis: De priori hic nobis est sermo, de posteriori verò discurramus in sequenti Disputatione.

Notandum 1. Ex nostro Alensi qu. 30.
 ,, dilectionem naturalem posse accipi
 ,, multipliciter; Aut enim, inquit, dicitur dilectio naturalis quidquid per se juvat naturam ut esset, vel juvat, ut permaneat, & hac ratione diligitur tantum Deus dilectione naturali ab Angelo: Nihil enim aliud est necessarium ad esse Angeli, præter illud quod est de esse; Non enim indiget unus alio ut sit, vel ut permaneat in esse: *Secundo modo*, Potest dilectio naturalis respicere omne conveniens naturæ, sive consimile, vel conforme in natura, & hoc modo est dilectio naturalis, non tantum Creatoris, vel Gubernatoris, sed etiam alterius Angeli, qui est simul in natura Angelica, vel etiam hominis, qui est consimilis in natura intellectuali creata: *Tertio modo* potest dici dilectio naturalis respectu illius boni, quod ordinatum est ad participandum completum dilectibile, quod est gloria, & secundum hunc modum, charitas, sive gratia est perfectio naturæ; Sic secundum hunc modum est diligibile ab Angelo, non tantum anima hominis, sed etiam corpus humanum, quod potest participare dotes: unde anima in secunda sola perficitur, & Angelus ex hoc quandam consequitur dilectionem. *Quarto modo*, Dilectio naturalis dicitur respectu omnis boni, in quantum est bonum, & sic extendit se ad omnem creaturam, & ad Creatorem.

Notandum 2. Ex Seraphico Doctore

„ in 2. diff. 3. art. 3. quæst. 2. Quod magis
 „ alicujus dilectio possit fieri tripliciter: aut ratione boni optati, aut ratione effectus intensi, aut ratione effectus impensis: *Ratione boni optati*, dicitur quis aliquem magis diligere, quando ei majus bonum optat, & sic dicitur diligere magis, quia ad majus.

„ Hoc modo naturali dilectione,
 „ procedente ex judicio rationis rectæ magis diligebat Angelus Angelum, superiorem, volebat enim ipsum excellere, & plus boni habere, sicut & Deus conditor voluit sic ordinare. *Ratione effectus intensi* dicitur magis alterum diligere, quando affectio ejus plus trahit alterum, & magis consolatur de ejus societate, & sic dicitur aliquis magis illum diligere, cum quo libentius cohabitatur: & sic Angelus magis diligebat per naturam Angelum ejusdem ordinis, quia sicut naturali affectu magis diligit quis concives suos, maxime quando conformantur sibi in moribus; & sicut magis diligit homo eum, qui est ejusdem professionis, & officii, ubi Invidia non interponit partes suas: Sic Angelus alterum Angelum ejusdem ordinis, magis dilectione naturali amplecti intelligendum est, cum se viderit à Conditoris in officii æqualitate, & naturæ similitudine illi sociatum, nec esset tunc morum diveritas; nec invidiæ malignitas. *Ratione effectus, sive beneficii impensis* dicitur quis magis eum diligere, cui plura bona impendit, & circa quem magis sollicitatur, sicut Magister confomet magis filium tenellum, & sollicitior est circa illum, quam circa adultum, & magis circa infirmum, quam circa sanum, & hoc facit consideratione majoris indigentiae, & hoc modo dici potest, quod Angelus superioris ordinis magis diligit Angelum inferioris, quia Angelus parvus vel

„ vel superioris ordinis non indiget ,
 „ sive sua instructione , sive purgatio-
 „ ne , sicut Angelus inferioris ordinis .
 „ His itaque prælibatis determinan-
 dum est , 1. An sit in Angelis aliqua
 naturalis dilectio : 2. An hac dilectione ,
 dum erant viatores , Deum super omnia
 diligere potuerint . 3. Qualiter tam se ,
 quam alios Angelos diligant .

CONCLUSIO PRIMA.

Reverà est in Angelis naturalis dile-
 ctio , quatenus naturalis amor op-
 ponitur supernaturali ; Non verò quate-
 nus opponitur libero . Hæc Conclusio
 duas habet partes , quarum prima est
 communis inter Theologos , & proba-
 tur : Quod rebus inferioribus absque
 ulla imperfectione tribuitur , Angelis
 non est denegandum , sed dilectio , &
 amor naturalis absque ulla imperfec-
 tione tribuitur formaliter hominibus :
 Ergo etiam Angelis non videtur dene-
 gandus . Deinde , quælibet res natura-
 liter diligit se , & suam propriam perfe-
 ctionem appetit , naturaliterque ad il-
 lam inclinatur : nullum enim est eus
 tam imperfectum , quod naturaliter
 propriam suam perfectionem non appet-
 tat : Ergo multò magis Angeli natura-
 liter appetunt suam beatitudinem , ad
 quam tanquam ad ultimam perfectio-
 nem ordinantur : sed hic appetitus di-
 citur amor naturalis : Ergo &c. Denique ,
 Dæmones habent naturalem sui dile-
 ctionem : Ergo & Angeli : Antecedens
 patet , nam Dæmones naturaliter fu-
 giunt suam miseriam : Ergo naturaliter
 diligunt se . Patet sequela ; Nam ideo
 odio habeo aliquem , quia diligo me ,
 vel alium ; Ergo si Dæmones naturali-
 ter fugiunt miseriam , quam habent ,
 etiam naturaliter diligunt se . Adde ,
 quod Dæmones naturaliter appetunt
 suam felicitatem , & beatitudinem in
 communi : Ergo naturaliter appetunt ,
 & diligunt se . Antecedens patet , nam
 beatitudo in communi non potest odio
 haberi .

Hæc autem Angelica naturalis dile-
 ctio , intelligenda est etiam quantum
 ad actum elicutum ; etenim in Angelis
 est amor sequens rationem , & formam
 apprehensam ; Ergo in Angelis est actus
 elicitus amoris . Probatur antecedens :
 Angelus habet naturalem cognitionem
 sui : Ergo & naturalem dilectionem sui .

Dicitur 1. Si in Angelis esset aliqua na-
 turalis dilectio , deberet esse vel recta , &
 perfecta ; vel inordinata , & imperfecta :
 sed neutrum dici potest : Non primum ;
 omnis enim recta , & perfecta dilectio ,
 est charitas , adeoque quid supernatur-
 ale ; Non etiam secundum , siquidem
 imperfecta dilectio , & inordinata , pec-
 catum est , Angelus autem ut in statu
 naturæ puræ non peccat .

Respondeo ad majorem , Quod cum
 amor naturalis nihil aliud sit , quam in-
 clinatio indita ab Authore naturæ , ne-
 cessariò dici debet recta ; alias summa
 Creatori fieret injuria , si quis eum pra-
 vam inclinationem indidisse assereret .
 Attamen cum duplex sit rectitudo ,
 nempe rectitudo naturalis inclinationis ,
 & supernaturalis virtutis ; Hæcque
 sit perfectiva alterius ; inde dici potest ,
 quod rectitudo naturalis non sit omni-
 modè perfecta , quamdiu intra limites
 suos stat , siquidem perfectior evadit ,
 dum charitati conjungitur : Est tamen
 recta , & perfecta intra ordinem natu-
 ræ ; quippe conformis est naturæ prin-
 cipiis , quibus res quælibet , quæ sibi
 convenientia sunt , appetunt .

Respondeo ad minorem . Illam dile-
 ctionem esse reverà naturalem , tam-
 prout naturale sonat inclinationem , &
 propensionem ad aliquid sui perfecti-
 vum , quam prout opponitur rei super-
 naturali : siquidem hac dilectione An-
 gelus non solum voluntatis suæ perfe-
 ctionem obtinet , potentia namque per-
 ficiuntur ab actibus ; sed etiam in eam
 fertur ex propria sua nativâ inclinatio-
 ne qua res quælibet in id , quod sibi
 conveniens est propendit . Nec refert ,
 quod

quòd hanc propensionem habuerit sibi inditam ab Authore naturæ, non minus enim per eam dicitur moveri ab intrinseco, nempe ab interno appetitu voluntatis. Similiter hæc tendentia dicitur libera, potest enim Angelus tam erga se, quam erga alia objecta amorem suum suspendere, ut probabitur in tertia Conclusionem.

Dicitur 2. Si quæ esset in Angelis naturalis dilectio, esset media inter dilectionem gratuitam, quæ est charitas, & peccaminosam, quam libidinofam Aalenfis appellat: At hoc dici nequit, medium enim inter bonum, & malum debet esse indifferens; Dilectio autem naturalis non est indifferens bono, & malo, sed revera est reponenda in genere boni. Ergo &c.

Respondet Ipsemet Aalenfis, quòd etsi illa dilectio naturalis media sit inter gratuitam, & vitiosam, non tamen est media inter bonum, & malum simpliciter, sed tantum inter bonum quod dicitur supernaturale, & malum supernaturali bono oppositum: Quamquam enim partim conveniat cum utroque extremo, cum dilectione quidem gratuita, quia diligit summum bonum; cum vitiosa autem, quia diligit illud propter seipsam, non autem propter ipsummet; nihilominus magis convenit cum dilectione gratuita, quam cum vitiosa, quia fertur circa summum bonum, nempe circa Deum, licet ita feratur propter bonum ipsius diligentis.

Probatur secunda pars: Nempe quòd dilectio Angelica non sit naturalis, quatenus naturale opponitur libero: Quod est enim naturale libero oppositum, est ex se necessario determinatum ad unum: Sed Angelica voluntas dici nequit ita esse determinata ad dilectionem: Ergo nec habere dilectionem naturalem libertati oppositam. Major constat ex communi Philosophorum sententia, qui in hoc naturale à libero distinguunt, quòd illud ex principiis

Tom. IV.

suis intrinsecis ad unum determinetur, sic ignis ad comburendum, grave ad motum deorsum, & leve ad sursum. Minor probatur: Si Angelica voluntas ex se determinata esset necessario ad amandum aliquod objectum, maxime vel Deum, vel ipsummet Angelum: Sed neutrum ita necessario diligit; quamquam enim fortè necessario feratur ad seipsum diligendum quoad perfectionem, ita quod non possit seipsum odisse, nihilominus non ita determinatur quantum ad exercitium; Siquidem, ut in tertia Conclusionem probabitur, potest cessare ab omni actu dilectionis erga seipsum. Idem dici potest de dilectione erga Deum, imò multo minus determinatur ad amorem Dei, quam ad amorem sui ipsius, non enim seipsum odio habere potest, potest verò odisse Deum, nam de Dæmonibus ait Regius Pfalter, *Superbia eorum qui se oderunt ascendit semper*. Adde quod unus Angelus potest occupari in amore alterius amore amicitie, quem habet ad illum, nec non & concupiscentie ad bona, quæ ipsi dilecto Angelo exoptat, per illum autem actum dilectionis, Angelus amans nec sese, nec Deum diligit, quippe neutri bonum per se exoptat: Ergo non necessario seipsum, & Deum semper diligit. Hæc veritas patebit evidentiùs in Conclusionem tertia.

CONCLUSIO SECUNDA.

Angelus naturaliter Deum diligere, potest plusquam se, & super omnia. Ita Doctor in 3. diff. 27. num. 13. Probaturque hæc Conclusionem *Primò*: Ratio naturalis ostendit naturæ intellectuali esse aliquid summè diligibile, quia in omnibus actibus, & objectis essentialiter subordinatis, est aliquid supremum, & ita aliqua dilectio suprema, & ita supremum objectum sic diligibile: sed ratio naturalis dictare debet, quòd illud summè diligibile sit summum bonum, nempe Deus, aliàs sequeretur quòd Charitas inclinaret ad summè diligendum

R.

il-

illud quod à ratione naturali dictaretur non esse summè diligendum, & sic Charitas non esset virtus, quippe cum non esset conformis rectæ rationi: Ergo ratio naturalis dictat Deum esse summè diligendum. Sed voluntas potest naturaliter diligere id omne objectum, quod per rationem naturalem proponitur summè diligibile, nihil enim potest intellectus rectè dictare, in quod dictatum non possit voluntas naturaliter tendere; alioqui voluntas esset naturaliter mala; vel saltem non esset libera ad tendendum in quodlibet secundum illam rationem boni secundum quam sibi ostenditur ab intellectu. Quod maximè, inquit Doctor, arguitur de Angelis, quia in statu innocentie non fuerunt non recti, quippe tunc non potuerunt habere actum non rectum: Potuerunt autem habere aliquem actum elicitem; & supponendum est, quod eum habuerunt, quòdque ille actus fuerit rectus: Non potuit autem actus ille esse rectus, si illo ipso dilexissent se Angeli super omnia, non autem Deum: Ergo &c.

Deinde Amor naturalis Dei super omnia, est possibilis, nec enim repugnat illius productio, aut ex terminis, nempe quod sit amor Dei super omnia, & quod sit naturalis, aut ex aliqua ratione à priori, vel à posteriori: Sed omnem dilectionem possibilem naturaliter potest Angelus elicere, nisi aliquid adsit impedimentum ex parte voluntatis, quod certè nullum est: Si enim esset aliquod impedimentum, quo voluntas non posset elicere talem amorem, maximè vel inclinatio, & propensio illius ad amanda alia objecta, vel amor actualis aliorum objectorum, neque enim aliud impedimentum ex parte voluntatis fingi potest: Sed neutrum dici potest. Non quidem primum; eatenus enim illa inclinatio præpediret amorem Dei, quatenus necessariò determinaret ad amorem actuale aliorum objectorum: sed ita non est, nulla siquidem

propensio voluntatis censetur eam necessariò determinare, quia non obstant qualibet inclinatione semper remanet libera. Non etiam secundum; quia amor actualis aliorum objectorum non necessariò conservatur, & consequenter mutari potest, & revocari, ipsique succedere amor Dei: Ergo nihil habet voluntas ex se quo removeri possit ad formandum amorem Dei naturaliter possibilem.

Denique, inquit Doctor, secundum philosophos vir fortis, quatenus est membrum Reipublicæ, sequendo dictamen rectæ rationis debet se morti exponere propter ipsam Rempublicam, tuendam, & consequenter deberet amare magis Rempublicam, quàm seipsum: sed eadem ratio multò magis dicit, quod quis debeat diligere Deum magis quàm se, & sese exponere propter amorem ipsius Dei. Plura namque debet vir fortis Deo, quàm Reipublicæ; siquidem tantum Reipublicæ obstringitur propterea quod sit ejus pars, & membrum; Deo autem se totum quantum ad productionem, & consuetudinem debet; Ergo si debeat magis diligere Rempublicam, quàm se, multò magis Deum.

Confirmatur 1. Quo magis aliquid est alterius, quàm sibi, eo amplius debet eum, quàm se diligere: sed creatura quæcumque, maximè Angelus, magis Dei est, quippe ab eo habet esse, operari, & bene esse, à se autem sine Deo nullum horum obtinet: Ergo magis Deum, quàm se-ipsam tenetur diligere.

Confirmatur 2. Quilibet Creatura in se includit intrinsecum ordinem, & dependentiam ad Deum, ut ad causam efficientem, & conservantem non solum sui ipsius, sed & totius Universi: Ergo naturali appetitu potius fertur in Deum, ut conservantem Universum, quàm in seipsam; Probatur sequela. Creatura quælibet habet se in ordine ad Deum,

Deum, ut conservantem Universum, tanquam pars ipsius Universi: sed pars quolibet appetitu naturali potius appetit esse totius, cuius est pars, quam suum esse proprium: Ergo quolibet Creatura potius appetit subsistentiam, & essentiam Dei, quam sui-ipsius; adeoque illa quæ est capax dilectionis, magis Deum, quam se naturaliter diligit. Minor patet, experientia qua constat hominem manum, vel membrum alterum exponere pro conservatione totius corporis: Expositio autem illa est motus naturalis, & non violentus: Ergo conveniens illi secundum naturalem inclinationem ejus: sed ita se habent Creaturæ respectu Dei conservantis totum Universum; Unde si per impossibile Deus exponi posset periculo non essendi, creaturæ se exponerent tali periculo non essendi, ut conservaretur Deus, eo quod sunt partes totius Universi quod subsistere nequit, nisi Deo subsistente, & Universum conservante: Ergo exinde sequitur quod creaturæ quolibet magis in Deum, quam in seipsas ferantur.

Confirmatur denique: Charitas, & gratia perficiunt naturam secundum rationem naturæ: sed charitas, & gratia inclinant ad amandum Deum super omnia; Ergo supponunt in homine, & Angelis naturalem inclinationem ad diligendum Deum plusquam se. *Insuper,* Præcepta juris naturalis fundantur in inclinatione naturali; ex ipsa enim natura, & dictamine rationis inclinamur ab observanda talia præcepta, puta præceptum de tuenda vita propria, quod fundatur in appetitu propriæ conservationis: sed præceptum de diligendo Deo super omnia est juris naturalis: Ergo fundatur in propensione, & inclinatione naturali, adeoque homo, & Angelus naturaliter inclinatur ad Deum diligendum.

Dices 1. Si Angeli naturalem haberent propensionem ad diligendum,

Deum plusquam se, eandem & nos haberemus propter paritatem rationis: sed consequens fallum edocet, ipsamet experientia, qua summam difficultatem patimur in subeunda morte pro Dei gloria: Ergo signum est naturam nos magis ad amorem nostri, quam ad amorem Dei inclinare.

Nego minorem, Et ad ejus probationem dico, duplicem in homine, & Angelo distingui posse inclinationem, unam quidem communem, & generalem quatenus creaturæ sunt, aliam autem specialem, & particularem quatenus sunt tales, & tales Creaturæ secundum se, & absolute spectatæ, puta homo consideratus quatenus est animal rationale secundum quod præcisè, & formaliter nullum dicit ordinem ad Deum, sed tantum inclinationem naturalem, & tendentiam, ad propriam suam perfectionem. Priori modo magis propendet ad Deum, quam ad seipsum diligendum, cum enim Creatura quolibet magis Deo sit, quam sibi, quippe totum suum esse à Deo, ac per Deum habet, inde etiam ut sic magis in Deum, quam ad seipsum inclinatur, & hac ratione magis homo inclinaretur ad obeundam mortem pro Deo, quam ad vitam servandam. Quoniam autem Angelus, & homo secundum se spectati suam naturalem inclinationem, & perfectionem appetunt, inde inclinatur ad seipsos servandos magis, quam ad sui interitum.

Hinc homo sentit difficultatem in obeunda morte propter Deum, quæ difficultas non provenit ex majori amore sui-ipsius, quam Dei, sed ex eo quod naturaliter diligit propriam vitam, quam cum non posset servare unà cum amore Dei, inde difficultatem in ejus amissione, patitur. Sicut v. g. qui pro vita tuenda ingruente tempestate merces projicit in mare, difficultatem in hac projectione patitur; nihilominus magis estimat propriam vitam, eamque

R 2

plus

plus diligit, quàm merces deperditas. Idem dicendum de illo, qui propter totius corporis incolumitatem patitur sibi membrum aliquod putridum abscindi, licet enim hanc abscissionem ægrè ferat, magis tamen totum corpus, quàm istam partem censetur diligere. Ita contingit in proposito; dum enim quis in obeundo Martyrio naturalem repugnantiam patitur. Hæc repugnantia non est indicium majoris amoris erga se, quàm erga Deum, imò contrarium inferitur, quia scilicet non obstante hac repugnantia, se libenter morti objicit.

Dices 2. Si Deum super omnia diligere naturaliter, sequeretur, quòd nobis inesset nativa inclinatio ad bonum: sed consequens est contra illud Genesim 8. *Sensus hominis, & cognitio humani cordis prona sunt ad malum ab adolescentia sua*: Ergo &c.

Nego majorem, & ad textum Scripturæ respondeo, eum intelligi de appetitu naturæ per peccatum vitiatæ, non verò de appetitu naturæ integræ, cum enim appetitus ille à Deo auctore naturæ fuerit inditus, necessariò debuit esse rectus, & ad bonum proclivis.

Dices 3. Homo naturaliter inclinatur in bonum proprium: Ergo non in bonum ipsius Dei, maxime quando bonum Dei est oppositum bono proprio, Sequela patet, implicat enim inclinationem naturalem ferri in duo opposita, & consequenter si quis inclinatur ad suum esse naturaliter, averfabitur suum non esse, subindeque illud omne quod suum non esse consequitur.

Distinguo sequelam: Magis inclinatur in bonum proprium, quàm in bonum ipsius Dei, absolutè, & simpliciter, nego: secundum quid, concedo: Hoc est, quatenus Creatura est habens existentiam ab ipso Deo mutuo acceptam, magis in Deum cui totam se debet, quàm in seipsam dilectione, & inclinatione fertur; magis verò fertur erga seipsam secundum illam propensionem,

quam habet res quælibet ad sui conservationem, ita quod reverà vellet suam vitam servare, si non deesset occasio mortis pro Deo subeunda, quæ tamen cum adsit, magis fertur in illam mortem obeundam secundum etià inclinationem naturæ, quàm in vitam servandam.

Ne autem hic fiat allucinatio, advertite Doctorem, & nos cum eo hic agere tantum de potentia physica, & inclinatione naturali naturæ institutæ, seu nullo vitio deturpatæ, & debilitatæ, qualis erat natura Angelica in statu viæ ut ipsemet loquitur Doctor num. 15. ita scribens; *Concedo conclusionem, quòd ex puris naturalibus potest quæcumque voluntas, saltem in flatu naturæ institutæ, diligere Deum super omnia, videlicet quantum ad inclinationem, & potentiam physicam naturæ integræ*. Etenim pro hoc statu naturæ per peccatum originale vitiatæ, & infirmantis, annuo libenter nos non posse absque speciali auxilio gratiæ elicere actum perfectum amoris Dei super omnia. Si enim auxilium supernaturale desideretur ad alios actus virtutum moralium, multò magis desideratur ad amorem Dei super omnia diligendi, maxime cum hujusmodi amor sit impossibilis cum affectu peccandi, & includat voluntatem efficacem etiam subeundi martyrii pro tuenda Dei gloria, ejusque voluntate implenda, ut fufius patebit in tractatu de Gratia.

CONCLUSIO TERTIA.

Angeli necessariò diligunt se dilectione quoad specificationem necessitante: Nos verò quoad exercitium: Hæc Conclusio duas habet partes: quarum

PROBATUR PRIMA: Angeli non possunt se odio habere: Ergo necessariò se diligunt quoad specificationem. Probat antecedens, unusquisque naturaliter suum esse appetit, suamque conservationem exoptat: Ergo idipsum Angeli in votis habent, adeoque naturaliter se diligunt; appetitus enim ille nil aliud

aliud estquàm ipsa propensio naturalis, quà quodlibet ens sui conservationem exoptat, quæve in spiritualibus dilectio appellatur. *Deinde* : Si Angeli possent erga se aliquid habere odium, maximè quia mutare possent iudicium, quò practicè iudicant sui conservationem esse quoddam expetendum, & diligendum, iudicarentque sui annihilationem esse exoptandam : Sed ita fieri nequit, cum enim nihil Angeli vel entis, nihil sit; nec proinde quidpiam bonitatis involvat : etiam nihil diligibilitatis in se complectitur. *Denique*, si quidam Angeli optarent, & amore elicitum suum non esse diligere, maximè Dæmones : sed ita non est ; nam etiamsi Dæmones ex naturali amore sui, & appetitu beatitudinis in communi exoptent non esse in tali statu miseris, quà præmuntur : Verisimilius tamen est, quòd simpliciter non appetant sui non esse ; siquidem appetitus ille non essendi, si quem habeant, provenit tantum ex urgente miseria, quà detinentur, adeoque magis in statu miserie quàm in non esse, est refundendus .

PROBATUR SECUNDA PARS CONTRA QUODDAM Thomistas modernos . Libertas quoad exercitium integra persistit in nostra voluntate quolibet in naturæ statu circa quodlibet objectum : Ergo multò magis stat integra illa libertas in Angelis : Antecedens admittit S. Thomas de virtute quæst. 22. art. 6. Consequentia per se patet. Cum enim Angelica libertas longè sit præstantior nostra, potiori iure dicendi sunt liberi quoad exercitium circa quodlibet objectum naturale ipsis propositum .

Deinde si voluntas Angelica necessario esset determinata ad actum amoris sui, nullatenus peccare posset in amore sui : sed falsum consequens : Ergo, & id unde sequitur. Patet sequela, quia peccatum in tantum est peccatum, in quantum est voluntarium : Si autem necessario, & naturaliter Angeli determinen-

tur ad actum amoris sui, nec possint alium elicere, actus ille non erit liber, adeoque nec peccaminosus . Probatur minor . Ille actus non est liber qui non provenit à voluntate indifferente, nec habet ordinem ad eam ut libera est : sed si voluntas naturaliter determinetur ad amorem sui, actus ille non dicit ordinem ad voluntatem, ut est potentia libera : Nam si aliquem ordinem diceret, maximè quia postquam illum elicit voluntas posset ipsum non conservare : sed in sententia Thomistarum id dici nequit, quippe cum, inquirunt, voluntas nunquam potuerit cessare ab illa dilectione : Ergo, &c.

Denique, Ideo Angelus non est liber quoad specificationem, quia nulla ratio boni potest inveniri in objecto contrario dilectionis suæ, nempe in nihilo sui : sed in objecto contrario hujus dilectionis, nempe in non dilectione actuali, potest Angelus reperire aliquam rationem boni : Ergo potest cessare ab actuali dilectione sui . Major patet ex priori parte. Minor probatur. Potest Angelus iudicare melius esse uti sua libertate, quam habet in suos actus, quàm semper habere actum dilectionis erga se ; Iti hoc enim nulla ratio mali apparet : Ergo quamquam Angelus cognitione speculativa apprehendat bonum esse quod se diligit, tamen iudicio practico iudicare potest bonum esse quod in eodè instanti actum amoris erga se non eliciat, nempe vel ut totum se transferat in Deum diligendum, vel ut alterum Angelum amore amicitie, vel concupiscentie prosequatur : Ergo non se necessario diligit amore naturali quoad exercitium .

Confirmatur : Voluntas non necessitatur quoad exercitium ad illum actum in quo potest deprehendi ratio minoris boni : sed Angelus aliquam rationem minoris boni apprehendere potest in dilectione sui ; Potest enim illam dilectionem apprehendere non solum ut impeditivam exercitii libertatis suæ

cir-

circa suspensionem suorum actuum: sed etiam ne toto conatu feratur in Deum, ut ultimum finem, neve alterum Angelum charitate præstantissima diligat: Ergo in amore sui potest deprehendere rationem minoris boni; sicque poterit talem actum suspendere, & circa præstantiorem ferri.

Obijcit 1. Gonetus. Angelus cognoscit, & contemplatur seipsum necessario etiam quoad exercitium: Ergo eadem necessitate seipsum diligit. Probatur consequentia; Tum quia operatio voluntatis proportionatur operationi intellectus per quam dirigitur, & regulatur: Tum etiam quia si Angelus necessario semper seipsum intelligit, vult necessario seipsum semper intelligere: Hoc autem est seipsum amare, quia hoc est sibi velle maximum bonum. Tum denique, quia ex naturali cognitione quâ Angelus se, & omnes suas naturales perfectiones comprehendit, resultat necessario iudicium practicum omnino immutabile quod se, & omnes illas perfectiones iudicat necessario debere amari: Ergo necessario cognoscit seipsum cognitione practica causante amorem, & non solum cognitione merè speculativa, quæ amorem non parit. Consequentia patet: Antecedens probatur: Quia iudicium de aliquo objecto est tunc immutabile, quando nulla potest esse ratio formandi iudicium oppositum: sed nulla potest esse ratio ob quam Angelus formet iudicium oppositum iudicio de seipso diligendo: Ergo Angelus se, & omnes suas naturales perfectiones apprehendens, format iudicium practicum omnino immutabile de seipso diligendo. Major patet. Minor probatur. Amor proprius non generat in Angelo fastidium, sed delectationem; nec impedit sed juvat tamquam medium ad alias operationes, maximè verò ad dilectionem Dei: Ergo nulla est ratio ob quam Angelus formare possit iudicium con-

trarium iudicio de seipso diligendo. Siquidem ratio ob quam potest haberi iudicium de suspensione amoris aliqujus objecti, est quia amor ille aut tedium generat, aut est impeditivus majoris boni.

Respondet 1. negando antecedens: Falsum namque est intellectum Angelicum seipsum necessario quantum ad exercitium intelligere: siquidem tum ab objecto externis movente, tum ab imperio propriæ suæ voluntatis diverti potest à sui ipsius intuitu, & cognitionem suam in aliud objectum divertere, ut priori Articulo dictum est.

Respondet 2. negando consequentiam, & ad primam ejus probationem dico: Quod quamquam Angelus necessario se-ipsam intelligeret, exinde non sequitur quod seipsum necessario amaret; licet enim intellectus operationem voluntas sequatur, quia nempe non fertur in incognitum; non tamen eam ita necessario sequitur ut versari debeat per actum elicitum amoris circa quodlibet objectum sibi ab intellectu propositum; Alioqui nusquam voluntas posset suspendere actum suum, nec ulatenus dici libera quoad exercitium. *Ad secundam* illius probationem, nego antecedens: Etenim quamvis Angelus ex naturali cognitione quâ se, & omnes suas naturales perfectiones comprehendit, iudicet se esse amore dignum, non sequitur tamen inde quod formet iudicium practicum omnino immutabile de dilectione sui; licet enim non possit formare iudicium oppositum, huic amoris, nempe quod ipse Angelus esset odio habendus, tamen potest formare iudicium suspensivum actus, non propter tedium quod generaret actus continuus amoris sui: sed propter rationem minoris boni, & impeditivi majoris; iudicare namque posset Angelus quod ille assiduus sui-ipsius amor esset impeditivus amoris Dei totis viribus totoque conatu amandi. Certum nam-

namque est quoddam Deus minus amaretur ab Angelo qui simul seipsum amaret, quam qui amore sui-ipsius neglecto, toto divini amoris incendio aestuaret.

Obijciat 2. Voluntas Angeli semper vult, sicut ejus intellectus semper intelligit: Ergo sicut omnis cognitio Angeli in cognitionem sui, tamquam in primam operationem ab ipsa natura determinatam, & procedentem reducit, ita, & omnis ejus volitio naturalis in amore, & dilectione sui fundatur. Unde communiter dicitur, amabilia quæ sunt ad alterum, oriuntur ex amabilibus ad se-ipsam; & consequenter amor naturalis quod Angelus se-ipsam diligit, necessarii debet esse continuus, & nusquam interruptus, subindeque necessarius quoad exercitium.

Distinguo antecedens: Voluntas Angeli semper vult idem objectum ad quod necessarii, & naturaliter determinatur, nego: Vult diversa objecta, vel si idem, illud tantum vult ex electione, & determinatione libera quæ tantum, & tamdiu versatur, quantum, & quamdiu ipsi libuerit, concedo; & nego consequentiam. Adde insuper, probationem consequentiæ etiam videri falsam, non enim amor naturalis cujuscumque objecti necessarii reduci debet ad amorem sui; siquidem, ut supra diximus, Angelus Deum amare potest naturaliter plusquam se, & super omnia: Amor autem ille quod Angelus diligit Deum plusquam se, reduci nequit ad amorem sui, nec ab eo originem ducere: Ergo ratio quæ nititur consequentia, non est universaliter vera.

ARTICULUS TERTIUS

De potentia Motrice, & Executiva Angelorum.

IN Deo rerum omnium Opifice triplex operationis genus distinguunt Theologi; etenim præter Intellectum

quod cuncta perspicit, præterque Voluntatem quæ divinò incendio flagrat; Omnipotentiam in eo deprehendunt quæ cuncta molitur, & exequitur: Totidem in Angelo præstantissima Divinitatis effigie, facultates describunt; intellectum videlicet cujus ope nedum Divinitatem ipsam intueri, & perspicere possunt; & voluntatem quæ tum Deum, tum se ipsos, & alia quæque diligibilia amore prosequuntur, sed, & facultatem Executivam ab intellectu, & voluntate saltem formaliter distinctam, quæ circa res creatas tum materiales, tum immateriales multa, & mira præstare possunt.

Hanc autem facultatem eis inesse non solum experientia, quæ constat Angelos, & Dæmones erga nos, & in Universo plura, ac stupenda operari; sed etiam ipsa ratio suadet. Sicut enim in ente supremo intellectuali, Deo scilicet, & infimo, nempe homine, præter intellectum & voluntatem, datur potentia executiva duabus illis subordinata, & ab utraque quodammodo pendens quoad operationem, ab intellectu quidem ut dirigente, à voluntate autem ut applicante: Sic in Angelis, mediis inter Deum, & hominem, talis potentia debet admitti. Quippe neque tantæ perfectionis est, ut Angelos excedat: siquidem convenit hominibus; neque etiam tantæ est imperfectionis, ut Angelos dedeceat, cum in Deo quoque reperitur.

Hæc autem Executiva facultas cum maximè circa corpora operari deprehendatur, idque vel in eis locum tenendo, vel sese in illis movendo; vel denique illa diversimodè agitando, ut eorum omnium distinctam notitiam possimus assequi, præsentem Articulum tres in Sectiones distinguemus; quarum *Prima* aperiet qualiter Angeli in loco corporeo sistantur; *Secunda*, quomodo in eo sese moveant; *Tertia*, quæ virtute corpora possint agitare, & producere.

SE-

SECTIO PRIMA.

De Loco Angelorum.

ANGELOS locum occupare non eadem concors fuit S. Patrum Sententia: Quidam enim non solum in loco esse, sed etiam illo circumscribi eos asserunt, quemadmodum corpora: cuius quidem assertionis fuerunt illi omnes, qui Angelos corpore esse præditos putant, inter quos S. Basilius lib. de Spiritu sancto cap. 16. *Substantia*, inquit, eorum est æreus, si fortè, spiritus, aut ignis expertæ materie, quemadmodum scriptum est qui facit Angelos suos spiritus, &c. Ideo, & in loco sunt, & speculabiles fiunt, atque in iis qui digni sunt, apparent in propriorum corporum forma. Plurimi Angelos in loco esse omnino negasse videntur; Sic S. Gregorius Nyssenus in libro primo contra Eunomium, ait; *Nemo adeo puerili est ingenio, qui in natura intelligente, & incorporea differentiam loci reperiri existimet. Locum enim positio propria est corporum: quod autem natura est intelligens, & materia caret, longe ab omni ratione loci est, ut omnes consentiant.*

Non defuerunt Scholastici qui Angelos aut esse ubique, aut nullibi asseruerunt. Durandus namque in 1. dist. 27. quæst. 1. censet Angelos neque per actionem, neque per substantiam in loco esse, sed quadam, ut ipse dicit, præsentia ordinis, per quam præsens adest Angelus cuilibet corpori quod movere potest, nec uni potius quam alteri: quemadmodum cæleste corpus, quia in inferiora omnia vim suam diffundit, præsens omnibus adest dicitur; non quidem proximè, sed propinquorum interventu longiquioribus adest. Angelus verò intimè proximèque adest iis corporibus, quæ movere potest; unde cum omnia corpora Angelum movere posse censet, etiam illum esse ubique docet. Quæ sententia jam pridem à

scholis eliminata, & ab omnibus jure contempta, hodie nullum defensorem obtinet. Operæ prætium est ergo hic determinare primò an, & per quid Angeli in loco subsistant. Secundò qualiter locum occupent: Tertiò, an plures eundem locum, vel unus plurima loca valeat occupare.

QUAESTIO PRIMA.

An, & per quid Angeli constituantur in loco.

NOTANDUM 1. Cum Seraphico Doctore in primum distinctione 2. quæst. 2. Quod locus habet triplicem, comparationem ad locatum. Comparatur enim primò, in ratione continentis: secundò, in ratione mensurantis; tertio, in ratione conservantis. Continet enim ut vas; mensurat ut quantitas; conservat ut natura. Secundum hanc triplicem habitudinem sunt in loco substantiæ finitæ corporales, & corruptibiles: Etenim quia finitæ, & limitatæ, sunt in loco tamquam in continente: quia verò sunt corporales, sunt in loco tamquam in mensurante; tandem ut sunt corruptibiles, sunt in loco tamquam in conservante. Secundum duas comparationes primas, quæ sunt continere, & mensurare; sunt in loco substantiæ quæ sunt finitæ, & corporales, sed incorruptibiles, putà Cæli inferiores: Secundum primam verò quæ est continere, sunt in loco substantiæ finitæ spirituales, & incorruptibiles ut Angeli. Et hoc dico de loco corporali: nam Angelus locum habet spirituale conservantem, scilicet Dei virtutem; locum mensurantem sive circumscribentem propriæ substantiæ, nempe virtutis limitationem vel clausionem: locum verò continentem, non tantum spirituale, sed etiam corporalem habet.

Notan-

Notandum 2. Locum corporeum, in quo Angelus dicitur existere, generatim posse distinguere duplicem, unum ipsi connaturalem, alterum violentum sive præter naturæ ipsius Inclinationem. Locus Angelo connaturalis dicitur ille, cui se præsentem sistit juxta nutum suæ liberæ voluntatis, violentus autem in quo non se liberè collocat, sed in eo per vim externam clauditur, & detinetur, qualis est v. g. ignis æternus, & infernus respectu Dæmonum. De utroque loco hic inquirimus quænam sit ratio proxima per quam formaliter Angeli dicantur locum occupare.

Circa cujus difficultatis resolutionem, triplex distinguitur Authorum sententia. *Prima* est Angelici Doctoris ejusque Discipulorum assensientium rationem formalem immediate fundantem ubicationem Angeli in loco connaturali, esse operationem virtualiter transeuntem: in loco autem violento, esse passionem per quam contra suam voluntatem in aliquo loco detinetur: *Secunda* assignat pro fundamentum talis ubicationis, & præsentiae, modum aliquem unionis per liberam Angeli voluntatem productum, quod ante omnem operationem transeuntem loco corporeo unitur; ita Vasques *disputatione* 188. *Tertia* denique sententia docet rationem formalem quâ Angelus immediate sit in loco, esse ipsam Angeli substantiam, quâ realiter, & substantialiter sit præsens loco quem occupat, ita Doctor Subtilis in *secundum dist. 2. quest. 6.*

Notandum 3. ex Doctore loco mox laudato numero 6. in Creaturis ad veram determinationem loci, & locati sex desiderari conditiones, *Primò*, inquit, *esse in loco*; *Secundò esse in loco actuali*; *Tertiò esse in loco determinato, & equali*; *Quartò esse in loco commensurativè*; *Quintò esse in loco determinativè, hoc vel illo*; *Sextò esse in loco naturaliter vel violentè*. Quatuor primæ conditio-

Tom. IV.

ner, inquit, *conveniunt corpori in quantum corpus est, quinta convenit ipsi ab agente, sexta convenit ipsi in quantum est corpus naturale*. Cæterum ex his sex conditionibus, tres tantum per se, & intrinsecè videntur desiderari ad rationem loci, & locati formaliter instituentem, quæ non solum rebus corporeis, sed etiam substantiis spiritualibus convenire possunt: *Prima conditio* est quod sit realis, & actualis præsentia locati ad locum, sine qua nec corporeæ res, nec spirituales verè dici possunt alicubi existere. *Secunda conditio* ut res locata quantum ad substantiam, & entitatem suam terminetur ac finiatur spatio, & ambitu ipsius loci. *Tertia* denique ut hæc determinatio ad locum fiat per rationem formalem ubificationis. Ratio autem formalis, ut observat idem Doctor in 4. *distinctione 10. questione 3. ad 2.* Sumitur bifariam: *Primò*, propriè pro ratione formali proxima quâ res talis dicitur formaliter, sic albedo est ratio formalis quâ paries dicitur albus. *Secundò*, sumitur fundamentaliter pro ratione remota quâ res taliter denominatur; sic albedo unius parietis est ratio formalis fundamentalis similitudinis, quam unus paries albus habet ad alterum. Quæ duæ rationes formales in ubificatione etiam reperiuntur; nam ratio formalis existendi in loco propriè dicta, & proxima, est respectus rei locatæ ad locum; fundamentalis verò, & remota, est illa in qua fundatur talis respectus: sic in corporibus, ratio formalis existendi in loco circumscriptivè, est quantitas; in Angelis verò aut animabus, est substantia, ut infra probabimus.

CONCLUSIO PRIMA.

Angeli neque nullibi sunt: neque ubique: sed in aliquo certo, & definito spatio. Hæc est communis quantum ad tres partes apud omnes Theologos: Quorum prima apertè colligitur ex Scriptura sacra, quæ pluribi mentio-

S

nem

nem facit de loco Angelorū, ut constabit in probatione secundæ partis. Hinc inter articulos à Stephano Parisiensi damnatos iste tertius in capite 1. scribitur, *Quòd Angelus vel anima separata nusquam est.*

*Probatur item ratione, si Angeli essent nullibi, maximè propter eorum spiritualitatem quâ dicerentur omnino separabiles, & indep:ndentes à spatio vero vel imaginario: sed hæc ratio non officit quin verè dicantur esse in loco; quippe cùm Deus ipse, quàmvis summè spiritualis, sit reverà ubique, non tantum per præsentiam, omnia cognoscendo; per potentiam, omnia in omnibus operando; sed etiam per essentiam, quatenus implet omnia suâ substantiâ, & entitate necessariò in immensum usquequaque diffusâ. Deinde, Angeli ab instanti suæ creationis, vel steterunt immobiles, vel motum localem habuerunt: Si primum, ergo sunt per substantiam ubi creati fuerunt, nempe in cælo aliquo inferiori empyreò: Si secundum, ergo locum mutando, spatium aliud, & locum verum aut imaginarium obtinuerunt, adeoque semper supponuntur in loco. Denique Angeli non possunt non esse præsentés intime Deo, ex hypothesi quòd existant: at si non essent in aliqua parte spatii veri aut imaginarii, non essent Deo intimè præsentés. Tandem; non est minùs improbabile, quòd aliquid verè existat, & nusquam existat, quàm quòd verè existat, & tamen nunquam existat: Ergo quemadmodum quidquid est aliquando est; etiam, & alicubi debet esse: Hinc S. Gregorius Nyssenus lib. 1. contra Eunomium; *Fieri non potest, inquit, ut quæ creatione producta sunt aut sunt, non omnino in loco vel in tempore habeant ut existant. Sola nullius gens, & æterna, ac res omnes complexa natura, neque in loco est, neque in tempore.**

PROBATUR SECUNDA PARS: Nempe

*quòd Angeli non sint ubique. Primò quidem ex Scriptura quæ docet Angelos ac esse in uno loco, ut in alio non sint, sic Apocal. 12. Locus eorum non est amplius inventus in Cælo: Ubi sermo est de malis Angelis è Cælo propter peccatum pulsus: Docet item Angelos moveri localiter, & ita esse præsentés alicui parti Universi, ut si alteri adesse velint, necesse habeant deferere hunc locum, & ad illum accedere per motum localem: Sic Zachariæ 2. *Eecce Angelus quib loquebatur me; egrediebatur in occursum ejus, dixit ad eum, eurre, loquere ad puerum istum:* Sic Job. 1. *Sathan ait; Circuevi terram, & parambulavi eam:* Tobiz 5. *Raphael Angelus dixit, Omnia itinera ejus frequenter ambulavi, &c.* Quæ omnia in sensu proprio, & litterali fumenda sunt; maximè cùm nulla urgeat ratio ad tropos confugere; atque etiam id ipsum litteraliter S. Patres explicant.*

Nam S. Basilii lib. de Spiritu sancto cap. 6. apertè ait; *Cæterarum porro Virtutum singulæ certò circumscriptæ locò esse creduntur; etenim Angelus ille qui Cornelio adstitit, non erat eodem tempore apud Philippum: neque qui ex altari Zachariam alloquebatur, eodem tempore propriam in Cælo stationem obibat. At spiritus semel, & in Abacuc operatus, & in Daniele apud Babilonem creditur. Subscribit Theodoretus qu. 3. in Genesim, ubi solum Deum incircumscriptum esse pronuntiat: *Quæ autem ab initio aliquæ, caperunt esse, sunt circumscripta; Quare licet expertem corporum fateamur esse naturam Angelorum, circumscribi tamen asserimus illorum substantiam.* Consentit S. Damascenus lib. 2. de Fide cap. 3. ubi de Angelis ait; *Circumscripti sunt, quoniam cùm in Cælo sunt, non sunt in terra; cùm in terram à Deo mittuntur, non manent in Cælo.* Id ipsum apertè docet S. Gregorius Papa lib. 2. moralium; *In hoc, inquit, est nunc natura Angelica à natura**

tura nostrae conditione distincta, quod nos, & loci circumscribimus, & cæcitatibus ignorantia coarctamur; Angelorum vero spiritus loci quidem circumscripti sunt: sed tamen eorum substantiæ longe super nos incomparabiliter dilatantur.

TERTIA PARS sequitur ex præcedentibus; eamque Seraphicus Doctor loci laudato duplici ratione confirmat: Primam repetit ex ratione Spiritus creati, & limitati. Cum enim, inquit, Spiritus increatus, qui Deus est, habeat in se simplicitatem, per quam est intra omnia, & immensitatem, per quam continet omnia, & est extra omnia; communitat illas condiciones creaturæ cætenus, quatenus nata est recipere: Sed quia Spiritus non potuit recipere virtutem continentis, eo quod ejus simplicitas sit finita, ideo est in loco; & quia non habet partem, & partem, ideo secundum se totum est simul hic, & nunc: Unde non potest habere capacitatem ad continendum: Cum autem corpus sit compositum, & habeat plures partes, non potuit participare simplicitatem divinam, sed propter partium extensionem, potuit participare ac recipere capacitatem ad continendum: Idcirco Deus fecit unum nobilissimum corpus quod posset omnia, ambire, & extra quod omnino nihil esset, putà empyreum, in quo Angelum reposuit.

Aliam rationem deducit ex eo quod in solo corpore sit distinctio secundum hic, & ibi; quia enim, inquit, cæteræ creaturæ ordinem, habent in mundo, distinctionem, & positionem habent secundum gradus perfectionum: & ita una est hic, & alia ibi, una sursum, & alia deorsum: & quia in solo corpore est potentialis distinctio secundum hic, & ibi, ideo inter creaturas soli corpori debet dari universalis potentia lo-

candi respectu visibilium, & invisibilium, ut sic Universum esset unum in omnibus suis partibus ordinatum. Et sic patet ratio duplex quare data est corpori potentia locandi Spiritum, & Spiritum contineri à corpore: Hoc enim exigebat ordo Universi, tum propter limitationem Spiritus creati, tum quia in solo corpore distinctio est secundum, hic, & ibi.

Obijciens primò; Plures ex SS. Patribus, qui Angelos loco definiri pernegant; nam præter Gregorium Nyssenum in præsentis Sectionis præludio laudatum, idipsum edocet Didymus in lib. 1. de Spiritu sancto, ubi creaturas spirituales negat circumscribi loco, & finibus, & lib. 2. ait: *Loca, & commutationes locorum ab incorporeis separamus: Idem edocet S. Basiliius homil. 30. de Paradiso, ubi ait; Locum esse præcipuum corporis; animam vero ex consequenti, ac velut accessivis instar esse in loco propter habitudinem ad corpus, cum ex naturæ suæ proprietate loco minime circumscribatur: Ergo multò minus Angeli debent loco circumscribi, cum nullum ad corpus ordinem dicant. Quod enim magnitudinis molis, & partium est corpus (inquit Nemeseus lib. de natura hominis cap. 3. ubi docet animam minime circumscribi, eo quod sit Spiritus) nulla loci parte circumscribi potest; cum mole cuius locus existit, quippe locus est terminus corporis ambientis, quo id quod continetur, amplectitur. Unde Boetius de Hebdomadibus, ait, Communis animi conceptio, quæ omnibus videtur, est incorporeum non esse in loco. Ergo cum Angelus sit omnino incorporeus, nulla ratione dicendus esse in loco.*

Respondet, Doctor, supra laudatum. 17. Præfatas, & alias similes sanctorum Patrum sententias sic esse intelligendas, ut velint substantias spirituales non esse in loco circumscriptivè,

& commensurativè, quemadmodum corpora quorum singulæ partes singulis loci partibus correspondent; ut explicat S. Damascenus loco supra laudato, *Cum autem Angeli intelligentie sint, inquit, etiam intelligibiliter in locis sunt, non corporum more circumscripti. Non enim ut corpora secundum naturam figurantur, neque triplici dimensionem constant, sed eo ipso sunt in loco, quod intelligibiliter præsentis sint &c.* Ideoque illi SS. Patres negant Angelos circumscribi loco, quia partibus carent quas metitur locus: Qui rem collocatam ita complectitur, ut pars parti respondeat.

Quod Augustinus in Epistola 28. ad Hieronymum declarat sic: *Porro si corpus non est, nisi quod per loci spatium aliqua longitudine, latitudine, ita sistitur, vel movetur, ut majore sui parte majorem locum occupet, & brevior brevior, minusque sit in parte, quam in toto, non est corpus anima: Per totum, quippe corpus, quod animat, non locali diffusionem, sed quadam vitali intentione porrigitur. Nam per omnes ejus particulas tota simul adest: nec minor in minoribus, & in majoribus major, sed alicubi intensius, alicubi remissius, & in omni-bus tota, & in singulis tota est.*

Obijcies 2. Locus, secundum Philosophum, est, *Ultima superficies corporis continentis immobilis prima:* Sed nulum corpus continet Angelum, quia continens debet esse actualius contento; corpus autem non est actualius Angelo: Ergo Angelus non est in corpore tamquam in loco.

Respondet Doctor, Ibidem negando minorem, & ejus probationem distinguit: Continens per modum causæ debet esse actualius contento, concedit: Continens per modum loci, ita ut locatum reperitur totaliter intra locum, negat. Si autem quæzatur qualiter Angelus indivisibilis possit contineri intra superficiem aliquam corporis? Re-

spondetur non in alio sensu, nisi quatenus est præsens isti superfici; non quod illa sit ultima superficies ipsius, quia Angelus non potest esse in loco cum extensione partium, sed ita ut penetrativè sit intra partem illius corporis cui præsens est.

Ex his, meritò infert Doctor, quod Angelus non est necessariò in loco; si enim corpus non necessariò in loco existat, quippe cum produci possit extra mundum, & poni in vacuo, multò minùs Angelus pendebit à loco corporeo; potest enim produci independentè a productione cujuslibet creaturæ corporeæ, & sic tunc nihil esset, in quo diceretur locari, adeoque non habet ex natura sua necessitatem ut alicui loco inexistat. Habet tamen potentiam, ut loco insit saltem definitivè, sive interim illa potentia fundetur in ipso quatenus substantia est, sive quatenus natura limitata actualiter est, sive ratione alicujus extrinseci; *Et ideo,* inquit Doctor, *non oportet querere aliquam intrinsicam rationem esseendi in loco, quia ibi nulla est, sed tantum est in ipso potentialitas passiva, qua potest esse in loco, quia non repugnat sibi.*

CONCLUSIO SECUNDA.

Ratio formalis fundamentalis quæ Angelus constituitur in loco, non ab ejus operatione, sed ab illius substantia petenda est. Hæc est Doctoris in 2. distinct. 2. quæst. 6. num. 1. Ubi ait, quod contraria sententia sit, inquit, *Quidam articulus damnatus ab Episcopo Parisiensi (nempe Stephano) & excommunicatus. Quod si dicatur, quod Excommunicatio non transeat mare, vel Diocesim; si tamen fuit articulus condemnatus sicut articulus hæreticus, ubique est condemnatus sicut hæreticus; non auctoritate Diocesani tantum, sed etiam auctoritate Papæ extra de Hæres. c. Ad abolendam; vel saltem sententia est suspens-*

ſpecta, quando in aliqua Univerſitate ſolemniter eſt damnata.

Suaderi poteſt huiusce conſuſionis veritas illis omnibus Scripturæ ſacræ textibus, quibus Angeli dicuntur prius acceſſiſſe ad loca, quàm in eis quidpiam fuerint operati ſic Luc. 2. *Miſſus eſt Angelus Gabriel ad Mariam, & ingreſſus dixit &c.* Prius ergo ingreditur, & ſit præſens, quàm loquatur. Math. 4. *Acceſſerunt Angeli, & miniſtrabant ei,* nempe Chriſto Domino poſt expugnatum Dæmonem tentatorem: Fuerunt ergo prius Chriſto præſentes, quàm quidquam erga ipſum fuerint operati; ſubindeque illorum præſentia ex operatione præciſe non eſt colligenda.

Reponunt Thomiſtæ, Angelos eſſe, quidem prius præſentes, quàm operentur, ſed præſentia inadæquatā, & inchoativā, quā habet Angelus quando incipit ſe ordinare ad aliquem locum, ut ibi operetur: quā Cajetanus, *præſentiam ordinis* appellat, docetque tres conditiones ad eam requiri, nempe iudicium practicum de operatione nunc, vel tali tempore àb Angelo faciendā, ſecundò electionem talis operationis, & expeditionem potentie executivæ, quibus ſuppoſitis; docet Angelum fieri præſentem loco inchoativè, & incompletè priusquàm in illo operetur; completè verò, & adæquatè per operationem.

Contra, Ad veram, & adæquatam rationem præſentie Angelicæ ſolum requiritur, quòd reverà Angelus totus ſit hic, & non alibi, quid enim aliud rel præſentia ſonat? At eo ipſo quo Angelus eſt alicubi, verum eſt dicere, quòd reverà ibi ſit, non vero alibi, etiamſi nihil ibi operaretur: Ergo eius præſentia ibidem eſt adæquatā. Deinde, in illo inſtanti, quo Angelus ſe ordinat ad operationem, poteſt ab ea removeri, vel per divinum imperium, quo alibi evocabitur, aut ab operatione exercenda prohibebitur, quemadmodum

prohibiti ſunt illi Angeli, quibus in Apocalypſi dictum eſt, *Noliſte nàcere, terræ, & mari &c.* Vel per denegationem divini concurſus: At eo in caſu, reverà Angeli fuiſſent loco præſentes; nec tamen in eo operantes. Ergo &c. Denique, Si Angelus eſſet adæquatè in loco tantum per operationem, ſequeretur, quòd nuſquam dici poſſet operari in loco; quia operari in loco ſupponit locum, & rem in loco conſtitutam: Sed Angelus, ut operans, non ſupponit ſeipſum ut conſtitutum in loco, quandoquidem per ſuam operationem deberet conſtitui in loco: Ergo numquam diceretur operari in loco: Quod conſequens cum nullus admittat, nec pariter admitteri debet id unde inferitur.

Probat conſuſionem Doctōr 1. Prius eſt eſſe, quàm operari: Ergo prius eſt eſſe in loco, quàm operari in loco: Sed poſterior non eſt cauſa prioris: Ergo operari in loco non eſt cauſa cur Angelus ſit in loco. *Conſirmatur,* ſicut ſe habet eſſe ſimpliciter ad operari ſimpliciter, ita ſe habet eſſe hic ad operari hic. Ergo quemadmodum operari ſimpliciter ſupponit eſſe ſimpliciter; ita operari hic neceſſariò ſupponit eſſe hic: Adeoque prius Angelus debet eſſe hic quàm operetur hic.

Verum Thomiſtæ negant autecedens: Siquidem, inquiunt, nihil prohibet aliquid eſſe prius ſimpliciter quod non eſt prius ſecundum aliquid, ſicut ſubjectum eſt prius ſimpliciter ſuperficie, ſed non quatenus eſt coloratum: Tria namque ait Cajetanus ſunt in re locata, in corpore enim v.g. eſt ſubſtantia quæ locatur, quantitas quæ eſt ratio locandi, & relatio præſentie, quæ ſequitur ad illa duo tamquam ad proprium fundamentum. In Angelo ſimiliter eſt ſubſtantia quæ eſt præſens ut quod, contactus virtutis, qui eſt præſens ut quo, & ipſa relatio præſentie conſurgens ex illis duobus. Quæ tria poſſunt diverſimodè conſiderari, & juxta diverſas conſideratio-

nes habere rationem prioris, & posterioris: Nam si considerentur ut sunt entitates quædam existentes in rerum natura, sic prior est in Angelo substantia, quàm operatio, & operatio quàm relatio; sicut etiam in corpore prior est substantia quàm quantitas, & relatio: Si verò considerentur non absolute, ut sunt entitates, sed ut rationes essendi in loco, sic quemadmodum in rebus corporeis prior est substantia quàm quantitas, & deinde sequitur ipsa relatio, ita in rebus spiritalibus prior est ipsa operatio quàm substantia Angeli, ad quæ tanquam ad subjectum, & rationes fundandi resultat relatio præsentia.

Contrà 1. Exemplum de subjecto non est ad propositum, constat enim quòd ratio extensis colorati illud subjectum constituat in ratione superficiæ, siquidem superficies est extensio corporis secundum longitudinem, & latitudinem: At non ita constat quòd operatio sit ratio constitutiva Angeli in loco; imò contrarium evincitur; prius enim ut jam diximus, agens locatum esse debet, quàm agere, quod in agentibus corporeis est evidentissimum, prius namque locantur, quàm agant.

Secundò, falsò supponunt quòd quantitas sit ratio locandi corpora, etenim quantitas panis, & vini in Eucharistiæ Sacramento eadem permanet post consecrationem, nec tamen est ratio cur panis dicatur existere in loco; siquidem amplius non existit: adeoque quantitas præcisè non est ratio cur corpus sit in loco, cum hæc possit subsistere illo destructo: *Insuper*, adorandum Christi Domini Corpus in Eucharistia non habet quantitatem, quæ illius partes extendantur ad locum, & ab eo circumscribantur, nec minùs tamen reverà est in loco definitivè; adeoque quantitas secundum se non est ratio cur corpora sint in loco, sed solum in quantum corpora afficit, & eis inexistit.

Tertiò denique, non verè reponunt, quòd applicatio vel contactus virtutis ad locum sit ratio qua Angelus sit in loco; illa enim applicatio vel est actus primus Angeli, vel secundus. Si primum, cum actus primus Angeli sit ipsamet ejus substantia, vel facultas substantialis; consequens est, quòd Angelus sit præsens loco ratione suæ substantiæ. Si secundum, vel ille actus est transiens, vel immanens, non immanens ut fatentur etiam Adversarii, quippe actus immanens nullum habet respectum ad extra, subindeque non potest esse ratio qua Angeli dicantur præsentés in loco: Non etiam transiens, si enim operatio transiens esset ratio formalis constitutiva Angeli in loco, qualis est illa transiens operatio; Ergo cum illa operatio extrinseca Angeli sit circumscriptivè, & mensurativè in loco (siquidem commensuratur corpori circa quod agit, & in quo recipitur; Corpus autem circumscribitur loco) pariter illa operatio loco debet circumscribi: Idcirco enim operatio hominis v. g. quatenus rem operatam importat, circumscribitur loco, quia recipitur in subjecto, quod loco circumscribitur: sed Angeli præsentia non est in loco circumscriptivè, ut constat quæstione sequenti. Ergo, &c.

Adde quòd si virtus ipsamet substantialis Angeli non est ipsi ratio existendi in loco: Ergo neque applicatio ejusdem virtutis; nam si quantitas corporis non esset ratio existendi in loco circumscriptivè, nec ejus applicatio talem præsentiam efficere. *Insuper*, sicut applicatio virtutis calefactivæ ad calefaciendum lignum, non est ratio calefaciendi, sed tantum conditio sine qua non; ita à simili applicatio virtutis Angelicæ ad locum non est ratio existendi in loco, sed conditio sine qua non cognosceremus Angelum esse præsentem huic loco potius, quàm alteri; Angelica namque præsentia solum per operationem nobis

bis innotescit, quamquam prius supponatur in loco, quàm ibidem operetur.

Probat 2. Doctor: Si Angelus præcisè esset in loco per operationem, sequeretur quòd plerumque nusquam esset; Si quidem sæpius Angeli nihil ad extra operantur; etenim dum in Cælo empyreo existunt, illud neque movent nec transmutant, quia nec mobile est, nec mutabile ad ulla qualitates, quas posset in ipso Angelus producere: Ergo dum Angeli in eo existunt, vel necessario dicuntur esse nullibi; vel non sunt alicubi per suam operationem.

Respondet Gonetus ex Cajetano primo, quidem Angelos habere aliquam operationem circa Cælum empyreum, quamvis ejusmodi operatio nobis non innotescat.

Verum hæc solutio omnino gratis profertur, nec ulla tenus est admittenda; Tum quia si talis operatio Angelica nobis non innotescat, asseritur absque fundamento, & gratis fingitur: Tum quia sic facile esset argumentum, quæcumque dissolvere: quis enim difficultatem quamlibet non posset eludere respondendo rem quidem ita esse, ut asseritur, sed illius rationem, & causam nos latere.

Respondet 2. Angelos producere ali-quod lumen quo magis perficitur innatus splendor Cæli empyrei: Licet enim, inquit, non possit Angelus immediatè qualitates alterativas producere, v. g. calorem, & frigus, sed solum applicando activa passivis; bene tamen lucem, nam lux est suprema omnium qualitatum corporearum; natura autem inferior in sui supremo attingitur à natura superiori, quia, ut ait, S. Dionysius de divinis nominibus, *Sapientia divina conjungit fines primorum principis secundorum.* Ex hac autem luce corpus illud cæleste maximè decoratur, & ornatur, sic enim de Beatis dicitur Apoc. 21. *Afferent gloriam suam, & honorem in illam;* scilicet Civitatem cælestem, mul-

tò magis Angeli luce sua speciali gloriosissimam efficient civitatem illam.

Contrà, gratis & absque ulla ratione fingitur Angelos Cælum empyreum novo lumine exornare, illud enim lumen, vel ab ipsis Angelis promanaret, quemadmodum emanabit à corporibus beatis, ut asseritur per laudatum contextum Apocalypsis, vel ab eis produceretur: sed neutrum dici potest. Non quidem primum, cum enim Angeli purè sint spirituales substantiæ, lumen corporeum, quo Cælum illustretur, ex se profundere nequeunt. Non etiam secundum, vel enim illam lucem producerent per creationem, vel per generationem: Non per creationem, siquidem creatio soli Deo propria est, ut cum Doctore Subtili probavimus in physicis.

Adde quòd, si Angeli possent producere lumen per creationem, eo quòd supremum infimi produci possit ab aliquo superioris ordinis; Si, inquam, hæc ratione posset Angelus creare lumen, multò magis posset creare animam rationalem, hæc enim licet illis sit inferior, maximè tamen eis est cognata: consequens autem admittit nemo; Ergo nec antecedens debet admittere. non etiam producere possunt Angeli lumen per generationem; Generatio namque fit per corruptionem formæ prius in materia existentis, in Cælo autem empyreo nihil est, quòd corrumpi possit, adeoque nihil unde generatio possit fieri. *Denique,* substantia perfectissima, quale est Cælum empyreum, debuit à suo Conditor in sue formationis initio cum tota perfectione sibi debita procedere, subindeque lumen sibi conveniens ex vi sue creationis obtinuit.

Nec valet reponere, substantiam perfectissimam alteri subordinatam ab illa posse compleri, quemadmodum Angeli inferiores, quamvis perfecti, indigent tamen illuminari à Superioribus. Hæc inquam responsio non est ad propositum;

tum, discrimen namque longè est inter Cælum empyreum, & Angelos, cum enim Angeli sint intellectualiter operativi, novam in dies suscipere possunt perfectionem, & illustrationem, quod utique de Cælo empyreo prorsus immobili, & inalterabili dici nequit; cum enim nullam possit exercere actionem, nec potest etiam ullam perfectionem, acquirere, adeoque omnem sibi debitam perfectionem habere debuit ex vi suæ perfectionis.

Probat 3. Doctor. Si Angelus necessario deberet operari ubi est, sequeretur quòd Angelus movens Cælum, esset immediatè in toto Cælo; totum enim Cælum est proportionatum virtuti Angeli; sed falsum consequens; Angelus enim summè diffusam haberet præsentiam, & per universum Cælum protensam, quod Adversarii non admittunt.

Nec dicas quod Angelus sit tantum in illa Cæli parte, in quam immediatè operatur, quamque movet, & illa mediante reliquas. Non enim Angelus, inquit Doctor, ex se habet magis movere unam partem immediatè, quàm reliquas, nisi quatenus magis applicatur uni parti, quam reliquis; Si autem prius applicetur uni parti, quam immediatè movet, consequens est, quòd prius sit in loco cum illa parte, quàm operetur in illa parte, & sic non habebit præcisè ab operatione, quòd sit in loco; Alias similes habet probationes Doctor, quas omnes sicut, & præcedentes hac ratione perfringo.

Probat 4. Angelus potest esse in loco corporeo absque ulla operatione, aut applicatione virtutis suæ, quæ sit operatio propriè, vel impropiè dicta, & absque eo quòd patiat in loco, aut illum exornet; Ergo non habet ab operatione tanquam à ratione fundamentali, quòd sit in loco. Probat 5. Antecedens, corpus potest esse in loco absque ulla applicatione virtutis, aut operatione propriè, vel impropiè; Ergo

multò magis Angelus. Antecedens admittunt Adversarii; Probatur consequentia, Idcirco potest corpus poni in loco absque ulla operatione, vel quia potest in ipso habere ubi intrinsecum, per quod formaliter dicitur esse in loco, nempe relationem locati ad locum; vel quia per actionem causæ extrinsecæ loco motivæ poneretur in loco; sed tam Angelus est capax ubi, ac formæ intrinsecæ, per quam poneretur formaliter in loco absque operatione ulla, & est etiam tã capax poni in loco per actionem causæ locomotivæ ipsius quam corpus: Ergo sicut corpus potest poni in loco absque operatione ulla propria, aut impropria, poterit, & Angelus. Probat 6. minor: Primò nulla proferri potest, nec assignari ratio cur Angeli substantia sua, quantitate virtutis non ita sit capax loci definitivi absque operationibus, quàm substantia materialis corporis beneficio suæ quantitatis molis est capax loci circumscriptivi: Ergo, &c. *Secundò*, Deus non magis ab aliquo dependet ut aliquem Angelum in loco constituat independentem ab operatione, quàm ut in eum corpus aliquod deportet, & colloct; sed hoc potest: Ergo, & illud. *Tertiò*, dum Angelus alicubi locatur, & operatur, Deus potest ejus operationem suspèdere, vel ei prohibendo ne quid ultra faciat in isto loco, vel ei suum concursum denegando: sed per illam suspensionem actionis non minùs Angelus remanet præsens in illo loco, eumque ibidem alius Angelus æquè videret, ac videbat dum operaretur: Ergo independentem ab operatione reverà tam est capax loci occupandi, ac corpus.

Obijciunt primò Thomistæ, substantia corporea ex ratione sua formalis non potest proximè, & immediatè tribuere corporibus esse in loco: Ergo nec substantia spiritalis potest esse ratio formalis proximè fundans ubicationem in rebus corporeis,

reís, & immaterialibus. Consequentia patet: Si enim substantia corporea non possit ex se, & præcindendo à quantitate, esse ratio formalis proximè fundans ubicationem corporibus, sed hoc solum habeat ratione quantitatis, multò minus substantia spiritalis habebit ex se, quòd sit ipsi Angelo ratio formalis essendi in loco. Antecedens verò probatur; Illud solum est in corpore, ratio formalis immediatè illi tribuens esse in loco, quod est ipsi ratio formalis proxima, & immediata tangendi locum: Atqui substantia corporea nequit ex se esse ratio formalis proxima, & immediata tangendi locum; Substantia siquidem corporea non tangit locum immediatè ratione sui, sed tantum ratione quantitatis inter ipsam, & locum mediantis: Ergo, &c. Probatur major à simili, nam aliquis vestitus, quamvis habeat vestem, nullo modo dicitur vestitus, nisi vestem tangat: Ergo neque substantia poterit esse in loco nisi locum tangat, vel contactu physico per quantitatem, ut corporeæ substantiæ; vel metaphorico per virtutem, ut omnes spiritus.

Respondeo 1. negando consequentiam: Quamquam enim contactus realis, & physicus esset necessarius, ut corpora dicantur esse formaliter in loco, non inde sequitur, quòd pari jure desideretur contactus virtutis, ut substantia spiritalis loco formaliter præfens dicatur: ideo namque contactus physicus dicitur desiderari in corporibus, quia nempe sunt in loco divisibiliter, & per commensurationem; ita quòd eorum partes loci partibus corresponsdeant, & commensurentur, ad quod ut apparet necessario requiritur contactus, & applicatio partium corporis ad partes loci: Secùs autem est de substantia spiritali, quæ cum definitivè, & modo prorsus invisibili sit in loco, non est necessum, ut aliquem contactum habeant, aut certè non alium, quàm

Tom. IV.

sux substantiæ realem præsentiam: Quemadmodum enim corpus per quantitatem locum tangere dicitur, & hac ratione sit ei præfens. Ita Angelus per suam substantiam fit realiter præfens loco, quod sufficit ut ipsum tangere dicatur.

Respondeo 2. Negari posse antecedens, nec-non & majorem illius probationis: Tum quia, ut jam diximus, adorandum Christi Domini Corpus in Eucharistia spoliatum sua quantitate, saltem externa, & qua locum realiter tangere posset, reverà est præfens in altari, & sub speciebus Eucharisticis, præsentia definitivà; adeoque quantitas illa, qua locus tangitur, non est ratio formalis cur corpora præcisè sint in loco. Tum quia, species Eucharisticæ panis, & vini eadem post, ac ante consecrationem permanent: sed peracta consecratione illorum quantitas non est ratio formalis, cur substantia panis, & vini dicantur esse in loco, siquidem illa substantia desit esse, nec amplius subsistit: Ergo quantitas non est ratio formalis fundans ubicationem, corporum in loco, quippe cum corpora saltem divinitus possint esse formaliter in loco sine quantitate, & quantitas ipsa remanere possit in eodem loco absque eo quòd corpora formaliter in loco constituant.

Obijciunt 2. Quod est proxima ratio fundandi ubicationem Angelicam, importat determinationem, aut limitationem in ordine ad locum, cum per illud ita sit hic, ut non sit alibi: Sed substantia Angeli secundum se, & remota operatione, non importat talem determinationem; ordo enim ad locum non est essentialis, sed accidentaliter Angelo: Ergo remota omni operatione, substantia Angeli non est ratio formalis immediatè fundans ubicationem Angelii.

Nego minorem: Illa namque determinatio, aut limitatio in ordine ad locum,

T

eum, vel intelligitur causaliter, & denotat causam extrinsecam, aut intrinsecam, per quam Angelus determinatur ad hunc locum occupandum, potiusquam ad alterum, vel fundamentaliter, aut formaliter, quatenus nempe existens hic habet rationem fundandi relationem ad hunc locum, potiusquam ad alterum: sed hæc habere potest independentem ab ulla operatione extrinseca; siquidem vel per divinam, vel per suam voluntatem determinari potest ad subeundum hunc, aut illum locum: cui ubi præfens sit, ejus substantia est ratio sufficiens fundandi relationem præfentiæ, & ubicationis ad locum; ad id namque nihil aliud requiritur, quàm quod dici possit Angelum esse reverà hic præsentem, & non alibi, adeoque habere respectum præfentiæ ad hunc, & non ad alterum locum, quæ omnia fieri possunt seclusa qualibet operatione: Ergo quovis modo illam determinationem usurpent Thomistæ, sit independentem ab operatione.

Insunt, Substantia Angeli secundum se esse indifferens ad omnem omnino locum in particulari: Ergo ut sit in loco certo, aut determinato, necessario requirit aliquid, per quod determinetur ad hunc locum potiusquam ad alterum subeundum: sed illud non potest esse aliud, quàm ejus operatio transiens. Ergo per hanc formaliter in loco substituitur.

Nego minorem: Nam ut dictum est, illa determinatio, vel intelligitur causaliter, vel fundamentaliter. Si primum, id habet Angelus non à sua operatione transeunte ad locum, sed vel à propria virtute motiva, qua liberè se transtulit ad eum locum, vel à virtute extrinseca, putà à Deo, per quam in eo loco productus est, vel detinetur, vel ad eum fuit translatus. Si verò illa determinatio accipiatur fundamentaliter, id habet ex substantia sua, quæ licet ex se sit indifferens ad existendum hic, aut

alibi, tamen ubi præfens sistitur hic, vel per suam, vel per alienam voluntatem, non est amplius indifferens ad fundandum respectum ad hunc, vel alium locum; sed necessariò fundat respectum præfentiæ ad eum locum, in quo substantialiter præfens est.

Urgent iterum: Seclusa operatione nihil habent Angeli, quo fundare possint relationem realem præfentiæ ad locum; Ergo hæc necessariò desideratur, ut locum determinatum habere dicantur. Probatur antecedens, si quid præter operationem sit in Angelo, quo fundare posset hanc relationem immediate, maxime illius substantiæ; sed Angeli substantia non potest esse fundamentum immediatum talis relationis: *Tum quia* substantia secundum se, & præcisè non fundat aliam relationem, quàm identitatis. *Tum quia*, Si fundaret relationem, maxime vel quatenus est substantia, & prout habet conceptum communem substantiæ, vel quatenus est substantia Angelica; Sed neutrum potest affirmari: Non quidem primum, alioqui omnis substantia similem relationem fundaret: Non etiam secundum, quia ratio formalis substantiæ Angelicæ nihil aliud formaliter denotat, quàm substantiam spiritualem totalem, & adæquatam nullum ordinem dicentem ad corpus: Ergo substantia Angeli per se præcisè non potest fundare relationem ad spatium, vel locum.

Nego antecedens. Et ad minorem illius probationis dico, substantiam Angelicam fundare respectum ad locum, non præcisè quatenus substantia est, nec quatenus substantia Angelica, sed quatenus substantia est hic, & non alibi; quemadmodum v.g. Paries fundat relationem similitudinis ad alterum, non præcisè quatenus est substantia corporea, neque quatenus est extensus, sed quatenus est vel albus, vel niger.

Ad id autem quod dicitur, nempe substantiam non aliam fundare relationem

tio-

cionem, quàm identitatis; *Respondet* Id verum esse dum confertur cum altera substantia, non verò dum comparatur cum aliquo alio, quemadmodum, enim substantia quatenus creata, dum confertur Deo, dicit ad Deum respectum dependentiæ; ita dum comparatur ad locum, dicere potest ad eum respectum præsentis omnino distinctum ab illo respectu identitatis, quem habet ad aliam substantiam. Inde patet Thomistas videri non satis congruè philosophari, dum pro sue opinionis fundamento quasi indubitatum proferrunt, substantiam secundum se nullam posse relationem fundare, quippe cum ad Deum relationem dependentiæ, & ad aliam substantiam relationem identitatis habeat.

Obijciunt 3. Si substantia Angeli secundum se, & antecederet ad operationem virtualiter transcentem, esset proxima ratio fundans ubicationem, seu immediatè tribuens Angelo, quod sit in loco, Angelus semper certum sibi locum vendicaret, & non posset in majori, aut minori pro suo libito existere: Sed hoc dici nequit: Ergo nec illud. Minor infra patebit. Probatur major; nam substantia Angeli intra propriam lineam est quid invariabile, semper enim eandem habet perfectionem substantialem, & nunquam in suo esse, substantiali variatur: Ergo si illa secundum se, & antecederet ad operationem sit proxima ratio fundans ubicationem Angelicam, seu immediatè tribuens Angelo, quod sit in loco, semper certum sibi locum vendicabit, nec poterit pro suo libito in majori, aut minori intra spheram suæ activitatis existere.

Confirmatur, ex eo quòd quantitas molis sit in nobis ratio formalis essendi in loco, non potest corpus v.g. occupare sive replere modò majorem, modò minorem locum, nisi fiat aliqua mutatio intrinseca in ipsius quantitate, putà

per condensationem, vel complicationem, aut rarefactionem; Ergo similiter si substantia Angeli secundum id, quod habet intra propriam lineam, sit ratio formalis proxima essendi in loco, non poterit Angelus aliquando in majori, aliquando in minori loco existere, nisi ipsa ejus substantia intrinsecè, & intra propriam lineam varietur, quod tamen est impossibile.

Nego minorem, Et ad ejus probationem dico; Quòd quamvis Angeli substantia ex se sit invariabilis secundum suam entitatem, variari tamen potest per respectum ad locum, cui applicatur, quatenus nempe subest divini, aut propriæ voluntatis determinationi, per quam ad locum talem, vel talem applicatur. Quamvis enim substantia Angeli secundum se sit determinata ad locum sibi adæquatum, in hoc sensu, quod non possit esse in majori, non tamen est determinata ad existendum in toto illo loco, neque in aliqua certa ejus parte, sed indifferenter potest esse, aut in loco, aut intra ejus latitudinem in majori, aut in minori loco: atque proinde necessarium est, quòd quantum ad hoc determinetur aliquo modo, ita ut ipsa substantia sit res determinata. Non est tamen intelligendum determinationem hanc ita fieri, ut ipsa substantia Angeli prius (saltem ordine naturæ) quàm unjatur loco, amittat terminationem, quam habet ex sua natura, & acquirat aliam, quasi per quandam constitutionem, aut dilatationem, ratione cujus postulat tantum, aut tantum locum intra latitudinem illius, quem secundum naturalem terminationem postulare; quemadmodum corpora ratione propriæ quantitatis postulant locum certæ extensionis, & ut sint in minori, necessarium est, quòd eorum quantitas prius saltem ordine naturæ restringatur, aut alio modo acquirat novam terminationem: Sed dicendum est fieri prædictam terminationem in Angelo

per hoc solum, quod ejus substantia applicatur tanto, aut tanto loco, juxta propriam voluntatis mensuram.

Ad confirmationem, nego paritatem, Disparitas enim est inter substantiam corpoream; & Angelicam, quod illa dum est in loco divisibiliter, in eo sit per omnimodam commensurationem totius quantitatis cum toto loco, & partium ejusdem quantitatis cum partibus loci: Hæc verò sit tota in toto, & tota in qualibet parte, sicut anima rationalis in corpore, & Corpus Christi in Eucharistia; Unde sicut anima rationalis absque sui variatione intrinseca potest informare nunc majorem, nunc minorem materiam, & Corpus Christi aliquando esse sub majoribus, aliquando sub minoribus dimensionibus sive speciebus, juxta voluntatem consecrantis, ita & Angelus absque intrinseca variatione suæ substantiæ poterit aliquando in majori, aliquando in minori loco existere, juxta beneplacitum suæ voluntatis, ratione cujus uniri potest Angelica substantia, vel toti loco sibi adæquato, vel tantum alicui ex partibus loci.

Urget Gonet; Etiam si aliqua substantia sit tota in toto aliquo loco, & tota in qualibet parte illius loci, inde non fit quod illa possit se constituere, nunc in majori, nunc verò in minori loco, prout ipsi libuerit; nam Deus est totus in toto loco corporeo, & totus in qualibet parte illius, & tamen non potest non replere omnem locum creatum. *Item* anima rationalis est tota in toto corpore, & tota in qualibet ejus parte, & tamen non potest ad libitum aliquando informare totum corpus, aliquando solum unam partem illius. Unde quod illa possit informare modò minorem materiam, dum scilicet primò actu corpus pueri, modò majorem, quando nimirum idem puer crescit: hoc non provenit ex eo quod sit tota in toto corpore, & tota in qualibet ejus parte, sed quia ex natura sua determinata

est ad hoc; ut primò actu et minorem materiam, deinde majorem in propriam substantiam hominis convertam. *Similiter* quod corpus Christi possit aliquando sub minoribus, aliquando sub majoribus dimensionibus panis, juxta beneplacitum consecrantis signantis materiam in illud convertendam existere, provenit ex natura sive institutione Sacramenti Eucharistiæ ipsum ad hoc determinante. At verò substantia Angeli non est per se, & ab intrinseco sive ex natura sua determinata ad hoc, ut pro diversis temporibus sit nunc in minori loco, postea verò in majori; quin potius cum sit omnino invariabilis ab intrinseco, oportet consequenter, quod determinet ipsum Angelum ad existendum semper in æquali loco, si sit illi ratio formalis proxima existendi in loco.

Nego minorem: Cum enim substantia Angelica quantum ad motum, & unionem ejus ad talem, vel talem locum omnino pendeat ab ejus libera voluntate, licet secundum se sit invariabilis; tamen non determinatur ab intrinseco ad semper existendum in æquali loco; unde multò facilius, quàm anima rationalis potest majorem, aut minorem locum occupare, anima namque ita colligatur corpori, ut major, aut minor illius diffusio, ab ipsius corporis majori, vel minori constitutione pendeat; Angelus verò non ita pendet à loco; sed pro nutu suæ voluntatis potest suæ substantiæ præsentiam ad ampliorem, vel strictiorem locum profunderere.

Ratio autem cur peculiariter Angeli substantia ad occupationem loci pendeat potius ab ejus libera voluntate, non verò corporea hominis quantitas ita ejus libertatis imperio subdatur, ut pro nutu majorem, vel minorem locum occupet, neque animæ rationalis substantia libera sit ad totum corpus informandum, vel tantum aliquas illius partes, nec Deus possit efficere ratione suæ im-

immenſitatis , & æternitatis , quòd ejus ſubſtantia ſit tantùm in aliqua parte loci , non autem ubique ; neque quòd ejus duratio alicui tantùm parti temporis coexiſtat : Ratio inquam hujusce diſcrimiſis eſt , inquit noſter Rada , quòd quantitas perfectionis in Angelo , quantum ad illam unionem habet duo , ratione quorum convenit ipſi ita ſubdi libertati ipſius Angeli . *Primum* eſt , quòd ex propria entitate , & ex modo , quo unitur non repugnat ipſi indiſcruſter uniri toto loco , & parti ejus : *Alterum* eſt illam unionem eſſe terminum operationis liberæ ipſius Angeli , ſcilicet motus localis : nam Angelus medio motu locali applicat , & unit ſeipſum efficienter alicui loco . At verò quantitati corporeæ deest primum ratione ſuæ extensionis , ut explicatum eſt , & animæ rationali deest ſecundum , unio ſiquidem ejus ad corpus , quòd informat , non eſt terminus alicujus actionis liberæ ipſius animæ , ſed fit ab agente extrinſeco , & ſimiliter potentia Dei ad omnem locum , & coexiſtentia cum toto tempore , ſi ex parte Dei conſiderentur , non terminant actionem aliquam liberam ipſius Dei : ſed ſuppoſito , quòd ſint locus , & tempus , neceſſariò coexiſtit ipſis Deus , alioquin eſſet Deus mutabilis ſecundum locum , & ſecundum tempus .

Q U A E S T I O S E C U N D A .

Qualiter Angeli exiſtant in loco ?

TRIA maximè hac in quæſtione ſunt diſcruſtenda : *Primum* , an Angeli quælibet locum maximum , & minimum occupare valeant : *Secundum* , an plures eidem loco ſimul poſſint exiſtere : *Tertium* , an unus pluribus eſſe in locis queat ?

Notandum 1. Locum Angelorum diſtingui poſſe dupplicem ; adæquatum videlicet ſive totalem , & inadæquatum ,

ſeu partialem : *Locus adæquatus* , & totalis ille eſt , qui correfpondet Angelo ſecundum ultimum ſuæ potentiae , & virtutis , in quo toto eſſe ſubſtantialiter poſteſt , & extra illum ſimul eſſe naturaliter nequit : *Locus verò inadæquatus* , & partialis , atque minor toto loco adæquato , ille eſt , in quo Angelus exiſtens poſteſt etiam propria virtute extra illum eſſe ; videlicet tanquam in loco partiali continuo ; cujuſmodi eſt pars aliqua prædicti loci adæquati , & ſpatii . Quærimus ergo an Angelus naturali , aut ſupernaturali virtute poſſit in pluribus locis adæquatis , & inadæquatis ſimul exiſtere ?

Notandum 2. Extra controverſiam eſſe , quòd unus Angelus poſſit ſimul in pluribus locis inadæquatis continuiſ , & inter ſe non diſtantibus exiſtere , cum enim ejus ſubſtantiae præſentia ad locum pendeat ex ejusdem libertatis applicatione , aperte conſtat , quòd ſi aula ſit locus adæquatus Angeli , & quatuor illius aulae partes , & anguli ſint ipſius locus inadæquatus , quòd pro libito poterit ſuam præſentiam ab uno , & altero angulo remove , ut ſolùm duabus aliis partibus , & angulis ſe præſentem ſiſtat , maximè cum hoc virtutem ejus naturalem non excedat : indiviſibilis enim ejus ſubſtantia ad locum certæ , & determinatæ magnitudinis naturaliter non protenditur , quemadmodum extenduntur corpora , quæ pro ſua majori , vel minori quantitate majorem , vel minorem locum naturaliter , & neceſſariò requirunt : Unde ſolùm difficultas eſt an Angelus poſſit eſſe pro ſuo nutu , & virtute naturali in locis inadæquatis diſcontinuiſ , & inter ſe diſtantibus , contentis tamen intra locum ſibi naturaliter adæquatum ; v. g. an poſſit Angelus exiſtens in aula , ſe præſentem ſiſtere in duobus angulis iſtius aulae abſque eo quòd exiſtat in medio .

Notandum 3. Præciſam rationem , cur duo corpora non poſſint naturaliter cum-

eundem locum simul occupare, ex eo maximè repetendam, quòd eorum corporum quemlibet locum cui præfens est, repleat: Locus autem uno corpore repletus aliud capere nequit: quemadmodum vas aliquo liquore plenum, alterius liquoris superinfusionem virtute naturali non capit. An autem eadem vigeat ratio, vel alia similis proferenda cur duæ substantiæ spirituales eundem simul locum occupare non possint, Invicem non conveniunt Authores: plurimi namque cum S. Thoma, & ejus discipulis affirmant Angelos non posse uni, eidemque loco adæquato simul adesse: Cæteri verò cum Subtili Doctore rem problematicè in utramque partem disputant, magis tamen in affirmantem, quàm in negantem partem inclinant. His prænotatis sit.

CONCLUSIO PRIMA.

Licet Angelica substantia sit indivisibilis, divisibilem tamen locum occupare possit, nec non & minimum indivisibilem. Hæc Conclusio quoad utramque partem est Doctoris in 2. dist. 3. quæst. 6. num. 13. Quamquam enim hac in re videatur problematicus, magis tamen in affirmantem, quàm in negantem partem propendit.

Probatur prima pars: Nempe quòd anima indivisibilis divisibilem locum occupare possit: Si quid enim huic occupationi, & præsentiae obesset, maximè Angelicæ substantiæ indivisibilitas: sed illa non officit quia loco divisibili se præsentem sistere valet: Nam licet substantia animæ rationalis sit pariter indivisibilis, nihilominus divisibile spatium occupat, cum sit tota in toto corpore quòd informat, & tota in qualibet ejus parte: Similiter quamvis substantia, & essentia divina reverà sit summè indivisibilis, nihilominus quia est infinita secundum entitatem, per universum mundum realiter, & substantialiter diffunditur, ut probatum est agendo de Immenfitate divina: Ergo pari

ratione quamquam substantia Angelica sit indivisibilis, divisibilem tamen locum occupare potest.

Addè quòd cum Angeli præsentia fiat vel per voluntariam suæ substantiæ applicationem ad locum, ut supra cum Doctore Subtili docuimus, vel per virtutis applicationem, & diffusionem, ut contendunt Thomistæ, utraque schola hanc conclusionis partem necessariò pro certa, & indubitata habere debet: Certum namque est quòd Angelus naturaliter velle possit, quòd sua substantia per determinatum locum se præsentem sistat; quid enim huic volitioni posset obistere: Maximè cum substantia indivisibilis divisibilem locum occupare queat. Certum pariter, quòd Angelus alicui spatio extenso, & divisibili suam virtutem applicare potest; quamquam enim illius operativa virtus, & operatio sint in entitate sua formaliter indivisibiles, sunt tamen virtualiter divisibiles, & extensæ, eo quòd inferant, & immediatè causent effectû divisibilem, & extensû in subjecto circa quod operantur.

Indè tamen inferre non licet, quòd Angelus quantitati infinitæ, si daretur, posset fieri præfens, quippe cum ejus nativa virtus sit limitata, & determinata, nec proinde possit in infinitum se extendere; non enim fieri posset præfens quantitati infinitæ ut infinitæ, nisi præfens fieret omnibus ejus partibus, implicat autem finitam, & limitatam substantiam infinitis partibus posse proportionari, & commensurari: Ergo, &c. Vnde meritò concludit Doctor ibidem n. 11. *Conceditur communiter, quòd Angelus non potest esse in loco quantumcumque magno, quia hoc est proprium Dei.*

An autem Angelus habeat locum ita determinatum, ut non possit esse in majori vel minori; *Hoc (inquit numero 14.) dubium est, quia nec videtur posse faciliter probari una pari, nec alia; quòd quidem inconveniens est, si quantitas sua virtualis per quam potest esse præ-*

præsens alicui loco, sit naturalis ratio essendi in tanto loco suo modò, sicut quantitas corporis est naturalis ratio essendi in tanto loco suo modò; ita quòd licet in potestate mea sit, me esse in hoc loco, vel in illo loco, non tamen est in potestate mea esse in tanto loco, vel in tanto: Quia iste effectus est naturaliter consequens quantitatem, quæ non subest potestati meæ; & sicut nec in se, ita nec quantum ad istum effectum, esse scilicet in tanto loco, vel tanto. Nihil ergo videtur sequi inconveniens si ita poneretur in Angelis, vel si ponatur quòd quantitas eorum habeat aliquem locum adæquatum, quò majorem non posset habere secundum conditiones sue virtutis, & essentie; licet tamen ipsa subest voluntati Angeli, ut possit non semper habere illum locum, sed majorem vel minorem; non sequitur inconveniens. Quibus Doctor, inquit Poncius in Commentario ad eundem locum, vult non posse assignari ullam rationem convincentem, quæ probari possit quòd Angelus valeat occupare ad libitum minorem locum, aut quod non valeat. Si enim diceretur quòd ex natura sua quilibet Angelus petat esse connaturaliter in toto loco, sicut corpus quadripalmare petit esse in loco correspondenti, itaut non posset poni naturaliter in minori, certè non posset Angelus ponere se in minori loco, sed quamvis posset ponere se in alio loco, semper omnis locus in quo posset se ponere, deberet esse tantus: Nec est ulla ratio convincens ob quam non dicatur ita esse defacto. Rursus, si poneretur non exigere ex natura sua tantum locum, sed ex se esse indifferentem ad locum quemcumque infra locum summum, quem posset habere usque ad locum minimum, tum posset sine dubio poni in minori, & minori loco, nec necessariò deberet semper habere locum ejusdem magnitudinis: sed nec etiam ulla ratio convincens est ob quam ostendatur quòd ita non sit defacto. Hæc ita Poncius.

PROBATUR ETIAM SECUNDA PARS: Nempe quòd Angelus possit existere in loco minimo: quamquam enim Doctor locò supra laudatò numero 11. asserere videatur Angelum non posse existere in loco quantumcumque parvo, attamen id solum problematicè sustinet, quippe cum statim dubium proponat an possit esse in puncto, nec alterutram partem determinet, ait enim numero 13. *Si tamen posset esse in puncto vel non; non videtur ratio necessaria, nec ad unam partem, nec ad aliam: quia licet Angelus sit indivisibilis, non habet tamen indivisibilitatem limitatam sicut punctus: & ideo non oportet ipsum esse in puncto sicut in loco. Nec fortè repugnat sibi esse in puncto sicut in loco: quia nullum inconveniens videtur ex hoc inferri, quia si ex esse in puncto sicut in loco hoc inferatur quòd non posset moveri localiter nisi spatium esset ex punctis, non sequitur, posset enim immediatè ex hoc inferri, quia si ex esse in continuum, ejus continui punctus est terminus. Cum itaque censeat Doctor Angelum posse existere in puncto, haud dubium est eum pariter problematicè asserere eundem in loco indivisibili posse existere.*

Quod insuper suadetur: Ipsi loco potest inexistere substantia Angelica, cui reverà potest fieri præsens definitivè: sed Angelus definitivè potest esse præsens loco minimo, & indivisibili; siquidem per præsentiam definitivam res est tota in toto, & tota in qualibet parte totius, sic Angeli spsistantia cum sit indivisibilis potest rei indivisibili inexistere: Ergo, &c.

Adde quòd exinde nullum sequatur inconveniens; Nam, inquit noster Herrera Disputatione 6. questione 7. Si posset aliquid assignari inconveniens, maximè quòd Angelus non posset movere se localiter ex uno loco ad alium, quia punctus non est locus, cum sit indivisibilis, nec dantur duo puncta immediata. Hoc autem non obstat, quia

quia cum Angelus sit in loco definitivè, illud habebit rationem loci definitivè quòd potest fundare relationem præfentialitatis Angeli ad illud, & per consequens cum in puncto possit haberi ista ratio fundamentalis, quia potest prædicari de Angelo, hoc est, ita esse hic quòd non alibi, ideo in puncto potest reperiri vera ratio ubi vel loci. Inconveniens autem de motu locali nullum est, ut ipse Doctor respondet, quia Angelus existens in puncto posset ferre se immediatè in locum continuum, hoc est, in superficiem proximam puncto, cujus continui (scilicet superficiiei) punctus est terminus.

Denique quando Angelus est in loco sibi adequato, est etiam in quacumque parte ipsius: sed locus minor quocumque loco divisibili determinato, est pars illius loci magni: Ergo est in illo loco minori de facto, quando est in loco maximo: sed existentia ipsius in illo loco nullam habet dependentiam à simultanea existentia ejus in aliis partibus loci majoris: neque enim potest ostendi in quo genere causæ, aut conditionis sine qua non, possit habere talem dependentiam: Ergo potest esse in illo solo quin sit in reliquis partibus.

Obicies 1. Si Angelus existere posset in minimo loco, etiam posset existere in Cælo, & in terra. Probatur, quidquid potest esse in uno ex æqualibus, potest esse in quocumque alio ipsi æquali, si figuratio aliqua quæ esset in uno ex æqualibus non repugnet ipsi: sed nulla figuratio loci ullius potest repugnare Angelo cum sit indivisibilis: Ergo si potest esse in uno loco, potest esse in quocumque loco ipsi æquali, si non determinetur ad locum aliquem parvum. At hoc est inconveniens; quia sequeretur quòd Angelus posset esse naturaliter simul in Cælo, & in terra: Si enim potest occupare locum quadratum, hoc est, quatuor laterum æqualium, & non determinetur ad locum aliquem determina-

tum parvum, in quo minori esse non possit, quandoquidem ex illo loco quadrato possit fieri locus quadrangulus (hoc est quatuor laterum, quorum duo sint longiora aliis duobus, & æqualia inter se) tantæ longitudinis, ut possit protendi ad Cælum, quia latera ipsius possunt comprimi magis, & magis in infinitum, & quò magis comprimuntur latera, eò magis protenditur corpus illud versus longitudinem, sequitur quòd possit simul existere in Cælo, & in terra.

Respondet Poncius in sua summa Theologica, negando primum subsumptum, & sequelam probationis; quia ex quadrato quatuor pedum non potest naturaliter fieri ullum quadrangulum quòd possit protendi à terra ad Cælum; quamvis enim possit per compressionem laterum protendi in longitudinem majorem, & majorem in infinitum; tamen hoc tantum potest fieri respectu partium indeterminatarum, & in infinitum synchathegorematicè; Non verò respectu partium determinatarum, & in infinitum cathegorematicè; ex hoc autem non sequitur quòd simul possit naturaliter extendi usque ad Cælum: Sicut non sequitur, licet sint tot partes synchathegorematicè in quantitate, palmari quot in centum-palmari, quòd possit occupare simul tantum loci, quantum centum-palmaris.

Obicies secundò: Si Angelus non haberet locum determinatum quantum ad parvitatem, sed posset se præsentem sistere in minori, & minori in infinitum, esset perfectionis infinitæ: sed hoc est falsum: Ergo, &c. Probatur sequela; quia est majoris perfectionis in ipso quòd possit præsens fieri in minori, & minori loco: si enim, inquit Doctor, numero 12. posset in infinitum esse in majori, & majori loco, concluderetur infinitas virtutis suæ; ita ergo concluderetur infinitas virtutis suæ, si posset esse in infinitum in minori, & minori.

N:-

Negat sequens Doctor, nec non, & consequentiam ejus probationis; ratio namque disparitatis est, quod occupatio majoris, & majoris loci in infinitum, quæ argueret perfectionem infinitam, est illa quæ fit per partes determinatas, ex quibus si omnes ponerentur à parte rei, fieret infinitum cathegorematicum: Unde non est mirum quod virtus per quam illa occupatio fieri posset esset infinita, ac consequenter repugnans Angelo; sed occupatio minoris, & minoris loci in infinitum fit respectu partium indeterminatarum, ex quibus omnibus positis in actu, non sequitur infinitum cathegorematicum, dari.

CONCLUSIO SECUNDA.

Angelus non potest naturaliter esse in duobus locis adequatis: Nec etiam in locis inadequatis discontinuis: In utroque tamen potest supernaturaliter existere. Hæc tres partes complectitur quas omnes aperit Doctor quæst. 7. numer. 2.

PROBATUR PRIMA PARS: Locus adequatus ille dicitur qui nec locatum excedit, nec ab eo exceditur: Ergo implicat quod Angelus simul, & semel præsens sit pluribus locis, quorum quilibet sit adequatus. Patet consequentia; Si enim esset in pluribus, quemlibet eorum in particulari excederet; quippe cum ita non esset in uno quin pariter existeret in alio, & sic quilibet eorum locorum esset adequatus, ut supponitur, & simul non esset; quippe cum locatum existens etiam in alio priorem locum excederet. Deinde si Angelus posset esse simul, & semel in pluribus locis adequatis, non ei opus esset transire de loco ad locum ut aliquid operaretur: sed consequens est falsum, & contra Scripturam sacram, quæ docet Angelos accedere ad corpora vel ad spiritus, ut circa res ejusmodi quidpiam operentur, ut questione præcedenti dictum est. Ergo &c.

Tom. IV.

SECUNDAM PARTEM, ut debiam relinquere Doctor alius discutiendam. Cum enim dixisset quod unus Angelus non possit esse in duobus locis adequatis; Quia, inquit, tunc ipse locus non videretur sibi esse adequatus secundum virtutem suam naturalem. Subdit, Sed utrum in duobus locis discontinuis posset esse, quorum nec unus, nec alius esset sibi adequatus, dubium est: nec videtur ratio necessaria pro, nec contra. Verior tamen apparet negans sententia quam affirmans: Tum quia, si Angelus se præsentem sistere posset pluribus locis inadequateis discontinuis, similis esset in pluribus locis, ut plura sunt: Loca enim illa partialia, & inadequatea nec essent unum secundum entitatem, ut constaret nec secundum continuitatem: quippe supponuntur esse discontinua: nec secundum ordinem, quia præsentia Angeli in uno non derivatur ex præsentia illius in altero, adeoque Angelus esset in illis, ut plura sunt: Sed non potest esse in pluribus locis, ut plura sunt; alioquin etiam posset esse in pluribus locis adequatis, cujus contrarium mox probatum est. Tum quia, si posset Angelus naturaliter esse in pluribus locis inadequateis discontinuis, simul fieri posset præsens pluribus locis qualibet distantia invicem remotis; Si enim distantia quæ est inter duo loca inadequatea inter se discontinua non impedit quominus Angelus ipsis inexistat non existendo in intermediis, etiam major distantia illius Angelicæ præsentia non obstat: Sed illud consequens est absurdum: Sequeretur enim exinde, quod Angelus simul fieri posset præsens naturaliter Cælo, & terræ quod nullus Theologorum admittit.

Nec valet reponere id quidem fore verum si illa distantia, & discontinuitas, fieret extra spheram activitatis Angelicæ, & loci ejus adequati, quod cum ita non sit; inde non sequitur, nec Angelum esse in pluribus locis, ut plura sunt,

V

sunt, nec eum posse existere in locis quacumque distantia remotis: Hæc, inquam, responsio præcedentium rationum vim non infirmat. *Primo* namque siue illi loci sint extra spheram activitatis Angelicæ, siue non, reverà sunt invicem dissiti, & ab invicem distincti; adeoque reverà sunt plures, subindeque Angelus in eis existens, existit non ut in uno, sed ut in pluribus. *Adde* quòd cum Angelus sit præsens loco ratione suæ substantiæ, & per applicationem liberæ voluntatis, si possit se præsentem sistere in quatuor angulis aulae invicem discontinuis, quidni pariter poterit se præsentem sistere etiam in loco aulae viciniore, non tamen contiguo; si enim distantia unius cubiti non impediatur quominus sit præsens locis discontinuis, quà ratione poterit impediri distantia duorum vel trium cubitorum?

Confirmatur hæc ratio unà cum præcedentibus. *Primo* quidem, quia nulla apparet ratio ob quam talis virtus videatur potius Angelo tribuenda quàm cæteris entibus, quæ limitata sunt, & determinata naturaliter ad unum locum, ita quòd statim ac videmus rem in loco, conjicimus illam distingui ab alia in altero loco posita. *Secundo*, Angelus ita determinatur ad locum, quemadmodum anima ad informandum corpus; sed eadem anima nequit simul informare partes distantes non informando intermedias: Ergo nequit Angelus existere in pluribus partibus discretis loci nisi existat in partibus intermediis. *Tertio*, multiplicatio præsentia Corporis Christi in diversis locis invicem dissitiis dicitur miraculosa: Ergo miraculum foret si res spiritualis existeret in diversis locis discontinuis, & consequenter Angelus se præsentem sistere nequit virtute propria in diversis locis dissitis.

Dices 1. Tota ratio propter quam nullum corpus potest esse in duobus lo-

cis etiam partialibus discontinuis, & distantibus, est quia corpus est quid continuum, & dependens à loco, subindeque non potest esse in locis discretis nisi ejus quantitas dividatur: Hæc autem ratio locum non habet in Angelis cum careant quantitate, & sint independentes à loco: Ergo, &c.

Nego majorem; Non enim ideo corpus aliquod non potest esse in pluribus locis quia divideretur, sed etiam quia secundum suam entitatem limitatam ita determinatur ad unum locum, ut simul plura occupare nequeat: quæ ratio in Angelis viget. Unde sicut corpus clauditur in uno loco circumscriptivo, nec potest simul plura occupare ut plura sunt, & discontinuata; ita pari ratione loco definitivo clauditur Angelus, ut propria sua virtute non possit ad plura, ut plura sunt, sese extendere.

Dices 2. Angelus, ut diximus, est in loco per liberam applicationem suæ substantiæ ad illum, ita ut cum voluerit, possit suam substantiam applicare toti loco sibi adequato, vel solum alicui ex ejus partibus: Ergo nihil prohibet quominus possit illam applicare duabus extremitatibus, non vero medio.

Nego consequentiam, quòd enim Angelus totum locum sibi adequatum occupet vel tantam unicam ejus partem, nulla apparet repugnantia; cum inde non sequatur eum esse pluribi, & ultra spheram suæ virtutis naturalis: Id autem sequitur si duobus locis inadæquatis discontinuis adesset, adeoque non est paritas.

PROBATUR TERTIA PARS, nempe quòd inquit Doctor *numero* 2. Angelus esse possit in pluribus locis tam adæquatis, quàm inadæquatis per divinam potentiam: Si quid enim obesset maxime quia unum, & idem non posset esse in pluribus locis modò definitivò: Sed consequens est absurdum, nam Corpus Christi Domini præsens est realiter sub speciebus Eucharisticis discontinuis, & distan-

stan-

stantibus: Ergo multò magis Angelus pluribi præsens adesse poterit: Patet consequentia, facilius enim est unicum quàm plura patrare miracula: Ut autem Corpus Christi præsens fiat sub speciebus consecratis, duo maxime oportet interveniant miracula, aliud quò sua nativa quantitate spoliatur, & modo veluti spiritali existat; alterum quò fiat pluribi præsens; ut autem Angelus pluribus locis addit, unicum tantùm miraculum requiritur, quò videlicet ejus præsentia multiplicetur: Ergo multò facilius quàm corpora pluribi poterit constitui.

Dices primò: Si Angelus pluribi existeret, distaret à se: Sed hoc est absurdum: Ergo &c. Probatur sequela majoris, quia loca illa, ut supponitur, distant à se: Ergo, & Angelus existens illis.

Probatur consequentia, quia quæ sunt simul uni tertio, sunt simul inter se: Ergo quæ non sunt simul uni tertio, non sunt simul inter se, & consequenter sunt distantia inter se.

Respondet Doctor numero supra laudato, Negando sequelam cum consequentia utraque probationis: Quia quemadmodum non sequitur, quòd Deus distet à se, etiam si distent corpora quibus est præsens; & quemadmodum non sequitur quòd anima hominis distet à se, etiam si informet manum dextram, & sinistram quæ inter se distant: Ita non sequitur quòd Angelus existens in pluribus locis distet à se, etiam si loca in quibus existit, distent inter se; sive existat in illis locis supernaturaliter aut naturaliter: sed solum cognoscitur quod existat in illis. Quod addo, quia si cognosceretur quòd Angelus existeret in uno loco naturaliter; & Angelus existeret etiam in alio loco naturaliter; deberet existimari quòd non esset unus Angelus qui existeret in utroque loco.

Ad confirmationem autem distingue

consequens Doctor: quando illud quod est simul in illis, est limitatum ad unum tantum, concedit: quando non est, negat: sicut patet de anima, inquit, in manu dextra, & sinistra posita, quæ anima non distat à se, & tamen manus distat à manu: Similiter Deus non distat à se, tamen distant inter se illa, quæ cum illo sunt, vel hic vel Romæ.

Dices secundò: Angelus est unius naturæ limitatæ: Ergo debet esse limitatus secundum quodlibet quod potest ipsi inesse, & consequenter nequit simul habere plura loca.

Respondet Doctor distinguendo consequens, secundum quodlibet omnino cujuscumque rationis, negatur consequentia, quia aliàs non posset habere plures intellectiones simul, nec plures etiam præsentias continuas: secundum quodlibet quod sibi potest inesse per modum proprietatis naturalis, & accidentis inseparabilis, transeat prima, consequentia, & negatur secunda.

CONCLUSIO TERTIA.

Probabilis est plures Angelos naturali virtute posse simul esse in eodem loco, non solum materiali, sed etiam definitivo, Ita Doctor, qui quamvis dubius hac in questione resolvenda videtur, nihilominus affirmantem partem probat, negantis verò argumenta dissolvit: Suadetur primò ex S. Patribus, quorum Alti qui licet corpora Angelis assignant sicut, & hominum animis, utrosque tamen in eodem loco posse plures consistere asserunt. Sic Tertullianus; *librò de anima*, cap. 25. Platonem sectis opinantem redarguit, *Quòd si quis ut Plato*, inquit, *non putat duas animas in unum convenire, sicut nec corpora, ego illi non modo duas animas in unum concessas ostendissim, sicut, & corpora in se ipsis; verum, & alia multacuna anima conferta, Demones scilicet, nec unius, ut in Socrate ipso; verum, & septenarii spiritus, ut in Magdalena; & legionarii numeri, ut in Geraseno: quò*

V 2

faci-

facilius anima cum anima conferetur ex societate substantiæ, quàm spiritus nequam ex diversitate naturæ. Gregorius verò Nazianzenus Epistola primâ ad Cledonium refutans Epollinarem, qui perfectum hominem fuisse negabat in Christo, quoniam duo perfecta simul esse nequeunt; ita respondet: *Non sanè, siquidem corporeo modo rem expendas; vas enim unius modii capax, duos modios minime continebit, nec corporis unius locus duo, aut plura corpora. Si autem ut intelligibilia, & incorporea ea considerare, illud animadvertite, quòd idem ipse, & animam, & rationem, & mentem, & Spiritum sanctum continui: Subdit, hæc enim intelligibilium natura est, ut incorporeo, & indivisibili modo, & inter se, & cum corporibus misceantur. Quæ mixtio non sit secundum substantialem eorum unionem, sed secundum ejusdem loci occupationem, & præsentiam.*

Probat Doctor 1. quidem auctoritate Richardi à sancto Victore; qui colligit Dæmones non habere corpora, eo quòd integra Dæmonum legio unicum hominis corpus occupaverit. Non enim potuisset legio fuisse in aliquo, si Dæmones habuissent corpora, ideo, inquit Doctor, videtur arguere quòd si habuissent corpora, fuissent corpora eorum simul in eodem loco. Igitur modò quando non habent corpora, videtur dicendum quòd simul fuerunt absque corporibus.

Insuper si unus Angelus movens cælum sit in meridie, & alius bonus Angelus missus de cælo ad terram debeat transire per illum locum, non videtur necessitas quòd non transeat per lineam rectam, vel quòd alius cedat sibi. Denique, inquit, si omnes Angeli fuissent creati ante creaturam corporalem, sicut videtur verum secundum Damasc. lib. 7. cap. 21. non videtur facillè assignare quomodo tunc non fuissent simul: & si tunc non fuisset inconveniens eps esse si-

mul, nec modò: quidquid autem sit de facto, & de possibili, de potentia; dico naturali eorum: De Possibili tamen respectu potentie divinæ, non videtur esse impossibile, quin per ipsum possent esse simul.

Probat in super conclusio. Duo Angeli possunt virtutes suas naturales operativas, atque suas substantias eidem simul corpori seu loco totaliter applicare, & præsentés facere: Ergo in eodem loco adæquato possunt simul adesse secundum suas virtutes, & essentias. Consequentia est evidens: Antecedens probatur manifestissimè, quia Angelus potest simul cum anima rationali idem inhabitare corpus, ut patet in his qui vexantur à spiritibus immundis: Ergo pari ratione poterit esse simul cum altero Angelo, quia anima rationalis est ejusdem rationis cum Angelis quantum ad modum existendi in loco. Deinde, quia si virtutes, & essentie duorum Angelorum eidem loco simul applicatæ esse nequirent, maximè quia unus virtus, & essentia non compateretur secum virtutem, & essentiam alterius, sed illam excluderet: quemadmodum quantitas una corporea à suo loco naturaliter pellit alteram; hoc autem dici non potest, cum virtutes illæ, & essentie sint spirituales, aliàs neque virtus animæ, & essentia secum pateretur in eodem loco, & corpore Angelicam virtutem, & essentiam: Igitur &c. Denique virtutes, & essentie Angelorum multò immaterialioris, & sublimioris naturæ sunt quàm lumen istud quod videmus: Sed constat duo diversa lumina à duobus luminosis causata in eodem simul adæquato loco existere: Ergo à fortiori poterunt simul applicari, & in eodem loco esse duæ virtutes, & essentie Angelorum; atque adeò, & duo vel plures Angeli, quia unus alteri non obstat.

Dices 1. Non possunt dari duæ causæ totales respectu ejusdem effectus: sed operationis quâ constituitur Angelus

in

ih loco, ipsemet Angelus est causa totalis: Ergo alius Angelus nequit habere operationem in illo loco, & consequenter nequit esse in illo loco.

Respondet Doctor primò, Falsum supponi in hoc argumento, nempe quòd Angelus constituitur formaliter in loco per operationem.

Respondet 2. Quòd quamvis id concederetur, & quòd una operatio provenire posset à pluribus Angelis, & consequenter quòd ab una operatione non haberent esse in eodem loco; tamen inde non sequeretur quin quando Angelus unus habet unam operationem, alter posset habere aliam: Quòd si dicatur quòd in corpore nequeat Angelus habere ullam operationem, nisi operationem loco motivam, quæ moveat ipsum localiter, & quòd quando movetur ab Angelo localiter per unum motum non possit moveri per alium alio motu.

Respondet 3. Hòc gratis concessò, adhuc duos Angelos posse concurrere ad eandem operationem, itaut uterque non sit causa totalis ipsius, sed partialis, & cum quamvis ab operatione eandem haberent esse in loco, non sequeretur quòd idem effectus produceretur à duabus causis totalibus. Quòd autem Angelus possit esse causa partialis talis motus, & admittere concursus alterius, patet, quia est causa libera illius non minus quam homo, & potest consequenter adhibere totum conatum, vel partem: etsi partem adhibuerit alter Angelus; potest hic adhibere liberè aliam partem; & sic motus integer erit ab utroque tanquam à duabus causis partialibus integrantibus unam causam totalem.

Dicit 2. Quæ habent eundem modum essendi non possunt esse simul: sed Angeli habent eundem modum essendi in loco: Ergo non possunt esse simul. Probatur major, quia propterea quo corpora gloriosa nequeunt naturaliter esse simul, quamvis corpus gloriosum possit

esse simul cum corpore non glorioso; & propterea etiam si essent quo Dii, non essent simul secundum Damascenum, quamvis uterque esset simul cum Creaturis.

Respondet idem Doctor negando majorem, quam meritò putat esse irrationabilem, seu improbabilem, quia esse in loco, non importat ullum respectum essentialem, & dependentiam rei locatæ ad locum; esse autem ab alio tãquam à causa per se sicut effectus est à causa, dicit dependentiam essentialem effectus ad causam: Ergo si possunt esse plures effectus ab una causa; non erit inconveniens quòd plures res possint esse in eodem loco quantum est ad esse in præcisè. Deinde omnia temporalia dicunt eundem respectum ad tempus, seu eundem modum essendi in tempore, sicut spiritualia dicunt eundem modum essendi in loco: sed hoc non obstante plura temporalia possunt esse simul in eodem tempore: Ergo, & plura spiritualia in eodem loco quantum ad hanc rationem. Denique omnia accidentia corporalia habent eundem modum essendi in loco, & tamen hoc non obstante plura ex illis sunt in eodem loco ut albedo, & dulcedo lactis. Ad probationem autem majoris respondet: Si verum est quòd duo corpora gloriosa nequeant esse simul, aut duo Dii, quod hoc non oriatur ex eo quòd habeant eundem modum essendi in loco; sed ex aliqua alia ratione. In rei autem veritate existimandum potius est quòd duo corpora gloriosa possint esse simul, & duo etiam Dii si essent possibili.

Dices 3. Plurimi è sanctis Patribus in ea sunt sententia, quòd nulla res creata quantumvis corporis experts, cum re altera spirituali misceri infundique possit, utpote cum hoc Dei sit proprium, cui (inquit Paschasius libro secundo de Spiritu sancto cap. 1.) Tantum debetur hoc privilegium ut conscientiam possit

fi intrare secretam : anima verò animæ aut Angelus Angelo conjungi potest, infundi non potest. Hinc affirmat Demones hominum incessores, Solas corporis latebras intrare posse ; animæ verò interiora adire non posse : Quod eo argumento probat, quia conscientias scire non possunt. Idem docet Didymus lib. 1. de Spiritu sancto cap. 15. sed clarius Cassianus collatione septima cap. 13. ubi ait : Nihil esse incoporeum nisi solum Deum, & idcirco ipsi tantummodo penetrabiles omnes spirituales, atque intellectuales esse substantias eò quod solus, totus, & ubique, & in omnibus sit; ita ut cogitationes hominum, & internos motus absque additamentis, & universa inspicat atque perlustrat : Ergo reverà duo Angeli non possunt esse simul sicut nec cum anima rationali.

Nego consequentiam, Præfati namque Patres, & quicumque alii, qui similia proferunt, non tam de ea penetratione, & Infusione que per loci conjunctionem fit, intelligendi sunt, quàm de efficientia, & instinctu quò per sese, nullaque re interjecta, Deus animam nostram movet, quod Angeli præstare nequeunt. Ita rem interpretari videtur sanctus Bernardus Sermone quinto in Cantica: Illud, inquit, scitote nullum creatorum spirituum per se nostris mentibus applicari; ut videlicet nullo mediante nostri sive corporis instrumento, ita nobis immisceatur, & infundatur, quò ejus participatione docti sive doctiores; vel boni sive meliores efficiamur. Nullus Angelorum, nulla animarum, hoc modò mihi capabilis est, nullus ergo capax. Nec ipsi Angeli ita se alterutrum capimus. Sequeretur proinde prærogativa hæc summo ac incircumscripto Spiritui, qui solus cum docet Angelum, sive hominem scientiam, instrumentum non querit nostræ corporeæ auris, sicut nec sibi oris. Per se infunditur; per se innoscit, purus capitur à puris.

SECTIO SECUNDA.

De Motu Angelorum.

QUONIAM localis motus ad locum comparandum ordinatur, idcirco explicatio Angelorum locò, de illius acquisitione, vel amissione; ac subinde de mutatione locali quæ ad illum terminatur, ordine methodico dicendum sequitur, ejusque non solum existentia, sed, & causa, natura, ac species variæ in præsentí Sectione sunt apericiendæ.

QUÆSTIO PRIMA.

An, & per quid Angeli localiter moveri dicantur?

NOTANDUM 1. Circa præsentis Quæstionis determinationem triplicem esse Authorum sententiam: *Prima* fuit Durandi in *primum dist. 37. secunda* parte illius quæst. 1. numero 26 asserentis Angelum simul esse ubicumque operari potest, sive simul, sive successivè, unde sentit, & quòd Angelus simul sit in omnibus corporibus Universi, & quòd si plura vel majora fierent, statim, & sine ulla sua mutatione in eis existeret, quia in omnibus potest semper successivè operari, quamvis non possit omnia simul movere; quia, inquit, sufficit habere simul potestatem ad operandum in quocumque loco disjunctim, & in omnibus successivè, ut simul omnibus adsit, eò modò quò potest esse; *Inde quæstione secunda* infert non posse Angelum propriè moveri localiter, ita ut transferatur de loco ad locum, quia non est in loco circumscriptivè, nec definitivè; sed simul est in omni loco in quo esse potest. Hinc putat Angelum non propriè moveri localiter, ita quòd ejus substantia deserat unum locum, & incipiat esse in altero: sed solum quia suc-

successive apparet in diversis locis per varios effectus quos in illis producit. *Secunda sententia* est sancti Thomae *prima parte questione 53. articulo 3.* Nec-non, & Cajetani ibidem articulo primò, ubi ait; Diligenter advertendum est motum localem propriè loquendo non convenire substantiis spiritualibus: sed quemadmodum abusive, & equivocè dicitur, substantias spirituales esse in loco; ita, & moveri localiter. Unde moveri non est eas esse subiectum motus, sicut nec locari est eas esse subiectum ubi: sed virtualiter tangere in genere causæ efficientis diversa loca. *Tertia* denique sententia est Doctoris Subtilis in *secundum dist. 2. questione 9. & sequentiis*, ubi sicut Angelum verè, & propriè constituit in loco per suam substantiam, ita, & affirmat verè, & propriè moveri.

Notandum 1. Cum nostro Herrera, *Disputatione 7. questione prima*, quod in unoquoque loco spatium reale aliter sese habeat ad corpora quàm ad spiritus; nam respectu corporum se habet per modum continentis, quia reverà corpus continet, & per modum spatii repleti; quippe cum corpore ita impleatur, ut aliud admittere nequeat; sic dum aqua est in vase, vas dicitur locus aquæ, quatenus aquam continet, dicitur autem spatium, quatenus impletur aqua: Potest etiam dici ubi ipsius aquæ, quatenus nempe fundat vel terminat relationem præsentialitatis, quia ita aqua est hic ut non sit alibi. Quantum autem ad spiritus, spatium illud reale potest quidem habere rationem loci, nec-non, & ubi respectu substantiæ spiritualis in ipso locatæ, siquidem substantia illa Angeli vel animæ rationalis, ita ibidem est realiter, ut non sit alibi, non tamen potest habere rationem spatii repleti, quippe cum spatium illud reale non impleatur per præsentiam substantiæ spiritualis, sed etiam si adessent omnes Angeli in aliquo reali spatio, non mi-

nus spatium illud posset quodlibet corpus excipere quàm si nulli spiritus adessent.

Notandum 3. Ex Doctore libro 11. in *Metaphysicam numero 93.* aliquid moveri, & movere tripliciter. 1. Per accidens, 2. juxta aliquam partem; 3. secundum se totum: illud dicitur moveri per accidens quod movetur ad motum alterius cum quo naturalem habet connexionem, sive hæc conjunctio fiat per modum formæ substantialis aut accidentalis: Sic movetur anima ad motum corporis, & quodlibet accidens ad motum sui subiecti: Vel ad motum integran- tis, sic partes moventur ad motum totius; vel uti contentum in continente naturaliter, sic liquor movetur ad motum vasis, & Nauta ad motum navis circumfertur; vel quod alicui conjungitur aliqua necessitate naturali, ut grave illi cui innititur. Secundo modo aliquid dicitur *motum*, aut *movens* propter motum ab aliqua sui parte productum, aut in ea receptum: Sic Petrus dicitur sanatus, propter sanatum illius oculum, & jecisse lapidem, propterea quod manu lapidem projecerit. Tertiò modo aliquid dicitur *motum*, & *movens* secundum se totum: Sic animal movetur secundum omnes sui partes, & aqua frigefacit, & ignis calefacit secundum omnes sui partes.

His ita prælibatis, tria sunt in præfati questione determinanda. Primum an Angelus reverà moveatur localiter, non solùm metaphoricè, sed etiam realiter, & propriè. Secundum utrum moveatur motu tam per se quàm per accidens. Tertium an non solùm ab alio moveri, sed etiam seipsum movere possit.

CONCLUSIO PRIMA.

Angelus reverà movetur localiter: Idque motu propriè dicto: hæc est communis quantum ad primam partem inter Theologos contra Durandum. Probatur primò autoritate Scri-
ptu-

pturæ sacræ, quæ motum localem tribuit Angelis non solum in corpore, existentibus, sed etiam extra corpus; sic *Isaya 13. de Dæmonum principe dicitur Quomodo cecidisti de celo Lucifer? Quibus verbis Diabolorum principis, & omnium suorum Affectarum memoratur lapsus, non solum secundum affectum depravatæ voluntatis, sed etiam secundum loci distantiam, & eorum è Cælo usque ad inferiores partes terræ defectionem. Quod utique confirmat Christus Dominus. Luc 10. Dicens, videbam Satanam quasi fulgur de Cælo cadentem: Hinc *Apocalyp. 11. Narratur prælium magnum per Principem exercitus Domini, nempe Michaelem, adversus rebellantes Angelos factum, & eos ita de Cælo fuisse decurpatos, ut non fuerit inventus amplius locus eorum in Cælo.**

Idem confirmant omnes illi textus in prima conclusionis præcedentis sectionis à nobis laudati, quibus non solum, apertè significatur Angelos reverà locum occupare, sed etiam de loco in locum per motum localem deferri.

Confirmatur. Ex eo quòd idem asserendum sit de Angelis, quòd de anima separata: sed anima rationalis à corpore sejuncta, reverà movetur localiter: Ergo, & Angeli. Major constat tum ex illo *Mathei 22. Ubi Christus Dominus docet animarum in Cælo existentium sortem fore Angelis similem, erunt, inquit, sicut Angeli Dei* Tum ex eo quòd animæ separata omnino sint substantiæ spirituales, nullum actuale cum corpore commercium habentes, sicut Angeli; adeoque si non obstante sua spiritualitate, & indivisibilitate locum occupare possint, & moveri localiter, idem de Angelis ferendum erit iudicium. Probatur minor, tum ex articulo fidei quò credimus animam beatissimam Christi in triduo mortis descendisse ad inferos: Nam Concilium Lateranense sub Innoc. III. *Cap. firmiter*, exponens illum articulum fidei, *Descen-*

dit ad inferos, resurrexit à mortuis, & ascendit in Cælum, ait, Sed descendit in anima, resurrexit in carne, ascendit in utroque: Ergo reverà Christi Domini anima descendit ad inferos per motum localem corpus suum deferendo, & inferiores terræ partes subeundo. Tum quia iustorum animæ statim è corporibus solutæ, dicuntur deportari per sanctos Angelos in locum quietis. Sic *Luce 16. anima Lazari dicitur deportata in sinum Abrahæ: Ergo certum est eas de loco in locum moveri.*

Reponit Durandus quòd ad prædictorum textuum veritatem non sit necesse Angelos substantialiter locum mutare, sed satis esse quòd mediante aliquo effectu iucipiant apparere, et se præsentés significare ubi antè non apparebant; quemadmodum *Matthæi 3. Dicitur de Spiritu sancto quòd descendit sicut Columba super Christum, & Ioannis 3. de Filio quòd descendit de Cælo.* Unde quemadmodum ille Filii, aut Spiritus sancti descensus non significat in eis mutationem localem; sed solum quòd Spiritus sanctus per Columbam, & filius per assumptam humanitatem de novo produxerit, aliquem effectum quem antè non edebat: Ita à simili, non opus est ut Angeli secundum suam substantiam locum mutant, sed sufficit quòd quædam opera alicubi exerceant, ut ad eum locum dicantur moveri.

Contra: Toties Scripturæ sacræ verba debent ad literam usurpari, quoties nullam in se repugantiam, aut aliquid implicans, & indecens involvunt: Sed tales sunt illi textus motum localem in Angelis affirmantes. Nihil enim exinde sequitur absurdum, ut constabit in solutione argumentorum obijciendorum, sicut grande sequeretur absurdum, si Filius, aut Spiritus sanctus diceretur mutare locum substantialiter; hoc enim apparet impossibile ex ipsamet Scriptura sacræ, quæ Deum ubique præsentem difertè pronunciat, adeoque incapacem qui

qui substantialiter locum mutet, quod de Angelis dici nequit. Adde quod præfatos contextus eum in modum interpretati fuerint sancti Patres: Maximè S. Augustinus libro primo retractationum cap. 24. ubi ponit differentiam inter descensum Angeli, & descensum Filii Dei, *Quia Filius Dei non descendit, neque venit ubi antea non erat, sed apparuit in humana carne secundum, quam antea non erat: Angelus autem reversa secundum substantiam deseruit Cælum, & cepit esse ubi antea non erat.* Similiter S. Ambrosius, libro de Spiritu sancto cap. 10. Comparans Spiritum sanctum cum Angelo ait. *Ille cum sit ubique non potest recedere à loco, neque acquirere locum; Angelus verò cum loco definiatur, potest locum acquirere, & deferere.* Quod egregie explicat Diadochus apud Damascenum in Eglogis titulo 47. *Solius, inquit, divini Verbi, quod hominem suscepit, proprium est, (ubique esse) quod, & in terra hac verò, & non sola specie visum est, & Cælum non reliquit, sed omnia semper comprehendens, uti scilicet propter incircumscriptam immensitatem naturæ divinæ, quod quidem Angeli non possunt: Quo enim tempore mittuntur in mundum, impossibile est eos in eodem loco esse, & supra Cælum.*

Hoc ipsum confirmant omnes alii sancti Patres: Sic S. Chrysostomus homilia tertio in Epistolam ad Hebræos; tractans illa verba, in ministerium missi, ait de Angelis: *in multa loca propter nos mittuntur, & ad nostram ministrant salutem. . . : Circa nos cursitant, hoc est eorum ministerium, propter nos in omnes mitti partes: Quod variis Scripturæ testimoniis confirmat, & tandem differentiam missionum Filii divini, & Angelorum explicans ait, Filius, non sicut Angelus fuit missus, non enim à loco in locum transit, sed carnem suscepit, Angeli verò loca mutant, & prioribus, in quibus sunt, dimissis, ad alia veniunt, in*

Tom. IV.

quibus non erant. Concinit S. Gregorius Nazianzenus, oratione 34. Ubi inter proprietates Angelorum ponit; *Quod omnia loca peragant, omnibus ubique impègrè adsint.* Tum ob ministerii promptitudinem, tum ob naturæ levitatem. Ubi notanda est hæc particula, *ubique adsint*, ejusque explicatio, per quam satis declarat non esse simul ubique, sed posse ubique nos juvare, & impègrè id facere per promptitudinem voluntatis, & naturæ velocitatem. Quomodo loquitur etiam Tertullianus in Apolog. cap. 22. Dicens: *Omnis spiritus ales est, hoc est, Angeli, & Dæmones; Igitur momento ubique sunt, totus orbis illis locus unus est, quid ubique geratur, tam facillè sciunt, quàm enunciant, velocitas divinitas creditur, quia substantia ignoratur.* Ubi per vocabulum *Ales est*, alludit ad Sententiam Dionysii in cap. ultimo de celesti Hierarchia dicentis, *Angelos depingi pennatos, ut eorum celeritas significetur:* Et ratione ejusdem velocitatis dixit Tertullianus *Angelos in momento ubique esse, Utique per velocissimum transitum: qualiter etiam,* intelligendus est S. Hieronymus Epistola 55. ubi tractans illud Apocalypsis 14. *Sequuntur agnunt quocumque ierit: Dicit, Si Agnus ubique: Ergo Martyres, qui cum agro sunt, ubique esse credendi sunt; Unde subdit, eum Dæmones toto vagentur orbe, & ex celeritate nimia, ubique præfentes sint, multò magis Martyres, &c.* Quæ omnia verum, ac realem motum significant: adeoque Angeli non solum reverà moventur, sed etiam motu reali, & proprio.

Probat pariter hanc veritatem ratione Doctòr subtilis, questione 9. num. 8. Omne receptivum formarum alicujus generis, quod non est ex se determinatum ad aliquam unam ex illis, nec est illimitatum ad illas omnes habendas, moveri potest ab una illarum formarum ad aliam, ut patet de superficie, quæ cum sit plurium colorum recepti-

va,

va, nec determinata ad illorum aliquem, potest nunc istum, nunc alterum recipere: Sed Angelus est receptivus plurium *ubi*, in quibus verè existere potest definitivè, ut supra probatum est, & non est magis determinatus ad unum locum, quàm ad alium, neque potest omnibus simul esse præsens, sed interdum in uno, quandoque verò in alio, quia nec est infinitus, nec est immensus; Ergo mutari potest ab uno *ubi*, & loco ad alterum.

Deinde Angelus habet locum definitum, cui ex natura sua necessariò non adest: Ergo & mutabilitatem à loco in locum. Consequentia est evidens, quia immutabilitas localis provenire tantum potest, vel ex necessaria præsentia in omnibus locis simul, vel ex adhesionē necessaria ad unum locum. Antecedens verò constat quantum ad primam partem, nempe quod Angelus habeat locum determinatum, siquidem reverà est in loco ut supra probatum est: Patet etiam quantum ad secundam partem: Locus enim realis, est quid corporeum; Angelus autem nulli corpori naturali necessitate adhæret, cum nec sit ejus forma substantialis, nec ad ipsum constringatur ex natura sua; adeoque ab ipso præpediti non potest ejus motus, sicut impediri potest motus animæ rationalis, dum in corpore detinetur. *Denique* cum Angeli intellectu, & voluntate polleant, possunt cognoscere, & appetere locum: at in eis frustraneus esset ille appetitus, si ad illum locum non possent sese transferre; Ergo &c.

SECUNDA PARS etiam ex dictis probata manet, nedum enim illi tum Scripturæ, tum sanctorum Patrum contextus motum in Angelis affirmant, sed etiam ipsum esse verum, & realem significat, quod insuper probatur. Angelus verè, & propriè existit in loco corporali, quamvis non commensurativè, sed solum definitivè: Ergo verè, & propriè moveri potest localiter. Con-

sequentia patet, quoniam eo modo convenit rebus finitis, & limitatis moveri, quo convenit eisdem esse in loco. *Deinde* qui verè, & propriè mutat locum, unum deserendo, & alterum acquirendo, etiam verè, & propriè movetur localiter; Motus enim localis fit per veram abjectionem unius termini à quo, & acquisitionem termini ad quem: sed Angelus dum de Cælo v.g. ad terras descendit, reverà cælum deserit, & terram pergit, siquidem ut supra dictum est ex sanctis Patribus, non possunt esse naturæ viribus simul in Cælo, & in terra: Ergo, &c.

Denique, quidquid secundum se transit de loco in locum per applicationem suæ substantiæ diversis locis, etiam secundum se, & substantialiter, non autem tantum metaphorice, & æquivocè dicitur moveri; Sed Angelus dum alicubi apparet, reverà ibi substantiam suam applicat, eamque removet à loco, in quo prius erat: Ergo substantialiter, & propriè movetur.

Dices 1. Ex Aristotele 3. *Physicorum* textu 6. Motus est actus entis in potentia secundum quod est in potentia, Ergo est acquisitio alicujus perfectionis, quam mobile habere non potest, nisi per motum. Sed nec *ubi*, nec *locus* potest esse perfectio Angeli: Ergo non potest moveri ad illa. Probatur minor: Omnis perfectio præstantior est perfectibili: Sed nec *ubi*, nec *locus* sunt perfectiora Angelo: Ergo nec sunt ipsius perfectiones.

Respondet Doctor numero 9. negando minorem cum majore probationis illius: Etenim, inquit, *Angelus habet intellectiōem, quæ est perfectiō potentiæ intellectivæ: tamen intellectiō est simpliciter ignobilior, sive imperfectior natura Angelica. Et ita potest concedi de usi, vel præsentia corporali cum Angelo, quod sit aliqua perfectiō Angeli, sicut aliquis actus dicitur perfectiō: sed longè ignobilior illa natura, cui inest. Adde* quod,

quod, non omnis motus terminari debeat ad perfectionem mobilis; nulla namque perfectio per motum neutrum, & violentum comparatur.

Instituis ex Philosopho 4. Physicorum: indivisibile moveri nequit; sed Angelus est indivisibilis: Ergo non potest moveri.

Respondeo, Philosophum loqui de indivisibili quantitativo, cujusmodi est punctum, quod non movetur motu propriè dicto, per quem videlicet acquiritur locum, & ubi circumscriptivum, non autem loquitur de indivisibili substantiali, cujusmodi est Angelus.

Urgetis: motus est accidens divisibile; sed substantia indivisibilis, qualis est Angelus, non potest esse subjectum accidentis divisibilis: Ergo nequit Angelus esse subjectum motus, nec propriè moveri localiter.

Distinguo maiorem, indivisibile non potest esse subjectum accidentis divisibilis permanentis, id est, habentis omnes suas partes simul, cujusmodi est albedo, & nigredo, concedo; Successivi, quod habet esse in fieri ut motus, nego. Vel aliter, *distinguo* minorem, non potest esse subjectum motus divisibilis per seceptionem illius divisibilitatis, & extensionis concedo; per commensurationem, & quamdam proportionem ad ipsum, nego: Sic enim anima rationalis, licet secundum substantiam indivisibilis, est in corpore divisibili, quod informat, & Angelus in loco divisibili, cui præsens est.

Dices 2. S. Augustinus lib. 8. de Genesi ad litteram cap. 20. Docet corpus omne moveri per tempus, & locum: Creaturam autem spiritualem non moveri per locum, sed tantum per tempus; Deum autem nullo modo moveri: Ergo censet S. Augustinus Angelum non posse moveri localiter.

Respondeo S. Augustinum ibi sermonem instituere de motu circumscriptivo, qualis aptum corporibus competit;

Non autem de motu definitivo, qui fit absque locali circumscriptione, ut exponit Hugo Victorinus cap. 16. adeoque ejus sententia opinioni Durandi non suffragatur.

Dices denique, S. Bernardus, Sermo 5. in Cantica apertè docet Angelos egere corporibus ad motum (quia) inquit, Non est discurrere, nec de loco in locum transire nisi corporeum, quod Angelos facere tam indubitata, quam nota probat autoritas. Ergo reverà Angelus per se non sunt capaces motus.

Nego consequentiam, non enim loquitur S. Bernardus de Angelis secundum se spectatis, sed tantum penes ministeria, quæ circa nos obeunt cum enim initio capitis dixisset, Quatuor spirituum genera nota sunt vobis, peroris noster, Angelicus, & qui condidit istos. Non est ex omnibus, cui sive propter se, sive propter alium, sive propter utrumque, necessarium corpus non sit, corporis sue similitudo, excepto dumtaxat illis, qui omni tam corporalis, quam spiritalis creatura meritò consistitur, & dicit Deus meus es tu, quoniam bonorum meorum non es. Postmodum de sanctis Angelis sermonem faciens ait, Jam quod, & super celestes spiritus opus corporibus habeant, illa maxime certis nos faciat vera, & verè divina sententia. Nonne omnes, ait, administratores spiritus sunt missi in ministerium propter eos qui hereditatem capiunt salutis? Quoniam ergo modo implent ministerium suum absque corpore, præsertim apud viventes in corpore? Unde statim subdit, Denique non est discurrere, nec de loco in locum transire, nisi corporum, quod frequenter Angelos facere tam indubitata, quam nota probat autoritas. Hinc est quod & visi sunt Patribus, & ad eos intraverunt, & manducaverunt, & pedes laverunt, &c. Quibus apertè constat ipsum loqui de Angelis quantum ad ministeria, quæ erga homines exercent, non autem quatenus

nus secundum naturam suam considerantur, nam inquit Alensis, *questione 33. membro 3.* ubi præfatam auctoritatem ita pariter explicat. Quantum est de natura sua convenit Angelis moveri de loco ad locum sine corpore, sive corporis assumptione, quod utique patet exemplo animarum, separatarum: animæ enim separatæ, inquit, possunt moveri non assumendo corpus: Quoniam aut alienum corpus assumerent, aut suum, alienum non videtur competere: de suo videmus, quod non assumunt; cum jaceant in sepulchris, quare multò magis Spiritus Angelici possunt moveri sine assumptione corporis, cum ex se, & natura sua sint separati; nec videantur dependere aliquo modo à corpore, aut aliquam relationem habere ad ipsum.

CONCLUSIO SECUNDA.

Angelus non movetur motu per accidens, & ad motum corporum, quibus inexistit: Sed motu per se: Hæc est Doctoris in quartum dist. 10. quest. 6. Ubi ait si Angelus voluntariè faceret se se præsentem lapidi, si moveo lapidem, non propter hoc moveo Angelum, quia nec est mobilis per se à virtute mea, nec per accidens in proposito, quia nec est forma, neque pars alicujus mobilis per se à me. Si ergo Angelus esset præsens lapidi moto à me in termino motus, hoc non esset per alium meum, sed per actionem suam propriam, qua faceret se præsentem ibi. Quod autem non moveatur per accidens.

*Probat*ur: quidquid movetur per accidens, debet habere naturalem unionem, & conjunctionem cum corpore, in quo existit: Sed talem unionem, & conjunctionem non habet Angelus cum corpore, in quo est: Ergo, &c. Major constat ex tertio notabili, etenim ut aliquid dicatur moveri per accidens, necessum est quod moveatur ad motum alterius seclusa omni alia causalitate

effectiva, vel ex parte sui, vel ex parte alterius causæ moventis ad ipsum directè terminata. Minor verò per se constat, siquidem Angelus cuicumque corpori inexistat, in ipso non est nec per modum formæ substantialis, ut anima in corpore, vel accidentalis, ut albedo in pariete, vel contenti in continente, ut liquor in vase, & nauta in navi; vel corporis gravis in quiete, ut lapis in terra, nec alia potest excogitari naturalis conjunctio, quæ intercedat inter ipsum Angelum, & locum corpuscum, in quo est; Ergo non videtur cum eo ullam naturam habere conjunctionem, adeoque non potest ad ejus motum moveri, nisi quatenus ipsemet se ipsum cum corpore moto movet, vel à causa superiori, putà à Deo efficaciter movetur.

Deinde, Si Angelus ad motum corporis moveretur, simul posset quiescere, & moveri, nec-non à duobus motibus contrariis agitari, putà sursum, & deorsum: Sed hoc apparet absurdum: Ergo & id unde sequitur, Patet sequela majoris: Si enim Angelus pro loco suo adæquato duos haberet lapides, & unus eorum moveretur altero remanente immoto, vel alius sursum, alius deorsum projiceretur, necessum esset, quod Angelus quiesceret cum immoto lapide, & moveretur cum lapide projecto, similiter cum uno lapide sursum, cum altero deorsum laberetur, quæ certè cum repugnent, etiam, & absurdum est id unde sequitur.

Denique si Angelus moveri posset per accidens, sequeretur quod etiam invitatus moveri posset ab homine; ex hypothese enim quod v.g. unus Angelus fuisset Deo destinatus juxta sacras alicujus sancti Reliquias in altari constitutas, & aliquis homo eas manu furtiva, & sacrilega surriperet: si ad motum corporis cui inexistit Angelus moveri deberet, necessum esset eum invitum ad deportationem earum sanctarum Reliquiarum.

quiarum ab homine moveri; sed consensuens non solum absurdum apparet; verum etiam, & contra experientiam quâ constat nullum prævalentem per infirmam imbecillioris virtutem reluctantem animo posse moveri: Ergo cum Angelus longe sit homine superior; & fortior, dici non debet quod invitus ab homine moveatur, & consequenter moveri non potest per accidentem.

PROBATUR ETIAM SECUNDA PARS à Doctore, in secundum dist. 2. quæst. 9. & 10. Quamquam enim propriis terminis quæstionem non explicet, nihilominus in toto suo discursu, id manifestè supponit, admittendo in Angelo potentiam receptivam motus, & docendo illum agere in seipso cum se movet. Adde quod, ut mox diximus, aperte docet Angelum non moveri per accidentem, necessum est ergo censeat illum moveri per se.

Probatur hujusce assertionis veritas; Illud dicitur moveri per se, quod reverà per se est subjectum motus: Sed Angelus est reverà subjectum sui motus: Ergo per se movetur: Major constat; res enim mota dicitur à motu; ergo quæ motum in se recipit, & immediatè, per se dicitur mota: Minor verò probatur, tum quia eò modò Angelus dici debet moveri localiter, quomodo est in loco: Sed ut supra probatum est, est in loco fundamentaliter per suam substantiam quâ nihil magis ipsi intrinsicè, formaliter autem per respectum præsentis ad locum in ipso Angelo receptum: ergo etiam movetur localiter per motum in se residentem: Minor constat ex dictis. Major vero admittitur ab omnibus Philosophis. Cum enim motus localis sit tendentia mobilis ab uno loco ad alterum, necessum est, quod ejus motus illius locationi correspondeat saltem quantum ad rationem præsentis: Tum quia idem est subjectum termini motus in facto esse, & in fieri: Sed subjectum termini in motu locali in facto

esse, est ipsa substantia Angeli præsens huic loco quem per motum acquisivit: Ergo eadem est etiam subjectum illius termini in fieri, & consequenter motus localis; quoniam motus localis nihil aliud est quàm ipse terminus in fieri seu acquirendus: Tum denique quia motus Angeli est ipsa acquisitio successiva ubi, seu existentis Angeli præsentis in alia atque alia parte spatii: Sed hujusmodi existentia, & præsentia reverà est in Angelo: Ergo pariter in ipso est motus.

Dicitur: si motus Angeli esset quid reale in ipso receptum, sequeretur toties Angelum realiter mutari quoties movetur: Sed consequens videtur absurdum; infinitis enim realibus mutationibus foret obnoxius, quod præstantissimam naturam creatam, & Deo omnino immutabili valde proximam, videtur dedecere: Ergo, &c.

Distinguo majorem: Foret obnoxius mutationibus per formas reales absolutas quæ physicè, & entitativè ipsum immutarent, nego: Per formas respectivas, seu per relationes quæ nullam physicam, & entitativam mutationem pariunt, sed solum denominationem ad aliquid extrinsecum, nego: Motus enim Angeli ultra ejus substantiam non dicit aliquam entitatem absolutam, sed solum actionem quâ formaliter, & immediatè Angelus acquirit successivè existentiam propriæ substantiæ, seu respectum præsentis illius substantiæ ad hoc vel illud spatium per quod transit, & ad locum determinatum tendit; is autem respectus nullam realem, & entitativam mutationem importat, alioquin millies in qualibet temporis morula realiter homo mutaretur; quippe cum innumeras de novo suscipiat relationes, & correlationes.

CONCLUSIO TERTIA.

Angelus seipsum movere potest localiter. Ita Doctor. in secundum dist. 21. quæst. 10. & communis est apud Theologos.

logos. *Probaturque primum* Ex Scriptura sacra quæ de Angelorum motu eodem modo sermonem instituit ac de motu hominum, vel aliorum animalium se moventium: Eisdem enim verbis significantibus motum procedentem à principio intrinseco rei se moventis utitur. Sic *Demon Job. i. dixit Circuivi terram, & perambulavi eam*, &c. de ipso S. Petrus *Epistolâ prima 5. cap. ait, Circuivi quærens quem devoret*; Unde *Luce 8. Matthæi 4. & Joannis 13.* Dæmonibus attribuantur verba, *veniendi, accedendi; ingrediendi, & egrediendi*; Sic Christus præcipiebat *spiritui immundo ut exiret ab homine*; sic Christum rogabant Dæmones, *ut permitteret eis in porcos ingredi*: Quibus constat Dæmones tamquam habentes potestatem se movendi solum petiisse, ut permitterentur ingredi porcos, hoc est, ut non prohiberentur. Idipsum aperte convincitur ex illis Christi verbis *Matthæi 12. Cum immundus spiritus exierit ab homine, ambulat per loca arida, quærens requiem, & non invenit: Tunc dicit: Revertar in domum meam unde exivi, & veniens invenit eam, &c. Tunc vadit, & assumit septem alios spiritus nequiores se, & intrantes habitant ibi*: In quibus ut scite advertit Suares *libro 4. cap. 23.* sex aut septem verba sunt quæ significant motum localem, & ab intrinseco, scilicet verbum, *intran- di, exundi, ambulandi, quærendi, revertendi, veniendi, vadendi, & assumendi.* Hæc enim dici non possunt de re, quæ seipsam movere non potest, sed ab alio tantum moveri.

Ex his etiam, inquit Suares, sumitur optima ratio quam attigit Gregorius: quia omnes Dæmonum motus, & itinera ad malum finem, scilicet perniciosum hominum ordinantur. Juxta illud *circuivi terram, & perambulavi eam*: Ergo dici non potest, quod illi motus à solo Deo specialiter fiant ad arbitrium ipsius Dæmonis; impium enim esset ita

de Deo existimare; Ergo necesse est fieri ab ipsis Dæmonibus se moventibus fieri. Probatur consequentia; quia si Angelus non se movet; multo minus unus Angelus poterit movere alium: Ergo à solo Deo moveri poterit, & ut talis motus non sit Angelo violentus vel necessarius, oportebit Deum tunc solum movere Angelum: cum ipse moveri vult, ac proinde ipsum solum ducere Dæmones quando ipsi tentare nos volunt. Quod repugnat præfatis Scripturæ textibus.

Conclusionem probat Doctor loco laudato hac ratione: Quotiescumque aliquid habet potentiam ad acquirendum aliquid per motum, perfectio est in eo quod habeat quoque potentiam activam, per quam possit illud acquirere: At verò Angelus habet potentiam passivam, ad motum localem, ut mox diximus, siquidem Angelus est subiectum sui motus: Ergo illi non est deneganda activa: Quandoquidem, ut ait Aristoteles, dignificanda est natura quantum apparentia permittunt: Patet consequentia; quia Angelus non est minoris conditionis quam res corporeæ, & inferiores creature; immo est illis longè nobilior; atqui in illis eum potentia receptiva alicujus perfectionis, simul etiam reperitur activa virtus, ut patet in animantibus, in quibus est quoque potentia passiva, & activa ad augmentum, & operationes sensuum, & ad se ipsos movendum: Patet etiam in rebus inanimatis, nam ex eo, quod gravia habeant potentiam passivam, ut sint in centro, habent etiam potentiam activam, ut possint illud acquirere: Ergo multo magis si sit in Angelo potentia passiva, gaudet quoque activa, quidam autem moveret se, si ad movendum alia virtutem activam habeat?

Confirmatur: quia movere se est gradus vite, quo Angeli fruuntur: Ergo movent se. Insuper, Angeli sunt viventes perfectissimi, & naturaliter non sunt ubi-

ubique, & ideo mutationis localis capaces sunt: Ergo possunt illam in se efficere. Probatur consequentia, quia supposita imperfectione propriæ limitationis, ad perfectionem vite pertinet facultas intrinseca se movendi, cujus argumentum est, quia inferiora viventia si participant cognitionem non solum intellectualem, sed etiam sensitivam, perfectam virtutem habent se movendi localiter: Quis ergo dubitabit Angelos multo perfectius movere, se posse, præsertim cum in hoc nulla sit difficultas, vel apparens repugnantia?

Obijciat: Nihil idem secundum idem potest esse in potentia, & actu simul: sed movens qua movens, est in potentia ad motum, & quod movetur ut sic, est in actu motus, seu habet motum. actu: Ergo nihil idem indivisibile potest esse simul movens, & motum, seu potest simul movere, & moveri, & consequenter Angelus nequit se movere.

Confirmatur: Quia aliqua differentia contrahentes, ac dividendes ens finitum ut sic, sunt impossibiles in eodem, ut patet de differentiis, quibus contrahitur ens ad substantiam, & accidens: Ergo à pari, differentia actus, & potentia, quibus contrahitur ens ut sic, nequeunt reperiri in eodem.

Negat majorem Doctor: sed illam distinguo: Nihil potest esse in potentia, prout dicit carentiam actus, & in actu simul, concedo majorem: Nihil potest esse in potentia virtuali producendi, aut suscipiendi actum, & simul in actu formali, idest, simul habere actum formalem, nego majorem: Similiter distinguo minorem, sed quod movetur est in potentia ad illud quod movetur, prout potentia dicit talem carentiam, pro illo instanti, aut tempore quo movetur, & quod movet est in actu; idest, habet actum oppositum isti carentia, nego minorem: Est in potentia, prout potentia non dicit talem carentiam, &

in actu simul, concedo minorem, & nego consequentiam.

Ad confirmationem dicit Doctor, quod omnino opposita dividenda ens, quæ verè opposita sunt, realiter nequeant reperiri in eodem; & consequenter, quod esse in actu, & potentia, prout sunt differentia entis sic opposita, nequeant reperiri in eodem: sed nego, quod talia reperiantur in eodem. Itaque quando dividitur ens finitum, ut sic, in ens in actu, & ens in potentia, non accipitur ibi ens in potentia pro ente productivo, aut susceptivo alicujus, & ens in actu pro ente habente talem actum, aliàs materia prima non posset simul cum forma habere potentiam susceptivam ejus, & quia aliàs male sic divideretur, & absque fundamento, & contra veritatem: Sed ibi accipitur ens in potentia pro ente possibili non actu existente, & ens in actu pro ente actu existente; evidens autem est, quod omne ens sit, aut in actu, aut in potentia hoc modo, & quod nullum ens, sit simul in actu, ac in potentia hoc modo.

Dicit secundò: In illo qui se movet, debet distingui pars se movens à parte per se mota: Sed in Angelo nequit assignari pars movens, & pars mota: Ergo non se movet. Probatur major tum auctoritate Aristotelis, libro *Physicorum*; tum etiam ratione, quia si una pars moveret alteram, sequeretur quod totum simul quiesceret ad quietem unius partis, & non quiesceret ad motum alterius.

Respondio, majorem esse veram de substantia corporea movente se motu organico, in ea siquidem hæc concurrunt ad motum, nempe cognitio quæ primò movet partem illam corporis quæ primò impellitur, quia potentia, motiva concurrens ad talem motum, est organica, & consequenter non solum distinguitur ab anima realiter quæ est primum movens; sed etiam fortassis ipsa.

ipsamet potentia organica residet in aliqua parte corporis, & primò movere debet aliquam aliam partem. Sed ex hoc non sequitur quòd quiddam aliud moveatur à se alio motu non organico debeat habere duas partes realiter distinctas, ut patet in gravibus, & levibus in quibus quælibet pars movet, & movetur, quia quælibet pars habet in se ipsum principium activum, & passivum sui motus. Unde non mirum si in Angelis, quorum substantia est indivisibilis, ad eorum motum non ita requiratur una pars movens, & altera mota. Adde quòd in eis etià, saltem metaphoricè, assignari possit pars movens, & mota; nam eorum substantia movetur per voluntatem.

Obijcies 3. Potentia naturalis Angeli debet ordinari ad aliquem finem naturalem juxta naturalem ordinem Universi: sed potentia motiva secundum locum respectu ipsius Angeli ad nulum finem naturalem potest deservire: Ergo non est in illo. Probatur minor: Angelus nunquam movetur propter sui indigentiam, neque etià propter indigentiam naturalem aliarum rerum, eo quòd universæ res inferiores sufficienter adjuvantur ex moribus cælestium corporum; imò, & ipse homo, quòd attinet ad corpus, & ad omnes potentias animales, sufficienter etià juvatur in suis operationibus ex cælestibus moribus; quòd verò attinet ad mentem, immediatè subjicitur ipsi Deo, qui solus potest immediatè contingere intellectum, & voluntatem: Ergo superflua est hujusmodi naturalis virtus motiva secundum locum respectu ipsius Angeli.

• Nego minorem. Illa uamque potentia activa nō est in Angelo frustranea, tum quia ipsa indiget ut rerum singularium species à rebus sibi remotis per suum ad eas accessum possit accipere. Tum etià ut operationes aliquas ad Universi moderationem spectantes possit exercere,

quas aliter non posset exercere. Tum denique, quia motus ille maximè dicit libertatem Angelicam, qua possit de loco in locum se transferre.

• Obijcies Denique: Relationes oppositæ non possunt eidem extremo reali competere: Sed relationes moventis, & moti sunt oppositæ: Ergo eidem Angelo convenire nequeunt.

Respondes Cum Doctore, in 2. distinctione 25. Quòd relationes sunt triplicis generis. *Quædam* enim sunt, quæ repugnant inter se non ex eo quòd non possint esse in eodem fundamento; sed quia aliquæ illarum includunt essentialem dependentiam; sicut relationes causæ, & causati. Et quia idem non potest dependere essentialiter à seipso; ideo istæ relationes non possunt eidem convenire. *Aliæ* sunt relationes, quæ includunt essentialem ordinem originis, ut sunt relationes producentis ad productum, & sic implicat, quòd idem sit produciens, & productum: *Aliæ* autem relationes sunt (ut moventis, & moti) quæ nec includunt dependentiam essentialem, nec originem, & ideo possunt fundari in eadem natura, & in eodem supposito, nec arguunt nisi dependentiam accidentalem. Neque ex hoc sequitur, quòd ista relatio sit ejusdem ad seipsum, quamvis eadem voluntas, & idem Angelus sit movens, & motus: Nam si Angelus consideretur, ut causans motum in se, fundat relationem moventis; si autem consideretur Angelus præcisè quatenus recipit motum in se, tunc fundat relationem moti, & sic tantum requiritur, quòd illa forma, ratione cujus Angelus movetur nempe motio passiva, sit realiter distincta ab ipso Angelo movente, & moto. Hæc Doctor.

• Ex his collige primò, Quòd potentia loco motiva Angeli ab ejus substantia nō sit distincta realiter: distinctio namque ista esset omnino superflua, quippe cum non idem inferendum sit de po-

ten-

tentia loco motiva Angeli, ac hominis; siquidem cum potentia loco motiva hominis sit organica, pendeatque à facultate externa, & corporea: Haud dubium est illam esse ab anima rationali realiter distinctam: Secus autem est de Angelis, qui cum corporis, & facultatis corporeæ sint expertes, non apparet quâ ratione eorum loco motiva potentia realiter distinguatur, tum ab Angeli substantia, tum ab ejus voluntate; Probabilius igitur mihi videatur illam eandem esse omnino cum voluntate; quippe cum non sint multiplicandæ facultates absque necessitate; nulla autem apparet necessitas admitteendi facultatem loco motivam ab angelica voluntate distinctam; siquidem angelica voluntas habet suam entitatem, & substantiam sibi subordinatam quantum ad locum, & motum; & consequenter sola sufficere potest ad efficiendum motum, & suam propriam substantiam alicubi movendam, & locandam.

Collige secundò, Angelum quemlibet moveri posse à Deo extrinsecè, ita ut ipse solùm concurrat passivè ad talem motum: Tum quia id non repugnat ex parte ipsius Angeli, cum non sit ubique, & moveri possit, nec moventi resistat; & quamvis resisteret, ejus resistentia, quoniam est finita, posset superari ab agente majoris virtutis. Neque etiam repugnat ex parte motus localis absolute, & in communi, quia motus Angeli non est vitalis, & ex consequenti non postulat, quod necessariò fiat à principio intrinseco ipsius mobilis. Neque denique repugnat ex parte agentis, quia vel Angelo superiori, vel saltem Deo non deest virtus ad hujusmodi effectum, neque in eo involuitur aliqua imperfectio, quæ Deum dedecet: Ergo Deus Angelum per se movere potest. Posset etiam Angelus superior movere inferiorem etiam resistentem propter majorem in illo virtutem, sicut

Tom. IV.

animal fortius movet minùs forte, etiam invitum. Sic Magi, qui Dæmones habent potentiores, aliorum machinationes evertunt, uno scilicet Dæmone superiori alium inferiorem coercente: sic etiam Dæmones animas damnatas indubiè invitas rapiunt ad infernum. Qualiter autem id fiat, non ita facile est determinare; verisimile tamen apparet, quòd Angelus potentior se uniat, & quodammodo alliget inferiori, quo posito sequitur ipsius quies vel motus, prout Angelus alligans quiescit, vel movet seipsum: Sicut enim Angelus superior se potest ad certum locum determinare, & alligare, sic non apparet cur non possit alteri Spiritui se pariter alligare, ut eum deferat, & detineat quolibet, & quandiu libuerit. Quòd si Spiritus alterum alligans non sit, vel maneat ipsi alligato præsens; facilius explicatur illa alligatio dicendo, quòd fiat tantum à Deo, moraliter autem à Spiritu, prout sancti nonnulli referuntur imperio suo detinuisse Dæmonia; qualiter etiam Angelus Raphael dicitur alligasse Dæmonem Asmodeum in deserto.

QUESTIO SECUNDA.

Qualis, & quoruplex distingui possit motus Angelicus?

NOTANDUM I. Motum localem solitò quadruplicem distingui, nempe Continuum, Discretum, Successivum, & Instantaneum. *Continuum* dicitur ille, in quo mobile per partes deserit terminum à quo, & acquirit terminum ad quem: *Discretus* è contra ille est in quo mobile deserit totum simul terminum à quo, & immediatè acquirit simul totum terminum ad quem; ita tamen ut in ultimo suo esse in termino à quo veluti quiescere videatur, antequam immediatè inexistat termino ad quem per primum sui esse in illo.

Y

Suc-

Successivus idem est omnino cum continuo, nisi fortè in hoc invicem discrepent, quòd motus continuus appelletur ille, quo mobile pertingit ad locum suum adequatum à motore intentum, & propositum in incæptione motus: *Successivus* verò sit ille, quo mobile interdum non pertingit ad locum adequatum propositum, sed in medio subsistit; unde sit quòd omnis motus continuus sit etiam *successivus*; & omnis verò *successivus* hac ratione dici non debeat continuus. *Instantaneus* denique dicitur ille motus, quo mobile deferit terminum à quo, & acquirit terminum ad quem eodem momento; itaut hæc unius termini abjectio, & alterius acquisitio uni tantum instanti nostri temporis coexistat. Hinc apparet, quòd motus continuus discreto, & *successivus* instantaneo directè opponatur. Quærimus ergo an hoc duplici, seu quadruplici motu locali Angeli moveantur.

Notandum 2. Divisibilitatem motus ex triplici capite maxime esse repetendam. *Primo* quidem ex parte mobilis, quando nempe illud est extensum, & divisibile, habetque partes extensas, ita quòd una moveri non possit nisi post alteram, quâlis est motus animalis: *Secundo*, ex parte spatii extensi, & habentis varias partes quarum una decurri non potest nisi post aliam, putà aer medius inter eælum, & terram: *Tertiò* ex parte durationis temporis; cum enim tempus sit mensura motus secundum prius, & posterius, ac proinde secundum successionem, necessarium est, quòd mensuratum sit divisibile, quando mensura est divisibilis. Hinc toties motus dicendus est divisibilis, quoties mobile partes habet distinctas, aut spatium ita protensum, & dispositum est, ut una pars prius decurri non debeat quin decurratur altera; vel dum motus per aliquam temporis successionem durat: Non est autem necesse, quòd hæc tria simul concurrant, ut

motum verè divisibilem constituent, sed sufficit, quòd alterutrum intercedat in ipso motu. Certum est autem, quòd angelicus motus dici nequeat divisibilis ex parte ipsius Angeli, cum ejus substantia sit omnino indivisibilis: An autem divisibilitatem obtineat à spatio quod decurritur, vel à tempore quo durat, hic est resolvendum.

Notandum 3. Motum considerari posse dupliciter, primò quidem in genere, & quatenus complectitur omnem transitum à termino à quo ad terminum ad quem; sive ille transitus supponat aliquid medians inter utrumque terminum, sive non. *Secundò* in specie, prout reverà significat, non solum omnem talem transitum, sed & medium inter utrumque terminum, quod mobile debeat pertransire, ut à termino à quo pertranseat ad terminum ad quem. Prior dicitur potius mutatio, quàm motus, complectiturque omnes illas mutationes instantaneas generationis, & corruptionis, illuminationis, & tenebrarum, &c. quas Philosophi motum solum appellare, sed laxius, & minus propriè usurpato vocabulo *motus*. Posterior verò tantum significat illam tendentiam mobilis à termino à quo ad terminum ad quem per spatium medians inter utrumque. De utroque hic erit sermo. Tria namque hic sunt determinenda. *Primum*, an Angelus per se moveri possit localiter motu continuo: *Secundum*, an moveri queat motu discreto: *Tertium*, an instanti possit transire ab eodem loco ad alterum per verum motum, aut solum per veram mutationem.

CONCLUSIO PRIMA.

Angelus potest moveri per se de loco ad locum motu continuo, & *successivo*: Ita Doctor in secundum distinctione 2. quæst. 9. nu. 8. ubi cum dixisset Angelum posse seipsum movere, *Qui non est immensus, & illimitatus ad omnia ubi: Ergo potest mutari ab uno ubi* ad

ad aliud: Addit, quod continuè, patet: quia inter duo ubi sunt infinita ubi media, quod probatur ex continuo motu corporis per omnia illa ubi; per omnia autem illa potest Angelus transire, ita quod in nullo illorum ubi sit nisi indivisibiliter, et per consequens non potest omnia illa pertransire nisi continuè moveatur. Quibus Doctor non solum affirmat Angelum posse moveri, sed etiam quod moveri possit continuè absque intermissione ulla per aliquod tempus, puta per quadrantem, aut horam, aut diem: Quod utique probat, quia inter duo loca, à quorum uno ad alterum potest moveri Angelus, ita ut necessario debeat relinquere locum priorem, priusquam posteriorem acquirat, sunt vel infinita loca acquisibilia successivè, ex hypothesis, quod dentur infinite partes in continuo, sive actu, sive potentia, ut communiter conceditur; aut saltem sunt plurima loca intermedia successivè, & continuè acquisibilia, alioquin corpus non posset successivè, & continuè moveri ab uno loco ad alium; Ergo Angelus movendo se ab uno loco ad alterum, potest continuè per illa loca intermedia seipsum successivè, & continuè movere.

CONFIRMAT DOCTOR hanc rationem ex eo quod si Angelus non posset continuè seipsum movere sicut, & corpora, maxime quia substantia ejus est spiritalis, & indivisibilis: sed hæc ratio non officit; anima namque rationalis est pariter substantia omnino indivisibilis, separata tamen à corpore moveri potest localiter, idque motu continuo: Imò, inquit, *Anima Christi beatissima movebatur localiter, quia descendit ad Inferos, sicut dicitur articulus fidei: Patet etiam ex Scriptura, quod Angeli mittantur quandoque cum corpore assumpto, et si tunc cum corpore movebantur, videtur quod tunc fuerit aliqua motio passiva ipsorum, alia formaliter ab ipsa motione passiva ipsius corporis, quia non*

erant formaliter aliquid ipsius corporis. Similiter credibile est, quod frequenter missi sint sine corpore, sicut de illo missus ad Joseph de conceptu beatæ Mariæ dubitantem.

PROBATUR: Angelus potest successivè deferere locum aliquem, & eodem modo acquirere alterum sine ulla interruptione: Ergo potest moveri de loco ad locum continuè. Consequentia patet, Probatur antecedens: Quando Angelus est in loco minori, eo qui sibi est adæquatus, potest paulatim, & successivè deferere partem ejus, ita ut remaneat in minori, & acquirere majorem intra latitudinem loci adæquati: Ergo etiam potest successivè, & per partes deferere totum locum in quo est, seipsum transferendo eodem modo ad alterum locum totalem. Patet hæc consequentia: Nulla enim apparet ratio cur non possit Angelus hoc modo deferere, & acquirere locum totalem sicut partialem. Probatur antecedens: Angelus liberè sese applicat majori, aut minori loco intra latitudinem loci sibi adæquati: Ergo etiam postquam est in aliquo loco minori adæquato, potest aut deferere partem ejus, non simul, sed per partes, aut extendi ad majorem locum, non enim potest aliter intelligi quomodo sit Angelo liberum, postquam est in loco sese vel ad minorem locum arctare, vel ad majorem protendere intra latitudinem sui loci adæquati. Deinde si repugnaret Angelo moveri motu continuo, & successivo, maxime quia ejus substantia est indivisibilis: sed anima rationalis quamvis sit indivisibilis potest successivè deferere partem aliquam materiæ illius, quam informat, quando nempe aliqua pars corporis successivè corrumpitur, & tabescit: Similiter extendi potest ad informandam novam partem substantiæ, quæ per continuam nutritionem aggeneratur: Ergo pari ratione poterit Angelus non obstante sua indivisibilitate, aut dese-

rere partem ejus loci adæquati in quo est, aut se extendere ad alias ejusdem loci partes successivè acquirendas.

Confirmatur, Non magis repugnat Angeli indivisibilitati acquirere locum extensum successivè, quàm esse in loco extenso, & indivisibili: sed secundum est possibile: Ergo, & primum. Denique Angelus potest transire ab uno loco ad alterum transeundo per omnia loca intermedia, nullum relinquendo impertransitum, & in eorum nullo quiescendo: Ergo potest moveri motu continuo, & successivo. Consequentia patet: quia non potest moveri per omnia illa media ubi nulla media quiete, nisi motu continuo, ac successivo. Antecedens verò probatur, quia corpus potest omnia illa media transire: Ergo, & Angelus. Patet consequentia, quia in hoc minor repugnantia apparet; Item ad continuitatem, & successionem motus sufficit divisibilitas spatii: Ergo Angelo etsi indivisibilis sit, non regnat moveri continuè. Consequentia est aperta, præsertim cum Angelus possit in loco divisibili existere. Antecedens verò patet ex secundo Notabili.

Dices 1. Angelus est indivisibilis secundum substantiam: Ergo non potest moveri motu continuo. Probatur sequela; Nam ad motum continuum requiritur, quòd movens sit partim in termino à quo, & termino ad quem: quia quod movetur, non movetur quando est in termino à quo, tunc enim quiescit, neque quando est in termino ad quem, quia jam mutatum est: Ergo quod movetur continuè, partim debet esse in termino à quo, & partim in termino ad quem: sed Angelus est imparitibilis: Ergo non potest moveri localiter continuè. *Confirmatur*, quia mobili indivisibili debet correspondere locus indivisibilis: Ergo si Angelus pertransit continuè aliquod spatium, necessarium erit, quòd suo transitu numeret infinita indivisibilia, quæ sunt in spatio, at-

tingendo unum post alterum, quod tamen est impossibile; quoniam multitudo, quæ potest numerando pertransiri habet terminum, & ex consequenti non est infinita.

Respondet Doctor loco supra laudato, numero 36. *Quando dicitur, quòd Angelus non possit moveri, quia est indivisibilis, quamvis potest faciliter responderi, quòd Angelus occupat locum divisibilem, & ideo respectu loci se habet, ac si esset divisibilis, aut si occupat locum punctalem, & ita impunctaliter existens non potest continuè moveri, ut semper habeat esse punctale; tamen quia non videtur ratio quare negatur indivisibile moveri, etiamsi esset indivisibile, quantitatis per se existens: ideo potest concedi, quòd Angelus habens ubi punctale potest continuè moveri, ut in puncto semper existens.* Inde probat indivisibile posse moveri localiter etiam continuè, ut constat ex motu sphaeræ, & cubi super perfectè planum: Quoniam, inquit, divisibilitas, & successio motus provenit ex divisibilitate mobilis, vel spatii, quorum alterutrum ad motus divisibilitatem, & successionem sufficit.

Dices 2. Successio continua in motu oritur ex resistantia mobilis ad motorem, vel medii per quod fit motus ad ipsum mobile, quod per ipsum movetur, vel medii ad motorem, qui per ipsum movetur: sed nullo ex his capitibus potest esse successio in motu Angeli: Ergo motus ejus nequit esse successivus continuè. Probatur minor, quia non ex primo capite, quandoquidem mobile hic sit Angelus, & idem Angelus est motor quando movet se: Angelus autem sibi ipsi non resistit: Non etiam ex secundo, aut tertio capite, quia medium per quod fit motus angelicus non resistit Angelo ut motori, aut ut mobili, quandoquidem Angelus posset movere se per medium penetrando ipsum sine ulla motione medii. *Confirmatur*, quia

quia corpus per medium vacuum non moveretur successivè, quandoquidem tale medium non resisteret ipsi : sed medium plenum non magis resistit Angelo, quàm medium vacuum resisteret corpori : Ergo Angelus nequit moveri successivè per ullum medium, sive corporeum, sive vacuum .

Negat minorem Doctor loco laudato num. 40. ubi duplicem distinguit successione in motu, aliam quæ ipsi convenit ratione spatii, alteram quæ ipsi tribuitur ex resistantia medii, quod facile non potest decurri, putà propter suam crassitiam, qua fit ut facile mobili non cedat . Prima, est essentialis ; secunda accidentalis : Essentialis convenit illi ratione spatii cujus cùm partes non sint simul, etiam simul non possunt decurri, & pertransiri, quapropter necessum est, quòd mobile quodcumque successivè pertranseat, unam post aliam decurrendo : Sic Angelus à Cælo in terram descendens necessariò debet medium aerem successivè decurrere . Successio verò accidentalis, quæ provenit, vel ex resistantia medii, aut ex majori, vel minori impedimento ex parte ipsius vincendo, non potest habere locum in Angelo; quippe nec medium ipsi potest resistere, nec in eo ali-quod esse impedimentum ratione cujus velocius, vel tardius terminum, acquirat : inde concludit Doctor n. 43. quòd fieri potest motus successivus in vacuo, loquendo de successione essentiali, quia nempe motus ille corresponderet partibus loci repleti ; non esset tamen successivus accidentalis, quippe non haberet majorem, vel minorem „ velocitatem, omnino enim, inquit „ Doctor, nullam velocitatem, aut „ tarditatem superadditam haberet „ mobile in vacuo, sicut haberet in „ pleno ; ratione videlicet spatii fa- „ cilis, aut difficilis cedentis mobi- „ bili .

Dices 3. Si Angelus moveretur con-

tinuè, sequeretur inferiorem Angelum pari velocitate moveri cum Superiori Angelo, quamvis uterque omnem suam virtutem loco motricem explicaret : Sed consequens videtur absurdum : Ergo, & illud unde sequitur . Minor patet, quòd enim agens majorem habet virtutem, cæteris paribus, præstantiorem effectum debet edere : Cùm igitur Angelus superior præstantiori naturâ, adeoque vegetiori facultate loco motiva polleat, quàm inferior, evidens est, quòd si uterque omnem suam movendi virtutem loco motivam explicet, superior velociori, & promptiori motu spatium debeat decurrere, & terminum ad quem obtinere . Probatur itaque sequela majoris : Si Angelus superior moveat se motu continuo, & successivo, oportet impendat aliquod temporis spatium in illo motu perficiendo ; sed quantumcumque breve foret illud spatium temporis, in altero equali, posset Angelus inferior eadem velocitate de Cælo ad terrâ descendere; quippe cùm nullam resistantiam patiatur ex parte spatii à qua possit in motu aliquantulum retardari : Ergo, &c.

Respondeo 1. negando majorem : Si quidem, ut mox dictum est, successio motus Angeli non solum petenda est ex parte spatii resistentis : sed etiam ex parte illius spatii, quatenus est divisibile, habetque partes non simul positas, sed extensas, quarum una decurri debet post alteram .

Respondeo 2. Negari posse minorem; quamquam enim unus Angelus alium excedat in virtute loco motiva, non tamen inferendum est, quòd altero velocius moveri debeat ; posset enim Angeli superioris virtus motiva virtutem inferioris in pluribus aliis excedere, putà quòd posset majus corpus movere, vel æquale majori velocitate agitare, imò ipsum Angelum inferiorem, etiam invitum, & resistentem loco detinere, & præpedire ne moveatur ;

Quem-

Quemadmodum v. g. non sequitur, quod quamquam corpus aliquod luminosum aliud in virtute illuminativa, excedat, quod possit velocius, aut citius illuminare; imò id videtur fieri non posse, cum utrumque in instanti illuminet. Satis est ergo ad illam diversitatem, quod luminosum præstantius, majus lucem diffundat, & in majorem distantiam.

CONCLUSIO SECUNDA.

Angelus moveri non potest naturaliter motu discreto. Hæc est Doctoris in 2. dist. 2. qu. 11. contra S. Thomam, & nonnullos ejus Sequaces. Probat: Moveri motu discreto, est deserere per ultimum suum esse, totum terminum à quo, & immediatè post sine ulla successione acquirere terminum ad quem: sed hoc præstare nequit Angelus naturæ viribus: Ergo moveri nequit motu discreto. Major admittitur ab Adversariis. Minor verò probatur; dari nequeunt duo instantia, immediata indivisibilia, alioquin sequeretur dari aliquod compositum ex indivisibilibus: sed in motu discreto necessarium esset, quod existerent duo instantia immediata; oporteret enim ut daretur ultimum instans, in quo Angelus esset in termino à quo, & primum instans, in quo fieret præsens termino ad quem: Sed ultimum instans in quo Angelus est in termino à quo, & primum instans, in quo inexistere termino ad quem, necessariò debent esse duo instantia distincta: Ergo fatendum est in illo motu discreto necessariò admittenda esse duo instantia immediata. Minor patet: instantia enim illa intrinseca sunt appositis terminis, nempe termino à quo, & ad quem: Ergo pariter debent esse opposita, & distincta.

Reponunt Thomistæ, quod licet in tempore nostro duo instantia non possint sibi immediatè succedere, bene tamen in tempore discreto, & angelico,

quo motus discretus, & operationes libere Angeli mensurantur, nam inquirunt, tempus illud nihil aliud est, quam indivisibilem durationum; sive instantium numerus.

Contra: Unicuique illorum instantium temporis discreti respondet aliquid temporis nostri, quodcumque, etenim eorum habet durationem determinatam etiam per respectum, & ordinem ad nostrum tempus, siquidem Deus novit determinatè, & distinctè quanta esset illius discreti motus duratio: Sed in tempore nostro tantum reperiuntur partes divisibiles, sive instantia indivisibilia continuativa partium divisibilium temporis; quodcumque verò instans motus angelici conferri potest aut cum parte præterita, aut cum futura nostri temporis: Ergo necesse est quod unicuique illorum duorum instantium temporis discreti respondeat in tempore nostro, vel unicum instans, vel quod primo instanti temporis discreti respondeat prior pars temporis nostri cum instanti terminativo illius, & quod secundo respondeat pars temporis subsequens cum instanti illius initiativo: Idem enim instans in tempore nostro est terminativum prioris partis, & initiativum posterioris, vel saltem sequitur, quod uni respondeat solum instans temporis nostri, & alteri pars ejusdem temporis; sed utrumque est absurdum: Primum quidem, sequeretur enim illa duo instantia nostri temporis esse sibi invicem immediata, etenim si inter illa mediaret aliquod tempus, verificari non posset, quod secundum instans motus discreti esset primum non esse Angeli in termino à quo: quippe cum in illo tempore intermedio prius verum fuisset dicere, Angelus non est in termino à quo. Adde quod sequeretur Angelum immediatè non transire ab uno termino ad alterum, ut volunt Adversarii: necessarium enim esset, quod illo tempore intermedio

dio, priusquam pertingeret terminum ad quem, esset in aliquo loco medio inter utrumque terminum, nec consequenter deferendo terminum à quo per ultimū sui non esse, non acquireret terminum ad quem per primum sui esse in eo. Secundum etiam dici nequit, aliās sequeretur non dari, aut primum esse Angeli in termino ad quem, aut ultimum esse ejusdem in termino à quo, quia neque datur prima, neque ultima pars temporis.

Reponunt secundò: Non videri inconveniens, quòd alicujus rei incœptio, aut desinitio indivisibilis fiat in tempore, quando non fit in eo per se, & tamquam per propriam mensuram; sed tantum per accidens, & secundum quandam coexistentiam, quia non est judicandum de natura durationis alicujus rei per ordinem ad quamcūque aliam durationem cui coexistit: sed per ordinem ad eam, quæ habet rationem mensuræ respectu ipsius; & ita existentia Angeli in termino à quo diceretur desinere indivisibiliter, & per ultimum sui esse, & in termino ad quem incipere per primum sui esse, quia quòd ita desinit, & incipit per ordinem ad propriam mensuram, idest, ad tempus discretum, licet incipiat aut desinat coexistendo parti divisibili nostri temporis, non minùs incipit, aut desinit indivisibiliter. Sicut esse substantiale, Angeli non minùs incipit, aut desinit indivisibiliter, quàm existentia in loco, & tamen non repugnat, quòd suum primum, aut ultimum esse coexistat temporis nostro; alioqui non posset unus Angelus creari immediate post alium per respectum ad nostrum tempus; quia si creatio primi Angeli coexistit instanti nostri temporis, necessarium erit, quòd creatio secundi coexistat temporis, eo quòd in tempore nostro non dentur duo instantia immediata.

Contra: Repugnat, quòd acquisitio

termini ad quem coexistat temporis habenti partes, & fiat simul, & indivisibiliter; nam vel illa acquisitio in seiv coexistit secundum se totam toti temporis, & secundum diversas partes distinctis partibus temporis, itaut tantum una illius pars respondeat uni parti temporis, & altera alteri; aut tota coexistit simul toti temporis, & tota singulis partibus: sed neutrum dici potest: Non primum, alioquin sequeretur, quòd illa acquisitio non fieret tota simul, sed successive; & per partes, quod in motu discreto negant Adversarii: Non etiam secundum, etiam si in qualibet parte illius temporis fit tota acquisitio, sequitur quòd fiat infinities, quia in quolibet tempore sunt infinitæ partes aliquotæ. Adde quòd duæ medietates temporis non possint esse simul; sed adveniente secunda recedit prima, idemque dicendum de aliis partibus: Ergo illa termini acquisitio non potest simul coexistere toti alicui temporis.

PROBATUR secundò Conclusio: Motus localis essentialiter est transitus medius inter duos terminos: sed si Angelus deferat simul terminum à quo, & simul etiam acquirat totum terminum ad quem, non potest inter duos illos terminos mediare aliquis transitus: Ergo neque sic fieri motus localis ab uno ad alterum. Major constat: Omnis enim motus maximè localis, est via, seu tendentia ab uno termino ad alterum.

Reponunt Thomistæ ipsam desinitionem unius termini, & acquisitionem alterius habere rationem viæ, & tendentiæ; successio enim, & habitudo unius termini ad alium, inquirunt, habet rationem alicujus medii.

Contra: Abiectio unius termini, & acquisitio alterius non sunt extra ipsos terminos: Ergo neutra potest habere rationem medii, seu transitus. Antecedens patet; Vel enim illa abiectio, &

acquisitio sunt simul in termino ad quem, vel una sit in termino à quo, & altera in termino ad quem, quia cum illa abjectio, & acquisitio termini sit operatio Angeli, aut operationem supponat, debet reperiri in altero extremorum simul, vel abjectio debet esse in uno, & acquisitio in altero. Consequentia etiam est evidens; Nam transitus est quid medium inter terminos; medium autem condistinguitur ab utroque extremo æqualiter, cum non magis se teneat ex parte unius, quam alterius.

Reponunt 2. Thomistæ existentiam in termino à quo posse sumi dupliciter, nempe aut secundum se, & absolute, aut ut dicit ordinem cuiusdam potentialitatis ad existentiam in termino ad quem sibi immediate succedenti. Si sumatur primo modo, verum est quod Angelus dum est in termino à quo non movetur: Si autem sumatur secundo modo, falsum est; quia secundum hanc rationem est terminus successione discretæ, in qua consistit motus discretus; & hoc satis est, ut existentia sic sumpta dicatur inchoative successio, & motus. Similiter existentia in termino ad quem potest dupliciter sumi, scilicet absolute, vel ut dicit ordinem actuantis, & terminantis potentialitatem quam importat existentia in termino à quo: Primo modo sumpta non dicitur motus, sumpta tamen secundo modo dicitur motus terminativè. Ratio verò ob quam quilibet ex his existentis, ut dicit ordinem ad alteram, potest dici motus discretus, sumitur ex propria natura hujus motus, nam motus discretus nihil est aliud, quam numerus diversarum operationum, ratione quarum Angelus est successivè in diversis locis: Unde sicut numerum componunt unitates, non quidem absolute consideratæ, sed una in habitudine ad aliam; sic etiam motum discretum componunt operationes di-

versæ, non absolute sumptæ, sed prout una dicit ordinem ad aliam.

Contra; Sive existentia Angeli in termino à quo sumatur absolute, & secundum se, sive respectivè, & per ordinem ad terminum ad quem, semper verum est, quod Angelus realiter sit in termino à quo, & non in termino ad quem, nec in medio; Ergo pariter verum est, quod realiter non moveatur: Motus enim realis est tendentia à termino à quo ad terminum ad quem, ita quod unus deferatur, alius acquiratur: quando autem Angelus realiter est in termino à quo ipsum non deserit, nisi aliquam ejus partem abiciat, & consequenter non potest dici moveri.

Deinde, respectus ille, & ordinabilitas Angeli ad terminum ad quem, nullatenus potest dici motus formaliter: Ergo nec ratione illius Angeli dici potest formaliter moveri. Probatur antecedens: Illud dici nequit motus formaliter, quod subsistere potest cum quiete: atqui Angelus etiam quiescens per horam in termino à quo, non solum in ultimo instanti illius horæ, sed etiam in quolibet illius momento, dicere potest respectum, & ordinabilitatem ad terminum ad quem: Ex eo enim dicit illam ordinabilitatem, ex quo voluntariè statuit, & se ordinavit ad illum locum ad quem acquirendum: at in primo instanti illius horæ quo existit in termino à quo, potest statuere, & ordinare acquisitionem termini ad quem; adeoque ad ipsum ordinari, & consequenter illa ordinabilitas subsistere potest cum quiete Angeli, subindeque non potest dici verus motus.

Denique; fatentur omnes Thomistæ omnem motum sive discretum, sive continuum, fieri posse in instanti verò, & reali; sed motus ille discretus fieri deberet in instanti, quippe cum inter abjectionem termini à quo, & acquisitionem termini ad quem nullum verum supponant tempus, nec instans me-

medium: Ergo eorum responsio invalidum est, & purum effugium .

PROBATUR TERTIO, De ratione motus localis est, quòd sit unus: Atqui motus in quo Angelus ita se habet quòd per ultimum esse deferat simul totum terminum à quo, & immediatè per primum esse acquirat totum simul terminum ad quem non est unus, sed aggregatum ex pluribus instantaneis mutationibus: Ergo, &c. Probatur minor: Motus interruptus quiete non est unus: sed iste motus esset interruptus aliqua quiete: Ergo non esset unus. Probatur minor: Non potest Angelus esse in uno termino per solum instans, quin sit in alio per tempus, quia post instans necessariò sequitur tempus; quippe cum, ut diximus, duo instantia temporis non possint esse sibi invicem immediata: Ergo Angelus se movens necessariò debet aliquo tempore permanere in termino à quo, vel ad quem, ac subinde in alterutro quiescere.

PROBATUR denique Conclusio ratione Doctoris quà solvit præcipuum Adversariorum fundamentum, nempe; quod quiescit in toto aliquo tempore, non potest aliter se habere in ultimo instanti illius temporis, sed etiam necessariò quiescere debet in eo. Hoc, inquam fundamentum sic *impugnat Doctor*; Si id verum foret: Inde sequeretur, quòd panis qui erat sub speciebus Eucharisticis in esse quieto toto tempore prolationis verborum consecrationis, esset sub illis in instanti ultimo prolationis verborum, quod est falsum, quandoquidem in illo instanti fiat transubstantiatio, & Corpus Christi sit sub speciebus illis, panis verò non sit tunc existens in rerum natura. Deinde sequeretur quòd aer, qui erat in esse quieto sub tenebris toto tempore ante instans in quo illuminatur, esset etiam sub tenebris in illo instanti, & sic vel tenebræ, & illuminatio essent simul, quod implicat, vel certè illuminatio non fie-

Tom. IV.

ret in instanti. Nec refert quòd Sol per motum localem applicetur ad aerem, tenebrosus quem illuminat, & quòd illuminatio fiat in instanti terminante itum motum localem: Tum quia, si in instanti crearetur Sol, & aer præexistere sub tenebris usque ad istud instans, certè adhuc illuminatio fieret in illo instanti. Adde quòd quamvis illuminatio non fiat de facto nisi in instanti terminante motum, hinc non sequitur quia fiat in illo instanti: Ergo vel tenebræ non sunt in illo instanti, vel simul existunt tenebræ, & illuminatio.

Impugnat secundò: Si fundamentum S. Thomæ verum foret, sequeretur quòd Angelus numquam moveretur localiter, nec in tempore continuo, nec discreto: sed consequens non admittunt Adversarii: Ergo nec admittere debent id unde sequitur. Probatur sequela majoris, ex hypothesi v. g. quòd Angelus quieverit per horam temporis nostri in uno loco, secundum Adversarios deberet necessariò etiam quievissè ultimo instanti terminativo illius horæ in eodem loco. Hoc supposito quæro, quando dicunt Adversarii quòd possit se movere in instanti temporis discreti ad alium locum, an illud instans temporis discreti coexistat instanti temporis nostri, aut alicui parti ejus? Si parti: Ergo motus ille angelicus sit in tempore continuo nostro, & non habet aliquod instans in quo inciperet: Si in instanti: Ergo vel illud instans erit immediatum instanti terminativo quietis, & sic duo instantia sequerentur se invicem immediatè, quod supponitur hic etiam ab Adversariis esse falsum, quia aliàs sequeretur tempus nostrum componi ex indivisibilibus, & consequenter non esse continuum, sed discretum. Si mediatum: Ergo inter illud instans mediatum, & instans terminativum quietis, mediat tempus in quo quiescit adhuc Angelus; sed si quiescat in illo tempore debet quiescere in instanti terminativo illius

Z

tem-

temporis secundum Adversarios: sed illud instans terminativum est instans illud mediatum in quo dicitur moveri: Ergo non posset moveri in illo instanti, quia alias moveretur, & quiesceret in eodem instanti.

Obijciunt Adversarii; moveri motu discreto est deferere per ultimum esse totum aliquem locum, & immediatè post per primum esse acquirere alium totum simul, & non per partes: sed hoc præstare potest Angelus: Ergo etiam moveri potest motu discreto. Major constat, per hoc siquidem differt motus discretus à continuo, quod in motu continuo mobile per partes deserit terminum à quo, & per partes acquirit terminum ad quem: in motu verò discreto è contra. Minor probatur: Angelus est indivisibilis, subindeque non commensuratur loco in quo existit; Ergo potest per ultimum esse deferere totum aliquem locum, & immediatè post totum alium locum simul acquirere. Probatur consequentia: Primò, quia hoc ipsò quod Angelus non commensuratur loco, non debet esse in illo secundum exigentiam ejus, subindeque nec continuè moveri in illo loco; licet sit continuus. Secundò, quia ex sola mobilis extensione provenit, quod non possit acquirere totum simul terminum ad quem: Angelus autem hoc ipsò quod est indivisibilis caret extensione. Tertiò, quia anima rationalis eò ipsò quod est indivisibilis in momento actuat totum corpus divisibile, & in instanti simul totum deserit: Quidni ergo poterit Angelus locum aliquem totum simul, & semel deferere, & alium immediatè post similiter totum simul acquirere? Ita Gonetus.

Nego minorem, & ad ejus probationem distinguo consequens: Angelus sic deferere potest totum aliquem locum, & immediatè post alterum totum simul acquirere abiectione, & acquisitione, quæ sit verus motus localis,

nego: quæ sit tantum mutatio, concedo: Nam ut patebit sequenti conclusionem, potest Angelus in instanti saltem virtute divina, transire à termino à quo ad terminum ad quem, non per verum motum localem, sed per simplicem mutationem. Hic autem sermo est de vero motu locali.

Ad primam illius consequentiæ probationem dico, non esse necessum quod Angelus commensuretur loco ut in eo dicatur moveri continuè, sed sufficere quod uni parti illius loci possit se sistere præsentem, deinde alteri, & rursus alteri.

Ad secundam probationem nego idcirco mobile non posse acquirere totum simul terminum ad quem eò quod sit extensum; nam ut in secundo Notabili observavimus, divisibilitas motus non solum ex mobilis extensione, sed etiam ex parte temporis, seu spatii desumenda est.

Ad tertiam probationem nego paritatem, Anima enim non informat totum corpus per motum, sed per quandam illapsum instantaneum, adeoque exemplum illud instantaneæ informationis, aut derelictionis corporis non est ad rem; quippe cum hic non de qualibet mutatione, sed de mutatione motus localis sermo fiat.

Obijciunt secundò, Ideo corpus non potest moveri motu discreto, sed continuo tantum, quia cum sit extensum, subindeque habeat partes correspondentes partibus loci, non potest simul totum aliquem locum deferere; sed necesse est quod ultima pars sui prius egrediatur ab ultima parte loci in quo est, & ingrediatur alium locum quam prima pars: sed Angelus caret extensione: Ergo motu discreto moveri potest.

Nego majorem: Non enim sola hac ratione corpus moveri non potest motu discreto, sed etiam ex eo quod decurrere debeat spatium divisibile medianis inter

inter terminum à quo, & terminum ad quem: Siquidem ut mox diximus, motus divisibilitas ex triplici capite repetenda est, videlicet ex parte mobilis extensi, medii interjacentis, & terminorum à quo, & ad quem divisibilium. Unde licet motus Angelicus non habeat primariam rationem divisibilitatis, & successionis, sufficit quod dici possit divisibilis ratione divisibilitatis spatii, & terminorum.

Ex his colligit Doctor; Non esse necessarium recurrendum ad aliud tempus ad mensurandum motum localem Angelici, sive quò continuè, & successivè movet se localiter, sive quò instantaneè, & non successivè se movet; sed omnino posse Angelum successivè se movere pro tempore nostro non minus quàm corpus, & posse etiam se-ipsam instantaneè movere pro instanti temporis nostri.

Probat primam partem; quia nihil potest salvari per tempus discretum, quòd non possit salvari per tempus continuum: nam per tempus discretum non potest salvari aliud, quàm quòd Angelus possit moveri à loco ad locum vel indivisibiliter, & sine successione: sed divisibiliter, & cum successione: sed utrumque horum potest facere in tempore nostro, comprehendendo sub tempore instantia ipsius quæ suppono in ipso includi: Ergo, &c. Probatur major quoad primam partem, quia si moveatur indivisibiliter absque successione, motus ille potest fieri in instanti, ut est evidens. Probatur eadem major quoad secundam partem de motu divisibili; quia si moveatur divisibiliter, & successivè; Aut illæ partes motus sunt omnes divisibiles, & non continuè, sed discretè succedentes sibi invicem, & tunc possunt omnes esse successivæ, & discretæ pro instantibus temporis nostri, & quæ sunt divisibiles possunt esse pro partibus divisibilibus temporis nostri; Aut omnes sunt divisibiles, sed di-

cretæ, & tum etiam possunt esse pro diversis partibus temporis nostri à se discretis, ita scilicet ut una habeatur pro quadrante, & tunc fiat cessatio, & alia pro alio quadrante post cessationem: Ergo quamvis ipsamet existentia Angeli mensuretur ævo, tamen ubi ipsius, & motus ad ipsum non debent necessariò sic mensurari, sed possunt mensurari tempore nostro, sicut possunt ubi corporeum, & motus ad illud.

PROBATUR SECUNDA PARS; quia si moveatur ad plura ubi continuè absque ulla intermissione, sicut movetur corpus, quandoquidem adveniente posteriore ubi definit, prius, certè omnino movebitur in tempore tam benè, quàm corpus; & si moveatur ad locum unum sine successione, ita ut non prius sit præsens uni parti quàm alteri, omnino movebitur in instanti temporis nostri ad illum locum.

CONCLUSIO SECUNDA.

Angelus non potest in instanti moveri ab uno loco ad alterum motu propriè dicto: Potest tamen, in instanti ab uno loco ad alterum transire per simplicem loci mutationem. Hæc est communis Subtili, & Angelico Doctori eorumque Sequacibus, ait enim Doctor laudatò loco numerò 6. Dico quòd dupliciter potest intelligi mutatio, & potest dici duplex mutatio, una includens totam realitatem motus, alia præcisè includens realitatem termini motus: Exemplum hujus est, quòd istud mutatur ab A ubi, usque ad B ubi; Ubi potest intelligi dupliciter, vel quòd simul habeat omnia ubi intermedia, sicut haberet, si præcisè moveretur successivè, vel quòd illa mutatione præcisè haberet ultimum ubi, sicut haberet si illa mutatio esset ultimus terminus motus. Primò modò contradicendo secundæ opinioni, non video qualiter Angelus virtute naturali potest mutari vel moveri in instanti, quia non videtur quòd virtute sua naturali possit habere plura ubi equalia. Secundò modò, non

videtur inconveniens quin possit mutari in instanti, quia quod terminus motus non statim inducatur, hoc est ex imperfectione virtutis ipsius moventis, quæ imperfectio non est attribuenda Angelo nisi aliqua necessitas appareat, quia dignificanda est natura quantum apparentia permittunt.

Quod autem Angelus non possit moveri in instanti motu propriè dicto, probatur: Si ita moveretur, necessum esset quòd in instanti haberet plura ubi adæquata: sed hoc naturæ viribus fieri nequit: Ergo nec in instanti moveri. Probat sequela majoris: Si Angelus moveretur successivè per horam ab hac aula, quæ esset locus adæquatus ejus, ad aulam continuam, in quolibet instanti istius horæ haberet locum adæquatum sibi. Nam in priori instanti esset tamquam in loco adæquato in parte hujus aulæ, & in parte alterius aulæ; in posteriori verò instanti esset in alia parte hujus, & in alia etiam alterius aulæ, & ita paulatim, & successivè mutaret locum adæquatum, relinquendo partem post partem loci adæquati prioris, & acquirendo partem post partem loci adæquati posterioris, donec tandem perveniret ad occupandam totam aulam secundam, nullam amplius partem occupando hujus aulæ: Ergo, &c.

Deinde, Illud quod per essentiam suam est successivum, non potest esse in instanti: Sed motus ex sua ratione intrinseca, & essentiali est successivus: Ergo implicat esse in instanti: Consequentia est: evidens cum minore supra probata. Major verò probatur, quia omne successivum habet partem post partem sibi invicem succedentes, & impossibiles, adeoque in instanti esse nequeunt, quia jam essent simul.

Denique, Ubi est intrinsecè prius, & posterius, ibi est intrinseca successio: sed in motu Angeli est intrinsecè prius, & posterius: Ergo, & intrinseca successio. Minor probatur, Motus est tendentia

mobilis à termino à quo ad terminum ad quem per spatium inter utrumque medians: sed in hac tendentia est prius, & posterius, quippe cum mobile deferendo terminum à quo, prius debeat esse in medio quàm in termino ad quem: Ergo, &c.

PATET ETIAM SECUNDA PARS, nempe quòd Angelus mutare possit suum locum adæquatum in instanti: Primò, quia exinde non sequitur eum esse simul, & semel in duobus locis adæquatis, quippe-cum illa subitanea mutatio fieret per primum non esse Angeli in termino à quo, & per primum esse in termino ad quem, quod ut patet non importat esse in duobus locis, sed tantum esse in uno, & non esse in altero. *Deinde*, si quid obesset huic instantaneæ mutationi, maximè quia terminus ad quem, qui est indistans à termino à quo, habet partes divisibiles: At hoc non officit, quippe cum in instanti anima rationalis totum corpus informet, & lux per totum aërem subitanea diffusionem protendatur. *Denique*, Si Angelus crearetur extramundum, haud dubium est quod in instanti totum locum adæquatum occupare posset in mundo: Ergo idem fieri potest dum jam locum occupat.

Dices 1. contra primam partem; Motus quò Ang. lus movetur de loco ad locum per spatia media, potest omnino, & absque ulla proportionem excedere, motum, quò corpus illud spatium decurrit; sed hic excessus non posset esse nisi Angelus moveatur in instanti: Ergo, &c.

Nego minorem, Ut enim motus Angelicus excedat in velocitate motum, quemlibet corporis cujuscumque, non opus est quòd moveatur in instanti; sed sufficit quod fieri possit in minori, & minori duratione divisibili, quàm possit esse motus cujuscumque corporis: Cum autem tempus sit divisibile in infinitum; consequens est quòd Angelus poterit semper majori, & majori,

jori velocitate moveri quàm quælibet corpora .

Dices 2. Angelus cum sit omnino spiritualis longè subtilior, & velocior est luce corporea : sed lux corporea in instanti pervadit omne aeris spatium : Ergo multo facilius illud pervadere poterit Angelus .

Distinguo minorem ; Lux corporea pervadit universum aerem in instanti per verum motum, nego : Per simplicem diffusionem, & mutationem quæ est terminus motus, concedo. Angelus autem transiens de uno loco ad alterum, cum verè moveatur, non in instanti, sed successivè potest aerem pervadere .

Dices 3. Motus localis Angeli nil aliud est quàm acquisitio loci : sed ut probavimus in secunda parte hujus conclusionis, Angelus acquirere potest locum in instanti : Ergo etiam poterit moveri localiter in instanti .

Nego majorem ; Nam ut diximus illa simplex loci acquisitio est tantum mutatio, non verò motus localis, qui ut sit propriè dictus debet esse transitus à termino à quo ad terminum ad quem ; nam si Angelus produceretur extra mundum, posset acquirere locum in mundo, non propterea tamen sic diceretur moveri localiter .

QUAESTIO TERTIA.

An Angelus possit transire de uno loco ad alium non transundo per spatium intermedium ?

NOTANDUM 1. Quòd quemadmodum Philosophi distinguunt duo genera partium in quantitate continua, scilicet communicantium seu proportionalium, & non communicantium seu aliquotarum : Ita pariter medium seu spatium medians inter terminum à quo, & terminum ad quem in motu locali distingui potest duplex, nimirum communicans cum utroque extremo,

& non communicans cum eisdem, v.g. si Angelus existens in primo palmo unius corporis tripalmaris velit ad tertium palmum transire, medium non communicans erit secundus palmus, quia habet suam extensionem distinctam ab aliis duobus palmis, nec de extremis aliquid participat ; esse tamen poterit medium communicans si aliquid sumatur de primo palmo, & aliquid de secundo, vel aliquid de secundo, & aliquid de tertio : Ista verò media communicantia sunt infinita in potentia, siquidem post aliquam partem indeterminatam primi palmi potest mensurari aliquis palmus, qui aliquid participet de primo, & aliquid de secundo, & jam cum puncta ac partes proportionales videantur in potentia infinitæ, etiam media communicantia dici possunt infinita in potentia .

Notandum 2. Angelos posse mutare locum multipliciter, positivè, privativè, & mixtè : Positivè, acquirendo novam præsentiam, & priorem non amittendo, ut cum Angelus in puncto existens, vel in spatio minore adæquato extendit se ad spatium majus retento priori : Privativè, cum è contrariò contrahit se ad spatium minus, vel ad indivisibile nihil novi acquirendo : Mixtè, cum spatium prius deserit, vel ex toto, vel ex parte, & aliud acquirit vel totaliter, vel ex parte diversum, tunc enim præsentiam partim acquirit partim amittit : acquirit scilicet novam, & veterem perdit, idque vel totaliter quando locum planè diversum subit, vel secundum quid quando non planè diversum, sed eundem secundum quid. Porro quando locus novus, & totaliter diversus acquiritur, vel ille est remotus, & distans à priori, vel non distans, sed continuus aut contiguus immediatè, sed major quàm ut totum simul occupare possit Angelus. De utroque autem hic quæritur, an ab uno ad alterum transire possit immediatè, & absque eo quòd per alij-

aliquid instans verè sit in medio inter utrumque terminum à quo, & ad quem.

Notandum 3. Hic quæstionem movetur non solum de motu qui est extra sphaeram activitatis Angelicæ, sed etiam de eo qui intra sphaeram ejus activitatis est; puta si sphaera activitatis Angeli, & ejus locus adæquatus sit una aula, queritur an possit se movere ab una parte illius ad alteram extremam, absque eo quòd moveatur per medium, quod est inter duas illas partes. Similiter ex hypothesi quòd aliæ duæ sint aulæ sequentes extra locum adæquatum ipsius Angeli, & sphaeram illius activitatis naturalis; an possit in tertiam se transferre absque eo quòd per mediam interjacentem transeat?

CONCLUSIO PRIMA.

Angelus transire non potest ab uno loco adæquato ad alterum distantem absque eo quòd transeat per medium, si illud sit communicans: Poterit verò ita transire motu instantaneo si medium non sit communicans cum partibus intermediis. Hæc est Doctoris in 2. dist. 2. q. 12. ubi cum hanc quæstionem præmisisset, ita respondet numero 3. Videtur probabiliter quòd non, quia ordo præfixus à superiori Agente videtur esse necessarius cuicumque Agenti inferiori, quando habet actionem præcise circa talia ordinata.

*Probat*ur prima pars eadem ratione Doctoris quæ simul explicatur. Ordo præfixus à superiori agente necessario servandus est à quocumque inferiori, nec potest causa inferior sibi præscriptum ordinem à causa superiori inverti: sed est ordo præfixus à Deo quòd nulla creatura possit transire de loco in locum distantem, non pertransito tali medio. Major constat. Cum enim omnis creatura pendeat à Creatore, non solum secundum entitatem, & operationem, sed etiam penes modum operationis, & activitatis suæ, opus est quod agat juxta præscriptum ordinem.

Probat minorem Doctor, primò quidem experientià quæ constat quòd cum, inquit, *Ordo formarum naturalium succedentium sibi in generatione naturali determinatus sit abinsistente naturæ, ideo respectu cujuscumque Agentis naturalis est necessarius.* Hinc nulla causa inferior producere potest animam sensitivam in corpore organico nisi vegetativa præcesserit, nec rationalis in eodem corpore operationes suas exere, nisi præcesserint operationes vegetativæ, & sensitivæ: nec anima corpus informans transit ad informandam unam partem corporis distantem, quin informet prius partes intermedias quibus continuatur pars distans cum parte alia prius informata. Nec, inquit Doctor ex Arist. 8. *Nethaphysicorum*, Agens naturale potest facere immediate acetum ex vino, quia inter vinum, & acetum naturaliter media est quædam alia substantialis forma: Ergo, &c.

PROBAT SECUNDAM PARTEM DOCTOR; Si autem loquamur de motu indivisibili, inquit, dico quòd in tali motu potest pertransire ab extremo in extremum immediatum non transeundo per medium, quod est aliquid utriusque extremi, imò necesse est hoc quia si transiret per tale medium, continuè transiret, & non instantanee. Unde sibi infra obiciens, quòd si Angelus non possit transire de loco ad locum, non transeundo per medium non communicans, non poterit etiam transire per medium communicans, responderet hanc illationem esse falsam; Quia, inquit, pertransiendo ab uno ubi immediate ad aliud ubi in instanti, habet ista omnia ubi ordine quodam naturæ inter quæ est, ordo potentialis ex natura rei: sed non oportet quòd habeat ea ordine durationis: Si autem transiret à distanti in distantem absque ordine omnimodo, tunc nec ordine naturæ, nec durationis haberet illa, quorum est ordo naturalis, circa quæ tamen operatur præsuppo-

supponens necessario ordinem eorum.

Patet autem hujusce Conclusionis veritas; dum enim Angelus transit instantaneè de loco ad locum contiguum, aut esset simul in duobus locis intermedio participante de utroque loco, aut non moveretur in instanti ad locum vicinum, quod est contra hypothese[m], aut esset simul in duobus locis adæquatis quòd naturaliter implicat. Probatur, quando enim movetur ab hac aula in instanti ad alteram vicinam, debet esse in illa aula vicina: Ergo vel simul est in loco inter-medio participante, & integrato ex media parte loci prioris, & media parte loci posterioris, vel non est, si non est: Ergo non pertransiit omnia loca inter-media, communicantia; si est: Ergo est simul in tota aula vicina, & in media parte hujus aulæ, & sic est in duobus locis adæquatis, aut saltem in loco majori quàm sit locus ejus adæquatus, quia aula proxima, ut supponitur, & media pars hujus aulæ est locus major quàm aula proxima sola: Ergo esset in loco majori quàm adæquato.

Disparitas autem quam profert Doctor cur Angelus transire possit de loco ad locum absque eo quòd transeat per medium communicans, non autem possit ita transire absque eo quòd transeat per medium non communicans, in hoc consistit, inquit Poncius *ad hunc locum*, quòd quando transit de loco ad locum immediatum in instanti, nulla est pars medii communicantis cui non fuit præsens, vel prioritate temporis, vel prioritate naturæ, anrequam fuit præsens toti loco immediato, quamvis non fuit præsens aliquibus partibus medii priùs tempore. Quod clarè patet, supponendo Angelum occupare hanc aulam tanquam locum adæquatum, & hinc in instanti transire ad aulam totam contiguam seu continuam: In hoc casu, media communicantia sunt partes intercedentes inter utramque aulam, v.

g. si hæc aula sit quatuor palmarum, & secunda totidem, unum medium, communicans sunt tres posteriores palmi hujus aulæ, & primus aulæ vicinæ, aliud medium communicans sunt duæ posteriores palmi hujus aulæ, & duæ priores aulæ vicinæ, & ita de cæteris. Quando autem Angelus transiret de hac aula ad vicinam, pro illo tempore quò fuit in hac aula, occupavit omnes palmos, & partes hujus, & hoc priùs tempore quàm occupaverit instantaneè aulam vicinam; quando etiam in instanti posuit se in aula vicina, simul occupavit omnes palmos, & partes ejus: Unde evidens est quòd in hoc casu nulla esset pars media inter utrumque locum, cui Angelus non esset aliquando præsens, & quidem partibus aulæ hujus, esset præsens priùs tempore; sed partibus aulæ vicinæ prioribus, & vicinioribus esset præsens priùs quàm posterioribus aut toti loco; non tamen tempore; quandoquidem omnes occuparet in instanti, sed solùm naturà, quia scilicet nisi esset præsens illis non posset esse præsens partibus aliis posterioribus: sed benè posset esse præsens illis prioribus sine eo quòd posset esse præsens posterioribus. Unde valet hæc consequentia; est præsens posterioribus: Ergo, & prioribus est vel fuit præsens: Non valet autem hæc; est vel fuit præsens prioribus: Ergo est vel fuit præsens posterioribus. Et consequenter quandoquidem illud dicatur prius naturà à quo non convertitur subsistendi consequentia; præsentia Angeli ad partes priores aulæ vicinæ est prior naturà quàm ad partes posteriores, & sic Angelus ipse priùs naturà est præsens partibus prioribus quàm posterioribus, de quo non potest dubitari. Sed sic est, quòd ordo necessario observandus ex natura rerum creatarum in mutatione, non est, quòd priùs tempore debeat omnis res esse in medio quàm in extremo loco ad quem sit motus; sed quòd priùs

prius tempore vel naturâ. Unde ſequitur manifeſtè quòd quamvis Angelus moveret ſe iſtantiànè de loco ad locum, non prius tempore tranſeundo medium omne, tamen adhuc obſervaret ordinem naturæ, quia prius tempore, vel naturâ eſſet in omni parte media: At ſi moveret ſe de loco in locum diſtanti non pertranſeundo medium non communicans, ut ab hac aula ad tertiam aulam relicta ſecundâ. Inverteret illum ordinem, quia nec prius naturâ, nec prius tempore fuiſſet in aula ſecunda intermedia, quàm in tertia. Hæc Poncius.

Hic autem advertit: Per motum iſtantiæ Doctorem non intelligere tranſitum à loco ad locum, qui ſit reverà motus propriè dictus, ſiquidem, ut ſupra probatum eſt, motus propriè dictus fieri nequit in iſtanti, ſed tantum eum tranſitum appellat iſtantiæ, qui eſt ſimplex loci mutatio, deferendo nempe terminum à quo, & acquirendo terminum ad quem, quod in iſtanti fieri poſſe priori quæſtione probavimus.

Dices contra primam partem; Angelus eſt in loco per ſuam ſubſtantiam, cum ſubordinatione ad imperium ſuæ voluntatis; ſed poteſt velle eſſe in loco diſtanti non volendo eſſe in medio: Ergo non eſt neceſſarium, ut de uno loco ad alterum tranſeat, quòd moveatur per medium.

Diſtinguit minorem Doctorem numero 4. loquendo de Angelis pro eo ſtatu in quo nunc conſtituuntur: Angelus malus poteſt velle eſſe inordinatè in loco diſtanti non volendo pertranſire medium, ex qua volitione non ſequeretur ullus effectus, quia nempe illud virtutem ſuam naturalem excedit, nec id poſſet à Deo obtinere niſi extraordinarie agente, concedit: Angelus bonus poſſet ordinatè velle eſſe in loco diſtanti non volendo pertranſire medium, quaſi virtute ſua id poſſet aſſequi, ne-

gat; in eo namque caſu quòd Angelus bonus optaret tranſire de loco ad locum impertranſito medio, Deus ejus votis annuens extraordinariè agendo, ita illum moveret de loco ad locum non movendo per medium, ſed hoc fieret virtute ſupernaturali, de qua non eſt ſermo.

Aliter diſtinguo minorem; Angelus poteſt velle eſſe in loco remoto volitione quæ ſufficiat ad hoc ut ſit in tali loco, ſeu per quam naturaliter locum remotum, & diſtans obtinere poſſit, nego: volitione inefficaci, & quæ operatum non obtineat, tranſeat: Itaque ſicut nos movemur de loco ad locum mediante voluntatis imperio, nec tamen poſſumus locum expeditum pro voluntate ſemper obtinere, ſed ſolum quando reverà nos applicamus ad locum conſequendum: Sic quamvis Angeli moveant ſe localiter cum dependentia ab imperio ſuæ voluntatis, non poſſunt tamen locum expeditum obtinere niſi debito modo ſeſe applicent ad eum, conſequendum: Hæc autem debita applicatio fieri nequit niſi cum ordine ad medium decurrendum priuſquam locus ad quem pertingatur.

Dices 2. Adorandum Chriſti Domini Corpus de Cælo ad altare tranſit non pertranſito medio: Ergo, & Angelus poteſt ſic tranſire.

Diſtinguit antecedens Doctorem; Corpus Chriſti ita ſit præſens in altari per virtutem extraordinariam, & ſupernaturalem, quæ non debeat ſe naturis rerum conformare, & earum virtuti commenſurari, concedit: *Quia*, inquit, *eſt ſupra illum ordinem præſens illum, & non habens illum pro præfixo.* Ita ſit præſens virtute naturali, negat. Hic autem ſermo eſt de virtute naturali Angeli, quæ cum ſit omnimodè limitata, & determinata, non poteſt rerum à Deo ſtatutum, & præfixum ordinem immutare, adeoque non poteſt à termino à quo ad terminum ad quem diſtan-

stantem absque transitu per medium, pertinere.

Dices 3. Angeli motus similis est nostræ cogitationi, nec-non, & motibus corporum Beatorum : sed nostra cogitatio transire potest à cœlo in terram absque medio : Intellectus enim noster de cœlo cogitans, illic potest cogitationem suam in terram dirigere, non cogitando ullatenus de aere intermedio. Similiter corpora Beatorum, (inquit Author libri de cognitione veræ vitæ cap. 25. apud S. Augustinum Tomo 9.) tam citò possunt transferri ab Oriente ad Occidentem, quàm id possit cogitatio nostra, quæ certè id potest in instanti, & sine transitu per medium: Ergo multò magis Angeli ita possunt moveri.

Nego majorem: Differentia enim magna est inter motum cogitationis, & motum localem: Tum quia cogitatio non requirit præsentiam realem, & substantialem cogitantis ad objectum, sed tantum metaphoricam, & intentionalem: Secus autem præsentia localis ad spatium: Tum etiam quia spatium intermedium non est medium cognitionis, adeoque non est necesse ut de illo medio cogitet intellectus quando unius extremi cogitatione abjicit, ut de altero extremo cogitet: Secus autem est de motu locali, qui necessariò fieri debet per spatium medium inter utrumque terminum distans. Ad id autem quod dicit Author laudatus de corporibus Beatorum, reponere possum eum sic intelligi, quòd scilicet tam citò illa beata corpora transferantur ac cogitationes nostræ, propter vim movendi celerissimam, & dotem mirabilem agilitatis.

CONCLUSIO SECUNDA

Angelus per mutationem instantaneam potest transferri de loco adæquato in alterum adæquatum continuum, & priori contiguum: Necnon, & deferre partem sui loci adæquati, & re-

Tpm. IV.

stringere suam præsentiam ad minimam ejusdem loci partem. Hæc Conclusio duas habet partes, quarum.

Probatur prima: Non minor est concedenda Angelo virtus quàm animæ rationali, & corpori luminoso: Sed anima rationalis simul infunditur toti corpori organico in instanti animationis, necnon, & toti parti per nutritionem aggeneratæ: Similiter lumen à Sole vel ab igne diffunditur in instanti per aërem contiguum, & continuum: Ergo similiter Angelus per mutationem instantaneam transire poterit ab uno loco ad alterum contiguum. *Deinde:* Si id præstare non posset Angelus, maximè quia successiò necessariò requiritur in abiectione termini à quo, & acquisitione termini ad quem, sed hoc est falsum: *Probatur:* quia nulla successiò requiritur ex parte medii, quippe cum nullum esse supponatur, nec ex parte termini ad quem, seu præsentia quæ acquiritur, quia quòd potest simul esse, potest etiam simul acquiri si nihil aliud obstat, nullum autem est contrarium obstitens, & impediens hanc acquisitionem, sicut calor v.g. successivè producitur propter frigus obstitens: neque ex parte termini à quo, quippe cum Angelus illum deferat per primum sui non esse in eo, ut dictum est in præcedenti quæstione: Ergo nihil necessariò successionem efficit, adeoque illa mutatio fieri potest instantaneè.

Dices: Terminus quem acquirit Angelus est extensus, adeoque habet partes viciniore, alias medias, alias remotiores: sed partes viciniore prius sunt acquisibiles quàm mediæ, & hæ quàm remotiores: Ergo non potest Angelus locum adæquatum deferere: & alium acquirere, nisi cum aliqua successione.

Distinguo minorem: Si hæc acquisitio fiat per verum motum, concedo: Si fiat per diffusionem sui per spatium adæquatum, necnon, & per sui replicationem,

A a

nem, & positionem multiplicem in diversis partibus aut punctis spatii, nego: Sicut enim lux Solis v. g. diffunditur sine transitu per productionem diversarum partium lucis in diversis partibus totius hemisphærii sine temporis successione, sed cum solo naturæ ordine, quia prius naturæ Sol illuminat partes sibi vicinas quàm remotiores, posito quòd naturaliter non possit agere in distans per se primò: Sic Angelus potest eodem instanti, & simul tempore diffundere se per spatium adequatum per sui replicationem, & positionem multiplicem in diversis partibus, aut punctis spatii cum naturæ tantum ordine, quia non potest occupare naturaliter partes remotas nisi mediantibus interjectis, cum non possit moveri in distans non occupato medio: Sic etiam anima rationalis simul adest omnibus partibus simul dispositis sufficienter, nec prius tempore propinquis quàm remotis, simulque relinquit, & informare cessat partes simul abscissas; quò exemplo patet Angelum posse simul spatium sibi adequatum replere. Nam si non est necessaria in anima aliqua successio ad occupandum simul totum aliquod spatium; imò neque illa sit possibilis naturaliter, cum anima nequeat initio informare unicum indivisibile, neque in argumentatione dispositio ultima fiat per indivisibilia: non videtur magis Angelo necessaria successio per se loquendo, ad replendum spatium illud, quod est virtuti suæ adequatum.

Secunda pars patet ex dictis articulo præcedenti: In quo probatum est Angelum amittere posse per mutationem simultaneam præsentiam realem quam habebat ad omnes partes sui spatii seu loci adequati, conservatâ tantum præsentia in minori illius spatii parte; hoc tamen præstare nequit per verum motum localem qui fieri non potest in instanti, sed tantum per subitaneam mutationem de qua sæpius dictum est.

QUAESTIO QUARTA.

An, & quæ sit Angelorum durationis mensura?

Notandum primò, distinguendum esse quadruplex genus mensuræ. 1. Est *perfectiōis* juxta illud Aristotelis 1. Metaph. cap. 3. *In unoque genere est unum quod est mensura cæterorum sub eodem genere.* 2. Est mensura *causationis* sic 9. Metaph. scibile dicitur mensura scientiæ quia scientiam causat. 3. Est mensura *Cognitionis* seu innotescentiæ, sic ulna notificat quantitatem panni, & hoc modo mensura nihil aliud est quàm quantitas magis nota alteram notificans: secundum, quod *mensurari* triplicem involuit respectum, unum, ad intellectum, alium ad rem mensuratum, & alium ad mensuram. 4. Est mensura *durationis*, sic Tempus dicitur mensura motus, Æternitas mensura Angelorum, & Æternitas mensura Dei.

Notandum 2. Hoc esse discrimen inter æternitatem, ævum, & tempus, quòd *Æternitas*, (ut diximus agendo de æternitate Dei,) sit interminabilis vitæ possessio tota simul, & perfecta, quæ scilicet triplicem dicit negationem, deficiationis, inceptionis, & successionis ac dependentiæ. *Tempus* verò ut diximus in physicis, est mensura motus secundum prius, & posterius; *Æternitas* autem est mensura, & duratio permanens, incorruptibilis ab intrinseco, defectibilis tamen per superiorem potentiam externam. In quo Ævum dupliciter distinguitur ab æternitate, & tempore; *Primò* differt ab Æternitate, quia æternitas est semper actu præsens, & nullò modò in potentia: Tempus verò secundum instans præsens est in actu, secundum verò futurum, est in potentia absque ulla penitus permanentia præteriti, & futuri. Ævum autem mensura quædam indivisibilis est, & non est om-

omnino præfens, sed partim actu præfens, partim potentia: Nam quemadmodum esse Angeli est indivisibile, & immateriale, & est actu præfens modò, sed tamen aliquomodo est in potentia, quia est in potentia ut conservetur in futuro per manutenentiam Dei, quæ si deflitteret omnino Angelus Annihilaretur: Pari ratione dicendum est de ævo quod est indivisibile, & actu præfens, tamen aliquomodo in potentia ad futurum. Cæterum differt a tempore, quia non est ita potentiale sicut tempus, non enim habet partes præcedentes, & partes sequentes. *Secundò* differt ævum ab æternitate, & tempore ex parte suæ mensuræ, quia Æternitas est mensura rei non deficientis nec potentis deficere: Tempus verò est mensura rei actu deficientis, & potentis deficere: Ævum autem est mensura media, scilicet mensura substantiæ non deficientis, & immutabilis, potentis tamen aliquomodo deficere, & mutari secundum operationes suas. Declaratur exemplo; nam sicut radius solaris productus à Sole in medio diaphano manente eodem est unus, & idem radius productus in instanti indivisibili, est in actu; est tamen aliquomodo in potentia, quia recedente Sole, definit esse statim: Ita dicendum est de Angelo, & ejus mensura. Alterum exemplum est imago in speculo quæ ab objecto corporeo visibili in instanti producitur, & est indivisibiliter producta, tamen recedente objecto definit esse imago illa. At verò tempus ipsum comparatur fluvio cujus partes ab eodem fonte dimanant, ita quòd pars parti succedit, atque adeò partes temporis sunt mensura rei cum innovatione, & veneratione, ejusdem: Ævum verò est mensura rei sine innovatione, & veneratione quantum ad substantiam.

Notandum 3. Ex Doctore in secundum dist. 2. questione 2. num. 10. Quòd mensurare est quantitatem ignotam certi-

*ficare per quantitatem magis notam: Certificatio autem aliquando potest fieri per quantitatem existentem in re, vel imaginatione, sicut Artifex expertus per aliquam quantitatem, quam habet in sua imaginatione, mensurat quantitatem quantumcumque sibi occurrentem. Aliquando autem potest fieri per quantitatem aliquam existentem in re, & hoc tripliciter, vel excedentem; & tunc certificatur intellectus de quantitate minore per accessum ejus ad quantitatem majorem, vel recessum ab ea: & hoc modo mensura ponitur in quidditatibus rerum, & mensura est perfectior ipso mensurato, quæ dicitur esse notior naturaliter ipso mensurato: Sicut albedo ponitur prima mensura in genere colorum, & Deus dicitur prima mensura omnium, quæ sunt in quocumque genere. *Alio modo* mensuratur per quantitatem excessam, quia quantitas nota minor est, & pars quantitatis majoris, quæ magis ignota est, & tunc illa quantitas minor per suam replicationem mensurat ipsum totum quantum majus, & hoc modo minor motus potest esse mensura majoris motus ex natura rei. *Tertio modo* mensuratur quantitas ignota per aliam quantitatem notam, & distinctam, & æqualem sibi, & hoc fit per applicationem, sive superpositionem. Et quia illud, quod est mensura ex natura rei, debet esse notius naturaliter ipso mensurato; ideo istò modò scilicet tertio, unum equalium non est mensura aliorum, nisi illa æqualitas nota fuerit ex naturà rei, hoc modo tempus, si est alia quantitas à motu, & notior eo, potest esse mensura motus ex natura rei. Alicui tamen intellectui potest illud esse mensura, quod ex natura rei non est mensura, puta si alicui sit nota quantitas ulnæ, & quantitas panni igno-*

„ta; potest tunc quantitas ulnæ esse
 „mensura quantitatis panni, licet ex
 „natura rei neutra quantitas habeat
 „majorem certitudinem aliâ.

His ita prælatis tria maximè hic
 sunt resolvenda: *Primum*, quòd Angeli
 non aliam habeant mensuram suæ du-
 „rationis, quàm æternitatem. *Se-*
cundum, quòd illa mensura non sit suc-
 cessiva. *Tertium*, quòd sit ab Angeli
 substantia realiter indistincta.

CONCLUSIO PRIMA.

Angelorum existentia mensuratur
 æternitate. Hæc est communis
 apud Theologos.

*Probat*ur primò. Existentia Angeli
 aliquâ mensurâ est mensurabilis: sed
 non mensuratur æternitate, nam hæc est
 mensura propria Dei, neque tempore,
 quia illo res corruptibiles mensuran-
 tur, licet ipsa Angeli existentia ob in-
 tensivam perfectionem, virtutem, &
 magnitudinem durationis suæ possit
 totti temporis coexistere, nulla varietate
 in ejus duratione facta: Sicut est exem-
 plum de palo fixo in fluvio, circa quem
 fluit continuè aqua, ipso palo stabili re-
 manente: Ergo ævo solo mensuratur
 ipsa Angeli existentia, cum sit inter
 ipsam, & illam Angeli existentiam pro-
 portio, quæ inter mensuram, & men-
 suratum requiritur.

Deinde, si non esset tempus, Angelus
 posset cognoscere suam durationem:
 Ergo habet aliquam aliam mensuram
 distinctam à tempore, per quam possit
 cognoscere eam: Illa verò non potest
 esse æternitas, cum sit altioris ordinis;
 ergo est ævum, quia nihil aliud assi-
 gnari potest, quòd rationem mensuræ
 existentie angelicæ habeat. *Denique*
 æternitas secundum Doctorem, est
 mensura entis creati permanentis,
 & uniformiter se habentis dum subsi-
 stit, seu quod habet uniformem mo-
 dum existendi: Vel juxta S. Thomam,
 est mensura entis incommutabilis se-
 cundum suam substantiam; mutabilis

verò, & variabilis secundum suas ope-
 rationes: Sed Angeli substantia est in-
 commutabilis secundum se, & unifor-
 miter se habet dum subsistit: Ergo An-
 gelus reverà mensuratur ævo. Quæ
 hanc adversus conclusionem possent
 objici, facilius solventur in sequenti
 conclusione.

CONCLUSIO SECUNDA.

Æternitas non est duratio succes-
 siva. Hæc est Doctoris in 2. disp. 2.
quæst. 1. ubi licet opinionem S. Bona-
 venturæ de successionem durationis an-
 gelicæ probabilem esse dixerit, solve-
 ritque omnia argumenta, quæ contra
 Seraphici Doctoris sententiam ab aliis
 fuerant proposita; nihilominus eandem
 sententiam ipse impugnat hoc modo
numero 18. Illa duratio angelica, quæ
 secundum sanctum Bonaventuram di-
 citur quantitas habens suam divisibili-
 tatem, non permanentem, sed succes-
 sivam, ita quòd uni ejus *nunc* raptim,
 fluenti succedat aliud; illa, inquam, du-
 ratio, seu quantitas, aut est identificata
 existentie Angeli, aut nō est identificata
 ipsi: Primum dici nequit, quia impossi-
 bile est esse successionem in duratione
 sine successionem in existentia; in existen-
 tia autem Angeli non est successio, sicut
 nec in essentia cui identificatur exi-
 stentia. Ergo, &c. Secundum pariter
 non potest affirmari, quia sicut ipsa exi-
 stentia absoluta Angeli potest poni in
 esse variis productionibus, aut eadem
 productione continuata, ita potest du-
 ratio absoluta, quam habet per primam
 productionem poni in esse per secun-
 dam productionem, aut eandem conti-
 nuatam: Ergo quando conservatur An-
 gelus pro secundo instanti, non est ne-
 cesse dari ipsi novam durationem di-
 stinctam ab illa, quam habuit in primo
 instanti, & consequenter duratio ipsius
 non erit quantitas successiva constans
 ex variis partibus.

Si Dixeris, quòd eadem duratio ab-
 soluta possit poni rursus in esse, sed pro di-

diversis *nunc* . *Contra* . Si potest poni in diversis *nunc* ; ergo potest conservari in illis : Ex quo sic arguo , aut potest conservari in illis per aliam durationem , distinctam , & ita dabitur processus in infinitum , quia eodem modo quæretur de alia duratione : Aut potest conservari in illis absque alia duratione , & ita sicut eadem existentia est in diversis *nunc* , eadem etiam duratio erit in illis , quod est intentum .

Impugnat secundò Doctòr eandem sententiam quatenus assereret illam durationem esse quid successivum , quia inquit , *Non videtur ponendus novus respectus sine novo fundamento , vel terminò , & absque aliqua novitate ex parte extremorum : Ergo si Angeli existentia sit eadem , & eodem modo Deus se habeat in secundo instanti , ac in primo , non videtur admittendus novus respectus* .

Probatur insuper conclusio auctoritate sanctorum Patrum , primò quidem S: Augustini lib. 83. qq. 9. 72. ubi dicit , quòd tantum id stat inter ævum , & tempus , *Quòd ævum est stabile , tempus autem mutabile* . Item S: Dionysius , de divinis nominibus cap. 10. ait , *Proprietatem ævi esse totum simul , secundum totum metiri* ; Non ergo secundum partem , & partem , & successivè . Et cap. 5. dicit *Ævum esse quietam , & totam simul vitam* . Item Gregorius in moralibus , dicit de gaudio Beatorum , *Nihil præteritis , nihil advenisse , nihilque futurum esse* : Ergo est totum simul .

Probatur iterum ratione fundamentali . Ideo ævi ternitas foret successiva , quia nempe constaret pluribus *nunc* , sive instantibus sibi invicem succedentibus ; sed id non videtur esse verum : Ergo , &c. Major est S. Bonaventuræ . Minor probatur , Illud primum *nunc* , seu instans ævi , aut idem est cum existentia Angeli , aut aliud : Si idem , igitur sicut existentia Angeli manet semper eadem ex S. Bonaventura , ita & nunc idem permanet . Si verò dicas , est aliud .

Contra : sicut ipsa existentia ex sancto Bonaventura potest infinitis poni in esse , ita & illud *nunc* aliud ab essentia , & existentia Angeli potest frequenter poni in esse , & ita potest conservari idem *nunc* ævi , sicut & eadem existentia : Ergo non est necessaria pluralitas ipsorum *nunc* ; sed unum sufficit . Si verò dicas , quòd si frequenter ponitur in esse , ponetur in diversis *nunc* .

Respondet , quòd vel dandus erit processus in infinitum , vel dicendum idem *nunc* posse conservari sine novo *nunc* . Probatur , quia illud primum *nunc* , vel potest conservari sine alio , vel non . Si primum , habeo intentum ; Si secundum , quæro de illo alio *nunc* , an possit conservari sine alio ? & sic vel deveniendum erit ad aliquod *nunc* , quod possit sine alio conservari , vel dabitur processus in infinitum . *Insuper* , quamvis hoc ultimum detur , tamen non erit necesse in ipso *nunc* esse successionem ; nam sicut ponitur essentia Angeli eadem , & invariabilis , etsi in alio , & alio *nunc* ponatur : Ita idem *nunc* potest permanere invariabile in se , quamvis in alio , & alio *nunc* ponatur in esse .

Confirmatur , quia conservatio Angelis , vel accipitur pro conservatione activa , vel passiva : Si primum , est tota simul nullam habens successionem , est enim actio divina cui permanentia secundum se considerata non repugnat sicut , nec terminò ejus , scilicet Angelo . Unde poterit Deus per huiusmodi actionem conservare Angelum , præsertim cum talis conservationis modus sit rebus ipsis indivisibilibus magis connaturalis , & consequenter magis debitus . Præterea , quia actio conservativa rei incorruptibilis ex natura sua est incorruptibilis , quia nullum habet suæ desitionis principium intrinsecum : Ergo , &c. Si secundum , est ipsum esse angelicum invariabile : Ergo nullam habet successionem , & per consequens non bene asserit opposita sententia .

ævum

ævum ex parte conservationis Angeli includere successionem.

Obijcit primò Doctor varias Sancto- rum Patrum auctoritates, quæ sententiæ Seraphici Doctoris videntur suffragari: In primis verò S. Augustinum l. 1. Confessionum c. 4. Nunc temporis si semper flaret, & non flueret, non esset tempus, sed æternitas: Ergo si nunc ævi non flueret, etiam deberet æternitas reputari: Sed consequens est absurdum: Ergo etiam id unde sequitur. Item lib. 4. super Genesim cap. 14. exponens illa verba, Pater meus usque modò operatur; subdit usque modò consummationem operis significat, aliter enim posset intelligi si diceretur, nunc operatur, ubi non est necesse ut operis consummationem acciperemus, aliter autem cogit intelligi cum ait, usque nunc ex illo quò cuncta operatus est. Quibus significat S. Augustinus aliquam esse continuationem in actionibus Dei ad extra, per quam conservat Creaturas à se productas, subindeque continuationem in duratione Creaturarum: sed continuatio successionem importat: Ergo quælibet creaturarum, adeòque Angelorum conservatorum duratio successiva est,

Subscribit Boetius lib. 1. de Trinitate cap. 9. Quamvis, inquit, secundum Philosophos de corporibus cælestibus, & spiritibus possit dici, quòd sunt semper, magna tamen est differentia in semper esse, in Deo enim tantum præsens est, non currens; nunc autem fluens facit sempiternitatem, id est ævum: Ergo Ævinitas est duratio fluens. Facet etiam S. Damascenus lib. 1. de fide cap. 25. Seculum, inquit, dicitur quòd semper protenditur cum æternis, velut spatium; Sed Angeli durant per sæcula; Ergo eorum duratio protenditur velut spatium, & consequenter includit partes sibi invicem succedentes, Consentit etiam S. Anselm. in Profologio c. 24. Hæc quoque modò transis omnia, etiam æterna, inquit Deum alloquens, quia

tua, & illorum Æternitas tota tibi præsens est, cum illa nondum habeat de sua Æternitate, quòd venturum est, sicut jam non habet, quòd præteritum est; Ergo censet durationem Angelorum, non existere quantum ad illam partem quæ præterit, neque quoad illam, quæ futura est, adeòque putat Angelorum durationem includere partes sibi invicem succedentes. Denique sanctus Hieronymus Epistolà ad Marcellam, ait, Tantum Deus est, qui non novit fuisse, vel futurum esse: Ergo creatura in suo esse, habet præteritum & futurum, & consequenter successionem.

Respondet Doctor numero 24. His omnibus auctoritatibus solum suaderi, quòd nulla creatura est à prima Causa independens, sed semper dependens; non tamen dependentià continuà alià, & alià, sed eadem propter, quam creatura quælibet habere potest esse cum una parte temporis, & non cum alià, sicque potest quasi cadere sub tempore, hoc est coexistere unì parti tēporis, & non alteri; quia ratione dicitur fuisse, non verò fore, & ita non habere esse, Æternum,

Respondeo secundò majoris elucidationis gratià ad eas omnes auctoritates sigillatim, & quidem Ad primam S. Augustini, Dico eum solum intendere, quòd si duratio temporanea ex se semper necessariò subsisteret, nec ullatenus etiam ab extrinseco posset deficere; reverà foret æternitas, quòd, ut apparet, omnino est impossibile: Non autem vult, quòd si illa duratio subsisteret absque ullo fluxu, & cum ordinaria Dei conservatione, deberet esse æternitas; exinde enim non sequeretur eam non posse ullatenus deficere sicut ipsa Æternitas omnino est indefectibilis, Unde distinguo consequens: Si Ævinitas non flueret, hoc est, si esset omnino indefectibilis, foret Æternitas concedo; nec enim sic illam volumus esse non fluentem: Si non

fluere, quatenus non haberet partes succedentes, foret Æternitas, nego consequentiam.

Ad secundam ex S. Augustino sententiam, nego ex ea illatum subsumptum: Eo enim ipso, quod eadem ipsa actio, qua res producta fuit, semper continuatur, etiam continuatur ipsa res conservata absque aliqua successione in seipsa, aut in ipsius duratione.

Ad auctoritatem Boetii Respondeo ipsum velle, quod sempiternitas Dei sit semper præsens ita necessario, ut omnino sit indefectibilis, etiam respectu cuiuscumque; Sempiternitas verò, quam haberet Angelus si ab æterno fuisset creatus, non semper præsens necessario extitisset, quippe cum potuisset deficere Deo volente: Unde illa sententia eo modo, quo prior S. Augustini est distinguenda.

Ad S. Damascenum dico ultimam ex ejus auctoritate consequentiam illatam esse negandam: Protenso namque per spatium, dici potest non quod habeat partes sibi invicem succedentes; sed quòd ipsamet existentia eadem, semper indivisibilis conservetur.

Ad S. Anselm. dico tantum velle, quòd cum Angeli non semper necessario extiterint, nec extituri sint, quippe cum Deo volente deficere possint; idcirco ratione illius possibilis defectio- nis reverà dici possunt non habere, quod futurum est, neque quod præteritum est: Quemadmodum Deus id habet necessario, quia summè necessario semper fuit, est & erit. Hinc neganda est consequentia: Tota namque illa Angeli duratio pro tempore præterito, & futuro modò existit, licet non necessario extiterit pro præterito, nec absolute loquendo ita pro futuro sit extitura.

Denique ad sanctum Hieronymum nego consequentiam ex ejus auctoritate illatam: Angelus namque etsi habeat durationem permanentem, cognosce-

re potest præteritum, & futurum, quippe novit se non necessario extitisse, nec extitutum, quandoquidem possint annihilari, Deo ita statuerente.

Objicit secundò aliam sancti Augustini auctoritatem ex lib. 8. de Genesi ad litteram cap. 19. ubi ait, *Sicut aer respectu Solis non est factus lucidus, sed fit lucidus, alioquin absente Sole remaneret aer lucidus: Ita se habet creatura respectu Dei.* Ex quibus sic pro opinione S. Bonaventuræ arguit Doctor subtilis sup. laud. qu. 1. num. 4. Creatura continuò producitur à Deo conservando, & conservatur producendo, & non tantum dependet à Deo, quatenus actio productiva ipsius exit à Deo pro primo instanti quo habet esse, sed etiam quatenus pro quolibet instanti quo conservatur in esse, actio illa divina quâ conservatur continuò exit à Deo; At non est illa ipsamet actio quâ producebatur à Deo pro primo instanti, quæ à Deo exit pro aliis instantibus in quibus conservatur: Sed alia omnino actio distincta succedens priori: Ergo duratio Angeli non est tota simul, sed successiva. Patet Consequentia, quia actio illa conservativa est de ratione, durationis Angeli, vel tamquam ratio formalis, aut pars intrinseca; vel tamquam conditio sine qua non: Ergo si conservatio illa sit successiva, etiam ipsa Angeli duratio successiva erit, aut saltem pendebit ab aliquo successivo. Probat minorem Doctor, actio conservativa est vera actio positiva: Sed non est eadem quâ Deus in primo instanti Angelum produxit: Ergo est alia ipsi priori succedens. Major patet, quia inquit Doctor, conservare, non est tantum non destruere, sed est aliqua actio Dei positiva, alioquin diceretur conservare lumen, qui non claudit fenestram, quod aperte falsum est, posset enim etiam eo absente lumen in aula conservari.

Insuper, si conservatio non esset actio po-

positiva, sequeretur, quod annihilatio ipsi opposita, esset actio positiva, quia non datur negatio negationis: Sed falsum est, quod annihilatio sit actio positiva, quia annihilare est non agere; igitur conservare est agere. *Denique* nulla creatura est in suo esse independens, quia non est actus purus; igitur continuè dependet à causa, non tantum ratione primariæ suæ productionis, quā accepit esse ab ea causa, quasi illud esse continuè ab illa non acciperet, quia sequeretur, quod conservare nihil aliud esset, quàm prius egiſſe, & modò non destruere: Ergo necessum est, quod actio conservativa sit positiva. Probatur itaque minor, nempe, quod actio illa positivè conservans, distincta sit ab actione primò productiva; quia per actionem illam productivam qua res accepit esse in primo instanti, non potest dici formaliter, & ultimariè abſque ullo superaddito conservari in illo esse pro aliis instantibus sequentibus: posset enim esse illa actio primò productiva abſque eo, quod res conservaretur pro alio instanti sequenti; siquidem in illo instanti sequenti posset annihilari: Ergo, ut existat pro alio instanti sequenti debet esse alia, actio ipsius conservativa à priori distincta.

Si dixeris quòd equidem ab illa actione sola non habeat res per illam, producta quòd existat pro alio posteriori instanti, sed ulterius requiri, quòd sit illud posterius instans quo posito, & sine ulla actione nova, aut aliquo modo superaddito res illa ipsi posteriori instanti coexistit. *Contra* sic urget Doctor: Si Angelus productus in primo instanti haberet ex se, & sine aliquo superaddito posse coexistere temporis sequenti, posita solùm existentia futuri temporis, sequeretur quòd ipsius duratio ab Æternitate non discreparet; Æternitas enim non potest coexistere futuro tempori nisi futurum tempus

existat, ubi autem non amplius existet, nec Æternitas ipsi coexistet. *Adde*, quòd non obstante productione Angeli pro primo instanti posset non habere coexistentiam cum instanti futuro, etiam existente ipſo futuro tempore; quia posset pro illo instanti non conservari: Ergo ab actione qua accipit esse, pro primo instanti non habet esse pro instanti futuro, etiam existente tali futuro instanti. Itaque.

Respondeo Doctor numero 20. Negando minorem, & concedendo consequentiam utriusque probationis, ex quibus non sequitur quòd conservatio sit actio distincta à prima productione quantum ad positivum utriusque; quāvis prima productio, quatenus dicit respectum ad non esse immediatè præcedens rei productionem, sit distincta ab actione conservante, quatenus non dicit talem respectum, sed potius respectum ad esse immediatè præcedens: Actio enim productiva præsupponit non esse rei quæ producitur, actio verò conservativa supponit rem, quæ conservatur prius habuisse esse per primam sui productionem. Ut autem faciliùs solvatur ista obſectio cum suis probationibus.

Respondeo ex hypothesi quòd duratio esset modus distinctus ab ipsa re durante, inde quidem sequi, quòd ille modus quò mediante coexisteret res instanti primo, non posset sufficere ut existat instanti secundo; nec posset consequenter facere Angelum existentem pro instanti secundo, nisi ipsamet existeret pro instanti secundo: Ergo ut existeret res pro instanti secundo, deberet esse alius modus distinctus quo mediante sic existeret. De suppositione verò quò duratio Angeli, & actio quā producitur, non superaddat aliquid supra entitatem, & existentiam ipsius præter volitionem Dei, quā vult ipsum producere tanto tempore, aut tanto, argumentum nihil concludit; quia falsum

sum est quòd actio illa Dei quà producitur pro primo instanti, de facto possit conservari, quin conservaretur Angelus, in sensu nempe composito, & ex hypothesi, quòd actio Angeli conservativa semper subsisteret. Unde licet dari possit aliqua actio productiva, quæ ex se, & sine aliquo alio superaddito non sufficeret ad conservationem rei, putà si Deus vellent producere Angelum cum ea intentione, ut per unicum tantum instans Angelus ille subsisteret: tamen cum actio quà de facto creat Angelum sit illa volitio quà vult ipsum, producere pro Æternitate à parte post, cùmque illa volitio non possit esse, quin Angelus necessariò sic existat pro Æternitate, hinc præfatum argumentum nullam difficultatem infert.

Obijciat tertio: Si duratio Angeli, qua debet existere v.g. pro anno, non sit quid successivum, sed indivisibile, simplex, & immutabile; sequitur, quòd post medium annum Deus non posset efficere quin ille Angelus subsisteret pro alia anni medietate sequenti; Sicut non potest efficere quin extiterit pro precedenti medietate ejusdem anni: Sed consequens est absurdum; falsum enim est, quòd Deus pro quolibet tempore non possit creaturam à se producitam destruere: Ergo, &c. Probat sequelam majoris Doctor num. 6. In eo qui habet totum esse simul, idem est fuisse, esse, & futurum esse: Sed quod fuit, impossibile est, quòd non fuerit: Ergo si in Æterno idem est fuisse, & fore, etiam impossibile est, quòd non sit futurum. At hoc proprium est solius Dei cujus Æternitas fuisse, esse, & fore necessariò, ac indivisibiliter complectitur. Deinde Deus non potest ab æterno velle contradictoria, ut contradictoria: Sed potest velle Angelum creare, & annihilare, & consequenter potest velle ipsum esse, & non velle ipsum esse: Ergo esse Angeli, & non esse ipsius non videtur contradictoria:

Tom. IV.

Sed reverà tamen essent contradictoria, nisi assignarentur diversa *nunc*, seu diversa instantia durationis in quorum uno vellet creare, & existere Angelum, & in altero vellet ipsum annihilare, seu non vellet creare, & ipsum esse: At ipsa diversa *nunc* non debent esse instantia temporis, quia posset Deus velle creare, & annihilare Angelum quamvis nullum daretur tempus: Ergo debent esse diversa instantia Æternitatis, seu durationis Angeli sibi invicem succedentia, & consequenter duratio Angeli erit successiva.

Resp. 1. Distinguo minorem; Absurdum est, quòd Deus non possit annihilare Angelum pro quolibet instanti in sensu diviso, & ex hypothesi, quòd non decreverit ipsum conservare pro illo instanti, concedo: In sensu composito, & ex hypothesi, quòd statuerit ipsum pro illo instanti conservare nego.

Respondeo secundò distinguendo sequelam majoris: Si duratio Angeli sit quid indivisibile se tenens ex parte ipsius Angeli, necessariò debet facere Angelum durantem pro toto anno, concedo: Si illud indivisibile non se teneat ex parte ipsius Angeli, sed Dei, nego. Falsum autem est, quòd illa duratio sit quid indivisibile se tenens ex parte Angeli præcisè, est enim ipsa volitio Dei quà vult ipsum existere pro anno, aut pro Æternitate, quæ volitio est una, & indivisibilis; inde nullatenus est inconveniens, quòd si Deus velit Angelum producere, & conservare pro anno, aut Æternitate, Angelus etiam debeat conservari tanto tempore in sensu composito, & quòd Deus non possit ipsi non dare esse futurum, sicut non potest ipsi non dedisse esse præteritum.

Ad primam probationem sequelæ, distinguo minorem: Repugnat durationi creatæ, quòd simul habeat esse, fuisse, & fore quatenus duratio est rei creatæ, se tenens ex parte ipsius creaturæ, concedo minorem: Se tenens ex parte Dei

B b

cra-

creaturam conservantis per volitionem suam indivisibilem, & simplicem, nego.

Ad secundam probationem nego minorem; qua ratione enim non esset contradictorium, quod Deus vellet creare, & annihilare Angelum si duratio ipsius esset successiva, ita pariter non foret contradictorium si duratio ejus sit quid permanens, & indivisibile: Ad salvandam enim illam contradictionem nihil juvat, quod illa duratio sit divisibilis potius, quam indivisibilis. Qualiter autem illæ duæ volitiones oppositæ respectu Angeli conservati, & annihilandi non possent esse contradictoriæ, colligitur ex eo, quod Deus potest velle Angelum esse taliter, ut si esset tale, aut tale tempus existens, vi istius volitionis non possit Angelus durare nisi tanto, vel tanto tempore finito; & exinde haberet volitionem quæ vellet ipsum ulterius conservare, ratione cujus volitionis fieret, quod licet ulterius tempus admitteretur, tamen Angelus in ipso non existeret.

Unde distinguo subsumptum, illæ duæ volitiones oppositæ forent contradictoriæ, nisi assignarentur diversa *nunc* sive æternitatis, sive temporis actu existentia, nego: si assignentur diversa illa *nunc* possibilia in quorum uno posset esse creatio, & in altero negatio creationis, concedo. Igitur illa diversa *nunc* non debent esse *nunc* temporis, aut ævi, quæ existant actu, sed possent esse diversa *nunc* temporis possibilia.

Obijcit quartò: Angelus est in æterno duraturus: Ergo habebit durationem in infinitum, adeoque si ipsius duratio non sit successiva, sed tota simul, consequens est, quod ipsius duratio sit infinita actu: Et consequenter, quod aliquid creatum est infinitum actu: Sed absurdum est, quod aliquid creatum sit actu infinitum: Ergo, &c.

Negat sequelam majoris Doctor nu-

mero 23. Ad hoc enim, ut esset aliquid infinitum propter coexistentiam, quam posset habere cum infinito tempore, deberet coexistere omnibus partibus infiniti istius temporis: Sicut enim, illud tempus non esset infinitum nisi quatenus includeret infinitas partes, ita id quod ipsi coexisteret non foret infinitum nisi pariter coexisteret omnibus ejus partibus: Cum autem partes temporis infiniti nusquam possint esse simul actu; Nec etiam coexistentia ipsis partibus poterit esse simul actu. Adeoque licet Angeli duratio sit indivisibilis secundum se, tamen cum sit divisibilis respectu coexistentiæ ad tempus infinitum, si daretur, non sequitur, quod secundum se, & permanenter debeant esse actu infinita, licet habere, possit coexistentiam successivam ad partes temporis infiniti si daretur.

Obijcit denique, Angelus potuit creari non peccator, & postea potuit peccare etiam si nullum fuisset tempus: Ergo in ipsius duratione potest esse, prius, nempe in quo non esset peccator, & posterius, in quo peccator existeret; adeoque ejus duratio est successiva. *Confirmatur* posset Angelus creari, & postmodum annihilari, aliusque postea Angelus creari: In illo autem casu verum non esset, quod illi duo Angeli simul existerent pro eodem *nunc*: Ergo pro diversis *nunc* deberent existere: Sed posset unus alius Angelus coexistere illis duobus Angelis, nempe annihilato, & alteri de novo producto; Ergo in duratione tertii Angeli esset prius, & posterius; prius quidem, ratione cujus diceretur coexistisse Angelo annihilato: Posterius vero per quod coexisteret Angelo de novo producto.

Negat consequentiam Doctor: Tum argumenti, tum confirmationis *nu. 24*. Quamvis enim unus Angelus alium subsequatur, & de non peccante fiat peccans, inde non sequitur, quod sit successio in ipsius duratione, sed tantum

tum esset successio inter durationem , & ipsius annihilationem, necnon inter innocentiam, & ipsius injustitiam : ita quod quamvis ipsius duratio coexistat innocentie, & injustitie sibi invicem succedentibus, non inde sequitur, quod sit aliqua successio in ipsius duratione ; indivisibilis enim duratio, quæ prius coexistit innocentie, potest coexistere ipsius injustitie . Eodem modo tertius Angelus posset coexistere Angelo prius producto, & Angelo posterius producto sine successione ulla in duratione, sua intrinseca; sicut ipsa æternitas, quæ est indivisibilis, & sine ulla successione formali secundum omnes, coexistit diei hesternæ, & hodiernæ .

CONCLUSIO TERTIA .

Duratio angelica non distinguitur realiter ab Angelo, ita subtilis Doctor in secundum dist. 2. quæst. 2. n. 3. Ubi hanc conclusionem sic probat. Hoc ipso quo res aliqua producitur, & conservatur, vel quod terminat actionem productivam, & conservativam, durat vel in instanti, vel in tempore : Ergo nihil aliud requiritur, ut duret : Immo quia si esset duratio aliquid distinctum à re durante, & actione ejus productiva, ac conservativa, esset aliquid absolutum, vel respectivum : sed neutrum dici potest : Ergo non est distinctum aliquid ab illis . Minor patet : Non enim est respectivum, quia respectus realis debet habere terminum, realem : Potest autem res durare absque eo, quod sit aliquid reale ad quod diceret respectum, puta si Deus unicum Angelum produceret : Non etiam absolutum, quia esset posterius re durante, & consequenter res durans produci posset absque illo, quod est absurdum, quia sic duraret, & non duraret : Duraret quidem, quia produceretur : Non duraret autem, quia non haberet durationem, quæ esset aliud absolutum, posterius non productum .

Probatur 2. Quotiescumque aliqua

distinguantur realiter, & eorum aliquod est natura prius altero; etiam eorum unum potest existere sine altero : Ergo si æternitas distinguitur realiter à substantia Angeli, cum sit ipsa substantia posterior, sequitur, quod Angelus potest esse, & manere sine sua æternitate, & sic sine duratione sua durabit, quod implicat. *Insuper* si ævum est distinctum realiter ab esse Angeli, vel Angelus seipso durat, vel alio à se distincto : Si seipso : Ergo pari ratione ipsa existentia poterit seipsa durare, formaliter, quia istud aliud non erit perfectius ipsa actuali existentia ejus, cum sit quasi passio ejus : Si autem aliud à se absolutum durat in esse, erit processus in infinitum in mensuratis, & mensuris. Amplius, pluralitas non est ponenda sine necessitate, ex primo Physicorum : Sed nulla necessitas est, quod ævum, pro duratione æterni sumptum, sit aliud ab æviterno : Ergo non est aliud. Denique, si ævum realiter, & essentialiter distinguitur ab Angelo, vel æviterno cujus est duratio, sequitur quod sit aliquod accidens ejus : sed videtur impossibile, quod per accidens duret ipsa substantia, magis enim videtur accidens durare per substantiam, quam è converso : Ergo, &c.

Dices primò; Tempus realiter distinguitur à motu, quem mensurat : Ergo pariter admitti debet necessariò aliquid distinctum realiter ab essentia Angeli, quod sit illius mensura .

Negat consequentiam Doctor : quia inquit numero 8. ejusdem quæstionis, „ licet tempus differat à motu, & per „ consequens instans à mutatione, „ non videtur idem dicendum de duratione Angeli : Nam, inquit, si tempus differt à motu, hoc ideo est, quia „ partes ejusdem proportionis alicujus non necessario sunt æquales in „ numero, & quantitate partium ejusdem proportionis temporis : nulla „ autem quantitas est eadem alteri

quantitati, nisi partes ejusdem portionis, & quantitatis in ea sint æquales partibus ejusdem proportionis, & quantitatis in reliqua, & hoc æquales tam in numero, quam in magnitudine: loquendo autem de quantitate, quæ est in motu, quam habet ex parte magnitudinis, sive formæ secundum quam est motus, possunt aliquæ partes motus, putà decem partes integrantes totum motum, esse cum decem partibus temporis; sed non sunt eadem eis, quia, cum eisdem partibus temporis possunt esse plures partes motus æquales prioribus partibus motus, vel tot inæquales, quia dupla virtus movet idem mobile, & per consequens in duplo velocius, nulla pars erit in motu tardiori, quæ non erit in motu velociori, loquendo de partibus, quas habet in magnitudine, vel de partibus, quas habet secundum formam quæ est: Quia movens mobile motu velociori non facit simul pertransire aliquas partes magnitudinis, sed præcisè alteram post alteram: Ergo tot partes sunt in motu velociori, & tantæ, loquendo de ista quantitate; quot, & quantæ sunt in motu tardiori; non potest autem idem tempus, & habens eandem partes cum isto motu, & cum illo motu: Ergo illæ partes temporis non erunt eadem, nec partibus istius motus, nec illius, quia non in eadem proportionem se habent ad totum, nec sunt æquales istis partibus totius, ita Doctor. Non est autem eadem ratio de æternitate, & Angelo, quippe tam Angeli substantia, quam ejus duratio sunt omnino indivisibiles: Adeoque una non potest alteram excedere.

Dices secundo, quantitas permanens est accidens distinctum à subjecto: Ergo, & successiva, quia utraque est ejusdem generis, seu prædicamenti: Et

consequenter utraq; debet esse distincta à subjecto, maximè si subjectum sit substantia: Sed quod mensurat existentiam Angeli est quantitas successiva: Ergo mensura Angeli distinguitur realiter ab ipso.

Respondet Doctor numero 11. Quod non est aliquid in actuali existentia Angeli, quod sit propriè quantitas, nec indivisibile de genere quantitatis; quia existentia videtur posse nosci absque omni alio addito. Unde negatur suppositum subsumpti, nempe quod detur in Angelo aliquid, quod mensuret existentiam ejus: quod si etiam daretur aliquid tale, certè non esset quantitas, quia non esset aliquid realiter ab ipso distinctum.

Dices tertio; Si res durare posset à se ipsa sine alio addito posset etiam esse in loco à se ipsa sine novo ubi superaddito, contra nostram sententiam.

Respondet negando paritatem; Quia res non habet necessariò esse in loco ex eo, quod producat; posset enim independentem habere; habet autem durare hoc ipso quod producit, & conservatur. Unde ut sit in loco, debet aliquid convenire præter conservationem: Ut verò dureret, non debet aliquid aliud à conservatione advenire.

Instabit Angelus est tam indifferens, ut sit in hoc, vel in illo tempore, ac ut sit in hoc, vel in illo loco: Ergo quemadmodum præter illam indifferentiam ponitur, ubi distinctum, quod determinatur ad hunc locum potiusquàm ad alium; sic ut ponatur in hoc tempore potiusquàm in alio, poni debet aliquid additum, illud autem non est aliud, quàm duratio: Ergo, &c.

Respondet negando subsumptum; Quia duratio non est illud à quo res habet esse hoc, vel illo tempore, sed quo possit tanto, vel tanto tempore existere, comprehendendo sub nomine temporis vel partem ejus divisibilem, vel instans indivisibile.

COROLLARIUM PRIMUM.

EX his colligit Doctor numero 11. Quod non detur in Angelo aliqua forma ipsi intrinseca distincta realiter ab ipsius existentia, per quam mensuraretur. *Probat hoc*; quia non sunt multiplicanda entia sine necessitate: sed nulla est necessitas ponendi huiusmodi mensuram in Angelo: Ergo, &c. Probatur minor, quia si esset necessitas ponendi mensuram distinctam, esset necessitas ponendi durationem distinctam: Sed hoc non est necesse, ut patet ex probatione primæ conclusionis. *Confirmatur*, quia illa ipsa argumenta quibus probatum est non dari in ipso durationem distinctam, probant non dari in ipso mensuram distinctam.

Confirmatur secundò; Quia si poneretur mensura in Angelo, non poneretur in ipso mensura excedens, nec excessiva, cum non possit intelligi quâ ratione esset excedens aut excessiva; ergo deberet poni mensura æqualis ipsi: Sed hoc etiam nequit dici, quia nihil positum in Angelo potest esse notius quantum ad mensurandum, neque ex natura rei, neque per accidens, quàm ipsamet existentia Angeli: Ergo nihil ponitur in ipso quod possit esse mensura istius existentie: Et quamvis aliqua quantitas totalis distincta cognita posset esse mensura ipsius quantum ad aliquas partes ejus, tamen nec sic etiam potest poni ratio mensuræ in Angelo, quia non habet partes quæ mensurari possent per ipsum. *Addit ad hoc doctor* quod non solum non sit necesse ponere aliquid absolutum pro mensura, sed nec relationem aliquam, quia non est necesse hic aliam relationem aliquam ponere, quàm illam quæ est ad causam efficientem, vel conservantem, & illa non est aliud à fundamento.

COROLLARIUM SECUNDUM.

Colligit secundò questione tertia, mensuram externam aliquam esse admittendam in duratione Angelo-

rum, eamque esse vel extra genus, vel in genere. Prior est ipsemet Deus ratione suæ infinitæ durationis secundum quam res creatæ possunt dici ipsi plus vel minus coexistere. Posterior verò est existentia primi angeli, cujus æterna duratio cæterorum dici potest mensura: Hæc enim mensura primi Angeli respectu omnium æternorum est simplicissima, atque magis uniformis regularis, & notior simpliciter in genere æternorum, proinde est mensura omnium existentiarum aliorum Angelorum: Sicut motus primi mobilis, quia est omnium simplicissimus, notissimus atque uniformior, & diuturnior, ponitur mensura omnium motuum, & tempus omnium temporalium. Quemadmodum ergo cujuslibet Angeli existentia suo particulari ævo, tanquam mensura suâ extrinseca mensuratur, & eodem modo ab aliò distinguitur, ita ut tot sint æva, quot sunt æterna: Ita generaliter loquendo unicuique ævum omnium æternorum, videlicet existentia primi Angeli distincta ab existentia cujuslibet æterni, & propterea dicitur mensura extrinseca etiam in ratione durationis.

Probat ex eo quod, ut supra diximus ex Aristotele, in quolibet rerum genere est aliquod primum quod est causa, & mensura reliquorum: Igitur in durationibus rerum spiritualium est recurrendum ad primam durationem magis perfectam, & uniformem, ut metiamur aliarum durationes: Ista autem duratio est in illo primo Angelo cujus natura est simplicior, perfectior, ac magis uniformis, & regularis in sua duratione; & per consequens ejus existentia est aliarum rerum incorruptibilium mensura saltem extrinseca, cum unumquodque æternum suam habeat propriam intrinsecam, ut dictum est. Unde sicut mensura sive tritici, sive vini, & aliorum ejusmodi in aliqua Republica solet publico sigillo muni, ut om-

omnibus innotescat illam esse fidelem, & certam, ad hoc ut ad illam cætera expenduntur mensuræ; ita cum ars imitetur naturam, dicendum est primi, & supremi Angeli substantiam proportionē servata esse uniformem, & perfectam omnium aliorum spirituum mensuram, quæ quidem mensura est eadem realiter cum illius supremi Angeli existentia, cui inest, sed distinguitur realiter ab existentia aliorum quas mensurat, sicut supremus ille Angelus distinguitur realiter ab omnibus aliis Angelis.

Dices primò, Si ævum primi Angeli est mensura omnium æviterorum: Ergo destructo primo Angelo in quo est, etiam tale ævum destrueretur, & per consequens omnia alia æviterna ab eo mensurata mutarentur: At hoc est inconveniens: Ergo, &c.

Respondet quòd hoc dato, non mensurarentur ævò primi Angeli, nec proinde mutarentur secundum suam entitatem absolutam, quia relatio mensuræ ad mensuratum non est realis, sed rationis, quæ nullam importat mutationem; nam primus Angelus se habet ad alia æviterna, sicut mensura excedens, non autem sicut mensura à qua mensuratum dependet.

Dices secundò: mensura debet esse notior re mensurata: Sed ævum primi Angeli non est notius aliis Angelis, nam potius proprium ævum est notius cuilibet Angelo, quàm ævum primi Angeli: Ergo, &c.

Respondet sufficere quòd mensura sit in se notior, etiam si non sit notior ei qui eam utitur, nam quoad nos notiores sunt motus horum inferiorum quàm motus primi mobilis qui est mensura omnium, quia in se est notior, ita autem se habet æviteritas primi Angeli.

Dices tertio; Omnes Angeli simul creati fuerunt, & duratio omnium est æqualiter uniformis: Ergo non est major ratio cur ævum primi Angeli sit mensura æviterorum, quàm æva ho-

rum sint mensura primi Angeli.

Respondet, Quòd ævum primi Angeli est simplicius, uniformius, & invariabilius, & ita est mensura respectu æviterorum: Sicut quamvis alii cæli sint uniformes in suis motibus, nihilominus non dicuntur mensura primi mobilis, sed potius ab illo mensurari, quia superius est.

His tamen non obstantibus non dubitarem asserere reverà nullum Angelum posse dici alterius durationis mensuram ratione majoris simplicitatis; non enim apparet qualiter unus Angelus quoad essentiam, posset dici simplicior alio Angelo, quandoquidem omnes sint indivisibiles quoad partes integrales, & physicas, & nullus ex ipsis sit expertus compositionis Metaphysicæ, nec compositionis ex essentia, & existentia, nec compositionis ex natura, & personalitate. Nisi diceretur simplicior fortè quòd posset plura simul per pauciores actus percipere, & in hoc sensu quamvis possit Angelus perfectior dici simplicior, tamen ex huiusmodi simplicitate non sequitur quòd possit mensurare existentiam alterius quantum ad durationem ejus, de qua mensuratione loquimur.

Quæres quānam mensurā operationes angelicæ mensurentur?

RESPONDET DOCTOR *quæst. quarta*, Operationes immanentes, nempe intellectionem, & volitionem Angeli, mensurari æviteritate sicut, & eorum substantiam quòd sic probat: Quæ eodem modo existunt, quandiu existunt, habent mensuram ejusdem rationis, quamvis unum ex illis diutius existat quàm alterum: Sed Angelus, & operatio ejus habent eundem modum existendi dum existunt absque ulla differentia, nisi quòd Angelus diutius habeat durare quàm operatio ulla ipsius: Ergo Angelus, & ejus operatio habent me-

mensuram ejusdem rationis: Sed Angelus habet ævum pro mensura: Ergo, & operatio ejus. Probatur major, quia eo ipso quo habet similem modum existendi, quicquid potest mensurare unum, potest, & alterum, & si non posset, certè ex hoc ipso sequeretur quòd non haberent similem modum existendi. *Confirmatur*, quia ex hoc sequitur quòd omnes Angeli quamvis sint alii aliis perfectiores, habent tamen mensuram ejusdem rationis, quia videlicet habent omnes uniformem modum existendi.

Confirmat secundò, Quia quod unum altero diutius existat, non impedit quin utrumque ævo mensuretur, alioquin sequeretur proportionem servata quòd quia sonus non tandiù durat quandiù motus celi, non deberet mensurari tempore, sicut mensuratur motus celi, sed aliquà alia mensura diversæ rationis, quod est absurdum.

Repones disparitatem esse; Nam Angelorum existentia semper erit; At eorum cognitio, & aliæ operationes immanentes possunt deficere.

Contra, Quia per accidens est ad durationem mensuræ quòd unum diutius quàm aliud permaneat, nam si Angelus solùm per horam duraret, adhuc ævo mensuraretur; non enim perpetuitas, vel destructio aut annihilatio variant mensuram formaliter: Ergo similiter, & ejus cognitio ac aliæ operationes immanentes cum suâ naturâ, dum manent, habeant esse totum simul, & uniformiter permanentes, sufficit ut habeant eandem mensuram quam habet ipsa Angeli existentia.

Confirmatur hæc ratio, quia non alia de causa res successivæ mensurantur tempore, nisi quia habent modum manendi permanentem; nam ut supra dictum est, mensura debet proportionari mensurato, & diversitas mensuræ attenditur penes diversum modum manendi mensurati; Sed tales Angelorum

operationes interiores, & immanentes non sunt successivæ, sed indefectibiles, & permanentes sicut ipsamet Angelorum existentia: Ergo eamets mensurari debent.

Probat secundò Doctör. Visio beatifica mensuratur Ævo; ergo, & operatio immanens Angeli. Probatur consequentia, quia visio beatifica procedit ab intellectu tamquam à causa partiali: Ergo intellectus habet productionem terminatam ad ipsam: Sed illa productio debet mensurari tali mensura quali mensuratur ipsamet visio: Neque enim visio potest esse æviterna, & productio continua ipsius à qua dependet necessariò, & per se, alterius mensuræ: Ergo illa productio est æviterna; hoc est mensurata ævo: Sed si illa productio mensuratur ævo, similiter mensurari debet ævo omnis alia operatio Angeli producta, & conservata indivisibiliter.

Reponunt Thomistæ, illas operationes non mensurari quidem æternitate quæ est Dei mensura, sed æternitate participata, quam dicunt esse inferiorem æternitate divinâ, ac differre ab illa sicut perfectiùs à minus perfecto; æternitas enim divina est mensura divini esse, æternitas verò participata est mensura esse ordinis divini, & supernaturalis, cujusmodi sunt gratia habituales, virtutes à Deo infusæ, & visio beata.

Contra; Quidquid mensuratur propriè æternitate, ex sua natura indefectibile est ut Deus: Ergo quod æternitate participata mensuratur, est indefectibile per participationem: Sed nullum datur ens ita indefectibile, quia omne ens creatum absolute loquendo defectibile est: Ergo nihil æternitate participata mensuratur.

Si dixeris gloriam hóc modò esse indefectibilem. *Reponam* potiori ratione, quòd cum Angelus sit substantia vivens, ac proinde secundum hanc considerationem nobilior sit in entitate ipsâ

ipsa gloriâ quæ est accidens, etiam deberet ita mensurari; nam quod sit ens naturale aut supernaturale, parum ad præsentem difficultatem interest. Hoc tamen nullus admittit.

Dices primò, per hoc distinguitur duratio, & mensura Dei à duratione, & mensura Angeli, quòd duratio Dei sit ex natura sua independens ac indefectibilis; duratio verò Angeli sit defectibilis ac dependens ex natura sua, ita ut possit nullomodo esse, & postquam est, deficere: Sed operatio angelica habet aliquam defectibilitatem ex natura sua quam non habet Angelus, quia Angelus petit connaturaliter postquam semel productus est, numquam deficere, quod non petitur ab operatione ipsius quæ connaturaliter potest deficere: Ergo operatio Angeli habet mensuram distinctæ rationis à mensura Angeli. Patet consequentia; non enim est potior ratio cur defectibilitas Angeli, & indefectibilitas Dei distinctas mensuras exigant, quam defectibilitas talis operationis angelicæ, & indefectibilitas ipsius substantiæ angelicæ, saltem ab intrinseco, & ratione sui: Nec videtur esse potior ratio cur diversus ille modus existendi quem habet Deus, & Angelus quatenus Angelus existit defectibiliter, & Deus indefectibiliter, exigat diversam mensuram, quam diversus ille modus existendi quem habet Angelus, & ejus operatio, quatenus hæc est defectibilis connaturaliter, ille verò non ita; ergo non habent eundem modum existendi, nec consequenter eandem mensuram.

Respondet, quòd etsi Angeli substantia, & ejus operatio diversam haberent durationem, & mensuram, nihilominus possent invicem convenire in ratione Ævi ut sic, quatenus nempe Ævum distinguitur ab Æternitate, & tempore; Ævum enim sic acceptum, nihil aliud est quam duratio rei defectibilis ex se vel per aliud, & habentis to-

tum suum esse simul sine ulla partium successionem, talem autem durationem habet angelica substantia, & ejus operatio, adeoque in ratione ævi convenirent, quamvis in ratione specifica talis aut talis ævi invicem discreparent.

Dices secundò, si Angeli substantia, & operatio mensurarentur ævo, sequeretur etiam, quòd omnia entia permanentia pariter ævo mensurarentur: Sed hoc videtur absurdum: Ergo, &c. Major constat; nihil enim est permanens cujus existentia non permaneat eadem dum manet, & hoc absque successionem propriè dicta, quæ sit acquisitio, vel perditio partis post partem. Probatur minor *primò*, quia secundum Philosophum 4. *Physicorum* textu 118. Quies mensuratur tempore; igitur illa circa quæ natus est esse motus, quando non sunt amplius in motu, mensurantur tempore, sicut, ac si essent in motu. *Secundò*, quia omnium generabilium, & corruptibilium generationes, & corruptiones mensurantur in instanti temporis, cujus autem primum esse mensuratur nunc temporis, ejus esse habitum mensuratur tempore: Ergo omnium istorum esse habitum post generationem mensuratur tempore.

Concedit majorem Doctor *eadem questione*, & numero 9. Nempe, quòd ævo mensuretur *Quæcumque existentia actualis invariabilis*, hoc est, inquit, *enim repugnat ut secundum ipsam sit variatio sive fluxus vel acquisitio partis post partem; nec enim perpetuitas aliquorum, vel corruptio, vel annihilatio aliquorum variat mensuram formaliter, dummodo existentia sit ejusdem rationis dum manet*. Ad minorem autem ut respondeat, advertit plura posse considerari circa permanentiam, nam *primò* potest considerari fluxus formæ permanentis divisibilis, quæ acquiritur successivè, qui fluxus est ipsamet successiva acquisitio formæ, vel successio partium formæ. *Secundò* considerari potest ipsamet forma se-

secundum; quam natus est fluxus ille, seu, qui acquiritur actu successivè, ut forma v.g. caloris, aut frigoris producta successivè. *Tertiò* forma manens secundum quam potest esse motus, quamvis de facto non sit, ut calor v. g. postquam est productus. *Quartò* forma permanens circa quam non est natus esse fluxus, seu, quæ non est nata produci successivè, ut formæ substantiales producibiles in instanti, v.g. forma animæ, quæ tamen forma habet aliam formam consequentem secundum, quam natus est esse fluxus v. g. formam caloris, aut alterius qualitatis consequentis formam substantialem illam permanentem. *Quintò* denique illud quod est sic permanens, ut nec ad ipsum possit dari fluxus, nec ad aliquam formam antecedentem, aut consequentem ipsam, ut sunt corpora cœlestia.

Ex his hoc ultimum nempe *Quintum* nullò modò mensuratur tempore, nec per se, nec per accidens, tamquam per mensuram propriam intrinsicam. *Primum* verò mensuratur tempore. *Quartum* secundum se non est natum mensurari tempore ratione consequentis formæ, circa quam potest esse motus, & quies. *Tertium*, & *quartum* in seipsa sunt eadem forma, quæ tamen habet unam rationem, ut ad ipsam est motus, & aliam rationem, ut est sub quiete sine motu.

Quem dicendi modum iterum duplicem distinguit Doctor, Primus est, quod semper mensuretur tempore, etiam quando quiescit, & manet secundum omnes suas partes, quia est forma ex se variabilis seu acquisibilis, ac destructibilis successivè: & si hoc teneatur, tum major non debet intelligi de omnibus permanentibus, sed de illis quæ debent produci, & conservari indivisibiliter, nec prima objectio urget etiam si totum concedatur, quod in ea proponitur. Secundus modus dicendi est, quod illa forma quandiu est sub

Tom. IV.

quiete mensuretur ævo, quia tunc habet omnes suas partes indivisibiliter existentes. Ait tamen hunc secundum dicendi modum esse minùs probabilem quàm primum, quia forma producta in tempore pro ultimo instanti istius temporis videtur habere instans illud pro sua mensura, non verò nunc ævi; secundum autem hunc modum dicendi hoc esset falsum.

Unde concludit, quod quamvis quies huiusmodi formarum mensuretur tempore, non tamen necessariò ipsæ formæ sic mensurantur; vel si dicatur juxta priorem modum dicendi, quod mensurentur tempore, tamen dicendum est quod omnes substantiæ generabiles, & corruptibiles indivisibiliter sine successu secundum se mensurentur ævo, quamvis per accidens ratione motus consequentis possint dici mensurari tempore. Ita Doctor.

Dices 1. Inter rem cujus substantia, & actio mensuratur tempore, ut est ignis v. g. & rem cujus substantia, & actio mensuratur æternitate, ut est Deus, datur res media cujus substantia mensuratur ævo, & actio tempore: sed talis res est Angelus potius, quam ulla alia res: Ergo operatio Angeli non mensuratur ævo. Major est Procli, qui est author libri de causis apud Aristotelem.

Negat majorem Doctor numero 13., & authoritatem Procli respuit; *Eo quod*, inquit, *doctrina de causis, tradita, est secundum doctrinam Avicennæ erroneam, ac si intelligeret ille Author intelligentias esse Deos quosdam, & earum operationes mensurari nunc temporis, non quidem intrinsicam operationem, quia hoc non pateret potentialitatem, nec successionem, sed extrinsecam circa corpus esse in momento temporis: & ideo authoritas illa non est habenda sicut authoritas, quia tradita est per radicem erroneam.*

Dices 2. Nihil producit, ut statim deficiat: Ergo quicquid producitur debet

Cc

bet

bet aliquandiu durare; & consequenter operatio angelica debet aliquandiu durare; sed si mensuraretur ævo, non deberet durare aliquo instanti; quidquid enim mensuratur ævo, & non est sempiternum, debet existere pro aliquo instanti tantum, operatio autem angelica non est sempiterna: Ergo si mensuratur ævo, debet existere pro aliquo instanti.

Negat minorem Doctor: Quamvis enim natura non intendat productionem rei, ut deficiat, & idcirco secundum intentionem naturæ res producta debeat aliquandiu durare, nihilominus potest aliunde deficere, ut constat in omnibus mutationibus instantaneis, *Quæ:* inquit Doctor, *non habent esse nisi raptim, & statim non sunt*, hoc est, statim esse desinunt.

Dices 3. Talis est mensura operationis angelicæ, qualis visionis beatificæ; sed visio beatifica non mensuratur ævo: Ergo nec operationes angelicæ debent ævo mensurari: Major constat ex secunda probatione superius deducta: Minor probatur: Tum ex illo Joannis 17. *Hæc est vita æterna, ut cognoscant te:* Tum ex S. Augustino lib. 83. *qq. quæst. 25.* ubi nostram beatitudinem æternitatem participatam appellat.

Nego minorem, & ad ejus probationem dico, Primum contextum Scripturæ sumi, non pro æternitate formaliter accepta, sed pro ævo sempiterno, quemadmodum anima dicitur æterna, eo quod in perpetuum sit duratura: Nam, ut observavimus articulo de æternitate, nomen æternitatis variis, sed præsertim quinque modis usurpatur in Scriptura.

Ad S. Augustinum dico, eum non loqui de beata Visione, sed de anima nostra, quam docet esse æternam participatione æternitatis, quippe cum à Deo, qui æternus est, in perpetuum sint conservandæ.

Quantum ad operationes transeun-

tes Angelorum, quales sunt motus localis, corporum deportatio, & agitatio, dico ipsas esse mensurandas nostro tempore. Hac enim ratione quandam conditionem corporibus communem, nempe motum localem, & ubi participant Angeli: Ergo debent etiam participare mensuram rerum corporalium, quæ est tempus continuum. *Confirmatur;* Nam In quantum moventur localiter, participant ubi, quod est conditio, & passio corporalis aliquo modo ejusdem rationis in ipsis, & in corpore: Ergo etiam possunt mensurari mensura primi corporis moti.

Imò addo, quod etsi prædicta de operationibus immanentibus secundum sententiam Doctoris, certiora appareant, nihilominus non dubitarem asserere tam ipsius Angeli, quam ejus operationes, nec-non, & cujuscumque rei permanentis durationem, reverà etiam mensurari posse nostro tempore; ita, quod per eorum coexistentiam ad nostrum tempus distinctè cognosci possit quandiu duraverint, nempe vel per annum, vel per diem, vel per horam: adeoque earum rerum duratio tam potest dici temporanea, quam quæcumque alia. Quod utique ratione firmari potest, duratio enim angelica aliquam habere debet mensuram, unde facillè conjiciatur Angelum tandiù aut durasse, aut duraturum: sed id cognosci non potest distinctè per ipsammet Angeli existentiam; licet enim Aliquis intuitivè cognosceret naturam Angeli, & realem ejus existentiam, inde tamen non posset certò cognoscere quandiu duraverit aut duraturus sit: adeoque aliam debet habere mensuram ex qua cognoscatut qualis, & quanta sit ejus duratio, eamque saltem de præterito mensurare. Ad id autem tempus facillè deservire potest; siquidem ex hypothesi, quod (sicut probatum est supra) Angeli creati fuerint cum Universo, facillè quisque judicare poterit eos jam per tot annorum mil-

millia, & centurias durasse, à condito scilicet orbe usque nunc; & si tempus esset perpetuum, ex illo quisque Angelorum posset cognoscere se, & alios tot, & non pluribus annis, diebus, & horis durasse: Igitur si consideremus Angelorum coexistentiam ad tempus, asserere licet ipsum dici posse mensuram externam durationis angelicæ, sicut, & aliarum quarumlibet rerum permanentium.

Inde tamen nollem subscribere Thomistis asserentibus operationes immanentes Angelorum tempore discreto mensurari: Hæc enim assertio videtur improbabilis: Tum quia, ut supra probavimus *quæst. 1. conclus. 2.* tempus illud discretum omnino fictitium est, & gratis excogitatum: Tum quia instans quodlibet temporis discreti necessariò coexistit alicui parti nostri temporis, aut instanti: Si instanti: Ergo tempus nostrum pariter est discretum, habetque instantia sibi invicem immediatè succedentia; subindeque non est quantitas continua, ut volunt Philosophi: Si correspondeat alicui parti temporis: Ergo sequitur Angelum non posse in instanti indivisibili nostri temporis formare intellectionem, quia non posset illam formare nisi in instanti sui temporis discreti, quod instans necessariò responderet non instanti, sed parti divisibili nostri temporis: Sed istud consequens est à veritate alienum; si enim homo possit in instanti nostri temporis formare intellectionem, multò magis Angelus. Tum denique quia fatentur Thomistæ nostras intellectiones, & volitiones non mensurari tempore discreto: Ergo à paritate rationis idem dicendum de angelicis. Patet consequentia, nam intellectiones nostræ sunt totæ simul, sicut, & intellectiones angelicæ: Ergo habent mensuram proportionatam; adeoque si illæ non mensurentur tempore discreto, hæc pariter tali tempore dici non possunt ita mensurari.

SECTIO TERTIA.

De Affectibus Angelorum erga corpora.

EST Angelus ex natura sua nullum cū re corporea commercium habeant, quippe cū nec corpore sint concreti, nec ex materia, & spiritu coalescant, nec tandem formæ sint substantiales ad corporis animationem, & agitationem ex natura sua destinatæ: Certò tamen constat eos stupendos prorsus effectus erga res corporeas interdum edere, dum vel corpora quævis movent, ut in eis latentes nobis appareant, vel in illis varios effectus operantur, & miranda, quæque, ac insolita proferunt. Quorum omnium, ut aliqua saltem delibemus, hic tria maximè proponimus determinanda. *Primum*, an, & quæ corpora Angeli assumant, ut in eis hominibus appareant: *Secundum*, an, & quos vitales actus in eis corporibus edere valeant. *Tertium*, an, & qualiter res aliquas corporeas producere, aut immutare queant.

QUESTIO PRIMA.

An, & qualiter Angeli soleant in assumptis corporibus apparere?

NOTANDUM I. ex Seraphico Doctore in *secundum dist. 8. art. 1. qu. 2.* Duplicem in Angelis esse virtutem, nempe *Contemplativam*, & *Administrativam*. Secundum *Contemplativam*, inquit, convertuntur ad Deum, & sic non indigent solatio corporis assumpti. Secundum *administrativam* descendunt ad nos, & condescendunt nobis, & ut nobis congruentius condescendant indigent solatio assumpti corporis: Indigent, inquam, 1. ad aliquas operationes exercendas, 2. indigent ad seipsos manifestandos, 3.

C c 2

in-

indigent ad nosmetipsos letificandos, sive confortandos, & ideo assumunt corpora sicut instrumenta, vel organa ad operandum, sicut signa ad manifestandum, sicut cooperimenta, vel habitacula ad conversandum. Unde corpus assumptum conjungitur illis sicut instrumentum motori, sicut signum significato, sicut habitaculum in habitatore. Hoc autem magis exigit indigentia ex parte nostra, quam indigentia ex parte sua: & quia finis imponit necessitatem his, quæ sunt ad finem, & corpus effigiatum, vel organizatum humana effigie, maxime competit operationibus spiritus rationalis, & expressius significat, & tanquam pulchrum indumentum quodammodo decorat; ideo Angelus assumit corpus, non qualecumque, sed humana effigie insignitum.

Notandum 2. ex eodem art. 2. quæst. 1. quod licet Angeli assumant interdum humana corpora, non tamen perfectè organizzata sibi effingunt, quia, inquit, Angelus non potest educere formam naturalem in esse nisi adjutus à virtute naturæ; in virtute autem naturæ est producere corpora omnium animalium: verumtamen aliter, & aliter. *Ad quedam enim* educenda sufficit Causa universalis sine adjutorio agentis particularis, consimilis in specie naturæ, cuiusmodi sunt animalia, quæ generantur per putrefactionem: *Quedam* autem sunt, ad quæ non sufficit, nisi adjuvetur ab agente consimilis speciei, sicut corpora animalium, quæ producuntur solummodo per propagationem, & istud planum est ad sensum. Si autem queratur ratio hujus, prima est divina institutio secundum quam est limitatio in virtutibus, & naturis rerum: & hoc secundum legem, quam indidit eis ab initio. Unde cum dixit, *Germi net*

terra herbam virentem; non dixit; quod germinaret hominem. Homini autem dixit, quod se multiplicaret; sic terra germinat herbam, & homo generat hominem.

Hæc autem lex, sive institutio non est absque ratione; quia quedam sunt animalia imperfecta tam in organizatione, quam in duratione: quedam verò perfecta utroque modò; quia verò quedam corpora animalium sunt imperfecta, & in organizatione, & in completionem: ideo non indigent agente tantæ virtutis; sed potuit virtus productiva ipsorum dari terræ, tanquam matri, & Soli tanquam patri, cum adjutorio aliorum corporum simplicium tam elementarium, quam celestium; quia verò sunt in perfecta duratione, & aliquando pereunt; ideo oportuit hoc communicari agenti alterius naturæ, quia ad hoc data est vis generativa rebus, ut dicit Philosophus: ut perpetuentur in esse. E contrario est de animalibus utroque modo perfectis: & ideo virtus productiva ipsorum majorem exigit actualitatem, & ratio seminalis cum maiori difficultate profertur in actu: ideo majori indiget adjutorio.

Illa igitur animalia, quæ ad primum genus spectant, educi possunt ab Angelis, mediante naturæ adjutorio velociter, & quasi subito; veraciter tamen, quia per vim naturæ. Sed animalia, & eorum corpora, quæ spectant ad secundum genus, educi non possunt veraciter nisi cum auxilio naturæ, & cum diuturnitate, & tempore. Et quoniam assumptio corporum ab Angelis est velociter, & quasi repente: ideo vera corpora humana non assument, quia non possunt illa per se formare veraciter, & cum alterius adjutorio non possunt facere, quod exeant in esse velociter: & est quod educerentur, adhuc

adhuc non competere, tum propter appetitum, quem habere ad animam rationalem, tum propter gravitatem: quæ duo repugnant fini illius corporis. Nam si haberet animam rationalem, non esset competens signum ad apparendum: Si haberet gravitatem, non esset competens instrumentum ad operandum, maxime ad motum, non esset etiam competens habitaculum ad inhabitandum.

Notandum 3. ex eodem ibid. quæst. 2.
Variam circa præsentis quæstionis resolutionem fuisse gravorum Authorum sententiam: *quidam* enim dicere voluerunt, quod Angeli assumunt corpora ex natura elementari; ita tamen, quod non ex uno tantum, sed ex omnibus simul mixtis, aliquo tamen eorum prædominante: Unde dicunt corpus illud ab Angelo assumptum, esse verè corpus mixtum, quamvis non sit verè corpus humanum. Illam autem formam mixtionis dicunt esse ab Angelo, tanquam à præparante solum, sed à Domino tanquam à dante, dante, inquam, non per creationem, vel infusionem, sed per intrinsecam operationem, quod indidit rebus naturam, & virtutes seminarias, secundum quas Deo cooperante cunctæ naturales formæ producuntur in esse.

Sed cum corpus illud quasi repente formetur, & destruat, aliis non videtur probabile, quod sit plena mixtione mixtum: maxime cum in ejus resolutione non appareat temporis longitudo, nec putrefactionis corruptio: & ideo dixerunt, quod corpus illud est de natura elementari simplici, ex qua dicunt illud corpus assumptum formari hoc modo. Natura enim elementaris ex qua corpus sibi format Angelus est aeris elementum, quod de sui natura est rarefactibile, & condensabile, si ad sit

virtus, quæ hoc possit. Unde sicut nunc videmus aquam solidari in crystallum, vel glaciem in frigore: si contingit aliqua virtute occulta, quæ non latet Angelos, aerem condensari posse, sed hoc secundum plus, & minus ad voluntatem Angeli operantis: Hoc autem corpus dum condensatur potest suscipere figuram, & effigiem: & ita corpori organico effici conforme. Potest nihilominus in una parte condensari plus, in alia minus, in alia minimè, & sic conformari nervo, ossi, & carni. Potest etiam in una sui parte intercepte plus de luce, in alia minus, & in alia minimè, & secundum hoc habere in se diversos colores: & ita corpori humano effici quasi in omnibus conforme, quamvis non sit in suis principiis multiforme: & ita idoneum esse instrumentum, signum, & habitaculum, ut ab Angelo assumatur.

Sed adhuc quia difficile est hoc intelligere, quomodo ex aere, sine alterius elementi commixtione fiat corpus solidum ex diversis coloribus coloratum, cum colores producere non sit artis, nisi mediante auxilio nature, ideo tertia via videtur adhuc esse probabilior, scilicet quod corpus assumptum ab Angelo corpus elementare est, non quia sit ex quatuor elementis, plena mixtione commixtum, sicut corpus complexionatum, nec quia sit ex puro, & simplici elemento formatum; sed quia principaliter formatur ex aere, cum aliqua admixtione alterius elementi, sicut videmus in nube, quæ non est corpus plene mixtum, habet tamen in se naturas plurium elementorum: Per hunc modum, & corpus ab Angelo assumptum principaliter ab aere intelligitur esse formatum, concurrente ad hoc natura alicujus vaporis terræ, vel aquæ, qui quidem faciat

tam

„ tam ad varietatem condensationis ,
 „ quàm ad multiformitatem coloris ;
 „ Hanc autem non oportet Angelum
 „ de longinquo mendicare , cum aer
 „ pro magna sui parte sit commixtus
 „ vaporibus .

His prænotatis quatuor præcipuè superlunt hic determinanda , & probanda : *Primum* , quòd reverà Angeli assumant interdum corpora , quibus sensibiliter hominibus appareant , ita quòd apparitio non sit sensuum illusio , & ludificatio , sed reverà corporis exterioris sensibilis manifestatio . *Secundum* , quòd illud corpus assumptum sit aliquando ab Angelis ex materia sensibili effigiatum . *Tertium* , quòd illud corpus assumptum quandoque sit humanum cadaver admodum viventis delineatum , & agiatum . *Quartum* , quòd ipsi corpori Angelus inest tantum , ut extrinsecus motor , & director .

CONCLUSIO PRIMA.

Reverà Angeli hominibus interdum apparent in corporibus visibilibus , & sensu perceptibilibus . Hec est communis contra Guilielmū Parisiensem parte secunda secundæ partis de Universo cap. 34. & sequentibus , ubi probat Angelos non assumere corpora , sed solum immutare phantasiam eorum , quibus apparent . Probatur conclusio illis omnibus Scripturæ textibus , quibus huiusmodi sensibiles Angelorum apparitiones referuntur ; Fuerunt namque frequentissimæ in Veteri Testamento . Nam *Genesi* 3. Dæmon sub specie serpentis Evæ apparuit , & loquutus est ; & c. 18. Tres viri apparuerunt Abraham ; & c. 19. Duo Angeli venerunt Sodomam in figura peregrinorum ; & cap. 32. Angeli venerunt obviam Jacob , quos cum vidisset dixit , *Cassra Dei sunt hæc* ; & postea unus eorum in hominis figura lucrabatur cum Jacob usque mane . Ac denique Raphael non solum in transitu , ut sic dicam apparuit Tobie , sed etiam per multos dies , & per varia iti-

nera illum comitatus est . In Novo etiam Testamento Gabriel Angelus visibiliter apparuit , & loquutus est Mariæ Virgini ; & Diabolus ad Christum tentandum ei visibiliter apparuit : Et in Actibus Apostolorum cap. 5. & clariùs in 12. similes apparitiones Angelorum narrantur . Itaque veritas hæc certa est , nec in illa generatim sumpta dubitatio , aut difficultas occurrit : in modo autem explicandi huiusmodi apparitiones , nonnulla esse potest .

Hoc ipsum probant sancti Patres , in primis Augustinus lib. 15. de Civit. c. 23. Sic , inquit , *apparuisse hominibus Angelos in talibus corporibus , ut non solum videri , verum etiam tangi possint , eadem verissima Scriptura testatur* . In quibus verbis parum abest , ut hoc de fide esse doceat . Idem apertè sentit Damascenus lib. 2. de Fide cap. 3. dicens de S. Angelis , *Probis , ac virtute præstantibus hominibus , quibusque eos conspiciendi sui copiam facere Deus voluerit , non quales sunt apparent , sed aliam , atque aliam formam , prout videri ab hominibus possunt , assumunt* : Et ideo inferius cum dixisset Angelos tribus dimensionibus non constare , nec corporeo modo circumscribi , nec figurari , addit , *quantum ad naturam attinet , indicans in corporibus assumptis tria illa recipere posse* . Imò etiam cap. 4. de malis Angelis inquit , *Potestate à Deo concessa , & viribus pollent , & immutantur , & in quolibet formam , ut quidam apparet , migrant* ; Ubi inquit Suarez lib. 4. cap. 33. particula , *ut quidam apparet* : non excludit sensibilem , ut ita dicam , ostensionem ; at denotat , vel , non apparere , quoad propriam naturam , sed tantum quoad corpus assumptum ; vel denotat illa corpora , in quibus apparent , non esse illius naturæ , seu speciei cujus ostenduntur , quamvis verè sint sensibilia , & externa .

Hinc S. Gregorius *Homilia* 34. in *Evangelia* ; duplicem distinguit Ange-

lorum missionem, scilicet invisibilem, & visibilem, ad eum modum quo Theologi eas in divinis Personis distinguere solent: illamque distinctionem in Angelis ex Dionysio refert. Denique Cyprianus *lib. de cardinalibus Christi operibus* in Præfatione; Sic, inquit, qui circa ipsum sunt Angelici spiritus, licet invisibilis nature sint, in legationibus tamen suis se auditui manifestant, & visui, & salutis nostre ministeriales se passim experimur.

Probatur etiam rationibus Seraphici Doctoris supra laudati quæst. 2. *Primo* quidem nulli potest impendi hospitalitatis hospitium, nisi habeat corpus naturaliter unitum, vel assumptum: sed Angelis aliquando impensa sunt hæc officia, sicut dicitur ad *Hebræos cap. ultimum*, quod quidam placuerunt Deo, Angelis hospitio receptis: Ergo vel habuerunt corpora unita, vel assumpta: sed non habuerunt naturaliter unita: Ergo assumpta. *Secundo*, nulla substantia spiritualis ex sui consortio præbet solatium sensui, nisi per inhabitationem corporis fiat visibilis: sed Angeli frequenter præbent solatia, non solummodo secundum spiritum, sed etiam secundum sensum, sicut patet in Angelo Tobie: Ergo inhabitant corpora: sed illa non habent semper unita: Ergo voluntariè assumpta. *Tertio*, nullus spiritus potest visibiliter demonstrari ad demonstrationem corporis, nisi sit aliquò modò corpori illi conjunctus: sed Angelus, qui loquebatur Tobie visibiliter poterat demonstrari, & verè dici hic est Raphael, vel hic est Angelus: Ergo habebat sibi corpus illud aliquò modò conjunctum: sed non per naturalem conjunctionem: Ergo per voluntariam assumptionem.

Dices 1. Proportio debet esse assumptis ad assumptum: sed Spiritus angelicus est omnino incorporealis: Ergo non habet proportionem ad corpus: Ergo nunquam assumit illud. *Confirma-*

tur, majorem convenientiam habet anima rationalis ad corpus, quàm habeat Spiritus angelicus: sed anima separata corpus non assumit: Ergo nec Spiritus angelicus.

Respondet Seraphicus Doctor quod illa proportio debeat attendi secundum modum assumptionis: unde cum assumptio non sit in unitatem nature, idcirco non requiritur, quòd sit ibi proportio sicut perfectivi ad perfectibile, sed sufficit quòd sit proportio sicut motoris ad mobile. Ad confirmationem respondet non esse paritatem inter Angelum, & animam separatam, quia non habet vim administrativam, nec usum administrandi, & ideo nec corpus assumit, nec habere debet potentiam assumendi.

Dices 2. corpus assumitur, aut propter aliquid; aut propter nihil: Si propter nihil: Ergo frustra: Si propter aliquid, aut est bonum, aut malum: Si bonum: Ergo per corpus assumptum meretur: Si malum: Ergo per corpus assumptum demeretur: Ergo Angelus debet posse puniri, & premiari cum corpore assumpto, quòd est inconveniens, & plane falsum.

Respondet idem Seraphicus Doctor illam assumptionem fieri, non in vanum, sed propter rationes assignatas in primo Notabili. Illud tamen, inquit, propter quòd assumit non pericit per corpus, tanquam anima per corpus proprium; sed tanquam Artifex per instrumentum, & ideo sicut instrumentum per quòd quis meretur, non remuneratur: sic nec corpus ab Angelo assumptum.

Dices 3. Ubicumque est assumptio, ibi est aliqua unio, vel in persona, vel in natura, sicut patet in assumptione humane nature à Filio Dei: Ergo si Angelus assumit Corpus, unit sibi vel in persona, vel in natura, sed non in natura unit sibi: quia non resultat tertium; nec in persona, quia non est communicatio idio-

idiomatum: Ergo nullô modô est ibi unio: Ergo nec assumptio.

Respondet idem seraphicus Doctor, negando antecedens: Non enim comprehendit omnes assumptionis modos, quia, inquit, homo assumit vestimentum cum se induit, non tamen unit sibi in persona, nec in natura: itaque antecedens solum verum est de illa assumptione in qua est unio perfecta, qualis fuit assumptio humanæ naturæ à Verbo divino. Ut autem solvantur aliz similes huiusmodi formandæ objectiones, scite admonet ibidem, quod quando Angelus dicitur assumere corpus, hæc assumptio non sic veniat intelligenda, quasi tantum moveat, vel operetur aliquid circa corpus: sed quia illud accipit ad se, ut in illo operetur, ut in illo manifestetur, ut in illo conversetur: & quia in illa conjunctione sive acceptione corpus potius sequitur modum spiritus, quam è converso, quia ab illo formatur, & conservatur, & regitur: Ideo Angelus se habet in ratione assumentis, & habentis; corpus verò in ratione assumpti, & habiti.

Dices 4. Angeli interdum hominibus apparent per solam sensuum interiorum, & phantasie immutationem, puta cum homines dormientes alloquuntur: sic v. g. *Angelus apparuit in somnis Iosiph, dicens, surge, & accipe puerum, & matrem eius, &c.* Cur ergo non affirmabimus ita semper apparere.

Respondeo: Id reverà quidem interdum ita contingere, sed nego id semper eò modò fieri. Fateor itaque, quod apparitiones Angelorum alterutro ex his tribus modis fieri soleant. *Primo* per solius imaginativæ facultatis immutationem: *Secundò* per sensus externi quandam perturbationem ut fit in præstigiis: *Tertiò* per objecti sensibilis externam representationem, sive interrim id quod apparet verum sit, aut tantum fictitium. Verum quidem est, quod Angeli hominibus interdum appareant

primò modò, conspiciuntur etiam secundò modò, quippe cum Dæmones suis præstigiis hominibus illudant: At etiam fateri oportet eos nonnumquam tertio modò percipi, nempe in corporibus assumptis debite propolitis facultati visivæ rectè ad operandum dispositæ.

Dices denique cum Guillelmo Parisiensi laudato initio conclusionis, si Angeli apparerent in corporibus, aut illa corpora effingerent, aut aliunde formata assumerent: sed neutrum dici potest.

Non quidem primum, Fabricatio enim huiusmodi corporum, aut esset subita, aut successiva; quod si subito fieret: Ergo solo nutu, & imperio assumptum, hoc autem non est nisi omnipotentis virtutis Creatoris: Si verò subito non fieret, sed per successionem, pars scilicet post partem, tunc esset generatio, fabricatio hæc, quare esset ex aliquo, quod corrumpere in generatum; quia igitur oportet illud esse visibile, necesse est alibi fieri generationem huiusmodi, quam ante homines quibus fit huiusmodi apparitio: Cum igitur numquam in toto mundo visa fuerit, vel ipsa fieri, vel materia ex qua fit; necesse est ipsam fieri extra habitationem hominum, qualiter, igitur adveniunt ad conspectum hominum tanta velocitate, & abeunt similiter non minori, & ubi deponunt atque reponunt corpora ista, quorum nullum indicium post eorum disparitionem apparet? Hæc ille.

Confirmat ex eo quod Angeli interdum appareant maximò numero, videtur enim, inquit, exercitus eorum major omnibus exercitibus omnium, Regum, & Principum terre; Unde ergo assumpta esset materia ex qua tanta numerositas corporum humanorum, & novorum equorum, scutorum, lancearum, galearum, & aliorum apparentium fabricata sit, cum

5, eùm integri montes omnes , & alia
„ partes terræ persistant .

„ *Non etiam secundum*, Si enim essent
„ vera corpora , inquit ibidem , qualia
„ apparent , essent verè tangibilia , verè
„ palpabilia , & verè passibilia omni
„ genere passionis , nihil autem eorum
„ reperitur in ipsis : *Insuper* , ut subito
„ corrumpantur , & redigantur in ni-
„ hilum non est possibile ; Corruptio
„ enim corporis , vel generatio non vi-
„ detur possibile ut subito fiat , ut de
„ creatione manifestum est ipsam esse
„ subitanam , sive instantaneam , &
„ non fieri ullo modo rem per partes
„ aut successionem : ubi ergo fieret ista
„ corruptio , nisi ubi , & apparitio eor-
„ um , & disparitio ? Ibi igitur necesse
„ est apparere , & esse secundum veri-
„ tatem id in quo fit corruptio , seu re-
„ solutio hujusmodi corporum ; mani-
„ festum autem est , quia nihil post se
„ relinquunt , quod sit corpus , vel cor-
„ poreum .

Respondet : Angelos quandoque ap-
parere in corporibus à se effigiatis ,
quandoque verò in aliunde formatis ;
qualiter autem , & ex qua materia illa
possint effingere , vel dimittere corpora
tam facili , tamque subitanea formatio-
ne aut resolutione , appareret .

CONCLUSIO SECUNDA .

Angeli interdum apparent in corpo-
ribus quæ efformantur ex materia ,
non cælesti , nec purè elementari , sed
mixta Hæc est communis secundum
rei veritatem apud omnes penè Theolo-
gos , quamquam nonnulli variant in
modo explicationis , & probationis
eiusdem ; eamque apertè tueretur Subtilis
Doctor , dist. 8. num. 3. cujus verba
quoniam hujusce resolutionis verita-
tem , & probationem luculenter expli-
cant , hic lubet exscribere .

„ Dico , inquit , quòd non assumit
„ corpus cæleste , nec corpus elemen-
„ tare in quibus appareat , quia in ele-
„ mentari non visibiliter appareret :

Toni. IV.

„ nec corpus elementare est suscepti-
„ vum illorum accidentium in quibus
„ apparet . Corpora autem mixta , jam
„ à natura generata potest assumere ,
„ sicut est cadaver mortui , vel lapis ,
„ vel aliquid tale . Et quando assumit
„ aliquid , quod non videtur prius
„ causatum , vel formatum à causis na-
„ turalibus , sed quasi formari tunc , &
„ subito completa operatione dispa-
„ rere , sicut fuit de Raphaele , & Sa-
„ muele ; tunc videtur probabile , quòd
„ illud sit corpus mixtum propter ac-
„ cidentia quæ apparent in corpore :
„ sed non mixtum plena mixtione ;
„ tum quia ex generatione tale mix-
„ tum non posset ita subito formari ,
„ quia non esset natum generare nisi
„ secundum determinatum processum
„ naturæ qualis non est ibi , putà si ap-
„ pareat in corpore hominis , non prius
„ geniti per naturam , illud corpus
„ non esset natum , vel aptum generali
„ nisi in materia .

Non potest dici , quòd Angelus subito
inducat illam formam in materia , quia
„ non potest naturalem formam indu-
„ cere , sed tantum elementa activa , &
„ passiva potest convenienter simul
„ adhibere , & corporibus in situ con-
„ venienti approximare , ut inducatur
„ forma particularis , qualis nata est à
„ talibus agentibus particularibus in-
„ duci . Itaque corpus , quod ita tam
„ subito formatur , & resolvitur , est
„ mixtum imperfecta mixtione , qualis
„ potest induci ab agentibus natura-
„ libus , quasi subito facta approxima-
„ tione elementorum ; ita quòd magis
„ tale corpus assimilatur impressioni
„ quæ est imperfectè mixta , & signum
„ hujus est , quia quando disparat tale
„ corpus , non remanet aliquid talis
„ corporis in quod naturaliter esset
„ mediare resolvable corpus illud as-
„ sumptum , si perfectè fuisset mixtum ;
„ corpus enim humanum , si esset per-
„ fectum mixtum , non est natum re-

D d

di

„dire nisi ad cadaver: sed tale imper-
 „fectè mixtum resolvitur statim in
 „elementa, sicut ex eis potuit statim
 „generari propter eorum imperfe-
 „ctam mixtionem.

Quibus Doctor tria maximè conclu-
 dit: *Primum*, quòd Angeli non assu-
 munt corpus cœleste, quia, vel assume-
 rent corpus cœleste ante generatum seu
 productum, quod scilicet esset aliqua
 pars corporum cœlestium, v. g. Cœlo-
 rum aut Astrorum; at hoc esset stupi-
 dum cogitare, quia sequeretur illa su-
 periora corpora non manere integra,
 vel loco istius partis, quæ assumeretur
 ab Angelo aliam partem de novo pro-
 duci: Vel esset aliquod corpus ejusdem
 speciei cum corpore cœlesti; at hoc
 etiam esset ludicrum, siquidem cum
 speciem præferat corporis subluna-
 ris, potius sublunare quàm cœleste dici
 deberet. Adde, quòd corpus cœleste non
 esset proportionatum subjectum his ac-
 cidentibus, quæ apparent in corporibus
 hujusmodi assumptis.

Concludit secundò, Corpus illud ab
 Angelis effigiatum, & assumptum, non
 formari ex aliquo ex quatuor elemen-
 tis. Si enim ad id aliquod purum ele-
 mentum deserviret, maximè aer: sed
 aer non est proportionatum subjectum
 istorum accidentium, quæ sunt in cor-
 poribus assumptis ab Angelo, putà tan-
 tæ soliditatis, ac densitatis, quæ est in
 ossibus, aut in illis partibus, quæ ap-
 parent ossa in illis corporibus. *Deinde*,
 quandoquidem illud corpus appareat
 mixtum distinctum ab elementaribus,
 & non videatur facilis ab Angelo pro-
 ducere illa accidentia externa, quæ ap-
 parent, quàm corpus mixtum, potius
 debet dici, quòd sit corpus mixtum,
 quàm aer, aut aliquod aliud elemen-
 tum.

Hinc non possum assentiri Aleni
quæst. 34. membro 4. ubi cum dixisset,
 quòd duplex est pars aeris, scilicet su-
 perior, quæ purior est, quæ propriè di-

citur aer, & alia inferior, quæ *Æther*
 nominatur, secundum hæc distinguun-
 tur duo Cœli, *æthereum*, & *aereum*:
 inde concludit, quòd Angeli boni de
æthere assumunt corpora, sed mali potius
 de aere. Hæc, inquam, vix probare
 possum, quippe cum neutra aeris por-
 tio videatur posse in corpus ita con-
 densari; & compaginari, ut carnia
 molliem, & duriciem ossium refe-
 rat.

Unde concludit tertio Doctor, quòd
 Corpus efformatum ab Angelis habeat
 pro materia quid mixtum nempe vapo-
 rem, aut nubem: ut etiam consentit
 S. Thomas affirmando Angelos sibi in-
 terdum corpora ex nube effingere,
 quod etiam Maro non ignoravit cum
 de Diabolo larvato cecinit.

*Tum Dea nube cava tenuem sine viri-
 bus umbram*

*In faciem Ence visa mirabile mon-
 strum,*

Dardaniis ornat telis, &c.

Ratio autem hujus est, quòd corpus
 mixtum facile possit condensari, & spis-
 situdinem, ac figuram suscipere, ut con-
 stat de nubibus, vaporibus, exhalatio-
 nibus, & aliis meteoris, quorum aliqua
 sic per frigus compaginantur, aut per
 ignem ætherem indurantur, ut diffi-
 cile possint resolvi, sicut compertum sit
 de fulmine, & grandine.

Fateor tamen vix posse explicari quo-
 modo ab Angelis ex vaporibus, & nu-
 bibus efformata corpora, ita possint in-
 durari, ut palpari, aut tangi queant,
 ita ut tactui vel solida, vel mollia appa-
 reant; *Quis enim explicet*, inquit, san-
 ctus Augustinus in Enchiridio cap. 59.
cum qualibus corporibus apparuerint
hominibus, ut non solum cernerentur,
verùm etiam tangerentur. Et paulò post
 addit, *Faciuntque dissestissimam quæ-
 sitionem quomodo Patres eis pedes lave-
 rint, quomodo Jacob cum Angelo tam*
solida concertatione luctatus sit; Et ibi-
 dem concludit, *Cum ista querantur, &c.*

ea sicut potest quisquis contrectat, non inutiliter exercentur ingenia: si adhibeatur disceptio moderata, & absit error opinantium se scire, quod nesciunt: quid enim opus est, ut hæc atque huiusmodi affirmantur, vel negentur, vel desiniantur cum discrimine, quando sine crimine nesciuntur: & quamvis hæc dixerit Augustinus de corporibus quibus Angelos naturaliter constare putavit, idem fortiori ratione iudicium esse debet, de his, quæ voluntate sola Angeli assumunt.

Nihilominus affirmare possumus, quod Angelus per eandem virtutem, per quam corpus assumit, facere possit, ut corpus illud, quamvis in se solidum, non sit, solidum tamen tactui appareat; nimirum sua virtute resistendo, ne partes talis corporis facile cedant, aut dividantur. Hinc potest efficere, ut quædam partes molliores ad modum carnis, & aliæ densiores ad modum ossis appareant; nam potest magis, vel minus tactui resistere, & in quibusdam nihil omnino cedere, in aliis verò aliquoties cedere; non ita ut dividantur, sed ut aliquomodo comprimantur.

Fateor tamen, quod si homo cum quo conversatur Angelus in corpore assumpto, attentè consideret id, quod tangit, dum Angelicum corpus contrectat, facile iudicare poterit illam non esse veram duritiem, nec veram molitiem qualis in ossibus, & carnibus reperitur: quia si attenderet, facile perciperet, non ita immutari tactum ab illis corporibus sicut ab aliis, quæ vivunt, & veras carnes, & ossa habent. Contrà verò accidit, quando homo sibi persuasum habet illum esse verum hominem, cum quo conversatur, & quem videt, tunc enim quoniam oculis iudicat eum esse hominem, & animo contrectat corpus illius, videtur sibi carnes, & ossa tangere, nec discernit utrum sit verum corpus, an apparens tantum. Ita existimo accidisse Abrahamo, & Loth

dum Genesios 18. & 19. laverunt pedes Angelorum: neque enim tunc cognoverunt Angelos esse, & in corporibus assumptis apparentes.

Quantum autem ad colores, qui in corporibus assumptis effigiantur ab Angelis. Plurimi assensent eos tantum esse apparentes, illorum instar, qui in nubibus, aut collo columbæ identidem cernuntur: Sed hoc videtur difficile, cum plurimis iisque, & diversis locis contuentibus iidem appareant, Sole etiam non lucente, quod non contingit in iride, nubibus, & aliis coloribus merè apparentibus: Veri ergo sunt, & partim ex Elementorum, & primarum qualitatum contemperatione orti, partim opera Angeli velut pingentis arte dispositi.

De virtute verò, quâ hæc corpora assumuntur, & præparantur: Censet sanctus Thomas quæst. 51. virtute Dei fieri. Alensis verò quæst. 34. membro 5. ait, quod Angelus præparat huiusmodi corpus assumptum, formatio autem ultima sit ab ipso Deo. Verum probabilius iudico cum Doctore, illa corpora fieri ab Angelo propria virtute: censet enim Doctor, ut supra diximus, ista corpora figurari condensatione; cum autem condensatio solo motu compressionis fiat, quem potest Angelus propria virtute efficere, sequitur propria virtute posse ab Angelo corpus assumi. Et quamvis non solâ condensatione id semper fiat, potest tamen aliquando Angelus applicatione aliarum causarum naturalium talia corpora perficere, ut assumantur. Id autem existimo probabilius, nam cum mali etiam Angeli ad pessimos fines corpora assumant, non est verisimile Deum propria virtute illa formare, & solum ipso Dæmone, ut instrumento uti.

Advertendum autem est insuper, quod quando Angeli, maxime Dæmones, apparent in assumpto corpore à se effigiato, possunt illud in corpus homi-

nis cum, quo loquuntur ingerere, necnon, & istud suo assumpto corpore circumdare; ita, quod homo tali corpore circumdatus, & indutus, aut alterius hominis effigiem referat, aut aliam formam induat: id enim suadet aeræ substantiæ facilitas ad dilatandum, sive rarefaciendum, & spissandum densandumque. Quam merito Psellus causam tradit cur spectra tam brevi spatio crescere, & decrescere videantur: Interdum enim illa spectra gigantem, aliàs verò nanum, aut pusionem referunt; quia materia illa ex qua assumptum corpus compaginatur, cum sit tenuis, & mollis, facile potest rarefieri, & condensari.

CONCLUSIO TERTIA.

Dæmones plerumque apparent in corporibus vel hominum, vel animalium vita funtorum.

Hæc etiam est communis apud Theologos, ut probatur innumeris propemodum exemplis, quibus constat Dæmones plerumque homines delusisse in assumptis mortuorum cadaveribus: cuiusmodi plurima exempla profert Cæsarius Monachus Eisterbacensis *libro 12. miraculorum cap. 3.* ubi in primis refert Dæmonem gestasse corpus cuiusdam Principis Germani vitæ functi, integro anno, priusquam sepeliretur, quasi illud vegetaret: Ita quod revera è mortuis surrexisse videretur. *Subdit ibidem*, similia legi in vita S. Patricii Hibernorum Apostoli, de quodam homine in cuius corpore multis annis, Diabolus habitans quasi esset hominis anima, tandem ad nutum viri sancti exivit, corpus verò corruit, & in pulverem reductum fuit: *Et cap. 4.* scribit, quod quidam Clericus adeò dulcem vocem habebat, ut audire eum deliciæ putarentur, donec Religiosus quidam vir illud adjuravit, quò dicente, cadaver corruit planissimè fœtens.

Sic etiam induto cadavere Diabolus sive incubus, sive succubus rem habet

cum strigibus, & sortiariis. Unde, & in hoc genere hominum, cadaverosus quidam fœtor graveolentiæ cernitur. Sic Guillelmus Parisiensis *parte ultima de Universo* refert, quòd aliquando assumpto bestiæ cadavere Diabolus deluserit militem, qui cùm putaret se formosa potitum Virgine, invenit se in amplexu cadaveris belluini tabe soluti fœtidissimè jacentem. Sic denique Dæmon aliquando sepulta jam corpora suscitavit, eaque quasi viventia essent agitavit, ut surrexisse videantur, cuiusmodi rem stupendam refert Phlegon *lib. de mirabilibus, & longævit.* cuius auctoritatem usurpat Origenes *tractatu 29. in Matheum* ad probandam eclipsim, quæ Christo moriente acciderat. Ille, inquam, Phlegon testatur se cognovisse quemdam nomine Machatem, qui Philinnium sui hospitis filiam, indiguè id ferentibus parentibus, amaverat, & sponsam ducere optabat, quæ absente Machate mœrore tabescens, mortua est, & publicè funerata. Cùm autem sexto post mense eò redisset Machates, circa noctem ad eum ingressa est Philinnium, & post longa colloquia cum ipso noctem duxit; quòd cùm id audissent parentes, dormientemque cum hospite suam filiam conspexissent, in ejus quasi vivæ amplexus ruunt; illa autem torvis in eos intuens oculis, & vos credules, ait, in filiam parentes: Ergo ne vos invidisse mihi meo Machate paterna in domo, vel triduum solidum frui Magno vobis dolore hæc sive curiositas, sive duritia stabit: renovabitis dolores præteritis, & filiam iteratò sepelietis. His dictis expalluit, & concidit cadaver mortuo iterum simile, seu potius revera mortuum: Cùm enim jubente Magistratu illius Philinnii sepulchrum fuisset apertum, inventum est vacuum cadavere, erantque in eodumtaxat annulus ferreus, & Scyphus auratus, quæ Machates ipsi quasi redvivæ donò tradiderat.

Con-

Contingit etiam, quod Dæmon ille-
ctus Magorum operâ, interdum viven-
tes personas surripiat, eorumque locò
mortua cadavera ad illarum persona-
rum similitudinem expressa substituat,
quasi languens, demum ad mortem
ægotantia, deinde morientia, & tu-
mulanda veluti mortua exhibeat, quò
subductæ ab eo personæ quasi reverâ
mortuæ censeantur. Cujusmodi duo
stupenda exempla refert Thomas Bra-
banticus lib. 2. de bono Univers. cap. 57.
ubi scribit, quod in villa Brabantie no-
mine *Gunerchena*, quidam juvenis puel-
lam Virginem adamavit, cumque pro
ejus nuptiis parentes anxie sollicitaret,
& illi renuerent, puella medio tempore
incidit in febrim acutam, quâ ingrave-
scente, omnibus mori visa est, luctuque
factò Campanæ quasi pro mortua pul-
satæ sunt. Nec morâ juvenis amator
puellæ de villa eadem in crepusculo no-
ctis transibat ad aliâ, & cum per du-
meta pergeret, audit vocem quasi femi-
næ lamentantis sollicitè: Ergo di-
scurrens, & quærens auditam, invenit
puellam, quam mortuam æstimabat;
cui dixit, mortuam te plangunt tui, &
huc unde venisti? Ecce, ait, vir ante
me vadit qui deduxit me: stupefactus
ad hoc juvenis, cum neminem alium,
nisi puellam videret, audacter rapit
eam, & in domum extra Villam pro-
tinus occulta vit. Hinc ingressus in Vil-
lam amicis suis loquitur, & cum eis
convenit patrem puellæ, unâ cum sua
familia sedentem ad funus; ab eo quæ-
rit si filiam suam sibi daret, quam quasi
mortuam deplangebat? Cui pater ad-
miratus respondit, numquid pro Deo
mihi es, ut mortuam resuscites, & ac-
cipias in uxorem? Cui juvenis, ait,
tantum lubens spondeas, ut filiam tuam
habeam in uxorem, si vivam reddidero,
& sanatam. Cui pater consentiens,
dictum coram omnibus confirmavit;
mox juvenis revelato linteo quò coo-
perta putabatur filia, figmentum mira-

bile quale à nullo hominum fieri potuit,
invenerunt.

Dicitur autem ab his, qui figmenta
hujusmodi diabolica infpexerunt, esse
interius putrido ligno similia, levique
exterius pelliculâ circumducta: Hinc
reducta puella est, & patri reddita,
sanaque post dies aliquot dictum juve-
nem maritum accepit, & usque ad tem-
pora nostra nostra incolumis perduravit,
ita dictus Brabanticus. *Subditque* aliud,
quid simile, quod contingit in confinio
Flandriæ,

Si autem requiras qualiter, hæc ope-
rari possit Dæmon? Reponam id qui-
dem fieri, Deo permittente, per vim
magicam, quâ fortè usus fuerat ille ju-
venis, ut præfatam filiam sibi in ux-
orem duceret. Alia his similia referemus
in ultima disputatione dum nobis erit
sermo de Magis, & Sagis.

Advertendum autem est, In primis;
Dæmonem non posse assumpta illa ca-
davera verè organizare, nec eis vitam
restituere, cum mortuorum vivificatio,
sit opus solius Dei. Potest tamen si per-
mittatur, in assumpto defuncti corpore
se præbere tangendum, & palpandum
cum vera duritie, & mollitie ex parte
corporis, adjunctis etiam extrinsecis
causis calore, & aliis qualitatibus suf-
ficientibus, ut tactui vivum appareat.
Advertendum pariter, sine dubio cre-
dendum esse nunquam hoc permitti
Dæmoni circa eorum corpora, qui justì
mortui sunt; quia non decet, nec est
divine amicitie consentaneum: De aliis
verò fortasse aliquando id accidit, ra-
rò tamen exitimo id Dæmoni per-
mitti, quia non datur illi tanta licentia,
præsertim in Ecclesia Christi ad homi-
nes decipiendos.

Quantumvis autem ille velit pul-
cherrimam hominis similitudinem re-
præsentare, quæ Dei bonitas est, tan-
tum solet assumere quam, & qualem
Deus permittit, teste S. Chrysostomo
Homilia 4. de Lazaro, & idco vel ipso
invi-

invito fieri videmus, ut qui non obefcæ nimium mentis sint, semper si attendant, fucum queant deprehendere: Aut enim se ostendunt Dæmones humano corpore atro, illuviofo, squallido, fæ-tente, tetro, ac formidabili, faltem ob-scuro, nigro, sædoque vultu, naribus vel deformiter fumis, vel immanè aq-uilis, oris ritu sparfo, profundoque, lumi-nibus valdè abditis, flammantibusque, manibus, pedibusque obunciiis, & vul-turinis, strigofis brachiis, cruribusque, & admodum villosis, caprinis etiam, vel asininis tibiis, uno, vel utroque pe-de bifido corneoque; interdum, & so-lidungulo, interdum mutili pede al-tero, vel utroque: Demum staturà cor-poris numquam justà, ac decorà, sed cui semper adfit aliquid insolitæ notæ, & deformitatem, pravitatemque Dæ-monis preducentis.

Dices: Si Dæmon verum corpus hu-manum posset assumere, sequeretur nullum fuisse Christi Domini argu-mentum, quò Lucæ 24. dubitantibus Discipulis de ejus vera resurrectione, suadere voluit se non esse phantasma dicens, *Palpate, & videte, quia spiritus car-nem, & ossa non habet, sicut nunc vide-tis habere*, quibus verbis eos invitabat ad palpandum, & videndum, quòd ipse carnem, & ossa haberet qualia non ha-bent spiritus etiam dum assumunt cor-pora: Ergo censet spiritus non posse assumere sibi corpus, quod sit palpabi-le, carnisque mollietiem, ac ossium du-ritiem habeat: sed tale foret cadaver humanum à Dæmone assumptum: Ergo illud non potest assumere, vel Christi argumentum non multum videbatur urgere.

Nepo consequentiam: Intentum enim Christi tantum erat suadere Apostolis se non esse phantasma, qualem ipsum existimabant, eo quòd viderant eum, januis clausis ingressum; quod rei cor-poræ tam vivæ, quam mortuæ repu-gnabat, quia penetratio corporum na-

turaliter fieri non potest: Idcirco pro-bare voluit posse illos contactu sentire, & dijudicare ipsum verum habere cor-pus, non verò phantasticum. Et quia palpatione tantum poterant corpus ef-ficere cognoscere, non verò ejus esset cor-pus, ideo jubet eos videre, & tangere vulnèra in ejus corpore impacta, qui-bus deprehendere licebat ipsum illum esse, qui triduo ante crucifixus fuerat.

CONCLUSIO QUARTA.

Angelus non assumit corpus per mo-dum formæ informantis: Nec per modum unionis hypostaticæ: Sed velut motor ipsum regens, & dirigens in qui-busdam operationibus eliciendis: Ita sub-tilis Doctor dist. 8. num. 2. ubi cum quæ-sivisset, quid sit Angelum assumere cor-pus, respondet; *Hoc quidem, inquit, non est informare, nec etiam ipsum sibi hypostaticè unire, sed tantum esse in-trinsecus motor corporis: Nam tunc assu-mit, id est ad se sumit; quia ad operatio-nes proprias sibi explendas utitur illo sicut instrumeto. Nec dicitur ista assump-tio fieri, quando corpus assumptum mo-vetur motu progressivo; quia talis motus non congruit fini, propter quæ assumi-tur tale corpus. Quibus Doctor resolvit primò, Angelum non uniri corpori, tamquam forma, quia aliàs non esset substantia completa, sed incompleta, non minùs quàm anima; imò esset ani-ma; quia si posset informare aliquid corpus, maximè corpus organicum, quippe cum illud sit aptius ad infor-mationem, sicque esset actus corporis organici.*

Infert secundò, Non assumere corpus hypostaticè cum saltem naturaliter talis hypostatica unio fieri nequeat; Dæ-mones autem tantum virtute naturali corpora assumunt: in bonis autem An-gelis non videtur admittendum esse miraculum quoties hominibus appa-rent; res enim per se nimium levis est ad statuendum tam grande miraculum quale est ipsa unio hypostatica.

Con-

Concludis tertio, Angelum assumere corpus, nihil aliud esse, quàm illi assistere tamquam motorem in mobili, in ordine ad operationes tales exercendas verè, vel apparenter, quibus Angelus videri possit corpus assumptum informare: In quo conveniunt pariter cæteri Theologice Principes, maxime S. Thomas *quæst.* 57. *art.* 2. & Seraphicus. Doctor in 1. *dist.* 8. *art.* 3. *quæst.* 2. Nihil enim videtur ultra requiri ad illam corporis assumptionem, quàm quòd Angelus intrinsicè sic moveat corpus assumptum, quod utique patebit assignando rationem singularium partium hujusmodi dictæ assumptionis.

Primo namque dicimus *Angelum esse intrinsicè motorem*, quia si esset extrinsecus motor non propriè diceretur assumere corpus ad se: similiter si esset intimè præsens corpori, sed non in ordine ad ipsum movendum, sanè non diceretur assumere; sicut nec anima præsens corpori potest assumere corpus, nec unum corpus simul penetratum cum alio corpore, dicitur alterum corpus assumere, etiam si virtute sua propria poneret se penetrativè simul cum ipso. Additur *in ordine ad operationes tales exercendas*, quia non sufficeret, quod esset intimè præsens per modum motoris localis, aliàs Angelus præsens Cælo, & ipsum movens localiter, dici deberet assumere Cælum: Similiter Angelus, qui Prophetam Abacuc cinctum deportavit ad lacum leonum, in quo Daniel Propheta erat reclusus, diceretur eum verè assumere, quod tamen omnes Interpretes negant; hæc namque translatio fuit quidem corporis deportatio, non autem assumptio. Diximus *veras, vel apparentes*, quia aliqua ex illis operationibus, quæ apparent, tales in rei veritate non sunt; nam auditio sensibilis, & tactus corporeus, ac visio ocularis, quas putamus Angelos in assumptis corporibus exercere, non sunt veræ

actiones, sed tantum apparentes.

Denique colligit Doctor, non sufficere ad illam assumptionem corporis ab Angelo, quòd moveat illum localiter; sic enim Intelligentiæ motrices assumerent sphaeras cælestes, quas movere dicuntur. *Adde* quod corpora adhuc maneant assumpta etiam quando Angelus ab omni motu cessat. Ut ergo verè dicatur assumere corpus, quod movet motu progressivo, intelligi debet de motu progressivo, vel qui sit signum vitæ, vel qui significet Angelum esse corpori intimè præsentem, & eum intrinsicè moventem.

QUAESTIO SECUNDA.

An, & quas Angeli operationes vitæ edere possint in corporibus assumptis?

NOTANDUM I. Actiones vitales maxime duplicis esse generis, quarum aliqua dicuntur esse productivæ terminis intrinsicis, qui dicatur vitalis, quia vel essentialiter pendet ab intrinseco principio vitæ tum proximo, tum etiam principali; vel saltem naturaliter non potest alio modo fieri, cujusmodi sunt omnes actiones sensuum externorum, & internorum, atque etiam appetitus sensitivi. *Aliæ* verò sunt actiones viventium, quæ licet ab ipsis fiant vitali modo, & sub ea ratione tales sint, nihilominus producunt terminos, qui per actionem non vitalem fieri possunt, ut sunt motus localis progressivus, vocis formatio, & similes, quæ dici possunt actiones vitales quoad modum, & non quoad substantiam, ut à prioribus distinguantur, quæ essentialiter, seu in sua substantia vitales dici possunt.

Notandum 2. ex Seraphico Doctore in 2. *dist.* 8. *art.* 3. *quæst.* 2. quòd sensatio possit accipi tribus modis, nempe communiter, propriè, & magis propriè.

Com-

COMMUNITER SENTIRE, idem est, quod rem ut præsentem cognoscere, secundum quem modum accipit Augustinus ad Paulinam in libro de videndo Deo. *Secundò modò*, sentire idem est, quod rem ut hic est nunc cognoscere, & sic accipit Boetius, cum dicit, quòd sensus est particularium, & intellectus universalium. *Tertiò modò*, sentire idem est, quòd speciem existentem in materia, præter materiam mediante organo corporeo suscipere, & sic accipit Philosophus in *secundo de anima*, cum dicit, quòd *sensus est susceptivus specierum in materia præter materiam*. Duobus prioribus modis non differt sensus ab intellectu re, sed ratione tantum, & hoc modo admitti potest sensatio in Angelo; Angelus enim per suam potentiam intellectivam cognoscit rem, ut præsentem, & ut hic, & nunc dirigendo aspectum per ipsam. Tertiò verò modo differt potentia sensitiva ab intellectiva, re & ratione, & illo tertio modo, sensus est potentia alligata corpori, & hoc modo spiritui Angelico non convenit. Ita S. Bonaventura.

Notandum tertiò ex eodem *ibidem*.
 „ Quòd cum anima triplici modo cor-
 „ pori uniatur, nempe per modum
 „ moventis, aut perficientis, aut utro-
 „ que modo; ita triplex genus opera-
 „ tionum erga corpus habet: *Quædam*
 „ enim sunt operationes, quæ conse-
 „ quuntur ipsam animam in corpore,
 „ ut est motrix: *Quædam* ut perfectio;
 „ *Quædam* partim sic, & partim sic.
 „ Differenti autem modo exercet ani-
 „ ma in corpore operationes, quæ se-
 „ quuntur ipsam, ut motricem, & ut
 „ perfectionem: Nam operationes, quæ
 „ consequuntur animam, ut motricem
 „ sic exercet per corpus, ut illas eas-
 „ dem exerceat in ipsum corpus: Quia
 „ non solum movet alia corpora, sed
 „ etiam corpus proprium: Operatio-
 „ nes verò, quæ consequuntur animam
 „ in corpore, ut est perfectio, sic exer-

„ cet anima in corpore per corpus, ut
 „ exerceat eas cum corpore, sicut pa-
 „ tet, quòd anima clauso oculo corpus
 „ aliquid videre non potest. Tercias
 „ autem operationes exercet in corpo-
 „ re quasi utroque modo: & ideo pri-
 „ mæ, competunt animæ, ut est mo-
 „ trix differens à mobili: Secundæ ve-
 „ rò, ut est forma juncta materiæ.

„ Quoniam igitur Angelus unitus
 „ corpori assumpto non ut perfectio,
 „ sed ut motor, ideo primas operatio-
 „ nes exercet plenè in eodem corpore:
 „ secundas minimè, tertias verò quo-
 „ dammodo sic, quodammodo non.
 „ Et hoc melius patet si descendamus
 „ exemplificando: Motus progressi-
 „ vus, sive quicumque alius sit mem-
 „ brorum exteriorum, est ab anima in
 „ corpore, ut est motor, vel motrix, &
 „ ideo competit Angelo: Sentire verò
 „ per organa corporis competit ani-
 „ mæ, ut est illorum organorum per-
 „ sectio; sicut enim anima perficit to-
 „ tum corpus, ita visus, sive potentia
 „ visiva perficit oculum, & hæc non
 „ competit Angelo in corpore assump-
 „ to: Ridere verò est operatio, quæ
 „ partim competit animæ, ut est mo-
 „ trix, partim ut est perfectio, ibi
 „ enim est quædam cordis ex hilaratio,
 „ & hæc est ab anima, ut est perfectio,
 „ est etiam ibi quædam genarum mo-
 „ tio, & hæc est ab anima, ut est mo-
 „ trix. Ratione primi non convenit
 „ Angelo: sed tantum ratione secundi:
 „ ita Seraphicus Doctor, cum quo Subti-
 „ lis in pluribus convenit, ut aperiet.

CONCLUSIO PRIMA.

Angeli in corporibus assumptis pos-
 „ sunt exercere operationes vite,
 „ quæ sunt per motum corporis: Non verò,
 „ quæ a facultatibus sensitivis, aut vege-
 „ tativis necessario proveniunt. Ita Doctor
 „ supra laudatus num. 4. ubi *primam*
 „ conclusionis partem sic explicat. Dico
 „ quòd motum localem potest causare An-
 „ gelus in corpore assumpto, & ita motus

qui

qui videtur esse progressivus; motum etiam qui esset inspirationis, & respirationis, motionem palpebrarum, & manuum, & similitum; & ratio est, quia non est aliquod corpus ita imperfectum in universo quin habeat in virtute sua aliqua aliquid, ut patet de gravi respectu centri. Ita Doctor. Quibus constat eum concedere, quod omnem actionem vitalem, quæ sit per motum corporis, possit Angelus elicere in corpore assumpto. Quod probat, quia non est deneganda ulla virtus substantiæ spirituali, quæ corporeæ conceditur: Sed virtus acquisitiva loci conceditur corporibus: Ergo, & Angelis. Verum fateor, quod hæc probatio, solum levis conjectura sit: Siquidem posset hæc virtus competere corpori, quamvis non competeret spiritui, nam plura corpori competunt, quæ spiritibus non quadrant, nullum enim est corpus, quod non possit producere aliquam qualitatem corpoream, tamen nullus spiritus, ut communiter supponitur, id potest efficere.

Vera ergo ratio cur Angelus possit hunc motum efficere, est quia potest corpus transferre de loco ad locum. Hoc autem præstare non posset, nisi pariter posset ipsum movere localiter: Potest ergo in corpore assumpto ambulare, &c. Hinc de Angelo Raphael legimus, quod cum Tobia gradiebatur, loquebatur, & alios corporis motus, & gestus efficiebat.

Secundam partem etiam ibidem indicat Doctor, nempe quod operationes, quæ necessariò proveniunt à facultatibus sensitivis, aut vegetativis, non possint edere Angeli in corporibus assumptis: idque primò de operationibus facultatum sensitivarum constat: Quia, inquit, illæ non sunt natæ recipi nisi in composito ex organo saltem perfectè mixto, & ex anima, in quantum habet potentiam perfectivam, quorum neutrum est ibi, nec scilicet

Tom. IV.

talis mixtio, nec anima perfectiens; & ideo simpliciter in tali corpore. composito, quod assumit, nulla est sensatio. Operationes etiam, quæ consistunt in verè agendo, cujusmodi sunt operationes vegetativæ, non competunt illi composito; quia vel illæ operationes natæ sunt esse compositi animati, quale non est ibi; vel natæ sunt esse corporis perfectè mixti, putà si caro generaret carnem; neutrum autem est ibi.

Quantum etiam ad actus vegetativos, qui apparent, si loquamur de vera nutritione, nihil ibi potest nutriri: Sed si loquamur de comestione, quæ præcedit nutritionem, illa non est nisi divisio cibi per motum localem maxillarum, & trajectio ejus in ventrem per motum localem; tunc potest fieri exhalatio, & resolutio in humorem, vel elementa; & isti motus locales possunt fieri circa corpus virtute activæ Angeli. Sicut autem dictum est de nutritiva, ita dicendum est de augmentativa, quia ibi nulla est nutritio, vel augmentatio: potest tamen esse vera juxta positio, si ipse velit subito alia elementa, quæ possunt imperfectè misceri, ad talem imperfectam mixturem apponere corpori suo, ut videatur crescere.

At si dicas, si comestio non sit operatio vitalis: Ergo non valet argumentum ad probandam veram Christi resurrectionem de comestione ejus cum Discipulis suis, quod est contra sanctos Patres.

Respondet. quod ad probandam resurrectionem ejus sunt multa alia argumenta in Evangelio efficaciora isto, & ita cum aliis bene probat, & si non per se tantum. Vel dico, quod erat comestio ordinata ad veram nutritionem, quia non est inconveniens, quod corpus gloriosum possit convertere corpus non gloriosum,

E e

in

„ in ipsum, sicut esse simul potest cum
 „ corpore non glorioso: Nec propter
 „ hoc est corruptibile, quia potest
 „ aliud convertere in se; posset enim
 „ Deus facere corpus gloriosum in
 „ minima quantitate, & illud augere
 „ per comestionem, nec tamen aliquid
 „ corrumpetur de nutrito, & aucto:
 „ in corporibus autem talibus assum-
 „ ptis non est nutritio, sed tantum ad-
 „ ditio, vel appositio. Ita Doctor.

Quibus tria maxime concludit, *Primum*, quod actiones verè sensitivæ, seu sensationes non possint elici ab Angelis in corporibus assumptis, quia illæ actiones requirunt organum vivum, vel tamquam principium effectivum, vel tamquam principium susceptivum, vel fortè tamquam principium productivum, & susceptivum: Ergo cum in corporibus assumptis non sint organa viva, aliàs corpus assumptum censetur vivificari per Angelum, adeoque Angelus esset actus corporis, & consequenter esset anima, ac substantia incompleta, & exigens connaturaliter esse in corpore, quæ omnia absurda sunt: Ergo nec illæ operationes sensitivæ verè, & propriè elici possunt in corporibus assumptis.

Infert secundò, quod comestio fieri possit ab Angelis, quatenus est cibi contritio, & trajectio ejusdem in partem internam, seu stomachum, non verò quatenus significat conversionem alimenti in substantiam aliti; nam inquit Seraphicus Doctor *diff. 8. art. 3. quæst. 1.* in cibatione, seu comestione perfecta, duplex est actio. Prima est cibi sumptio, & consumptio: Secunda est conversio, & unio ejusdem cibi cum substantia aliti. Prima, inquit, competit Angelis in corpore assumpto, non simulatè, sed verè, quia cibum sibi appositum verè sumunt, & consumunt: non ita secunda, nam cibus assumptus eorum indigentiam, vel deperditionem non restaurat: illa namque cibatio non

est in Angelis ex indigentia, qualis est in corporibus verè nutritis. Unde cibi illi ab Angelis assumpti, vel in aerem solvuntur, vel aliunde deportantur. Hac ratione dicebat Angelus Raphael ad Tobiam: *Videbar vobiscum edere; sed ego invisibili cibo utor*; nam dicendo *videbar*, indicabat, quod reverà cibum sumebat, dividebat, & trajiciebat in partem internam corporis assumpti, non verò illum convertebat in substantiam ejusdem corporis.

Infert denique Doctor, quod comestio facta à Christo post resurrectionem coram Discipulis, reverà poterat fieri per conversionem alimenti in ejus substantiam, adeoque esse vera nutritio; quia nempe non videtur inconveniens, quod corpus gloriosum, de potentia absoluta, nutriri possit absque deperditione alicujus partis prius habitæ. Quam sententiam immeritò, & absque ulla prorsus ratione erroris notavit Suarez lib. 4. cap. 39. propterea quod inquit, nimia videatur, aut saltem temeraria, tum quia inquit, est contra communem consensum sanctorum Patrum, & Ecclesiæ; tum etiam quia est contra impassibilitatem, vel perfectionem corporis resurgentis.

Verum utraque hæc ratio, sicut, & illius censura infusa prorsus apparet, primò namque gratis fingit illam esse contra sensum Ecclesiæ, quippe cum hæc de re, ne verbum quidem apud Patres legatur. Secundò falsò supponit, quod nutritio fieri non possit absque deperditione partium præcedentium; quis enim Philosophorum præter Suarem hæc aliquando somniavit. Nutritio quidem fit per aggenerationem novæ partis substantiæ, non autem necessariò infert deperditionem præcedentium. Nec plus veritatis habet id quod rursus opponit, nempe quod si nihil deperditum fuit per comestionem Christi post illius resurrectionem, consequens est, quod ejus corpus fuerit incom-

completum, aut quod per aggeneratam substantiam factum fuerit quodammodo monstruosum, quippe cum redundante substantiæ portionem haberet.

Respondeo namque, quod cum aggenerata illa substantia fuerit modica; inde Christi Domini corpus quid exuberans, & ultra naturalem sortem ac iustam proportionem habere dici non potuerit. Nec pariter inde Isequebatur ipsum fore passibile, siquidem nihil ex ipso per illam nutritionem deperibat, Vana est ergo illa Suaris censura.

Dices Tertullianus lib. 3. adversus Marcionem qui contendebat Christi Domini corpus fuisse tantum phantasticum, non autem verum & solidum, idque probabat ex eo, quod Angeli in phantasmate putatiæ Carnis egerint apud Abraham, Lot, & tamen verè sint, & congressi, & passi, & operati quod mandatum eis fuerat. Reponit Tertullianus, Scito nec illud tibi concedi ut putativa fuerit in Angelis caro, sed vera, & solida substantia humana: si enim difficile non fuit illi putativæ carnis veros, & sensus, & actus exhibere, multò facilius habuit veris, & sensibus, aliis veram dedisse substantiam carnis. Concedit ergo Tertullianus Angelos sicut, & verum corpus, sic, & verè vitales corporeas operationes habuisse.

Respondeo Tertullianum prorsus fuisse dubium hac in solvenda questione, utrum Angeli vera corpora, verasque corporeas vitales operationes aliquando habuerint, etenim negativam partem docet lib. de carne Christi cap. 6. ubi de Angelis ait. *Constat* inquit, *Angelos carnem propriam non gessasse, ut putà nature substantiæ spiritualis, & si corporis alicujus, sui tamen generis: In carnem autem humanam transfigurabiles ad tempus, ut videri, & congruere cum hominibus possent.* Et apertius lib. de resurrectione carnis cap. 62. *Quia Angeli*, inquit, *aliquando tanquam homines fuerunt, edendo, bibendo, & pedes lavacro*

porrigendo: Humanam enim superficiem induerant sub a intus substantiâ propriâ.

Hoc itaque sufficere visum est Tertulliano, quod dogmati Apellis non consentiret qui ex aerea substantia Angelos creatos dicebat: *Qualia autem fuerint ab eis assumpta corpora, vera an larvata in dubium habuit. Quod* certè mirum videri non debet, cum ipsemet beatus Augustinus hanc perplexam questionem referens lib. 3. de Trinitate, cap. 1. fateatur illam excedere vires intentionis suæ; quem sequutus est Beatus Bernardus homiliâ 5. in Cantica. *Ceterum*, inquit, *utrum ipsi spiritibus naturalia corpora sint, sicut hominibus sua, an verò ipsi spiritus corpora cum opus est, sumant? Rursumque expleto opere ponant in eandem, de qua sumpta sunt, materiam dissolvenda? Nolo ut hanc requiratis: videntur Patres de huiusmodi diversa sensisse, nec mihi perspicuum est unde alterutrum doceam, & nescire me fateor: sed, & nostris profectibus non multum conferre arbitror harrum rerum notitiam.*

Quantum autem ad locutionem, quam frequenter efformant Angeli in corporibus assumptis; Alenis noster. *questione 35. memb. 4.* eis tribuit virtutem, quā non solum per corpus assumptum velut per instrumenta similia organis deservientibus humanæ locutioni, sed etiam sine ullo prorsus assumpto humano corpore, possint vocem humanæ similem efformare, quod etiam testatur omnis Antiquitas, quæ; & oraculorum non solum in statuis, & idolis, sed etiam in antris, arboribus, bestiis, imo calvariis à Dæmone editorum meminuit.

Tamen existimarem verius, formatam ab Angelis locutionem non esse propriè dictam, siquidem hæc actio, non minus quàm supradictæ, vitalis est; non etiam propriè loquendo dicit tantum sonum in aere formatum, sed etiam modum illius formationis im-

portat, nempe, quòd fiat immediate per propria organa vitalia, & ex motione phantasie, ac cum intentione aliquid significandi. Quamvis autem Angelus possit formare in aere, vel in corpore assumpto sonum similem illi, & materialiter ejusdem rationis cum sono vocis humanæ, tamen non potest eundem effingere formaliter; quippe cum sonus ille locutionis Angelicæ non fiat per vitalia organa, nec per immutationem phantasie, ac cum intentione aliquid significandi. Solum itaque loquuntur Angeli in corporibus assumptis ad eum ferme modum, quò quis artificiosè quodam instrumento, putà tibia, vel tuba sonum vocis humanæ exprimat, vel quomodo cavæ valles, & murorum, icissuræ, nec-non, & antri foveæ exceptam ac repercussam vocem, articulatè admodum reciprocant;

Advertendum est autem quòd Dæmones in corporibus loquentes plerumque utuntur voce stridula, subsibilante, confusa, obscurà, debili pusilla, & quasi ex dolio, vel per testam rimosam, ut fatetur Remigius lib. 1. de *Demonologia cap. 8.* Potest autem Diabolus, quando in corpore assumpto apparet, & loquitur, videri, & audiri tantum à quibus optat, ceteros verò omnino latere: idque naturaliter; si nempe quantum ad nonnullos, & non quoad ad alios, ex parte objecti vel organi impedimentum afferat, putà si medium ita præpediat, ut per illud species ad oculum, vel auditum non perferantur: vel si ipsas similitudines, ad alios dirigi prohibeat, ad eos verò à quibus audiri, & videri vult, fiat simulachra, & sonos liberè commicare, & imaginationem eorum ad nulla alia obducatur.

CONCLUSIO SECUNDA.

Angeli in corporibus assumptis non possunt reverà per se generare aliquod animal perfectum ita communiter Theologi cum Doctore supra laudato numero 5. Quantum ad generationem,

inquit, dicendum quòd illa fit virtute seminis decisi à mare in feminam in qua servatur virtus patris, sicut communiter dicitur: Si ipse potest illud semen ab aliquo succumbendo recipere, & ferrare illud in sua naturali qualitate conveniente suæ generationi naturali, quousque illud transfundat; ipse nihil facit ibi, nisi quia primò recipit in corpore illo assumpto, illud quod postea movet localiter in aliquam cui est incubus: & si illud semen antequam sit receptum, in matrice non amittat suam qualitatem naturalem potest per ipsum fieri generatio, sicut si immediate transferret reverà primo decidentem in eandem matricem. Et hoc modo attribuitur non quidem Angelo bono, quia absit quòd talibus vilibus se immisceat; sed Dæmoni, generare, quia idem primò succubus, & postea incubus semen à decidente primò transfusum recipit, & deinde transfundit illud in matricem.

Idem habet seraphicus Doctor *eadem dist. art. 3. quæst. 1.* ubi probat Dæmones non posse per se generare primò, Quia generatio est productio similis in specie, sed Dæmon assumens corpus non assimilatur homini, sed Dæmoni: Ergo non potest hominem generare. Deinde ut fiat generatio necesse est secundum Medicos, quòd concurrat triplex spiritus naturalis, vitalis, animalis; & secundum Philosophum triplex calor, videlicet calor animæ, calor cæli, & calor elementis: Ergo cum Dæmon nec spiritum animale, nec calorem animale in corpore assumpto possit habere, videtur quòd nullo modo possit generare. Denique generare non est actus animæ, & corporis divinum, sed conjunctum; sed ex Dæmone, & corpore non fit unum: Ergo nunquam potest per corpus exire in actum generandi.

Sub-

Subdit autem; quòd duo concurrant ad generationem, nempe facultates, & seminis constitutio, nec-non, & ejusdem seminis transfusio, & susceptio: „ Primum, inquit, est solius illius cui „ Deus dedit vim propagativam, & „ hoc nullo modo competit Dæmoni- „ bus assumentibus corpus; Secundum „ verò scilicet seminis susceptio, & „ transfusio potest eis competere; Pri- „ mò enim succumbunt viris in specie „ mulieris, ut ex eis semen pollutionis „ suscipiant, & quadam sagacitate, „ ipsum in sua virtute custodiunt, & „ post modum, Deo permittente, fiunt „ incubi, & in vasa mulierum trans- „ fundunt ex qua transfusione homi- „ nes generari possunt.

Hanc ipsam veritatem plurimis exemplis suadet Delrio lib. 2. *Magiarum questionum quest. 15.* Vetusitas enim, inquit, à Dæmonibus specie humana larvatis obrudit genitos suos *semi-Deos, Hercules, Serpedones, Servios Tullos, Anglia Merlinum, Pannonia Hunnores, Arlunis strigibus Gothicis, & Faunis natos.* Helinandus lib. 4. apud Belvacensem, affirmat *Clivensium* familiam excitatam fuisse à Dæmone succubo. Chiesia cap. 27. p. 2. *br. st. Perus.* scribit in Hispaniola solitum *Croceton* Dæmonem misceri mulieribus, & ex eo naus bicornes nasci.

Hanc ipsam veritatem confirmat sanctus Augustinus in *libris de Civitate Dei*; Licet enim lib. 3. cap. 2. dubius dixerit, *Utrum potuerit Venus ex concubitu Anchisis Eneam parere, in medio relinquamus; Nam pene talis questio in Scripturis oritur, quà queritur utrum prævaricatores Angeli cum filiabus hominum concubuerint? Unde natis gigantibus, idest nimium grandibus, & fortibus viris, tunc terra repleta est;* Tamen lib. 5. cap. 23. questionem determinat in hæc verba. *Creberrima fama est, multisque se expertos, vel ab eis qui expectant de quorum fide du-*

bitandum non est, se audivisse confir- mant, *Silvanos, & Faunos; quos vulgus, Incubos vocant, improbos existisse mulieribus, ac earum appetisse ac peregisse concubitum;* & quosdam Dæmones, quos *Dustos Galli nuncupant, assidue hanc immunditiam, & tentare, & effecere pluries, talesque asseverant, ut hoc negare impudentia sit.* Hoc ipsum confirmat Glossa in illa verba Genesis: *Videntes Filii Dei filias hominum, &c.* ubi dicit non esse incredibile, non ab hominibus, sed ab Angelis, vel quibusdam Dæmonibus qui mulieribus sunt improbi, gigantes esse procreatos.

Probat etiam Guillelmus Parisiensis 3. *part. de Universo cap. 25.* ubi cum dixisset gentem Hunnorum ab hujusmodi Dæmonibus esse generatam, nec-non, & insulam Cypri totam populatam esse, & inhabitatam à filiis Dæmonum: inde pluribus demonstrat Dæmones posse homines gignere, assumpto, & transfuso nectum semine humano, sed etiam quorundam animalium, quæ quandam cum homine in generando convenientiam habent; quod utique confirmat hoc exemplò: „ Scito, inquit, quia in provincia Saxoniæ, Ursus quidam rapuit uxorem cujusdam militis, & detulit in speluncam in qua inhabitabat, ibique habuit eam diebus multis, & annis, genuitque ibidem filios ex ea, qui postea recuperata muliere illa, & restituta viro suo, vixerunt cum eadem muliere, & facti sunt postmodum milites: & cum essent veri homines, de natura ursina, hoc apparebat in eis, quod vultus eorum in similitudinem ursinorum vultuum aliquantulum declinabant, cognominacionem autem à Patre scilicet, *Ursus*, à quo geniti fuerant, vocati sunt *Ursini*.

Sciendum autem quòd Ursus in duobus assimilatur hominibus, videlicet in hoc quòd coeunt sicut con-
ju-

„ iugati; & cùm decoriati sunt, tota
 „ figura corporis simili appareret ho-
 „ minibus propter, quod, & multi esum
 „ eorum carnium abhorrerunt, vi-
 „ delicet tanquam esum carnium hu-
 „ manarum. Non igitur mirum si se-
 „ men Urinum etiam tanta similitu-
 „ dine humano semini appropinquet,
 „ ut ei etiam ad generationem conve-
 „ nienti conjunctione applicetur. Cui
 „ autem Intelligenti non est notum
 „ huiusmodi spiritus diabolicos, facile
 „ esse subito exhibere, & adhibere
 „ mulieribus, quas sic ludificant, semi-
 „ na animalium quæ cognoverunt ad
 „ generationem convenientia:

Ex his colligit infra, non improba-
 bilem esse sermonem famosum opinio-
 ne vulgatum de *Merlino*, qui in majori
 Britannia filius Dæmonis incubi fuisse
 dicitur, nec id esse impossibile. Quod
 autem idem Merlinus Propheta in ead-
 em regione habitus est, eo quod multa
 de futuris vaticinatus fuisse visus est
 propheticè, id contigisse ex instructione
 vel doctrina paterna, non immeritò
 credi potest; multa enim de futuris, &
 aliis absconditis certum est nosse Dæ-
 mones, & interdum aliis, nedum filiis
 revelare.

Addit insuper Dæmones incubos mul-
 lieribus pulchra cæsarie donatis magis
 infestos esse multiplici de causa; aut
 quia, inquit, in cultu ornatuque, ac tin-
 ctura crinium curâ nimia intendunt
 huiusmodi mulieres: vel quia pulchri-
 tudine illa inflammare spectantes in
 suam libidinem conari consueverunt:
 vel quia in eis insolenter mulieres glo-
 riantur. Et forsitan ad terrorem divinæ
 severitatis hanc tentationem à mali-
 gnis spiritibus sustinent, ut ab huius-
 modi cultu desinant, timentes viros ad
 suam libidinosam concupiscentiam in-
 flammare, dum ipsos Dæmones ad eam
 instigare, & provocare videntur.

Simile quid refert *Burchardus Ab-
 bas Basernenfis* in vita S. Bernardi c. 6.

ubi narrat, quod cùm sanctus ille Nan-
 netum venisset, invenit ibi mulierem,
 quæ à quodam petulante Diabolo vex-
 abatur. Apparuit autem ei lascivus
 ille Diabolus in specie militis valde
 pulchri aspectus, & in amorem suum
 intus suggestione latenti, extra locu-
 tione blandienti animum ejus falla-
 citer inclinavit. Cumque mulieris
 assensum obtinuisset, expansis bra-
 chiis, pedes ejus super una manuum
 suarum posuit; altera verò manu ejus
 caput operuit, sibi que eam foderis
 hujus signo dotavit. Habebat autem
 illa virum strenuum militem, sed
 hujus tam execrabilis commercii
 prorsus ignarum. Abutebatur ergo,
 etiam in eodem lecto eubante mari-
 to, invisibiliter impurissimus ille,
 adulter, & incredibili vexabat libi-
 dine.

„ Sex annis tantùm latuit malum,
 „ nec detexit mulier perditæ tanti cri-
 „ minis probrum. Septimo verò anno
 „ confusa est in seipsa, & exponit tum
 „ propter colluvionem tam continuæ
 „ turpitudinis, tum propter timorem
 „ Dei cujus iudicio singulis momentis
 „ timebat intercipi, & damnari. Con-
 „ fugit ad Sacerdotes, & piaculum
 „ constituit. Peragrat loca sancta, &
 „ implorat sanctorum suffragia; sed
 „ nulla ei confessio, nulla oratio, nulla
 „ elemosynarum largitio suffragatur,
 „ Quotidie, ut prius, & importunius
 „ à Dæmone infestatur. Denique in
 „ publicum tantum scelus effusum est:
 „ quo audito, & cognito maritus ejus
 „ contubernium execratur. Interea ad
 „ locum prædictum vir Dei cum comi-
 „ tatu suo advenerat; cujus, ut ad
 „ vit adventum infelix mulier, se ad
 „ pedes ejus tremebunda projecit.
 „ Aperit ei lachrymis perfusa passio-
 „ nem horribilem, & ludificationem
 „ inveteratam; & quod nihil ei profe-
 „ sbyteris imperata. Addit sibi ab op-
 „ press-

„ preffore suo adventum ejus prædi-
 „ ctum, & minaciter ei interdictum ne
 „ ante ejus iret præsentiam, quia nihil
 „ ei prodesset, & ipso (recedente Ab-
 „ bate) qui fuerat amator, crudelissi-
 „ mus ei fieret persecutor. Audiens,
 „ hæc vir Dei blandis verbis consola-
 „ tur mulierem; & de Cælo promit-
 „ tens auxilium, præcipit, ut die alte-
 „ ra (jam enim nox instabat) confi-
 „ dens in Domino revertatur. Rever-
 „ sa manè, cùm viro Dei blasphemias,
 „ & minas quas eadem nocte ab Incu-
 „ bo suo audierat, retulisset; nec cures,
 „ inquit, Vir Dei, minas ejus, sed
 „ tolle baculum hunc nostrum, & po-
 „ ne in lectulo tuo, & si quid potest
 „ agat. Egredietur mulier quod jussu sue-
 „ rat, & recubans in lectulo suo, signo
 „ crucis munita, juxta se baculum po-
 „ nit: Adest ille continuò, sed nec ad
 „ consuetum opus nec ad ipsum cubile
 „ præsumit accedere: minatur tamen
 „ acernimè, quod discedente viro Dei
 „ ipse in ejus supplicia reverteretur.
 „ Instabat dies Dominica, & voluit vir
 „ Dei per edictum Episcopi in Eccle-
 „ siam accersiri. Cumque ipso die ma-
 „ ximus populus ad Ecclesiam conve-
 „ nisset, inter Missarum solemnias co-
 „ mitantibus Episcopis Gaufrido Car-
 „ notensi, & Brictio Nannetensi, ip-
 „ se apud ambonem conscendit, &
 „ ut omnes qui in Ecclesia erant, ac-
 „ censas candelas in manibus teneant,
 „ locuturus edicit. Quod, & ipse cum
 „ Episcopis, & Clericis faciens, inau-
 „ ditos Diaboli ausus publicè aperit,
 „ & fornicatorem spiritum, qui in tam
 „ horrenda inquinamenta, etiam con-
 „ tra naturam suam exarserat, cum
 „ omnium fidelium, qui aderant sub-
 „ scriptione anathematizat; & autho-
 „ ritate Christi tam ad illam, quam ad
 „ omnes mulieres deinceps interdic-
 „ it accessum. Extinctis itaque Sacra-
 „ mentalibus illis luminibus, extincta
 „ est deinceps tota virtus Diaboli, &

„ mulieri post confessionem commu-
 „ nicanti numquam postea apparuit
 „ inimicus, sed irreversibiliter climi-
 „ natus aufugit.

Simile, quid refert Laurentinus Ana-
 nias lib. 4. de natura Dæmonis cap. 3.
 evenisse in Marrea regione, in qua haud
 multis ab hinc annis puella quædam
 forma venusta, & egregia, natalibus-
 que non minus clara, diu detractans
 conjugium, ventrem ferre reperta est;
 parentibus de eo, qui stuprum tale in-
 tulisset, sollicitè inquirentibus, sponte
 fatetur puella se. tam noctu quam in-
 terdiu venerem exercuisse cum adole-
 scente quodam; Quis verò, aut unde-
 nam veniret, aut esset ignorare. Ad
 quæ non potuere non parentes vehe-
 menter obstupefcere, angustiam animo ac
 affligi; à famula tandem hominem in
 cubiculo cum filia rem habere edocti,
 haud morà interposità ullà, facibus
 tædisque accensis, quod nox esset, ac-
 currentes, reclusis foribus monstrum
 horrendum ingens, ac omnem huma-
 nam fidem excedens, & maxime terri-
 bile à filiæ complexibus pendere vident.
 Sacerdotem è vestigio vitæ moribusque
 probatis accersunt, qui cùm in recita-
 tione Evangelii S. Joannis verba illa
 exprimeret, *Verbuni caro factum est*;
 Dæmon non sine maximo, ac horrendo
 excitato strepitu, terroreque incusso,
 & post se relicto, more nempe suo, dis-
 sparuit, cubiculi tectum simul auferens:
 At sæmina, hæc infelicitissima triduo post
 monstrum, non minus horrendum eni-
 xa est, quod ne in familie summam
 ignominiam aleretur, ac educaretur,
 extructa pro more pyræ flammis con-
 sumptum est.

Causa autem quare Dæmones se in-
 cubos, aut succubos efficiant, non est
 capeffendæ delectationis, aut carnalis
 voluptatis ratio; siquidem cùm sint puri
 spiritus, hujusmodi delectationem per-
 cipere non possunt: Sed hæc est potissi-
 ma, ut per luxuriæ vitium utriusque
 homi-

hominis naturam lædant corporis, & animæ, ut sic ad omnia vitia homines proniores existant.

Dices 1. Dæmon est expers vitæ, & origo mortis: Ergo nequit esse author, & origo actus vitalis.

Respondeo: Vim hanc vitalem non inesse Dæmoni, sed ipsi semini; sicut vis calefaciendi non inest scipho propinanti, seu tubo fundenti vinum, sed ipsi vino. Si autem queratur cujus filius existat homo sic genitus. Respondeo quod non est filius Dæmonis, sed filius hominis cujus est semen acceptum. Cum autem instatur quod nihil est superfluum in operibus Angelorum sicut, & naturæ: Id concedo: Sed eum infertur quod Dæmon potest indivisibiliter semen, & recipere, & infundere: Respondeo id esse verum; hoc autem potius operatur visibiliter, ut succubus, & incubus, ut sic per talem spurcitiam inficiat corpus, & animam viri, & mulieris.

Dices 2. Dæmon, & homo specie differunt: Ergo ex hac copula sequi nequit proles.

Respondeo: Consequentiam esse nullam, tum quia ex equo, & asina, & aliis specie discrepantibus animalibus Muli, Thoes, Leopardi, Pantheræ, & aliæ hybrides gignuntur. Tum quia generatio hic non tribuitur Dæmoni, sed homini cujus est semen, ut rectè ait *sanctus Thomas quodlibet 6to, articulo octavo ad sextum*, & ideo hic ex homine, sicut ex viro, & femina solitò nascitur homo.

Instabis: Generatio completur per virtutem formativam, quæ est in semine, corpore vivo resoluta: sed corpus à Dæmonibus assumptum, non est vivum: Ergo Dæmones generare non possunt. *Deinde*, principium gignendi est cor: Ergo cum Dæmon corde careat, ipsi pariter deest virtus cordialis calorem, ut oportet, temperans. *Denique*, semen non habet vim generativam nisi

quandiu calor animæ in eo retinetur: sed ipsum evanescere necesse est propter magnam distantiam, quò interdum deportatur Dæmone, &c.

Respondeo ad primum, Dæmonem hac in re se habere non per modum causæ principalis, sed instrumentalis, applicantis verum semen ad generationem necessarium: quod utique præstare potest, ut supra dictum est.

Ad secundum dico, sive à corde, sive à cerebro vis gignendi oriatur, spiritus genitalis ipsi semini est iustus in ipsa feminis ab humano corpore decisione: Dæmon vero hunc spiritum cum calore suo tantum conservat. Possunt enim Dæmones aliqua adhibere ad seminis conservationem nè calor vitalis evanescat: possunt etiam ita velocissimè moveri, & semen deportare, ut spiritus illi effluere non possint: Quibus patet responsio ad ultimam objectionem.

Dices denique, non esse credendum Deum concurrere ad huiusmodi actum, aut animam tali corpori ex huiusmodi coito nato infundere, & inchoato Dæmonis operi coronidem addere.

Respondeo Dæmonem, quoad naturæ operationem, hic humtaxat esse instrumentum, & applicare solummodò agens principale, quod est verum semen humanum: Deum autem concurrere ad ultimam dispositionem organici corporis ab humano semine nati: Accidentarium verò quid esse, & morale dumtaxat peccatum fagæ atque Dæmonis malitiam. Itaque Deus, ut author naturæ, juvat naturam, peccato verò cujus author non est, non adminiculatur. Adde quod, Si quid huiusmodi valerent argumenta, sequeretur neque ex fornicatione, neque ex adulterio, neque ex incestu prolem gigni posse.

Repones, diversam esse rationem, quoniam in his ordo naturæ servatur, non verò in illo Dæmonis hymeneo. verum hæc responsio non solvit no-

stram

fram replicam; ordo namque naturæ quantum ad physica generationis præcipua principia servatur, natura enim dumtaxat postulat, ut ex viri prolifico semine aptè mixto semini muliebri proles nascatur.

Quæres 1. An etiam ex viro incubo, & Dæmone succubo filii nasci possint?

Respondeo probabilius videri, quòd non, plura namque ad prolis generationem partumque matres quam patres suppeditant; requiritur enim tactus corporis, ut semen in matris utero in corpus organicum commutetur, & absolutissima illa humani corporis architectura perficiatur: Requiritur etiam continua vegetantisanimæ operatio in fœtu alendo, & alia penè innumera naturæ arcana; quæ omnia, utrum Dæmon in assumpto corpore præstare queat summè dubito, imò non posse reor. Hinc affirmabo constanter, quòd de *Pisavorum Comitum* ex *Melana Sirena*, & viro nobili oriundorum, Francorum nonnullæ historiæ referunt, sicut, & quæ de *Ursini familia* ex urso propagata supra retulimus ex *Guillelmo Parisiensi*, inter decantatas aniles fabulas esse reponenda.

Censerem igitur pueros quos legimus succubo Dæmone natos, vel supposititios fuisse alterius fœminæ veros partus à Dæmone furtim subductos: vel larvatos Dæmones sub specie parvuli recenter nati, & quasi per nutritionem, & lactationem ad modum veri pueri crescentis. Prioris generis exemplum plurimi Authores cum *Delrio lib. 2. qu. 15*; referunt de nobili quodam Bavaro, qui cum defunctam uxorem ferret impatientius, quadam nocte fœminam rediisse, seque resuscitatam dixisse, Dæmon assumpta specie defunctæ mulieris assuevit: qui postmodum quasi præfata mulier, cum suo marito convixit, & ex eo liberos suscepit: cum

Tom. IV.

autem maritus ille pluries à larvata illa uxore monitus, ut à convitiis, & blasphemis se abstineret; nec tamen vitam emendaret, die quadam in hujus viri conspectu ipsa ementita uxor evanuit, relictis ibi muliebri veste, & parvulis quos aliunde furtim acceptos quasi ex se genitos supposuerat.

Ad posterius autem fraudis Dæmonis induentis formam parvuli ex Dæmone succubo nati, exemplum refert *Ulricus Dialogo de Pitbonicii mulieribus cap. 6.*
 „ Quòd in regno Siciliæ imperante,
 „ Rogerio contigit, quòd quidam strenuus, & natandi arte peritus circa
 „ crepusculum noctis lucente Luna in
 „ mari balneans, mulierem post se
 „ tantem per crines apprehendit, esse
 „ putans unum ex sociis, qui cum vellet
 „ mergere; eam autem alloquens
 „ nullum verbum extorquere potuit,
 „ opertaque pallio in domum duxit,
 „ & tandem in uxorem solemniter accepit.
 „ Increpatus aliquando à socio
 „ quodam, quòd phantasma accepisset,
 „ expavescens arripuit gladiū, minatus
 „ in conspectu ejusdem mulieris filium
 „ quem ex ea susceperat interfectorum,
 „ nisi illa loqueretur, & diceret
 „ unde esset. Quid, inquit, vè tibi
 „ misero, utilem perdis uxorem dum
 „ cogis affari, tecum essem, & tibi bene foret, si injunctum mihi silentium
 „ tenere permisisses. Nunc autem,
 „ deinceps me non videbis, & mox
 „ evanuit. Puer autem crevit, maximum balneum frequentare cœpit,
 „ tandem una dierum phantastica illa
 „ mulier coram multis eundem puerum
 „ in eisdem fluctibus occurrentem
 „ rapuit, quem si verus filius fuisset,
 „ mare ad litus expellere debuisset.
 „ Hæc ille.

Ad hujusmodi fraudis Dæmoniæ probationem spectant parvuli ipsi, quos Dæmones mulieribus interdum supponunt, quasi ab eis genitos, quique vulgò *Cambiones* appellantur, idest

Ff

Cam-

Cambici, inquit Guillelmus Parisiensis *ultima parte de universo cap. 25.* quasi commutati, & à mulieribus parentibus pro filiis propriis suppositi. Ferunt autem eos adeo esse lacte insaturabiles, ut etiam quatuor nutricum rumis exhaustis, macillenti perseverent. Ponderosissimi tamen, & tandem post aliquot annos prorsus evanescent. Itali, ipsos à continuo vagitu *vagiones* apellant. Talem arbitratur Delrio fuisse puerum quem mendicis quidam per Galiciam summa cum defatigatione humeris bajulabat; cum enim mendicus postmodum comprehensus fuisset, confessus est puerum, Diabolum larvatum fuisse, qui sibi promississet omnes se ad eleemosinas ei conferendas pellecturum, quando sic circumferretur habitu pueri morbos, & fasciis involut.

Quæres 2. An Dæmones possint animalia per se producere?

R *Espondeo* 1. Animalia imperfecta putà muscas, vermes, ranas, & hujusmodi insecta, & alia, quæ ex putrefactione nascuntur, Dæmones posse producere celeriter; non quidem creando, sed applicando activa passivis, ita S. Aug. *lib. 3. de Trinit. cap. 7.* Probaturque innumeris propemodum exemplis, quibus constat Magos plerumque accepto à Diabolo pulvisculo in aerem projecto, statim producere diversas species locustarum, bruchorum, murium, & similium animalculorum varias pestes. Sic etiam possunt producere quosdam anseres imperfectiores, quales sunt qui gigni solent ex deciduis fructibus arborum in mari putrescentibus, vel ex lignis navigiorum putridorum.

Respondet 2. Possent etiam producere animalia, quæ perfecta vocantur; non quidem applicando activa passivis, quippe cum illa non nascantur ex putrefactione: sed ex prolifico parentum semine; sed illa posse producere eo mo-

do quo homines, excipiendo nempe ab animali semen emissum, ut Dæmon incubus, & post modum in aliud animal transfundendo, ut succubus. Possent etiam Dæmon animalia jam nata callidè subducere, & in locis remotis ubi nata videantur, fovere, alere, & respirationem efficere; siquidem non raro inter saxa reperiuntur non solum muscæ, mures, & similia imperfecta viventia; sed etiam interdum perfecta: refert enim Guillelmus Neubrigensis *Histor. Angelorum cap. 28.* quoddam in quadam lapidicina, petra ingens ferramentis scinderetur, apparuere duo canes capacem sui in eadem petra locum, replentes absque omni spiraculo, intellige perceptibili: videbantur autem esse ex eo canum genere quos leparios vocant, sed vultu truces, odore graves, pilorum expertes; & unus quidem eorum, ut dicitur, citò defecit, alterum verò stupendæ, ut ajunt, edacitatis Henricus Vvickonienfis Episcopus diebus plurimis in deliciis habuit. Subdit autem in alio lapide inventum bufonem catenulam auream circa collum habentem. Censeo huic catenulam à Dæmone additam; nam ipse bufo ibidem nasci potuit, nam in Carbonariis fodinis Leodicensibus, filicæ ingentes nonnumquam reperiuntur, quos vivi bufones conditi, ut in natiuitatis suæ cunis latebant. Ità Delrio *lib. 2. qu. 14.*

Quæres 3. An Dæmones possint corpora in aliam speciem mutare?

R *Espondeo* quoddam non, omnes enim, quæ leguntur hujusmodi permutationes, illusoriæ sunt, & deceptrices: Neque enim v.g. anima humana in formare potest corpus Belluinum, ut nec anima leonis corpus equinum, vel anima equi corpus humanum; quia quælibet forma substantialis, ut suum esse tribuat informando, requirit peculiaris, sibi que convenientes dispositiones, & or-

& organizationem corporis propriam, ideo anima definitur actus organici corporis. Unde fit ut nec ferina anima humanum corpus, nec humana ferinum queat informare.

Non poterit itaque anima hominis in ferinum corpus migrare illud informatura, multò minùs poterit, si sit cum corpore, animal immutari. Quod utique egregiè probat S. August. lib. 18. de Civitate Dei cap. 18. ubi loquendo de Iudificationibus Dæmonum, quibus Maga famosissima Circes dicitur mutasse focios Uliissi in porcos, ait, Nec sanè Dæmones naturas creat, si aliud tale faciunt de qualibus factis, ista vertitur quæstio; sed specie tenus, quæ à vero Deo sunt creata commutant, ut videantur esse, quòd non sunt. Non itaque solum animum, sed nec corpus quidem ulla ratione crediderim Dæmonum arte, vel potestate in membra, vel in lineamenta bestialia veraciter posse converti: sed phantasticum hominis, quod etiam cogitando, sive somniando per rerum innumerabilia genera variatur, & cum corpus non sit, corporum tamen similes mira celeritate formas capit: sopitis, aut oppressis corporeis hominis sensibus ad aliorum sensum nescio quò ineffabili modò figura corporea posse perducì, ita ut corpora ipsa hominum alicubi jaceant, viventia quidem, sed multò gravius, atque vehementius, quàm somno suis sensibus obsestatis. Phantasticum autem illud veluti corporatum in alicujus animalis effigie appareat sensibus alienis, talisque etiam sibi homo esse videatur, sicut talis sibi videri posset in somnis, & portare onera: quæ onera, si vera sunt corpora, portantur à Dæmonibus ut illudatur hominibus, partim vera onerum corpora, partim jumentorum, falsa cernentibus.

Nam quidam nomine Præstantius

patri suo contigisse indicabat, ut venenum illud per casum in domo sua sumeret, & jaceret in lecto suo quasi dormiens, qui tamè nullo modo poterat excitari: post aliquot autem dies eum velut evigilasse dicebat, & quasi somnia enarrasse, quæ passus est, caballum se scilicet factum, annonam inter alia jumenta bajulasse militibus, quæ dicitur retica, quoniam ad retia deportatur, quòd ita ut narravit, factum fuisse comperit: quæ tamen ei sua somnia videbantur. Indicavit, & allus se domi suæ per noctem antequam requiesceret vidisse venientem ad se quemdam Philosophum sibi notissimum, sibi quæ exposuisse nonnulla Platonica, quæ antea rogatus exponere noluisse, & cum ab eodem Philosopho quæsitum fuisset, cur in domo ejus fecerit, quod in domo sua petenti negaverat: Non feci, inquit, sed me fecisse somniavi: ac per hoc alteri per imaginem phantasticam, exhibitum est vigilanti, quod alter vidit in somnis. Hæc ad nos, non quibuscumque qualibus credere putarem indignum, sed eis referentibus pervenerunt, quos nobis non existimarem fuisse mentitos. Proinde quod homines dicuntur, mandatumque est litteris à Diis, vel potius Dæmonibus, Arcades in lupos solere converti, & quòd *carminibus Circe socios mutavit Uliissi* secundum istum modum, mihi videtur fieri potuisse quem dixi, si tamen factum est. Hæc S. Augustinus.

Refert Jacobus Springerus *parte secunda mali maleficarum quæst.* 2. quòd in civitate Salamina regni Cypri, cum juvenis quidam una cum cæteris à navi ibi apellente ut necessaria sibi ad victum compararent, ova à muliere venefica, & saga prætorio accepisset, unumque ex eis navem retendo comedisset, statim quasi

„ mente destitutus, & mutus effectus,
 „ quidnam sibi accidisset conjicere,
 „ non valens; dum vult navem subire
 „ repulsam patitur à sociis, eum ut
 „ asinum videntibus, & putantibus.

„ Quocirca ut monuerat mulier, ejus
 „ domum repetit, eique ad modum
 „ asini per triennium deservivit, ne-
 „ cessaria domus in lignis, & bladis
 „ asportans, quæ autem portanda
 „ erant, tanquam jumentum deporta-
 „ bat; hoc consolationis sibi relicto,
 „ ut licet ab omnibus aliis jumentum
 „ reputaretur, ab ipsis tamen maleficis
 „ conjunctim, vel divisim morantibus,
 „ ut verus homo humanitus conversa-
 „ sando in incessu, statu, & habitu
 „ agnoscebatur. Triennio igitur elapso,
 „ dum quodam die ante meridiem ci-
 „ vitatem præfatam intrasset, & mulier
 „ à longè sequeretur, contigit quan-
 „ dam Ecclesiam, in qua divina cele-
 „ brabantur, juvenem sic maleficatum
 „ præterire: qui audiens notam cam-
 „ panæ pro elevatione Corporis Chri-
 „ sti, ad Ecclesiam se convertit, & in-
 „ trare dum propter verbera, & expul-
 „ sionem non auderet, à foris genua,
 „ & crura posteriora in terram fixit,
 „ & anteriores pedes, id est manus si-
 „ mul junctas elevans ex capite asini-
 „ no, ut putabatur, Sacramentum in
 „ elevatione intuetur, quòd grande
 „ prodigium dum certi Januenses Mer-
 „ catores confpexissent, mirantes asi-
 „ num sequuntur, & inter se de miro
 „ opere conferentes, ecce malefica
 „ cum baculo asinum insequitur: &
 „ quia, ut præmissum est, hujusmodi
 „ maleficia illis in partibus plurimum
 „ præcantur, ad instantiam Merca-
 „ torum, per Judicem asinus cum ma-
 „ lefica capitur, interrogata, & quæ-
 „ stionibus exposita crimen fatetur, &
 „ ut ad domum redire valeat, juve-
 „ nem restituere suæ formæ promptit.
 „ Dimissa igitur, & domum regressa,
 „ juvenis ad pristinam formam redu-

„ citur, & ipsa denuò capta, debitam
 „ ultionem pro commissis suscepit, &
 „ juvenis ad propria cum gaudio re-
 „ meavit. Hæc Springerus.

Simile quid refert Palladius in vita
 S. Macharii, scribens quòd quædam ju-
 vencia ope cujusdam Judæi magicis
 artibus in equam ut videbatur conversa,
 deducta fuerit ad beatum Macha-
 rium cujus visum Diabolus non potuit
 ludificare: Licet enim omnes illam fi-
 liam velut equam conspicerent; illam
 tamen S. Macharius hac equina specie
 non larvatam intuebatur, suisque præ-
 cibus à Deo obtinuit, ut ab omni illa
 illusione esset libera; ipsique dixit, hoc
 ideo à Deo permissum fuisse malefi-
 cium, quòd illa negligentius Sacra-
 menta frequentaret, licet aliunde ho-
 nestè, ac devotè viveret.

Stupendum quid refert Delrio lau-
 dato loco, contigisse non ita pridem,
 juxta Dixmudam in Flandria, quòd
 cum mulier cauponaria cum quodam
 rustico quærimoniæ habuisset de præ-
 tio propter propinatam cervisiam sol-
 vendam, sthomacabunda ait, quòd illo
 die non posset scapham, quam ad flu-
 violi ripam reliquerat, conscendere,
 & à ripa contis depellere, quòd utique
 contigit ut minata fuerat mulier: Nam
 ubi vires omnes suas frustra impendisset
 ut scapham illam de ripa deduceret,
 duos tresve Milites in suppetias voca-
 vit, qui cum pariter diu frustra labo-
 rassent, tandem conspiciunt in scaphæ
 sentina luridum bufonem scintillantibus
 oculis eos intuentem. Non tulit
 unus militum, sed gladii cuspidem per-
 foratum ad guttur tumidatum in aquam
 injectit. Ille quasi ex animis in tergum
 pervolvitur ventre resupinato, vulnera
 natitanti imponunt cæteri alia, & re-
 pentè navis solvitur. Lætus rusticus au-
 xilliatore ad idem, unde recesserat, ho-
 spitium reducit; potum petit, præbet
 ancilla; quærit ille ubi hospita? Audite
 pessimè habere, & animam in lecto

agere. Quid, inquam, inepta, ebrium me putas? Vix media pars horæ elapsa cum ego illam isthinc sanam, & malam qualis tu reliqui? Eo, visurus quid hoc rei? Intrat in thalamum, invenit colum, & ventrem vulneribus confossum laceramque mulierem expirasse. Unde hæc, exclamat, vulnera? nescire se profiteretur ancilla, nec domo illam, quod sciat, pedem extulisse. Itur ad Magistratum: vulnera cæsum, punctimque illatâ, inveniuntur iisdem in locis, quibus bufonem, qui nufquam comparebat, milites distinxerant.

His itaque constat, veram non esse, sed tantummodo larvatam illam demutationem hominum, quam vel Magi arte diabolica, vel Diabolus ipse efficit. Idque diversimodè; nam solet aliquando aliud corpus substituere, & illis absentibus, & alicubi in loco abdito soporatis, ipse assumpto lupi corpore, vel ex aere formato, & sibi circumdato ista gerit, qui putant homines ab illo misero absente, & dormiente patrata. Quod stragemata à Sancto quodam cunctis manifestatum, narrat Guillelmus Parisiensis *ultima parte de universo cap. 13.*

„Erat, inquit, quidam Arreptitius, & per dies arripiebat eum malignus spiritus, & eò usque dementabat, ut crederet se esse lupum: in diebus autem arreptionis præcipitabat eum, Diabolus in locum absconditum, ibique relinquebat eum tanquam mortuum; tempore verò huiusmodi absconsionis intrabat Diabolus lupum, vel ipsemet in specie lupi ostendebat hominibus se, & faciebat incursationes terrificas contra homines, & animalia, ita ut à facie ejus fugerent, devorari timentes ab ipso. Erat quoque fama hominem illum lupum fieri per dies. Et hoc homo ipse credebat, sicut prædixi. Credebat insuper se esse lupum illum, qui faciebat incursationes huiusmodi. Quo audito venit vir sanctus in regionem illam,

„in qua hæc fiebant, prædicavit hominibus non esse verum, quod de homine illo credebant, videlicet quod lupus fieret: Adductusque ad locum, in quo jacebat quasi mortuus, ostendit hominem populo, qui venerat ad huiusmodi spectaculum; atque coram hominibus eo excitato, & à vexatione huiusmodi liberato, ostendit ei, & adstantibus lupum, quem homo ille crederet se esse, sicut etiam ipse coram hominibus, qui aderant, confessus est.

„Aliquando verò hominibus ipsis ferarum exuvias huiusmodi foras aptissime circumdat: quod fit quando illis dat lupinam pellem in trunco quopiam, cavæ arboris oculandam, ut ex quorundam confessionibus constat. Aliquando denique ex parte Magi aeream circumdat effigiem belluæ, & membra membris quoad patitur similitudo circumponens, caput capiti, os ori, ventrem ventri, pedem pedi, brachia brachiis accommodat. Hoc solet contingere cum ad hoc inunctionibus certis, vel solis verbis conceptis utuntur, quo sanè ultimo casu nihil mirum est, si post modum verè inveniantur saucii illis membris humanis, quæ in ferino corpore ictum exceperant; nam leviter cessit circumjectus aer, & vulnus vero corpori implantatus est.

Quod confirmat Bartholomeus Spineus *quæst. de Strigibus cap. 16:* Hujus etiam, inquit, apparentis conversionis Strigum in Catos, testis alius in hac civitate Ferrariæ Philippus nomine, artificio cerdo sub judiciali iuramento mihi asseruit hoc anno, strigem quandam ante tres menses ei imposuisse, ne prohiberet venire circa puerum (à se forte strigatum) quem curandum assumpserat, si quos blandientes, & alludentes videret catos. Eadem igitur die dum discessisset illa, viderunt post horam ipse, & uxor sua catum magnum, & hæc.

„Atenus ab eis inivsum, qui ad pue-
 „rum accedebat concito gradu: Quem
 „cùm ex timore parentes sæpiùs abe-
 „gissent, postremo contra venientis
 „vexationem ad impatientiam exar-
 „serunt: clausoque ostio, vir ille gra-
 „vissimè Catum hinc illinc fugientem

„diutius hasta percussit, & demum se-
 „nestram subiens, evasit. Ex tunc
 „autem strix illa vetula, toto contra-
 „cta, & vulnerata corpore per pluri-
 „mos dies lecto decubuit. Ita Spi-
 „neus.

DISPUTATIO TERTIA.

De Angelorum gratia, merito, & demerito.

CERTUM est duplicem Angelorum
 sicut, & hominum esse statum,
naturalem unum, quo in spiri-
 tualium rerum genere suum ordinem
 tenent. Alterum naturæ sublimiorem, ac
 Divinitati ipsi propinquiorem, qui gra-
 tiâ continetur, & gloriâ. Priorem
 quantum sicut, in duabus præcedenti-
 bus Disputationibus scrutati sumus, &
 referavimus: Posteriores verò in præ-
 senti Disputatione revelandum, & sol-
 vendum auspicamur. Constat autem
 naturam Angelicam sicut, & humanam
 capacem esse supernaturalis beatitudi-
 nis, quam nativis suis viribus assequi
 non possunt: Unde fit, duos fines ulti-
 mos, duosque ordines, seu rectitudines
 bonorum actuum esse in Angelis sicut,
 & in hominibus distinguendos: unum
 quidem naturæ suæ veluti debitum, ac
 proportionatum: alterum verò longè
 præstantiorem, omnemque naturæ ca-
 pacitatem excedentem, & in quem fines
 cæteri à rationali creatura intenti, ve-
 lut in ultimum illius scopum colli-
 neant.

His autem duobus finibus assequen-
 dis duo mediorum, & actuum ordines
 deferviunt: quædam enim media sunt
 tantum ordinis naturalis, quæ per se
 ad naturalem finem ultimum assequen-
 dum rationalem creaturam promovent;
 juxta modum ipsi proportionatum, &

naturaliter inditum: Alia verò sunt or-
 dinis supernaturalis, quibus ipsa ratio-
 nalis creatura ultra proprias vires ad
 finem sibi naturaliter indebitum, debi-
 tum tamen ad absolvendam omnimo-
 dam ejus perfectionem, & summam
 beatitudinem stabiliendam sublevatur.
 Ex quo etiam duplex distingui solet
 gratuitum donum, vel auxilium; unum
 quidem supernaturalis ordinis, quod
 in sua entitate, & productione omnem
 naturæ captum transcendit: aliud
 naturalis ordinis, datum tamen gratuito,
 & ultra exigentiam, ac naturæ debi-
 tum, necnon, & cum quadam resolu-
 tione, ac ordinatione ad supernatura-
 lem finem.

Hic autem maximè sermo fit de fine
 ultimo supernaturali, & mediis ad eum
 assequendum simpliciter, & absolute
 necessariis. Quocirca præsens Dispu-
 tatio sicut, & cæteræ tribus Articulis
 constabit: quorum *Primus* concessam
 Angelis ab eorum initio gratiam, &
 illius usum aperiet. *Secundus*, sancto-
 rum Angelorum erga Deum, & homi-
 nes obsequium referet. *Tertius* deni-
 que perduellium Angelorum demeri-
 tum, & peccatum indicabit,



ARTICULUS PRIMUS.

QUESTIO PRIMA.

De Gratia Angelis concessa.

An, & in qua Beatitudine creati fuerint Angeli?

SUMMA Dei rerum omnium Opificis providentia tria maximè in Creaturis quibuscumque finxit, & distinxit, videlicet, Naturam, Finem, & Inclinationem: Naturam quà constant, Finem in quem tendunt, ut in ejus ademptione quiescant; Inclinationem denique per quam in finem propendunt, & veluti nativo pondere rapiuntur. Hæc autem tria nedum naturalis, sed & præternaturalis ordo rebus inesse demonstrat. Lapis enim v. g. naturam habet corpoream ex elementis, maximè terræ, & aqua compactam: pro fine, terræ centrum, in quo velut in materno grāmio pacificè quiescit, & sibi ingenuum gravitatis pondus, quo veluti inclinatione, aut propensione quanto potest concito motu in terram fertur. Hæc eadem in ordine supernaturali cernere licet, etenim divina, ac beata Dei visio, & fructio finis est, ad quem tendimus: Gratia autem sanctificans nos Dei filios adoptivos constituendo in quadam præternaturali entitate, & statu nos instituit: Charitas autem, & cæteræ virtutes Theologicæ sunt ipsæ propensiones, & veluti cælestes alæ, quibus in Deum, tanquam in nostræ perpetuæ quietis centrum tendimus.

Hæc autem tria cum pariter in Angelis reperiantur, idcirco de singulis hoc in Articulo differendum est sequentibus in questionibus: quarum *Prima* aperiet, in qua beatitudine conditi fuerint Angeli: *Secunda* quam, & qualiter ad illam assequendam gratiam, obtinuerint: *Tertia*, quibus meritis, & virtutibus fuerint illustrati, ut illam beatitudinem possent obtinere.

NOTANDUM 1. Duplicem in Angelis distingui posse beatitudinem, Naturalem unam, quæ ultima est perfectio, quam Angelica natura per ingenitas sibi vires comparare potest suis præstantissimis operationibus, cognitione videlicet, & amore Dei, ut Authoris naturæ: Alteram Supernaturalem, quæ est ultima perfectio naturæ Angelicæ, excedens omnem ejus facultatem naturalem, quamque nonnisi beneficio divini auxilii eam supernaturaliter elevantis comparare potest: Hæc autem rursus duplex est, una viæ, altera patriæ; illa inchoata, hæc consummata; illa, quæ fit per cognitionem fidei, quæ Deum obscurè, & in ænigmatibus cognoscimus, & per infusum charitatis habitum diligimus; hæc quæ consistit in clara Dei visione, ejusque perfecta fruitione, qua potiuntur Animæ beatæ in cælis.

Notandum 2. Ad perfectam, & consummatam beatitudinem supernaturalem tria maximè desiderari. *Primum* est clara Dei visio, dilectio præstantissima, & fructio perfecta; beatitudo namque consistit in summi boni ademptione, & fruitione, quæ fit per cognitionem, & amorem. *Secundum* est, impotentia peccandi, cum enim peccatum summa sit miseria, consistere nequit cum vera, & perfecta beatitudine. Adde quod impossibile sit Deum intuitivo conspiciere, & tamè diligere, & non præferre eum aliis omnibus rebus, quæ voluntatem allicere possent, & à Deo avertere. Tantæ enim est excellentiæ summa illa Dei majestas, ut clarè visa in sui amorem præstantissimum voluntatem creatam rapiat, idque toto conatu, & tanta necessitate, ut ab ejus amore nec diverti, nec revocari possit, sub-

subindeque nec qui ita afficitur peccare queat. *Tertium* est perpetuitas, ac invariabilitas beatifici status, alioquin vel metus erit, & tristitia, si beati se à tali statu lapsuros intelligant; vel error, si perpetuò mansuros credant, vel anxietas, & inquietudo si dubii sint, & nesciant, quæ futura sit illius status fors; hæc autem omnia, ut apparet, veræ, & perfectæ beatitudini repugnant, adeoque status ille debet esse perpetuus.

Notandum 3. Hac in resolvenda questione, maximè duplicem esse oppositam Authorum sententiam: sunt enim qui volunt Angelos à suæ creationis exordio perfectæ essentiae divinæ visione, non permanente, sed transeunte fuisse donatos, ita quòd saltem per nonnulla temporis instantia omnes Angeli tam boni, quàm reprobi jucundam Dei fructionem, quæ fit per cognitionem, & amorem habuerint, idque firmare nituntur plurimis S. Augustini sententiis in objectionibus proferendis. *Verum* secunda sententia omnino opposita est omnium ferè Theologorum assensum nullo Angelos creatos fuisse de facto in statu beatitudinis supernaturalis, quamquam nonnulli cum Doctore Subtili censcant, eos ita creati potuisse.

Tria igitur sunt maximè hic resolvenda. *Primum*, quòd Angeli omnes creati fuerint in beatitudine naturali. *Secundum*, quòd eorum nullus supernaturali beatitudine in primo suæ formationis instanti donatus fuerit; *Tertium*, quòd eam tamen supernaturalem beatitudinem ab ipsomet suæ creationis exordio, si Deus ita voluisset, etiam potuisset obtinere.

CONCLUSIO PRIMA.

Angeli omnes creati fuerunt in statu beatitudinis naturalis. Ita omnes Doctores Scholastici cum Subtili in 2. disp. 3. qu. 9. num. 8. Ubi probat Angelis concessam fuisse speciem divinæ essen-

tiae representativam; qua distinctè Deum cognoscebant. Bene quidem, inquit, possibile est habere cognitionem distinctam licet abstractivam; nam abstractiva distinguitur in confusam, & distinctam, penes rationem aliam, & aliam cognoscendi; & istam talem speciem representantem essentiam divinam intellectui Angelico, non videtur inconveniens, ponere intellectui Angeli inditam, esse à principio: ita quòd licet ipsa non sit naturalis intellectui hoc modo, quòd iste intellectus possit ex naturalibus suis eam acquirere: Neque etiam, quòd possit eam habere ex actione alicujus objecti agentis naturaliter, quia non potest eam habere præsentitate alicujus objecti finiti moventis, nisi essentiae divinæ tantum, quæ nihil aliud a se causat naturaliter naturali causatione. Tamen sicut perfectiones datæ Angelo in sua prima creatione, licet non necessario sequantur naturam ejus, dicentur naturales, distinguendo contra merè supernaturales scilicet gratiæ, & gloriæ: ita ista perfectio datæ intellectui Angelico, qua essentia divina esset ei præsens distinctè licet abstractivè, potest dici naturalis, & ad cognitionem naturalem, Angeli pertinere, ita quòd quidquid cognoscit Angelus de Deo virtute hujus speciei, aliquo modo cognoscit naturaliter, & aliquo modo non naturaliter, in quantum ista non est principium gratuitæ actus, nec gloriosi; non naturaliter autem, in quantum quòd ad istam non posset attingere de naturalibus, neque aliqua actione naturali.

Quibus Doctor apertè docet datam fuisse Angelo speciem abstractivè representantem Deum, non tantum confusè, sed etiam distinctè, & quæ esset naturalis simul, & supernaturalis, naturalis inquam, quatenus naturale dici-

ci-

citur illud omne, quod non est ordinis gratiæ, aut gloriæ: supernaturalis verò, quia à solo Deo infunderetur, nec eam intellectus Angelicus posset acquirere.

Quòd autem probabile sit Angelis concessam illam speciem ab initio eorum creationis, probat *primò* quia videtur hominì ante lapsum concessam aliqualem notitiam Dei distinctam, quam habere non potuit absque tali specie: ergo cum Angeli cognitio, & beatitudo naturalis præstantior sit, quàm hominis, multò magis Angelis videtur illa species concessa. *Probat secundò* ex eo quòd S. Augustinus concedit in Angelis fuisse cognitionem creaturarum in Verbo, seu matutinam, prius quam ipsis concederetur vespertina, quæ est cognitio rerum in proprio genere: ait enim lib. 4. super Genesim cap. 30. *Tunc non ad diem pertinet, non dies ad noctem: cum sublines, & sancti Angeli illud, quod creatura in ipso Creatore noverunt, referunt in ipsius honorem, & amorem, in quo æternas rationes, quibus creata est contemplantur ea, quæ concordissima contemplatione sunt unus dies, quem fecit Dominus: cui conjungitur Ecclesia, ex hac peregrinatione liberata, ut & nos exultemus, & latemus in eo*; Ex quibus infert Doctor, quòd cognitio ista in Verbo naturaliter præcessit cognitionem creaturarum in genere proprio, Sed inquit, tunc erant Angeli in statu innocentie, & non beati, quia aliqua morula temporis fuit inter creationem, & lapsum eorum: erat igitur aliqua cognitio Angelorum matutina, scilicet creaturarum in Verbo existentium in naturalibus, aut saltem non beatorum. Hæc autem cognitio distincta haberi non potuit absque specie impressa: ergo verisimile est illam speciem fuisse Angelis concessam, quàm Deum distinctè cognoscerent.

Probatursuper. Angeli tam boni, quàm mali, à suæ creationis exordio ac-

Tom. IV.

ceperunt quicquid pertinet ad integritatem propriæ eorum naturæ, necnon, & ad naturalem suam perfectionem: ergo fuerunt creati in sollicitate naturali. Antecedens patet, quia cum perfecta Dei sint opera, & omnia à se condita numeris omnibus absolverit, non videtur quidplam Angelicæ naturæ omnium præstantissimæ denegasse, quòd ad ejus perfectam, & naturalem beatitudinem conducere.

Deinde Angeli ab initio habuerunt cognitionem, & perfectam dilectionem Dei, ut Authoris naturæ: siquidem perfecta intelligendi, & amandi virtute donati sunt, adeoque potuerunt cognoscere, & diligere objectum super omnia intelligibile, & amabile qualis est Deus: sed in illa duplici operatione intellectus, & voluntatis consistit beatitudo; illa namque est ultima perfectio quam natura Angelica per viros ingenuitas sibi comparare potest: ergo Angeli in beatitudine naturali à Deo fuerunt conditi.

Dices. Si Angeli fuissent creati in beatitudine naturali, in ea utique permanissent, nam inamissibilis est de ratione beatitudinis: sed Angeli perduelles non habent beatitudinem naturalem, maxima namque tristitia, & pœna afficiuntur: ergo non fuerunt creati in beatitudine naturali. Confirmatur: beatitudo naturalis maximè consistit in amore Dei, ut Authoris naturæ: sed ille amor non permanet in Dæmonibus, summo namque odio Deum prosequuntur: ergo non fuerunt Beati.

Respondeo negando majorem; quamvis enim beatitudo naturalis sit inamissibilis respectu Angelì in puris naturalibus constituti; tamen Angelus elevatus ad ordinem supernaturalem potest per accidens, & indirectè illam amittere, peccando directè contra præcepta supernaturalia.

Nec refert, quòd S. Dionysius dixerit

G g

112-

naturalia in Dæmonibus remanuisse integra : Intelligendus enim est de naturalibus in esse physico consideratis qualia sunt substantia, potentia, species intelligibiles, & huiusmodi : non verò de naturalibus, quæ habent aliquid moralitatis admixtum cuiusmodi sunt cognitio practica, & rectitudo voluntatis erga ultimum finem ; hæc enim saltem quantum ad aliquid per peccatum destructa fuerunt in Angelis. Simili modo respondendum est ad confirmationem : quamvis enim Dæmones non perseveraverint in illa dilectione Dei, ut Authoris naturæ, non minus dicendi sunt eam habuisse à suæ formationis exordio, & dum adhuc erant viatores.

CONCLUSIO SECUNDA.

Angeli non fuerunt de facto creati in beatitudine supernaturali. Hæc est Doctoris dist. 5. quest. 2. num. 3. Ubi inquirens utrum Angeli boni de facto beati fuerint in primo instanti, & mali damnati, vel miseri, respondet primo de malis, quod non fuerint beati in primo instanti, idque probat : *Quia tunc, inquit, non fuerunt certi de beatitudine sua; sic enim postea non cecidissent: sed si non fuerunt certi de beatitudine non fuerunt beati.* Similiter sicut dicit sanctus Augustinus lib. 4. super Genesim, NON PRIUS DISCERNEBAT DEUS BONOS A MALIS QUAM ESSENT DISCRETI INTER SE : non ergo qui mali modo sunt, in prima instanti fuerunt beati, quia fuerunt creati uniformes boni, & mali, subdit eodem modo patet de bonis. Ipsi concludunt sanctus Thomas, & omnes ejus discipuli.

Probatur itaque Conclusio : primo quidem de Angelis malis, Si Dæmones fuissent ita beati, & Deum clarè vidissent in primo instanti suæ creationis, aut aliquanto post eorum formationem, vel fuissent visione hac privati propter superveniens peccatum, vel ex mero Dei beneplacito, qui seipsum

clarè videndum eis se præbuerit aliquantulum, postmodum verò sua se voluntate occultaverit : sed neutrum dici potest : Non quidem primum; quia ut diximus in secundo notabili, clara Dei visio peccatum omne excludit ; Non etiam secundum dona enim Dei sunt sine penitentia, inquit Apostolus Roman. 11. adeoque sua beneficia à creaturis non remouet, nisi ad id per eorum ingratitude moveatur. Deinde quamvis concessa fuisset Angelis illa Dei clara visio primo instanti suæ creationis, non propterea Dæmones dicendi fuissent beati defectu impeccabilitatis, & permanentiæ in eo felici statu : securitas enim, & innocentia, saltem ex consequenti, desiderantur ad statum beatitudinis.

Idem patet de bonis Angelis, quod nempe in primo instanti suæ creationis Deum non viderint, tum quia eadem est ratio de bonis, ac de malis, nec aliqua inter eos in ipsa creatione fuit discretio ; sed tantum dum erant in via, siquidem inquit Doctor supra laudatus num. 14. omnes Angeli fuerunt uniformes in sua creatione, boni autem à malis discreti fuerunt in via : Unde concludit, quod in via fuerunt tres morule : Prima in qua fuerunt uniformes in gratia, (si volumus dicere, quod mali habuerunt gratiam) vel uniformes saltem in natura ; Secunda mora, in qua adhuc in via existentes fuerunt deformes, ita scilicet quod isti ultimamè meruerunt, & isti ultimamè demeruerunt. Tertia mora fuit distinctio finalis unius ab alio necessario.

Probatur autem Conclusio simul de bonis, ac malis. Si Angeli in primo suæ creationis instanti Deum clarè vidissent, nec postmodum aliqui liberè stetit malis cadentibus ; nec facultatem habuissent merendi, vel demerendi ; sed hoc est absurdum : ergo, & id unde sequitur, major constat ; clara enim Dei visio reddit videntem impecca-

cabilem saltē ab extrinseco, tantæque est efficacitatis propter summam, objecti bonitatem, atque pulchritudinem, ut videntem necessariō in sui notitiam, & dilectionem alliciat, ideoque si Angeli à primō instanti suæ creationis Deum clarē vidissent, non fuissent deinceps liberi ad merendum, vel demerendum.

Probat̃ur itaque minor à SS. Patribus affirmantibus Angelos omnes habuisse libertatem adherendi Deo, vel se ab illo avertendi, & sanctos liberē stetit̃e in amore Dei, malis ab eo cadentibus. Ita in primis docet sanctus Augustinus lib. de Correptione, & gratia cap. 10. dicens: *Deum sic ordinasse Angelorum, & hominum vitam, ut in ea prius ostenderet quid posset liberum arbitrium, deinde quid posset Dei beneficium.* Quibus verbis S. Augustinus Angelos omnes facit æquales non solum inter se, sed etiam cum primo homine; ac proinde sicut homo, & Angeli, qui ceciderunt, fuerunt sine Dei visione creati, ita de cæteris Angelis sanctis dicendum est. Unde subdit de illis sanctis Angelis, *Per liberum arbitrium (utique gratia adjutum) in veritate steterunt, camque de suo casu numquam futuro certissimam scire meruerunt.*

Subscribit S. Damascenus lib. 2. cap. 3. necnon S. Gregor. homil. 7. in Ezechiel. Ubi ait, *natura Angelica quando creata est, liberum accepit utrum vellet in humilitate persistere, & in omnipotentis Dei conspectu manere; an ad superbiam laberetur, & à beatitudine caderet: sed quia cadentibus aliis sancti Angeli in sua beatitudine persistenterunt, hoc acceperunt in munere, ut jam cadere omnino non possent.*

Nec refert, quòd ingerat verbum, *persistenterunt in beatitudine*; non enim vult sanctos Angelos prius habuisse consummatam beatitudinem, sed tantum inchoatam, seu non in re, sed in spe. Vel quia persistentes in beatitu-

dine, & dilectione naturali Dei, supernaturalem obtinuerunt, utramque verò Dæmones amiserant.

Hanc autem veritatem omnium optimè explicat S. Prosper lib. 1. de vita Contemplativa c. 3. *Voluntatis, inquit, sanctorum Angelorum fuit, quod malis sponte cadentibus, ipsi in sua dignitate manserunt: & divino, iustoque iudicio altum est, ut quæ fuit cum Deo suo manendi voluntas, fieret permanendi voluntaria, felixque necessitas. Et ideo quia nec peccaverunt unquam, nec peccare jam possunt: illius contemplativæ vitæ semel facti participes, inexplicabiliter auctorem beatitudinis suæ conspiciunt: ac meritis suæ stabilitatis in æternum felices effecti de sua mansione securi sunt.*

Dices primò sancti Patres constanter affirmant Angelos omnes beatos fuisse ab initio: ergo reverà ita censendum est. Probat̃ur antecedens ex S. Augustino pluribi, maxime lib. 4. de Genesi ad litteram cap. 24. Ubi asserit omnes Angelos fuisse creatos cum cognitione matutina: sed hæc est beatifica: Ergo, & secunda. Ibidem ait eos fuisse beatos ea beatitudine, quam nos speramus: sed hæc supernaturalis est: quod utique confirmat lib. 12. Confess. c. 9. ubi exponens illa verba: *In principio Deus creavit cælum*, interpretatur de cælo intellectuali, id est, Angelica natura, quam dicit, *esse factum participem æternitatis, & inherentem Deo, ex quo facta est, & ex dulcedine felicissimæ contemplationis supra omnem mutabilitatem, & volubilem vicissitudinem temporum fuisse.*

Insuper apertè docet lib. de Ecclesiasticis dogmatibus cap. 9. Angelos sanctos in ea, in qua creati sunt beatitudine, perseverare.

Tertiò denique lib. 11. de Civitate Dei c. 9. ait bonos Angelos numquam esse peregrinatos à Domino: *Magna pars est, inquit, & eo beator quò numquam peregrinata. Peregrinari autem*

à Domino, idem est, ac per fidem ambulare, juxta illud S. Pauli 2. ad Corinth. 2. *Dum sumus in corpore peregrinamur à Domino*. Cui subscribit S. Bernardus serm. 13. & 17. super Cantica, ubi dicit Diabolum ante suum lapsum vidisse Verbum, & res in Verbo, asserit enim sermone 17. *Potuit autem contingere, si tamen incredibile non putetur, plenum sapientiâ, & perfectum decore, homines præscire potuisse futuros etiam, & profuturos in parem gloriam: sed si præscivit, in Dei Verbo absque dubio vidit, & suo livore invidit*.

Nego antecedens, & ad primam auctoritatem respondeo S. Augustinum, per matutinam cognitionem quandoque intelligere beatam visionem, quandoque verò cognitionem supernaturalem, & fidei, quæ cum cognitione naturali comparata dici potest matutina, licet obscura. Vel dico eum interdum usurpare cognitionem matutinam pro illa cognitione abstractiva Dei, quam habuerunt Angeli per speciem sibi divinitus impressam, & statim ab exordio suæ creationis, ut supra docebamus cum Doctore dist. 3. quæst. 9. nu. 9. Ubi dicit Angelum habuisse ab initio speciem intelligibilem distinctè representantem essentiam divinam per cognitionem abstractivam ipsius Dei, quæ cognitio erat matutina, quia secundum S. Augustinum 4. super Genes. cap. 23. dies illi sex non erant in successione temporis, sed in cognitione Angelica creaturarum ordinem naturalem habebat: ita quòd prius naturaliter novit Angelus creaturam in Verbo, secundò in genere proprio, & non ibi stando rediit in Verbum laudans ipsum ex opere suo: & in illo iterum vidit rationem sequentis creaturæ naturaliter. Ita quòd quando dixit Deus *facta lux*, vidit Angelus se in Verbo æterno: cum facta est lux, & cum factum est vespere, vidit se in genere proprio: & cum

factum est vespere, & manè dies natus, ex se exsurrexit in laudem Dei, in quo vidit secundam creaturam: ita quòd ista visio erat terminus præcedentis diei, inquantum ex cognitione creaturæ primæ in Verbo, surrexit in cognitionem Verbi, imò requies omnium creaturarum in primo Artifice, & Opifice. Ita distinguit S. Augustinus singulos dies usque ad diem septimum, cujus erat manè ultima creaturæ in Verbo, & non sequebatur vespere, & erat principium sequentis diei inquantum vidit illam creaturam in genere proprio.

Nec refert, inquit Doctor *ibidem*, quòd illam cognitionem rerum in Verbo S. August. cap. 22. *ejusdem libri*, BEATIFICAM appellaverit: potest enim probari ex ejus dictis, quòd hæc cognitio, quæ vocatur communissimè cognitio matutina, sit naturalis, & non præcisè beatifica: Quia secundum sanctum Augustinum, iste ordo erat in cognitione Angelica creaturæ post creaturam, quòd prius naturaliter præcessit cognitio Angelica creaturarum in Verbo, cognitionem earum in genere proprio: factis autem creaturis in genere proprio, statim potuit Angelus cognitionem earum habere in genere proprio: igitur omnes istæ cognitiones in Verbo præcesserunt naturaliter cognitionem creaturarum in genere proprio: omnes igitur, secundum eum, erant simul productæ: igitur cognitio ista in Verbo naturaliter præcessit productionem earum in genere proprio. Sed tunc erant Angeli in statu innocentie, & non beati, quia aliqua morula fuit inter creationem, & lapsum eorum: erat igitur aliqua cognitio Angelorum matutina, scilicet creaturarum in Verbo existentium in naturalibus, aut saltem non beatorum: & ita

videtur, quòd oporteat dare distinctionem cognitionem Angeli stantis in cognitione naturali, vel in gratia, quia alias in ipsa causa præcisè cognita, non posset prius cognoscere creaturas, & effectus ordinatos, quàm in genere proprio. Nam ratio cognoscendi rem confusè, non est ratio cognoscendi eam distinctè, & effectus ordinatos. Hæc Doctor.

Ad testimonia ejusdem S. Augusti. secundò locò inducta. Respondet ipsum non loqui de beatitudine illa perfectissima, & consummata quâ nunc fruuntur Angeli, sed tantùm de beatitudine generali, & inchoata, quæ in cognitione, & amore charitatis Dei consistit, maximè quando adjunctam habet innocentiam, & potestatem, ac facilitatem carendi omni malo si quis velit: qualiter sese explicat S. Augustinus *lib. de Correctione, & gratia cap. 10.* Ubi postquam sanctos de suo statu securos esse dixit, ita loquitur, *Diabolus verò, & Angeli ejus, etsi beati erant, antequam caderent, etsi in miseriâ casuros esse nesciebant; erat tamen adhuc, quòd eorum adderetur beatitudini, si per liberum arbitrium in veritate stetissent, donec ipsam summam beatitudinis plenitudinem tamquam præmium ipsius permanens acciperent: id est, ut magna per spiritum sanctum abundantia charitatis Dei cadere ulterius omnino non possent, & hoc de se certissimè nossent.* Ac paulò post, primum hominem adhuc innocentem sicut Angelos ab initio beatum fuisse asserit: quibus constat ipsum de generali beatitudine loqui, quatenus nempe gratia Dei, ac iustitia continetur, adjuncto felici aliquo tranquilloque statu.

Ad tertium verò caput Authoritatis, dico S. Augustinum intelligendum esse, non de peregrinatione viâ simpliciter, quæ fit per fidem, sed de peregrinatione peccati, de qua loquitur S. Petrus Epistolâ prima cap. 4. Nolite peregrinari in

servore, qui in tentationem vobis fit. Vel dico, quòd vellet Angelos non fuisse peregrinantes, aut quia brevissimo tempore post suam creationem comparaverunt suam beatitudinem: sicut modico tempore ambularunt per fidem, parum autem pro nihilo reputatur: aut quia ipsi semper fuerunt in cœlo empyreo, à quo nos elongati sumus: aut quia per peccatum numquam à Deo recesserunt: aut denique quia nullam habuerunt miseriâ sicut homines.

Ad sanctum verò Bernardum. *Respondet* ipsum non assertivè, sed dubitativè loquutum, ait namque *si tamen incredibile non putetur, quæ verba eum hac in re dubium hæsisse denotant.*

Dices secundò Scriptura sacra apertè significat supremum saltem Angelum onatum fuisse beatitudine cœlesti; nam Ezechiel 28. sic primum Angelum prævaricatorem in persona Regis Tyriorum alloquitur: *Tu signaculum similitudinis, plenus sapientiâ, & perfectus decore, in deliciis paradisi fuisti: delicia autem paradisi sunt amor beatificus, & gaudium de divina visione, ergo primus Angelus dum esset viator; cœlesti beatitudine potitus est.*

Nego majorem, per delicias namque paradisi, quibus dicitur aliquando fructus Lucifer, non intelligitur ipsa clara, & intuitiva visio divinæ essentiae, sed Dei amor per charitatem, & cognitio per fidem, nec-non, & omnia gratiarum charismata, quibus cum aliis Angelis in suæ creationis exordio illustratus fuerat Lucifer, & quæ per peccatum perdidit: vel intelliguntur inferiores quædam deliciae, nempe habitatio cœli empirei, quòd locus amœnissimus est, & paradysus plenus deliciis, in quo Lucifer cum aliis Angelis conditus est, & à quo per peccatum fuit dejectus.

Dices tertio, si Angeli omnes à suæ creationis exordio non fuerint cœlesti beatitudine donati, maximè quia prius esse debuerunt liberi, ut possent eam pro-

promereri: sed hæc ratio non officit, si-
quidem Christus Dominus licet in pri-
mo instanti suæ conceptionis secundum
animam beatus fuerit, non minus me-
reri potuit, igitur status beatitudinis
merito non officit.

Distinguo minorem, meritum subsi-
stere potest cum statu beatitudinis,
quando non habet annexum periculum
peccandi concedo: quando habet ne-
go: Christus autem non meruit cum
peccandi periculo, & libertate ad pec-
catum, quæ summè repugnat visioni
beatificæ, quæque fuit in eo ab initio
creationis ejus animæ: Sed tantum,
Christus meruit, vel cum libertate ad
actuum multiplicationem, quorum nul-
lus determinatè erat necessarius ad im-
plendum sibi præscriptum præceptum,
quod tamen per singulos actus implè-
batur: vel cum libertate ad obtinendam
à Patre dispensationem præcepti si vo-
luisse; vel denique cum libertate ad
varias circumstantias, & diversa moti-
va, quæ non præcipiebantur cum acti-
bus sibi præscriptis.

Adde quòd Angeli non sint hac in
parte comparandi cum Christo Domi-
no, sed potius cum hominibus: ita ut
quemadmodum homines prius fuerunt
viatores quàm comprehensores, &
Adulti prius ordinati, ut per propriam
cooperationem liberam, beatitudinem
posset promereri, nempe claram Dei
visionem per actus fidei, comprehen-
sionem per actus spei, & per charitatem
viæ ad charitatem patriæ tendere: Sic
etiam Angeli ita fuerunt ordinati;
adeoque non videtur ipsis ab initio
concessa beatitudo: ordo namque con-
gruus exigebat, ut saltem per aliquod
instans prius fuerint sub gratia, & ca-
pacitate merendi, quàm meriti præ-
mium acceperint.

CONCLUSIO TERTIA.

Angeli operari potuerunt in statu bea-
titudinis, si Deus ita ordinasset,
hæc est Doctoris, diss. 5. qu. numerò 5.

Ubi ait. Dico, quòd Boni potuerunt
„ in primo instanti esse beati. Cujus
„ ratio est ista, quia beatitudo non po-
„ test inesse alicui creaturæ capaci bea-
„ titudinis nisi à Deo: ergo pro quo-
„ cumque instanti est beatitudo possi-
„ bilis dari à Deo, & inesse creaturæ
„ capaci illius, pro illo instanti est sim-
„ pliciter possibilis: sed pro quocumque
„ instanti Deus potuit illam dare, ita
„ benè in primo sicut in secundo, vel
„ in tertio instanti: & Angelus bonus
„ pro quocumque instanti fuit capax,
„ quia per naturam est imago Dei, quæ
„ est capax Dei, & illam plenam ha-
„ buit naturam, & perfectam in natu-
„ ralibus; quare, &c.

Quibus verbis Doctor apertè affirmat
Angelos potuisse in primo instanti suæ
formationis reverà esse beatos; idque,
vel absque sua cooperatione, quemad-
modum sanctissima Christi Domini
anima, quæ independentè à sua co-
operatione, & ullo liberi arbitrii actu,
sed ex solo Dei beneplacito statim, ac
formata fuit beatitudinem, claramque
intuitivam Dei visionem obtinuit. Vel
ita ut eam beatitudinem sibi à Deo
oblatam cum libera sua voluntatis ac-
ceptione illam acceperint, solo na-
turæ ordine servato inter hunc actum,
& beatitudinem; qualiter servatur in-
ter contritionem, & gratiam, vi ejus,
tamquam ultimæ dispositionis infusam:
An autem eam quoque in primo instan-
ti mereri potuerint? dicitur infra. Nec
quantum ad prædicta, ulla videtur esse
discutienda difficultas.

Subdit Doctor, quòd etiam Angeli
potuerint in primo suæ creationis in-
stanti esse miseri miseriam pænæ, quæ
non supponit culpam; Quia, inquit.
non videtur contradictio, quòd in primo
instanti pænâ aliqua Angelicæ naturæ
infuisset; subindeque potuit etiam imme-
diatè à Deo dari pro primo illo instanti
sicut, & beatitudo: Nulla inquam, quan-
tùm ad hoc assignari potest contradi-
ctio,

Actio, vel repugnantia; etenim si, quæ esset, maximè vel physica, vel moralis: at non *Physica*, quia omnis oppositio physica, quæ esset in primo instanti inter Angelum, & pœnam, esse pariter deberet in sequentibus instantibus: sed nulla fuit talis oppositio in sequentibus instantibus, quippe cum plures Angeli fuerint pœnis æternis addicti. *Non etiam Moralis*, quia si aliqua, maximè quia dedeceret Deum punire absque culpa tam gravi, putà pœnà quam de facto patiuntur damnati, quippè hoc summè repugnare videtur bonitati divinæ: sed ex hoc capite non repugnaret, quia cùm Deus sit Dominus vitæ, & mortis creaturæ, potest pro libito ipsius statum immutare. Quod confirmat Doctor Authoritate sancti Augustini 3. de lib. arb. dicentis: *Si Deus ab initio fecisset hominem in pœna, non esset propter hoc vituperandus Deus nec injustus*: Ergo nec dedeceret idem de homine constituere. Adeoque nulla apparet repugnantia, cur Deus creaturam aliquam non posset citra culpam pœnis addicere, ut fusiùs demonstrabimus agendo de statu naturæ puræ in quo Deus hominem creare posset, & pœnis addicere, ubi pariter solventur, & quæ hanc adversus veritatem posset obijci.

QUESTIO SECUNDA.

An, & qualem gratiam habuerint Angeli.

Notandum primò, nomine *gratiæ* nos hic intelligere, non solum donum seu beneficium divinum ex vi solius creationis aut naturæ rei non debite; sed qualitatem illam supernaturalis ordinis quâ rationalis creatura rectificatur, completur, & elevatur ut possit aliquem actum supernaturalem Deo gratum producere, vel in supernaturali statu constitui, etenim, inquit, Seraphicus Doctor in 2. *distinct.* 4.

quest. 2. ad tertium. *gratiæ* nomen tripliciter usurpatur uno enim modo gratia dicitur communiter, prout comprehendit quidquid naturalibus est superadditum; naturalibus, inquam, quæ sunt de essentiali rei constitutione, sicut dicitur ex gratia habere bonum ingenium, bene legere, bene cantare, & alia huiusmodi. *Alio modo* dicitur quod superadditum est libero arbitrio ad rectitudinem faciens, & dispensans, sic virtutes naturales, sicut innocentia, humilitas, & pietas dici possunt gratia. *Tertiò modo*, quod est superadditum tanquam rectificans, & complens, & elevans, & hæc dicitur gratia gratum faciens, quia hominem facit acceptum Deo, quia ipsi conformem efficit. De gratia, autem hac in posteriori acceptione sermo est in præsentiarum.

Notandum secundò, gratiam Angelis multipliciter; maximè verò quatuor modis videri necessariam.

Primò, quidem *gratiæ prædestinationis* opus fuit eis, cùm enim beatitudo supernaturalis æque Angelis ac hominibus sit naturaliter indebita, gratiæ beneficium fuit, & donum naturæ non debitum, quod Deus ex beneplacito Angelos ad finem supernaturalem ordinaverit; nec eos in statu naturæ puræ deseruerit. Hinc Conc. Viennense in Clementina ad nostrum de hæreticis, meritò definivit naturam intellectualem (id est Angelos æque ac homines) non esse naturaliter beatam: Et censurâ Pij V. & Gregorij III. contra Michael Baïum, statuitur hominem adhuc integrum, & Angelos debuisse elevari per dona supernaturalia, ut mererentur vitam æternam.

Secundò, opus habuerunt *gratiæ præveniente atque concomitante*, siquidem Deus Angelos prædestinavit ad beatitudinem consequendam per media convenientia, id est, per proprios actus liberos, & morales, media autem con-

ve-

venientia, debent esse fini proportionata: subindeque cum beatitudo sit ordinis supernaturalis, ut ad eam possent Angeli sese disponere, necessaria fuit eis gratia praeveniens, seu auxilium speciale illuminationis, & pia motio- nis, quod Deus intellectum, & voluntatem praevenit ad ejusmodi actus liberos conversionis actualis in Deum exercendos: tum etiam gratia concomitans, & physicè cooperans in ipso exercitio actus liberi supernaturalis consensus in vocationem, ut docet S. Augustinus lib. 12. de Civitate Dei c. 9. Affirmans gratiam excitantem, & cooperantem fuisse sanctis Angelis necessariam ut Deo amore casto adhererent.

Tertio, ut essent sancti, & iusti opus habuerunt gratia sanctificante, seu, habitu- ali quæ infert specialem inhabitationem Spiritus sancti: *Sanctificatio* enim inquit S. Basilus lib. de Spiritu sancto cap. 16. non est absque Spiritu: nec colorum virtutes suapte natura sanctæ sunt; & S. Augustinus supra laudatus, docet de Angelis æquè ac de homini- bus intelligendum esse illud Pauli ad Romanos 5. *Charitas Dei diffusa est in cordibus nostris per Spiritum sanctum qui datus est nobis.*

Quarto denique Angeli boni, ut mal- lis cadentibus starent in gratia, & ut sollicitantibus ad perditionem, resisterent, gratia perseverantia opus ha- buerunt, ut docet S. Fulgentius libro de Fide cap. 3. & lib. 2. ad Thrasimundum cap. 3. dicite eandem gratiam operari in homine ut resurgat, quæ in Angelo operata est ne caderet, quod etiam docet Beda in Psalmum 32. ex- ponens illud: *Verbo Domini caelificati sunt*, &c. ubi ait, quoddam celestis exercitus Cherubim ac Seraphim præ- varicante Diabolo perstiterunt, non ex se, sed ex Domino Patre, & Verbo ejus bubuerunt: & non pars virtutis, sed omnis virtus eorum est spiritu oris ejus, Hic autem tantum sermo est de gratia

habituali, & sanctificante. An videli- cet Angeli eam habuerint in primo in- stanti creationis.

Notandum tertio, circa præsentis dif- ficultatis resolutionem duas maximè esse Authorum Sententias.

Fuerunt enim aliqui, ait Seraphicus Doctor loci supra laudato, dicentes, „ quod Angeli omnes creati sunt in „ gratuitis gratum facientibus, & ra- „ tio quæ movet eos fuit hæc, ex parte „ Dei, nempe perfecta liberalitas, & „ ex parte creaturæ idoneitas: quia „ enim ab instanti creationis erant va- „ sa, & receptacula munda, & Deus „ est promptus suam gratiam imper- „ titi, nisi habeat obstaculum ex parte „ suscipientis, non dimisit Deus illa „ ad momentum vacua; sed statim ut „ condidit, gratia illustravit, & talia „ debuerant de manu Dei exire rece- „ ptacula, ut statim essent prompta in „ bonum usum. Unde sicut probabili- „ ter conjiciunt aliqui, quod Deus fe- „ cerit arbores plenas fructibus, & alia „ In statu nobilissimo, & perfectissimo: „ sic etiam naturam Angeli ornaverit „ gratia à sui conditione, quæ in pri- „ mo usu bono sine victoria erat per- „ petuanda, & in prima deordinatione „ perpetualiter amittenda, hæc est „ una positio, & satis videtur consona „ SS. Patrum auctoritatibus. Hanc „ autem sententiam docet S. Thomas „ quest. 2. articulo 3.

Fuerunt etiam alii, qui dixerunt An- gelos non habuisse gratiam gratum fa- cientem ab instanti creationis, sed post; & ratio quæ eos movet; est dispositio Angelicæ naturæ, quæ fertur in id quod appetit sine retardatione. Unde sicut ex conversione ad malum ita profundè conversi sunt, ut non possent redire; sic imò multò magis ex conversione ad bonum; sive ex habilitate, ita bono to- taliter adhæsisent, si gratiam habuis- sent, quod numquam lapsi essent. Un- de non videtur aliquo modo probabile, quod

quòd Lucifer habuerit gratiam, & si ipse non habuit cùm inter ceteros esset excelsus, à majori arguitur, nec alios habuisse à sui origine; hanc positionem videtur acceptare Magister, eamque communiter tenent Doctores, & ita huic tanquam probabiliori, & communiore concordant; ita Seraphicus Doctor, ita pariter docent Hugo à S. Victore lib. 1. de Sacram. par. 5. c. 29. Henric. Gand. 4. quæst. 10.

Quibus constat eum hac in re omnino esse probabilem, nec alterutram sententiam apertè docere: talis pariter fuit Subtilis Doctor, qui utramque sententiam probabilem existimat, dist. 5. qu. 1. ubi asserit tantùm omnes Angelos aliquando fuisse in gratia: an verò creati fuerint in gratia sanctificante, vel in puris naturalibus, itaut post modum, ipsis gratia sanctificans collocata fuerit, non determinat: Sed dicit num. 7. tantùm, quòd ponere Angelos creatos fuisse in puris naturalibus; necesse est tunc ponere quatuor moras, ita quòd omnes in prima mora fuerunt in puris naturalibus, in secunda omnes in gratia, & meruerunt boni, & mali demeruerunt: in tertia boni perseveraverunt in bono, & mali in malo; in quarta & isti, & illi fuerunt in termino, & ista ultima via de quatuor moris salvat plures status in eis, & plures affirmativas authoritates. Quæ pluralitas morarum si non placeat, quia non habet necessitatem evidentem, saltem tres moras probabile est ponere, in quarum prima, inquit num. 6. omnes creati sint in gratia, & sint uniformes, in secunda fuerunt diffformes, scilicet boni meruerunt, & mali demeruerunt, in tertia omnes fuerunt in termino, scilicet boni in beatitudine, & mali in pœna. Ita Doctor.

His præmissis, quatuor maximè hic sunt resolvenda: primum, quòd omnes Angeli sive boni, sive mali habuerunt aliquando gratiam sanctificantem: se-

Tom. IV.

cundum, quòd probabilius sit eos in gratia sanctificante creatos fuisse: tertium, quòd qui præstantioris sunt naturæ uberiores gratiam acceperint.

CONCLUSIO PRIMA.

Certum est omnes Angelos aliquando expertes fuisse omnis culpæ, & in statu gratiæ sanctificantis extitisse. Hæc modò communis est apud Theologos, & probatur primò, si aliqui Angelorum gratiam sanctificantem aliquando non habuerunt, maximè Lucifer cùm suis perduellibus Affectis: sed ita non est: ergo, &c. Major constat, cùm enim boni Angeli non fuerint creati in statu beatitudinis supernaturalis, ut suprà probatum est, sed eam suis meritis, obtinuerint, ut constabit infra, haud dubium est eos aliquandiu stetisse in gratia habituali, & sanctificante, quo in statu possent illam beatitudinem promereri.

Probatur minor ex Scriptura sacra. Primò: quidem ex illo Isaïæ 14. *Quomodo cecidisti de cælo Lucifer, qui mane oriebaris, &c.* ubi licet ad litteram sermo sit de Nabuchodonosor Rege Babylonis, tamen in sensu mystico de Lucifero principe perduellium Angelorum intelligunt, non solum Origenes lib. periarchon cap. 2. & Tertullianus lib. 5. adversus Marcionem cap. 17. sed etiam Athanasius lib. de Passione Christi: Hieronymus in cap. 14. Isaïæ, Ambros. in Psal. 118. necnon, & August. lib. 3. de Doctr. Christ. cap. 37. Licet etiam hæc verba innuant Luciferi lapsum de cælo, in quo cum ceteris Angelis creatus fuit, nihilominus tam gravis interrogatio, & admiratio videtur significare casum non tantùm de cælo materiali; sed ex eminenti quadam dignitate, & excellentia, non quidem naturali, quam non amisit, sed supernaturali, & gratiæ, quæ per peccatum spoliatus est.

Probatur secundò eadem minor, ex illo Ezechielis 28. *Tu signaculum similitudinis sapientiæ, & perfectus decore,*

H h in

in deliciis Paradisi Dei fuisti, omnis lapidis præciosus operimentum tuum... in medio lapidum ignitorum ambulasti, perfectus in viis tuis à die conditionis tue, donec inventa est iniquitas in te. Quæ verba licet ad litteram dicta sint de Rege Tyri, tamen de Dæmone Angelorum rebellium principe intelliguntur passim à sanctis Patribus, Ambros. lib. de Paradiso cap. 2. Hieron. in hunc locum Ezechielis. August. lib. 11. de Genesi ad litt. cap. 25. Cyrillo lib. 3. in Joannem cap. 29. & recentioribus Interpretibus, qui communiter ponderant primò verba illa, *tu signaculum similitudinis Dei* scilicet cum singulari excellentia. Unde Gregorius lib. 32. Moral. cap. 18. *Quid doni non habuit, si signaculum Dei similitudinis, fuit: Secundò per verba illa, in medio lapidum ignitorum,* intelligunt sanctos Angelos charitate flagrantes, & ignitos, ut sanctus Augustinus lib. 11. de Civit. c. 15. Atque adeo Luciferum in medio eorum positum instar Regis stipati Aulicis, quando inter eos ambulat eodem igne flagrare. Tertiò verba illa, *plenus sapientia, & perfectus decore, & perfectus in viis tuis, donec inventa est iniquitas in te,* probabiliter significant perfectionem, & iusticiam supernaturalem, à qua Dæmon excidit, naturalia enim dona non solent in scriptura tantopere exaggerari.

Probatum tertiò eadem minor, ex illo Judæ cap. 6. Angelos, qui non servaverunt suum principatum, sed dereliquerunt suum domicilium in iudicio magni diei vinculis æternis sub caligine reservavit. Quamquam enim nonnulli recentiores Interpretes hunc textum explicant de principibus in terra promissionis dominantibus, quos dicunt fuisse reservatos in æternum iudicium, eo quòd non servaverint sibi creditum principatum, à Deo concessam regiam dignitatem; nihilominus communior, & verior interpretatio est de Dæmoni-

bus, quos constat privatos fuisse principatu, non quidem naturali, neque scientiis, & similibus donis naturalibus, secundum quæ est naturalis subordinatio inter malos Angelos. Neque etiam fuerunt Cælo exclusi, & privati jure incolarum cœlestis domicilii, nisi propter peccatum, & amissionem gratiæ supernaturalis, cui hæreditario jure debetur gloria.

Hæc eadem veritas probatur ex sanctis Patribus, quorum plurimi affirmant Angelos aliquando habuisse gratiam, quam Dæmones per peccatum perdidērunt. Ita S. Cyprianus lib. de zelo, & livore in initio, ubi affirmat *Dæmonem aliquando fuisse Deo acceptum, & charum;* Et Basiliius Epistola 141. in qua de Spiritu sancto disputans, non ejusdem illum esse cum Angelis naturæ, conditionisque sic ostendit: *At neque mutabilem illius substantiam unquam audebis dicere, si ad naturam contraria Virtutis respicias, quæ sicut fulgur cecidit de Cælo, atque a vera vita excidit: Propterea quòd adventitiam virtutem habuit: Et malam vitam consequuta mutatio est. Itaque cum ab unitate recessisset, & Angelicam dignitatem abieceret Diabolus a moribus appellatus est: Postquam prior ille, ac beatus habitus extinguitus est; & huic opposita vis accensa.*

Idem docet S. Hieronimus in illud Osæ 3. & *Es diligunt vinacia uvarum, ubi addit, Quæ vina non habent, & pristinam gratiam perdidērunt, sicut Dæmones, qui lapsi de propria dignitate, & antiquæ gratiæ possidentes aridi sunt.* Sed omnium optimè S. Augustinus, qui licet in aliquot locis dubius videatur, alibi tamen id affirmat, ut lib. 12. de Civit. cap. 9. circa medium. Ubi ait Deum creasse Angelos, simul in eis condendo naturam, & largiendo gratiam. Unde, inquit, *sine bona voluntate, hoc est Dei amore, nunquam sanctos Angelos fuisse credendum est, illi autem qui cum boni creati essent, tamen mali sunt,*

sunt, mala propria voluntate, quam bona natura non fecit, nisi quando à bono sponte defeit: & mali cause non fit bonum, sed defectus à bono: aut minorem acceperunt amoris divini gratiam, quam illi, qui in eadem perfilerunt: aut si utrique boni equaliter creati sunt, istis mala voluntate cadentibus, illi amplius adjuti ad eam beatitudinis plenitudinem, unde se numquam casuros certissimi ferent, pervenerunt.

Favet etiam Concilium Bracharense primum Canone 7. cujus verba hæc sunt, *Si quis dicit Diabolum non fuisse prius Angelum bonum à Deo factum, anathema sit.*

Dicit, qui nusquam habuit charitatem, nec gratiam habuisse dicendus est, Omnis enim, inquit S. Joannes epistola prima cap. 3. qui non diligit, manet in morte: sed Dæmones nusquam charitatem habuerunt.

Probatur primò, ex Joanne Papa in epistola ad Isaac Syracusanum, ubi de Dæmone ait, Dolet satis, & erubescit charitatem, quam in cælo habere nequivit, homines constantes ex lutea natura tenere in terris: sed homines tenent in terris charitatem quâ justificantur apud Deum: ergo Dæmones illam in cælis habere nequiverunt.

Deinde S. Gregorius lib. 32. Moral. c. 23. expendens illud Ezechielis c. 28. Aurum opus decoris tui, & foramina tua in die quâ conditus es; preparata sunt. Per aurum, sapientiam Dæmonis intelligit: per foramina verò capacitatem charitatis, quâ, inquit, si repleti voluisset, stantibus Angelis tanquam positis in Regis ornamento lapidibus, inherere potuisset. Unde concludit, Habuit ergo foramina, sed per superbiam vitium, charitatis auro non sunt repleta. Quam utique sententiam sequitur Rupertus lib. 1. de operibus Trinitatis c. 28. Ubi de Dæmone ait: Durum est hic asserere illum non fuisse perfectum, durius autem asserere illum habuisse unquam in se

Creatoris dilectionem sine qua nulla est perfectio viarum. Nam, & si Propheta prædictus dixit: Aurum opus decoris tui, & foramina tua in die qua conditus es præparata sunt, non tamen, & hoc dixit, vel nullo modo significat, quòd ejusdem foraminibus auri ligaturam recepit; quia videlicet cum sit rationalis creatura, utique ingenium, intellectum, & memoriam habuit, quibus quasi foraminibus, spiritum amoris Dei, quòd est aurum optimum, recipere cum debuisset, superbe recusavit. Quibus constat Diabolum non habuisse unquam Creatoris dilectionem, subindeque nec gratiam, quæ aut charitas est, aut charitati indivisibilis conjuncta.

Nego minorem, & ad primam ejus probationem dico cum Glossa canonica, illa verba Joannis Papæ intelligenda esse de perseverantia finali in charitate, quam Diabolus habere non potuit: non quòd reverà non potuerit illam recipere, sed quia jam receptam retinere non voluit, & idcirco maxime dolet, quod illam homines obtineant, & constanter servant. Vel dico particulam nequivit, significare impotentiam habendi post lapsum; idest recuperandi charitatem, vel propter suam in malo proposito obfirmationem, vel propter defectum vocationis ad pœnitentiam supernaturalem sine qua recuperari non potest. Unde etiam in quibusdam exemplaribus, loco verbi præteriti nequivit, legitur præsens, nequit. Vel denique dico Dæmonem dolere, quòd nequiverit, non absolutè, vel antecederet, sed consequenter ex inconstantia, & vitio suæ voluntatis, habere perseverantem charitatem, quam videt multos homines lutea licet natura constantes, & longè fragiliores, firmiter tenere.

Ad S. Gregorium, dico ipsum debere intelligi de charitate non simpliciter, sed aucta per merita, ut indicat etiam verbum repleti; Vel etiam de charitate

H h 2

con-

consummata per beatitudinem, & gloriam, ac subinde loquitur de capacitate proxima ad eam charitatem consummatam, quæ capacitas non est per solam naturam, sed per charitatem viatoris. Quod autem ita debeat intelligi inde liquet, quia aliàs, sibi contradiceret, nam cap. 18. ejusdem libri, expendens hæc verba Ezechielis: *In medio lapidum ignitorum perfectus ambulasti*, illa verba interpretatur de Lucifero, quem testatur conditum fuisse in charitate: *Quia*, inquit, *inter Angelorum choros, charitatis igne succensus, clarus gloria conditionis exstitit*. Similiter exponi posset Rupertus: vel dicendum, est illum contrariam sententiam sequutum fuisse, quæ nunc improbat à Theologis.

Dices secundò, qui ab initio suæ formationis peccavit, nec penituit, gratiam sanctificantem non habuit: sed ita est de Dæmone, ut probatur primò ex Joannis 3. *Qui facit peccatum, ex Diabolo est, quia ab initio Diabolus peccat*. Et cap. 8. Christus Judæos sibi adversantes alloquens dicebat, *Vos ex Patre Diabolo estis, & desideria Patris vestri, vultis facere: ille homicida erat ab initio, & in veritate non stetit*; hoc est, non exstitit, Verbum enim stare, in Scriptura frequentius usurpatur pro esse, vel existere; sic secundæ ad Corinth. 3. *In ore duorum, vel trium stabit omne Verbum*, hoc est erit: Sequitur ergo, quod Diabolus gratiam sanctificantem nusquam habuit.

Nego minorem, & ad primum contextum dico illius sensum esse, vel quod Diabolus ab initio mundi moraliter, & non mathematicè sumpto peccaverit, hoc est paulò post suam formationem: vel quod Uinceps pertinaciter, & continuo peccaverit, ex quo semel peccare cœpit. Ad posteriorem verò textum, dico reverà quidem Diabolum ab initio mundi moraliter sumpto esse reum homicidii, quippe non solum Cainum

ad Abelis fratricidium impulit: sed etiam ejus invidia mors introivit in orbem terrarum propter peccatum primi Parentis ejus tentatione commissum, quocirca meritò Christus Judæis sibi mortem inferre conantibus dixit, illos esse ex Patre Diabolo, eo quod Diaboli sævitiam imitarentur. Non itaque inde colligitur Dæmones gratiam sanctificantem nusquam habuisse, imò contrarium ex posterioribus verbis elicitur; siquidem Diabolus dicitur in veritate non sterisse, nam licet verbum *sto*, interdum in Scriptura idem significet, ac existo, frequentius tamen stabilisatem, & permanentiam in aliqua re inchoatam, vel in aliquo bono incœpto designat, maximè verò hoc locò.

Quod utique confirmatur ex illo Jobi 4. *Ecce qui serviunt ei non sunt stabiles, & in Angelis suis reperit pravitatem*: dicuntur enim Dæmones non fuisse stabiles, quia non perseveraverunt in gratia, quam acceperunt: Quod utique significat Christus dicendo Diabolum in veritate non stitisse; hic autem veritas innocentiam, & sanctitatem significat, quemadmodum, & in illo 4. Regum cap. 20. ubi dixit Ezechias, *Memento quòd ambulaverim coram te in veritate*.

CONCLUSIO SECUNDA.

Probabilius est Angelos omnes in primo suæ creationis instanti gratiam sanctificantem excepisse.

Hæc pariter communior nunc est apud Theologos, & probatur primò ex illo Ezechielis 28. ubi de Lucifero sub figura Regis Tyrii dicitur: *Perfectus in viis tuis à die conditionis tuæ, donec inventa est iniquitas in te*. Hanc veritatem expresse docet S. August. lib. 12. de Civitate Dei c. 9. Ubi cum dixisset, ut superiori conclusionem retulimus: *Deum creasse Angelos, simul in eis condendo naturam, & largiendo gratiam*: de bonis Angelis subjungit: *Unde sine bona voluntate, hoc est Dei amore, numquam san-*

sanctos Angelos fuisse credendum est. De malis autem: Ipsi qui cum boni creati essent, mali sunt, aut minorem acceperunt divini amoris gratiam quam illi, qui in eadem persisterunt; aut si utrique boni equaliter creati sunt, illis mala voluntate cadentibus, illi amplius adjunti, ad eam beatitudinis plenitudinem, unde se nunquam casuros certissimi fierent, pervenerunt.

Secundò Basilii in Psalmum 32. *Nihil sanctum est, sine Spiritu sancti presentia, Angelos namque ex nihilo, ut essent, Verbum opifex omnium condidit, sanctificationem verò simul illis impendit Spiritus sanctus: non enim in infantili statuta sunt creati, deinde paulatim exereitati atque perfecti Spiritus susceptione digni habiti sunt: sed in ipsa constitutione, & quasi quadam conspersione sue substantiæ simul infusam habuere sanctitatem. Quod item de malis Angelis postea docet.*

Tertiò Gregorius libro 27. Moral. cap. 23. *Virtutes Angelicæ, quæ in divino amore fixæ persisterunt, hoc in munere retributionis acceperunt, ut in contemplatione Conditoris sine felicitatis sine permaneant, & in hoc quod sunt conditæ, æterna stabilitate subsistant.*

Probatur ratione, Angeli enim non fuerunt creati in minori perfectione quam primus homo: sed fatentur omnes Theologi Propotarentem in iustitiâ originali fuisse conditum. Primò quia id videtur insinuare Tridentinum sessione 5. ubi dicit: *Adam per peccatum, iustitiam, & sanctitatem perdidisse in qua fuerat constitutus.* Secundò quia id aperte docet Anacletus Papa ep. 1. dicens: *Hominem ideo dici conditum ad imaginem Dei, quia in sui creatione gratiam, & ceteras habuit virtutes.*

Tertiò quia id Scriptura non obscure testatur, dum ait Ecclef. 7. *Deus fecit hominem rectum, rectitudo enim in Scriptura, gratiam, & sanctitatem significat. Denique, quia filii qui ex Adamo*

nati fuissent, si ille in statu innocentie perseverasset, gratiam quasi congenitam habuissent: ergo, & ipse Adam, qui erat ipsorum caput, & exemplar, illam à principio suæ conditionis habuit.

Deinde, Deus prior est ad miserendum quam ad damnandum: sed Angelos creavit eo in statu ut illicò possent demereri, adeoque damnari: ergo eos etiam producere debuit in statu in quo poterant mereri, subindeque in statu gratiæ sanctificantis, quæ est meriti principium. Denique Deus à principio condidit Angelos omnes propter finem supernaturalem, & sub convenientissima providentia ad consequendum, illum: sed convenienti providentia postulat, ut cuique rei medium necessarium tribuatur ad sibi debitum finem assequendum: ergo cum gratia sanctificans sit maximè necessaria ad beatitudinem promerendam, congruum fuit ut illam Deus Angelis omnibus statim ab initio largiretur. Congruum inquam, fateor enim ad hanc veritatem suadendam nullam rationem demonstrativam suppeditari posse, cum res de facto ex mera Dei voluntate, & liberalitate pendeat.

Obijcies primò, illud c. 4. Jobi, nam ubi legimus, quòd *Deus in Angelis reperit pravitatem*, in Hæbræo habetur, in Angelis suis non posuit laudem vel lucem: sed gratia, & iustitia in sacris literis, appellatur lumen, & lux, juxta illud primæ Petri 2. *Vocavit eos in admirabile lumen suum:* & S. Paulus plerumque iustos, filios lucis appellat dicens: *Eratis aliquando tenebræ, nunc autem lux in Domino.*

Confirmatur ex eò quòd S. Augustinus lib. 1. de Genesi ad litt. cap. 9. dicit: *Angelicam creaturam primò factam, fuisse informem, & celum dictam: deinde formatam fuisse, & lucem appellatam:* Ergo Angelus ab initio gratiam sanctificantem non obtinuit.

Respondeo, quòd et si præfatus textus

Jo.

Jobi, interpretetur de laude vel luce; non propterea officiet veritati conclusionis, siquidem significavit Angelos non habuisse laudem, vel lucem consummatam, & perfectam qualem habent beati Angeli, qui idcirco ab eodem cap. 38. dicuntur: *Astra matutina Deum laudantia*.

Ad sanctum autem Augustinum, dico, equidem ipsum hac in decernenda veritate pluribi videri ancipitem, & dubium; nihilominus, quoniam ut supra diximus, eandem veritatem alibi constanter edocet, benigne interpretandus est ne sibi contrarius appareat. Dico igitur, quod quando affirmat Angelos prius fuisse informes quàm formatos, intelligit vel de sola prioritate naturæ, non temporis: Vel quod iudicio probabilius, loquitur de informitate per carentiam visionis beatificæ ac luminis gloriæ, quæ duratione beatitudinem præcessit.

Dices secundo, si omnes Angeli fuissent in gratia sanctificante creati, nullus eorum cadere potuisset: sed falsum consequens: ergo, & antecedens. Minor constat, Dæmones enim lapsi sunt. Probatur autem sequela majoris: si in gratia sanctificante creati fuissent, etiam fuissent supernaturaliter ad Deum conversi, non enim solet Deus gratiam sanctificantem conferre personis propria voluntate utentibus, nisi ipsis consentientibus, & volentibus illam habere; adeoque ad Deum conversis: sed si Angeli fuissent semel ad Deum conversi, nunquam ab eo averti potuissent; Tum quia Angelorum voluntas, vel omnino mutari non potest ab eo, quod semel elegit, vel difficillimè mutatur, & ideo postulat statim confirmari in sua electione. Tum quia si in primo instanti conversi essent in Deum per gratiam, meruissent beatitudinem: ergo in secundo instanti in sui meriti præmium accepissent, & sic cadere non potuissent.

Nego majorem, & ad ejus probationem dico, quod quamquam Angeli non ita facilè ac homines moveantur ab eo quod semel elegerunt; tamen omnino ex se non sunt in sua electione prorsus immobiles: ideo etiamsi Angelus in prima sua operatione per gratiam sanctificantem conversus fuerit ad Deum, tamen ab illa conversione recedere potuit, quippe cum liber esset, & adhuc in statu viæ, & insuper, quia nova occasio peccandi ipsi occurrit, ut docet sanctus Gregorius Nazianzenus oratione 38. ubi de lapsu Angelorum cum dixisset, *Velim dicere eos immobiles ad malum*, atque ad bonum dumtaxat agitationem habentes; utpote Deum circumstantes, ac primas à Deo illustrationes haurientes; Subdit, *Verùm ut non omnino immobiles, sed agrè mobiles existimem ac dicam, mihi persuades ille a splendore Lucifer, qui propter superbiam caligo effectus est, & nominatur, ac subiectus illi rebelles Potestates, quæ per boni fugam vitium effecerunt, & nobis contraxerunt*.

Dices 3. Gratia est medium inter naturam, & gloriam: Ergo debuerunt Angeli prius creati in statu naturæ puræ, post modum gratiæ donari, & deinde ad beatitudinem promoveri.

Nego consequentiam, Etenim si quid probaret, etiam evinceret primum hominem non fuisse creatum in gratia. Adde quod ratio in antecedente posita est parvi momenti, multò enim melius est creaturæ rationali semper in gratia Dei stetisse, quamvis instanti immediatè sequenti receptionem gratiæ non sit beatitudinem receptura, quàm fuisse aliquandiu in statu naturæ puræ; status enim naturæ puræ non dicit perfectionem sicut dicit status gratiæ. Deinde major Dei potentia, & liberalitas apparet donando simul gratiam cum natura, quàm si prius naturam, post modum gratiam conferret; nullaque apparet ratio cur Deus gratiam Angelis conferre distulisset, maxime cum ut

su-

supra docebat sanctus Basilius, Angelis non fuerint creati infantes, idest non opus habuerint temporis decursu ad sanctificationem, & illuminationem recipiendam.

Dices 4. Magis congruum erat gratiam conferre post naturam, siquidem utramque simul conferendo, gratia videretur connaturalis: Ergo probabilius est Deum simul utramque non contulisse.

Nego antecedens: Licet enim gratia simul cum natura Angelis fuerit collata, nullum tamen erat exinde periculum utramque confundendi, maxime cum Angelis nosse potuerint, saltem per fidem, auxilium sibi concessum ex mera Dei liberalitate pendere, & eorum vires naturales prorsus excedere: hæc namque notitia maxime conducebat ad eorum constantiam, & humilitatem probandam.

Dices denique; Deus nihil frustra operatur: sed gratia Angelis in primo instanti frustra collata fuisset, quippe cum illa nondum poterant deliberare, nec consequenter poterant operari mediante gratia. *Deinde* gratia fuisset frustranea in Dæmonibus, quippe nullum fructum boni operis, & meritum ex illa perceperunt. Tandem Angelus novisset se creatum in gratia, subindeque se esse Filium Dei; & consequenter tantam dignitatem ita facile nolisset deperdere: Ergo probabilius apparet ipsi non fuisse concessam gratiam sanctificantem.

Nego consequens & ad primum argumentum dico gratiam non fuisse frustraneam in primo instanti, siquidem maxime conducebat ad Angelorum perfectionem, & insuper cum ea poterant deliberare sufficienter, & operari, ut ultima conclusione probabimus.

Ad secundum dico quod licet Dæmones nullum gratiæ fructum fuerint sortiti, illa tamen non fuit eis frustra concessa; siquidem medium erat ad finem

debitum consequendum, conferebatque ad demonstrandam suavem illum rectamque Dei providentiam qui vult omnes salvos fieri, & singula media ad salutem necessaria subministrat.

Ad tertium dico, quod quamvis Angelus se noverit Filium Dei, & in gratia constitutum, tamen ex libertate sua potuit illam dignitatem deperdere, agendo nempe contra gratiæ inclinationem, & institutum; siquidem gratia voluntatem non necessitat, sed juxta liberam suam conditionem adjuvat, & promovet ad actus supernaturales.

CONCLUSIO TERTIA.

Angelis gratiam inequalem Deus contulit juxta majorem aut minorem perfectionem naturalem eorum: Hæc est communis apud Theologos, & probatur primò autoritate sanctorum Patrum: Inprimis enim S. Ambrosius lib. 1. de Spiritu sancto cap. 7. docet Angelis uberiorem gratiam quam hominibus collatam fuisse pro majori ac præstantiori suæ conditionis dignitate: *Si putant, inquit, non esse spiritalem in Angelis sanctitatem, sed aliam quandam gratiam suæ proprietate naturæ, hi inferiores prosterbunt Angelos hominibus judicabunt.* Cum enim, & ipsi fateantur quiddam Spiritui sancto Angelos conferre non audeant, nec possint negare quod hominibus infundatur Spiritus sanctus, sanctificatio enim, Spiritus donum minusque divinum est; invenientur utique homines, qui meliorem sanctificationem habent Angelis præferendi: sed cum Angeli hominibus in adjumentum descendant, intelligendum est, quod creatura quidem superior Angelorum sit, quæ plus recipit gratiæ spiritualis, ejusdem tamen, & erga nos, & illos munus Autoris sit. Quibus verbis S. Ambrosius fatetur, idcirco Angelis uberiorem quam hominibus collatam fuisse gratiam, eò quod fiat præstantioris naturæ; cum autem Angeli etiam alii sint aliis in natura præstantiores, eadem ratione sc.

sequitur illis uberiolem , pro cuiusque natur& perfectione gratiam fuisse collatam .

Hoc ipsum edocet S. Basilius lib. de Spiritu sancto cap. 16. dicens: *Celorum virtutes non suapte natura sanct&e sunt , sed juxta proportionem qu& se invicem superant à Spiritu habent sanctificationis mensuram*. Similem ferè sententiam habet Damascenus lib. 2. cap. 3. ait enim, *Per Verbum omnes Angeli creati sunt , & per sancti Spiritus sanctificationem omnes perfectionis numeros acceperunt ; ita tamen ut pro sua quisque dignitate , & classe luminis grati&que participes sint* . Videnturque suam sumpsisse sententiam ex S. Dionysio lib. de cœlesti Hierarchia, ubi Angelos perfectiores in natura dicit propinquiores esse Deo, tum in officio, tum in splendoribus glori&, & grati&: *Quod à præceptore Paulo didicisse cap. 6. profitetur , & ita consequenter ibid. ait. Primam Hierarchiam , sicut est perfectior reliquis , ita primoribus Dei splendoribus majori propinquitate conjunctam esse*. Et cap. 7. *Meritò prima illa cœlestis functio ab altissimis Spiritibus agitur , cum sit ordo omnibus celsior atque sacratio* , atque ad hunc modum de cæteris insequentibus capitibus philosophatur .

Et quamvis isti Patres expressè non loquantur de primo instanti creationis: tamen, inquit Suares lib. 5. cap. 10. sine dubio idem cum proportionem de illo sentiunt: Tum ex parte Dei, quia videtur consentaneum sapienti& ejus, ut quos meliores in natura condebat, in altioribus sedibus glori& collocaret, & consequenter etiam majoribus gratiis præveniret: Tum ex parte ipsorum Angelorum, quia quò sunt natur& perfectiores eò vehementius, & majori conatu per gratiam operantur, & ad illam se disponunt; verùm hæc assertio difficultate non caret, quæ ut appareat .

Dices 1. Si Angelis Deus gratiam

contulisset juxta natur& perfectionem, sequeretur Luciferum in primo instanti creationis fuisse cæteris Angelis sanctiorem; sed hoc videtur absurdum: Ergo, &c. Patet sequela majoris, Lucifer enim omnium Angelorum in naturalibus perfectissimus erat. Minor etiam constat, Verissimile namque non sit Deum, illum Angelum in sanctitate aliis prætulisse quem sciebat non fore in gloria cum illis collocandum. *Confirmatur*, inferius non potest esse mensura superioris, sed natura est inferior gratia: Ergo non potest esse mensura illius collationis .

Nego minorem: Non enim est inconveniens, quod si Lucifer perfectior fuit omnibus Angelis in natura, etiam eis sanctior extiterit, & abundantior habuerit gratiam quàm cæteri inferiores Angeli, quippe cùm Deus gratiam non conferat juxta præscientiam eventus futuri, sed secundùm præsentem dispositionem: Nec major gratia majorem semper infert conformitatem ad illam, quod exemplo Jud& fit comperit, plures enim gratias excepit quàm plerique sancti; periit tamen ille; hi verò in æternum salvantur .

Ad confirmationem distinguo majorem: Inferius non potest esse superioris regula princeps aut formalis, concedo: Occasionalis, aut instrumentalis nego. *Ad minorem dico*, Naturam Anglicam esse mensuram grati&, & ejus distributionis inter Angelos, non quidem regulam principem, & formalem: Primaria enim regula distributionis grati&, tam inter Angelos quàm inter homines, est ipsa divina voluntas dividens singulis prout vult, ut loquitur Apostolus *primè ad Corinb. 12*. Nihilominus ipsa Angelica natura potest esse regula occasionalis, quatenus nempe Deus ex pura liberalitate distributurus gratiam Angelis, sapienter voluerit eam distribuere juxta proportionem perfectionum naturalium, ut qui præstan-

stantiores erant in ordine naturali, etiam, & in supernaturali præcellerent.

Dices 2. Deus illam proportionem in distribuendis gratiis juxta naturæ dignitatem, & præstantiam non servat erga homines: Ergo nec eam servare debet erga Angelos. Patet antecedens; Plures enim homines conspiciamus ingenio, & aliis animæ facultatibus cæteris præstantiores, quos tamen Deus nec uberiori gratia donat, nec ad obeunda divina munera seligit, aut evocat; Imò, inquit Apostolus, primæ ad Corinth. 1. *Non multi sapientes secundum carnem, non multi potentes, non multi nobiles, sed quæ stulta sunt mundi elegit Deus.* Consequentia etiam constat à paritate rationis, quippe cum nulla appareat ratio cur Deus erga Angelos in gratiis distribuendis aliter se gerere debeat, quàm erga homines, maxime cum illud beneficium utrique naturæ profusum sit indebitum.

Nego consequentiam, quamquam enim nulla nobis appareat ratio cur Deus ita se gerat erga Angelos potius quàm erga homines, non minùs res ipsa nobis debet esse constantissima: maxime cum non omnium Dei consiliorum ratio nobis affluat. Quemadmodum non minùs certum est Deum non apprehendisse Angelos, sed semen Abraham, ut cum ipso hypostaticè uniretur, licèt ejus præferentiæ nulla supeditetur alia ratio quàm ipsa divina voluntas, quæ pro suo nutu quam voluit naturam adoptavit: Ita etiam placuit homines ad varlos gradus gratiæ pro sua voluntate eligere: Angelis verò placuit gratiam distribuere servatam proportionem ad ingentiam eorum præstantiam, propter scilicet rationes congruitatis in conclusione præmissas; maxime verò id constat propter auctoritatem sanctorum Patrum, id ipsum asserentium. Igitur non licet ab hominibus ad Angelos, aut è converso ar-

Tom. IV.

gumentari: & fortasse noluit Deus utroque hoc diverso modo gratiam hominibus, & Angelis largiri, ut se liberalem gratiæ donatorem ostenderet, ut pote cum eam quibuslibet, & quomodolibet distribuatur.

Dices 3. Si ingenitæ Angelorum præcellentiæ essent rationes cur amplior gratia ipsis infunderetur, sequeretur quòd cum æquali gratia, unus Angelus plus mereretur quàm alius: sed falsum consequens: Ergo, antecedens. Probatum sequela majoris; Idcirco unum Angelum ampliolem gratiam obtinuit, quia nempe præstantiorem habuit naturam, & facultates vegetiores, adeoque ad ipsam gratiam excipiendam sese nobiliùs, & efficacius disposuit: Ergo à pari, si unus Angelus cum æquali gratia majorem adhibeat conatum in implendo sibi præscripto divino mandato quàm alius, etiam præstantiùs habebit meritum: non propter gratiam, quæ supponitur æqualis: Ergo propter majorem conatum; adeoque illa meriti exuberantia refundenda est in vires purè naturales.

Negant sequelam majoris communiter Theologi, amplioris namque meriti ratio desumenda est, inquit, ex parte gratiæ, & consequenter cum æquali gratia si duæ potentie opus aliquod implerent, quarum una vegetiùs ageret quàm altera, non propterea abundantius, sed omnino æquale cum altera haberet meritum.

Verùm quoniam hanc responsionem non probant Scotistæ contendentes etiam cum æquali lumine gloriæ Deum ab intellectu perspicaciori, & vegetiori clariùs videri, Idcirco *nego minorem*, & ad ejus probationem dico, illam meriti amplitudinem majorem in uno quàm altero, non esse refundendam in solas naturæ vires, sed in facultatem per gratiam elevatam, ut à simili diximus agendo de principio inæqualitatis luminis gloriæ.

li

Quæ-

QUÆSTIO TERTIA.

*An, & quomodo Angeli gratiam sanctifican-
tem, & suam beatitudinem ex
propria operatione, & merito
suerint affecti?*

NOTANDUM 1. ex Seraphico Docto-
re lib. 5. *Compendii Theologici*
cap. 11. Quòd meritum, est boni ope-
ris efficacia ad obtinendum id quod
non habetur, vel ad habendum ju-
stius, quòd habetur: Unde per me-
ritum de non debito fit debitum, &
ipsum debitum fit magis debitum.
Sicut Rex dat equum quem miles
non meruit; sed per usum equi me-
retur eundem equum jam datum.
Meritum autem generatim triplex
distinguitur, scilicet, congrui, di-
gni, & condigni. *Meritum congrui*
est per, quòd disponitur subiectum,
ut possit recipere gratiam secundum
rationem divinæ justitiæ, istud vo-
catur dispositio materiæ, scilicet cùm
quis facit, quod in se est. *Meritum*
digni dicit idoneitatem operantis ad
alsequendum id quòd meretur. *Me-
ritum condigni* dicit æqualitatem
meriti ad remunerationem: Dico
autem æqualitatem non arithmeti-
cam, sed geometricam, id est non
quantitatis, sed proportionis, & hoc
patet, quia Deus semper remunerat
supra meritum, sicut punit citra
condignum. Unde non est inter me-
ritum, & premium æqualis quanti-
tas: sed proportio, quia apud Deum
non est justitia commutativa, justitia
fori, quæ datur unus panis pro
uno denario, vel ulna panni pro so-
lido; justitia verò distributiva est
principium, quò distribuuntur dona,
secundum proportionem ad merita,
& ista est apud Deum. Unde Apo-
stolus primæ ad Corinth. 3. *Unus-*
quisque propriam mercedem accipiet
secundum suum laborem. Unde in-

fert Seraphicus Doctor, quòd nullus
meretur sibi primam gratiam meritò
digni, vel meritò condigni, sed tan-
tummodo meritò congrui. Similiter
existens in charitate non potest alte-
ri mereri primam gratiam meritò
condigni, sed meritò digni, & me-
ritò congrui. Potest autem existens
in gratia mereri sibi augmentum
gratiæ ex condigno, & per conse-
quens meritò digni, & meritò con-
grui.

Notandum 2. Ex eodem ibidem,
c. 13. quòd opera meritoria totaliter
sunt à gratia, & totaliter sunt à li-
bero arbitrio, licet principaliter à
gratia, quia gratia comparatur ad
liberum arbitrium, sicut sessor ad
equum: Sicut enim sessor equum di-
rigit; ita gratia dirigit liberum arbi-
trium in exercitio virtutum; per nos
enim malum facere possumus, sed
non bonum. *Insuper* ad efficaciam
merendi, tria valent: *Primum* est
difficultas operis, quòd patet in mar-
tyrio. *Secundum* promptitudo volun-
tatis; nam, inquit, apostolus secun-
dæ ad Corinth. 5. *Hilarem datorem*
diligit Deus: *Tertium* est magnitudo
charitatis, ipsa enim charitas pon-
dus est sanctuarii secundum, quòd
omnia, quæ erant in templo ponde-
rabantur; ut legitur Levitici 27.

Rursus, ut aliquod opus sit meri-
torium, tria requiruntur: *Primo*,
quòd ipsum opus fiat in charitate,
quia opera, quæ sunt extra charita-
tem mortua sunt, sicut cardo extin-
ctus. *Secundò*, quòd fiat ex charitate:
multa enim sunt in charitate, quæ
tamen non sunt meritoria, ex eo,
quòd non sunt ex charitate; id est,
quia non referuntur ad finem debi-
tum. *Tertiò*, quòd ipsum opus sit
referribile ad bonum: Mala enim non
possunt bona intentione fieri, alio-
quin sequeretur absurditas, quòd idè
opus esset meritorium, & demeritorium.

Dr.

Denique tria attenduntur in merito ex parte hominis, scilicet subiectum, hoc est anima, principium, id est liberum arbitrium, & intentio finis: Quibus tria respondent ex parte Dei, scilicet gratia, virtus, charitas: Gratia quidem reddit subiectum Deo gratum: Virtus autem habilitat liberum arbitrium: Charitas verò dirigit intentionem ad debitum finem.

Notandum 3. Ex eodem ibidem c. 15. quòd opera bona sunt meritoria trium, scilicet vitæ æternæ, augmenti gratiæ, remissionis pœnæ. Primum respondet radici operis, scilicet charitati, & hoc est præmium substantiale vitæ æternæ; præmium verò accidentale respondet generi operis, sicut, & augmentum gratiæ, quia operibus excellentibus, & supererogativis meremur magis augmentum gratiæ, quàm aliis operibus; remissio autem pœnæ respondet pœnalitati operis, quia opera quò magis sunt pœnalia, magis sunt meritoria remissionis pœnæ: Hæc Seraphicus Doctor.

Sciendum autem est, hic sermonem non institui de merito remissionis pœnæ, quippe cum Angelis peccantibus non repercerit Deus, nec tempus ad pœnitendum, & veniæ gratiam concesserit; solum itaque hic superest examinandum: Primum an Angeli propriis suis operibus cum gratia actuali sese disposuerint ad recipiendam gratiam sanctificantem. Secundum, an reverà bonis suis operibus S. Angeli beatitudinem suam meruerint. Tertium, quibus maxime virtutibus illam fuerint assequuti.

CONCLUSIO PRIMA

P*robabilius est omnes Angelos gratiam sanctificantem accepisse per propriam voluntatis cooperationem, & veluti dispositionem: Hæc est communio inter Theologos, eamque aperte docent S. Thomas prima parte quæst. 62. art. 2. & omnes illius Discipuli. Quamvis autem Doctor subtilis de ipsa veritate ni-*

hil expressè determinet, eam tamen satis indicat, diff. 5. quæst. 1. numerò 5. ubi varios referens dicendi modos de duratione, & statu vitæ Angelorum, dicit, Quod possunt quatuor move assignari, in quarum prima omnes Angeli fuerunt in naturalibus: In secunda omnes in gratia; in tertia boni steterunt, & meruerunt in gratia, & mali deliquerunt: In quarta, & hi, & illi fuerunt in termino. Quam assertionem licet probabiliorē non judicet, ut explicat infra, verius existimando Angelos omnes in gratia sanctificante fuisse creatos; illam tamen non improbat, sed probabilem existimat.

Suadetur conclusio primò: Angeli sanctificati fuerunt nobiliori modo, qui creaturam rationalem decebat: sed sanctificatio, quæ fit per propriam dispositionem, longè nobilior est, & præstantior, quàm quæ fit per puram Dei misericordiam, & liberalitatem: quia ex suo genere ac cæteris paribus, semper est perfectius habere aliquid à se, quàm ab alio tantum, & esse saltem ex parte causam suæ perfectionis, quàm illam totaliter ab altero emendicare; qui autem ad gratiam habitualemente se præparat per proprium actum, est saltem ex parte causa suæ sanctificationis, quippe cum concurrat cum auxilio actuali ad illam gratiam habitualemente, & sanctificantem recipiendam. Hinc communiter Theologi distinguunt duplicem, sanctificationem; unam quidem Adultorum, qui secundum proprium actum sanctificantur: Alteram Puerorum, qui non sanctificantur per proprium actum fidei; sed secundum fidem parentum, vel Ecclesiæ; Fatentur autem primam sanctificationem esse perfectiorē quàm secundam eò, quòd actus sit perfectior quàm habitus: Habitus enim ordinatur ad actum, adeoque perfectius fuit in Angelis sanctificari per propriam dispositionem, quàm per simplicem Dei concessionem. Adde quòd, qui se disponit ad gratiam habitualemente seu san-

ctificantem, illam impetrat à Deo, & meretur saltem de congruo, Deumque aliquatenus excitat, & allicit ad illam gratiam sibi conferendam, ac subinde aliquo modo efficit causâ suæ gratiæ sanctificantis, concurrat nempe cum auxilio supernaturali actuali ad illam ita promerendam.

Secundò, Homines adulti non recipiunt gratiam sanctificantem nisi mediante propria dispositione, eo quod libertatis usum habeant quò carent Parvuli in quibus illa prævia dispositio non exigitur: sed Angeli conditi fuerunt cum perfecto usu liberi arbitrii: *Neque enim*, inquit S. Basilus in Psalm. 32. *in infantili statura sunt creati, deinde paulatim exercitati*; sed ab initio suæ productionis perfecta notitia, & libertate donati sunt: Ergo verisimilius est, quòd gratiam sanctificantem aliter quàm per propriam dispositionem, & consensum non receperint.

Confirmatur; quia causæ liberæ non minùs possunt operari cum primò, habent omnia ad agendum requisita, quàm causæ naturales seu necessarie: sed causâ naturalis, quæ in primò instanti suæ formationis habet omnia requisita ad agendum, eodem instanti operatur, ut patet de Sole, & quolibet alio corpore luminoso, quod statim illuminat ac existit: Ergo pari ratione causâ libera potest operari primò instanti, quo est, si in eo habeat omnia requisita ad liberè operandum: atqui Angeli habere potuerunt omnia necessaria ad operandum in primò instanti suæ formationis, tam ex parte Dei, quàm ex parte eorum: *Ex parte quidem Dei*, nempe auxilium actuale supernaturale, quò eorum voluntas ad Deum moveretur, & pio in ipsum affectu tenderet: *Ex parte verò sui*, nimirum plenam cognitionem, & vim completam voluntatis, qua concurrere possent cum auxilio divino sibi oblato ad actum supernaturalem eliciendum, vel

non eliciendum: Igitur habuerunt ab initio omnia necessaria quibus se liberè disponere poterant ad gratiam sanctificantem recipiendam.

Tertiò denique, per receptionem gratiæ sanctificantis inicitur amicitia inter Deum, & creaturam, imò, & quòdâ spirituale matrimonium contrahitur: Amicitia autem fundatur in consensu amantium, & ad matrimonium contrahendum requiritur utriusque partis consensus: Ergo gratia sanctificans non communicatur creaturæ intellectuali usum libertatis habenti, nisi adsit ejus consensus. *Adde quòd* conveniens est, ut Deus, quos in filios adoptat, adultos jam, & liberos non promoveat ad statum illum supernaturalem, nisi ut liberos, idest, volentes, & consentientes liberè, idque magis consentaneum est naturæ rationali, & liberæ, atque amicitiae ineundæ quam mutuo partium consensu iniri convenit: quo etiam modo Deus se gerit cum hominibus adultis jam, & liberis, juxta illud. *Convertimini ad me, & ego convertar ad vos*; quæ lex respectu nostri certa, & universalis est, juxta Tridentinum sess. 6. cap. 5.

Dices 1. Christi Dominus secundum humanitatem paulò minùs minoratus est ab Angelis: sed illi datus est habitus gratiæ ab instanti suæ conceptionis, sine propria dispositione, & ab illo habitu proveniebat primus actus ab eo elicitus: Ergo idem de Angelis ferendum est judicium.

Nego paritatem; Nam primâ gratia habitualis Christi erat veluti resultans ex gratia unionis, & ita illam habebat nobiliori modo quàm per dispositionem propriam. *Insuper*, Gratia Christi ab initio fuit consummata, & primi ejus actus fuerunt visio, & fruitio beata, qui non poterant esse dispositiones ad gratiam, sed potius fructus illius.

Dices 2. Deus alias res creavit cum fructibus perfectas, v. g. arbores, & ab-

absque ulla dispositione ex illarum parte: Ergo multò magis Angelos condidit cum fructibus, hoc est, gratia habituali, & iustitia inhærente, absque prævia eorum dispositione.

Respondeo: Res alias non posse per dispositiones proprias recipere altiores perfectiones, sicut possunt Angeli, & homines adulti.

Dices 3. Perfectior agendi modus Angelis ab initio tribuendus est, ipse namque divinæ operationi, & Angelicæ dignitati consentaneus est: sed nobilius est, & perfectius operari ex habitu supernaturali, quàm sine ejus concursu: Ergo nobilius erat Angelis primò operari ex habitu gratiæ sanctificantis, quam per auxilium actuale, adeoque non potuerunt sese disponere ad receptionem ejus gratiæ habitualis.

Distinguo majorem: Operari ex habitu cæteris paribus, melius, & connaturalius est, quàm operari sine illius habitus concursu, concedo: Quando cætera non sunt paria, nego: Fieri namque potest, ut convenientius sit operari sine habitu quàm cum ejus concursu: Ita autem fit in proposito; nobilius namque fuit Angelis sese disponere ad propriam sanctificationem, & esse aliquid causam suæ iustitiæ, & per proprium consensum Dei amicitiam, ac dispensationem acceptare, quàm aliter hanc recipere: Ergo ita factum fuisse judicandum est.

Dices 4. Angeli habuerunt gratiam sanctificantem sibi concreatam: Ergo ad illam non potuerunt sese disponere. Antecedens patet, ex dictis in priori questione: Consequentia probatur; Dispositio præcedit formam, quippe subiectum præparat ad illam recipiendam; sed aliquid concreatum non potest præsupponere aliquid prævium in subiecto quod sit dispositivum ad sui receptionem: Ergo cum gratia sanctificans fuerit Angelis concreata, ad eam non potuerunt sese disponere.

Nego consequentiam, & majorem illius. probationis distinguo: Dispositio præcedit formam, instanti naturæ, concedo: temporis nego: Si quidem, ut etiam constat in rebus Physicis, ultimum esse dispositionis, est primum esse formæ substantialis; & actus contritionis, qui est dispositio ad gratiam sanctificantem simul est cum ipsa gratia sanctificante, licet naturæ eam præcedat: Ergo à simili Angeli cum auxilio supernaturali sibi ab initio concessio, eodem instanti, quo creati sunt, potuerunt sese ad Deum convertere per actum amoris, quo veluti quadam dispositione acceptabant ea omnia, quæ sibi cum in naturalibus, tum in supernaturalibus ab ipso magnifico rerum omnium Artifice monstrabatur: ipsique propter ingentia sibi collata beneficia grates referebant.

Instabis: Si Angeli per auxilium, actuale sibi concessum aliquem elicerent actum quò sese disponerent ad gratiam habitualem, sequitur, quòd simul tempore duos actus habuerint, unum quidem elicited à voluntate cum concursu illius gratiæ actualis, alterum, verò cum concursu gratiæ habitualis: sed una eademque facultas duos simul actus elicere non potest: Ergo nec Angeli illos duos actus simul habuerunt. Probatur sequela majoris. Primò asserimus eos eliciisse actum cum auxilio supernaturali actuali, quò sese ad gratiam habitualem disponerent; sed etiam debuerunt alterum actum elicere ex illa gratia habituali sibi concreata, alioquin habitus ille fuisset aliquandiu in Angelis otiosus, quod apparet absurdum: Ergo, &c.

Respondeo concessa majore distinguendo minorem: Una eademque facultas non potest simul elicere duos actus totales, & non subordinatos, concedo: Partiales, & invicem subordinatos, nego: Quæmadmodum enim Sol v.g. eadem illuminatione adæquata, & Lunam, & ipsa mediante aerem noctu lumina

mina

mine perfundit: ita eadem voluntas duobus actibus simul in Deum poterit tendere, quando maximè unus se habet per modum dispositionis ad alterum.

CONCLUSIO SECUNDA.

Angeli de falso meruerunt beatitudinem, idque prius tempore, quam eam fuerint adepti. Ita Doctor *dist. 5. quæst. 1. num. 3.* Ubi refert, & impugnat sententiam Magistri dicentis Angelos non meruisse eam beatitudinem antequam acceperint: sed postquam illam acceperunt: sicut miles dicitur mereri equum per opera non facta, sed fienda. Quæ sententia, inquit, Doctor, absurda est, si enim propter opera prævisa, quis diceretur mereri, sequeretur gratiam non esse gratiam, ex eo namque, inquit, quod aliquis prævidetur bene usus accepto, non meretur accipere illud. Tunc enim posset homo mereri primam gratiam, quia prævidetur à Deo dante, bene usus ea, & tunc gratia non esset gratia, quia esset ex meritis, licet non posset in effectu, tamen prævisus: igitur Angelus non meruit beatitudinem, si tantum habuit eam propter bonum usum prævisum ipsius in obsequendo circa electos. Deinde subdit: Ideo tenetur, quod Angeli meruerunt beatitudinem suam priusquam receperunt eam: Primam autem conclusionis partem.

Sic probat: Omnis natura consequitur suam perfectionem per operationem propriam: sed perfectio, & finis cujuslibet creature rationalis, est beatitudo, quæ soli Deo est naturalis: Ergo illam Angelus per propriam actionem consequi debuit. Finis autem, consequendus per operationem, vel est per eam faciendus, vel per eam promerendus, seu ut loquitur Doctor, omnis operatio ducens in finem, vel est factiva finis, quando scilicet finis non excedit virtutem operantis propter finem, sicut medicatio respectu sanitatis: vel est meritoria finis, quando scilicet

finis excedit virtutem operantis propter finem, & tunc expectatur finis ex dono alterius: Beatitudo autem excedit omnem naturam creatam: ideo tantum Angelus, quàm homo non potest illam consequi per operationem effectivam, sed tantum per meritoriam.

Probatur 2. Natura Angelica ita capax est merendi suam beatitudinem, quàm homo: Ergo qua ratione homines non consequuntur beatitudinem, nisi per proprium suum meritum, eam pariter Angeli debuerunt promereri: Consequentia patet: tum quia, cæteris paribus, Angeli sunt aptiores ad merendum apud Deum, quàm homines: Tum quia si hominibus naturà imbecillioribus, & infirmioribus non datur gloria sine merito, pari ratione non videtur abique merito Angelis concedenda. Tum denique, quia Apoc. 22. *Mensura hominis, quæ est Angeli:* hoc est, ut quidam interpretantur, eadem ratione se habet erga homines, ac habuit erga Angelos in eorum ordinatione ad beatitudinem, quia nempe in consequenda beatitudine, eadem mensura, seu regula mensurantur homines, & Angeli: Ergo cum in hominibus mensura consequendæ beatitudinis sit meritum, pari ratione dicendum est, Angelos per proprium meritum beatitudinem fuisse adeptos.

Confirmatur: Hæc veritas auctoritate sanctorum Patrum, maximè verò S. Augustini *lib. de Correctione, & Gratia cap. 11.* Ubi loquendo de statu primi hominis, cui Deus auxilium concesserat, quo perseveranter bonum tenere posset, si vellet, inquit, sed quia, noluit permanere, propterea ejus culpa est, ejus meritum fuisset, si permanere voluisset: Sicut fecerunt Angeli sancti, qui cadentibus aliis per liberum arbitrium, per liberum arbitrium steterunt ipsi, & hujus mansionis mercedem recipere meruerunt, tantam scilicet beatitudinis plenitudinem, qua eis certissimum
fit

se semper se in illa esse mansuros. Fatetur ergo S. Augustinus reverà sanctos Angelos promeruisse suam beatitudinem.

Probat etiam secundam partem Doctor, Nempe quòd Angeli meruerint gloriam prius tempore, quàm ipsam fuerint adepti: Non potest voluntas simul, & semel esse in eo statu, in quo velit objectum mutabiliter, & contingenter, & etiam immutabiliter, & necessariò; Sed si Angeli eodem tempore acciperent beatitudinem, quo ipsam merentur, sequeretur eos velle idem objectum mutabiliter, & immutabiliter, contingenter, & necessariò; Ergo non possunt mereri, & obtinere eodem instanti temporis beatitudinem. Major patet: Duo namque actus omnino oppositi non possunt simul ab eadem facultate procedere: Probatur minor, ut quis mereatur eo debet esse in statu, ut non sit ita determinatus ad actum, quin habeat libertatem non solum essentialem; sed etiam contradictionis habendi talem actum, vel non habendi, seu debet esse indifferens ad actum eliciendum, vel non eliciendum: Sed quando voluntas est in statu beatifico, non habet amplius talem indifferenciam, quippe cùm per visionem beatificam ita determinetur, & alliciatur ad amandum Deum, ut ab eo eliciendo actu non possit cessare; Ergo si eodem instanti, quo meretur, haberet beatitudinem, sequeretur, quòd simul mutabiliter, & immutabiliter, contingenter, & necessariò posset per actum amoris in Deum tendere, quod cùm sit absurdum, etiam absurdum est, eos simul mereri beatitudinem, & eam accipere.

Deinde status beatitudinis omne meritum excludit, alioquin homines defacto mereri possent in Cælo; nec status viatoris ad merendum necessariò desideraretur: sed consequens est contra communem Theologorum sententiam, qui ad meritum volunt requiri

statum viæ, non patriæ: Ergo meritum nequit esse simul cum beatitudine, subindeque debet illam tempore præcedere.

Denique Dispositio ad formam, & via ad terminum, debent esse prius forma, & termino, quando ex ratione sua speciali quamdam habent incompatibilitatem, ratione cujus non possunt simul subsistere: sed meritum Angelorum est via, & dispositio ad beatitudinem, quæ cùm ipsa non possunt subsistere; quia meritum Angelorum supponit fidem, & cognitionem, ac statum viæ: utrumque autem beatitudo excludit; Ergo non possunt simul subsistere: adeoque meritum tempore beatitudinem debet præcedere.

Dices 1. Angeli merentur aliquid propter obsequia hominibus impenfa: sed illud meritum simul consistit cum præmio, aliàs illud expectarent, hæc autem expectatio eorum sælicem statum interturbaret; Nam ex Prov. 13. *Spes, quæ differtur affligit animam*: Illud autem, quod merentur non potest esse aliud, quàm beatitudo, subindeque meritum, & beatitudo simul possunt subsistere, & consequenter Angeli simul potuerunt mereri beatitudinem, & eam possidere.

Distinguit majorem Doctor: Per illa obsequia Angeli merentur beatitudinem essentialem, negat: accidentalem, concedit; quamvis autem hanc accidentalem beatitudinem prius non habuerint, & illam possint appetere, ac desiderare: inde tamen nulla in eis sequitur molestia, quippe cùm eam omnem beatitudo essentialis excludat.

Dices 2. Majus præmium supponit majus meritum; sed Angeli majus præmium, amplioremque beatitudinem habent, quàm plurimi homines electi: Ergo pariter majus meritum debent habere: sed non potuerunt habere majus meritum ante perceptam suam beatitudinem, quàm plurimi sancti homines,

nes, qui diuturno viventes tempore plurima merita congeſſerunt: Ergo neceſſum eſt, quòd Angeli mereantur gloriam per opera conſequentia, & conſequerentur ipſorum meritum ſimul cum beatitudine ſubſiſtit.

Diſtinguit majorem Doſtor. Majus præmium requirit majus meritum intenſivè, concedit: extenſivè, negat: Hoc eſt, requirit opus meritorium, quòd ſit præſtantius, & perfectius, ratione ſcilicet vel præſtantioris principii, vel intenſioris actus charitatis, & amoris, non verò requirit plura opera meritoria quantum ad numerum: & ſimiliter diſtincta minore, Neganda eſt conſequentia; meritum enim Angelorum, quamquam modico tempore comparatum fuerit, nihilominus longè perfectius potuit eſſe intenſivè, quàm merita hominum multiplicata per varios annos.

Inſtabis: Meritum adjunctam habet difficultatem: ſed in Angelis nulla fuit difficultas in bonum proſequendo: Ergo vel nullum in eis fuit meritum, vel ſaltem minus perfectum in hominibus, qui maximam difficultatem patiuntur in proſequentione boni.

Diſtinguit minorem Doſtor: Non fuit in Angelis difficultas proſequenti bonum ex inclinatione ſenſibili ad oppoſitum, concedit: ex proportionem objecti, circa quod tendere debebant, negat; Sciendum enim eſt, inquit, quòd difficultas aliquando accidit in aliquo opere ex inclinatione voluntatis ad oppoſitum: Aliquando accidit difficultas in opere propter hoc illud, circa quod operatur, quòd excedat naturam operantis. Et hoc modo fuit conſequentio beatitudinis difficilis, & laudabilis in Angelis, non autem primo modo, quia non inclinabant ad oppoſitum. Adde omnino verifiſimile eſſe, quòd Angeli magnam paſſi ſint difficultatem, ut Deo amore, & obſequiis adhererent; Id enim denotat prælium, magnum

initium inter Angelos Perduelles, & Fideles: Significatur etiam ex lapſu tot Angelorum, qui probabiliter ita non corruiffent, nec à Deo exorbitaſſent, niſi quamdam difficultatem in ejus adheſione paſſi fuiffent. Denique ſi quid argumentum concluderet, inferendum eſſet, quòd etiam Angeli non poſſent ullatenus mereri per opera ſubſequentia adeptionem beatitudinis, quippe cum ſtatus ille omnem difficultatem removeat, maxime circa amorem Dei, quem intuentes facie ad faciem etiam ſummè diligibilem agnoſcunt.

CONCLUSIO TERTIA.

Angeli meruerunt ſuam beatitudinem maxime per actus virtutum Theologicarum Fidei, Spei, & Charitatis.

Probatur Conclusio, primò quidem de Fide, nam ex Abacuc, ſecundò, *Justus ex Fide vivit*, & ut addit Apoſtolus ad Hebræos 11. *Sine fide impoſſibile eſt placere Deo.* Angeli autem, ut mereantur, Juſti eſſe debuerunt, & Deo placentes: Ergo, & fidem habere. Insuper, non minus oportebat Angelos per fidem juſtificari, & ad viſionem pervenire, quàm homines: ſed homines juſtificari nequeunt, & ad viſionem pervenire abſque fide; Siquidem, inquit Apoſtolus ad Hebræos cap. 11. *Fides eſt ſperandarum ſubſtantia rerum.* Unde ibidem concludit; *Credere oportet accedentem ad Deum, quia eſt, & inquirantibus ſe remuneratori ſit:* Ergo, &c. Denique viſio quadam peculiari ratione fidei reſpondet tanquam præmium illi ſpecialiter proportionatum. Hinc beatis accommodari poſteſt illud *Psalmiſtæ, ſicut audivimus per fidem in via, ſe videmus per evidentem manifeſtationem, in civitate Domini virtutum.* His adde, quòd Angeli charitatem habuerunt, eſt enim charitas, vel eadem cum gratia, vel ab ipſa inſeparabilis: Charitas autem neceſſariò fidem ſupponit, ſubindeque neceſſum fuit, ut An-

geli fidem infusam habuerint.

Hinc verius dicendum arbitror, Angelis revelatum fuisse, & eos per fidem cognovisse: *Primò* Deum ut Authorem gratiæ, & finem ultimum, objectumque beatitudinis supernaturalis, nam ut supra dicebamus ex Apostolo, *accedentem ad Deum*, &c. Quæ verba de Angelis æquè, ac de hominibus intelligi debere docet S. Thomas 2. *quæst. 5. art. Secundò* explicitè noverunt mysterium Trinitatis. Nam, inquit Thalassius *tomo 5. Bibliothecæ Patrum sententia 59.* Tam Angelorum, quàm hominum sanctificatio, & Deificatio est sanctæ consubstantialis Trinitatis cognitio. Suaderi etiam potest, quia cognitio viæ Angelorum, debuit respondere cognitioni patriæ: Fides enim est dispositio maximè accommodata per quam paulatim ad scientiam beatificam rationalis creatura promovetur: sed beatitudo supernaturalis maximè consistit in cognitione mysterii Trinitatis: Ergo, &c.

Tertiò, Probabilius etiam existimo mysterium Incarnationis illis pariter fuisse revelatum: Tum quia talis revelatio, & cognitio, non solum ad perfectionem ipsorum Angelorum spectabat: sed etiam valde conveniens erat honori, & majestati Christi, idque indicat S. Paulus *Hebr. 1.* Dicens, *Cum iterum introducit Primogenitum in orbem terræ, dixit: & ADORANT OMNES ANGELI EIUS:* quod præceptum dari decuit etiam Angelis viatoribus, non solum erga Filium ut Deum, sed etiam, ut Deum hominem: nam cum mysterium Incarnationis cognoscatur à beatis Angelis, ut unum è præcipuis, cumque cognitio viæ Angelorum correspondere debeat cognitioni patriæ congruum fuit, ut mysterium illud in via cognoscerent.

Dices S. Paulus ad *Ephefos 3. v. 1. ad Timoth. 3.* significans Mysterium Incarnationis fuisse absconditum à sæculis in Deo, & per Ecclesiam Evangelizantem.

Hum innotuisse Principatibus, & Potestatibus in cœlestibus: Unde illæ Angelorum interrogaciones, *Quis est iste Rex gloriæ?* *Psal. 23. Quis est iste, qui venit de Edom tintis vestibus de bostra?* *Isay. 63.* Ergo, &c.

Respondet Poncius ex eodem Apostolo ad *Hebr. 1.* constare, Angelos ante omnem pacem, & Ecclesiæ prædicationem agnovisse mysterium Incarnationis ab ejus initio, & Christum Dominum adorasse in ipso ejus Conceptionis, vel Nativitatis puncto. Alia ergo ejus loca intelligenda sunt de cognitione Incarnationis, non simpliciter, sed secundum quid, nimirum vel secundum cognitionem intuitivam ejusdem jam executioni traditæ, vel secundum fructum in omnes gentes, prædicatione Pauli, & Ecclesiæ patefactum Angelis, experimentaliter saltem: vel secundum abrogationem legalium, & alias circumstantias reipsa exhibitas. Istæ verò interrogaciones, vel Prophetarum sunt, vel potius Angelorum, non ignorantium, sed admirantium. Neque enim verum est, quòd à nonnullis affirmatur, aliquos quidem ante cognovisse, sed alios ignorasse, putà eos, qui interrogarunt in Ascensione Christi: Paulus enim ad *Hebr. 1.* affirmet omnes Angelos Christum Dei primogenitum adorasse cum in orbem terræ introduceretur.

Confirmatur ex eo, quòd S. Dionysius *cap. 4. cœlestis Hierarchie*, affirmat omnes Angelos edocuisse omnia mysteria, quæ hominibus prænuñciarunt, maximè verò, quæ Christum spectabant. Unde subdit: *Divinum etiam humanitatis Jesu mysterium, Angelis primum patefactum esse video, deinde per eos ad nos cognitionis beneficium pervenit.* Cui concinit S. Augustinus *lib. 7. de Civitate Dei*, *cap. 32.* dum ait: *Ab exordio generis humani Incarnationis mysterium fuisse Angelorum ministerio prænuñciatum, & præfiguratum:* Supponit ergo ab An-

gelis fuisse præcognitum: adeoque præfata S. Pauli verba non possunt eo rigore accipi, ut excludant omnem notitiam ante habitam ab Angelis de adorando Christi Verbi incarnati mysterio; maxime vero quantum ad Angelos superioris ordinis: Nam Doctor Subtilis, *diff. 19. num. 2.* non vult illius mysterii cognitionem innotuisse Angelis inferiorum ordinum, ut constabit *quæst. 1. sequentis articuli.*

Dices 2. Cognitio Angelica fuit evidens, sed cognitio, quæ habetur per fidem, non est evidens; Ergo illa cognitio non erat per fidem. Probatur major, Angeli evidenter cognoscebant Deum sibi revelare illa mysteria, quorum notitiam accipiebant; Unde merito S. Bonaventura in 3. *diff. 23. art. 2. quæst. 3.* docet quod Angeli, à prima conditione sua habuerunt cognitionem aliquam de articulis pertinentibus ad Trinitatem, quæ tamen non meretur dici fides; imò potius cognitio contemplationis propter absentiam ænigmatum.

Distinguo majorem: Cognitio illa fuit evidens ex parte attestantis, & revelantis, quia Angeli evidenter cognoscebant revelationem, sive manifestationem mysteriorum fieri à Deo, concedo: ex parte rei revelatæ nego: & similiter distincta minore, nego consequentiam: Evidentia enim ex parte attestantis absolutæ non repugnat fidei, nos enim nobis loquentes cognoscimus, & temen eorum verbis credimus. Similiter contingebat in Angelis, qui Deum equidem sibi loquentem noverunt, sed quæ referebat, & manifestabat, evidenter non cognoverunt.

Quod de fide diximus, idem potiori jure de spe, & charitate Angelica dicendum est: Constat enim Angelos bonos, tempore illius prælii, quod adversus perduelles habuerunt in Cælo, & Deum amasse, & in eo spem suam reposuisse; quippe propter ejus tuendam gloriam præliabantur, quod certò

fieri non poterat, nisi maximo ejus amore flagrant, & opportunum ab eo auxilium adversus ingentem illam rebellantium Angelorum catervam præstolati fuissent.

Quæres, Qualis fuerit via Angelorum duratio?

Respondet Doctor *diff. 5. quæst. 1. numero 5. in sequentibus:* Varias hæc in re determinanda fuisse Doctorum sententias: Primò namque S. Thomas *prima parte, quæst. 65. art. 5.* docet duas tantum fuisse Angelorum moras, unam qua creati sunt in gratia, & meruerunt, alteram qua boni beatitudinis essentiali præmium acceperunt, mali autem æternum supplicium. Magister verò sententiarum existimat tres statuendas esse durationis moras, quas sic explicat, ut velit in prima Angelos beatos conditos fuisse in puris naturalibus, in secunda verò mora mali peccarunt, meruerunt iusti; in tertia verò omnes fuerunt in termino, boni quidem in beatitudine, mali verò in tormentis; sunt itidem aliæ veterum Theologorum sententiæ.

Verum omnes jam penè recentiores Theologi conveniunt cum Subtili Doctore tres tantum admittendas esse Angelicæ viæ morulas, quas instantia vocant, etsi non sint necessario indivisibilia, uti instantia nostri temporis: *Primum* instans fuit eorum creationis, in quo omnes, & naturam, & sanctificantem gratiam sibi concreatam acceperunt, & Creatori per amorem castum adhaeserunt, adeoque amore in illo instanti pariter meruerunt: sed non in merito steterunt omnes: *Secundum* instans fuit, in quo facta est discretio inter bonos, & malos: bonis in merito perseverantibus, malis autem in perduellionem, & peccatum labentibus. *Tertium* instans fuit, in quo consummata est illa discretio, bonis beatificatis,

tis, malis verbò damnatis.

Seu ut loquitur Doctor quæst. 2. n. 15. *PRIMA mora, in qua fuerunt uniformes ingratia, si volumus dicere, quòd mali habuerunt gratiam, vel uniformes salutem in natura. SECUNDA mora, in qua adhuc in via existentes fuerunt diffformes, quòd isti ultimam demeruerunt, & isti ultimam demeruerunt. TERTIA mora fuit distinctio formalis unius ab alio necessario. Probabile est etiam, quòd in secunda mora, in qua fuerunt diffformes in via, fuerunt multe morule, quia mali peccaverunt multis speciebus peccati, scilicet superbia, odio, & invidia: & isti alius ordinatè, & non in eodem instanti fuerunt elicitè.*

*Dixi autem instantia illa non fuisse omnino indivisibilia, maximè primum, & secundum. Quantum enim ad primum spectat, oportuit ipsam fuisse virtualiter divisibile respondens aliquali durationi nostri temporis: Gratis enim fingeretur Angelos perverfos statim, post primum instans omnino indivisibile lapsos fuisse: Nec sit verisimile amorem illum casum, in quo omnes concreati sunt, unico tantum indivisibili instanti perseverasse, & illico extinctum fuisse: Imò contrarium suadere videtur Ezechiel sub persona Regis Tyri graphicè Luciferum delineans, dicens, *In medio lapidum ignitarum ambulasti, persectus in viis tuis: Quòd indicat ipsum aliquandiu stetit in amore casto, & velut in eo gressum fecisse per continuationem ipsius amoris, & bonorum operum pluralitatem.**

Unde multò minùs verum apparet, quòd docent plurimi Thomistæ, post primum indivisibile instans bonos omnes fuisse beatificatos, malos verbò damnatos, quia tot ponenda sunt instantia pro via Dæmonum, quot fuerunt operationes realiter inter se distinctæ, sibi que succedent, quibus eorum via ultimò terminata fuit: Supponunt enim Thomistæ instantia temporis di-

creti, quo via Angelorum duravit, multiplicari juxta numerum operationum sibi succedentium: sed Dæmones tria operationum genera exercuerunt: in primò namque instanti creationis elicerunt actum meritorium, postmodum mortaliter peccaminosum, quem deinde sequuta est damnatio: quæ tres operationes omnino sunt impossibiles: Prima namque fuit conversio actualis in Deum, ut ultimum finem: Secunda fuit aversio actualis ab eodem: Tertia verbò necessario pariter distingui debuit à secunda: summa namque delectatio, & summa tristitia sunt inter se impossibiles respectu ejusdem subjecti: Angelus autem in eo instanti, quo peccavit, habuit summam delectationem, & complacentiam in sua perfectione naturali: Ergo in eodem instanti non potuit habere summam tristitiam, subindeque tertium illud instans distingui debet à secundo.

Secundum instans viam similiter aliquam habuit temporis continuationem, quo boni augendis meritis, & pugna sive resistentia adversus peccantes, eorumque peccata occupabantur. Quamvis enim in Angelis ad operandum per naturam, & gratiam expeditissimis longa mora non fuerit necessaria; congruebat tamen, ut per quamdam temporis durationem sua merita, prorogare possent, & sic ampliorem si vellent beatitudinem promereri: quemadmodum docent Theologi, quòd si homo stetisset innocens, nec ipse, nec ejus posterì, statim fuissent in Cælum deportati, sed diuturno tempore in terris degissent, ut multiplicato bonorum operum sænore abundantior in Cælis gloriam, & beatitudinem assequerentur. Adde quòd eandem protractam durationis moram suadeat vulgata opinio de peccato Luciferi cæteros ad perduellionis consortium instigatione inducentis; non enim verisimile sit eodem indivisibili momento omnes rebel-

belles Angelos ipsi adhæsisse; imò credibilis apparet, aliquos interdum fuisse reluctatos, & tandem urgente ipsius sollicitatione ad ejus partes declinasse.

Tertium verò instans consummatæ discretionis bonorum Angelorum à malis per illorum glorificationem, & horum damnationem, indivisibile quidem fuit, ea ratione qua viam clausit, & terminavit: in æternum tamen duraturum est.

Quæres 2. Quandiu duraverit Angelorum via.

Respondeo rem esse prorsus incertam; quidam enim existimant Angelos viæ suæ terminum habuisse ipsa prima die mundi, quando Deus divisit lucem à tenebris, quasi in ista discretionis mysticè delineata fuerit ac designata Angelorum bonorum à malis discretio: *Sunt qui existiment, id contigisse secunda die, quando Deus creato firmamento divisit aquas quæ sūt super firmamentum ab his quæ ipsi inferiores sunt, quasi per hanc divisionem adumbrata fuerit sanctorum Angelorum à Dæmonibus separatio. Putant ceteri, nullos adhuc Angelorum lapsos fuisse sexta die mundi, quippe cū Deus vidit cuncta quæ fecerat, & erant valdè bona, subindeque nullæ adhuc creaturæ peccato deformes, & inficiatæ tunc temporis videbantur.*

Verum hæ omnes sententiæ levioribus, & incertis ducuntur argumentis; siquidem Moyses illis mundi diebus rerum corporearum formationem delineat; sicque divisionem lucis, & aquarum corporearum, ut natura ipsa demonstrat, refert sanctissimus Propheta, nec fortè de illa bonorum Angelorum à malis discretionem, quidquam tunc cogitabat; sic pariter docet Deum probasse omnia quæ fecerat ad totius Universi integritatem, & ornatum: An autem illis verbis etiam complexus fuerit for-

mationem spiritualium creaturarum; incertum prorsus.)

*Nilominus conveniunt omnes Theologi viam Angelorum non ita diù protractam, sed fuisse valdè brevem; Tum ob perfectionem potentiarum Angelicarum, quæ facillimè opera sua implent. maximè cū nulla adversantia impedimenta, nec corporea organa habeant Spiritus illi ad intelligendum, & volendum expeditissimi: Tum propter ingentia ipsis collata divinitus auxilia, quibus eorum intellectus irradiabatur, & voluntas ad operationem stimulabatur. Adde quòd præmii comparandi magnitudo, nec temporis diuturnitas, nec bonorum operum multitudinem ac pluralitatem exigit; nam ut loquitur Doctor dist. 7. quæst. 1. num. 4. *Ad magnum præmium, non requiritur multitudo meritorum, sed multò magis requiritur unum meritum intensum, quàm centum millia remissa. In Angelis autem fuit motus meriti valdè intensus pro ipsa morula qua merebantur, in tantum fortè quòd nullus homo secundum communem legem, posset habere ita intensum alium meriti, sicut ipsi habuerunt.**

ARTICULUS SECUNDUS:

De Officiis sanctorum Angelorum erga homines, & Obsequiis hominum erga Angelos.

ANGELORUM in humanum genus infinita propemodum, & illustria ac quotidiana sunt officia & beneficia; *In supernis enim Spiritibus non solum admirabilis dignitas, sed etiam dignatio amabilis invenitur, ait S. Bern. serm. 1. de S. Michael. Præcipuum autem in homines Angelicæ beneficentiæ munus, est eorum custodia, quàm tum publicè univerforum, tum singulorum privatim suscipiunt; quocirca meritò homines, ut aliqua ex parte*

tan-

tanta ab Angelis impensa sibi beneficia rendere valeant, dignum est, ut eos ingrati animi testimonium laude, & cultu celebrent. Unde in hoc Articulo tria suscipimus determinanda. *Primum*, an omnes Angeli a Deo ad homines interdum mittantur, ut aliquod ipsis beneficium aut obsequium impendant. *Secundum*, an, & qui Angeli ad privatam, & publicam hominum tutelam, & custodiam à Deo deputentur. *Tertium*, quo cultu, & qua veneratione homines, sanctos Angelos venerari, & celebrare debeant.

QUÆSTIO PRIMA.

An omnes omnino Angeli ad hominum obsequia interdum deputentur?

NOTANDUM 1. Angelos omnes, præter eorum distributionem in tres Hierarchias, & novem Ordines, communiter dividi in Assistentes, & Ministrantes, quæ divisio sumitur ex Daniele 3. *Millia millium ministrabant ei, & decies centena millia assidebant ei*: Ex quo oraculo Doctores inferunt plures esse Angelos assidentes, veluti cælestis aulae Principes, quàm Ministrantes; majori namque numero assidentes designat Propheta quàm Ministrantes. Hinc conjiciunt aliqui non omnes Angelos à Deo ad homines è Cælo in terras deputari; sed eos qui sunt ultimæ Hierarchiæ, ceteros verò Deo semper in Cælo præsentibus assistere, nec usquam hominibus apparere, quod an verum sit, hic determinandum.

Notandum 2. Ex Doctore in 2. *dist. 10. quæst. unica, numero 2.* Duplicem distingui posse Angelorum Missionem: exteriorem unam, sensibilem, & immediatam; interiorem alteram insensibilem, & mediatam. Prior est, quæ Angeli à Deo ad homines mittuntur, quatenus vel eis divinam voluntatem insinuant, vel eorum affectum ad divi-

nam amorem stimulent, & accendant, vel intellectum illustrent, & illuminent, nedum eis divinam lucem impertiendo, sed, & sibi conceditis veritates suggerendo: Posterior verò est, quæ Angeli superiores ad inferiores mittuntur, ut eos de divinis mysteriis, divinæque voluntate instruant, quatenus ipsi eadem homines possint docere: *Secundum communem processum, & ordinem*, inquit Doctor, *revelantur majora Dei mysteria superioribus, priusquàm inferioribus: & ita superiores mittuntur ad inferiores loquendo, & illuminando eos interius: & Alij inferiores mittuntur exterius, ad illa revelata nuncianda hominibus, vel explenda: & ita non omnes communiter mittuntur extra.* An autem extraordinariè saltem omnes Angeli à Deo ad homines propter grandia quædam denuncianda mysteria aut implenda negotia, vel beneficia conferenda mittantur, hic est resolvendum.

Notandum tertio, quod quamquam convenient omnes Doctores Scholastici, Angelos interdum à Deo ad homines mitti, ut eorum intellectum illuminent, & affectum inflamment; dissentiunt tamen invicem plurimi in assignando modo illius illuminationis, & inflammationis, nam inquit Seraphicus Doctor. *Dist. 101. art. 2. part. 2.* Animæ nostræ à beatis Angelis per eorum revelationes illuminari possunt tripliciter. *Uno modo*, inquit, ut intelligatur Angelus inferiorem portionem illuminare per modum luminis irradiantis: *Alio modo* ut intelligatur illuminare per modum speculi deferentis. *Tertio modo*, ut intelligatur illuminare per modum linguæ vivaciter exprimentis. Omnes hi modi etsi aliquò modo sint intelligibiles, cum Angelus sit lumen, & speculum, & habeat etiam spiritualis interpretationis sive locutionis officium, sustineri possunt; tertius tamen modus intelligibilior est. Non eni-

„ enim multum bene japparet quo-
 „ modo Angelus irradiet, nec quo-
 „ modo se offerat aspectui animæ; sed
 „ hoc satis intelligibile est quomodo
 „ possit animæ quod concepit, sugge-
 „ rere: Et sicut Doctor dum exterius
 „ loquitur, & viam parat ad intelli-
 „ gendum, & viva, & efficax locutio
 „ quadam vivacitate ad intellectum
 „ nostrum habet ingressum, dum so-
 „ nat in aure corporis exterius, ratio-
 „ ne cujus etiam libentius audit homo
 „ bonum Clericum, cujus sermo est
 „ efficax, & vivus: cum habeat aliquid
 „ latentis energie vivæ vocis actus, ut
 „ dicit Hieronymus: Sic, & hoc modo
 „ intelligendum est, quod Angelus
 „ hoc possit facere interius, & sic illu-
 „ minare, non lumen infundendo, nec
 „ solum offerendo sicut objectum vel
 „ speculum, sed etiam vivaciter exci-
 „ tando, sicut Doctor exterius, &
 „ adhuc efficaciori modo.

His ita prænotatis, tria sunt resolu-
 venda, *primum* an revera Angeli à Deo
 ad hominum obsequia è cælo in terram
 mittantur: *Secundum* an non solum ex
 ultima Hierarchia, sed etiam ex aliis
 duabus superioribus interdum ita de-
 putentur. *Tertium*, quidnam sit præci-
 pius, & ordinarius illius Angelicæ mis-
 sionis effectus.

CONCLUSIO PRIMA

Angeli revera interdum mittuntur
 ad homines. Hæc est de fide, &
 probatur variis Scripturæ textibus Exo-
 di 23. *Eccce ego mittam Angelum meum
 qui præcedat in via.* Lucæ 2. *Missus est
 Angelus Gabriel.* Act. 12. *Nunc scio
 verè quia misit Dominus Angelum
 suum, & eripuit me de manu Herodis.*

*Probat hanc Conclusionem Seraphicus
 Doctor loco supra laudato quæst. 1.* Ex eo
 quod hæc missio maxime congruat chari-
 tati divinæ quæ per eam missionem
 manifestatur; & Angelicæ, quæ per
 ipsam nos adjuvat; & nostræ quæ cum
 sit infirma, per Angelicum obsequium

fovetur nutritur, & excitatur. Hæc in-
 quam, missio concordat charitati divi-
 næ, quia in hoc manifestatur divina
 bonitas, quantum nostram salutem di-
 ligat, dum nobilissimos Spiritus, qui ei
 intima charitate junguntur, dirigit, &
 transmittit ad procurandam salutem
 nostram. Et competit etiam charitati
 Angelicæ, cum enim charitatis arden-
 tis sit, maxime desiderare aliorum salu-
 tem, ob quam dicit Dominus sicut
 etiam dixit Isaia c. 6. *Eccce ego Domi-
 ne mitte me:* & Angeli possint nos ju-
 vare pro eo, quod vident nos suo auxi-
 lio indigere, & malos Angelos indefi-
 nenter nos impugnare; ideo, quod ad
 nos mittantur, lex exigit charitatis
 Angelicæ.

Competit etiam hoc charitati huma-
 næ, quæ quoniam parvula est, quamdiu
 sumus in via, indiget foveri, & nutriri,
 & excitari. Et quoniam Angeli sunt
 concives hominibus, cum non sint eis
 juncti per similitudinem naturæ quæ
 excitat ad amorem, oportuit jungi per
 obsequium beneficentia.

Dices 1. Frustra mittit quis nuntium,
 ubi ipse præsens est, & melius potest
 facere per seipsum; ergo cum Deus
 nobis præsentissimus sit, & omnia pos-
 sit facere per seipsum, ad nos frustra
 mittit Angelum; sed Deus nihil frustra
 molitur; Ergo nec Angelum mittit.

Respondet, Seraphicus Doctor, quod
 quamvis sit Deus præsens, tamen pro-
 pter cæcitatem, & caliginem intelle-
 ctus nostri in qua sumus, ipsum cog-
 noscimus ut absentem. Et quia illi
 Spiritus propter claritatem luminis, &
 beatitudinis perfectionem semper vi-
 dent Deum facie ad faciem, & sunt ei
 præsentem, quemadmodum illi qui sunt
 in camera Regis indicant his qui sunt
 in exercitu, Regis voluntatē, & ad hoc
 mittuntur à suo Domino: sic intelli-
 gendum est in proposito. Nec valet,
 Dominus per se potest facere: ergo non
 debet ad hoc nuntium mittere. Multa
 enim

enim potest ille, qui præest per se facere, quæ tamen injungit servo, vel nuntio, ut salvetur in ministerio de actionibus decens, & congruus ordo.

Dices 2. Deus mittit filium, & Spiritum sanctum ad nostram salutem instaurandam: ergo ad eam procurandam non est necessaria Angelorum missio.

Negat consequentiam Seraph. Doctor. Quamquam enim revera Filius, & Spiritus sanctus per suam ad nos missionem sufficientissimè salutem nostram instauraverint, quoniam tamen libertate donantur, & nostrum arbitrium pigrum est, & non bene gratiæ cooperatur: ideo indiget excitari; ad hoc autem nullus est magis idoneus, quàm sit Angelus: Et ideo conveniens est, ut ad nos mittatur, non propter indigentiam procurationis salutis nostræ ex parte Filii, vel Spiritus sancti, sed propter negligentiam cooperationis ex parte nostri.

Dices 3. Angelus beatus sedem habet in cælo empyreo, tamquam in loco sibi congruo, & maxime convenienti, subindeque appetit ibi esse: Ergo si extra cælum empyreum mittatur, frustratur ejus appetitus, sicque non erit perfecte beatus, hoc autem consequens est absurdum: ergo, & id unde sequitur.

Respondet idem, quòd locus non debetur Angelo propter ejus necessitatem, vel indigentiam: sed solum propter quamdam congruentiam. Hæc autem congruentia compensari potest, & tunc nullam ponit imperfectionem, vel indecentiam per sui ipsius absentiam: Et sic est in proposito, plus enim delectatur Angelus implere voluntatem Domini sui, & adjuvando hominem placere Deo, quàm delectetur esse in empyreo.

Rogabis primò, num etiam Deus interducat malos Angelos ad homines mittat?

Affirmo, id enim expressè Scriptura

significat, legimus enim 3. *Regum cap. ultimo.* Quòd Dæmonem alloquens, qui habebat in animo petere facultatem, ut deciperet Achab. *Egressus est autem Spiritus coram Domino,* & ait, ego decipiam illum, cui ait Dominus, in quo? *Et ait,* Egrediar, & ero spiritus mendax in ore omnium Prophetarum. Cum ergo Angelus ille offerebat sese, qui ad decipiendum sit malus, & à Deo missus sit, ut significatur verbis sequentibus, *decipies, & prævalebis, egredere, & fac ita.* Ergo mali interdum ad homines mittantur.

Hoc ipsum luculenter explicat sequitur, quod Gregor. *lib. 2. Moral.* ubi loquens de bonis Angelis, & malis, dicit. *Sicut de bonis Angelis in hac vita laborantibus auxilium pietatis impenditur; ita isti occulte ejus justitiæ nesciendo servientes, ministerium exequi reprobationis conantur: non enim ministrant Deo soli, qui adjuvant boni, sed etiam mali, qui probat non solum qui redeunt à culpa sublevent, sed etiam qui redire volentes gravent.*

Nec refert, quòd Angeli perversi seductionem hominum, & animarum perditionem intendunt; licet enim inquit Aletius noster *quæst. 41. membro 2.* Sit contraria intentio ipsius Diaboli intentioni divinæ, quantum ad hoc, quod hæc est bona, & illa mala, nihilominus utitur Dominus tentatione Diaboli ad bonum; tentatio enim quæ tentavit Diabolus Job, quantum fuit de voluntate Diaboli, fuit ad seducendum: sed illam ordinavit Dominus ad bonum, ut patientia Job probaretur. Missio erga Domini respiciet ordinationem potestatis ad tentandum, quæ est sub potestate divina, non in ordine ad voluntatem Dei, sed ejus malam voluntatem ordinat Deus ad bonum.

Rogabis secundò, an Angeli inferiores interdum à superioribus mittantur ad homines.

Affirmo.

Aſſeruo, idque probat S. Gregorius in Moralibus ex illis Zacharię Prophetę verbis, ubi dicit Propheta, quod *Angelus, qui loquebatur in me egrediebatur, & alius Angelus egrediebatur in occurſum ejus, dixit ad eum; loquere ad populum illum dicens: abſque muro habitabitur Jeruſalem*. Ex quo accipitur, quod Angelus mittit, unde dicit: *In conſpectu Conditoris Angelica miniſteria ordinata ſunt, ut pro communi ſalutitate beatitudinis Opifcem ſuum videntes, gaudeant: Cum pro diſpoſitione dignitatis alii alii ſubminiſtrant. Ad Prophetam Angelus Angelum mittit, & quæ ſecum de Deo communiter conſpicit, edocet, & eligit quia eum per ſuperiorem ſcientiam virtute cognitionis, & præſtantiorem gratiam culmine poteſtatis excedit*. Hæc S. Gregorius. Ex quibus manifeſte colligitur, quod unus Angelus ab alio interdum mittitur.

Confirmatio, quia veriſimile eſt, quod quando Deus inferioribus Angelis vult revelare aliquid, id revelat prius ſuperioribus, communiter loquendo, & his mediantibus inferioribus: Ergo mittuntur ſuperiores ad inferiores illuminandos: ſed inferiores etiam ſimiliter illuminat alios ſibi inferiores, donec veniatur ad ultimum ordinem, ex quo veriſimiliter mittuntur aliqui ad illuminandos homines.

Dicit, quod etſi ſuperiores illuminant inferiores, tamen non inde ſequitur, quod mittantur, quia ad miſſionem, de qua hic agitur, requiritur motus localis, ſed ut ſuperiores illuminent inferiores, non eſt neceſſe, ut moveantur localiter, alioquin non poſſent ſibi proximos illuminare.

Reſpondeo, fortassis choros Angelicos ſuperiores eſſe tam diſtantes ab inferioribus, ut non poſſint eos illuminare, quin moveantur localiter.

Deinde poſſet dici, quod miſſio quæcumque non neceſſario importet motum localem, ſed ordinationem Angeli

ad illuminandum alium, itaut ille Angelus dicatur ad alium mitti, cui Deus præcipit ut alium inſtruat, ſive interim id fiat cum, vel abſque motu locali.

CONCLUSIO SECUNDA.

Angeli non ſolum inferiores, ſed etiam ſuperiores quique interdum à Deo ad homines deputantur. Ita Doctor loco ſupra laudato num. 2. ubi ait: *Videtur quod ſupremi, vel aliqui de ſupremis mittantur quandoque ad extra*. Probaturre quoque conſeſſio ex Scriptura ſacra, imprimis verò ex illo *Iſaię 6.* ubi legimus: *Seraphim ſtabant ſuper illud ſex alæ uni ſex alæ alteri, & ſubdit ſtatim: Et volavit ad me unus de Seraphim; & in manu ejus calculus, quem forcipe tulit de altari, ac tetigit os meum*. Sed Seraphim ſunt ſuperioris ordinis, ut ſupra probatum eſt, & indicat ſanctus Damascenus lib. 2. cap. 4. Ubi referens doctrinam S. Dionyſii ait: *Primum ordinem Angelorum eſſe, qui Deum ſemper circumſtat, aſſidueque, ac citra ullius rei interventum ei copulatur: nempe ſex aligerorum Seraphim*. Item Gen. 3. legimus, quod Deus collocavit ante paradifum voluptatis Cherubim, & flammeum gladium, atque verſatilem ad cuſtodiendam viam ligni vite. Diximus autem ſupra Cherubim eſſe ſecundi ordinis Angelorum, qui Deo proximiores ſunt, unde etiam 4. Regum 19. *Domine Deus Rex Iſrael, qui ſedes ſuper Cherubim tu es Deus ſolus Iſrael*.

Id ipſum etiam evincitur ex eo Danielis 18. *Michael unus ex principibus primis venit in adjutorium meum: & infra, nemo eſt adjutor meus niſi Michael princeps veſter*. Hinc Eccleſia in officio Angelorum orat: *Angelum pacis Michael ad iſtam caeliſti mitti rogitamus aulam*. Et iterum, *Michael Archangele veni in adjutorium populo Dei*. At verò Michael unus ex primis ſi non primus Seraphinorum eſſe creditur, ut cenſet Pantaleon Diaconus, In *Hom. de S. Michaelis apud Surium 29. Septembris*, nec-

non

non S. Basilus *Hom. 1. de Angelis*, ubi hæc legimus, *Michael Dux supernorum Spirituum, qui dignitate, & honoribus prælatus es omnibus Spiritibus tibi sup- plico*. Idem sentit Laurentius Justinianus dicens in sermone de S. Michael: *In spirituali primo consiliu cæteris Spi- ritibus sanctis prælatus est Michael, sicut Lucifer malis*. Quod etiam firmari potest ratione, nam in bello Angelico, quod in exordio mundi fuit Michael fuit dux bonorum, qui illos ad obediendum Deo excitavit, sicut Lucifer socios ad defectionem induxit.

Confirmatur, verisimile est mentem Ecclesiæ esse supremum omnium Angelorum plus venerari, quam reliquos: quia hoc etiam magis consentaneum voluntati divinæ esse meritò præsumi potest; sed Ecclesia maximè veneratur Michaellem, ut in officio Angelorum, proficetur, & præ cæteris ipsi templa dicat: ergo sentit illum esse supremum Seraphinorum.

Non tamen me latet S. Thomam in 2. dist. 1. Afferere Michaellem esse exordine Principatum, & ad litteram intelligit verba Danielis cap. 10. ubi Michael dicitur, *Unus ex principibus primis*: quam sententiam sequitur Toletus in primum caput Lucæ, & Pererius lib. 12. in Daniele: Non desunt etiam, qui inter Potestates illum collocent, quia ad illum ordinem spectat debellare, & amovere Dæmones, in quo Michaeli maxima potestas tribuitur *Apoç. 12*. Cui sententiæ videtur Ecclesia favere in officio ipsius sancti Michaelis dicens, quoties miræ virtutis aliquid agitur, Michael mitti perhibetur. Verum probabilius sententia jam invaluit, ipsum esse supremum inter Seraphinos, adeoque principem omnium prorsus Angelorum; qui cum ad nos mittatur, certum esse debet nedum inferiores, sed & superiores Angelos interdum à Deo ad homines delegari.

Denique hoc ipsum apprinè edocet *Tom. IV.*

S. Paulus, ubi sine ulla exceptione testatur omnes Angelos mitti à Deo, & mandata sibi ministeria capessere, & perficere: *Nonne omnes*, inquit ad Hebræos 1. *sunt administratores Spiritus in ministerium missi propter eos, qui hereditatem capiunt salutis, quæ verba disertissimè veritatem conclusionis confirmant*; maxime si advertatur series totius S. Pauli discursus: intendit enim probare Christum rebus omnibus creatis antecellere; præsertim Angelis, qui cæteris creatis omnibus præstant: *Tandem*, inquit, *melior Angelis effectus, quanto differentius præ illis nomen hereditavit*, nimirum quod Dei filius appelletur, & ad ejus dexteram, ut Patri æqualis sedeat; Unde subdit *ad quem Angelorum dixit aliquando, sede à dextris meis*, quoad usque ponam inimicos tuos scabellum pedum tuorum? quas dignitatis prærogativas, ut evincat Apostolus Angelis non convenire, subdit *omnes sunt administratores Spiritus, &c.* quæ certè ratio imbecillis, & nulla prorsus appareret, nisi Angelos omnes sine ulla dignitatis, vel ordinis exceptione comprehenderet, nam si summi ordines eximantur, videri quidem poterit Christum Angelis, & Archangelis, aut aliis quibusdam excellere; non autem Cherubinis, & Seraphinis, qui nec à Deo cum cæteris mitterentur, nec in ministrandi partes venirent. Quare, quod de Angelis dicit illo loco Paulus, ad omnes etiam supremos Angelos pertinet. Certum ergo esse debet omnes etiam superiores Angelos ad nos interdum à Deo deputari.

Eandem veritatem probant sancti Patres, maxime S. Athanasius *oratione secunda contra Arianos*, ubi demonstrat Filium Dei esse verè Deum, ex eo quod superior sit Angelis, qui ad ministerium mittuntur, & *Angeli qui Deum*, ait, *sursum*, deorsumque Comitantes ministros se præbent de Filio verò dicit, *ET ADORENT EUM OMNES ANGELI EJUS. QUOD*

ultima verba ex Apostolo desumpta omnes prorsus Angelos etiam superiores denotant; quippe non minùs principes quique Angeli, quàm infimi Christum venerari iussi sunt. Expressissimus est etiam Chrysostomi locùs *Hom. 8. in Gen.* ubi illa verba, *Faciamus hominem*, non ad Angelos, ut Hebræi putant, referri probat, quòd Angeli non sint divinorum arcanorum principes, sed ministri: *Non est*, inquit, *Angelis tributum, ut sint essetii participes, sed ut assistant, & ministerio fungantur; quod ut distas audi magni loquentissimum.* *Esayam de superioribus Angelorum virtutibus loquentem: VIDI CHERUBIM STANTIA A DEXTRIS DEI, ET SERAPHIM.* Consentit Gregorius Nazianzenus *oratione 34.* Cùm Angelorum summos, & infimos recensisset ordines, mox universè ait: *Illos divina voluntatis administrari loca omnia peragere, omnibus ubique adesse promptos ministerii alacritate, tum naturæ agilitate, alios aliam mundi partem obincentes, sive alteri cuiuslibet parti universitati attributos.*

Mitto plurimos alios è SS. Patribus idem affirmantes, uni cumque profero S. Bernardum, qui sermone de S. Benedicto, Luciferum interpellans ait: *Cherubim, inquit Propheta, stabant, & non sedebant, quid laborasti, ut jam sedas! Omnes administratorii sunt spiritus missi in ministerium propter eos, qui hereditatem capiunt salutis, & tu sedebis?* Et Sermone primo de S. Michael, cùm dixisset ipsum licet è superioribus Angelis, nobis tamen ad vigilare, & opitulari, subdit: *Neque id quidquam incredibile videatur, quandoquidem ipse quoque Creator, & Rex Angelorum, venit non ministrari, sed ministrare, & animam suam dare pro multis.*

Eandem veritatem probat Doctor Subtilis loco laudato, ex eo quòd Gabriel missus ad Beatam Virginem fuerit unus ex supremis Angelis, quippe cùm cognoverit mysterium Incarna-

tionis, quòd multos inferiores Angelos (ut putat) latuit. Nam, inquit, Incarnationem nescierunt multi Angeli ante tempus Incarnationis, vel Passionis Christi, sicut patet, per illud *Isayæ 63.* ubi quæritur in persona inferiorum Angelorum, *quis est iste, qui venit de Edom tinctis vestibus, &c.* & per illud *Psalmi, quis est iste Rex gloriæ?* & respondit Dominus *fortis, &c.* apparet etiam per Apostolum ad Ephesios 3. *& innasceat Principibus, & Potestatibus per Ecclesiam, &c.* ubi glossa Hieronymi, Angelicas potestates, vel dignitates dicit præfatum mysterium Incarnationis ad plenum nesciisse, donec completa esset Passio Christi, & Apostolorum prædicatio fuisset gentibus dilatata, quòd tamen usque tunc non latuit majores secundum gloriam Augustini ibidem dicentis: *Constat autem, quòd Angelum missum ad beatam Virginem, ad hoc nunciandum non latuit: Ergo ille cui hoc patuit erat de superioribus, & non de infimis, quos latuit illud sacrum mysterium, ita Doctor.*

Dicit S. Dionysius *cap. 13. de Cælesti Hierarchia*, arbitratu supremos Angelos nunquam ad hæc infima ministeria descendere: Quòd autem ad *Isayam* purgandum unus è Seraphinis lapsus legitur, id sic explicat, ut non summi ordinis quispiam munus hoc obierit, sed inferior aliquis, cui Seraphinorum proprium nomen imponitur, quia propriam istius ordinis functionem gerebat, cùm ignito carbone Prophetæ labia perurebat. Quam etiam interpretationem S. Gregorius Magnus in caput primum ad Hebræos amplectitur, probatque, ex eo quòd etiam interdum Angeli nomine Dei appellentur quando vices illius gerentes opera majoris momenti obeunt: Ergo isti Patres censent superiores Angelos ad nos non transmitti.

Respondeo equidem illam fuisse illorum sententiam; verum hac in re non videntur audiendi, maxime cum Scriptura sacra satis aperte nostram sententiam firmet, & cœteri Patres nobis addisculentur, ut supra dictum est. *Addo* illam expositionem S. Dionysii videri pugnare in ipsamet verba Prophetæ: *Seraphim stabant super illud sex ala uni, & sex ala alteri* Seraphinorum, qui per illas imagines representabantur: Sicut enim dicit Prophetæ: *Vidi Dominum sedentem super solium*, ita dicit se vidisse Seraphinos illi assistentes: ergo sicut priora illa verba intelliguntur de Deo ipso representato in illa imaginaria visione: ita posteriora intelliguntur de veris Seraphim assistentibus, & laudantibus Deum.

Adde quod inquit Suarez lib. 6. c. 10. in nullo alio loco Scripturæ sit mentio Seraphinorum, nisi in illo, ut ibi notat Hieronymus: Ergo si ibi Seraphim non significat proprium ordinem, sed generaliter Angelum accendentem, non habebimus in Scriptura mentionem illius ordinis, nec unde illum probemus; nam quod dicit Psalmo 103. *Qui facis Angelos Spiritus, & ministros suos flammam ignis*, licet ab aliquibus de Seraphinis exponatur, ita ut sensus sit, Deum etiam supremos Angelos in se ardentes, ut flammam ignis, facere ministros suos; verus tamen sensus est, Davidem loqui de omnibus Angelis, quos vocat flammam ignis, vel quia charitate ardent, vel quia efficaciam habent spiritaliter urendi, & accendendi homines, ut ibi exponunt Augustinus, Theodoretus, & Gregorius *Homilia 34. in Evangelium*. Unde potius roboratur argumentum; nam cum omnes Angeli ministri Dei sint, & generali ratione flamma ignis, si propter hoc solum vocantur Seraphim apud Isayam, non superest locus, unde ex nomine Seraphim proprium ordinem Seraphinorum probemus.

Dices secundo, Angeli, ut diximus in

primo notabili, 'solito distribuuntur in assistentes, & ministrantes: sed illa divisio nulla foret, si omnes deligerentur ad ministerium: ergo necessario fatendum est superiores Angelos, qui Deo dicuntur assistere, ad ministeria deputari.

Confirmatur ex S. Gregorio lib. 17. *Moral. cap.* ubi verba illa Danielis declarans: *Millia millium ministrabant ei, & decies millies centena millia assistebant ei*. Ita scribit: *Aliud est assistere, aliud ministrare, assistunt enim illa proculdubio Potestates, quæ ad quædam hominibus nuncianda non exeunt, ministrant verò hi, qui ad explenda officia nunciorum veniunt; sed tamen ipsi quæque contemplatione ab intimis non recedunt: & quia plures sunt, qui ministrant, quàm hi qui principaliter assistunt, assistentium numerus quasi definitus, ministrantium verò infinitus ostenditur.*

Distinguo majorem, distribuuntur Angeli in assistentes, & ministrantes, secundum ordinariam divine providentiæ dispositionem, concedo: secundum extraordinariam, & quantum ad extraordinaria opera, nego: ordinariè quidem soli inferiores Angeli ad tutelam, & custodiam deputantur. Nihilominus etiam interdum superiores emittuntur; quod utique ex Scripturæ testificatione liquet, quæ Angelos quosdam, qui nominatim assistere dicuntur, è cœlo mitti docet in terras, ac variis legationibus, ministeriisque perfungi; talis fuit *Raphael*, qui se unum è septem esse fatetur, qui adsunt ante Deum, & is tamen ad Tobiam missus, nulla ne infirma quidem servorum obsequia detrectavit: ita *Gabriel* Zachariæ Sacerdoti oblatus in templo: *Ego sum*, inquit, *Gabriel qui adfui ante Deum*: idemque Angeli alterius jussu Danieli se stetit: & ei ventura prædixit: *Michael* verò unus de principibus primis apud eundem Danielelem venire nihilominus ad opem ferendam legitur, ac de Moyse corpore cecasse cum Diabolo; in judæ

canonica : nam de Seraphinis , qui ſupremi omnium habentur , ſatis ex Eſaya conſtat mitti eos , ac diverſis functionibus operari . *Cherubim* item ante Paradifum voluptatis collocatus reſertur à Moyſe . Quod autem de utriſque Dionyſius quorundam ex opinione ſcribit , non illos ex Seraphinorum , aut Cherubinorum ordinibus fuiſſe , ſed ex inferiore , ac majorum illorum geſſiſſe vices , minimè conſentaneum videtur , eique complures reclamant veterum , qui quorum nominibus appellantur ; eorum ad ordines pertinere illos putant , unius ex omnibus Hieronymi teſtimonio ero contentus , qui de Seraphinis ita loquitur : *Quidam Græcorum in Scripturis apprime eruditus Seraphim virtutes quaſdam in cælis eſſe expoſuit , quæ ante tribunal Dei aſiſtentes , laudent eum , & in diverſa miniſteria militantur , maximè quæ ad eos , qui purgatione indigent , & ob priſtina peccata aliqua ex parte ſupplicii purgari merentur .*

CONCLUSIO TERTIA .

Ordinarius , & præcipuus Angelicæ ad homines miſſionis effectus , eſt animæ purgatio , intellectus illuminatio , & affectus inflammatio . Ita Seraphicus Doctör diſt. 10. art. 2. quæſt. 1. & 2. „ Hancque veritatem luculenter expendit ipſemet , vel alius ex ipſo „ quiſquis fuerit author compendii „ Theologicæ veritatis lib. 2. cap. 18. „ ubi ait , S. Dionyſius attribuit Angelo , tres actus , ſcilicet purgare , illuminare , & perficere : purgant itaque „ Angeli removendo phantaſmata , „ quæ impediunt illuminationem , „ quam Angelus intendit facere in „ nobis . Unde tria remouet ab anima , ſcilicet ignorantiam , & nubila „ phantaſiarum , ac falſas opiniones „ philoſophicarum rationum revelationi contrariarum . Illuminant vero „ animam tripliciter , ſcilicet ad „ aſenſum , ut patet quando aliquid

„ manifeſtatur in ſumpto corpore : „ item ad imaginationem , ſcilicet cum „ fumoſitates , quæ per ſpiritum animale ad cerebrum eleuantur tranſmittunt in diverſa phantaſmata ; & „ hanc poteſtatem habet etiam Diabolus : item ad intellectum , & talis „ illuminatio ſolum perfecta eſt .

„ Non autem , quòd Angelus illuminet intellectum efficiendo novam „ cognitionem in anima , quia non „ poteſt in intellectu novam ſpeciem imprimere , nec habitum novi luminis dare , ſed nec ejus intentionem „ quò vult convertere , quia hoc eſt „ contra naturam liberi arbitrii . Hac „ enim tria requiruntur ut intellectus „ noſter intelligat aliquid , ſcilicet ſpecies , quâ cognoscat , & lumen in „ quo cognoscat , & intentio quâ „ convertatur intellectus ſuper ſpeciem . Illuminat autem Angelus intellectum noſtrum excitando , & diſponendo , & lumen divinum in uos „ transferendo , facit enim ut dictum „ eſt , in phantaſia tranſmutationem „ ſpecierum componendo , & dividendo ſecundum exigentiam rei , quam „ vult revelare . Item irradiat lumen „ intellectus ſui ſuper illas ſpecies , ut „ moveant intellectum noſtrum , & ſic „ plura , & ſubtiliora videre poſſunt in „ lumine duplicato . Item excitat intentionem animæ aliquo motu , ut „ ipſa convertat ſe ſuper illa phantaſmata abſtrahendo ſe ab aliis : perficit „ autem , id eſt , promovet ad melius .

Idem docet quantum ad inflammationem affectus , dum probat , prius præmonendo accendi poſſe intellectum „ humanum tripliciter ; ſcilicet vel „ efficiendo , vel excitando , & adjuvando , vel movendo . Primò modò , ſolus Deus poteſt inflammare affectum , ſcilicet per „ effectum . Secundò modò , ipſum deſideratum inflammatur affectum , ſcilicet „ excitando , & adjuvando . Tertio „ modò , poteſt Angelus affectum

no-

„ nostrum incendere per motum . De
 „ his habemus exemplum in naturis ;
 „ quia primò modò ignis accendit li-
 „ gna ; secundò modò ligna incendunt
 „ ignem , & tertio modò , qui ligna igni
 „ apponit , ignem accendit : Differen-
 „ tia autem est , inter emittere cogita-
 „ tionem , & incendere , & mentem
 „ illuminare ; quia cogitationem im-
 „ mittere est , ut dicit Beda , intus crea-
 „ re , & facere cogitationem ; sed in-
 „ cendere , est cogitationem jam fa-
 „ ctam inflammare ; Illuminare verò
 „ verò est dare revelationem de aliquo
 „ occulto intelligibili .

Observandum est autem primò cum
 Subtili Doctore in 2. diff. 11. numero 4.
 quòd Angeli intellectum humanum il-
 luminando , nullam intellectionem
 actualem , aut speciem intelligibilem
 ullo modo causare possunt , ut causæ to-
 tales . Ratio autem , inquit , non est ex
 aliqua impotentia ex parte Angeli , quia
 sufficienter est in actu primò , & potest
 causare in alio Angelo actum secun-
 dum : sed ratio est ex intellectu nostro ,
 qui pro statu isto est passivum determi-
 natum ad determinatum activum , ut
 ad phantasmata , & intellectum agen-
 tem : & ideo impeditur ne possit recipere
 immediatè immutationem ab aliquo
 actu intelligibili sine phantasmate ; quia
 phantasmata se habent pro statu isto ad
 intellectum nostrum , sicut sensibilia ad
 sensum ; quoad hoc scilicet , ut sicut sensus
 non immutatur primò , nisi à sensibi-
 li extra , sic nec intellectus noster pri-
 ma immutatione immutatur , nisi à
 phantasmate .

Ex quibus infert , quòd nullus Ange-
 lus potest naturaliter hominem in ex-
 tasim rapere per intellectionem seu vi-
 sionem intellectualem , & quòd omnis
 raptus factus virtute Diaboli , fiat pri-
 mò , & directè ad imaginationem ali-
 quam vehementem , quam concomita-
 tur , aut potest comitari cognitio intel-
 lectualis ejusdem objecti , quæ imagina-

tio potest esse tam vehemens , ut di-
 strahat hominem ab attentione ad ul-
 lum aliud objectum ; & denique quòd
 omnis raptus ad quem homo potest
 seipsum per consuetudinem disponere ,
 sit etiam ad aliquid imaginabile consi-
 derandum . Quamvis fortè Deus ani-
 mam consuetam se retrahere ab omni-
 bus aliis objectis ad considerationem
 alicujus unius objecti boni , v.g. passio-
 nis Christi , aut gloriæ Paradisi quando-
 que rapiat ab illa consideratione ad
 considerationem merè intellectualem
 independentem à phantasmatibus , ta-
 lem scilicet , quam haberet anima extra
 corpus .

Observandum secundò ex eodem ibi-
 dem numero 5. ut ipsum explicat Pon-
 cius , quòd Angelus non possit in ho-
 mine producere cognitionem ullam in-
 dependentem à phantasmatibus , neque
 etiam dependentem tamquam causa to-
 talis aut partialis immediatè concurrens
 effectivè ad ipsam cognitionem ; posset
 tamen docere hominem ; quæ sententia
 est communis , & probatur . Quia sicut
 homo docet hominem proponendo signa
 illi taliter inter se ordinata , ut ipse
 possit cognoscere , quod ignoravit ante :
 Ita etiam Angelus potest facere ; quia
 in corpore assumpto posset loqui tam
 benè quàm homo , & quia melius
 cognoscit naturas rerum , facilius , &
 citius posset perducere ad cognitionem ,
 quàm homo . Deinde Angelus potest
 excitare illas species quas quis habet ,
 eo ordine quo determinare possint
 ipsum ad cognoscendum aliquid antea
 ignotum , & hoc faciendo doceret , &
 instrueret .

Rursus posset ipsismet res proponere
 secundum talem rationem , secundum
 quàm ex ipsis posset quis cognoscere
 aliquid , quòd antea ignoravit ; & sic
 etiam doceret , in quo non est diffi-
 cultas .

An autem Angelus citius hominem
 docere posset urendo signis naturalibus
 ad

ad placitum institutis,quàm doceri possit ab altero homine,id fore mirum existimat Doctor; *Mirum enim*, inquit, *videretur,si citius posses immutare visum multis sensibilibus,vel visibilibus, à quibus abstraherentur species necessariae ad unam magnam argumentationem hominis quàm posses ipse, vel homo uti signis illis ad placitum institutis representantibus illa objecta.*

Verùm id non solum mirum videri debet, sed etiam impossibile, si sit sermo de cognitione, quæ indigeret variarum rerum propositione; sed non dubitò quin possit citius docere monstrando reus ipsam unam, vel alteram de natura illius, quàm homo posset loquendo.

Observandum tertio, ex eodem ibidem numero 6. quòd Angelus nequit producere novum phantasma in phantasia hominis, nisi mediante objecto naturaliter causativo ejus; & ratio est, quia non potest producere visionem albedinis cum oculo absque concursu ipsius albedinis, nec potest etiam consequenter producere speciem visibilem ejus absque albedine, ut omnes fatentur; Et certè gratis illa virtus ipsi concederetur: Ergo à pari, non potest producere actum phantasiæ, aut speciem requisitam ad talem actum absque concursu objecti: Posito autem concursu objecti, sufficit concursus ipsiusmet potentiae, & sic Angelus nullum debet habere concursum immediatum ad actum aut speciem. Itaque solum potest concurrere per modum proponentis objectum, aut speciem ejus, & per modum etiam removens impedimentum.

QUAESTIO SECUNDA.

An, & quâliter Angeli sancti ad hominum custodiam deputentur.

NOTANDUM I. Quòd quamvis Deus, sicut omnia per semetipsum immediate produxit, ita pariter res omnes

sua providentia particulari administree, dirigat, servet, & certos ac sibi debitos in fines ordinet, ac deducat; nihilo minus executionem hujus providentiæ, quam gubernationem, seu directionem appellamus, solus immediatè non intendit, nec efficit; sed quibusdam creaturis interdum utitur ad alias servandas, & moderandas. Consentaneum enim suæ divinæ bonitati judicavit, non solum creaturas sui esse particeps efficere, sed, & virtutem agendi, & communicandi se aliis voluit impartiri, quatenus divinam bonitatem, & modum illius communicationis possent aliquatenus æmulari, & participare. Ideo per quasdam creaturas in alias influit, sicut per Solem in alia corpora lucem, ac splendorem diffundit, & ut loquitur S. Augustinus lib. 3. de Trinitate cap. 4. *Sicut corpora crassiora, & inferiora per subtiliora, & potentiora quodam ordine reguntur; ita omnia corpora per Spiritum vitæ, & Spiritus vitæ irrationalis per Spiritum vitæ rationalis, & Spiritus desertor per Spiritum pium, & justum, & ille per ipsum Deum regitur, & administratur. . . . Nihil enim fit visibiliter, & sensibiliter, quod non de interiori, invisibili, & intelligibili aula summi Imperatoris, aut jubeatur, aut permittatur.*

Notandum 2. Duos maximè esse modos custodiendi rem aliquam; *Primus* fit cùm ab ea removentur, & eliminantur causæ omnes, vel occasiones, quæ ipsi nocere possunt, & bonum ipsius, vel acquisitum auferre, vel acquirendum præpedire. *Secundus* verò fit cùm bonum ipsius promovetur, ipsam nempe ad perfectiorem statum aut excitando, aut ad eum adipiscendum illam, adjuvando per vires internas superadditas, vel per interiùs inspiratam majorem illius boni notitiam, ex qua desiderium ardentius illius consequutionis accendatur. Sic bonus Pastor oves dicitur custodire, non solum ab eis lupum,

pum, & omnia nocentia removendo; sed etiam uberiora, & meliora pascua, & alia ipsis commoda animo vigili procurando. An autem utroque hoc modo Angeli nos custodiant, hic determinandum est.

Notandum 3. Angelos maxime nobis invigilare, & servire propter tria, ut observat seraphicus Doctor, vel quisquis est alius Author compendii Theologicæ veritatis lib. 2. cap. 18. scilicet, propter ruinæ suæ reparationem, quia homines salvandi intrabunt in locum cadentium Angelorum. Item propter meriti accidentalis cumulationem, quod augetur in eis usque ad diem Judicii. Item propter amoris erga nos demonstrationem. Ut fusius infra demonstrabimus. Quibus præmissis, tria sunt hic determinanda. *Primum*, an reverè Angeli ad hominum custodiam deputentur. *Secundum*, an hominum quilibet sibi specialem Angelum custodem destinatum habeat. *Tertium*, an etiam cæteræ creaturæ Angelo custode donentur.

CONCLUSIO PRIMA.

Defide est SS. Angelos per ineffabilem Dei providentiam ad hominum piatorum custodiam deputari.

Probatum primò ex Scriptura, imprimis verò ex illis verbis Psalmi 33. *Immittet Angelus Domini in circuitu timentium eum, & eripiet eos*; seu, ut ex Hebræo vertit S. Hieronymus, *Circumdabit Angelus Domini in gyro timentium eum*. Vel ut alia versio habet. *Custro metatur Angelus Domini in circuitu timentium eum*. More quidem Ducum, qui castra sua juxta arcem, vel civitatem constituunt, & ordinant, ut eam ab hostibus tueantur. Unde Salmeron ex Græco vertit, *Castra sua instruit aciebus Angelus collocavit in circuitu timentium eum*. Nempe, ut immisiones per Angelos malos undequaque propellat. Hinc S. Basilii in eadem verba Psalmi. *Sicut*, inquit *muri civitatis circumdant omni ex parte arcem*

propulsantes hostiles incurfus. Sic, & Angelus te præmunit à fronte, & à tergo custodit; & nihil utrimque in custodiendo relinquit. Clarius hanc Angelicam tutelam, & custodiam describit, & aperit Regius Vates Psalmo 90. his verbis, *Angelis suis Deus mandavit de te, ut custodiant te in omnibus viis tuis, in manibus portabunt te, &c.* quem Psalmum licet ad litteram de Christo exponant S. Ambrosius Luc. 4. & Augustinus ad illa Psalmistæ verba. Nihilominus censent alii S. Patres, & Doctores cum S. Hieronimo, & ibi sermonem esse generalem de omnibus hominibus, maxime de Justis: siquidem Psalmi principium Justos omnes designat his verbis, *Qui habitat in adjutorio Altissimi*. Unde præfata verba mirum in modum exponens S. Bernardus in Psalmum, *qui habitat*, ait, *Mira dignatio, & verè magna dilectio charitatis, quæ enim, quibus, de quo, quid mandavit consideremus fratres*. Tum singula ea quatuor expendit, & *Primum* quis; quantumque sit, qui tale mandatum dedit, Deus nempe qui magnus est, & laudabilis nimis, & cujus magnitudinis non est finis. *Secundum* quibus mandavit? Angelis ipsis, utique creaturis nobilissimis, potentissimis, sapientissimis: Tam sublimibus, tam beatis, tamque sibi proximè coherentibus, & familiariter adherentibus, ac verè domesticis: *Tertium* de quo mandavit Deus? Utique de homine, unde exclamat idem Bernardus cum Davide, *Domine quid est homo, quod memor ei ejus, aut filius hominis quoniam reputas eum? Quasi verò non sit Homo putredo, & filius hominis cinis*. Apponit tamen erga eum cor tuum, & geris pro eo sollicitudinem, curam ejus habes, neque ei solum mittis Unigenitum tuum, immittis Spiritum tuum, promittis vultum tuum: sed interim, ne quid in cœlestibus vacet ad opera sollicitudinis nostræ, Bea-

Beatos illos Spiritus propter nos
mittis in ministerium, custodiæ no-
stræ deputas, nostrosque jubes fieri
Pedagogos.

Addo quid est admirabilius, quàm
pulcherrimos Aulæ syderem procures,
Triadis honorarios, Palatinos cælitæ;
Genios illos magnificos, & ornatu om-
nium gratiarum nobiles, illos divinis
honoribus perfruentes, & beatos devo-
lare ad homines, se illis benignissimè
adjungere, eosque tueri, & humanissi-
mè complecti? Homines, inquam, in
Deum impios, iræ filios, multis crimi-
nibus maculatos, crudelitate prope bel-
luas, vecordiâ pecudes, in eos ipsos
tutelares Ingratos? Sunt enim Angeli
Olympici Dynastæ, & Empyreæ domus
purpurati, apud Augustum orbis terræ
opificem, & Dominum gratiosi, Præ-
fecti Universitatis, & rerum omnium
creatarum Præsules, quibus dominans
in nobis Deus, & supremus Imperator,
dedit hominum atque omnium, quæ
sub Cælo sunt curam providentiamque,
ait, Justinus martyr *Apolog. 1.*

Quartum denique considerandum
occurrit ex S. Bernardo, Quid manda-
vit Deus Angelis suis de nobis, ut vi-
delicet custodiant nos in omnibus
viis nostris? Nempe in omnibus vi-
eis, foris, & plateis in quibus instar
sponsæ Canticorum Deum quærimus;
in omnibus itineribus, locis, negotiis,
& exercitiis, quippe in omnibus lapis
offensionis, petra scandali, & laqueus
tentationis ab hoste immittitur.

Hæc ipsa veritas firmatur pluribus
ex Novo testamento depromptis oracu-
lis; maximè verò ex illo *Matthæi 18*: ubi
Christus de fidelibus, pusillorum, hoc
est, humilium nomine, loquens, ait,
*Videte ne contemnatis unum ex his pusil-
lis, dico enim vobis, quia Angeli eorum
in Cælis semper vident faciem Patris mei
qui est in Cælis.* Quasi diceret, eos non
esse contemnendos, maximè quia tanti
sunt meriti apud Deum, ut non dedi-

gnatus fuerit Angelorum illis custo-
diam tribuere: Namque inquit Euthi-
mius in hæc verba, *Quos servant Ange-
li, hos despicere non oportet, etsi non pro-
pter illorum virtutem, saltem propter
Custodes eorum.* Unde S. Hylarius, *pe-
riculose ille contemnitur, cujus desideria,
& postulationes ad Deum, Angelorum
ministerio perveniunt.* Confirmatur ex
illo Pauli ad *Hæbræos*: *Omnes sunt Ad-
ministratores Spiritus in ministeriis missi
propter eos, qui hereditatē capissent salutis.*

Probatur hæc eadem veritas testi-
monio SS. Patrum, primò quidem
Dyonisii qui in c. 9. *de cælesti Hierarchy*,
specialiter de tertia, seu infima
Hierarchy Angelorum dixit præesse
humanis ordinibus, ut referantur ad
Deum, & convertantur. Hermas etiam
alius S. Pauli Discipulus ut fertur in
lib. qui Ecclesia dicitur, divisione 3. Scri-
bit se custoditū, & præservatum per An-
gelum bonum dictum *hægrim*, à magna
quadam bestia quæ in forma Retis ap-
paruerat, ex cujus ore locustæ ignem
egrediebantur. Clemens Alexandrinus
lib. 6. *Stromatum* circa finem: *Divina
virtus, inquit, præbet bona per Angelos,
sive videantur, &c.* Origenes humilia 8.
in *Genesim*, *Angeli tenent curam ani-
marum nostrarum, & quod eis ab infan-
tia tanquam Tutoribus, & Curatoribus
committimus.* Nazianz. *carm. 6. de sub-
stantiis separatis*, de ministrantibus
Angelis sic ait, *Pronaque ad obsequium
pari altera sustinet orbem, auxilioque
suo servat, &c.* Gregorius Nyssen. lib. de
vita Moysis; *Eh, inquit, sermo ex Ma-
jorum traditione fædem sibi vendicans,
quid infestè postea quam natura nostra in
peccatum decidit, Deum hunc lapsum
nostrum provididit, suâ curâ minime de-
stituisse: sed Angelum quemdam ex his
qui naturam corporis expertem sortiti
sunt addibuisse, ad unum cuiusque tute-
lam ac præsidium. At ex adverso, natura
Corruptorem pari machinatione contra-
niti, & pravo quodam ac malefico adjun-
cto*

De-

Demone humane vite perniciem efferre. Porro hominem in amorum medio constitutum alterutrius ad certum scopum ac propositum alterius proposito contrarium suppete momento, valentius redere. Ambrosius lib. de viduis post medium: *Obsecrandi sunt Angeli pro nobis, qui nobis ad presidium dati sunt:* Et in Psalmum 37. *Quomodo, inquit, longè stant qui ad adiumentum sunt attributi?* Et Psal. 43. in id, *QUI MANDAS SALUTES* JACOB: *Salvi, ait, in ministeriis Angelorum, qui ad protectionem hominum deputantur.*

Suadet hanc veritatem 'Seraphicus Doctor diss. 11 art. 1. *quæst. 2. triplici ratione; Conveniens erat, inquit, homini lapso deputari custodiam Angelicâ: Tum quia decet altitudinem divinæ potentiae: Tum quia decet ordinem sapientiæ: Tum quia etiam decet dulcedinem misericordiæ. Altitudinem namque decet potentiae, duplici ex causa, una est, quia Deus non solummodo vult honorari in se, sed etiam in suis servis: Unde non fufficit altitudini divinæ potentiae quòd Angeli ministrarent sibi, sed etiam ad ostensionem excellentis suæ potentiae hoc ab eis exigit, ut ministrarent etiam creaturæ suæ: Alia est ratio, quia cum Deus habeat Diabolum, & ejus Demones adversarios, magis decet quòd ipse eos vineat per suos ministros, ut per hoc ostendatur potentia manus Dei, quia non solum potens est in se, sed etiam in servis suis; & ut non indebit possit Dominus exercituum appellari. Ordinem verò sapientiæ similiter decet; nam hic est ordo quem divina lex in suis operibus exequitur, & conservat, ut postrema per media deducat, ad summa; quoniam igitur Angelus tum ratione immortalitatis naturæ, tum etiam ratione gratiæ consummate medium tenet inter Deum, & hominem lapsum, decess, fuit, ut Deus*

hominem adjuvaret, & custodiret per Angelum. Dulcedinem etiam decet divinæ misericordiæ, quæ aperuit sinum homini lapso, nec in aliquo ei defuit, quod spectat ad salutis suæ promotionem; & ideo etiam homo lapsus, esset venumdatus ut faceret malum, ei ministravit præmium sanguinis Filii sui, per quem est redemptus, ut faciat bonum; & quia habet adversarium impugnantem, dedit ei ministrum custodientem, vel custodem auxiliantem; ut sic ex nulla parte miseria remaneret humana sine divinæ misericordiæ subsidio, & beneficio. Competebat igitur homini lapso dari ex hac triplici ratione Angelicam custodiam.

Hanc eundem veritatem mirum in modum probat, & confirmat Guillelmus Parisiensis secunda parte de Univerſo cap. 158. *Primo* quidem quia, inquit, naturalis est pietas, & dilectio in hominibus ad invicem, naturalisque amor honestatis, & compositionis vitæ, per quem unusquisque paterfamilias ad hoc intendit, ut componantur mores, & decoretur vita familiæ suæ in forinsecos. Etiam ostendit hanc pietatem, & dilectionem, movens eos atque corripiens à vitiis, & peccatis quibus deformantur mores hominum, & vita turbatur; & nemo dubitavit adhuc quin hoc, & bonum sit, & Deo altissimo placitum. Quantò fortius igitur in Sanctis, ac beatissimis Angelis est ista naturalis pietas atque dilectio, & etiam tantò major quàm in hominibus, quantò nobilitas eorum ad hæc, & alia bona omnia expeditior est, atque potior quàm ipsi homines in miseria vitæ præsentis. Si igitur natura humana in ista depressione, & miseria homines bonos à correptione, & gubernatione hominum, quod possibile est, abstinere non patitur; quantò magis nobilissima illorum

„ bonorum Angelorum natura ex in-
 „ comparabiliter majori pietate atque
 „ dilectione, miserabilissimos homines
 „ suis consiliis, & auxiliis aliisque om-
 „ nibus ad gubernationem eorum per-
 „ tinentibus, carere non sinet.

„ *Secundò*, Si in tantum possunt apud
 „ homines naturalis pietas atque dile-
 „ ctio, ut quemadmodum prædixi, alii
 „ aliis consulant, Alii alios adjuvent,
 „ aliisque officium regiminis impen-
 „ dant; quanto magis hoc poterunt
 „ pietas ac dilectio, ut beati ac sancti
 „ Angeli in tanta miseria, ac desola-
 „ tione deesse nolint hominibus.

„ *Tertiò* si iustitia est quæ nec mise-
 „ rum facit, nec miserum deserit, nul-
 „ la igitur erit iustitia sanctorum, ac
 „ beatorum Angelorum, si curam non
 „ gerant hominum.

„ *Quartò*, Si hominibus datur po-
 „ testas in homines, & præficiuntur
 „ eis Rectores hominum, & hoc con-
 „ tra perturbatores publicè faciunt
 „ homines atque privatè; quanto for-
 „ tius contra malignos Spiritus qui
 „ maximè infesti, maximè noxii sunt
 „ hominibus, necessarij sunt eis Re-
 „ ctores, & Defensores? Si igitur cura
 „ est Creatori, videlicet Deo altissimo,
 „ ut omnes Rectores, & Defensores
 „ habeant sive Reges, & Principes
 „ contra infestatores, & perturbatores
 „ homines; quanto fortius cura est
 „ eidem Creatori benedicto, ut sint
 „ eis rectores, & defensores, contra
 „ infestatores, & perturbatores spiri-
 „ tuales, videlicet malignos spiritus,
 „ ubi tanto magis indigent hujusmodi
 „ regimine, & cura, quanto majora
 „ sunt spiritalia, bona, & mala cor-
 „ poralibus, & temporalibus.

„ *Quintò*, Cùm ordinata sit univer-
 „ salis gubernatio Dei altissimi, &
 „ nihil ultra gubernationem suam esse
 „ patiatur, nihil finat debito carere,
 „ regimine, unumquodque igitur pro
 „ modo, & ordine suo congruentibus

„ subjecit rectoribus: manifestum,
 „ autem est quia homines hominibus,
 „ nec congruentes pro toto, nec suf-
 „ ficientes rectores existunt, maximè
 „ cùm in majori, & meliori parte re-
 „ giminis eorum deficiant, videlicet
 „ contra principes militiæ spiritalis;
 „ contra eos enim virtute sua aut sa-
 „ pientia incomparabiliter minis pos-
 „ sunt, quàm requirat cura guberna-
 „ tionis hominum. Ut igitur perfecta
 „ sit gubernatio Dei altissimi quæ regi-
 „ totum indiget universum, necesse
 „ est & sapientiores, & fortiores atque
 „ modis omnibus meliores esse recto-
 „ res hominibus; præsertim propter
 „ infestationes ac perturbationes quæ
 „ hominibus, & rebus humanis à spi-
 „ ritibus proveniunt; præsertim cùm
 „ manifestum sit per gubernationem
 „ Rectorum, hoc est regentium, ho-
 „ mines nec astutiz, nec potentiz ma-
 „ lignorum spirituum resistere posse;
 „ alioquin, quid aliud esset de ho-
 „ minibus? Nisi quoddam malignis spiri-
 „ tibus tanquam animalia occisionis
 „ absque Pastoribus, & Custodibus
 „ dati essent in prædam, & devora-
 „ tionem, quod bonitas atque beni-
 „ gnitas Creatoris benedicti nullo
 „ modo patitur. Ita Guillelmus.

Dices 1. Angelica custodia detrahit
 hominum libertati, & meritorum præ-
 stantiæ: Ergo non videtur admittenda.
 Probatur antecedens: Homo per libe-
 rum arbitrium non potest ad malum
 compelli, nec violenter agitari: Ergo
 de se sufficiens est qui resistat Adver-
 sariis: Frustra ergo Angeli ad ejus custo-
 diam deputantur, aut ipsius libertatis
 gloriæ Angelica illa custodia quidpiam
 detrahit.

Insuper: Tantò major est gloria Vin-
 centis, quantò paucioribus auxiliis de
 adversario triumphat. Ergo gloriosius
 esset homini diabolum vincere per se-
 ipsum, quàm cùm adjuvante, & com-
 prahente Angelo: subindeque ipsa An-
 ge-

gellica custodia ipsius gloriæ sicut, & libertati quidpiam detrahit.

Nego antecedens quantum ad utramque partem, Quamvis enim fortè homo per liberum arbitrium gratiæ auxilio, & beneficio roboratur per se sufficeret ad repugnandum contra adversantes, & illustrem de ipsis triumphum reportandum: Attamen quoniam non est ipsi colluctatio adversus carnem, & sanguinem, sed adversus Principes, & Potestates, & contra spiritualia nequitie in cælestibus, cum ipse sit debilis, & infirmus, frequentius ab eis vinceretur, quàm vinceret, nisi Angelos sanctos haberet adversus malos Angelos compliantes, *Neque enim*, inquit Petrus Damianus Epist. ad Alexand. 11. summum Pontificem, *versutia tam calidi, & exercitati hostis posset fragilitas humana resistere, nisi cum à temptationibus Electorum virtus Angelica propulsaret.* Multò igitur ei melius est, & gloriosius cum Angelico præsidio tam formidandos hostes vincere, quàm absque præsidio superari.

Dices 2. Ex illo Christi Domini Luc. 12. Oraculo, *Major est qui recumbit quàm qui ministrat*: Ergo si Angelus hominem custodiendo ei ministrat, sequitur hominem Angelo esse superiorem: sed falsum consequens: Ergo, & antecedens. *Insuper*, Si Angelus hominem custodiat, vel id habet à natura, vel à gratia: si à natura, sequitur, quòd Dæmones debeant etiam hominum custodes censerì, naturalia namque in eis integra permanserunt: Si à gratia, cum una anima aliam in gratia excedat, ad illius custodiam deberet deputari.

Nego utramque consequentiam, & ad antecedens primæ, dico illud quidem verum esse de ministerio subjectionis, non verò de ministerio præsentie: Angelus autem hominem custodiendo ministrat ei præsidendo, & illum regendo ac docendo, ut pedagogus parvu-

lum; non serviendo, & obediendo, ut famulus Domino.

Ad antecedens secundæ consequentiæ, dico Angelum habere simul à natura, & à gratia, quod hominem possit custodire: A natura quidem, quia est homine fortior, & potentior: à gratia verò quia est præstantior, & firmior: Ideo ex utroque capite ei convenit hominem regere, & proteggere.

Dices 3. Soli Deo convenit hominem custodire: Ergo non Angelo: Probatur antecedens, Tum quia Deus in Scriptura dicitur hominum custos sic Job. 7. *Quid faciam tibi ó custos hominum?* Et Psalmo 120. *Ecce non dormitabit neque dormiet qui custodit Israël.... Dominus custodit te ab omni malo custodiat animam tuam Dominus: Dominus custodiat introitum tuum, & exitum tuum.* Tum quia custodia ordinatur ad præservandum hominem, ne in Diaboli captivitatem ruat: sed ejusdem est præservare in libertate, cujus est liberare, & redimere à captivitate: Ergo cum solius Dei sit à captivitate redimere, etiam solius ejus est in libertate custodire, & conservare.

Nego antecedens, & ad primam ejus probationem dico: Cum Seraphico Doctore supra laudato ad 5. quod perfectio divinæ custodiæ non excludit utilitatem Angelicæ. Sicut enim Deus propter suæ bonitatis ostensionem, & ordinis sapientie manifestationem, creaturis communicavit posse operari, & effectivè alias creaturas producere, ipso tamen producente, & cooperante; sic dedit Angelis posse hominem custodire, cum tamen à servorum suorum custodia nusquam ipse desistat, quia, talis custodiendi virtus Angelicæ gratiæ, & naturæ dignitatem decebat: Divina ergo custodia Angelicæ non officit: imò divina confert ad Angelicæ perfectionem; & Angelica ad divinæ commendationem, & manifestationem.

Ad ſecundum probationem, Nego paritatem cum eodem Seraphico Doctore: Redimere enim, eſt mortuum viviſicare; ſolius autem Dei eſt vitam primò conferre, & eam deperditam de novo reſtituere: Cuſtodire verò dicit tantum aliquem beneficiæ actum externum, qui poteſt à præſtantiore natura, & virtute potentiore conferri: ideo non mirum, ſi Angeli qui hominem à Dæmonis captivitate ſolvere non potuerunt, poſſint tamen eum cuſtodire, & ſervare, ne ruſus in eam præceps per peccatum ruat.

CONCLUSIO SECUNDA.

Singulis hominibus, ſive parvulis, ſive adultis, ſive fidelibus, ſive infidelibus, prædeſtinatis, aut reprobatis, peccatoribus, aut iuſtis deputantur ſinguli Angeli cuſtodes. Hæc receptiſſima eſt apud Catholicos contra Calvinum lib. 1. *Inſtitutionum* cap. 14. Ubi mendaciſſimè affirmat incertum eſſe an ſingulis hominibus ſinguli Angeli aſſignentur: Et ſuper *Pſalmum* 90. addit falſum eſſe commentum. Hanc veritatem ex Scriptura ſacra colligit S. Baſilius lib. 3. contra Eunomium: *Quòd autem*, inquit, *uniquique fidelium adſit Angelus tanquam Pedagogus aliquis, & Paſtor vitam gubernans, nemo contradicat, qui Domini verborum meminerit dicentis, Ne contemnatis unum ex his pusillis, quoniam Angeli eorum ſemper vident faciem Patris mei, qui in Cælis eſt.* Et *Pſalmiſta* dicit, *Caſtra metabitur Angelus Domini in circuitu timentium, ipſum.* Et *Angelus* qui eruit me à juventute mea, & cætera id genus. Quibus Scripturæ locis commune Catholicorum dogma Baſilius adverſus Calvinum adſcribit. Ipſi ſubſcribit Hieronymus, qui eundem locum expendens ait, *Magna dignitas animarum, ut unaqueque habeat abortu natiuitatis in, cuſtodiam ſui Angelum delegatum.* Primò ſignanter dicit *unaqueque*, non enim unus Angelus cuſtodit plures ho-

mines: *Tum quia* non poteſt eſſe Angelus cuſtos ſimul in pluribus locis, & ſæpe poteſt cōtingere, ut duo homines loco diſtantes indigeant locali præſentia, & aſſiſtentia ſui Angeli: Unde ſi eſſet unus Angelus, & idem, non poſſet utrique convenienter ſubvenire. *Tum quia* hoc magis magnificentiam, & liberalitatem Dei commendat. *Tum denique quia* veriſimile ſibi in infima Hierarchia plures eſſe Angelos, quàm ſint homines actu, & de facto exiſtentes, ſubindeque non appareat neceſſum, quod unus plures homines cuſtodiat.

Probatuſ inſuper Concluſio; Idque primò de infantibus, & parvulis. Hoc enim primò diſertè edocet S. Hieronymus dicens, *Supra hoc unaqueque anima ab ortu natiuitatis ſibi deputatum habet Angelum.* Quæ verba licet aliqui ut S. Thomas 1. p. q. art. 5. ad 3. Explicent de Nativitate non in utero, ſed extra uterum; quia, inquit, puer cum eſt in utero eſt veluti pars, & fructus matris. Unde quemadmodum, qui cuſtodit corpus, aut arborem, etiam cuſtodit partem corporis, & fructum, arbori connexum; ita Angelus Matrem cuſtodians, etiam puerum cuſtodit quandiù eſt in ejus utero.

Attamen jam omnes pœne conveniunt, quòd illa Angeli deputatio fiat ſtatim; ac anima corpori inſuſa eſt. Hoc apertè docuit S. Anſelmus in elucidario ſcribens, *Unaqueque anima, dum in corpus mittitur Angelo committitur*: Anima autem in conceptione inſunditur; Ergo in conceptione ad ejus cuſtodiam Angelus deputatur. *Suadetur inſuper hæc veritas ratione, primò*, quia ſtatim, ac parvulus formatuſ eſt, incipit eſſe homo viator: Unde licet phyſicè ſit quaſi pars Matris, tamen in ordine ad ſalutem animæ, eſt perſona diſtincta; Unde eſt capax peccati originalis, etiamſ Mater ſit ſancta, & per gratiam Dei eſt capax meriti, ut in Joanne Baptiſta. cernere eſt. Item cre-

di-

dibile est statim illi adjungi Dæmonem, qui specialiter nocere, & damnum inferre procuret: Ergo etiam debet illi Angelus ex tunc deputari, ut Dæmonem arceat, & alia impedimenta tam corporalia, quàm spiritalia, ex tunc præcaveat. *Neque* obstat, quòd Angelus cultus Matris, possit hanc curam suscipere: quia solum pertinet ad illum, quandiu ad bonum Matris est necessaria. Potest autem in solius Filii utilitatem redundare, & speciali affectu, & magis proprio propius Angelus illam habeat. Et interdum Mater non parens suo Angelo, potest aliquid tentare Filio nocivum, quòd Angelus Filii custos impedire poterit. *Denique* hæc providentia liberalior est, ideoque huic parti libentius adhæreo.

Qualiter autem, & quam ob causam fiat hæc Angelica custodia erga parvulum sive in utero, sive extra Matris uterum existentem, edocet Alensis *qu. 41. memb. 4. articulo 3.* Accipitur autem, inquit, ratio hujus custodiæ tam ex parte Angeli custodientis, quàm ex parte hominis custoditi: *Ex parte Angeli*, ratio est meritum, meretur enim præmium accidentale ex custodia hujusmodi: *Ex parte verò parvuli* accipitur ratio, tum ex parte corporis, ut scilicet bonus Angelus custodiat corpus parvuli à vexatione contrariæ potestatis: Tunc ex parte animæ, & hoc dupliciter, quia sumitur ratio animæ secundum se, & ex conjunctione animæ ad corpus. *Ex parte animæ in se*, quia quam cito anima creatur, vertibilis est ad bonum, sive ad malum, & potest proficere, non tunc, sed postmodum: & ideo datur ei custos Angelus, non pro tempore isto, idest, non ut tunc faciat eam proficere, vel retrahere à malo, sed ut ordinet eam, & disponat, & habiliet ad hoc, ut postmodum proficiat, quando tempus erit utendi ratione. *Ex parte autem animæ prout conjungitur corpori*, potest accipi ratio custodiæ in parvulo,

quia anima, quàm citò unitur corpori, corrumpitur corruptione vitiosa; exinde contrahit corruptionem: Unde anima, quàm citò est conjuncta corpori, subito procedit in alteram habilitationem, sive ad malum, sive ad bonum; quamvis non sit nota hujusmodi habilitatio, & ad hujusmodi habilitationem juvat, & ordinat Angelus bonus, qui datur ei custos: sicut fortè illa corruptio, quàm contrahebat ex corpore, juvabat ad habilitandum ad malum.

Dices, Pueri non possunt deficere per culpam, nec in melius proficere per bonum opus, cum usu rationis careant: Ergo frustranea ipsis est Angelica custodia.

Distinguo antecedens; Non possunt proficere pro tunc, & quandiu rationis usum non obtinent, concedo: non possunt proficere pro tempore futuro, dum perfectio rationis usu donabuntur, nego, ut exposuit Alensis supra.

Probatur similiter Conclusio quantum ad cæteras partes: Nempe quòd omnes prorsus Adulti sive prædestinati, sive reprobi, sive peccatores, sive iusti specialem sibi deputatum Angelum ad custodiam habeant. Et quidem primum constat *de Reprobis*; Tum quia ipsis conceditur auxilium sufficiens ad salutem: Custodia autem Angelica est extra latitudinem talis auxilii sufficientis: Ergo ipsis est concedenda. Major constat: Minor probatur. Deus permittit reprobos tentari à Dæmone, & consequenter debet illis protectionem, & sufficientem defensionem præbere: Hanc autem per Angelos custodes subministrat: Ergo illam ipsis denegare, non debuit: *Tum quia* licet hæc custodia non habeat effectum meriti vitæ æternæ; nihilominus per illam revocantur à pluribus malis, quæ haud dubiè perpetrarent, nisi bonus Angelus illos retraheret. *Tum quia* Deus permittit prædestinatos habere Dæmones ipsorum salutis insidiantes: Ergo pari jure

Angelicam custodiam reprobis debet concedere, ut eorum salutis qua possunt via invigilent. *Tum denique quia*, hæc custodia in bonum prædestinatorum redundat; nam per illam arcantur Demones instigantes reprobos homines, ne noceant Electis quantum cupiunt.

His solvi potest, & explicari S. Paulus, dum asserit Hæbræorum primò, *Angelos in ministerium mitti propter eos, qui hæreditatem capiunt salutis*: Sic enim ministeria Angelorum circa reprobos redundant in bonum eorum, qui hæreditatem capiunt salutis; præphatis enim verbis significare voluit S. Paulus, finem Angelici ministerii in universum, esse hominum salutem, & idcirco circa homines exerceri, licet fructus maximè compleatur in his, qui effectivè salvantur.

Hæc eadem veritas constat de peccatoribus quibusque: *Tum quia* inquit Seraphicus Doctor *diff. 11. quæst. 1.* Parrior non est bonus Angelus ad conferendum in bono, quam sit malus Angelus ad præcipitandum in malum: sed malus Angelus quantumcumque homo sit bonus, usque ad mortem non cessat ipsum infestare: Ergo videtur quòd nec bonus quantumcumque malum hominem usque ad mortem desinat custodire. *Tum quia* quantum aliquis pejor est, tantò est pronior ad malum, & quantum pronior ad malum, tantò magis indiget retrahente: Ergo cum Angelus ad custodiam deputatus ad hoc ordinetur, ut retrahat à malo, videtur quòd non debeat hominem quantumcumque peccatorem deferere: *Tum denique quia*, de nemine desperandum est, dum adhuc viator existit: Ergo quantumcumque aliquis in peccato sit obstinatus, semper affulget aliqua spes ejus salutis: Sicut igitur medicus nullum ægrotum deserit, nisi priùs de restituenda ejus salute spem omnem perdidit; ita

nec Angeli animarum medici, neminem deserere debent, quandiu viget aliqua salutis spes.

Hæc autem tamdiu viget, quamdiu homo viator existit: Ergo neminem Angelus custos deferere debet ante mortem.

Dicitur 1. Plurimi è sanctis Patribus affirmant non omnes homines, sed justos tantum habere Angelos custodes, ita indicat Didymus apud Damascenum *lib. 4. Parallel. cap. 7.* dicens, *Probi, ac sancti viri lucidos Angelos custodes habent; Mali autem tenebrosos.* Idem Evagrius apud eundem indicat, scribens, *Scientia, ac Sapientia ipse multos vobis Angelos jungunt: at vir impius, ac flagitiosus etiam ab eo Angelo, qui ipsi a puero datus est, disjungitur.* Hoc ipsum significat S. Basilus in *Psalmum 33.* ubi docet solis fidelibus, & piis Angelos assistere, peccatores autem deferere: *Cuiusque credenti in Dominum, inquit, Angelus assistit, nisi forte nos ipsum improbi salis effugemus: nam ut apes fumus in fugam agit, & columbae malus odor abigit: ita vite nostre custodem Angelum lacrymosum, sordidum peccatum repellit.* Et in Commentariis ad Ilayam exponens illa verba Prophetæ, & *auferam sepem ejus*, de Angelorum custodia interpretatur, scribens; *Fieri etiam potest Angelum, ut cum unusquisque nostrum habeat sanctum, qui castra metatur in cirenitu timentium Dominum, in peccatis deprehensus, buie plagæ, quam minatur, fiat obnoxius, & muro prioretur, hoc est sanctarum virtutum tutela.* Confirmari potest ex illis verbis Jeremiæ 51. *Curavimus Babylonem, & non est sanata, derelinquamus eam.*

Respondet Sanctos Patres ita posse explicari, ut solum velint Angelos homines pios dumtaxat custodire, & peccatores deferere, non quòd omnino horum curam non habeant, sed quòd aâualem operationem, & exercitium

custodire interdum remittant propter hominum incapacitatem, vel resistantiam. Non autem volunt, quod eum omnino deserant, nec ullam illius curam amplius gerant, contrarium enim legimus *Exodi 23*. ubi Deus promittens Iudaico populo Angelum custodem, subdit, *non dimittes eum peccaveris*. Et hoc ipsum ratione suadet. Cum enim Dæmon non desistat à tendendo iustum propter eximia iustitiæ opera, sic nec sanctus Angelus deseret peccatorem: nam ut dixit Ambrosius in id *Psalmi 38*. *Ornatus, et humiliatus sum, &c. Angelus in circuitu est hominis, ne quis noceat ei, non discedit Angelus, nisi iussus à Domino*. Insuper hæc cura data est Angelo independentè ab hominis viatoris fide, vel gratia; Ergo sicut custodiunt Angelus eos homines, qui vel gratiam, vel fidem nunquam habuerunt: ita etiam eos, qui illas perdidērunt. Denique Deus non deserit hos peccatores quoad auxilia sufficientia, interna, & externa. Ergo neque Angeli illos deserere possunt propter peccata, cum hoc non sit consentaneum voluntati Dei; Igitur Angelus peccatorem omnino non deserit: sed remissivè, & minori fortè sollicitudine, propter continuam ejus resistantiam erga eum, se gerit.

Hinc fit etiam interdum, ut iustum videatur Angelum custodem quodam modo derelinquere, seu remissius juvare, ut id tandem in majus ipsius bonum cedat; sic Ambrosius verba illa, *Psalmi 35*. *Qui juxta me erant, a longe steterunt. Ne abhorreat, inquit, mysticus pietatis affectus: ut pro Angelis dixerit, qui præstendunt timentibus Dominum ut eripiam eos de temptationibus, quas ferre non possunt: quomodo ergo longe stant, qui in adjumentum sunt attributi? Sed non illi se sperant, sed qui urgetur temptationibus, putat eos longe abesse, quos proprius adesse desiderat, & arbitratur dissimulare, cum illi ju-*

vandi tempus nutu sui superioris exspectant, qui athletam suum, quo gloriofius vineret, diutius certare præcepit.

COROLLARIUM.

EX his collige, quòd obduratus quisque peccator Angelo custode non careat, imò etiam non carebit ipsemet *Antichristus*, ut docent Alensis, S. Bonaventura, & S. Thomas; idque colligitur ex eo quòd Deus velit omnes homines salvos fieri, nullumque excipere, sed omnes comprehendere, etiam pessimos; & per consequens ipsum quoque Antichristum. Favet etiam ratio, qui enim proponit alicui finem, debet providere de mediis ad illum obtinendum; at verò cunctis quantumvis impiis proponitur vita æterna, & custodia Angelica medium est ad illam obtinendam, & acquirendam: Ergo &c. ac proinde Antichristo non denegabitur. Adde quòd quemadmodum semper infidiantur mali Angeli: ita è contra boni ea qua fervent charitate, volunt continuò auxiliari, & in hoc Deum misericordiæ, & charitatis fontem imitantur.

Neque dicendum est, custodes Angelos homines quantumvis peccatores deferere, quandiu sunt in hac vita. Quemadmodum enim nulli viatori omnino denegatur auxilium supernaturale commune; ita neque dum est in via, custodia Angelorum prorsus destituitur. Sicut autem propter peccata hominum interdum eis denegantur auxilia quædam particularia, & efficaciora, quæ Deus non tenetur dare, ita denegatur custodia Angelorum quoad peculiare aliquos effectus.

„ *Sciendum enim est*, inquit Alensis, „ quod multiplex est effectus custodiæ „ Angelicæ circa animas, unus est ut „ proficiat anima in bonum gratiæ: „ Alius ut non cadat in malum culpæ. „ Tertius est, ut si cadit, postmodum „ resurgat: vel ne toties cadat, vel in „ tantum malum cadat. *Hinc concluditur*: Dicimus ergo quod Antichristus ha-

„ habebit custodiam Angelicam, non
 „ ad primos effectus, idest, Angelus
 „ Gustos istos effectus circa eum non
 „ habebit, sed tantum ultimum, scili-
 „ cet, ut non toties cadat, quoties ca-
 „ deret sine Angelo Custode. Nulli
 „ enim viatori in quantum viator est,
 „ deficit misericordia Dei, quæ est in
 „ dando Angelum Custodem.

Censet tamen Joannes Altfstaing
 Mindelhaimensis in suo vocabulario
 Theologico, quod Angelus bonus de-
 putabitur primò Antichristo ad Custodiam;
 sed quando ita obtinabitur in
 peccato, quod dicit se esse Deum, &
 extollet se super omne id, quod dicitur
 Deus, aut colitur, sicut dicit Apostolus,
 tunc primò deseret eum Angelus ex to-
 to, nec habebit eum postmodum ad
 protectionem.

Collige secundò, quod Christus Do-
 minus Angelum Custodem non habue-
 rit: quia, inquit Scraphicus Doctor
dist. 11. qu. 3. Christus non indigebat
 „ Angeli Custodia, nec ipsa eum dece-
 „ bat; non egebat, inquit, quia ad-
 „ versarius ejus nec poterat opprimi-
 „ re per violentiam Corpus Divinitati
 „ unitum; nec poterat seducere per
 „ astutias intellectum à Verbo plena-
 „ riè illustratum; nec poterat allicere
 „ per blandicias affectum plenitudine
 „ gratiæ confirmatum: ideò Christus
 „ non indigebat Angelo bono, nec
 „ quantum ad defensionem Corporis,
 „ nec quantum ad eruditionem opera-
 „ tionis, nec quantum ad incitationem
 „ affectionis. Non solum autem non
 „ indigebat Angelica Custodia, sed nec
 „ etiam ei competeat. Custodia enim
 „ in Custodiante respectu Custoditi,
 „ dicit præsentiam quamdam: &
 „ quia Angeli Christo Domino sube-
 „ rant, non præerant; ideo nec aliquod
 „ officium præsentis ipsi Angelis
 „ respectu Christi committi debebat,
 „ & propterea nullus Angelus debuit
 „ deputari ad Custodiendum Chri-

„ stum, sed Angelorum multitudo de-
 „ buit deputari ad ejus ministerium.

Confirmatur, ex eo quòd egeamus
 Angelo Custode propter tres potissi-
 mum causas; prima ut nos doceat, &
 instruat, ne decipiamur: secunda, ut
 moneat, & hortetur ad bene agendum:
 tertia, ut removeat occasiones, & pe-
 ricula peccandi: At Christus nullo eor-
 um indigebat: Primò, quia erat ma-
 jori scientia præditus, quàm omnes An-
 geli: Secundò, quia eum esset plenus
 gratia poterat seipsum excitare ad be-
 nè agendum: Tertiò, quia intrinsecè
 erat impeccabilis propter unionem hy-
 postaticam, gratiam, & gloriam, qui ergo
 custodit Israel, imò Custos est omnium,
 ipse Angelo Custode opus non habuit.

Dices Angeli delegati sunt ad Christi
 custodiam: Ergo reverà Angelos Cu-
 stodes habuit.

Probatur antecedens ex illo Psal. 90.
*Angelis suis Deus mandavit de te, ut cu-
 stodiant te, &c.* quem Psalmum de Chri-
 sto scriptum fuisse plurimi SS. Patres
 testantur.

Deinde morientem solari, & defi-
 cientem roborare, officium est, & mu-
 nus Angeli Custodientis; sed *Luc. 22.*
 legimus quod Christo, dum ejus anima
 tristis esset usque ad mortem: *Afflitus*
Angelus Domini confortans eum; Ergo
 Christus habuit Angelum Custodem.

Denique Christus secundum naturam
 humanam, minoratus est paulò minus
 ab Angelis: Ergo eorum ministerio, &
 custodia sicut ceteri homines egebat.

Nego has omnes consequentias, & ad
 primum antecedens, dico quod quan-
 quam nonnulli SS. Patres illa Psalmi
 verba de Christo interpretentur, nihilo-
 minus ceteri contendunt non de Chri-
 sto, sed de quolibet homine justo à Da-
 vide scripta fuisse. Adde quòd si de
 Christo accipiantur, possunt intelligi,
 non de Custodia Christi adversus Dæ-
 mones; quorum erat expugnator; An-
 gelorum nempe auxilio opus non ha-
 buit,

buit, ut ipsum vinceret, sed tantum de ministerio quodam externo, quod ipsi impenderunt. Hinc Matthæi 4. legimus quod de victo Diabolo, *Accesserunt Angeli, & ministrabant ei, nempe Christo.*

*Ad secundum antecedens, dico cum, Alensi supra laudato art. 2. quod duplex est confortatio, una autoritativa, altera ministerialis; prior auctoritatem importat, posterior amicitiam, & reverentiam sonat: Priori modo Dominus servum solatur, ei nempe gratias, & beneficia largiendo: Posteriori servus Dominum, ipsi quædam excitantia ad liniendum dolorem subministrando, solari potest. Sic inquit S. Damascenus lib. de Fide cap. 3. *Angelus Christum Dominum confortavit, non quidem proponendo ipsi aliquid quod ipsum lateret, sed tantum ipsi representando, quod, quid gerebatur à Divino Patre decretum fuerat; exinde quod Deo summa gloria, & hominum salus erat oriunda.**

Ad tertium dico; quod etsi Christus dicatur minoratus ab Angelis ratione passibilis humane nature, nunquam tamen sic minoratus est, ut eorum præsidio, & regimine opus habuerit: in quolibet enim statu etiam passionis, & mortis, Angelorum supremus Dominus exiit, & eis ad nutum imperavit.

Collige 3. quod Beatissima Virgo, quamquam gratis illustrata, & stipata virtutibus, quia tamen intrinsecè non erat impeccabilis, sed tantum extrinsecè per specialem protectionem, & quatenus erat in gratia confirmata. Censent omnes Theologi cum S. Bernardo 77. ipsam habuisse Angelum Custodem, quem arbitrantur fuisse S. Gabrielem, qui ut S. Ambrosius scribit, *ipsam consolabatur in angustiis, & divina ipsi mandata, & arcana intimabat.* Scribit autem Andreas Crætenfis non solum illam habuisse Angelum Gabrielem Custodem, sed ut erat Regina cæli, & Angelorum Domina, multis ipsorum turmis fuisse circumdatam, quæ

Tom. IV.

Angelica agmina regebat, & ordinabat S. Gabriel, ait Gregorius Nicomediensis *in oratione de Maria in templo præsentata.* Idque prænunciatum fuisse, videtur *Canticorum 7.* Ubi *Sunamitis,* quæ sanctissimæ Virginis specimen præferebat, dicitur terribilis, ut castrorum acies ordinata: Chori enim castrorum, sunt cælestium Civium agmina, atque legiones cælestes, quæ sanctissimam illam Virginem tuebantur, & solabantur.

Collige tandem, quod etiam Protoparentibus in statu innocentie deputati fuerint Angeli Custodes, ut docent Alensis, nec-non & Seraphicus Doctor. Tum quia Deus pronior est ad miserendum, & succurrendum, quàm ad damnandum: ergo si in statu nature innocentis permisit, ut Angelus malus hominem infestaret, & tentaret, potiori jure debuit ipsi delegare Custodem Angelum, qui cum ipso adversus impugnantem Diabolum depugnaret; maxime cum scripserit Ecclesiast. 23. *Contra bonum malum, & contra vitam mors, & sic insuere in omnibus operibus Altissimi unum contra unum, & duo contra duo.* Tum quia idcirco nobis deputati sunt Angeli Custodes, ut per eorum auxilium à malo revocemur: sed homo in statu innocentie opus habebat à malo removeri, siquidem peccare poterat: Ergo ad id egebat Angelica custodia. Denique, ideo bonus Angelus homini deputatur in custodiam, ut nempe eum defendat ab oppressione contra violentiam, inquit Seraphicus Doctor *qu. 2.* Ut eum erudiat, & dirigat contra fallaciam, & exhorretur, & inducat ad bonum contra blanditias: Cum ergo Diabolus in statu innocentie Protoparentum rationem seducere poterat per astutiam, voluntatem ad malum deducere per blanditias, & virtutes per quamdam violentiam opprimere, siquidem homine innocente erat fortior, & astutior, & in proposito malitie perti-

N n

na-

nacior; ideo congruum erat homini innocenti concedi Angelicam custodiam quatenus adversus tam formidandum hostem repugnare posset.

CONCLUSIO TERTIA.

Angeli non solum hominibus, sed & cæteris rebus deputantur in Reſtores Administratores, & Custodes.

Probatur hæc veritas, primò quidem auctoritate SS. Patrum, maximè S. Augustini qui lib. 83. qu. 79. ait, *Una quæque res visibilis habet Angelicam potestatem sibi præpositam. Quæ utique sententia confirmari potest ex Scriptura; nam Apocalypsis 14. dicitur, Et alius Angelus exivit de altari, qui habebat potestatem super ignem: Et cap. 15. Audivi Angelum aquarum dicentem, iustus es Domine, &c. ubi Arethas ait; Hinc scimus Angelicas potestates præpositas esse creaturis; hanc quidem aquis, hanc autem igni, hanc verò aliis eisdem particulari creaturae. Hinc Origenes 8. in Jeremiam docet quod Omnibus rebus Angeli præfident tam terræ, & aquæ, quam aeri, & igni, id est principalibus elementis, & in hoc ordine pervenire ad omnia animalia, ad omne germen, ad ipsa quoque astra Cæli. Idem Homilia 23. ait; Virtutes cælestes mundi hujus ministeria suscepisse, ut illa terræ vel arborum germinationibus, illa fluminibus, ac fontibus, alia ventis, alia marinis, alia terrenis animalibus, vel singulis de terra gignentibus præfint, & esse in his singulis Sacramenta ineffabilia divine dispensationis in ordine suo cuncta, & competentis per unam quamque virtutem dirimatur officio.*

Præcipuè autem sancti Angeli deputantur ad custodiam Provinciarum, Ecclesiarum, & Communitatum. Quod enim pro Regnorum custodia peculiares Angeli destinantur, satis apertè colligimus ex illo Danielis 10. ubi Daniel Gabriele alloquens, ait, *Princeps Regni Persarum restitit mihi viginti, & uno diebus, & ecce Michael unus de*

Principibus primis venit in adiutorium mihi, & ego remansi ibi cum Principe Regni Persarum; Et infra: Nunc revertar ut prælior adversus Persarum Principem; Cum ergo egrederer apparuit Princeps Græcorum veniens, &c. Quibus verbis mentio fit Angelorum destinatorum ad custodiam Judæorum, Persarum, & Græcorum, ut interpretatur S. Dionysius cap. 9. de cælesti Hierarchia; & Theodorus lib. 5. de divino decreto cap. 7. Hyeron. in illa verba, & Gregorius lib. 17. Moral. Qui omnes censent ibi fieri mentionem de sanctis Angelis, inter quos licet nulla sit pugna nec discordia, sed omnes summa pace fruantur; juxta illud Job. 25. *Qui facit concordiam in Sublimibus suis; Nihilominus absque præjudicio pacis, & charitatis, suis precibus invicem apud Deum pugnabant: Gabriel quidem partem Judæorum agens Deum exorabat, ut Israelitas à captivitate solveret, quippe cum pollicitus fuerat ejusmodi captivitatem non amplius septuaginta annis duraturam, quod tempus pene jam effluerat. Alii verò dō Angeli Persis, & Græcis in custodiam assignari, Deum enixe deprecabantur, ut diutius Judæi apud Græcos, & Persas incolatum protraherent; quia nempe plurimi ex infidelibus Judæorum doctrina illustrati, idolorum cultum respuebant, & verum Deum venerabantur: & ita invicem precibus pugnabant, quia quid Deus facere decreverat eis non erat adhuc compertum: Unde postquam S. Michael, qui tribus illis Principibus erat superior, divinam eis voluntatem manifestasset, tunc maximè concordæ extiterunt.*

Confirmatur hæc veritas ex illo Deuteronomii cap. 2. ac 30. ubi legimus: Quando dividebas Altissimus gentes, quando separabas filios Adam, constituit terminos populorum, juxta numerum filiorum Israel. Septuaginta Interpretes vertunt, juxta numerum Angelorum Dei

Dei. Hinc Origenes Hom. 35. in Lucam ex eo loco concludit: *Quod Principibus idest Angelis, ab exordio terra divisa sit.* Sic etiam Theodoretus in illud caput Danielis cum dixisset, *Singulis Angelis unius cujusque nostrum creditam esse curam, ut custodiant, & tueantur, & à pravi Dæmonis nos liberent insidiis:* Ex Math. 18. cap. concludit. *Archangelis verò illud munus impostum, ut Gentium sint præfetti, sicut beatus Moyses docuit, cuius dicit beatus item Daniel consentit cum dicit ipse regni Persarum Principem: & rursus paulò post Principem Græcorum.*

Hoc ipsum testantur quique SS. Patres, imprimis verò Clem. Alex. lib. 6. Strom. ubi ait, *Per Gentes, & Civitates divise sunt Angelorum præfectura:* Et lib. 7. *Jussu divino, & antiquo per Gentes sunt distributi Angeli.* Hoc ipsum docet S. Basilii lib. 3. adversus Eunomium ubi affirmat; *Singulis fidelium adesse comites Angelos, scilicet Gentibus alios præesse; & quo præstantior est gens integra singulari aliquo viro, eo potior est dignitate præsidem gentis Angelum, quam illum cui unius cujuspiam cura committitur:* Similiter Epiphanius hæresi 52. *Regna, inquit, & Gentes sub Angelis posita sunt:* Idem passim edocent cæteri SS. Patres.

Similiter non abs re censent Doctores Theologi quod cum nationibus populisque præfint Angeli, multò magis Ecclesiis, templis, ac cœtibz religiosis: *De Ecclesiis* quidem Apoc. 1. cap. testimonium extat, ubi septem Ecclesiis totidem præfides Angeli nominantur, ut interpretatur Origenes Hom. 20. in Numeros: *Secundum ea, quæ Joannes in Apoc. scribit inquit, unicuique Ecclesiæ generaliter Angelus præf. Et* Hom. 13. in Lucam dicit, in singulis Ecclesiis duos Episcopos præsidere, alterum visibilem, alterum invisibilem. Quod utique confirmat Ambrosius lib. 2. in Lucam, ubi ait, *Non solum Epi-*

scopus ad tuendum gregem Domini ordinavit, sed etiam Angelos destinavit. Subscribit Greg. Naz. oratione 32. *Nec enim, inquit, mihi dubium est, quin alii aliarum Ecclesiarum Præsides, ac Pastores sint, quemadmodum in Apocalypsi Joannes me docet.*

Hinc non mirum si plurimi viri sanctissimi Ecclesiæ Præsules Angelos suarum Ecclesiarum custodes in ministeriis etiam sensibilibz ad laborantes habuerint: Nec pariter in dubium revocari debet, quod plerique referunt Historie, nempe pluries apparuisse S. Angelos in Templis quibus custodiendis sunt destinati. Sic in *Prato spirituali* cap. 4. legimus, quod Leontinus Abbas Monasterii Lauræ vidit in cornu altaris stantem Angelum qui dixit ei, *Ex quo sanctificatum est altare istud, ego ei jugiter adflare jussus sum.* Similia refert Lanspergius de S. Geltrude Virgine, &c. Quod autem maximè Religiosorum cœtibz custodiendis adsint, pluribus probat noster le Petit cap. 17. *scilicet 1. de SS. Angelis;* præcipue verò ex eo quod Angelicam vitam religiosi æmulentur; amant enim Angeli concives suos, & suorum contubernalium summopere curam gerunt.

QUAESTIO TERTIA.

Quenam beneficia per suam custodiam nobis impendant Angeli, quæ ob eam eis rependat Deus, nosque rependere debeamus.

NOTANDUM 1. hoc fuisse Origenis paradoxum, ut putaret tutelares hominum Angelos non alia conditione visionem Dei obtinere quàm si fidei suæ commissos ad salutem perducant. *Eam ob causam, inquit homilia 23. & 35. in Lucam, Angeli pro nobis solliciti sunt, scientes, quod si nos bene gubernaverint, & ad salutem usque perduxerint, habebant etiam ipsi fiduciam videndi faciem*

Patris : Quomodo enim si per curam eorum, & industriam salus hominibus comparatur, faciem Patris semper attendunt: sic si per negligentiam eorum homo corruerit, etiam sui periculi rem esse non nesciunt. Et sicut bonus Episcopus, & optimus Ecclesiæ Dispensator scit sui meriti esse, atque virtutis, si oves gregis sibi credite fuerint custoditæ; ita intellige, & de Angelis. Ignominia Angelo est, si homo iustus creditus fuerit, & peccaverit: ut è contrario gloria est Angelo si creditus sibi saltem minimus in Ecclesiâ fuerit. Videbunt enim non aliquando, sed semper faciem Patris, qui est in Cælis, cum aliis semper non videant. Secundum meritum enim eorum, quorum Angeli sunt, aut semper aut nunquam, vel parum, vel plus, faciem Dei Angeli contemplabuntur. Sed, & homilia 20. in Numeros idipsum docuit, Culpari Angelos, tamquam Pedagogos, si eorum commissi curæ ab officio deslexerint. Quod Apocalypsis testimonio probat; ubi unicuique Ecclesiæ unus præesse dicitur Angelus, qui, inquit, vel collaudatur pro benefactis populi, vel etiam pro delictis ejus culpatur.

Origenis errorem pridem sopitum, & extinctum iterum excitavit Calvinus, nam Fevardentius noster in sua Theomachia Calvinistica lib. 9. cap. 19. refert Calvinum dicentem lib. 3. Institutionum cap. 14. Angelos non posse satisfacere justitiæ Dei; quia, ut idem Calvinus serm. 16. in Job scripsit: *Si Deus summo jure cum Angelis agat, inveniet, quod in eis desideret, non habit in eis constant, & perpetua firmitas.* Et infra: *Deus non invenit in Angelis solidam veritatem, sed fluitantiam, vanitatem, & inconstantiam.* Inferius autem declarat se loqui de Angelis, qui persisterunt in obedientia Dei, & faciem ejus intuentur. Verum.

Notandum 2. hunc errorem pridem proscriptum esse à SS. Patribus, qui constantissimè docent Angelos bonos

cum prius peccare possent, non peccando in via, meruisse, ut amplius peccare non valeant. Sic docet, Augustinus in Enchiridio 57. Fulgentius de Fide ad Petrum cap. 23. Gregor. lib. 34. mor. c. 4. Colligiturque maximè hæc veritas ex verbis Christi quibus nos docuit Deum orare hoc modo, *Fiat voluntas tua sicut in Cælo, & in terra;* per hæc enim petimus, ut nos voluntatem Patris in terra impleamus, sicut illam in Cælis implent Angeli. Nec enim dicere potuit Christus illa verba nisi propter Angelos; siquidem tunc temporis nullæ in Cælis erant creaturæ nisi soli Angeli: Supponit ergo ab Angelis divinam voluntatem fidelissimè, & perfectissimè impleri; subindeque eos non posse peccare. Adde quòd de Angelis prædicat David Psalm. 102. *Benedicite Domino omnes Angeli ejus, potentes virtute, facientes verbum illius.* Unde quasi per Antonomasiam subdit; *Ministri ejus, qui facitis voluntatem illius.* Denique si, ut quis ingreditur cælestem Hierusalem, debeat esse purus ab omni macula, juxta illud Apocalypsis 24: *Non intrabit in illam aliquid coinquinatum;* multò magis semper innocens esse debet, qui Dei visione semper donatur; siquidem ait David ad Deum Psalm. 5. *Non habitabit juxta te malignus, nec permanebunt injusti ante oculos tuos:* At verò Angeli semper cum Deo permanent, siquidem de ipsis dicit Christus, *Angeli eorum semper vident faciem Patris,* Consequens est ergo eos nullatenus posse peccare, neque suam beatitudinem deperdere. Futile est ergo, & prorsus erroneum commentum, arbitrari propter homines in peccatum labentes, Angelos esse culpandos, & puniendos, quasi sibi creditos non quia decebat vigilantiam custodierint. Solum itaque superest examinandum an aliquid præmii propter impensam nobis suæ custodiæ curam à Deo recipiant, quòd, ut planius fiat.

Notan-

Notandum 3. Duplicem solitò distinguimus beatitudinem, Essentialem nempe, & Accidentalem: *Est enim*, inquit Seraphicus Doctor dist. 11. art. 2. quæst. 2. *duplex gaudium in Beatit: primum in quo consistit præmiũ substantiale, & hoc est gaudium de bono increato, quod habet Angelus de Deo, & in Deo*; nempe Deo fruendo per ejus unionem, & amorem. *Aliud est gaudium accidentale, quod habet Angelus de bono creato, sive proprio, sive alieno*: Cujus quidem Scriptura plerumque meminit: ut Psalm. 149. cum dicitur: *Exultabunt Sancti in gloria lætabuntur in cubilibus suis*. Et Lucæ 15. *Gaudium erit in Cælo super uno peccatore penitentiam agente*. Huc etiam pertinet judiciaria potestas, quam voluntariè pauperibus Christus repromittit; imò, & illud centuplum, quod præter æternam vitam idem Dominus Matthæi 19. spondet his, qui propter ipsum omnia reliquerint. Spectat etiam ad illam gloriam accidentalem aureola Virginitatis, Martyrium, & Doctrinam, & similia, quæ suo modo, & cum proportionem Angelis communia sunt. Licet enim eis propriè aureolæ non conveniant, quia non sunt capaces Virginitatis, aut Martyrii, tamen habent alia objecta proportionata, de quibus possint accidentaliter gaudere.

Sciendum insuper, quòd nomine *accidentalis beatitudinis*, hic non intelligimus ea, quæ per se Dei visionem, amorem, & gaudium infallibiliter sequuntur; vel in universum, vel in uno quoque Beato, secundum modum suum; quales sunt v. g. memoria priorum bonorum operum cum lætitia, quæ ex hac oritur, item honor, & gloria Beatorum inter se, & apud Deum; qualiter etiam gloria corporum resurgentium respectu beatitudinis animæ, inter accidentales beatitudines numeratur. De hoc ergo genere beatitudinis accidentalis in præsentem non loquimur; licet enim hæc in Angelis etiam reperitur, illa tamen

non est augmenti susceptiva; quia hæc accidentaria beatitudo, vel ex natura rei, vel ex ordinatione divina consequitur essentialiter beatitudinem infallibiliter; adeoque cum hæc non sit augmenti susceptiva, nec illa crescere potest.

Hic itaque tantum sermo est de beatitudine illa accidentali quæ consistit in quodam actu intellectus, & voluntatis circa objecta creata, qui essentialiter beatitudinem non consequitur; sed ex peculiari Dei favore conceditur, ut sunt revelationes per Verbum de effectibus gratiæ, & contingentibus futuris, quæ Angeli à principio beatitudinis non noverant. Ejusdem rationis sunt gaudia, & alii affectus circa res sic cognitæ, ut est illud gaudium de peccatore penitentiam agente. Gloria igitur, & gaudium ex his resultans, beatitudo accidentalis appellatur; quia non solum essentialiter circumstat, sed etiam ab ea separabilis est per modum accidentis.

His ita prænotatis, tria supersunt determinanda, *Primum*, quænam beneficia per suam custodiam Angeli sancti nobis impendant. *Secundum*, qualem beatitudinem ob illam custodiam Deus ipsis retribuatur. *Tertium*, quæ gratitudinis, & venerationis obsequia, ipsis fidelissimis custodibus rependere debeamus.

CONCLUSIO PRIMA.

S Ex sunt præcipua beneficia, quæ sancti Angeli per suam custodiam nobis largiuntur. Colligitur hæc Conclusio ex seraphico Doctore in 2. dist. 11. art. 2. quæst. 1. ad 7. ubi cum dixisset: *Credendum est, quòd multis modis Angeli*, „ qui nos custodiunt, studeant promo- „ vere ad bonum, & retrahere à malo, „ quamvis hoc non percipiat habitu- „ do spiritus nostri: propter, quod „ multi superbiunt, multi sunt ingra- „ ti, & frequenter sibi attribuant, quod „ est ex beneficio Angelico, & ex hoc

mi-

„ minùs fuit digni, ut ab Angelis adju-
 „ ventur: Perutile est ergo effectus An-
 „ gelicæ custodiæ nosse, & intellige-
 „ re: Consueverunt autem ad Magistris
 „ duodecim effectus assignari: Ea ta-
 „ men omnia ad sex præcipuos reduci
 „ possunt.

Primus est pro delictis increpare. Sic
 Judicum 2. *Ascendit Angelus Domini*
de Galgalis ad locum Flentium, & ait:
Eduxi vos de Ægypto, & introduxi in
terram pro qua juravi patribus vestris,
& pollicitus sum, ut non facerem irritum
pactum meum vobiscum in sempiternum:
Ita dumtaxat, ut non feriretis fœdus cum
habitatoribus hujus terre, sed aras eo-
rum subverteretis: & noluisistis audire vo-
cem meam: Cur hoc fecistis? &c. Imò in-
 terdum contingit, ut etiam pœnas ho-
 minibus quos custodiunt, immitant:
 pœnæ enim hujus vitæ quædam ex pu-
 ra justitia Dei vindictiva proveniunt,
 & supplicia appellantur: Aliæ verbò ex
 misericordia Dei ordinantur, & pœnæ
 medicinales vocantur: Prioris generis
 pœnas immitit Deus per Dæmones,
 juxta illud Psalmi nu. 7. *Mittit in eos*
iram indignationis suæ, immissiones per
Angelos malos: Utitur enim Deus Ange-
lis malis, inquit S. August. in hæc verba,
non solum ad puniendos malos, sicut
in Rege Achab quem fallaciæ Spiritus
ex Dei voluntate seduxit, ut caderet in
bello: verum etiam ad probandos, & ma-
nifestandos bonos, sicut fecit in Job. Pos-
 terioris generis pœnas etiam per An-
 gelos bonos Deus interdum immitit,
 ut idem August. docet, lib. 9. de Civit.
 Dei cap. 5. ubi ait, *Sanctos Angelos sine*
ira punire, quos accipiunt æterna lege
puniendos, & miseris sine miseriæ com-
pensatione subvenire. Hæc eadem veritas
 ex Scriptura sacra facris aptè colligi-
 tur; nam juxta communioem Inter-
 pretum sententiam munus puniendi
 homines peccatores, aliquando per san-
 ctos Angelos Deus exequitur: Sancti
 enim erant Angeli missi ad subverten-

dum Sodomam Genesim 19. Sanctus erat
 Angelus, qui extendebat manum suam
 super Israelitas, ut eos propter Davidi
 peccatum exterminaret. Unde potiori
 jure Deus interdum pœnis medicinali-
 bus justum hominem castigat per An-
 gelum bonum; quippe hæc punitio opus
 misericordiæ est, & maxime ad officium
 Pedagogi seu custodis pertinet; Tum ut
 persona custodita divinæ justitiæ pro-
 pter suas negligentias debitam pœnam
 persolvat; Tum, ut his tribulationibus,
 & afflictionibus vitam æternam pro-
 mereatur, & meritum augeat.

Secundus effectus est à vinculis pecca-
 torum absolvere, cujus rei specimen
 edidit Angelus ille, qui *Actuum* 2. Pe-
 tro in vinculis ab Herode conjecto asti-
 tit, & catenas de manibus ejus solvit,
 eumque pristinæ libertati restituit.
 Quam utique peccatorum solutionem
 non præstant Angeli effectivè nec au-
 thoritativè, sed solum dispositivè, dum
 nempe, inquit Cresolius lib. 3. *Mythag.*
c. 3. hominibus peccato fœdati lugen-
dum eorum statum indito cœlitus lumi-
ne ita exhibent, ut hominum mentes
videant scelerum turpitudinem, &
monstrificam veluti effigiem plenam,
horroris, & contemptionis, intuean-
turque pestem ante oculos positam,
crudele exitium, funestam calamita-
tem, & damnationem æternam, si su-
bito illo in statu è corporis domicilio
eripiantur. Inde fit, ut peccatores ani-
 madvertant Numinis iracundiam, ar-
 cana judicia formidabilia hominum,
 generi, mucronem illum in divinis ora-
 culis depictum: instar fulgoris expoli-
 tum, & vibrantem, illius oculum pene-
 trantem omnia, & retrusas animi cogi-
 tationes pervadentem: insuperabilem
 potentiam, fortem manum, quam pœ-
 nas repetentem nullus hominis vis,
 dolusque effugiat.

Tum blandius sui luminis radium,
 iniiciens Angelus in animum hominis
 peccatoris, perspicuè illi ostendit scela-

ris

ris infamiam, labem animi, inexplicabilem hominum stultitiam malo suo legantium, ingratiæ mentis indignitatem: Insuper demonstrat divinæ gratiæ vim, & fortitudinem, quæ nequitia perditur, & quâ perditâ sit homo Dæmonis ludibrium, erebi spoliū, Cœli exul: Ponit etiam ante oculos conscientiæ bonæ lætitiā, quæ omnem corporis voluptatem liquido animi gaudio, & jucunditate antecellat. Hæc, & similia Angelus tutelarī noster nobis interdum ingerit, ut à fœtido peccatorum statu nos vel removeat, vel revocet.

Tertius effectus est, Dæmones coercere ne tam graviter tentationibus nos urgeant, neve tot pravas cogitationes immittant, aut occasiones peccandi subiciant: Nam, ut loquitur Grana-tensis concione de S. Michaelē; *Quamdiu in corpore militamus, non desunt spiri-tus nequam, qui sint ad malum incen-tores; sic etiam non desunt Angeli, qui sint ad bonum hortatores, qui videlicet lucem nobis ad veritatis cognitionem, præferant, qui viam quâ itur ad Cælum monstrant; qui ab hostibus tueantur, qui à sceleribus avocent, & ad honesta sem-per inducant.* Sicut ergo illi mala semper suggerunt, ita è contra isti semper honesta suadent, & adversantis nobis Diaboli vires, & virtus reprimunt. Si-cut ergo de S. Angelo Raphaelē apud Tobiam legimus; quòd *apprehendit Dæ-monium, & reliquit illud in deserto su-perioris Egypti*: Ita Angeli nostri cus-todes terroris sunt ipsis Dæmonibus ini-micis nostris, & maximâ potentia illor-um furorem compescunt; sunt enim illi sexaginta fortes ex fortissimis Israel qui lectulum Salomonis mystici, nempe animam fidelem, Christi Domini tri-clinium, & sacrarium, ambiunt: *Fortes enim, inquit sanctus Athanasius lib. qq. quæst. 22. Angeli Dei sunt, qui perfe-ctum virum circumcunt, & circa ipsum ineidunt, ut nempe à Dæmonum incur-sibus, & occursibus tueantur & servent.*

Quartus effectus est obstacula ad vir-tutem remove, & facilem ad ejus af-secutionem viam sternere: quod utique signatur in Exodo, ubi legimus, quòd Angelus percussit primogenitā Egyp-ti: Siquidem ad eorum custodiā, maximè spectat tollere impedimenta spiritalis profectus; in via namque virtutis non proficere, deficere est; Hinc meritò de Angelo custode cecinit Vates Regius, *In manibus portabunt te, ne fortè offendas ad lapidem pedem tuum.* Unde S. Augustinus in Solilo-quio cap. 27. *Sancti Angeli ambulant nobiscum in omnibus viis nostris, in-trant, & exeunt nobiscum, attentè con-siderantes, quàm piè, quàm honestè in medio præcæ nationis conversemur: quantoque studio, & desiderio queramus regnum tuum, & justitiam ejus; quan-toque timore, & tremore serviamus, & exultemus tibi in lætitia cordis nostri. Adjuvant laborantes, protegunt quies-centes, hortantur pugnantes, coronant vincentes, &c.* Unde monet S. Bernard. serm. 2. in prædictum Psalmum, *Sancti custodes nostri fideles sunt, prudētes sunt, potentes sunt, quid trepidamus? Tantùm sequamur eos, adhareamus eis, ut in pro-tectione Dei Cœli commoremur.*

Quintus effectus est orationes eorum quos custodiunt, offerre Deo, quandiu in terris hanc mortalem vitam agunt, & eis in mortis instanti adesse, ut eor-um animas si cujusvis debiti, & delicti expertes sint, in Cælum deducant. Id-que colligitur ex Tobie 12. *Ego obtuli orationem tuam Domino; quæ verba ex-pendens S. Augustinus sermone 3. de Natali Domini ait, Vota nostra, & ope-ra bona Deo offerentes, videlicet elemo-synas, jejunia, & alia denique, ut constat de Raphaelē, qui non solum orationes Tobie Deo offerebat; verum etiam, & ejus elemosynas, & alia bona opera, quæ exercebat circa mortuos, quos sepe-liebat.* Unde in Actis Angelus ait, *Orationes, & elemosyna tua ascende-runt*

runt in memoriam in conspectu Dei : quasi diceret, illas Deo obtuli.

Cum autem preces offerunt, & desideria nunciant, rationes etiam Deo allegant, ut nos exaudiat, & suas preces nostris conjungunt; & quò ferventiores sunt, & ardentiora, ac puriora desideria, eò libentius illa Deo annunciant, & offerunt: idque maximà præstant eloquentià, ut colligimus, ex eo quòd habetur apud Jobum cap. 3. *Si fuerit, inquit, pro eo Angelus loquens unus de millibus, annuncians hominis equitatem.* Pagninus, & Regia impressio vertunt eloquent; Nam sicut solent Oratores benè composita, præmeditataque oratione uti, ut eos quos alloquuntur, ad id quòd intendunt, inducant; ita Angeli dum nostras preces Deo offerunt, nulli dubium est, quin id maximà eloquentià præsent, ut illas Deus exaudire dignetur.

Idem suadet sanctus Bernardus ex illis Psalmistæ verbis 67. *PRÆVENERUNT PRINCIPES CONJUNCTI PSALLENTIBUS: Credimus, inquit, sanctos Angelos afflare orantibus, offerre Deo preces, & vota hominum.* Ad quòd etiam facit visio Jacob, de qua in Genesi cap. 28. legimus: *Viditque in somnis scalam flantem super terram, & cacumen illius tangens Cælum; Angelos quoque Dei ascendentes, & descendentes per eam, &c.* Quem locum explicans Origenes lib. 5. contra Celsum, ait; *Angelos dicimus ascendere, ut hominum vota, precesque ad ea loca perferant, quæ cælestia sunt.* Et illud idem est, quòd piè prosequitur S. Augustinus in Soliloq. cap. 27. *Magnà curâ, inquit, & vigilantissimo studio adfuerunt nobis, solliciti, discurrentes inter nos, & te Domine; gemitus nostros, atque suspiria referentes ad te, ut impetrent nobis facilem tuæ benignitatis propitiationem, & referant ad nos desiderata tuæ gratiæ benedictionem.*

Hanc eandem veritatem egregiè declarat S. Hylarius in Matthæum c. 18.

Angeli, inquit, pusillorum, præsumunt fidellum orationibus. Præesse Angelos, absoluta auctoritas est. Salvandorum igitur per Christum orationes Angeli quotidie Deo offerunt. Ergo periculosè ille contemnitur, cujus desideria, ac postulationes ad æternum, & invisibilem Deum ambizioso Angelorum famulatu, ac ministerio percrebuntur.

Tandem idipsum suadet, ex his verbis Apoc. 8. *Et ascendit fumus incensorum de orationibus Sanctorum, de manu Angeli coram Deo:* Quibus significat quantam vim preces, & bona opera accipiant, dum ab Angelis offeruntur. Sicut enim incensa, & aromata nisi prunis imponantur, parum olent; igni verò imposita, longè latèq; redolēt non aliter orationes nostræ, & opera, quæ per se fortè parum valerent, dum tamen Angelorum precibus sunt intermixta, & illis commendationes suas adiungunt, & sic ab illis Deo offeruntur, multum valorem ex offerentibus accipiunt. Quòd utique luculenter explicat S. Thomas 22. quæst. 83. art. 1. ubi ait, eorum precibus, & meritis orationes nostræ sortiuntur effectum, & nostra opera bona à sua divina maiestate sunt accepta.

Qui autem durante hac mortali vita tanta charitate nobis opitulatur, etiam animabus nostris è corporibus solutus non desunt. Nam si omnino puræ, sine macula, & ruga venialis culpæ, aut reatus alicujus pœnæ ab hac vita decedunt, à suis Angelis custodibus, & interdum simul ab aliis juxta varia earum merita, & divinæ Providentiæ dispositionem usque ad Cælum deducuntur. Si autem aliqua purgatione indigent, sancti Angeli eas deducunt usque ad Purgatorii locum, ibique eas visitant, & consolantur. Hoc in primis colligitur ex Lucæ 16. ubi de Mendico ait Christus Dominus: *Factum est autem ut moreretur Mendicus, & portabatur ab Angelis in sinum Abrahe.*

h. c. Ubi Chrysoſt. in ſpeciali Homilia: *Probat*ur, inquit, *in humeris Angelorum, ne ſaltem ambulans laboraret* :

„ Num ſufficeret ad portandum unus
„ Angelus? ſed propterea plures veniunt, ut chorum lætitiæ faciant.
„ Gaudet unusquiſque Angelorum tale onus tangere, libenter talibus
„ oneribus prægravantur, ut adducant
„ homines ad regna Cælorum.

Sextus tandem effectus eſt mœrentium conſolatio. Sic legimus Genef. 31. quod *Angelus conſolatus eſt Agar fugientem à facie Domini ſui, dixitque ei, Revertere ad Dominam tuam, & humiliare ſub manu ejus* : & ſic ejus mœrorem, & triſtitiã dum eſſet in ſolitudine fugitiva abſterſit : Conſtat etiam de Gedeone, ad quem conſolandum miſit Deus Angelum, qui honorificè eum ſalutavit, dicens; *Dominus tecum, virorum fortiffime*, ut exanimatum animaret, & de fuga cogitantem retineret. Sic Angelus Raphael conſolatus eſt Tobiam cum ei dixit, loquens de filio ſuo, quem ad peregrinandum ſuſcipiebat ducendum, Tobia 5. *Ego ſanum ducam filium tuum, & reducam*. Sic in reditu dum ipſum ejus filium ſanum, & incolumem ei repræſentavit, non minori conſolatione eum recreavit. Sic Eliæ apparuit unus Angelus, amaritudine conſectum animum cœleſti conſolationis rore perfundens, & oblato ſubcinericio pane deficientes præ itineris fatigatione, & famis inedia, corporis vires reparans.

Plurima alia Angelicæ conſolationis argumenta Scriptura ſacra ſubminiſtrat, quibus conſtat ingentia SS. Angelorum erga nos eſſe beneficia, quæ tantò majori affectu nobis impendunt, quòd nedum hac in re divinis mandatis obſequantur; ſed etiam flagrantiffima erga nos charitate aſtuent: *Neque enim*, inquit Bloſius in dictis Patrum, *ulla unquam mater erga unicum dilectum filium ſuum regendum, conſolandum,*

Tom. IV.

tuendumque vigilavit, uti hi beatiffimi Spiritus ſalutis invigilant, & præcipue Angelus proprius noſtræ ſpectatum cuſtodia à Domino deputatus; nam noſtu, & diu, omni loco, & tempore, in cunctis cauſis, & neceſſitatibus noſtris ſumma cum fidelitate nobis adeſt, & ne ad momentum quidem unquam à nobis recedit. ſane cū cœleſtes illi Spiritus videant, & cognoscant, quàm admirabili, immenſo, atque ardenti amore, & noſter, & ipſorum Dominus nos prolequatur, ita etiam, & ipſi tanta dilectione nos complectuntur, ut à nullo dignè id queat exprimi.

Hæc omnia luculenter declarat ſanctus Bernardus ſermone 1. de ſancto Michael; Hic eſt, dilectiffimi, ſuniculus triplex, quo de excello Cælorum habitaculo ad conſolandos, ad viſitandos, ad adjuvandos nos attrahitur ſupereminens charitas Angelorum, propter Deum, propter nos, propter ſeipſos. *Propter Deum* utique, cujus tanta erga nos miſericordiæ viſcera ipſi quoque, ut dignum eſt, imitantur. *Propter nos*, in quibus nimirum propriam ſimilitudinem miſerantur. *Propter ſeipſos*, quorum ordines inſtaurandos ex nobis toto deſiderio præſtolantur. In ore enim parvulorum, qui lacte modò veſcuntur, & nondum ſolido cibo, perficienda eſt laus illa majeſtatis divinæ, cujus habentes primitias Angelici Spiritus beata nimium delectatione fruuntur: ſed tantò avidius nos expectant, quantò conſummationis ejus expectatione, & expoſitione ſollicitantur.

CONCLUSIO SECUNDA.

Angeli cuſtodet ob impenſa nobis ab eorum obſequiis calica beneficia, gaudii accidentaliter incrementum à Deo recipiunt: Ita communiter Doctores Scholaſtici, cum noſtro Alenſi 2. part. quaſt. 41. membro 6. & Seraphico Doctore diſt. 11. qu. 2. ubi cū duplicem

O o

hac

hac de re opinionem retulisset; quarum prima affirmabat in beatis Angelis ex hominum salute crescere gaudium essentiale simul, & accidentale; non solum extensivè, sed etiam intensivè, eo quod hujus sententiæ Sequaces censuerent Angelos nondum esse perfectè beatos, licet sint in gratia confirmati: Secunda verò contendebat neutrum, gaudium, tam essentiale, quàm accidentale crescere intensivè, sed solum extensivè, sicut eorum charitas non est nunc major, quàm fuerit ab initio, quamvis plures nunc diligant, quàm tunc: Tandem concludit, tertiamque sententiam instituit, nempe quod in Angelis nullatenus præmium, & gaudium augeatur: Quia, inquit, quantum ad illud, perfectè beati sunt: sed gaudium, in quo consistit præmium accidentale, accrescere potest, non solum extensivè, verùm etiam intensivè, & ratione boni proprii, & ratione conjuncti; quia ministrando aliis, bona opera faciunt, in quibus præmium accidentale merentur, & etiam concives suos ad beatitudinem perducunt, super quibus absque dubio gaudent, & gratulantur: & hæc positio tertia videtur esse probabilior, & secundum hanc patet responsio ad partes oppositas: Nam rationes ostendentes, quod ex nostra beatificatione Angelis accrescat gaudium, concludunt solum de gaudio accidentali, quod est circa bonum creatum, in quo tamen non consistit essentialis præmii augmentatio. Eandem sententiam amplectitur, & docet Gabriel *art. 3. dubio 2.* affirmatque Angelos, quantum ad illud gaudium accidentale; non esse in termino, sed in via; quia priusquam detur, carent illo, unde possunt illud mereri; adeoque propter meritum ipsis à Deo conceditur.

Verùm vix adduci possum ut credam, Angelos aliqua ex parte adhuc esse Viatores, & aliquatenus posse no-

vum præmium promereri. Ut enim aliquis sit in statu merendi, non satis est quod careat re aliqua; sed ultra necessarium est quod sit in via ad merendum, destinata ex divina ordinatione; quæ via regulariter in Angelis, & hominibus, est status fidei, intuitivæ Dei visioni oppositus. Adde, quod, gaudium illud accidentale sufficienter intelligi possit Angelis à Deo concedi, absque eo quod illud promereantur; illud enim gaudium de novo suscipiunt Angeli, vel ex nova præsentia objectorum, & absque peculiari revelatione vel illuminatione ex parte Dei aut Angelorum Superiorum, sicut gaudent super uno peccatore pœnitentiam agente, quia ejus pœnitentiam cognoscere possunt per scientiam propriam: Unde cum summa charitate homines diligant, ita de illorum salute lætantur; Nam, inquit Augustinus cap. 27. Soliloquiorum: *Quoties benè agimus, gaudent Angeli, & tristantur Dæmones: Quoties à bono deviamus, Diabolum lætificamus, & Angelos tuos suo gaudio defraudamus: Gaudium est enim eis super uno peccatore pœnitentiam agente; sed Diabolo super uno lapsso pœnitentiam deferente.* Hoc modo autem gaudium consequuntur Angeli absque ullo suo merito.

Vel dici potest, quod augmentum illius gaudii proveniat ex eo, quod aliquid de novo reveletur Angelis in ordine ad sua ministeria; ut quando Gabrieli Archangelo revelata fuit Incarnatio tali tempore, & modo exequenda, ut illam Virgini nunciaret: & tunc etiam opus non habuit aliquo novo merito ad illud gaudium recipiendum; quippe proveniebat illud ex illa nova revelatione sibi facta. Vel denique concipi potest novum illud gaudium Angelo concedi propter novam revelationem sibi factam, quæ ad ejus ministerium spectet, ut quando ipsi revelatur, quod homo ipsius custodiæ traditus, tali tempore sit talem pœnitentiam acturus, aut

ta-

talia, vel alia opera meritoria acturus, Sic autem gaudium illud etiam non advenit propter aliquod speciale Angelum meritum, sed solum propter divinam revelationem, & peccatoris conversionem; adeoque non videtur necessarium esse Angeli meritum ad illam accidentalem beatitudinem assequendam.

Verius itaque dicendum censeo, quod augmentum illius gaudii beatifici, seu illa beatitudo accidentaliter proveniat tum ex parte Dei liberaliter gaudium illud Angelo concedentis, tum etiam ex parte Angelorum, qui propter summam charitatem qua homines prosequuntur, eximia perfunduntur læticia, ingensque concipiunt gaudium, quoties eos saluti studere, & invigilare conspiciunt.

Rogabis qualiter se habeat Angelus erga hominem suæ Custodiæ deputatum, quem Deo revelante novit esse damnandum.

Respondet Aletius noster *membro 6. art. 2.* Quod quamvis alicui Angelo re-
 „ veletur damnatio ejus, cui deputatus
 „ est: tamen non revelatur ei quanti-
 „ tas damnationis, scilicet quanta fu-
 „ tura est ejus damnatio: hoc enim est
 „ de secretissimis Dei. Unde quamvis
 „ eum damnandum esse sciat per reve-
 „ lationem; & cognoscat se nihil pro-
 „ fecturum circa eum, quantum ad
 „ hoc ut salvetur: tamen quia nescit
 „ quanta futura est ejus, dānatio, ideo
 „ nescit an profecturus sit circa eum
 „ quantum ad hoc, quod minor sit ejus
 „ pœna, sive damnatio. Unde adhuc
 „ curam apponit circa eum, nec dere-
 „ linquit eum ex toto; nec dissonat
 „ hoc à voluntate divina. Unde quam-
 „ vis non operetur circa eum ad tra-
 „ hendum eum ad salutem; tamen ope-
 „ ratum ad retrahendum eum à majori
 „ damnatione, quam scilicet incurre-
 „ ret, nisi Angelus custodiret eum,

CONCLUSIO TERTIA.

Tertia maxime sanctissimis nostris Angelis tutelaribus in animi nostri gratitudinem rependere debemus; nempe Venerationem, Dilectionem, & Invocationem. Ita S. Bernardus *serm. 12.* Si ipse, Deus, mandavit ipsi qui, & ei ex tanta charitate obediunt, & nobis subveniunt in tanta necessitate, ingratos esse non licet; Simus ergo devoti, sumus grati tantis Custodibus redamentis eos, honoremus eos quantum possumus, quantum debemus; totus tamen eis reddatur, & amor, & honor à quo tam ipsis quam nobis est totum, unde honorare possumus, vel amare, unde amari, honorari vè mereamur.

Quantam autem sanctis Angelis reverentiam debeamus impendere, egregie explicat idem Doctor mellissimus in *Psalmum 90. serm. 12.* Ubi inter cætera, ita admonet: In quovis diversorio, in quovis angulo, Angelo tuo reverentiam habe: tu ne audeas illo præsentem, quod vidente me non auderes. Et sermone primo de Sancto Michael, nobis erga amantissimos illos Tutelares summam reverentiam habendam ita inculcat: Pensate quanta nobis sollicitudine opus est, dilectissimi, ut dignos nos exhibeamus eorum frequentia, & eo modo conversemur in conspectu Angelorum, ne forte sanctos offendamus obtutus. Væ enim nobis, si quando Angeli provocati peccatis, & negligentis nostris, indignos nos judicaverint præsentia, & visitatione sua, ut jam necesse habeamus, & nos cum Propheta plangere ac dicere: AMICI MEI, ET PROXIMI MEI AD VESUM ME APPROPINQUAVERUNT ET STETERUNT, ET QUI JUXTA ME BRANT DE LONGE STETERUNT, ET VIM FACIEBANT, QUI QUÆREBANT ANIMAM MEAM; elongatis nimirum sis, quorum præsentia, protegere nos, & propulsare poterat inimicum. Quod si tam necessariam habemus familiaritatem dignationis Angelicæ, cavenda nobis eorum offensa, & in his maxime exerceendum,

quibus eos novimus oblectari. Sunt enim plurima, quæ eis placent, & quod in nobis invenire delectat; ut est sobrietas, castitas, paupertas voluntaria, crebri in cælum gemitus, & orationes cum lacrymis, & cordis intentione: attamen super omnia hæc, unitatem, & pacem à nobis exigunt Angeli pacis.

Quantam pariter beatissimis illis Custodibus gratitudinem debeamus, etiam declarat ipsemet Bernardus præfato Serm. 12. in Psalmum 90. Ubi cum dixisset: *Adsum igitur, & adsum tibi: non modò tecum, sed etiam pro te adsum: ut protegam, adsum ut profuit: quid retribuam Domino pro omnibus quæ retribuit tibi?* subdit: *Simus ergo devoti, fuitus grati tantis Custodibus, redamemus eos, honoremus eos, quantum possumus, quantum debemus; & sequentia quæ habet supra. num. 15.*

Tandem invocationibus nostris, & precibus sunt interpellandi, quoties angustiarum spirituales, & corporum nos premunt: id namque fecerunt sanctissimi Patriarchæ: in primis verò Jacob, qui filiis Joseph benedicens aiebat Genes. 49. *Angelus qui eruit me de cunctis matribus, benedicat pueris istis*, quibus verbis constat Angelum sui protectorem invocare. Id ipsum cap. 5. Job legimus ubi Eliphaz. Jobum arguens ait: *Voca ergo, si est qui respondet, & ad aliquem Sanctorum convertere*; Ubi nomine Sanctorum beatos Angelos intelligit, ut interpretatur S. Augustinus in annotationibus in Job. qui etiam illud: *Miseremini mei, miseremini mei, saltem vos amici mei ad Angelos dici existimat*, juxta, quod dicitur apud eundem Job capite 33. *Si fuerit Angelus loquens pro eo unus de nullibus, miserebitur ei, & dicit, Libera eum, ut non descendat in corruptionem*. Quod utique confirmatur ex illo Osee 12. ubi de Jacob Patriarcha legimus, quod invaluit in Angelum, & confortatus est, fleuit, & rogavit eum: sic enim explicatur lucta

illa, quam idem Patriarcha habuit tota nocte cum Angelo Genes. 31. Roganti autem Angelo sicut eum dimitteret ad auroram, respondit: *Non dimittam te, nisi benedixeris mihi*.

Hanc eandem veritatem edocent sancti Patres; in primis verò sanctus Chrysostomus in sua Liturgia, ita scribit: *Cælestis militia Princeps Michael, rogamus te nunc indigni, ut tuis intercessionibus munus nos*. Et clarius lib. de Incomprehensibili Dei natura, loquens de Angelis ait: *Rogant pro genere humano, quasi dicant, Pro his Domine rogamus, quos tu aded dilexisti, ut pro eorum salute mortem obires, animam in cruce essares; pro his supplicamus, pro quibus ipse tuum largitus es sanguinem, pro his oramus, pro quibus corpus tuum immolasti, &c.* Id ipsum præstat Ecclesia, quæ in sacro Missæ Canone post consecrationem hæc verba à Sacerdote proferenda præscripsit: *Supplices te rogamus omnipotens Deus. jube hæc perferri per manus sancti Angeli tui in sublime altare tuum in conspectu divine majestatis tue*. Atque ita planè contigisse cuidam sui temporis Sacerdoti, refert Beatus Climacus, in speculo exemplorum, scribens, quod ubi prædicta verba quidam Sacerdos sui temporis inter celebrandum pronunciasset, illicò magna cælestium Spirituum adfuit multitudo visibiliter, inter quos unus specie illustrior, & maiestate sublimior visus est sacram Hostiam accipere, & illam divino conspectui præsentare, tum oblatam omnibus aliis Angelis summâ reverentiâ congratulantibus, iterum super altare ad sacrificij consummationem deposuisse.

Hinc sanctus Bernardus sermone de triplici genere bonorum, devotè monet: *A sanctis Angelis, inquit, auxilium querendum est, ut oculis suspiriis, & frequentia lacrymarum, & illi supereminenti maiestati preces nostras offerant, referant gratiam; quia missi administratores*

torii spiritus sunt propter nos, ut hæreticam capiamus salutem. Quod utique confirmat sermone 12. in Psalm. Qui habitat, Quoties ergo gravissima cernitur urgere tentatio, & tribulatio vehementer imminere, invoca Custodem Angelum tuum, Doctorem tuum, Adjutorem tuum in opportunitatibus, & tribulationibus, inclama eum, & dic, Domine salva nos: perimus. Inde non mirum si Seraphicus Pater noster Franciscus, ut ait S. Bonaventura in ejus vita: Tantò erat ipsi Angelis spiritibus amoris vinculo copulatus, atque ita eos venerabatur, ut ob devotionem ipsorum ab assumptione Virginis gloriose, quadraginta diebus insilens jejunaret; Beato autem Michaeli Archangelo, eo, quod animarum representandarum haberet officium, spiritualis erat amore devotior, propter servitum quem habebat zelum ad salutem omnium salvandorum.

Dices. Sanctus Paulus ad Coloss. 2. religiosum omnem cultum Angelorum interdixit, ita scribens; Nemo vos seducat volens in humilitate, & religione Angelorum, que non vidit, ambulans frustra inflatus sensu carnis sue. Unde Theodoretus exponens hæc verba capituli sequentis, quibus Paulus hortatur: Omnia in nomine Domini lesu facite; Hanc legem, inquit, sequuta Laodicea Synodus, ut veteri illi morbo remedium afferret, decrevit, non esse supplicandum Angelis, neque derelinquendum esse Dominum nostrum Iesum Christum: Ergo, inquit Calvinista, Angeli non sunt interpellandi.

Nego consequentiam: Neque enim, hunc sensum sancti Pauli, & Concilii Laodicensi verba præferunt: quid enim voluerit Apostolus, explicat aperte sanctus Chrysost. Homil. 6. in idem cap. Quid sibi, inquit, omnino volunt ista verba? Respondet, Erant nonnulli dicentes: Non oportet nos per Christum aditum habere ad Deum, sed per Angelos; illud enim captum nostrum superat.

Hinc Apostolus ubique ea quæ de Christo dixerat inculcare studet: Per sanguinem crucis ipsius reconciliati sumus, & pro nobis passus est. Quod idem habet Theophylactus, Aiebant, inquit, indignum esse majestate Unigeniti nos ad Patrem adducere; majusque quam pro humana tenuitate: Unde, inquit, rationi magis est consentaneum dicere Angelos conciliationi nostræ servivisse. In hunc verò cultum Angelorum invehebant, ac simplicioribus persuadebant, ut his intenderent animum, tanquam his qui nos servassent. Nec ab hac interpretatione abhorret Theodoretus, ait enim Pertinere hæc ad quorundam hæresim; qui tanquam humilitate ducti, cum asserabant invisibilis universorum Deus, nec attingi, nec comprehendendi possit, oportere per Angelos divinam sibi conciliare benevolentiam: Subdit autem illos Judaicis ritibus assuefactos fuisse, & illud jactasse, legem per Angelos traditam esse, ac propterea cultu ac veneratione dignos videri. Hinc subinfert, Morbus hic, inquit, in Phrygia, & Psidia longo tempore hæsit: ejus gratiâ, Synodus apud Laodiceam Phrygiæ oppidum habita lege voluit Angelos orare, hodieque oratoria sancti Michaelis apud illos, & eorum finitimos videre licet. Quibus patet non eam fuisse Teodoreti mentem, ut voluerit per Laodiceam Synodum, proscriptum fuisse cultum Angelorum, sed tantum damnatos illos hæreticos, qui Angelos, spreto Christo, velut primarios, & unicos apud Deum intercessores adhibebant, ut ferunt ultima verba in objectione posita.

Quod autem commemorat in illis regionibus crebra esse oratoria S. Michaeli sacra, non eo pertinet, ut eadem damnet, qualia tunc populari cultu celebrabantur: sed ut indicio sit populos istos in Angelorum venerationem propensissimos fuisse, eo quòd frequentia illis in locis sancti Michaelis essent oratoria, quæ pridem instituta fuerant;

non

non quidem ut ibi superstitiosus honor tribueretur Angelis, uti postmodum fecerunt illi hæretici, sed ut manifestum fieret sanctos Angelos à fidelibus ab ipsis etiam Ecclesiis primordiis summa veneratione esse habitos. Quod autem ea fuerit etiam Laodicensi sententia, patet ex *Canone 37.* in quo constitutum legimus; *Non oportere Christianos Ecclesiam Dei relinquere, & ire, atque Angelos nominare, & Congregationes facere, quæ interdicienda noscuntur. Si quis igitur inventus fuerit huic occulte idololatriæ ferviens, sit anathema, quia reliquit Dominum nostrum Jesum Christum Filium Dei, & se idololatriæ tradidit.* Quibus verbis perspicuum est, non prohiberi quemcumque cultum, & invocationem Angelorum; sed eum tantummodo, qui ad contemptum pertinet Domini nostri Jesu Christi, ut faciebant illi humiles Angelorum cultores.

Porrò Angelorum, ac præsertim sancti Michaelis, Theodoretæ ætate, venerationem percrebuisse, & in illius honorem frequentia per totum Orientem oratoria instituta fuisse, testatur Sozomenus æqualis Theodoretæ *lib. 2. cap. 3.* ubi *Michaelia*, idest basilicas, & oratoria sancto Michaeli dicata, & ingentia in eis facta miracula refert, ex eoque Nicephorus *lib. 7. cap. ult.* His itaque constat, quàm levibus momentis ducantur Calvinistæ, ut Angelorum cultum nobis exprobrant.

ARTICULUS TERTIUS.

De Angelorum peccatis, & penis.

MIAUM certè qualiter obscuratum fuerit aurum cælestis, mutatus color optimus, dispersi sint illi lapides prætiosi, quibus instauranda, integrandaque erat cælestis Jerusalem: Angelos dico illos perduelles, & in Deum rebellantes, qui divinam æqualitatem

æmulati cum suo Principe Lucifero, omnibus quibus à suæ creationis primordio ditati fuerant charismatibus, spoliati, è Cælorum sublimi in inferni profundum æterno, & irrevocabili lapsu ruerunt. Horum autem naturam superfluum esset speciatim hic discutere, cum alia non sit à sanctis Angelis, ut prima initio hujusce Tractatus disputatione apertè satis declaratum est.

Insuper tamen hic è limine Lectorem monitum volo, nonnullos è sanctis Ecclesiæ Patribus docuisse Dæmones aliam, quàm sancti Angeli sortitos fuisse naturam. Etenim primò peritque contendunt eos fuisse à primordio corpore, & carne vestitos. Ita in primis opinatus est Justinus Martyr, qui cum dixisset Deum terrena hominibus subjecisse, hominum verò, rerumque cæterarum providentiam Angelis attribuisse, subdit; *Angeli porrò hunc ordinem prætergressi, consuetudine mulierum capti sunt, ac filios genuerunt, quos Dæmones appellamus: atque insuper humanum deinde genus sibi subjecerunt, partim magicis scriptis; partim terroribus, ac suppliciis, quæ inferebant; partim sacrificiorum, ac suffituum, & libaminum institutione, quibus indigere ceperunt, postquam cupiditatum perturbationibus tanquam servos se subjecerunt.*

Quibus verbis quamquam significet omnes Angelos esse corpore vestitos, tamen aliam esse Dæmonum ab Aliis naturam apertè declarat. Idem habet ejus Discipulus Tatianus *Lib. contra Græcos*, docens Dæmones non carne præditos esse, sed tenuissimis corporibus: *Dæmones, inquit, omnes carne præditi non sunt, sed spiritualis illis inest conerctio, ut ignis, & aeris: porro ab his solis, qui Dei spiritu uniantur Dæmonum corpora respiciunt, &c.*

Eandem sententiam approbat Origenes *l. 3. contra Celsum*, & insuper affirmat Dæmones *liguritores esse, ac circum sacrificia & cruores, & vapores su-*

sacrisiorum volitare; Angelos verbò bonos discrepantis esse tum naturæ, tum propofiti ab his omnibus Dæmonibus, qui in terris habitant. Idem docet sanctus Basilus, vel quisquis est Author commentarii ad primum caput Isaïæ, ubi legimus quòd Dæmonibus propter naturam voluptatum appetentem, & perturbationibus obnoxiam, sacrificia voluptatem quamdam, & usum afferunt in nidorem abeuntia, quod ex unctione sanguis evaporatus, & ad hunc modum attenuatus, in illorum substantiam assumitur. Toti enim per totum vaporibus a-luntur, non mandendo, vel ventris officio: sed quemadmodum capilli omnium animalium, & ungues, ac cætera id genus in totam substantiam suam alimentum accipiunt. Ob id nidores affectant, thurisque fumos tanquam ad nutrimentum suum vehementer expetunt. Subscribit etiam Chrysost. Oratione 2. in sanctam Babylam Dæmones, inquit, cum nidore, ac fumo, & fuso ei uore coluntur, accurrunt tanquam canes sanguinem vorantes, & gulosi ad lambendum; quando autem nemo est, qui hæc illis præbeat, velut fame quadam eneantur. Non abnuat etiam Hieronymus Epistola 146. ad Damasum ita scribens. Talis est Dæmonum multitudo, quæ per idola mansueta crure pecudum, & vidimis pascitur.

Ex hoc ipso argumento Tertul. Cap. 22. Apologetici, demonstrat Dæmones esse spiritus immundos: Quod, inquit, ex pabulis eorum sanguine, & fumo, & putidius rogis pecorum, & impurissimis linguis ipsorum natum intelligi debet. Eusebius denique, Lib. 5. de præparatione Evangelica, eandem veritatem confirmat, affirmans idcirco Dæmones homines ad sacrificia frequentanda, & simulachra veneranda traducere, ut ex oblatarum victimarum nidore saginentur. Isti igitur, inquit, circa terram, ac sub ea degentes, ac terrenum aerem, crassum illam, caliginosumque perua-

gantes, & in tenebricosum, ac terrenum domicilium relegati circa mortuorum sepulchra, & monumenta, ac sordidam omnem, impuramque materiam, oberrantes, sanguine, ac tabo, & omnigenum animantium corporibus, atque eorum, qui ex terra manant suffusum, vaporumque habitu gaudent.

Nec alia videtur fuisse sancti Augustini sententia, quamvis dubius totus videatur in determinando num Dæmones ex aerea, aut alia materia formati fuerint, nam 3. de Genesi ad litteram ita scribit: Et hi, inquit, Dæmones, aerea sunt animalia, quoniam corporum aereorum natura vigent: & propterea morte non dissolvuntur, quia prævalet in eis elementum, quod ad faciendum, quam ad patiendum est aptius, &c. Ac paulò post: In qua fortassis parte (suprema scilicet aeris, ac purissima) si fuerunt ante transgressionem suam, transgressores cum principe suo nunc Diabolo, tunc Archangelo: nam nonnulli nostri non eos putat cælestes, vel supercælestes Angelos fuisse: non mirum si post peccatum in hanc sunt detrusi caliginem, &c. Mox: Si autem transgressores illi antequam transgredierentur, cælestia corpora gerebant, neque hoc mirum est, si conversa sunt ex pœna in aeream qualitatem, ut jam possint ab igne, id est, ab elemento naturæ superiori aliquid pati.

Ea autem sententia de permutatione substantiali, quam in Angelis peccando factam supponunt præfati Patres, diu apud Græcos invaluit; nam in Concilio Florentino legimus eos dixisse, quod „ Diabolus, & qui cum ipso exciderunt „ gloria Dei, carnem propomodum „ acceperunt, & qui materiæ erant ex „ pertes, ex parte materiales facti sunt: „ idcirco & ad materialia currunt cor „ pora, & in corporibus acquiescunt: „ cujusmodi erat ille, qui dixit Matth. „ 8: Si ejicias nos Domine, permitte nos „ intrare in gratiam porcorum: & permi-

misit ipsis, & irruit grex in præcipitium, ac propterea & in humanis corporibus habitare cupiunt; in ipsis enim requiescunt: Ecce quomodo ex parte carnales sunt, & supplicio sunt afficiendi, & materia quam acceperunt, in igne concremabitur in æternum, Angeli autem omnino sunt expertes materiæ, ut qui cadere amplius nequeant; nec ulla inest ipsis materia.

Verum hæc sententia prorsus absfona est, siquidem *prima disp. hujusce Tra&atus* sufficienter demonstravimus Angelos omnes esse omnino materiæ, ac corporis expertes, & Dæmones initio sortitos esse cum sanctis Angelis eandem naturam, nec ab ea peccando descivisse; quocirca ne trita jam stadia remetiāmur, abstinendum duxi ab iterata improbatione hujus sententiæ. Solum illaque hic Inquirendum, & resolvendum auspicamur, quodnam fuerit, & quàm grande Angelorum perduellium malum; Cumque generatim duplex Angeli malum incurrerint peccando, & avertendo se à Deo incommutabili bono, ut ad bonum proprium se convertereint; nempe malum culpæ, & pœnæ; de utroque disserendum erit in sequentibus quæstionibus, quarum *Prima* aperiet, an & qualiter Angeli peccare potuerint: *Secunda*, quale primum, & capitale fuerit Angelorum peccatum. *Tertia* an peccatum illud sit omnino inextinguibile, Dæmonesque ita sint in malo obstinati, ut nullatenus resipiscere queant: *Quarta*, quænam eorum pœna, & qualiter à Deo criminum vindice torqueantur.

QUÆSTIO PRIMA.

An, & qualiter Angeli peccare potuerint?

TRIA maxime veniunt in presenti quæstione determinanda: *Primum*, an Angeli creati potuerint esse

omnino Impeccabiles. *Secundum*, an peccare potuerint primo suæ creationis instanti: *Tertium*, an aliqua ducti necessitate, vel plenè libera voluntate peccaverint, quæ ut evidentiùs resolvantur.

NOTANDUM 1. Nullum de facto existere, aut extitisse unquam puram creaturam ex natura sua, & intrinsecè impeccabilem; nam omnis creatura intellectualis, angelica est vel humana; certum est autem utramque peccato fuisse sœdatam. Unde meritò *Iob. 4.* dicitur, *Eccè qui serviunt ei non sunt stabiles, & in Angelis suis reperit pravitatem; quânto magis hi, qui habitant domos luteæ?* Quasi diceret, ait ibidem S. Gregorius, *Si illi Spiritus incommutabiles esse nequeunt, qui nulla carnis infirmitate deprimuntur, qui temeritate homines in bono permanere constanter existimant, quos in eo quod intellesur ad summa evehit, carnalis infirmitas aggravans præpedit, ut per corruptionis vitium in semetipsis habeant unde ab intima novitate veterascant.*

Solum ergo difficultas est, an de potentia Dei absoluta formari possit aliqua rationalis creatura, quæ ex se; & ex natura sua sit omnino indefectibilis. Circa cujus difficultatis resolutionem, duæ maxime oppositæ sunt sententiæ; quarum *Prima* contendit non repugnare aliquam creaturam rationalem esse ab intrinseco impeccabilem, Ita sentit Ochamus in *1. disp. 44. quæst. unica art. 1.* ubi supponit posse dari hominem longè essentialiter perfectiorem illo, qui creatus est, & consequenter illum potuisse produci natura sua impeccabilem. Sunt autem, qui repetunt modum hujus impeccabilitatis, ex eo quod putant posse produci creaturam, aliquam, cui esset connaturalis visio beatifica, quæ inquit, hominem efficit natura sua impeccabilem. Sunt etiam, qui volunt hujus impeccabilitatis modum deduci posse ex eo, quod non

non repugnet à Deo produci creaturam rationalem non liberam, sed ex necessitate determinatam ad unum, subindeque illam peccare non posse; quia cum naturaliter non possit ad malum determinari, consequens est, quod illa esset ex natura sua formaliter ad bonum determinata. *Secunda* verò sententia negat creaturam produci posse, quæ sit intrinsecè impeccabilis, tam in materia naturali, quàm in supernaturali, ita quòd si naturæ suæ relicta, sive ad ordinem supernaturalem evecta peccare posset.

Notandum 2. Reverà Angelum non fuisse peccatorem in primò suæ creationis instanti, siquidem, ut supra docuimus, omnes Angeli creati fuerint in statu gratiæ sanctificantis, unde in Concilio Lateranensi sub Innocentio III. determinatur, quod Diabolus, & alii Dæmones à Deo quidem naturà creati sunt boni, sed ipsi per se facti sunt mali. Et in Concilio Carthagenensi 4. cap. 1. inter alia fidei dogmata interroganda ab eo, qui Episcopus creatur, unum est, an credat quòd Diabolus non per conditionem, sed per arbitrium factus est malus. Hinc Origenes homilia in Ezechielem: *Serpens*, inquit de Diabolo, *non semper fuit serpens, primò quidem à Deo bonus creatus, sed propria voluntatis pravitate Dæmon efficitur.* Cui concinit S. Chrysostomus de patientia Job. *Diabolus*, inquit, *non naturæ nomen, sed præsumptionis est. . . non enim Diabolus factus est à principio, sed Angelus creatus est.* Quibus concinit sanctus August. pluribi, maximè Lib. 1. de nuptiis, & concupiscentiis cap. 23. *Diabolus*, inquit, *spiritus immundus, est, & utique quoniam spiritus est natura, immundus est de vitiis, bonum quod spiritus, & malum quod immundus: quorum duorum illud à Deo est, hoc ab ipso.* Unde lib. de Civit. c. 13. ait, *Nec ipse Diaboli natura, in quantum natura est, malum est; sed perversitas eam malam facit.*

Tom. IV.

Hæc etiam veritas ratione firmari potest: Si enim Dæmones creati fuissent mali, non viderentur digni supplicio propter tale malum, in his enim, quæ à natura sunt, nec præmio, nec supplicio quis dignus est censendus: Tum, quia sequeretur talis malitiæ Deum esse principalem Authorem; etenim qui dat formam, dat naturaliter consequentia ad formam: sed illa malitia formalis sequeretur talem naturam, ut supponitur: Ergo principaliter ab Authore talis naturæ proveniret. Tum denique quia Deus ipse *Genes. 1.* omnia à se condita opera ut perfecta, & bona probavit; *Vidit*, enim, *Deus cuncta quæ fecerat, & erant valde bona.* Adde quòd ad hujusveritatis assertionem sufficiant verba Judæ Apostoli dicentis, *Angelos qui non servaverunt suum principatum, sed reliquerunt suum domicilium, in judicio magni diei, vinculis æternis sub caligine esse servatos;* Non fuerint ergo mali natura: sed tales propria voluntate facti sunt. Restat itaque determinandum, an Angeli in primò suæ creationis instanti reverà peccare potuerint. Negant Thomistæ cum Angelico doctore, *prima parte qu. 63. ar. 5.* Affirmat verò subtilis Doctor *in 2. dist. 5. qu. 2. num. 13.*

Notandum 3. Reverà Angelos fuisse ab initio suæ formationis libero arbitrio donatos: *Saluberrimè enim constituntur*, inquit S. Augustinus lib. de correptione, & gratia cap. 10. *quòd relictisimè credimus Deum, dominumque rerum omnium, qui creavit omnia bona valde, & mala ex bonis exortitura esse præstitit, & seivit magis ad suam omnipotentissimam bonitatem pertinere, etiam de malis bene facere, quàm mala esse, non finire: sic ordinasse Angelorum, & hominum vitam, ut in ea prius ostenderet quid posset eorum liberum arbitrium, deinde quid posset suæ gratiæ beneficium, justitiæque judicium.* Denique *Angeli quidam quorum princeps est, qui*

P p

di-

dicitur Diabolus, per liberum arbitrium à Domino Deo refusa facti sunt: refugientes tamen ejus bonitatem, quâ beati fuerunt, non potuerunt ejus effugere judicium, per quod miserrimi effecti sunt, Ceteri autem per ipsum liberum arbitrium in veritate steterunt. Quibus verbis apertè docet. S. Augustinus omnes Angelos tam bonos, quàm malos ab initio donatos fuisse plenissima libertate, & malos liberrimè à Deo fuisse averfos: bonos autem proprio suo arbitrio actuali gratia roborato, & illustrato in veritate, & observantia stetisse. An autem aliquo ad peccatum suadente, & moraliter impellente Dæmones devierint: hic erit determinandum.

CONCLUSIO PRIMA.

REVERA non potest aliqua produci rationalis creatura, quæ ex natura sua, & intrinsece sit impeccabilis. Ita Doctor in 2. dist. 23. quæst. unica num. 6. ubi ait, *Dico igitur, ad quæstionem, quod non potest fieri talis natura, sive voluntas, quæ sit impeccabilis per naturam: quia auctoritates Sanctorum sunt expresse de hoc.*

Probat itaque conclusionem, primò quidem auctoritate S. Hieronymi Epistola 148. circa finem, ubi expendens illa verba Psalmi 142. *Non justificabitur in conspectu tuo omnis vivens*, ait, *Non dicit OMNIS HOMO, SED OMNIS VIVENS, id est, non Evangelista, non Apostolus, non Propheta: ad majora conscendo, non Throni, non Dominationes, non Potestates, ceteraque Virtutes: Solus Deus est in quem peccatum non cadit, cetera cum sint liberi arbitrii, in utramque partem suam possunt sciltere voluntatem.* Eamdem sententiam edocet S. Augustinus Lib. 3. contra Maximinum cap. 12. ubi ex illis verbis 1. ad Timotheum 6. quibus de Deo dicitur, *Qui solus habet immortalitatem*: concludit Deum etiam solum habere impeccabilitatem; nam homines, & Angeli peccando aliquo modo

moriuntur: *Et omnes, inquit, qui non peccaverunt, peccare potuerunt, & cuiusque creatura rationali præstatur, ut peccare non possit, non est hoc naturæ propriæ, sed Dei gratiæ.*

Rem expresse declarat S. Gregorius libro 5. moral. cap. 27. *Natura Angelica, inquit, etiam contemplatione sua auctoris in bærendo in statu suo immutabiliter permanet; eo tamen ipso, quo creatura est, in semetipsa vicissitudinem mutabilitatis habet.* At omnium evidentissimè rem definit S. Anselmus lib. 2. Cur Deus vivum cap. 10. ubi Discipulo ab eo querenti cur non potuit Deus facere creaturam impeccabilem per naturam? respondet: *Quia non potnis ipsam facere Deum: Ergo* (subinfert Doctor) *nulla creatura potest esse impeccabilis, nisi sit Deus, vel assumpta à Verbo.*

Eamdem veritatem duplici ratione probat Doctor; quarum primam sic format; *Omnis voluntas, quæ potest appetere suum commodum, & illud non appetere rectè, potest peccare: sed nullæ est creata voluntas nec creabilis, quæ non possit appetere suum commodum, & illud non appetere rectè: Ergo nulla pariter est, quæ non sit defectibilis. Major constat: Nam eo ipso, quò voluntas proprium commodum appetendo potest omittere affectum justitiæ, & rectitudinis, seu non appetere illud commodum ob finem honestum, & à Deo præscriptum, potest peccare; peccatum quippe nihil aliud, est quàm carentia rectitudinis debitiæ actui. Minorem probat Doctor Omnis voluntas in qua non necessario conjunguntur ista duo; nempe appetere commodum, & illud rectè appetere: potest illud bonum commodum appetere rectè, & non rectè: sed in nulla voluntate creata possunt conjungi illa necessario; nempe, quod appetendo suum bonum commodum, necessario illud appetat rectè: nulla enim voluntas præter divinam rectè appetit*

ex eo formaliter, quod appetit : Ergo, &c. *Pates Major* : Si enim illa duo non sint necessariò connexa, nempe appetere commodum, & illud appetere rectè, evidens est, quod voluntas poterit commodum sibi bonum appetere, & illud non appetere rectè. *Minorem probat Doctor* : Omnis voluntas creata sicut potest appetere sibi commodum, sic potest illud appetere modo sibi non convenienti secundum ordinationem divinam : quia posset illud commodum velle tali modo, quo appareret esse ipsi majus commodum : sic posset appetere, & velle summè beatitudinem summam, & omnium maximam ; quia melius est habere beatitudinem summam quàm eam habere in gradu remisso : ille autem appetitus non esset conformis divinæ ordinationi ; quia ex Dei præscripto beatitudo commensurari debet meritis : Ergo nulla est voluntas creata, quæ ex se non possit aliquid velle contra Dei voluntatem ; adeoque nulla est, quæ non possit peccare.

Confirmat. Omnis voluntas, quæ non est sua regula, nec necessariò est conformis suæ regulæ, potest deficere à sua rectitudine : sed omnis voluntas creata naturæ suæ relicta, nec est sua regula, nec conformis suæ regulæ : Ergo, &c. *Major constat* : Omnis namque voluntas, quæ nec est sua regula, nec est conformis suæ regulæ, haud dubie poterit ipsi esse disformis ; adeoque non erit recta, nec proinde debitam rectitudinem in suis actibus habebit, subindeque peccabit ; cum peccatum, ut mox diximus, nihil sit aliud quàm carentia debitæ rectitudinis in actibus à voluntate libere elicitis. *Minor* etiam est evidens ; nulla namque voluntas creata, potest esse sua regula, cum necessariò voluntatem superiorem nempe divinam habeat, à qua dependet, & per quam regulari debet : nec ipsi est necessariò conformis ; quippe cum supponatur licita, adeoque potest velle aliquid

contra divinam voluntatem, aut saltem velle alio modo, & alterum ob finem : Ergo, &c.

Probat 2. Omnis voluntas, quæ non est satiata per amorem alicujus objecti, & quæ non habet necessariò, sed per propositum bonum infinitum, quo satiari potest ; potest quando libuerit cessare à quocumque objecto, quod amat, & amare aliqua objecta, non in ordine ad bonum illud infinitum satiativum : sed nulla voluntas creata est ex se satiata amore ullius objecti ; nec habet necessariò sibi propositum bonum infinitum semper, quo solo satiari potest : Ergo omnis voluntas creata potest cum libuerit cessare ab amore cujuscumque objecti, quod amat, & amare aliqua objecta sine relatione eorum ad objectum infinitum satiativum : sed omnis voluntas, quæ potest hoc facere, potest peccare ; quia potest cessare ab amore alicujus objecti, etiam quando præcipiatur : Ergo omnis voluntas creata potest peccare, & consequenter nulla est ex se impeccabilis, Advertit etiam hac ratione posse confirmari secundam, & tertiam probationem Alensis.

Probari posset ulterius hæc conclusio ; quia eatenus posset dari voluntas rationalis non peccabilis ; vel quia determinaretur ex natura sua ad prosequendum quodcumque bonum propositum, itaut non esset ipsi liberum cessare à prosecutione : vel quia determinaretur ad bonum honestum, ut sic, itaut non posset prosequi aliud bonum quam bonum honestum, quamvis ex ipsismet bonis honestis posset pro sua libertate hoc præ illo eligere, sicut voluntas Beatorum est de facto determinata. Sed neutrum ex his dici potest : Non *primum*, quia sic voluntas non esset libera : & præterea, quia si esset determinata ad quodcumque bonum pro-

positum, deberet etiam esse determinata eodem modo ad fugiendum quodcumque malum propositum: sed hoc est inconveniens: quia sequeretur, quod intellectus non deberet habere virtutem proponendi simul bonum, & malum, nec duo bona in, quæ non posset voluntas simul tendere, aut duo mala; quia, quando quidem voluntas esset determinata ad unum, frustra simul proponeret alterum, & frustra daretur talis facultas intellectus. Non etiam *secundum*; quia absurdum est, quod appetitus ullus sit, qui non possit tendere in quodcumque bonum suum: sed impossibile est, quod possit voluntas esse ulla creata, quæ non possit habere aliud bonum quàm honestum: impossibile est enim, quod sit potentia ulla vitalis, quæ non habeat aliquod objectum delectabile: Ergo impossibile est, quod solum determinetur ad bonum honestum ex sua natura intrinsecè.

Dices 1. Deus potest facere corpus, quod non potest deordinari à suo motu, ut est cælum, quod naturaliter nequit aliter moveri, quàm de facto movetur: Ergo potest facere spiritum, qui non possit deordinari à motu suo, & consequenter erit impeccabilis.

Respondet Doctor, negando antecedens, si loquamur de corpore secundum naturam suam intrinsecam: nam sine dubio quodcumque corpus potest à quocumque motu impediri, saltem divinitus, & moveri motu omnino distincto, & opposito. Deinde, quamvis verum esset antecedens, negari potest consequentia: discrimen enim est, quod tale corpus cum libertatis sit expers, nec possit esse culpæ particeps sicut voluntas, non posset etiam deordinari in motu suo deordinatione culpabili: non sic autem voluntas, quæ cum sit libero arbitrio donata, & non solum possit habere motum circa unum objectum, sed etiam circa aliud, non debet necessariò habere unum præ alio, & conse-

quenter si solus motus in unum ex illis, ut in bonum honestum, sit motus rectus, & ordinatus ipsius, poterit deordinari ab illo motu habendo alium motum in bonum commodum non honestum, qui motus est inordinatus.

Dices 2. Deus facere potest voluntatem aliquam, quæ necessariò tendat in aliquod bonum, putà in finem: Ergo poterit facere, quod talis voluntas tendat in omne ordinatum ad illum: Ergo, &c. Antecedens patet per August. 13. de Trinit. cap. 3. dicentem, *Quod omnes volunt necessariò beatitudinem*. Consequentia probatur, quia eadem necessitate, qua aliquid tendit in finem, tendit in ea, quæ sunt ad finem.

Respondet Doctor. Primò juxta sua principia, quod voluntas creata non necessariò tendit in finem sibi ostensum; nec in particulari, nec in universalis: idcirco negat antecedens cum sua probatione.

Respondet secundò juxta communem sententiam, concessio antecedente negando consequentiam: nam alia est ratio de fine ultimo, atque de mediis ad ipsum ordinatis; nam in fine ultimo cum sit infinitum bonum est perfectissima bonitas alliciens voluntatem ad amorem ejus, non verò est talis ratio boni in mediis ad ipsum ordinatis. Addit Doctor, quod quamvis necessariò talis voluntas tenderet in finem: non inde sequeretur, quod in media tendere deberet modo debito, & consequenter inde non sequitur, quod non possit peccare.

Dices 3. Possit peccare juxta S. Anselmum, non est libertas nec pars ipsius: Ergo potest esse vera libertas absque peccandi potentia: proindeque Deus poterit producere aliquam voluntatem omnino impeccabilem.

Respondet primò Doctor, explicando S. Anselmum, & distinguendo antecedens. Possit peccare, idest, posse producere ipsum peccatum formaliter, seu pri-

privationem, in qua communiter supponitur consistere ratio formalis ipsius peccati, concedit antecedens: posse peccare, id est, posse producere actum illum qui est peccaminosus pro instanti, quo est peccaminosus, negat antecedens: & similiter distinguit primum consequens, & negat secundam consequentiam.

Respondet secundò distinguendo aliter antecedens: Posse peccare non est ita essentia libertatis etiam creatæ, quin possit haberi conceptus libertatis absque conceptu talis potentie; concedit: quia potest quis considerare potentiam, ut potentem unum bonum præ alio eligere ad libitum suum, & hic conceptus est ipsius, ut est libera, & sufficienter distinctivus ipsius à potentia naturali: posse peccare non est de essentia libertatis creatæ ex se sic, ut non conveniat ex natura sua intrinseca cuicumque potentie liberæ creatæ; negat antecedens.

Dices 4. Deus potest facere voluntatem impeccabilem per gratiam, & gloriam, ut patet in Beatis, & confirmatis in gratia: Ergo, & per naturam; quia Deus potest communicare creaturæ alicui omnem omnino perfectionem finitam ipsam ei identificando realiter: At perfectio illa quam habet status beatitudinis, confirmationis in gratia, ratione cujus voluntas fit impeccabilis, est perfectio finita: Ergo potest illam identificare voluntati: sed voluntas, cui identificaretur, esset sine dubio tam impeccabilis, quàm est voluntas Beati, & confirmati in gratia.

Confirmatur. Quod non repugnat alicui creaturæ, potest illi concreari, & consequenter potest esse ipsi connaturale: sed gratia, & charitas non opponuntur creaturæ rationali: Ergo possunt esse ipsi connaturales.

Respondet primò, Negando majorem: nam, ut diximus in disputatione de Visione beatifica, nulla est creabilis

substantia spiritualis, cui Visio beatifica sit connaturalis. Idem dicendum de gratia, & charitate, subindeque etiam neganda est confirmatio.

Respondet secundò. Doctor negando consequentiam cum majori probationis suæ, neque enim potest efficere Deus, ut ulla substantia v. g. habeat sibi identificatum calorem formalem, aut ullus intellectus creatus intellectiōnem aut Visionē beatificam; unde quantumvis posset facere perfectiorem intellectum in infinitum, nunquam tamen posset facere, ut ullus finitus esset realiter gratia, aut intellectus intellectio.

Dices 5. Voluntas creata est impeccabilis in primo instanti suæ creationis; quia pro illo instanti habet rectitudinem naturalem sibi datam à Deo, & motum naturalem, & per consequens rectum naturaliter, & necessariò: Sed Deus potest conservare creaturam pro quolibet altero instanti eodem in statu, quo primò formata fuit: Ergo semper poterit esse ex se impeccabilis.

Respondet Doctor primò negando antecedens, cujus falsitas patebit ex conclusione sequenti. Respondet secundò juxta S. Thomæ doctrinam, negando, quòd illa creatura conservari deberet in sequentibus instantibus eodem in statu, quo erat in primo, quia pro aliis instantibus exigit connaturaliter habere operationes ex se sibi ipsi imputabiles, & non necessariò imputabiles Deo: in primo autem instanti necessariò imputantur Deo omnes operationes ejus, consequenter non potest habere pro primo instanti operationem malam juxta illam sententiam.

Dices denique: Non implicat contradictionem, quòd creata voluntas necessariò determinetur ad sequendum dictamen rationis, adeoque Deus talem voluntatem potest producere: quidquid enim contradictionem non implicat, à Deo fieri potest: Sed voluntas necessariò sequens dictamen rationis est ex se im-

impeccabilis: Ergo, &c. *Minor* constat: Probatur *Major*: Tam appetitus voluntarius potest determinari ad dictamen rationis sive rectum sive erroneum, quam appetitus sensitivus determinatus est ad dictamen sensus, formale, vel virtuale: Ergo potest esse appetitus determinatus ad dictamen rationis, ita, quod non posset ire contra dictamen rationis, & posset nihilominus in diversa objecta liberè tendere secundum dictamen rationis; quando, scilicet, ratio dictaret plura bona, nec unum alteri præferret, tunc voluntas liberè posset ex his unum eligere, aliud dimittere, nec in hoc peccaret; quippe non ageret contra dictamen rationis.

Nego majorem, & ad ejus probationem dico, quod in eo casu nec voluntas, nec dictamen rationis haberent perfectam rationem voluntatis, & dictaminis; sicut verbi gratiâ, si Deus tantum concurreret cum intellectu alicujus ad intelligendum bona, & non ad intelligendum mala; tunc voluntas necessario vellet bona, & non mala: illa tamen determinatio voluntatis non esset ab intrinseco, sed ab extrinseco; quæstio autem præsens movetur de determinatione voluntatis ab intrinseco.

CONCLUSIO SECUNDA.

ANGELUS potuit peccare in primo instanti. Ita Doctor in 2. dist. 5. q. 2. numero 13. Teneo igitur, inquit, quod potuit in primo instanti habere potentiam volitionis perfectam, & non limitabatur ad rectam operationem: non enim habuit in secundo instanti magis determinans quam in primo: Ergo, &c. Quæ ratio Doctoris sic elucidari potest: Potentia, quæ potest habere operationem perfectam, & non limitatur nec determinatur necessariò ad operationem rectam, potest habere operationem non rectam: sed Angelus in primo suæ creationis instanti habuit potentiam volitionis perfectam; & ideo potuit habere volitionem perfectam, & non limitaba-

tur, nec determinabatur ad operationem rectam: Ergo in illo instanti potuit non rectè operari, & per consequens peccare. Consequentia est optima, cum majori evidenti. *Minorem* probō: Quia voluntas Angeli in primo instanti non habuit majorem determinationem, quam in secundo; cum nihil reale intrinsecum habeat in primo, quod non habeat in secundo: Ergo, &c.

Secundò: Voluntas in primo instanti creationis priùs naturâ quam peccaret, potuit habere omnes condiciones requisitas ad agendum, & eliciendum actum peccaminosum: Ergo reverà potuit pro illo instanti peccare. Probatur *antecegens*: Non aliæ desiderantur condiciones ad peccandum, quam cognitio objecti sub ratione boni aut utilis, aut delectabilis, & prohibiti, & negatio omnis impedimenti: Sed illa omnia possunt esse in primo instanti. Probatur, Illa, quæ sunt in secundo instanti possunt esse in primo præter respectum ad esse præexistens, sed ille respectus nihil prorsus facit ad rem: Ergo quæ requiruntur ad peccandum in secundo instanti, possunt esse in primo.

Probatur 3. Angelus in primo instanti potuit mereri, & habere omnia requisita ad merendum: imò, ut farentur Thomistæ, de facto meruerunt: Ergo, & peccare, & habere omnia prærequisita ad peccandum: tum quia prorsus est eadem ratio: tum quia si non posset peccare, non posset mereri, quia quidquid impedit quominus posset peccare, impedit quominus posset mereri; imò plus requiritur ad merendum, quam ad demerendum; nam mereri est bonum quoddam perfectum, demereri autem est malum: bonum verò ex integra causa, & malum ex quolibet defectu.

Confirmatur: Idcirco Angelus non habuisset in primo instanti necessaria ad peccandum, quia non fuisset perfectè, & completè liber: sed sufficienter liber

liber exitit, ut peccare posset. *Probatur.* Ad hoc, ut Angelus in instanti suæ creationis peccare potuerit, sufficit, quod fuerit liber libertate contradictionis, & exercitii. Sed hanc saltem libertatem in primo instanti creationis habuit: Ergo in illo peccare potuit. *Probatur major,* Angelus in primo instanti suæ creationis tenebatur ex præcepto divino elicere actum dilectionis Dei super omnia: Sed cum fuerit liber quoad exercitium respectu prædicti amoris, potuit tunc non amare, seu amore illum omittere, maxime quia tunc Deus potuit illi denegare auxilium efficax ad illum elicendum; hujus enim auxilii collatio, illi non erat debita; sed omnino libera, & gratuita: Ergo tunc potuit Angelus peccato saltem omissionis peccare; nam posse peccare peccato omissionis, est posse non elicere actum ad quem aliquis ex præcepto tenetur, seu posse illum actum omittere.

Reponunt Thomistæ cum Cajetano, Angelum in primo instanti non potuisse omittere actum; quia stante præcepto ex parte Dei de elicendo tali actu ab Angelo, v. g. de conversione facienda in Deum, erat iudicium ipsi inditum ab Authore naturæ; quod quidem non poterat esse nisi verum practicum de faciendo, quod à Deo præcipitur: ac proinde voluntas non poterat contrarium operari, nec ab actu cessare; nec minus tamen propterea erat libera. Quod utique explicant exemplo Christi Domini, qui respectu actus cadentis sub præcepto, fuit liber quoad exercitium; & tamen peccare non potuit: Unde licet illum actum potuerit elicere potentia antecedenti, & in sensu diviso, non tamen potentia consequenti, & in sensu composito. *Addunt*, quod Angeli in primo instanti potuerint incurere omissionem actus, non tamen omissionis peccatum; quia licet potuerint omittere talem actum, prout ommissio est pura negatio actus oppositi, non tamen

ut est privatio prædicti actus, ut debiti, & à Deo præcepti.

Contra primò hæc responsio supponit tamquam certum, non esse dabilem puram omissionem culpabilem, quod tamen controversatur inter Theologos; quorum plurimi affirmant simplicem, omissionem illius præcepti, quod quis tenetur implere, esse peccaminosam; siquidem eo tempore quò præceptum obligat ad diligendum Deum, v. g. vel ad audiendum sacrum die Dominicâ, potest quis ratione alicuius negligentie culpabilis, se merè negativè habere circa illum actum, itaut nullum voluntatis actum eliciat, quo positivè velit Deum non diligere, vel adesse sacro; quæ negligentia erit omnino culpabilis; quia, ut ommissio sit peccatum, satis est, quod negligentia sit voluntaria indirectè; ut autem negligentia sit hoc modo voluntaria, sufficit quod voluntas possit; & teneatur illam vitare, excitando intellectum ad actum sollicitudinis ei oppositum, & tamen non vitat: ad hoc autem non est necessarius actus voluntatis, quò ipsa negligentia sit volita: nam S. Thomas 2. *quest.* 54. dicit, *Quod negligentia provenit ex quadam remissione voluntatis, per quam contingit quod ratio non sollicitetur, ut percipiat ea quæ debet, vel eò modo quò debet.* Et consequenter ad negligentiam culpabilem non requiritur actus voluntatis, quò sit volita.

Deinde, si voluntas Angeli non poterat suspendere talem actum conversionis ad Deum, consequens est, quod necessitabatur ad illum ponendum: Ergo in eo ponendo actu Angelica voluntas non erat libera, nec ille actus erat voluntarius, proindeque non potuit esse meritorius: sed hoc consequens ut falsum negant etiam ipsimet Adversarii; proindeque ferri debent illum actum fuisse liberum, ac subinde potuisse fieri peccaminosum per omissionem suæ productionis.

Ad exemplum autem de Christo Domino, quod in suæ responsionis confirmationem adducunt, dico illud non esse ad rem, quippe cum Christus Dominus nec in primo, nec in quovis alio instanti suæ vitæ potuerit peccare: Tum quia primus, & princeps erat confirmatorum in gratia: Tum quia intuitiva Dei visione donabatur: Tum denique quia habebat unitam hypostaticè suam humanitatem Verbo: Angelus autem in primo instanti suæ creationis nullo horum gaudebat privilegio: Ergo ex privilegiis Christi, & ex ejus impeccabilitate, non rectè inferitur impeccabilitas Angeli in primo instanti.

Dices 1. Si Angelus in primo suæ creationis instanti peccaret, tale peccatum Deo ut Authori, ac Motori specialiter tribueretur; sed implicat peccatum Deo attribui: Ergo, & Angelum in primo instanti creationis peccare. Minor constat. Probat Major. Prima operatio, quæ incipit cum ipso esse rei, tribuitur causæ productivæ ipsius rei; nam idcirco motus gravium, & levium ad suum locum naturalem, sive centrum, dicitur inesse eis à generante, quia motus ille cum eorum esse incipit; statim enim moventur, & existunt, maxime si producantur extra locum suum naturalem.

Secundò, idem suadetur exemplo tibiz, quæ si nascatur curva, & statim incipiat claudicare, illa claudicatio reducitur in debilitatem principii generantis.

Tertiò, idcirco motus cordis in animalibus generanti tribuitur, quia incipit unà cum ipsis animalibus. Ratio autem eorum omnium est, quia operatio, quæ incipit cum esse rei productæ, est veluti corollarium quoddam sequens ad naturam illius, sicque procedere debet ab Agente, & Authore illius esse; unde vulgare illud, Qui dat esse, dat etiam consequentia ad esse.

Confirmant, ex eo quod operatio pro-

cedens à natura secundum inclinationem ab Authore naturæ acceptam, ipsi naturæ Authori debet attribui; nam moveri sursum, inest igni à generante, quia est secundum inclinationem, quam habet à generante ad locum sursum: sed operatio, quæ incipit simul cum esse rei, procedit à natura secundum inclinationem ab Authore naturæ acceptam: Ergo ipsi naturæ Authori debet attribui. Probant minorem. Quando res incipit esse, non habet aliam inclinationem, & dispositionem, præter illam quam accipit ab Authore naturæ: Ergo si in eo instanti operatur, necessum est, quod operetur secundum inclinationem sibi ab Authore naturæ inditam.

Negat majorem Doctor loco supra laudato numero 4. Primo quia secundum S. Augustinum 11. de Civitate Dei c. 3. qui dicunt Angelos a principio fuisse malos, non sentiunt cum Manicheis, qui ponebant unum Deum malum immediate esse causam mali, & alterum esse immediate causam boni: Sed hoc sentire deberent si Angeli in primo suæ formationis instanti non possent esse mali, & peccatores, quin eorum peccatum in Deum refunderetur: Ergo ex S. August. licet Angeli peccassent in primo instanti suæ creationis, eorum propterea peccatum Deo non essettribuendum. *Secundò*, Defectus causæ secundæ in agendo, pro quocumque instanti quo agit, non est Deo tribuendus, sed ipsimet causæ secundæ, quamvis agere nequeat nisi cum concursu ipsius Dei; sed defectus qui inesset actui peccaminoso Angeli peccantis in primo instanti, esset ipsiusmet Angeli defectus: Ergo non Deo, sed ipsis Angelis esset adscribendus. *Tertiò*, Eatenus peccatum Angelicum in primo instanti refunderetur in Deum tamquam in causam illius peccati, quatenus Deus pro illo instanti voluntatem produceret, ipsique infunderet principia omnia, quibus median-

tibus posset peccare, necnon, & conditiones sine quibus non peccaret, putâ objectorum applicationem, & motionem: Sed si hac ratione Deus dicendus esset author peccati, pari jure omnia peccata, quæ fierent in secundis instantibus in ipsum essent refundenda: quippe ille ipse est, qui formavit voluntatem, quæ peccat, & cum ea ad actum peccaminosum physice concurrat; necnon, & cum objecto ipsam movente, & aliis causis ad actum peccaminosum inducentibus; Ergo multò magis dicendus esset author peccati, quod fit in illis sequentibus instantibus: quod tamen cum asserere sit execranda blasphemia, pari jure non esset dicendus author peccati, qui fieret in primo instanti.

Denique, hoc argumentum in ipsosmet Adversarios retorquet Doctor *num.* 8, nempe quod si Angeli non potuerint peccare in primo instanti, quia eorum peccatum totum in Deum unicuique autorem refunderetur; nec etiam potuerunt in illo instanti mereri; quia idcirco, inquit, non potuit Angelus demereri in primo instanti, quia omnis operatio, quam habet in primo instanti, est Dei producentis, & consequenter non sua: Operatio autem peccaminosa debet esse sua propria: sed operatio meritoria tam debet esse sua propria, quam peccaminosa: Ergo si operatio, quam habet in primo instanti sit Dei, & consequenter non propria; sequitur quod non possit esse meritoria; quod cum non admittant Adversarii, nec etiam alterum admittere debent.

Ex iis itaque constat falsam esse maiorem illius argumenti, quo maxime nititur sententia Adversariorum. Undo in forma, nego antecedens illius probationis, & ad primam ejus confirmationem dico, Motum gravium, & levium non aliter tribui generanti, quam quia tribuit illis esse; non enim alius esset descensus lapidis producti in

Tmo. IV.

medio aere, v.g. quàm in primo suæ formationis instanti in terram laberetur, quam sit descensus illius pro instantibus sequentibus: unde sicut descensus in sequentibus instantibus non aliter tribuitur generanti, quam quia producendo lapidem ipsi indidit gravitatem illam, quæ est principium immediatum istius descensus; Sic non esset inconveniens, quod pari ratione operatio mala voluntatis tam in primo, quam in sequentibus instantibus tribueretur Deo, solum ex eo quòd voluntatem liberam creaturæ rationali indidit, quæ voluntas est principium immediatum, & per se actus peccaminosi.

Confirmatur; quia secundum Adversarios, sicut descensus lapidis in primo instanti tribuitur causæ generanti, etiam eidem attribuitur in aliis instantibus: Ergo si sit eadem ratio de descensu lapidis, ac de operatione mala voluntatis; sicut illa operatio adscribitur Deo in primo instanti, ita & in aliis instantibus; maxime si non essent aliæ causæ præter voluntatem, à quibus in aliis instantibus proveniret: quod cum sit absurdum, ut etiam fatentur Adversarii, necessum est fateantur illud exemplum non esse ad propositum.

Nec magis juvat exemplum tibiæ: concedo namque, quod curvitas ipsius debeat adscribi causæ generanti, non verò ipsi tibiæ; sed nego idem esse dicendum de omnibus perfectionibus, vel imperfectionibus quas creaturæ propria sua operatione sibi comparare possent in primo instanti productionis; Disparitas enim est maxima; quia ipsa tibiæ non habet virtutem producendi in se curvitatem, & propterea illa curvitas in aliam causam est refundenda; Voluntas autem habet virtutem producendi in se operationem malam; idcirco non est recurrendum ad aliam causam. *Adde* quod rectitudo alterius tibiæ non provenit effectivè ab ipsa ti-

Q

bia

bia, sed à causa generante, & aliis circumstantiis: Ergo si debeat esse paritas inter tibiam claudicantem, & voluntatem peccantem in primo instanti; etiam debet esse aliqua paritas inter tibiam rectè ambulantem, & voluntatem bene operantem in primo instanti: Adeoque sicut rectitudo tibie non provenit ab ipsa; nec etiam in primo instanti operationes bonæ possent à voluntate procedere, quod Theologorum nullus admittet. Idem à pari dicendum ad cætera, quæ profuerunt.

Dices 2. Angelus non habet primum velle à se, sed ab alio: at Angelus non potest peccare per velle habitum ab alio, & non à se: Ergo prima volitio ipsius nequit esse peccaminosa. Probat major ex S. Anselmo de casu Diaboli cap. 13. ubi ait: *Si primum velle à se habet, aut hoc est volens, aut nolens: Si volens, igitur illud non est primum velle; Si nolens, idem sequitur, quia ante illud velle noluit illud: Igitur voluit illud non esse: igitur aliquid voluit.* Ergo peccatum quod esset in primo instanti, non posset esse à voluntate; & consequenter deberet esse à Deo: quod cum fieri nequeat; consequens est, quod voluntas Angeli non possit esse peccaminosa in primo instanti.

Negat majorem Doctor num. 5. Sicut enim Angelus potest habere à se velle secundum; ita & potuit habere à se primum velle; alioquin sequeretur processus in infinitum: Nam, inquit Doctor, *Quæro à quo primum habet velle? Aut à se, per aliam volitionem, aut sine alia volitione: Si sine alia volitione, ergo voluntas potest à se habere primam volitionem absque alia: Si per aliam, ergo illam aliam debet habere per aliam, & illam rursus per alteram, & sic necessarius erit processus in infinitum.*

Unde ad auctoritatem S. Anselmi, dicit Doctor: quod per volitionem, quæ debet præcedere primum velle,

Angeli, intelligit S. Anselmus ipsam voluntatem in actu, quam Angelus debet habere à Deo, ex suppositione, quod ipsemet eam in se producere non possit: quam suppositionem fortè facit Anselmus discurrendi causa. Certum est autem quod produci non possit volitio, nisi à voluntate prævia, adeoque volitio debet voluntatem præsupponere. Quod si aliud voluerit S. Anselmus, hæc in re esset negandus, quippe cum illa sententia Principiis Philosophicis, & Theologicis non quadret.

Ad discursum autem ejus, Respondeo Angelum habere primum velle, non per aliud velle, aut nolle, sed per ipsum primum velle: Sicut à pari, causa effectiva habet primam actionem, non per aliam actionem, aut negationem actionis, sed per ipsammet actionem primam quæcumque illa sit. Adde quod, si Angelus non posset peccare in primo instanti, quia non posset habere primum velle à se; sequeretur etiam quod non posset peccare in sequentibus instantibus, Quæro namque à quo in aliis instantibus haberet illud primum velle peccaminosum? Si à se, ergo idem dici potest de primo instanti: Si ab alio: Ergo cum, inquit Adversarii, prima volitio, quam habet in primo instanti nequeat esse peccaminosa, quia est ab alio, idem sequitur in quocumque alio instanti.

Dices 3. Si Angelus peccaret in primo instanti, necessario peccaret; sicque peccaret, & non peccaret: sed hoc est absurdum: Ergo, &c. Patet sequela majoris; Quia si in primo instanti peccavit, non potuit non peccare: Ergo necessario peccavit, adeoque cum peccatum debeat esse liberum, sequitur quod peccavit, ut supponitur; & quod non peccavit; quia non liberè, sed necessario peccavit. Probat autem hæc consequentia, nempe quod si peccaverit, necessario peccavit; quia si potuit non peccare, aut potentia ante actum,

aut

aut potentiâ cum actu ; *Non primum* ; quia Angelus non fuit ante illud instanti, quod supponitur primum suæ formationis : *Non etiam secundum*, quia in ipso instanti primo quo peccavit, non potuit non peccare ; & ideo per illam potentiam non potuit non peccare : Ergo necessariò peccavit .

Negat primam sequelam Doct̃or nu. 6. Ad cujus probationem dicit, quod voluntas Angeli peccans in primo instanti, verà potuit non peccare potentiâ ante actum ; non quidem prioritare temporis, sed naturæ ; quia ipsamet voluntas ex se, ut concipitur prior actu peccaminoso, quem producit, est indifferens, & potens ad illum actum producendum, vel non producendum ; quod autem non sit necesse, ut causa, vel facultas prioritare temporis effectum, vel operationem præcedat ; sed quod ad utrumque sufficiat prioritas naturæ, demonstrat Doct̃or ; quia aliàs sequeretur primo, quod Deus ipse nihil posset libere velle ab æterno ; similiter quod creatura rationalis non posset velle libere in primo instanti, adeoque sequeretur quod Angeli non potuissent mereri in primo instanti suæ formationis, quod tamen Adversarii non admittunt ,

Dices 4. Angelus in primo instanti non potuit habere deliberationem sufficientem ad peccandum : Ergo nec in illo peccare potuit . Probatur antecedens ; Ad deliberandum plures cognitiones desiderantur ; oportet namque varia objecta percipere, & variam in eis deprehendere rationem amabilitatis, vel aversionis, ut nempe unum præ alio voluntas prosequatur : sed in primo instanti non potuit Angelus varias habere cognitiones : Ergo nec deliberare .

Negat antecedens Doct̃or nu. 7. necnon ; & minorem ejus probationis ; quia ad peccandum non requiritur alia cognitio, quam ea quâ objectum co-

gnoscitur esse bonum bonitate utili, vel delectabili ; aut illud esse prohibitum : Certum est autem, quod talcm cognitionem habere potuit Angelus pro primo instanti tam facile, quam pro quocumque alio sequenti . *Adde quod* non major requiritur deliberatio ad peccandum, quam ad merendum : Ergo cum in primo instanti Angelus habere potuit sufficientem deliberationem ad merendum, etiam & sufficientem ad peccandum habere potuit .

Dices 5. Nullus peccare potest, nisi sit debitor justitiæ : sed in primo instanti Angelus non fuit debitor justitiæ ; quia secundum S. Anselmum supra laudatum cap. 12. & 14. Angelus in primo instanti justitiam non accepit : Ergo non potuit peccare . Major constat, quia justitia, & peccatum opponuntur sicut habitus, & dispositio : Ergo peccatum privat justitiâ ; sed non potest privare justitiâ, nisi justitia sit debita, & consequenter nisi peccans debeat habere justitiâ .

Negat majorem Doct̃or num. 11, & ad ejus probationem dicit, quod si Angelus in illo primo instanti non fuit debitor justitiæ, quia eam non accepit ; sequeretur, inquit, quod semper existens in peccato mortali, nunquam esset debitor justitiæ, quia nunquam accepit eam : Ideo de ista justitia non valet argumentum : Similiter nec de justitia acquisita, nam ista potest admitti injustitiæ elicitis ; nec ille qui nunquam fuit justus moraliter teneretur ad juste operari, si non esset debitor justitiæ ; quia nunquam istam accepit ,

CONCLUSIO TERTIA.

Lucifer alios Angelos ad peccandum induxit, illorumque perduellionis, & lapsum causa extitit . Hæc est communior sententia Theologorum, quam tradit Seraphicus Doct̃or in 2. diff. 5. art. 2. quæst. 1. & 2. In prima namque, quæstione ita loquitur . Notandum

„ quod superbia Dæmonum conformis
 „ fuit capiti, totius militiæ principi,
 „ scilicet tenebrarum: ipse autem Dia-
 „ bolus attendens suorum naturalium
 „ strenuitatem, & excellentiam, &
 „ præcellentiam, voluit præesse, &
 „ requiescere sua autoritate, hoc est,
 „ sine meritis, & sine ministerio. Dæ-
 „ mones verò ei subiecti, non sunt ausi
 „ tantum appetere, sed considerantes
 „ naturalium strenuitatem, voluerunt
 „ sub umbra illius requiescere, ita
 „ quod non ministrarent, sed quadam
 „ subillo potirentur voluntaria liber-
 „ tate, quam videbant se non posse
 „ habere sub divino dominio. Co-
 „ gnoverunt autem Angeli se esse
 „ factos ad percipiendam quietis bea-
 „ titudinem, & acquirendam per me-
 „ rita, & ministeria: In hoc ergo su-
 „ perbierunt, quia sine meritis volue-
 „ runt beati esse, & sine ministerio
 „ quiescere, & sine limite propriam
 „ voluntatem implere; & hoc totum
 „ est superbire; quamvis non sit tantæ
 „ superbiæ, quantæ fuit appetere om-
 „ nibus præcellere, & nullibi subesse.

Secunda autem quæstione explicat
 qualiter primi Angeli peccatum quam-
 dam supra peccata cæterorum Angelo-
 rum præminentiam habuerit. Fuit
 enim ibi ordo, inquit, & quantum
 ad gradum, & quantum ad occasio-
 nem, & quantum ad durationem:
 Quantum ad gradum, quia illud Lu-
 ciferi fuit majus: Quantum ad oc-
 casionem, quia aliis præbuit exem-
 plum: Quantum ad durationem,
 quia sicut Lucifero necesse fuit tem-
 pore ante esse cognitionem, quam
 peccare: quia non potuit in eodem
 instanti habere cognitionem, quæ
 exigitur ad peccatum cum deordi-
 nata affectione; sic in minoribus An-
 gelis dicunt fuisse in peccando, &
 cum peccaverunt aspiciendo, quod
 Angelus volebat, & exinde aspicien-
 do commodum suum.

*Probatur autem conclusio variis Scri-
 pturæ locis; Primò quidem S. Hierony-
 mus damnatorum Angelorum congre-
 gationem per Luciferi suggestionem,
 corruisse colligit ex illo Ezechielis 37.
 Emulata sunt cum omnia ligna volu-
 ptatis, quæ erant in Paradiso. Nam,
 emulari nihil aliud est quam imitari;
 & ita si per metaphoram applicentur
 illa verba ad Angelos, optimè signifi-
 cant inferiores peccando, Luciferum
 fuisse imitatos S. August. ex illo Matth.
 25. Ite maledicti in ignem æternum, qui
 paratus est Diabolo, & Angelis ejus:
 Sed Diabolus, inquit, dicitur qui fuit
 aliis causa, vel incentivum peccandi:
 Ergo aliquis Angelorum illorum fuit
 inter Angelos peccatus Diabolus: & per
 consequens ille qui dixit, Super astra
 Dei exaltabo solium meum, fuit inter
 Angelos Diabolus.*

Sed maxime probatur ex illo Apoca-
 lip. 12. ubi dicitur: Factum est prælium
 magnum in Cælo; Michael, & Angeli
 ejus præliabantur cum Dracone; & Dra-
 co pugnavit, & Angeli ejus, & non præ-
 valuerunt, nec locus inventus est eorum
 amplius in cælo. Et projectus est Draco
 iste magnus, serpens antiquus, Diabolus,
 Satanas, & seducens universum orbem:
 Ergo fuit aliquis primus peccans inter
 omnes peccantes, & inducens alios ad
 peccandum, & seducens illos. *Probatur
 antecedens.* Fuit aliquis antiquus Dra-
 co inter peccantes: Ergo fuit aliquis
 primus peccans. Pater sequela, quia si
 omnes simul peccarent, nullus esset al-
 tero antiquior.

Confirmatur. Fuit aliquis inter illos
 alios seducens: Ergo non simul omnes
 peccaverunt. Pater sequela; nam sedu-
 cens prius est seducens, quam alii sint
 seducti: Ergo seducens prius peccavit,
 quam alii peccarent.

Hanc ipsam veritatem docent sancti
 Patres tam Græci, quam Latini; Græci
 quidem; in primis verò Origenes lib. 1.
 Periarchon: *Apud plurimos, inquit, ista*
 ba-

habetur opinio; quod Diabolus apostata effectus, quamplurimos Angelos secum declinare persuasit, qui & nunc usque Angeli ejus nuncupantur. Subscribit Celsarius Gregorii Nazianzeni frater Dialogo 1. Ad malum, inquit, versus Autor ille mali Diabolus secum ad seditionem multos Angelorum trahens, non naturâ, sed voluntate mutatos perduxit suggestione, qui convenientem sub fâcto suscepit appellationem. Item sanctus Chrysostomus in Psalm. 14. Unus, inquit, illie civis tanquam Inquilinus movit seditionem, & ejus est tanquam externus, & à Deo alienus, & cum eo qui eum sequuti sunt Dæmones. Similia habet Damascenus lib. 2. cap. 4. Principem malorum Angelorum, inquit, adversus opificem suum Deum, se extulisse, & rebellare contra eum in animum induxisse. Et subdit inferius; Una cum eo convulsa est, eique comitem se adjunxit, simulque corruit innumerabilis subjectorum sibi Angelorum multitudo.

Eadem est concors sanctorum Patrum Latinorum sententia; in primis namque S. Ambrosii Epist. 55. ad Demetrium apertè dicit, Diabolum, qui quoniam sua quam à Creatore suo acceperat potentia, dignitate sibi placuit, cum his Angelis quos in consensum impietatis sue traxerat, à cælesti sublimitate dejectum esse. Idem significat Arnobius Junior lib. 2. de Deo trino, & uno, dicens: Primus omnium Angelorum in suo corde peccavit, ex quo pullulare omnium præsumptionum genera tunc exierunt, cum nullius exemplum sequutus, à se dedit peccandi exordium. Deaique idem indicat S. Bernard. Tractatu de grad. humilitatis de Lucifero dicens, Tu solus sedere affectans, fratrum concordiam, totius cælestis patriæ pacem, ipsius quantum in te est, quietem Trinitatis infestas. Quò te tua, miser, curiositas ducit, ut præsumptione singulari non dubites civibus scandalum, injuriam facere Regi d. Dum ait enim so-

lum Luciferum scandalum alii tribuisse, & pacem turbasse, indicat profecto ipsum seditionem contra Deum movisse. Unde inferius ait, Voluisse Luciferum dominari omnibus filiis superbiæ, quos sua malitia astibus studuit inflammare.

Dices primò: Omnes Angeli boni simul conversi sunt in Deum, nullo altero Angelo suggerente, nec illius conversionis motivum, & exemplum præbente: Ergo pariter omnes mali aversi sunt à Deo, nullo suggerente.

Respondeo posse negari antecedens, quâ ratione enim Lucifer aliis Angelis perduellibus inobedientiæ causam præbuit, quocirca dicitur, quod Draco pugnabat, & Angeli ejus, eadem ratione S. Michael fidelis in Deum observantiæ, cæteris Angelis subditis exemplar, & incentivum fuit, siquidem legitur Apoc. 20. quod Michael pugnabat, & Angeli ejus.

Respondeo secundò negando paritatem: Boni namque Angeli per gratiam sanctificantem, perque evidentem suæ ad Deum dependentiæ cognitionem, sufficiens habebant motivum, & incentivum quo in Deum fideli observantia tenderent: mali verò nullum in se tale motivum ad rebellandum habuerunt; adeoque verisimile est ipsos ad perduellionem fuisse per Luciferum excitatos.

Dices 2. cum Guillelmo Parisiensi 2. par. de Universo; Omnes Angeli per superbiam peccarunt: Ergo omnes non ab alio inducti, sed per se, ac propriâ excellentiâ, & amore abstracti, & illæti, aliquid superbè appetierunt. Secundò: Non poterat Lucifer vel rationibus eos suadere, vel per errorem, vel deceptionem eos inducere; quia sciebat, eos non posse decipi in cognitione, & debita existimatione Creatoris; nec etiam per promissiones, vel alia objecta concupiscentiæ poterat eos allicere; quia nulla re indigebant, quam ab illo expectare possent; nec in hoc etiam falli

po-

potuissent. *Tertio addit*, Quia si peccatum Angelorum inferiorum fuisset perduellionis contra Deum, ad quam à Lucifero fuissent inducti, non fuisset ausus solus Lucifer contra Deum rebellare, nisi præcognovisset voluntates inferiorum propensas ad rebellionem contra Deum fuisse; Sicut in regnis humanis nullus vassallus quantumcumque potens, audent contra Regem insurgere, nisi multorum consensus accedat, & inter eos contractus ad rebellionem præcedat: Ergo similiter in Angelis necessarium fuisset, ut Lucifer aliorum voluntates agnosceret, ab eis invitaretur ad perduellionem, vel saltem inter se convenirent, & de rebellionem tractarent. *Quarto*, Quia omnes Angeli simul cum Lucifero peccaverunt: Ergo non sunt ab illo inducti ad peccandum.

Nego omnes consequentias, & ad primam rationem dico, Quod licet omnes Angeli superbiâ peccaverint, inde tamen non sequitur, quod ad illam non fuerint inducti; nam Lucifer prius superbiit propter suam excellentiam: Deinde singulis Angelis propriam excellentiam exponens, eos pariter ad complacendum in eo, & superbiendum stimulavit.

Ad secundam rationem, Dico peccatum Angelorum habuisse aliquam annexam considerationem; nam nimium complacentes circa propriam beatitudinem naturalem, non retulerunt Deo gratias, propter dotes, & excellentias quas in primo instanti suæ creationis acceperant: Forſan enim tenebantur aliquo præcepto ad continuandum actum illum supernaturalem, & meritum, quem in primo instanti inciperunt; & Lucifer nimis complacens in sua beatitudine naturali, non solum non continuavit actum incœptum, sed ostendens illam Angelis inferioribus, & quasi animadvertens illos de propria beatitudine naturali complacere, non

solum ille, sed, & alii à tali actu cessaverunt; & sic peccaverunt peccato elationis, & superbiæ. Quare quando Lucifer alios sollicitavit ad malum superbiæ, non proposuit illis aliquod malum ex parte objecti, sed tantum ex modo operandi. Nam proposuit illis excellentiam propriæ naturæ, extollendo felicitatem, & beatitudinem naturalem, nulla facta mentione de beatitudine, & felicitate supernaturali; & tunc nimis complacentes in tali beatitudine naturali, nec se, nec sua in supernaturalem retulerunt, in quo fuit modus quidam elationis, & superbiæ.

Ad tertiam rationem, nego pariter consequentiam, Nam Lucifer, & Angeli ejus non rebellabant contra Deum, quasi vim illi inferre volentes, aut per virium fortitudinem illum vincere ac superare tentantes, ad quem modum rebellionis solet inter homines præcedere secreta consiliorum communicatio, aut seditiosus contractatus, ac negotiatio; eò vel maxime quod contra Deum hic modus perduellionis possibilis non erat, cum nulla cogitatio eum latere possit, quod Angeli non ignorabant. Rebellarunt ergo contra Deum solo affectu quem Lucifer ex propriis, & sine aliorum consilio, tractatu, vel communicatione habere potuit: & inde potuit ad similem seu proportionatum affectum proprio judicio, & deliberatione alios inducere, sine prævia cognitione voluntatis, vel determinationis, aut consilii eorum, cum sola spe illos in propriam sententiam, & spirituales perduellionem trahendi.

Ad quartam denique rationem, Dico omnes Angelos simul cum Lucifero peccasse; quia nempe modica fuit mora inter peccatum Luciferi, & aliorum Angelorum: de repente enim, & quasi non perceptibili tempore simul ac voluntatem primi Angeli perceperunt, ei statim consenserunt, & adheſerunt; si enim prius aliqua diuturna temporis

prio-

prioritate peccasset Lucifer, quàm reliqui Angeli, cum ex illo peccato suborta fuisset deformitas per expoliationem, & carentiam omnium supernaturalium donorum, quibus ipse Lucifer in primo suæ creationis exordio fuerat illustratus, cumque divina iustitia in ipsum animadvertisset, illud advertentes ceteri Angeli, haud dubium est, quod ipsi non consentissent, nec a partibus ipsius stetit.

Ex his infer Alenfis quest. 98. num. 6. longè gravius fuisse peccatum? Luciferi quam aliorum, ex duplici capite; Primo, quia libido appetitus ejus major extitit. Secundo, quia ante se non habuit aliquod exemplar, cum ad nullius peccantis imitationem peccaverit, sed fuit ipse totius peccati inventor, & principium.

QUESTIO SECUNDA.

Quodnam, & quale fuerit primum, & capitale Diaboli peccatum.

NOTANDUM 1. varia cogitari posse peccata quæ perduelles Angeli à suæ rebellionis initio committere poterunt; puta peccatum præsumptionis de propriis viribus ac præcellentiis; invidiæ erga homines; odii in Deum: Similiter inordinati cujusdam desiderii beatitudinis, in quantum præcisè est bonum quoddam delectabile; & tandem complacentiæ nimis in propriis perfectionibus, quam peccatum luxuriæ Subtilis Doctor appellat; *Sicut*, inquit ipse, *peccatum quo inordinatè delectatur aliquis in speculatione conclusionis Geometricæ ad luxuriam reducitur.* Quodnam autem horum omnium primum ac capitale fuerit? invicem dissentiunt Auctores; maximè verò duas in partes scinduntur, quorum *Aliqui volunt* cum nostro Alenfi 2. parte, *quest. 98. memb. 2.* S. Bonoventura in 2. diff. 5. art. 1. *quest. 1.* & S. Thoma 1. p. q. 63. art. 1. primum

Angelorum peccatum non esse aliud, quàm superbiam propriè dictam; *Concedunt verò Alii* cum subtili Doctore, primum peccatum Angeli fuisse inordinatum sui ipsius amorem, & quandam superbiam, luxuriam improprie dictam, seu potius spiritualem, quàm Angeli in suis dotibus nimium complacentes, inordinatè concupiverunt bonum spirituale delectabile, nempe suam beatitudinem naturalem. Sicut enim cupiditas inordinata boni delectabilis corporalis, constituit speciem luxuriæ; ita appetitus inordinatus boni spiritualis summè delectabilis speciem luxuriæ spiritualis efficit. Quæ autem earum sententiarum sit verior, hic est resolvendum.

Notandum 2. Sanctos Patres variè de primo Diaboli peccato sensitisse; Quod duplex enim diversa distingui potest eorum hac de re sententia. Primo namque illi omnes qui Angelos corpore præditos putarunt, tale peccatum eorum fuisse censent, ut cum orbi huic administrando præpositi essent à Deo, mulierum capti specie, stupri cum eis consuetudinem habuerunt, ac propter impuritatem, & flagitium, Cælo ac Dei consortio sunt ejecti; ita enim interpretandum putaverunt illud Genesis 6. *Videntes Filii Dei*, vel ut ferunt alii codices, *Angeli Dei, filias hominum quod essent pulebræ, acceperunt sibi uxores ex omnibus quæ elegerant.* Ita in primis censuit Justinus in Apologetico à nobis laudatus initio præsentis Articuli. Subscripsit Clemens Alexandrinus in quinto Stromatum, ubi ait Angelos mulierum specie captos eis arcana quoddam ac recondita patefecisse; *Angeli*, inquit, *illi quibus superna fors obtigerat, delapsi ad voluptates, enunciarunt arcana mulieribus, & quæcumque ad eorum venerunt cognitionem, &c.* Idem docuit Tertull. lib. de idololatria cap. 9. affirmans Dæmones Dei desertores, amatores seminarum, homines vanam

astro-

astrologiæ curiositatem docuisse. Et lib. de habitu muliebri, asserit Dæmones fuisse Doctores, & inventores eorum omnium quæ mulieres ad sui ornatum superbe assumunt: *Propriè*, inquit, & quasi peculiariter instrumentum istud muliebri gloriæ contulerunt; lumina sapillorum quibus monilia variantur, & circulos ex auro quibus brachia arstantur; & medicamenta ex succo, quibus lana coronantur: & illum ipsum nigrum pulverem quo oculos exordia producuntur. Hinc lib. de Virginibus velandis, monet velanda mulierum capita, ut docet Apostolus 1^o ad Corinth. 11. propter Angelos; Quos, ait. legimus à Deo à Cælo excidisse ob concupiscentiam feminarum. Debet ergo adumbrari facies tam periculosa, quæ usque ad Cælum scandalum jaculata est. Quod autem mirum est, eamdem in sententiam ivit sanctus Ambrosius qui in lib. 7. de Virginibus ait: Quam præclarum, inquit, Angelos propter intemperantiam suam in sæculum decidisse de Cælo, Virginem verò propter castimoniam in Cælum transisse de sæculo!

Non desunt qui putent Angelos invidiâ primùm lapsos fuisse; quod utique trifariam explicant; nam *Aliqui* volunt eum homini invidisse, eò quòd ad imaginem Dei factus, & expressus esset. Ita Gregorius Nicen. in Catechesi cap. 6. *Hoc autem*, inquit, homo animal erat in quo divina intelligibilis natura pulchritudo inexplicabili quadam virtute temperata erat, quod indigne tulit Dæmon, nec tolerabile ratus est ille qui terrenarum rerum curationem sortitus fuerat, quod ex subiectu sibi natura substantia quadam esset condita, quæ ad excellentiâ illius dignitatis similitudinem expressu foret. Idem habet Cyprianus lib. de zelo, & amore, nec-non, & August. lib. de Genesi ad litteram cap. 14. Lactantius verò putavit Dæmonem invidisse Filio Dei, quem Pater produxerat similem sui Spiritum, qui esset vir-

tutibus Dei Patris prædictus. Bernardus denique sermone 17. in Cantico, putat eum invidisse incarnationi Verbi, ac homini Deo, uti jam ex ipso semel, & iterum declaravimus.

Sunt etiam plurimi qui putant primum ac capitale Dæmonis peccatum, fuisse superbiam; quos utique referemus ac refellemus in objectionibus; Ceteri verò edocent illud peccatum, non aliud fuisse, quam nimium sui ipsius amorem, & inordinatam in propriis dotibus complacentiam. His itaque constat hac de re non esse coneordem SS. Patrum sententiam; adeoque nobis fas esse alterutram partem amplecti.

Notandum 3. cum Doctore Subtili in 2. dist. 6. quæst. 2. omnes actus voluntatis adæquatè dividi in nolitioem, & volitionem; ita ut nullus sit actus, nec bonus, nec malus voluntatis, nisi actus quo prosequitur conveniens seu bonum, qui actus vocatur volitio, vel velle: seu actus quo fugit disconveniens, seu malum, qui actus vocatur nolitio, seu nolle. Advertit præterea Doctor inter utrumque actum hunc esse ordinem, ut prius non possit haberi nolitio quam volitio, *A nullo enim*, inquit, *refugio*, nisi quia non potest stare cum aliquo quod accepto tanquam conveniens; quæ verba non ita usurpanda sunt, quasi non possit haberi, absolute ulla nolitio, sine priori actu volitionis; non enim apparet, cur non possit aliquis nolle molestiam aut cruciatum sibi propositum absque ulla prorsus formali volitione delectationis, aut boni convenientis oppositi: sed tantum vult Doctor, quòd non possit aliquis nolle disconveniens sub ratione formali disconvenientis, & quatenus est oppositum bono convenienti, impeditque illius consecutionem; nisi quia prius vult bonum illud conveniens.

Monet insuper actum volitionis distinguì in amorem amicitie, quo alium

quem amamus propter se; & concupiscentiæ quo aliquid alicui volumus, seu ut ipse loquitur; *Duplex est velle, quod potest nominari amicitia, & concupiscentia; & dicatur velle amicitia esse illius objecti cui volo bonum: & velle concupiscentia illius objecti, quod volo alicui amato.* Quod utique non sic accipiendum est, quasi amor amicitia esset præcisè volitio, quâ quis personam diligit non volendo illi bonum, alter verò nempe concupiscentiæ, sit volitio quâ solum vult bonum personæ amata; etenim amor amicitia est etiam actus quo volo bonum personæ quam diligo; ipsam namque verè non diligerem, si ipsi bonum non optarem; Sed per amorem amicitia, eum intelligit Doctor, quo quis vult bonum alicui propter solum ipsius amorem, dilectionem, absque eo, quòd ad id moveatur amore alterius; amor verò concupiscentiæ, sit volitio quâ quis vult bonum alicui propter amorem quem habet erga alterum: Sic v. g. dum quis amat proximum propterea, quòd Deum diligit, qui amorem proximi imperat, & ipsi benefaciendum esse præcipit, illa volitio qua vult bonum proximo, dici poterit amor concupiscentiæ: Siquidem non vult ipsi bonum præcisè, quia ipsum diligit, sed tantum propter amorem, quem habet erga Deum, qui imperat bonum esse proximo procurandum.

Obstat Denique Doctor ibidem, istorum duorum amorem concupiscentiæ præsupponere amorem amicitia: Cum enim, inquit, amatum sit respectu concupiti quasi finis cui volo bonum (nam propter amatum concupisco sibi bonum quod sibi volo;) & cum finis voluntatis habeat primam rationem objecti voliti; pater, quòd velle amicitia præcedit velle concupiscentia.

His ita prænotatis, Tria supersunt hac in questione determinanda: Primum, an primum ac capitale Angeli peccatum fuerit inordinatus amor ami-

citia sui: Secundum, Quid per amorem inordinatum concupiscentiæ desideraverit: Tertium, An ille uterque amor amicitia, & concupiscentiæ fuerit superbia propriè dicta, vel potius luxuria spiritualis.

CONCLUSIO PRIMA.

Primum Angeli peccatum fuit inordinatus amor amicitia sui ipsius. Ita Subtilis Doctor loco supra laudato, numero 4. ubi ait, quòd simpliciter actus primus inordinatus voluntatis Angeli fuit primum velle amicitia voluntatis ejus, qui voluit bonum, hoc autem objectum non fuit Deus, quia non potuit Deum inordinate ex intentione amare amore amicitia: Nam Deus est tale amabile, quod ex sola ratione sui, ut objectum est, dat completam rationem bonitatis actui perfectè inteso: nec est verisimile, quòd aliquid aliud à se nimis intensè dilexerit actu amicitia: Tum quia inclinatio naturalis magis inclinavit ad se, quàm ad aliquid aliud creatum sic amandum. Tum quia, nō videtur quòd aliquid aliud creatum a se sic intellexerit sicut se: Ergo primus actus inordinatus fuit actus amicitia respectu sui ipsius. *Hec Doctor, quibus apertè indicat primum peccatum Angeli fuisse inordinatum amorem amicitia sui ipsius, quod utique sic probat.*

Primum Angeli peccatum fuit amor inordinatus sui: sed non fuit amor concupiscentia, quatenus ille ab amore amicitia distinguitur: Ergo revera fuit amor inordinatus amicitia. Minor constat: Amor enim quo Angelus amavit seipsum, is non erat quo se diligebat ob amorem alterius, siquidem non est verisimile, quòd ullam aliam creaturam aut prius, aut magis amaverit, quàm se: Nec etiam se amavit propter Deum; Amor enim ille non fuisset inordinatus: sed ille amor quo seipsum amavit, & non propter amorem alterius

rius, est reverà amor amicitiae: & consequenter ille amor quo inordinatè se Angelus amavit, non erat amor concupiscentiae, quatenus ille ab amore amicitiae distinguitur. Majorem verò probat Doctor: *Primò* quidem auctoritate S. Augustini *lib. 12. de Civit. c. 6.* ubi cum dixisset causam beatitudinis sanctorum Angelorum esse, *quia ei adherent, qui summè est*: subdit: *Cum verò causa miseriae malorum Angelorum queritur, ea meritò occurrit, quod ab illo, qui summè est, averfi, ad seipsos conversi sunt.* Hæc autem adhesio, vel conversio per amorem primariò fit: adeoque censet S. Augustinus primum Angeli peccatum fuisse inordinatum sui amorem. Idipsum repetit, & evidentius explicat *lib. 14. cap. ult.* ubi asserit quòd duo amores fecerunt duas civitates: *Civitatem Dei, amor Dei usque ad contemptum sui. Civitatem Diaboli, amor sui usque ad contemptum Dei.* Prima igitur radix Civitatis Diaboli, inquit Doctor, fuit inordinatus amor amicitiae sui, quæ radix germinavit usque ad contemptum Dei, in quo est consummata ista malitia. Idipsum insuper docet *lib. 11. de Genesi ad litteram cap. 15.* ubi ait: *Angelum peccasse amando, non pecuniam, sed propriam potestatem, & proinde perversus sui amor privavit sancta societate turgidum spiritum.*

Eandem majorem ratione confirmat Doctor. Primum peccatum Angeli aut fuit volitio, aut nolitio: Si volitio, maxime vel qua inordinato modo complacere in se, vel qua volebat aliquod bonum sibi indebitum: Si primum, apertè constat, quòd illa volitio eras amor sui inordinatus: Si secundum, vel illa volitio præsupponebat aliam, qua inordinatè complacere in se: nullus namque vult alteri bonum, nisi prius ipsum diligat, & sic illa prima volitio complacentiae in se, necessariò fuit primum peccatum. Vel non præsupponebat, & sic ipsamet volitio erat

amor inordinatus sui: siquidem volitio qua quis vult sibi bonum, & non propter amorem alterius personæ, vel est amor proprius, vel præsupponit amorem proprium. Si dicatur, quòd fuerit nolitio, quod tamen nullus hactenus affirmavit: siquidem docent omnes, primum Angeli peccatum fuisse commissionis, & non solius omissionis: nihilominus etiam si fuisset aliqua nolitio, illa necessariò præsupponere debuisset volitionem; vel non debuisset præsupponere: Si præsupposuit, illa præsupposita volitio fuisset amor proprius inordinatus, si non præsupposuit, illa nolitio fuit amor proprius vel formaliter, vel æquivalenter: quia quando quis non vult sibi malum, idque non ob amorem alterius personæ, siue dubio censendus est illud malum sibi nolle ob amorem sui ipsius.

Dicit: Amor amicitiae ille est, quo Angelus non concupiscit aliquid bonum à se distinctum: sed complacet tantum in suis perfectionibus intrinsicis: sed ille amor non potest habere aliquam malitiam sibi adjunctam: Ergo non potuit esse primum Angeli peccatum. Major constat: Minor probatur. Amor ille non potest esse malus, cujus objectum non est malum; nec ullam habet circumstantiam, qua deordine-tur, aut inficiatur: sed amor ille, quo Angelus seipsum diligebat, habebat objectum bonum, nempe Angeli dotes tam naturales, quàm supernaturales; nec videtur habuisse ullam circumstantiam inficientem, aut deordinantem. Si enim aliqua posset assignari, maxime major aliqua intentio ipsius amoris, quàm oporteat, sed quories actus secundum substantiam suam est bonus, & habet bonum objectum, non videtur quòd possit esse mala ipsius intentio: Ergo talis amor non potuit esse malus, nec consequenter potuit esse primum Angeli peccatum.

Respondet 1. negandò majorem; Nam amor

amor amicitiae secundum Doctorem. Subtilem, ut in *sermo Notabili* declaravimus, non solum ille est quod quis vult sibi bonum aliquod intrinsecum, sed etiam quo quis potest velle bonum aliquod extrinsecum à se distinctum, non propter amorem alterius, sed propter amorem sui. Unde quamvis Angelus non posset peccare nimium complacendo in suis perfectionibus intrinsecis, & eas intensissime diligendo; inde non sequeretur, quod ejus amor amicitiae non posset esse inordinatus; siquidem hoc amore posset velle sibi bona aliqua extrinseca, quae velle non deberet: Hic autem amor cum alterum amorem non praesupponeret, inde non sequeretur, quod ille non esset amor amicitiae; siquidem juxta Doctorem Subtilem, amor amicitiae in hoc ab amore concupiscentiae non distinguitur, quod per illum Angelus velit tantum bonum sibi intrinsecum; per hunc verò, bonum extrinsecum sibi cupiat, ut non ita rectè ipsum interpretatus est Suares *lib. 7. numero 9. cap. 14.* Siquidem secundum sententiam Doctoris, amor amicitiae potuit etiam Angelus bonum velle sibi aliquod externum, & à se distinctum.

Respondeo 1. negando minorem; Falsum enim est, quod amor perfectionum intrinsecarum non possit esse malus, & inordinatus, ratione majoris intentionis quam deberet habere; etenim unusquisque tenetur Deum supra se, & pliusquam omnia diligere; & consequenter toties peccare potest, quoties potest majorem erga se, quam erga Deum amorem elicere: sed aliquis etiam non concupiscendo sibi bona externa, & distincta, potest majorem erga se amorem elicere, quam erga Deum; adeoque ille amor sui ipsius potest esse malus.

Est autem verisimilius, quod primum Angeli peccatum, fuerit ipsemet amor inordinatus sui ipsius, non quo bona quadam extrinseca sibi volebat; etenim Doctor *numero 15.* videtur supponere,

quod peccaverit Angelus amore concupiscentiae, desiderando bona illa extrinseca; subindeque indicat, quod amor amicitiae, quo primum peccavit, fuerit aliquis amor inordinatus, quo in seipso nimium complacuit: Idque rationi apparet consentaneum; Tum quia Angelus non minus perfectam sui cognitionem habuit, quam aliarum rerum; adeoque verisimile est, quod ipsa cognitio suarum perfectionum ejus voluntatem induxerit ad nimiam sui complacentiam: Tum quia exinde facile concipitur qualiter ille inordinatus sui ipsius amor eum ad cetera committenda peccata stimulaverit: Tum denique quia hoc ipsum aperte videtur sentire S. Augustinus à nobis supra laudatus, affirmans Angelum idcirco à societate Sanctorum fuisse segregatum, quod propriam potestatem amando, perverso amore sibi complacuerit.

CONCLUSIO SECUNDA.

A More concupiscentiae peccavit Angelus, maxime inordinatè appetendo beatitudinem supernaturalem: Ita Doctor eadem quaest. 2. numero 5. *Videtur*, inquit, dicendum, quod primum concupierunt sibi immoderatè beatitudinem.

Quamquam autem aperte non explicet de qua beatitudine, naturali an supernaturali loquatur, verius tamen dicendum arbitror ipsum de supernaturali esse intelligendum: Tum quia illa est, quae absolute, simpliciter beatitudo appellari solet à Scholasticis: Tum quia ibi loquitur Doctor de beatitudine, quam Angelus non habebat: non carebat autem beatitudine naturali subindeque eam inordinatè appetendo precipue non peccavit, quamquam tamen in ea inordinatè appetenda peccare potuisset; nimirum illam appetendo cum independentia à Deo, vel eam tanti faciendo, ut ad beatitudinem supernaturalem non tenderet, licet novisset se

ad eam procurandam creatum, & ordinatum fuisse à Deo .

Probat autem Conclusionem Doctor: Primò quidem ratione deducta ex S. Anselmo de casu Diaboli cap. 4. Primus actus concupiscentiæ inordinatus Angeli, vel processit ex affectu iustitiæ, vel ex affectu commodi, hoc est, processit à voluntate, vel secundum, quòd habet inclinationem ad bonum honestum, quod iustè, & juxta dictamen rectæ rationis appeti, & comparari potest: vel secundum, quòd habet inclinationem ad bonum commodum. *Non primum;* quod enim iustè, & secundum rationem diligitur ac concupiscitur, non inordinatè amatur: *Ergo secundum;* Sed verisimile est, quod voluntas agens, & aliquod appetens ex affectu commodi contra iustitiæ præscriptum, primò versetur circa maximum bonum commodum ex omnibus, quæ ipsi manifestantur: Hoc autem maximum commodum bonum, est ipsa beatitudo supernaturalis: Ergo prima concupiscentia inordinata voluntatis Angelicæ circa bonum commodum non habita, maximè versabatur circa beatitudinem supernaturalem. Major constat, Minor probatur: Quoties voluntas in appetendo bonum commodum nullam aliam regulam sequitur, quàm impetum appetitus inordinati ejusdem boni commodi; cum ille appetitus sit naturalis; agens autem naturale toto nisu, totisque viribus in suum actum erumpat; Consequens, est, quòd appetitus ille immoderatus voluntatis Angelicæ, ipsam ad volendum, & appetendum bonum commodum totis viribus stimulabat; subindeque impellebat illam ad maximum commodum inter ea, quæ ipsi proponebantur, & manifestabantur; tale autem commodum, & bonum maximum, erat beatitudo supernaturalis. Ergo &c.

Reponunt aliqui Thomistæ hanc rationem nihil probare; quia, inquit, primus appetitus commodi in Angelo,

potuit esse circa aliquod particulare delectabile; non autem necessum est, quòd versetur circa summè delectabile, vel commodum.

Contra: Voluntas Angeli non regulabatur, nisi ab appetitu commodi inordinato, & immoderato: sed, ut sic totis viribus, summoque affectu tendebat ad id, quòd sibi maximè commodum videbatur: Appetitus enim totis viribus impellit ad bonum commodum, adeoque impellit ad maximum commodum; agentia namque naturalia, qualis erat ille appetitus commodi, toto impetu erumpunt in actus, nisi præpediantur; ibi autem nihil erat impediens: Si quid enim illum impetum reprimere potuisset, maximè affectus iustitiæ, & dictamen rectæ rationis; Neutrum autem ibi aderat, adeoque nihil erat, quo refrænaretur ille impetus; & consequenter toto nisu ferebatur in commodum sibi propositum, subinde appetebat maximum commodum, qualis est beatitudo supernaturalis.

Probat secundò: Prima inordinata Angeli concupiscentia fuit aliquis actus volitionis: Ergo versabatur circa bonum honestum, utile, aut delectabile. Non circa honestum, aliàs esset honesta ac ordinata: Non etiam circa utile, quia concupiscentia, & amor boni utilis, præsupponit concupiscentiam, & amorem boni, ad quod consequendum illud esse utile videtur: Ergo illa volitio versabatur circa bonum delectabile: sed verisimilius est, quod versabatur circa maximum delectabile, qualis est beatitudo; quamvis enim illa sit etiam bonum honestum, possitque honestè appeti, tamen ipsa etiam est bonum valdè delectabile, potuit inordinatè appeti; nimirum, vel eam tanto ardore appetendo, ut dolor esset, quòd non ita citò à Deo conferretur, & propterea optaret eam possidere aliter quàm Deus ordinasset: vel etiam vellet eam independentè à Deo possidere.

Pro-

Probat tertio : Omnis appetitus maximè id desiderat, quòd sibi proponitur maximè conveniens, & delectabile ; sic enim appetitus, qui fertur in visibile, summè appetit, id quod ab oculo tamquam visibile magis oblectans percipitur : Ergo cum voluntas Angeli non habeat appetitum sensitivum, quo moveatur ad appetenda sensibilia, maximè appetit id quod proponitur ab intellectu, ut summum delectabile : Sed talis est beatitudo supernaturalis : Ergo maximè in eam tendit appetitus Angelicus : sed verisimile est, quòd appetitus inordinatus Angeli ferebatur circa illud, quòd maximè appetebat : Ergo ferebatur circa beatitudinem supernaturalem .

Probat quarto. Illud primò appetitur à voluntate non regulata per affectum iustitiæ, sed commodi, quod ea appeteretur quamvis alia appetibilia non essent, & quod si cætera abessent, non minus appeteretur : sed tale est objectum delectabile : Ergo primo appetitu fertur in objectum delectabile : Sed si feratur in objectum delectabile primo suo appetitu, verisimile est, quòd feratur in maximum delectabile : Ergo, &c.

Major videtur manifesta, quia voluntas destituta affectu, & regula iustitiæ, sequitur omnino commodum suum, & nullum vult incommodum : Si quidem incommodum solum volumus, & appetimus affectu iustitiæ, ut patet in martyribus, & pœnitentibus . *Minor* etiam apparet vera : bonum enim quantumvis excellens, si esset tristabile, & non delectabile, certum est, quod non appeteretur appetitu commodi .

Denique probatur Conclusio : Certissimum est, quòd Angelus aliquem actum circa beatitudinem supernaturalem habuerit : illam enim cognovit, ut sibi possibilem, novitque media quibus illam consequi posset ; alioquin perfectus viator non extitisset : Ergo vel actus il-

le fuit ordinatus, & sic non peccavit, sed meruit ; vel fuit actus neuter, id est, nec bonus, nec malus, nec ordinatus, nec inordinatus, quod nullus Theologorum admittit ; vel fuit inordinatus : Sed non fuit ordinatus, nec neuter ; Ergo necessum est, quòd fuerit inordinatus ; & per consequens, quòd fuerit peccatum . Quòd autem fuerit primum peccatum, ex eo constat ; quia cum objectum illud fuerit maximè delectabile, & potentia ab appetitu naturali duceretur, & impelleretur ad bonum, necessariò sequi videtur primum actum, concupiscentiæ illius voluntatis fuisse circa beatitudinem supernaturalem .

Confirmantur, & explicantur supradictæ rationes ab eodem Doctore nu. 6. ubi observandum monet, quòd quilibet potentia cognoscitiva habet appetitum sibi correlative ; unde cum anima habeat potentiam cognoscitivam, nempe intellectum, habet etiam sibi correlative appetitum, qui in voluntate residet ; quæ licet sit libera, tamen maximè conformatur appetitui naturali in agendo, & ideo, inquit Doctor, in hominibus secundum diversitatem complexionum, est dominiū appetituum sensitivorum, & si quidem quilibet potentia cognoscitiva habet proprium appetitum, tunc secundum diversitatem complexionum, est diversitas dominiū in cognitivis diversis, & in eorum appetitivis : in quolibet, inquam, voluntas secundum prædominium appetitus sensitivi maximè inclinatur ad actum ejus . Et ideo quidam sequentes inclinationem primam sine regula iustitiæ, primo inclinatur ad luxuriam, quidam primo ad superbiam . Voluntas ergo agendo sequitur appetitum naturalem, ut plurimum . Licet autem voluntas separata ab omni sensu, & appetitu sensitivo ; non possit inclinari in aliquod objectum sensibile ; cum tamen sit potentia naturalis, habet inclinationem naturalem ad objectum

ctum maximè sibi conveniens, in quantum est potentia naturalis; illud autem est beatitudo; quia idem est objectum appetitivæ, & facultatis cognoscitivæ. Cum ergo beatitudo sit maximum objectum intellectivæ virtutis, etiam erit summum, & maximè motivum appetitus intellectivi, qui est voluntas; & consequenter licet voluntas sit potentia libera, tamen cum in agendo sequatur appetitum naturalem, nisi reguletur, & refrenetur per affectum iustitiæ, & dictamen rationis, consequens est, quod toto conatu primo concupiscit primum objectum delectabile, non ordinatè; ergo inordinatè; subindeque primus illius Angelicæ voluntatis concupiscentis affectus inordinatus, fuit circa beatitudinem. Ita Doctor.

Dices 1. Ex S. Augustino lib. 13. de Trinit. cap. 5. beatitudo ab omnibus appetitur; quod autem ab omnibus appetitur, uniformiter est naturale; igitur beatitudo naturaliter appetitur: sed appetitus naturalis semper est rectus; quia est à Deo: Ergo voluntas conformis appetitui naturali semper est recta; quod enim est conforme recto, rectum est: Ergo in appetendo beatitudinem nullus peccare potest; adeoque primum amoris concupiscentiæ Angeli peccatum, non fuit appetitus inordinatus beatitudinis.

Negat minorem Doctor numero 10. Cum enim volitio sit libera, & possit habere rationem mali, quamvis esset consona inclinationi naturali, seu volitioni talis objecti ad quod haberetur inclinatio naturalis, inde sequitur, quod licet feratur in objectum ad quod inclinatur naturaliter, non minùs potest ejus affectus esse inordinatus; inclinatio enim ad quodcumque delectabile, v. g. naturalis est, & tamen certum est, quod desideria plurium delectabilium sunt inordinata, & mala: Non est ergo verum, quod volitio elicit conformiter ad inclinationem na-

turalem rectam sit semper recta, & ordinata: quia voluntas, ut est libera, & elicitiva actus circa objectum, tenetur se conformare iustitiæ, & regulæ superiori, quæ præcipit, & ordinat, ut illum appetitum naturalem regulet, & moderetur juxta dictamen rectæ rationis, & præscripta regulæ iustitiæ.

Dices 2. Nullus intellectus errat circa prima principia: Ergo nec voluntas errare potest circa ultimum finem qualis est beatitudo. Antecedens est *Aristotelis 2. Metaph. textu 1.* Consequentia probatur ex eodem 2. *Physic. textu 8.* ubi ait, *Quod sicut se habet principium in speculabilibus, ita se habet finis in agilibus, seu operabilibus.*

Respondet Doctor numero 11. negando consequentiam; & rationem disparitatis proferit, quod principia prima determinant intellectum ad actum rectum, finis verò non determinat voluntatem: semper ad actum rectum: sed ipsa ex se potest habere vel actum malum, vel bonum circa finem pro suo arbitrio; cum enim intellectus sit potentia naturalis, & naturaliter sit operans, idcirco non potest non assentiri principiis sibi propositis, sed in tantum eis assentitur, in quantum eorum veritas magis, ac magis ei manifestatur: Secus est autem de voluntate, cum enim hæc sit libera, ideo moderari potest appetitum proprium ne illi dominetur, & pravealeat in eliciendis suis actibus, imò ne actus absolute eliciatur; potest enim avertere intellectum à cogitatione illius objecti delectabilis circa, quod ipse occupatur.

Dices 3. Si Angeli perduelles ex appetitu, & affectu commodi peccaverint, concupiscendo nempe beatitudinem quatenus erat bonum commodum; sequitur etiam quod Angeli obsequentes pari modo peccaverint; sed illud consequens est absurdum: Ergo, & id unde sequitur. Patet sequela majoris, siquidem juxta S. Anselmum lib.

de

de Concordia cap. 26. & 43. *Voluntas quod commodum est non velle nequit*: Ergo cum omnes tam boni, quam mali habuerint affectum commodi, & maxime summi commodi, qualis est beatitudo; consequens est, quod si sit in hoc affectu peccatum, etiam Angeli boni peccaverint.

Respondet Doctor num. 12. negando sequelam; quia quamvis boni habuerint tantam inclinationem naturalem ad beatitudinem, quatenus est bonum commodum, quantum habuerunt mali, imò fortè majorem, nempe præstantiorem habebant naturam; quia ista inclinatio, inquit Doctor, est secundum perfectionem naturalem: tamen quia boni operabantur ex affectu justitiæ concupiscendo beatitudinem, etiam temperabant affectum suum circa illam, ipsumque regulabant juxta dictamen rationis, & regulas Superioris, unde illam honesto, & debito modo concupiscebant: *Non enim*, inquit Doctor, *utebantur voluntate secundum rationem ejus imperfectam, in quantum scilicet est tantum appetitus intellectivus, agendo scilicet tali modo quo competeret appetitui intellectivo agere; sed utebantur voluntate secundum perfectam ejus rationem, quæ est libertas; agendo scilicet secundum voluntatem eo modo quo congruit agere liberè in quantum liberum agit*: Hoc autem erat secundum regulam superioris voluntatis determinantis, & hoc jussit.

Ad probationem autem sequelæ: nego, quod voluntas non possit non velle bonum commodum; quotidie enim contingit, ut non velimus bona commoda, propterea quod noverimus illa nobis esse prohibita. *Vel dies*, quod licet fortè voluntas non posset non velle bonum commodum, maxime summum, qualis est beatitudo, tamen voluntas Angeli poterat ipsam velle inordinate, aut ordinate; ordinate quidem; nempe si vellet ipsam tantum

obtinere quando; & quomodo Deus ordinaverat, aut si illam habere concupisceret tantum, ut Deum amore præstantiori diligeret.

Possit autem illam ordinate appetere: idque tripliciter, inquit Doctor *num. 9. vel quantum ad intensiorem*, putà volendo eam majori conatu, quàm sibi conveniat; vel *quantum ad accelerationem*, putà volendo eam sibi citius, quàm sibi conveniat, vel *quantum ad causam*, putà volendo sibi eam aliter, quàm sibi congruat; v.g. sine meritis, vel fortè modis aliis, de quibus omnibus non oportet hic curare. Aliquo istorum modorum est probabile, quod excesserit voluntas ejus, scilicet *vel plus appetendo* sibi beatitudinem in quantum est bonum sibi, quàm amando illud bonum in se: vel plus appetendo illud bonum, ut objectum beatificum esse bonum suum tanquam sibi bonum, quàm appetendo illud inesse alii, ut Deo suo: & in hoc est summa perveritas voluntatis, quæ est *uti fruendis*, & *frui utendis*, secundum sanctum Augustinum lib. 83. qq. q. 30. *Vel secundo modo* potuit appetere habere illam statim cum tamen Deus velit eum illam habere post mortuam viam. *Vel tertio modo* appetendo eam ex naturalibus habere, non habendo eam gratiose, cum tamen Deus velit eam haberi ex meritis. Debuit ergo libera voluntas moderari affectionem quantum ad istas circumstantias quas recta ratio habuit ostendere: quia beatitudo debuit minùs appeti sibi quàm Deo, & debuit appeti pro tempore, pro quo Deus voluit; & ex meritis, pro quibus Deus voluit eam debere appeti. Ergo si aliquo istorum modorum sequebatur affectionem commodi, non moderando eam per justitiam, hoc est per infusam, si habuit, vel acquiritam, vel innatam sive naturalem, quæ

si, que est ipsa met libertas, peccavit. Qualia autem fuerint objecta appetitus Angelici, resolvetur ad calcem istius questionis. An autem uterque ille amor inordinatus Angeli, tam amicitie, quam concupiscentie, sit superbia propriè dicta, vel potius ad luxuriam spirituale sit reducendus, aperiet.

CONCLUSIO TERTIA.

Amor inordinatus Angeli, tam Amicitie, quam Concupiscentie, fuit superbia: non formaliter, & propriè, sed radicaliter, & impropriè dicta. Hæc videtur esse genuina Subtilis Doctoris sententia in præfata quæst. 2. num. 14. ubi cum præmississet sententiam S. Thomæ, & aliorum dicentium, quod amor ille inordinatus Angeli fuerit propriè dicta superbia, concludit: Ideo dico, quod primum peccatum ejus non fuit superbia propriè dicta; sed propter delectationem, quam importabat, magis videtur reduci ad luxuriam; sicut peccatum quod inordinatè delectatur quis in speculatione conclusionis geometricæ, ad luxuriam revocatur: In quibus verbis duo maxime advertenda sunt: Primum quod Doctor absolute non neget amorem illum esse superbiam, juxta aliquam superbiam usurpationem, sed tantum, quod non sit superbia propriè dicta. Secundum est, quod non dixerit illum amorem esse formaliter luxuriam, sed quod si ad aliquod ex septem capitalibus criminibus sit revocandus, magis congruè ad luxuriam, quam ad superbiam revocetur. Quid autem amor ille Angelicus inordinatus, non fuerit propriè dicta superbia.

Probatur 1. Primum peccatum Angeli fuit immoderata complacentia in suis perfectionibus: sed superbia propriè dicta, non est talis immoderata complacentia, inquit S. August. lib. 14. cap. 15. Quid est enim superbia, nisi perversa celsitudinis appetitus? Appetitus autem celsitudinis non est formaliter amor sui, sed ex eo sequitur: quia ne-

mo potest appetere immoderatè suam excellentiam, & beatitudinem, nisi quia seipsum inordinatè diligit: Ergo primum Angeli peccatum non fuit formaliter superbia. Deinde amor inordinatus amicitie erga alterum non est formaliter superbia: Ergo, nec amor inordinatus sui; eadem enim videtur esse ratio. Denique propriè dicta superbia, est inordinatus appetitus excellentie respectu aliorum: unde S. August. lib. 19. de Civit. cap. 12. ait: Superbia pervenit imitatur Deum; odit namque cum sociis equalitatem sub illo, sed imponere vult sociis dominationem suam pro illo: Quibus verbis significat, quod ratio formalis superbie consistit in appetitu excellentie, ut dicit relationem dominationis super alios! sed ille affectus dominationis non potest esse primum Angeli peccatum: idcirco namque voluit supra cæteros dominari, quia seipsum inordinatè diligebat; qui inordinatus amor fuit equidem radix, & origo superbie, non autem ipsa superbia formaliter: Ergo, &c.

Obijciunt primò Thomistæ varios Scripturæ contextus, quibus significari contendunt primum Angeli peccatum fuisse superbiam formaliter dictam. In primis vero illud Isayæ 14. ubi in persona Regis Assyriorum allegoricè describitur peccatum principis De nonum his verbis, *Detrahta est ad inferos superbia tua; quomodo cecidisti de Cælo Lucifer, qui dicebas in corde tuo; in Coelum conscendam?* &c. quæ verba manifestæ superbie sunt indicia. Secundò illud *Ezechielis* 28. ubi sub persona Regis Tyri describitur Diaboli peccatum, & inter alia de eo dicitur: *Inventa est iniquitas in te. Quæ autem fuerit iniquitas illa, declarat dicens: Elevatum est cor tuum in decore tuo, &c.* Elevatio autem cordis superbia est, vel effectus superbie propriè dictæ. Addunt illud *Ecclesiasticis* 10. *Initium omni peccati superbia.* Unde S. Aug. lib. 14.

de civitate Dei cap. 13. addit: Mala voluntatis initium quid potuit esse aliud nisi superbia?

Confirmant ex illo Tobie, ubi Tobias pater filio dicit: Superbiam nunquam in tuo sensu, aut in tuo verbo dominari permittas; in ipsa enim initium sumpsit omnis perditio: atqui omnis perditio hominum, imò, & Angelorum sumpsit initium à peccato principis Dæmonum: ergo peccatum illius fuit superbia.

Hoc ipsum probare nituntur variis sanctorum Patrum oraculis: In primis verò sanctus Ambrosius vel alius Author epistolæ ad Demetriadem Epist. 33. Hæc superbia, inquit, à Diabolo sumpsit exordium; qui quoniam suam quam à Creatore acceperat, potentia, & dignitate sibi placuit, idque Authoris sui gloriæ comparavit, cum Angelis, quos in consensum impietatis suæ traxerat, à celesti sublimitate dejectus est. Subinde itaque in lapsu Diaboli sive in prævaricatione hominis, initium peccati superbiæ est, quæ congruenter, & avaritia nominatur, quia utraque appellatio eum significat appetitum, qui, & suam mensuram concupiscit excedere; & non dignetur dives esse, nisi proprii. Tanquam habeat hoc simile Deo, ut bonorum suorum ipse sibi sors, ipse sibi sit copia.

Consentit sanctus Athanasius in oratione de Virginitate; Satanæ, inquit, non propter fornicationem aut adulterium aut furtum de cælo dejectus est: sed superbia ipsum in inferiores abyssi partes præcipitavit. Subscribit Hieronymus in caput 16. Ezechielis, ubi superbiam proprium Diaboli, primumque peccatum vocat. Hoc ipsum pluribi docet sanctus Augustinus. maxime lib. 14. de civitate Dei cap. 13. ubi ait, Male voluntatis, quod potuit esse nisi superbia; initium omnis peccati superbiæ est: quid est autem superbia nisi perversa celsitudinis appetitus? Perversa enim celsitudo est deserto eo, cui debet animus inherere, principio, sibi quodammodo fieri atque

Ton. IV.

esse principium. Hoc fit cum nimis sibi placet; sibi verò ita placet eum ab illo bono incommutabili desit, quod ei magis placere debuit, quam ipse sibi. Subscribit Fulgentius lib. ad Monimum, cap. 17. Si initium peccati requiritur, inquit, nihil aliud nisi superbia invenitur: dicit enim Scriptura, Initium omnis peccati superbia; quæ itaque tunc initium sumpsit, cum Angelus adversus Deum elatus, & ipsa elatione prostratus per concupiscentiam, quæ radix est omnium malorum, volens usurpare, quod illi datum à Deo non fuit, à Deo decessit, & cecidit, in quo se steterat, non cecidisset. Tandem Bernardus lib. de modo bene vivendi Serm. 37. Superbia, inquit, radix omnium malorum, Angelos deposuit, potentes stravit, superbos deiecit. Hinc superbia communiter peccatum Dæmonum appellatur, & Job 12. Lucifer vocatur Rex super omnes filios superbiæ. Constat igitur tum ex Scripturæ, tum ex sanctorum Patrum oraculis, superbiam fuisse primum, ac capitale Dæmonum peccatum.

Negat consequentiam Doctor numero 17. & ad Scripturæ, & sanctorum Patrum auctoritates, reponit, præsumptionem fuisse simpliciter primum peccatum Angeli, Non quatenus, inquit, est prima species superbiæ propriè sumptæ; sed quatenus significat nimiam complacentiam, & amorem inordinatum sui ipsius, quæ complacentia, & præsumptio, causa fuit, & radix superbiæ, ut explicabat sanctus Augustinus, & evidentiùs aperit lib. de Genesi ad litteram. cap. 25. ubi ait Diabolus amasse propriam potestatem, & perverso sui amore privatum sanctæ societatis: turgidum Spiritum. Et cap. 23. Ab eo continuo se à luce veritatis avertit, superbiæ tumidus, & propriæ potestatis delectatione corruptus. Itaque præfatæ tum Scripturæ, tum sanctorum Patrum auctoritates sic possunt explicari. Primum quod significant primum peccatum Diaboli fuisse superbiam,

S s

non

non formaliter, & propriè dictam, sed radicaliter, & effectivè, quatenus nempe inordinatus ille amor sui ipsius, Angelum induxit, ut de se præsumeret, divinam præminentiam, & dominationem affectaret, ac tandem Deo subiici renueret. Vel quòd superbia Diaboli causa fuerit totius peccati, quòd à primo Parente in universum humanum genus Diabolus derivavit, ut explicat S. Augustinus in Psalmum 121. *Cecidit*, inquit, *Angelus, & factus est Diabolus. Propinavit homini superbiam; deiecit secum invidentià cum qui stabat; isti sibi voluerunt idipsum esse, sibi dominari voluerunt.* Denique dico cum Seraphico. Doct. articulo 7. quæst. 7. Quòd Diaboli peccatum considerari debet quantum ad triplicem statum: scilicet, quantum ad inchoationem, consummationem, & confirmationem: Initiatum est in complacentia, & præsumptione; statim enim ut vidit suam pulchritudinem, præsumpsit: Consummatum est in ambitione, quia præsumens de se, appetiit quod omnino supra se fuit, & ad quod pervenire non potuit; sed Confirmatum est invidia, & odii averfione; quia ex quo obtinere non potuit, quod appetiit, ideo invidere cœpit, & affectu odii contra ire, & in hoc firmatum est, quia hæc omnino ipsum à Deo separavit, & perfectum obstaculum posuit, sicut charitas perfectè Deo jungit.

Dices secundo, secundum sanctum Joannem; Omne, quod est in mundo, aut est concupiscentia carnis, aut concupiscentia oculorum, aut superbia vitæ: sed primum Angeli peccatum non fuit concupiscentia carnis, aut oculorum; ergo fuit superbia vitæ.

Negat consequentiam Doctor, quia illa divisio comprehendit tantum peccata ordinaria hominum, non verò Angelorum. Quòd si Angelorum peccatum ad aliquod ex illis tribus membris reduci debeat, potius revocandum est ad concupiscentiam oculorum, quàm ad

alia duo membra: Sicut enim inquit Doctor, in nobis ad concupiscentiam oculorum spectant immoderati appetitus aliqujus visibilis pulebri: ita, & in Angelis ad concupiscentiam oculorum debet spectare immoderatus appetitus delectabilis.

Dices tertio: Peccatum Angelorum reduci debet ad aliquod ex septem vitiis capitalibus: sed ad nullum commodè revocari potest, quàm ad superbiam: ergo debet esse superbia propriè dicta.

Respondet primo Doctor numero 17. negando majorem: illa namque divisio peccatorum in septem genera, nec est adæquata, nec est etiam congrua: quod optimè probat; quia si divisio peccatorum fiat juxta numerum habitum maiorum oppositorum septem virtutibus, nimirum tribus Theologicis, & quatuor Moralibus, certum est, quòd non sit bona, quia deberent assignari septem peccata distincta, & separata ab illis septem; nam infidelitas, & præsumptio deberent numerari inter illa, & aliqua alia ex illis septem omitti. Quod si divisio peccatorum non sumatur sic, sed prout opponuntur actibus bonis, quibus observantur decem præcepta decalogi, deberent esse decem peccata. Unde concludit, quòd illa divisio non debet admitti tanquam adæquata, nec ut comprehendens omnia peccatorum genera, nec etiam fortè omnes radices peccatorum; siquidem, inquit, infidelitas, & desperatio, sunt opposita spei, suntque graviora peccata, quàm peccatum guls, aut accidia, nec tamen sub illis membris comprehenduntur propriè, & directè; hinc infert, quòd hæc divisio sit peccatorum, quæ sunt ordinariè; & quæ sunt radices, & occasiones plurium peccatorum.

Respondet secundo negando consequentiam, quia illa divisio non est adæquata; nec quodlibet peccatum debet esse aliquod ex illis formaliter, & propriè: plura enim sunt peccata, quæ non nisi

nisi reductivè ad illa septem spectant.

Respondet tertio negando minorem : si enim reductivè Angelorum peccatum ad unum ex illis septem revocetur, potius ad luxuriam, quàm ad superbiam spectabit; *Sicut*, inquit Doctor, *omnis inordinatus appetitus delectabilis, ad concupiscentiam oculorum revocatur.*

Instabis: Inordinatus delectationis affectus non solum in luxuria, sed etiam in gula, aliisque similibus intemperantiæ vitii invenitur: ergo dato, quòd primum Angeli peccatum consisteret in deordinato delectationis affectu circa propriam excellentiam, non magis luxuria, quàm gula spiritalis dici debet.

Respondet primo, quod et si consequentia foret vera, tamen non pugnet contra sententiam Doctoris: non enim contendit Doctor illam complacentiam inordinatam Angeli, esse potius ad luxuriam, quàm ad gulam revocandam: sed quòd potius ad luxuriam, quàm ad superbiam revocari possit. *Respondet secundo* congruentius tamen ad luxuriam, quàm ad quodlibet aliud peccatum esse revocandam; cum enim luxuria versetur circa objectum magis delectabile, quàm gula; delectatio autem illa ab Angelo inordinatè concepta de propria sua excellentia, & perfectione fuerit summa; quia aliàs non movisset Angelum ad tot gravia patranda peccata; consequens est, quod ad luxuriam magis, quàm ad alia peccata reduci debeat; quippe cum maiorem in delectationis excessu proportionem habuerit cum luxuria, quàm eum alio quovis peccato.

Quæres, an revera Angelus appetiverit æqualitatem cum Deo, seu Deum esse?

Respondet revera ipsum appetuisse, æqualitatem cum Deo secundum se spectatam. Ita Doctor in 2. dist. 6.

quæst. 1. numero 2. ubi eum impugnasset sententiam, & rationes sancti Thomæ docentis objectum excellens, cuius appetitione Angelus primò peccavit amore concupiscentiæ, non fuisse omnimodam æqualitatem cum Deo in natura; concludit Doctor potest aliter ad quæstionem responderi; scilicet, quòd Angelus potuit appetere æqualitatem Dei; idque probat ratione quadruplici: sed prius firmanda est hæc nostra responsio auctoritate tum Scripturæ, tum sanctorum Patrum.

Primò namque, ex Scriptura deducitur, quod de facto Lucifer appetiit hanc æqualitatem: ergo reverà potuit eam appetere. Probatur Antecedens ex illo *Isayæ 14.* ubi Lucifer ait, *Ascendam super altitudinem nubium, similis ero Altissimo*, quamvis enim de similitudine, quæ potest esse minor, quàm æqualitas, ibi fiat sermo; nihilominus similitudo sine æqualitate perfecta non est. Adde quòd si antecedentia verba considerentur, videntur perfectam similitudinem denotare, & exigere.

Accedit illud *Ezechielis 28.* ubi pariter de Lucifero dicitur, *Elevatum est cor tuum, & dixisti, Deus ego sum, & in cathedra Dei sedi in corde maris*; & ideo Angelus primus, qui Lucifero restitit, dicitur *Michael*, hoc est *quis ut Deus*; quia nempe repugnavit Lucifero, & hæc ei verba Divinitatem affectanti improbavit.

Idem docent sancti Patres: in primis verò sanctus Ambrosius. *epist. 33.* ubi ait: *Quoniam suam quam acceperat potentiam, & dignitatem sibi placuit, seque Authoris suæ gloriæ comparavit, à celestis sublimitate dejectus est.* Clarius id indicat octon. 3. in Psalm. 128. Ille, ait, *se se exaltavit, ut vellet æquari Altissimo*, Subscribit sanctus Chrysostomus. hom. 3. de verbis *Isayæ*: *Dei*, inquit, *superavit æqualitatem, quæ res eum cælo expulsi.* Concedit sanctus Augustinus. 14. de civitate. cap. 11. ubi ait *Luciferum quodam quasi*

tyrannico faſtu gaudere ſubditis magis, quàm eſſe ſubditum elegiſſe; Quasi diceret, quòd Lucifer cum Deo æqualitatem in authoritate, & poteſtate concupivit, quippe omnibus aliis præeſſe, nulli verò ſubeſſe optabat. Rem clarè indicat Nazianz. orat. 17. ubi Luciferi elationem exponit, his verbis: Indignum, inquit, atque intolerandum dicebat ſe cum divinus eſſet, non Deum quoque exiſtimari, quod eleganter expreſſit carmine, quod eſt de ſubſtantiiſ mente præditiſ ubi inter alia ſcribit.

Quæcirca primus ſana mente tumefcens

Lucifer (eximio nam quod fruereſtur bonore

Sperabat regale Dei ſolumque decuſque)

Corruit amiſſo vilis ſplendore, miſerque:

Dum Deus eſſe cupit, terra caligine totus

Obrutus eſt.

Probat autem hanc reſponſionem Doctor. Primò quidem. Voluntas ſecundum actum amoris amicitie, & actum amoris concupiſcentie habet totum ens pro objecto, ita, quod ſicut quodcunque ens poteſt ipſa amare amore amicitie, ſic, & poteſt illud amore concupiſcentie proſequi: ſed æqualitas Dei ſecundum eſſentiam, eſt aliquod bonum concupiſcibile ſecundum ſe: ergo cum Angelus potuerit ſe amare amore concupiſcentie, potuit ſibi appetere omne bonum concupiſcibile, ſubindeque potuit appetere æqualitatem Dei.

Probat ſecundò, & priorem rationem confirmat. Si aliquid impediret quominus Angelus poſſet illam æqualitatem affectare, maxime quia non ſolum in ſe eſt impoſſibilis, ſed etiam ut impoſſibilis apprehenditur ab Angelo: abſurdum eſt enim aſſerere eum fuiſſe ita malitia excorcatum, ut eam æqualitatem divinam creaturæ omnino im-

poſſibile eſſe non agnoverit: ſed illa impoſſibilitas non impedit, quin potuerit Angelus ipſam Divinitatem appetere: Ergo, &c. Majorem concedunt Adverſarij, minorem verò probat Doctor.

Primò quidem authoritate Ariſtotelis lib. 3. Ethic. cap. 2. dicentis Electio quidem non eſt impoſſibile. Voluntas autem eſt impoſſibile, putà immortalitatis. Inſuper damnati Deum non eſſe cupiunt: ſed hoc eſt impoſſibile: ergo poteſt aliquid impoſſibile appeti. Suaderi poteſt ex illo ferventiſſimo dilectionis actu, quem S. Auguſtinus hiſ verbis expremeſcit erga Deum. Domine ſi eſſet Auguſtinus, & ego poſſem eſſe Deus, mallem te quàm me eſſe Deum. Inſuper ſæpe ſæpius Juſti optant Deum diligere amore infinito, & pœnitentes deſiderant, quod nunquam peccaſſent: ſed hæc, ut apparet, ſunt impoſſibilia: ergo poteſt voluntas velle id, quod intellectus impoſſibile judicat.

Thomiſtæ duplex diſtingunt impoſſibile: unum quidem per ſe, & abſolutè; aliud per acciſdens, & ex ſuppoſitione. Primum eſt illud, quod ex ipſiſ terminis involvit contradiccionem, ut hominem eſſe lapidem; hoc enim merito dicitur eſſe impoſſibile abſolutè, & ſimpliciter, quia non eſt tale reſpectu hujus aut illius loci, temporis, vel cauſæ, ſed reſpectu omnium abſolutè: Secundum verò, eſt illud, quod non ex ipſiſ terminis, aut ex natura rei, ſed ex aliqua tantùm hypotheſi involvit contradiccionem: ſicut v.g. Petrum non peccaſſe, hoc enim abſolutè non repugnat, quia poterat Petrus non peccare: ſed jam repugnat ex hypotheſi, quod peccavit, quia ratione temporis impoſſibile eſt ipſum non peccaſſe poſtquam peccavit. Inter utrumque autem impoſſibi-

bile hoc statuunt discrimen, quòd impossibile per se quacumque facta suppositione, & addita conditione, nihil habet entitatis, aut bonitatis, ex quo provenit, ut non possit appeti, nedum per electionem efficacem tendentem ad executionem, sed neque etiam per simplicem voluntatem, sive per inefficacem voluntatis actum, etiam sub conditione si esset possibile. At vero impossibile per accidens, licet, ut stat sub illa positione impossibilitatis, & in sensu composito illius, non sit possibile, nec consequenter habeat aliquam rationem boni, & convenientis; tamen secundum se sumptum, & ut per abstractionem purè præcisivam, abstrahit à tali suppositione, & impossibilitate, sive in sensu diviso illius, habet per se aliquam possibilitatem, & bonitatem; & ita consideratum, licet non possit esse formaliter volitum per actum electionis, quia electio tendit ad executionem, potest tamen esse volitum per simplicem actum voluntatis, qui dicitur voluntas; quia cum hic actus non tendat ad executionem, potest terminari ad objectum secundum se, abstrahendo à particularibus circumstantiis: unde propterea peccator vult inefficaciter non peccasse, quamvis ex suppositione, quòd peccaverit, sit impossibile. Ita Gonet post Cajetanum. Quibus præmissis, respondent impossibile per se, & absolute nullatenus posse appetiti, bene verò impossibile per accidens: Ergo, inquiunt, cum divina æqualitas sit impossibilis creaturæ, ab Angelo nullatenus potest appeti.

Contra: Impossibile per accidens ex eis, potest appeti, ergo etiam impossibile per se. Patet consequentia, ad concupiscendum enim bonum apprehensum, ut impossibile, perinde est, quod sit impossibile aut per se, aut per accidens; quippe cum apprehendens noverit utrumque à se nusquam posse obtineri: Ergo si idcirco impossibile per se

sit inappetibile, quia scilicet nulla ratione potest obtineri ab appetente; pari ratione, impossibile per accidens erit inappetibile, quippe cum appetens illud noverit se tale bonum non esse assecuturum. Sic pœnitens, qui optaret se non peccasse, cognoscit hoc esse impossibile, etiam per divinam potentiam, quia hoc solo privatur Deus, ut quæ facta sunt, infecta esse nequeant. Deinde damnati, ut dictum est, appetunt Deum non esse, & tamen illud non esse, est impossibile simpliciter. Denique hæc ipsa eorum replica non subsistit cum Doctrina sancti Thomæ: ille siquidem docet *quæst.* 16. *de malo art.* 3. *ad nonum*, & *1. 2. quæst.* 13. *art.* 5. *ad primum*, duplicem esse actum voluntatis: unum, quidem efficacem, & completum, alium verò inefficacem, & incompletum. Unde subdit posteriori loco, *Voluntas completa non est nisi de possibili, quod est bonum volenti: sed voluntas incompleta est de impossibili, quæ secundum quosdam velleitas dicitur, quia scilicet aliquis vellet illud si esset possibile: Electio autem nominat actum voluntatis jam determinatum ad id, quod est huic agendum, & ideo nullo modo est nisi possibile: Ergo sanctus Thomas admittit voluntatem etiam posse esse impossibilem.*

Confirmatur hæc impugnatio, & priores Doctoris rationes iterum firmantur à Doctore, ex S. Augustino *lib.* 83. *qq. quæst.* 30. ubi docet, quòd voluntas potest uti fruendis, & frui utendis: Ergo voluntas creata potest frui seipsa: sed non potest frui nisi summo bono: Ergo potest concupiscere sibi summum bonum, quo una cum seipsa fruatur: Hoc autem summum bonum est æqualitas cum Deo: Ergo creata voluntas potest appetere æqualitatem cum Deo, non quidem appetitu efficaci, sed saltem inefficaci.

Nam, ut observat Doctor ibidem *n.* 8: duplex est actus volendi, seu volitio: alia enim inquit, est volitio *efficax*, alia *voli-*

volitio complacentia, v. g. duo infirmi quorum unus sperat sanitatem restituendam, alter verò desperat, ambo sanitatem exoptant, & volunt; sed diversimodè; primus enim vult sanitatem quia sperat eam restituendam, & ideo inquit, & applicat media conducentia ad ejus restitutionem: secundus verò, quia non sperat sanitatem se posse consequi talia media nec inquit, nec applicat. Prima volitio dicitur efficax, secunda verò dicitur inefficax, aut complacentia tantum: Prima versatur tantum circa possibile; secunda verò etiam circa impossibile occupatur. *Hæc autem, inquit, sufficit ad meritum, & demeritum, quia etsi sit impossibile, tamen potest consentire illi pleno consensu: & illa volitione potuit Angelus appetere æqualitatem Divinam. Sed de prima volitione, quæ efficax est, dico quod Angelus non potuit appetere; simpliciter tamen volitione potuit sibi concupiscere tantum bonum, & tanto desiderio quanto concupisceret, si esset possibile.*

Obijciunt primo Thomistæ: Primum Angeli peccatum non fuit ex passione, neque ex ignorantia, quia passio, & ignorantia est pœna peccati; proindeque peccavit tantum ex electione: sed electio non est impossibile. Ergo non peccavit desiderando æqualitatem divinam sibi impossibilem.

Distinguit minorem Doctor: Electio quæ est volitio efficax, quæ applicatur media ad consecutionem finis, concedit: Electio prout dicit solum complacentiam, & appetitum voluntatis, quod velit liberè aliquid sibi propositum sub ratione boni, siue impossibilis non potest esse erga bonum impossibile appetenti, negat. Supra namque probatum est, quod revera voluntas inefficax possit versari circa impossibilia.

Instabis; Electio quæ peccavit Angelus, debuit esse demeritoria. Sed illa volitio inefficax, seu velleitas non potest esse meritum, vel demeritum: Er-

go per hanc non potuit peccare Angelus.

Nego minorem: quis enim neget actum esse meritum, & perfectissimam charitatis, quod S. Augustinus cum Deo loquens dicebat: Si possem esse Deus, mallet te quam me esse Deum; hic tamen actus est simplicis complacentiæ, & velleitatis, & est etiam circa impossibile: Potest ergo aliqua velleitas esse meritoria, Insuper, Actus meritorius est, cum quis, postquam peccavit, cogitat se, ac si non peccasset, & in hoc delectatur, velletque se nullatenus peccasse, & in priori innocentia statu existere, ut majori affectione, & acceptione Deo inserviret; hic tamen actus est simplicis affectus, quem velleitatem appellant. Similiter, in hoc affectu simplici potest esse gravissimum peccatum: ut si quis odio Deum habens non solum exoptaret Deum non esse, sed etiam desideraret, ut aliquod malum ipsi accideret, in quo genere peccati Dæmones, ac damnatos versari non dubito.

Dices secundò: Angelum esse æqualem Deo est impossibile, adeoque est non ens; sed non ens non est appetibile, in tantum enim aliquid est appetibile in quantum bonum, non ens autem bonum esse nequit: nec consequenter appetibile: Ergo Angelus non potuit appetere æqualitatem cum Deo.

Respondet primò, quod si quicquam probaret hoc argumentum, etiam evinceret impossibile per accidens non posse appeti, quod tamen Thomistæ negant, utrumque enim impossibile tam per se, quam per accidens est non ens.

Respondet secundò distinguendo majorem: Non est ens aliquid unum, & habens in se bonitatem possibilem, concedo: non est ens aliquid multiplex includens duo, quorum unum est in se bonum absolute, & esset etiam bonum respectivè ad alterum, si posset cum ipso conjungi, nego: Itaque quamvis voluntas angelica non possit appetere æqua-

æqualitatem, Dei volitione absoluta, quâ ferretur in ipsam per modum unius objecti possibilis, quia ipsi non proponitur ab intellectu; tamen potest volitione comparativa ferri in ipsam æqualitatem divinam appetendam, quatenus ipsa esset ipsi bona, si illam consequi posset.

Dices tertio: Voluntas angelica nequit appetere æqualitatem Dei, nisi ipsi proponatur ab intellectu: sed non potest proponi ab intellectu: vel enim proponeretur ab intellectu errante, vel ab intellectu non errante: *Non primum*, quia cum nondum peccasset, nullum habebat errorem in intellectu, alioquin pœna fuisset prior culpa; ille namque error non potuit esse in Angelo, nisi per modum pœnæ inflictæ: *Non etiam secundum*, quia intellectus non errans nequit proponere voluntati aliquid falsum; falsum autem est Angelum posse esse æqualem Deo: Ergo, &c.

Negat minorem Doctor; ad cuius probationem dicit, quod proponi possit illa æqualitas ab intellectu non errante: *Æqualitas enim Dei*, inquit, *potest apprehendi sine errore, quia est in aliquo sine errore, quia Filius Dei est æqualis Patri, & ille potest apprehendi*. Deinde potuit Angelus apprehendere illam æqualitatem esse sibi bonam, si esset possibilis; & supposita tali apprehensione, & iudicio, voluntas potuit illam æqualitatem appetere: sanè Dei apprehendimus æqualitatem sine errore, nec non, & iudicamus, quod si illa æqualitas esset possibilis Angelo; sicut est possibilis, & de facto convenit Filio Dei; quod reverà Angelus longè perfectior esset, quàm modo sit, quantam perfectionem nunc habeat: Ergo multò magis Angelus potest apprehendere illam æqualitatem, & tale iudicium eformare.

Obijciunt quarto Nullus potest appetere suum non esse, ex S. Augustino 3. de libero arbitrio: sed si Angelus appeteret æqualitatem Dei, consequenter

appeteret se non esse Angelum, quia Angelum esse Deum, est ipsum non esse Angelum; nam Angelum esse, est creaturam Deo esse subditam: Ergo Angelus non potest appetere se esse æqualem Deo. *Confirmatur ex illo sancti Anselmi lib. de similitudinibus cap. 6.* ubi ait, *Quod si quis vellet esse similis alteri in propria persona, vellet se non esse, quod velle nequit.*

Respondet Doctor primò, quod quamvis fortè aliquis non possit directè velle suum non esse, tamen indirectè id velle potest, volendo nempe aliquid ex quo posito sequeretur ipsum non esse: *Sic*, inquit, *quilibet peccans mortaliter vult aliquid in quo non vult subesse Deo, & in hoc ex consequenti vult se non esse, quia non potest esse, nisi subit Deo.*

Respondet secundò negando minorem; quia quamvis sequeretur destructio sui ex æqualitate cum Deo, tamen non est necesse, quod volens æqualitatem, velit formaliter, & expressè non esse suum, seu suam destructionem: Non enim sequitur, inquit, *quod si aliquis velit antecedens, velit etiam consequens, quando consequens potest intelligi absque antecedente*: sicut v.g. aliquis potest appetere Episcopatum, non volendo Sacerdotium: in proposito autem consequens non est necessario connexum cum antecedente: non enim absolute sequitur, quod si Angelus velit æqualitatem cum Deo, etiam velit sui destructionem; posset enim appetere æqualitatem cum Deo ex suppositione impossibili, quod ipsa æqualitas non inferret destructionem Angeli. Ad S. Anselmum respondet Doctor, ipsum loqui de voluntate ordinata; Non potest autem quis ordinatè velle se non esse, inquit, *quia ordinata voluntas non est volendo aliquid, & non volendo illud, quod necessario sequitur ad ipsum, sive illud sit ipsi intrinsecum, sive non: hæc autem vera non sunt de voluntate inordinata.*

Instabis: Angelus cognoscebat se ens crea-

creatum, & per participationem; sciebat pariter nullum ens per participationem posse esse ejusdem naturæ cum ente per essentiam, adeoque perfectè noverat; quòd non posset optare æqualitatem divinam quin optaret se non esse.

Nego consequentiam: quamvis enim Angelus seipsum cognosceret esse ens per participationem, tamen potuit apprehendere illam æqualitatem divinam ut bonum aliquod appetibile; subindeque potuit eam sibi appetere; non quidem appetitu efficaci, sed inefficaci: Unde potuit sibi displicere, quod esset Deo subiectus, & inferior, potuitque optare independentiam respectu Dei, & superioritatem respectu aliorum Angelorum; quod, ut apparet, est velle æqualitatem cum Deo secundum naturam.

Urgebis: Potest aliquis absque ullo peccato desiderare se esse Deum: Ergo dicit Angelus æqualitatem divinam fuerit æmulatus, exinde non censetur peccavisse. Probatur antecedens: Posset aliquis appetere se fieri Deum, ut nempe sicut Deus, foret immunis à peccato, & ut Deum diligeret quantum in se diligibilis est: sed appetitus ille non esset peccaminosus; imò reverà pius, & innocens: Ergo appetitus æqualitatis Dei non est culpabilis; nec proinde fuit primum Angelus amoris concupiscentiæ peccatum,

Nego antecedens, & ejus probationis minorem distinguo: Appetitus ille non est culpabilis si sit hypotheticus, & conditionatus, concedo: si absolutus, nego. Posset itaque hunc habere affectum vir pius conditionate, nempe si hoc foret possibile, & absque ullo Divinitatis præjudicio: parem autem affectum, non habuit Angelus Divinitatem æmulatus; imò eum absolute affectavit, ut colligere est ex verbis tum Isayæ, tum Ezechielis à nobis supra laudatis.

Quæres 2. *An etiam Angeli æmulati fuerint unionem Hypostaticam, & reverà homini ad eam assumendo inviderint?*

Respondeo 1. Reverà Angelos invidià peccasse: ut egregiè docet S. Augustinus lib. 11. de Gen. ad litteram cap. 14. Nonnulli, inquit, dicunt ipsum fuisse lapsum à supernis sedibus, quòd invidet homini factio ad imaginem Dei. Porro hæc invidentia sequitur superbiam, non præcedit. Non enim causa superbiendi est invidentia, sed causa invidendi superbia. Cum igitur superbia sit amor excellentiæ propriæ, invidia verò sit odium felicitatis aliene; quid inde nascatur satis in promptu est. Amando enim quisque excellentiam suam, vel paribus invidet, quòd ei cœquantur, vel inferioribus ne sibi cœquantur, vel superioribus, quod eis non cœquetur. Superbiendo igitur invidet, non invidendo quisque superbus est. Subscribit S. Bernardus sermone 17. Ergo in Cælo concepit dolorem, & in Paradiso peperit iniquitatem, prolem malitiæ matrem mortis, & ætumnarum omnium patrem superbia.

Respondeo 2. De factum Diabolum inordinate appetisse beatitudinem, & idcirco naturæ humane invidisse; ut docet S. Bernardus variis in locis, præcipuè sermone 17. in Cantica: potuit autem contingere, inquit, (si tamen incredibile non putetur) plenum sapientia, & perfectum decore homines præstare potuisse futuros, etiam, & profuturos in parem gloriam; sed si præstaret, in Dei Verbo absque dubio vidit, & in livore suo invidit, & molitus est habere subditos, socios dedignatus. Inferioresque naturæ: non deceat esse concives, nec æquales in gloria. Et infra ipsum Diabolum interpellans ait; Tu tibi miser sedem collocas in aquilone, plaga nebulosa, & frigida, & ecce susci-

scitantur de pulvere inopes, & de stercore pauperes, ut sedeant cum Principibus, & solum gloriæ teneant, doleasque impleri illud: Pauper, & inops LAUDABUNT NOMEN TUUM. Quamquam autem ibi S. Bernardus nullam expressam invidiæ Diaboli erga Christi incarnationem, mentionem faciat, potest tamen ex illo non leve fundamentum, à fortiori sumi. Nam si ex eo, quòd Lucifer præciverit homines in parem gloriam fuisse profecturos, colligit S. Bernardus credibile esse Luciferum doluisse, & ex invidia erga homines peccasse; multò profecto magis credi potest, si Lucifer præcivit hominem aliquem futurum esse multò excellentiorem ipso, non solum in gloria, sed etiam in gratia, unionis, & in Personæ divinæ maiestatis; indignatum propterea fuisse, vehementerque doluisse, & invidiâ contabuisse.

Respondeo 3. Etiam probabile videri, quod inordinatè unionem hypostaticam affectaverit, neque enim solemus invidere aliis bona, nisi, quæ optamus nobis, quando ea non habemus: & deinde non est magis credendum de malicia Diaboli, quòd inviderit illam dignitatem hominibus, quàm inordinatè eam sibi concupierit. Unde quotquot Patrum, aut Doctorum dicunt Diabolum invidisse homini dignitatem suam, pro hac assertionem citari possunt; quia vel directè volunt dignitatem unionis hypostaticæ, vel si de alia loquantur expressè, certè ex hoc, quòd aliam quameumque dignitatem inviderit, colligitur valde verisimiliter, quod hanc etiam invidet, quæ omnium maxima est.



Tom. IV.

QUÆSTIO TERTIA.

An voluntas Dæmonum ita sit in malo obfirmata, ut nec possit aliquatenus resipiscere, nec bonum, aliquid operari?

SCIENDUM est è limine, maximè duplicem esse circa primæ partis questionis resolutionem Authorum sententiam. Prima fuit Origenis, quam refert S. Thomas *prima parte quæst. 64. art. 2.* afferentis omnem voluntatem creatam, tam beatorum, quàm damnatorum esse flexibilem in bonum, sive in malum; dempta tamen voluntate animæ Christi. Secunda est omnium Doctorum Catholicorum, affirmantium, quòd Dæmonum, & damnatorum voluntates ita sint in malum obfirmatæ, ut nullatenus resipiscant. Causam autem hujus obstinationis, non eandem omnes profert, imò in illa assignanda varias scinduntur in sententias. *Primò* namque S. Thomas assignata prius quæstione, docet causam obstinationis Dæmonum esse immobilitatem, & inflexibilitatem eorum voluntatis circa actum quem voluntariè, & determinatè semel eliciunt. *Hæc enim est, inquit, natura Angelorum, ut ubi semel uni parti determinatè adhaeserunt, non possint in alteram flecti, à qua sententia non longè abest Henricus Gandavensis quodlibeto 8. quæst. 11. docens, quòd idcirco Angelus est immutabilis ab actu, quem semel elicit; quia voluntas separata ita profundè immergit se objecto, ut ab eo resilire nequeat. Secundo, Aureolus asserit hanc obstinationem provenire ab habitu quodam vitioso, quem Deus producit in voluntate damnatorum in pœnam suorum delictorum, & ita per eum ad malum inclinantur, ut nullatenus bonum aliquid valeant operari. Tertiò, sunt qui docent cum Marsilio in 2. quæst. 5. art. 3. causam damnatorum obstinationis in malo ex eo repeti, quòd*

T t

quòd Deus nolit cum eis concurrere ad ullum bonum opus elicendum. *Quar-
to*, Ochamus in 2. disp. 29. contendit
illam obstinationem oriri ex eo, quòd
aliquis actus in Angelo damnato ad-
mittatur, qui non est in ejus potestate:
Unde infert, quòd Deus totaliter, & im-
mediatè causat aliquem actum in vo-
luntate Angeli mali. *Ultima* tandem
sententia est Doctoris Subtilis, docen-
tis causam obstinationis Dæmonum, &
aliorum damnatorum non aliunde re-
petendam esse, quàm ex denegatione
divini auxilii ad respiciendum, & ex
perversa damnatorum voluntate, ex
qua sequitur prava quedam effectio vo-
luntatis, quâ unusquisque damnatorum
immobiliter adhæret fini perverso, in
quem in ultimo statu viz deciderunt;
quæ sententia, ut clariùs innotescat.

Notandum 1. Quòd longè diversus est
status Viatorum, Comprehenforum, &
Damnatorum: Status viatorum, est ipsa
generalis, ac universalis Dei lex, quâ
decrevit cum voluntate concurrere ad
actum pœnitentiæ, & dispositionis ad
gratiam sanctificantem, nec-non, & ad
augmentum ejus, quoties homo pœni-
tere voluerit, & bonum aliquod opus
elicere; juxta illud Ezechielis 18. *Nolo
mortem peccatoris*, &c. Status Compre-
henforum est lex divina, quâ Deus sta-
tuit ipsos Comprehensores ita servare,
ut nec ab eo possint declinare, nec ab
opere bono cessare unquam, juxta illud
Christi Domini Joann. 10. *Oves meæ
vocem meam audiunt, & ego cognosco eas,
& sequuntur me: & ego vitam æternam
do eis, & non peribunt in æternum, &
non rapiet eas quisquam de manu mea.*
Denique status Damnatorum est lex
ipsa universalis Dei, quâ statuit se nul-
latenus concurraturum cum damnatis ad
ullum actum meritorium, nec ad dispo-
sitionem ad gratiam justificantem pro-
pter eorum demerita finalia, juxta illud
Eccl. 11. *Si ceciderit lignum ad austrum,
aut ad aquilonem, in quocumque loco*

ceciderit, ibi erit. Hoc est, ut explica-
Doctor, in cujuscumque creaturæ ratio-
nalis amore perverso steterit in fine
viz, permanebit in æternum.

Notandum 2. eodem Doctore disp. 7.
num. 11. quòd in voluntate creata præ-
ter ejus entitatem, & bonitatem natu-
ralem, quæ competit ipsi in quantum
est ens positivum secundum gradum,
suz entitatis magis aut minus perfe-
ctæ, triplex est alia bonitas moralis: sci-
licet objectiva, circumstantialis, & gra-
tuïta; Prima ex objecto: Secunda ex
circumstantia, Tertia ex gratia proven-
nit. *Prima* dicitur bonitas ex genere, &
convenit actui, ex eo, quòd versetur
circa objectum juxta dictamen rectæ
rationis; ita quòd objectum appareat
per rationem probabilem aut certam,
quòd taliter sit conveniens, & con-
gruum, ut in illud creatura rationalis
tendere possit absque peccato. *Bonitas*
circumstantialis ea est, quæ convenit
actui elicito cum omnibus circumstan-
tiis, quas recta ratio dicat ipsum debe-
re sortiri. Dico autem cum omnibus,
quòd si deficeret aliqua circumstantia,
requisita, aut adesset alia, quæ non de-
beret adesse, actus non haberet hanc
bonitatem; nam juxta sanctum Diony-
sium lib. de Divinis cap. 4. Bonum est
ex integra causa, malum autem ex quo-
vis defectu. *Tertie* denique bonitas, ea
est, à qua actus habet esse meritorius
respectu alicujus præmii, quam bonita-
tem habet, tum à gratia sanctificante,
tum ab acceptance divina; nullus
enim actus præcisè potest esse merito-
rius, nisi mediante ordinatione, pacto,
aut acceptance divina: Hæc autè bo-
nitas necessariò duas priores supponit;
ut enim actus sit meritorius, debet oc-
cupari circa objectum congruum, &
habere omnes circumstantias sibi debi-
tas.

Harum autem bonitatum proponit
exemplum Doctor; nam cum quis dat
elemosinam, habet bonitatem ex ob-
je-

jecto; siquidem recta ratio distat bonum esse proximi necessitatem sublevare: habet pariter bonitatem ex circumstantiis, si eleemosinam illam cum debitis circumstantiis largiatur: puta si de suo, non verò de alieno; si tempore opportuno, si propter bonum finem, puta Dei amorem &c. Habebit verò bonitatem meritoriam, si præter duas præfatas bonitates, fiat ex gratia sanctificante, & charitate supernaturali.

Notandum 3. ex eodem Doctore; Quod huic triplici bonitati triplex opponitur malitia. Prima quidem malitia ex genere; quando scilicet actus, qui tantum habet bonitatem naturalem fertur in objectum, quodd secundum rationem rectam est disconveniens creaturæ rationali; puta si odium ejus tendat in Deum. *Secunda* est malitia ex aliqua circumstantia deordinante actum, puta si largiatur eleemosinam propter vanam gloriam. *Tertia* denique est malitia demeritoria, quæ advenit actui, quando non solum non est meritorius vitæ æternæ; sed potius pœnæ. Advertit insuper Doctor, quod quilibet ex illis tribus malitiis possit considerari, ut opposita bonitati sibi correspondenti, vel privativè, vel contrariè. Si primo modo consideretur, nihil aliud dicit, quàm privationem, aut negationem bonitatis in actu humano libero, pro eo instanti quo posset elici à voluntate actus bonus; & actum esse malum nihil aliud est, quàm eum carere aliqua tali bonitate: Unde si quis eliceret actum absque ullis circumstantiis bonis, actus sic elicited, esset malus malitiâ privativè oppositâ bonitati circumstantiali; quia non haberet bonitatem circumstantialem; & si quis eliceret actum non secundum inclinationem charitatis, eo ipso actus esset malus privativè malitiâ oppositâ privativè bonitati meritorie; & eodem modo si quis eliceret actum absque bonitate objectiva, esset malus privativè malitiâ oppositâ priva-

tivè bunitati objectivæ. Si verò actus non solum habeat objectum conveniens, sed objectum disconveniens, tum actus habebit non solum malitiam objectivam privativè, sed malitiam objectivam contrariam. Similiter si actus non habeat circumstantias bonas, quas posset habere; sed etiam habeat aliquam circumstantiam, quam non deberet habere, tum habebit malitiam circumstantialem, non solum privativam, sed contrariam; & denique si non solum non habeat bonitatem meritoriam, sed habeat malitiam demeritoriam, tum erit malus malitiâ contrariâ bonitati meritorie.

Denique addit Doctor malitiam demeritoriam objectivam, privativam, & contrariam, invicem converteri, non sic autem circumstantialis, ac demeritoria; actus enim, qui est malus per carentiam bonitatis objectivæ, necessario debet esse malus malitiâ contrariâ illi bonitati. Secus est autem de malitiâ circumstantiali, ac demeritoria; potest enim fieri, ut aliquis actus sit malus per carentiam bonitatis circumstantialis, & meritorie, quin habeat malitiam contrariam ipsis; nam potest benè fieri, quod actus non sit meritorius, quia non elicitur ex inclinatione charitatis, & tamen non sit demeritorius; Actus enim bonus moraliter elicited à peccatore, aut homine constituto in puris naturalibus, non esset meritorius, nec demeritorius. *Deinde* actus elicited circa objectum bonum absque additione aliqujus circumstantiæ bonæ, vel ex inconsideratione, vel ex eo quod non teneretur quis adjungere ullam ulteriorem bonam circumstantiam, esset malus malitiâ circumstantiali privativè, non verò positivè, seu contrariè, quia non haberet ullam circumstantiam ratione ejus deberet simpliciter dici malus, & sufficiens ad fundandam rationem demeriti.

His ita præmissis tria restant determinanda.

T t 2

mi-

minanda: *Primum*, An Dæmonum voluntas ita fuerit in malo obstinata, ut nullatenus resipiscere possint: *Secundum*, Unde proveniat hæc obduratio: *Tertium*, An ratione illius obdurationis in malo Dæmones nullum bonum opus elicere possint.

CONCLUSIO PRIMA.

Dæmonum, & aliorum Damnatorum voluntas, ita est in malo obfirmata, ut nusquam revera ad iustitiæ statum sit revocanda. Hæc est communis apud omnes Doctores Catholicos, & probatur primò illis omnibus Scripturæ textibus, quibus significatur damnatos perpetuis, & nusquam finiendis pœnis addici; subindeque eos nusquam admitti peccati veniam assecuturos, nec delictorum salutarem pœnitentiam acturos: Ita *Matth. 25.* de Reprobis dicitur, *Ite in ignem æternum, qui paratus est Diabolo, & Angelis ejus*; Et infra, *Ibunt ibi in supplicium æternum*: Et *Marci 9.* de iisdem Reprobis Christus ait: *Veniis eorum non moritur, & ignis non extinguitur*. Hinc *Apocalip. 20.* de Diabolo dicitur, *Missus est in flagnum ignis, & sulphuris, ubi & bestia, & Pseudo-Propheta cruciabuntur die, ac nocte in sæcula sæculorum*.

Secundò hæc veritas definita fuit in 5. Synodo, nec-non, & in 6. a. ã. 16. ubi approbatur Epistola Sophronii damnantis Origenem, quod docuerit damnatorum pœnas aliquando finiendas, & ipsos in statum innocentie restituendos. Idipsum determinatum est in Concilio Lateranensi sub Innocentio III. cap. firmiter, ubi decernitur de Reprobis, quod cum Diabolo pœnam æternam recipient. Eandem veritatem docet sanctus Athanasius in suo Symbolo, ubi ait: *Qui bona egerunt ibunt in vitam æternam, qui verò mala in ignem æternum*.

Probatur eadem veritas à SS. Patribus, qui constanter ajunt Dæmones esse salutis pœnitentiæ, & gratiæ recuperandæ prorsus incapaces. Ita S. Grego-

rius Nyssenus lib. 1. Philosoph. cap. 3. *Solus homo, inquit, inter intellectuales creaturas principium habuit pœnitentiam agendo veniam dignus effici; nec enim Dæmones, aut Angeli pœnitentiam agendo veniam digni effici possunt*: Et inferius ait; *Quod hominibus est mori, Angelis est casus*.

Confirmat S. Damascenus lib. 2. de Fide cap. 3. ubi absolute dicit Angelum capacem non esse pœnitentiæ, quia corpore vacat, quam rationem sic explicat; *Nam quod homo de vitiorum ceno emergere, atque ad meliorem frugem se convertere queat, id ob corporis imbecillitatem est consecutus*. Quibus aperte declarat se loqui de pœnitentia fructifera, & quæ à speciali Dei auxilio, ac benignitate pendet. Quibus subscribit sanctus Fulgentius de Fide ad Petrum c. 3. ubi cum dixisset Deum creasse omnes Angelos cum dilectione sui, & cum tanta libertate, ut unusquisque eam habere posset, & perdere; ita tamen ut qui eam sponte perderet, eam deinceps suo arbitrio, & sine gratiæ auxilio resumere non valeret, adjungit: *Et de Angelis quidem hoc disposuit, & implevit, ut si quis eorum bonitatem voluntatis perderet, numquam eam divino munere repararet*. Hoc ipsum confirmat, & explicat S. Gregorius lib. 2. Moral. cap. 3. *Deus, inquit, apostatam spiritum ad pœnitentiam nequaquam revocat, sed viam superbiæ ejus rescindens damnat*: Et lib. 4. cap. 9. & 10. absolute ait *Angelum ita per superbiam cecidisse, ut reparari non possit, quia ad reiterationis lucem nulla spe veniæ, nulla conversionis emendatione revocatur*.

Hanc veritatem confirmat Seraphicus Doctor in 2. dist. 7. art. 1. quæst. 1. ex S. Damasceno lib. 2. de Fide cap. 4. ubi ait: *Quod hoc est Angelis casus, quod hominibus mors; sed homo post mortem non potest recuperare bonam voluntatem, & rectam quam amisit in vita*: Ergo, &c. *Secundò*, Similis est ratio con-

confirmationis in bono, & obstinationis in malo: sed Angeli statim, ut bene moti sunt, confirmati sunt in bono: Ergo, & mali statim ut peccaverunt, obstinati sunt in malo: sicut ergo boni non possunt cadere, ita nec mali resurgere. *Tertio*, gravius peccavit Angelus, quàm homo: Ergo, & gravius debet puniri: sed peccatum hominis punitum fuit aliqua pœna irremediabili, ut pœna mortis, de qua nullus evadit: Ergo necesse est peccatum Angeli, quod erat mors spiritus, puniri pœna mortis: sed non potuit puniri pœna mortis naturæ: Ergo necesse fuit ipsum puniri pœna damnationis æternæ.

Dicit 1. S. Cyrillus Hierosolymitanus *Catechesi* 2. postquam benignatem Dei erga homines in remittendis eorum peccatis exaggeravit, subdit: *Sed nescimus quanta ille, & Angelis condonaverit; indulget enim, & illis*: Censet igitur beatos Angelos posse peccare; subindeque, & Dæmones pœnitere posse.

Nego consequentiam, & ad antecedens dico S. Cyrillum ita esse intelligendum, ut loquatur de indulgentia anticipata per prævenientem gratiam efficacem, & prævationem; sicut sanctus Augustinus dicit gratiæ Dei tribuendum esse, quòd multa peccata non facimus, quæ si permetteret Deus, faceremus. Quod autem hæc fuerit ejus mens declarat ipse, subjungens, *Indulget illis, quandoquidem ipse tantum unus est, qui peccare non possit*: Hac enim ratione probat Deum indulgere S. Angelis manutendo eos ne peccent, quia nempe non sunt naturâ impeccabiles, ut Deus: non autem significat, quòd eis parcat postquam peccaverint.

Dicit 2. Si Angeli non possent respiscere, nec eorum voluntas rectificari, illa impotentia repeteretur vel ex parte Dei, vel ex parte Angeli, vel ex parte peccati: sed neutrum dici potest. Non quidem ex parte Dei: Tum quia obstinatio malæ voluntatis, vel ejus impos-

sibilitas ad rectitudinem, est tantum defectus, non verò effectus: Ergo non habet causam efficientem, sed deficientem: at Deus nullius est causa deficiens: Ergo non est causa, nec ratio hujus impossibilitatis: Tum quia Deus antecederet vult omnes homines, & Angelos salvos fieri, adeoque Angelorum perpetua perditio ex eo non est repetenda: Tum quia si Diabolus veniam peteret, illam à Deo consequeretur, neminem enim pœnitentem Deus respuit: Ergo illa impossibilitas ex parte Dei non provenit. Non etiam provenit ex parte voluntatis naturæ Angelicæ: Tum quia Angelus peccando non amisit arbitrii libertatem, quia libertas arbitrii est ei naturalis: sed ratione liberi arbitrii Angelica voluntas susceptibilis erat rectitudinis ante peccatum: Ergo quantum est ex natura sua, etiam adhuc rectitudinis est susceptibilis. Tum quia peccatum Angelicum non excedit peccatum hominis in infinitum: Ergo nec in infinitum Angelum elongavit à Deo: sed peccatum hominis non abstulit ab eo possibilitatem recuperandi illam beatitudinem: Ergo, nec eam abstulit peccatum Angelicum: adeoque potest restitui. Non denique ex parte peccati: Tum quia gratia quæcumque sanctificans, si inesset Dæmonis voluntati, omne peccatum ab ea solveret, & expurgaret; subindeque peccatum illud non est de se incurabile. Tum quia nulla culpa inducit necessitatem voluntati: Ergo non aufert possibilitatem ad recuperandam rectitudinem, adeoque nulla impossibilitas est ex parte peccati, quin Angelica voluntas pristinam integritatem obtineat.

Respondet Seraphicus Doctor: Quòd equidem impossibilitas illa recuperandæ prioris integritatis à damnatis, non sit præcisè, & formaliter repetenda, nec ex parte Dei, nec ex natura Angelicæ, nec ex gravitate peccati: sed ex parte status: *Quia enim*, inquit, *voluntas An-*

Angelus eſt extra meriti ſtatum, idcirco abeſt ab ea omni gratia; & quia eſt in ſtatu damnationis, ideo ipſi abeſt deſperatio certiſſima, quæ duæ ſunt conditiones omnino diſponentes voluntatem ad impoſſibilitatem reſtitutionis.

Aliam rationem Doct̃oris Subtilis ſequenti conſeſſione ſubjiciemus.

Dicitur 1. Ad reſtitutionem voluntatis, & innocentie reſtitutionem duo maximè deſiderantur, ſcilicet indulgentia ex parte divinæ miſericordie, & actus pœnitentie ex parte peccatoris: ſed utrumque eſt poſſibile in Angelis lapſis. Primum quidem, quia miſericordia Dei eſt infinita, Dæmonum autem culpa finita eſt; infinitum autem ſuperari nequit à finito: Ergo divina miſericordia poteſt reſmittere, & condonare peccatum ab Angelis lapſis commiſſum. Secundum pariter verum apparet, ſiquidem Angeli lapſi naturalia ſervaverunt integra, adeoque habent libertatem reverà perfectam, & flexibilem; ſicque, ut potuerunt ſe determinare ad peccatum, ita poſſunt ejus affectum exuere: Ergo ex neutra parte repugnat eorum innocentie reſtitutio.

Reſpondet Seraphicus Doct̃or, negando conſequentiam: Nec enim eorum impenitentia tantam provenit ex Deo denegante gratiam, & indulgentiam: ſed etiam, ex eo quod ſint extra ſtatum, & tempus merendi. Notandum eſt enim, inquit, quod in formatione, & diſpoſitione rerum non attenditur ratio Miſericordie, & Juſtitie principaliter; ſed Sapientie. Decrevit enim divina Sapientia in Univerſo facere duplicem creaturam rationalem, ad hoc ut eſſet Univerſum completum: unam corpori unitam, ut animam rationalem; ſpiritualementem aliam, ut Angelum: Et quoniam ſubſtantia omnino ſpiritualis, omnino eſt incorruptibilis, & ingenerabilis, non potuit unus Angelus

ex alio produci, & ideo ſimul producti ſunt, & quia ſimul producti, ideo ſimul glorificandi, ſive diſpoſiti ad ſimul glorificari. Et quia ſunt ſpirituales, & incorporeales, nullo modo habentes retardativum; hinc eſt, quod in loco gloriæ ſunt conditi, ſcilicet in Empyreo; & ita de proximo ad gloriæ diſpoſiti, & ratione naturæ, & loci; & ideo tempus meriti eſt eis ita breve præfixum ſicut potuit: & ideo uſque ad primam averſionem, & converſionem deliberativam. Homini verò quia conditus eſt in corpore animali ad procreandam prolem ad cultum Dei, & ita in diſpoſitione remotiori à gloria, datus eſt locus diſtans ad merendum à ſui conditione, ſcilicet Paradifus terreſtris; & præfixus eſt ei terminus diuturnus propter officium procreandi prolem: Et propterea cum peccavit Angelus, ſtatim exiit tempus meriti ſtatuti, homo verò non: & ideo potuit iſte reſtificari, ille verò non. Et hoc eſt, quod dixit S. Auguſtinus de mirab. ſacræ Scripturæ (vel quiſquis eſt Author) Angelus de ſublimiſſimo ſui ordinis ſtatu cecidit: ideo reſurgere non potuit. Patet igitur, quod voluntas Angeli non eſt reſtificabilis, nec fuit à tempore ex quo cecidit; quia enim fuit extra ſtatum meriti, certiſſimè revelata eſt ei ſua damnatio: & ideo ſicut Beati non poſſunt timere damnationem; ita Angelus malus propter certitudinem damnationis, non poteſt ſperare ſalutem, & propter abſentiam gratiæ non poteſt pœnitere, & ideo nec bonus eſſe.

CONCLUSIO SECUNDA.

R*atio formalis ob quam Dæmones, & Dammati non poſſint reſpiſcere, non eſt neque inflexibilitas, vel immobilitas voluntatis eorum: Nec ullus habitus vitioſus cauſatus à Deo in voluntate damnatorum, eamque neceſſitans ad malè agendum: Nec aliis à Deo immediatè pro-*

productum in eorundem voluntate: Sed illa oritur præcisè, & formaliter ex denegatione divini auxilii necessarii ad respiciendum, ex qua sequitur prava affectio voluntatis eorum, quâ unusquisque Damnatorum immobiliter adheret fini perverso, quem unusquisque selegit in ultimo instanti viæ. Hæc quatuor præcipuas partes complectitur; quarum.

Primam sic probat Doctor. Idcirco voluntas Angelica foret immobilis in actu, quem semel elegit, quia nempe appetitus ejus proportionari debet potentie cognoscitivæ; cognoscitiva autem facultas Angeli, seu intellectus, apprehendit immobiliter, & sine discursu omne objectum circa quod versatur: sed hoc fundamentum falsum est: Ergo, & id unde sequitur.

Maorem admittunt Thomistæ; Probat minorem Doctor; Primò quidem quia falsum supponunt, affirmando, quod intellectus sit sufficiens motor voluntatis: Non enim potest aliter intellectus movere voluntatem ad actum, nisi quatenus proponit ei objectum sub ratione boni, & mali, aut quatenus ad illam propensionem sequitur imperium aliquod practicum determinans voluntatem ad prosecutionem boni, aut fugam mali: sed ante primum peccatum proponebat voluntati objecta illa circa quæ operabatur sub ratione boni delectabilis, & mali inhonesti; nec sequebatur aliquod imperium potius in ordine ad prosecutionem boni delectabilis, quàm ad fugam mali inhonesti, aut prosecutionem alterius boni honesti, quod simul tum proponebatur Angelo; quia aliàs omnes Angeli determinarentur ad malè agendum; quia æqualiter omnibus proponebat intellectus hujusmodi objecta sub his rationibus, & similia judicia practica in omnibus sequebantur; Non enim est aliqua ratio diversitatis ex parte intellectus, imò si intellectus ad aliquod determinaret; deberet potius determinare ad bo-

num honestum, quàm ad bonum delectabile inhonestum in illo priori instanti.

Secundò, inquit Doctor, si ex ratione motoris, & mobilis, intellectus immobilis in apprehendendo immobilem voluntatem efficiat, sequeretur, quod Angelica voluntas non tantùm esset immobilis post primam electionem voluntatis, sed etiam in ipsa prima, vel ante primam, quia intellectus eorum sicut immobiliter ostendit aliquid post primam electionem; ita, & ante eam, etsi ipse immobiliter apprehendens moveat appetitum immobiliter: Ergo etiam in primo actu movebit immobiliter, & per consequens, voluntatem efficit immobilem.

Denique, Angelus malus habuit gratiam in primo instanti: Ergo in illo instanti benè operatus est: Ergo si sit immobilis, ut volunt Thomistæ, debuit semper perseverare in operatione bona. Probatur, Quia si in primo instanti non haberet operationem bonam amoris Dei super omnia, peccaret mortaliter, maximè secundum Thomistam, qui docent creaturam rationalem teneri ad amandum Deum super omnia in primo instanti usus rationis, sed non habuit in illo primo instanti peccatum mortale, quia tale nequit habere cum gratia sanctificante: Ergo habuit talem amorem, adcoque bene operatus est: ac proinde si Angeli voluntas in prima electione est immobilis, necessariò semper benè sic debuit operari; quod consequens cum sit falsum, fatendum est ejus voluntatem ex natura sua non esse invertibilem.

Nec valet etiam illa disparitas quam S. Thomas conatur iustificare inter voluntatem hominis, & Angeli, quod nempe intellectus angelicus sit immobilis, & moveat voluntatem necessariò, quia intelligit sine discursu; humanus verò intelligat per discursum. Quamquam enim hæc sententia vera esset, quam

quam tamen, ut falsam supra impugn-
 avimus cum Doctore, tamen exinde non
 sequeretur intellectum Angelorum ma-
 gis esse immobilem in assensu suo, quam
 humanum. Ita enim certitudinaliter,
 inquit Doctor, hoc est non dubitando,
 tenet conclusionem ad quam discurret,
 sicut Angelus tenet eam videndo in
 principio sine discursu: Ergo ista Im-
 mobilitas intellectus humani, hoc est
 certitudo, haberet æquè immobilem
 voluntatem, sicut illa alia, quæ poni-
 tur in Angelo. *Deinde*, intellectus hu-
 manus tam immobiliter, & sine discursu
 adheret primis principiis, nempe,
 quod bonum honestum sit amandum,
 & malum inhonestum fugiendum,
 quam Angelus adheret sine discursu
 illi propositioni. Ergo deberet volun-
 tas immobiliter operari circa tale ob-
 jectum, ita ut si semel vellet persequi bonum
 honestum, semper deberet illud
 velle; quod etiam est falsum: Ergo illa
 disparitas nulla est. *Denique*, quam-
 quam Angelus non discureret, non mi-
 nus propterea posset suam mutare ap-
 prehensionem propter nova motiva an-
 te non cognita; ut patet exemplo Dæ-
 monum, qui prius suaserunt Interfe-
 ctionem Christi, & postea dissuaserunt
 eam, ut SS. Patres testantur, quia prius
 non sciverunt mortem illam sibi fore in
 præjudicium; postea verò sciverunt.

Patet etiam secunda pars, nempe,
 quod illa obduratio non proveniat ex
 infuso vitioso habitu; si namque ille ha-
 bitus concurreret cum voluntate, ma-
 ximè vel partialiter, vel totaliter. Si
 partialiter, ergo cum voluntatem à pro-
 pria ratione non immutat, sequitur,
 quod si illa non est ex se determinata ad
 odium Dei, v.g. nec per talem habitum
 ad illud odium poterit determinari: si
 autem sit causa totalis illius odii, ita,
 quod voluntas se habeat tantum merè
 passivè respectu istius odii per talem ha-
 bitum producti; sequitur, quod odium
 illud non sit peccaminosum esset enim

illud odium totaliter à Deo causatum
 saltem mediâtè: Quod autem à Deo est,
 peccatum esse nequit, siquidem Deus
 esse non potest author peccati: Ergo,
 &c. Consequens autem falsissimum est:
 Ergo voluntas damnatorum respectu
 illius odii in Deum, non habet se merè
 passivè; subindeque non habet habitum
 aliquem, qui sit causa totalis illius
 odii, cæterorumque Dæmonum pecca-
 torum.

Pari ratione vincitur tertia pars,
 nempe, quod illa in malo obfirmatio
 non fiat per actum aliquem à Deo pro-
 ductum in voluntate Dæmonum: cum
 enim talis obfirmatio sit causa conti-
 nuationis odii in Deum, & omnium
 peccatorum, quæ perseveranter Dæmo-
 nes operantur, si hujus obdurationis
 Deus esset author totalis, & unicus, es-
 set pariter eorum peccatorum author
 censendus: Quod cum sit absurdum,
 etiam, & absurdum id unde sequitur.

Probaturs itaque quarta pars; nempe,
 quod Dæmonum obstinatio proveniat
 partim à voluntate, partim à denegata
 gratia, non divisim sed conjunctim. *Si*
enim illa obstinatio voluntatis male fit à
Deo, inquit Doctor, num. 20. *ergo ista*
malitia erit à Deo, & sic Deus est causa
peccati; si autem, & à voluntate, vide-
tur, quod ipsa possit resistere ex se ab ea
sicut ipsa potuit ex se illud malum male
velle. Qua enim virtute movet se ad ali-
quid, eadem quiescit in illo, & equali-
ter potest se retrahere ab illo, & movere
in aliud magis inclinans, quale est oppo-
situm illud: Ergo necessum est, ut ab
utroque illa proveniat. Unde huic prin-
cipio infra reponens Doctor, ait. Cum
ergo arguitur, quod si ista est à volunta-
te sola; Ergo voluntas sola potest in op-
positum resistere, scilicet ab illo obiecto in
quod inordinate se inclinavit. Respon-
deo. Dico, quod ad resistendum merito-
rie, requiritur aliud principium à volun-
tate, puta gratia, quam Angelus non
potest ex se habere, & Deus, secundum,
quod

quod deseruit ipsum, disposuit sibi eam non dare.

Hanc eandem veritatem confirmat S. Fulgentius *lib. de fide ad Petrum, c. 3.* ubi ait, ita Deum disposuisse Angelorum, & hominum causam, ut si propriæ voluntatis arbitrio contra Creatoris imperium suam niterentur facere voluntatem, ad supplicium eis relinqueretur æternitas misera, in erroribus doloribusque crucianda. Et adjungit: *Ac de Angelis quidem hoc disposuit, & implevit, ut si quis eorum bonitatem voluntatis perderet, nunquam eam divino munere repararet, Et inferius addit, Ut Angeli mali nec mala possint unquam voluntate carere nec pœna; sed permanente in eis injustæ aversionis malo, permaneat etiam justæ retributionis æterna damnatio.* Et rursus inferius, dicit nullum Angelorum ex quo ruina sue merito è cœlo ejelli sunt, bonam posse resumere voluntatem.

CONCLUSIO TERTIA.

N *Et Angeli nec homines damnati possunt ullatenus elicere bonum opus meritorium; Habent tamen potentiam ad eliciendum actum naturalem, qui posset esse moraliter bonus; quem tamen nusquam elicient propter obstratam in malo voluntatem.*

Hæc est Doctoris, quantum ad tres partes; quarum primam declarat numero 14. ubi primò præmittit, quòd non repugnet Dæmonem posse habere actum meritorium, Neque *potentia logica*; quia nempe non implicat contradictionem, quòd Dæmon possit habere gratiam, & cum ea operari; Neque *potentia reali passiva*; quia quòd est ex natura sua capax recipiendi volitionem rectam, quamdiu idem in se manet, nequit fieri non receptivum illius: voluntas autem Dæmonis fuit aliquando receptiva bonæ volitionis, & actus meritorii, quia ante damnationem potuit meruisse, & fuisse beatus: Neque tandem *potentia reali activa*, quia, inquit,

Tom. II.

numero 15. voluntas respectu rectæ volitionis, est principium activum partiale; & illam habet integram, secundum Dionysium, & eandem quam habuit in statu innocentie; & per consequens non est verum negare ab eo potentiam, hoc est principium activum partiale volitionis meritorie: Sed istud principium non est totale, quia non sufficit sola voluntas ad meritorie volendum; sed requiritur gratia tamquam principium cooperans; Concludit numero 17. Secundum hoc ergo quantum ad omnia membra, de potentia, ut est principium, non videtur negandum ab Angelis posse meritorie velle, nisi quia non habent principium merendi totale; nec principale partiale respectu volitionis bonæ; nec respectu gratiæ specialis, quæ requiritur ad bonam volitionem. Subinfert autem, quòd inter Diabolum, & opus meritorium non sit repugnantia intrinseca, sed tantum extrinseca; nempe quia Deus non potest concedere Diabolo gratiam, impotentia absoluta, quasi Diabolum habere gratiam, contradictionem involvat: Cum enim, inquit numero 18. *natura Angelica sit capax gratiæ, sequitur, quòd nulla sit contradiçtio in hoc, quòd gratia informet illam naturam, sed tantum repugnat ex potentia Dei ordinaria, quæ debet esse conformis in agendo regulis prædeterminatis à divina sapientia, vel magis à divina voluntate, quæ quantum ad creaturam rationalem beatificandam, vel puniendam, has statuit regulas: nempe, quòd ubique cecideris lignum ibi erit; hoc est, in cuiuscumque creaturæ rationalis amore permanferit, in illò permanebit: & igitur eorum non extinguuntur, & vermis eorum non morietur, & ibunt ibi in supplicium æternum; justis autem in vitam æternam: Et ex talibus regulis Scripturæ concludit August. 21. *de Civit. Dei cap. 23. & 24.* quòd certum est Deum nunquam daturum eis gratiam: Scitu-*

V v

dura

dum hoc ergo impossibile est eos bene vel-
le; quia impossibile Deo (de potentia
dico ordinaria) eis gratiam dare. Ita
Do&tor .

*Patet etiam secunda pars ex eodem
Do&ctore*, Nempe, quod Dæmones pos-
sint habere actum bonum moralem; si-
quidem postquam impugnasset senten-
tiam S. Thomæ dicentis, Dæmones non
posse ullum actum bonum elicere, quia
omnem actum deformant ex aliqua cir-
cumstantia inordinata, referendo illum
inordinatè ad amorem sui; & quia non
possunt à malo cessare propter vehe-
mentè inclinationem ad illud, conclu-
dit numero 24. Quod non necessariò
habent aliquem actum malum, nec lo-
quendo de aliquo actu determinato, vel
indeterminato, sive vago; *Primam* par-
tem probat, quia supposito, quod ex
natura voluntatis Angelicæ non sit,
quod perseveret perpetuò in actu semel
elicitò, non potest assignari aliquid
aliud determinativum ipsius ad ullum
actum determinatum, nisi fingatur,
quod habeant aliquem habitum deter-
minantem ad illum: sed in primis gra-
tissimè asseritur talis habitus; & præ-
terea absurdum est, quod omnes actus
malos quos Dæmon possit habere, ha-
beat simul, & simul etiam conserve-
t; quod sequeretur ex opposita sententia:
Ergo nec habitus, nec ipsa voluntas
ipsius est determinata ad omnes: Ergo
potest aliquando sine aliquo ex illis
subsistere.

Probat etiam tertiam partem; Nempe
quod voluntas Dæmonis nullum habeat
actum malum indeterminatum; quia
saltem quantum ad actum in genere,
potest habere aliquem actum indiffe-
rentem, qui scilicet nec habeat circum-
stantias omnes requisitas ad actum bo-
num moraliter, nec etiam ullam cir-
cumstantiam malam oppositam positi-
vè circumstantiis bonis, nihil enim,
prorsus impedit, quominus talem pos-
sit habere. Mirum enim videtur, in-

quit Do&tor, negare potentiam natura-
lem in natura illa eccellente, ubi non
apparet aliquid propter, quod sit ne-
ganda: Nihilominus infert Do&tor,
probabile esse, quod secundum hanc
potentiam non exeant in actum, pro-
pter vehementem malitiam, secundum
quam magis probabile est, quod agunt,
quam secundum potestatem naturalem,
secundum quam possent in actus ali-
quo modo oppositos. Quibus patet
quam perperam aliqui Do&ctorem infu-
mulent, quasi reverà docuisset Dæmo-
nes interdum opus honestum elicere;
quamquam enim id iudicet non esse
impossibile, ostendatque omnes ratio-
nes, quæ ad id probandum profert
S. Thomas, nullius esse momenti; ta-
men censet de facto Dæmones nullum
bonum opus morale elicere posse, pro-
pter scilicet summam illam malitiam
quæ eorum voluntas afficitur.

*Dicit primò ex S. Jacobo cap. 2. Dæ-
mones credunt, & contremiscunt*; sed
credere, & contremiscere, sunt actus
boni: Ergo aliquando eliciunt actus
bonos, adeoque non omnis actus illo-
rum est malus.

Negat minorem Do&tor numero 25.
quia quamvis ille actus credendi esset
bonus diminutè, quatenus scilicet ha-
beret bonum objectum, & non afficere-
tur aliquà circumstantia mala, non ta-
men esset eo ipso bonus simpliciter,
quia deesse posset ipsi aliqua circum-
stantia, quæ requireretur ut esset bonus:
unde posset esse actus indifferens. Vel
ut inquit Do&tor, licet credant, ille ta-
men actus credendi est in eis malus,
quia oderunt illud creditum.

Dices secundò, In Dæmonibus, &
damnatis remanet imago Dei, ratione
cujus sunt capaces amoris ipsius Dei:
sed non sunt capaces ipsius nisi per
actum bonum: Ergo habent actum bo-
num.

Respondet Do&tor, negando mino-
rem: Sunt enim imago Dei particeps,
& ca-

& capax ejus per hoc, quod habeant naturam intellectualem, quamvis non haberent ullum actum bonum, & quamvis etiam non haberent potentiam proximam ad talem actum, in quo nulla est difficultas.

Dices tertio, Nullum violentum est perpetuum, quia est contra inclinationem ejus cui inest, quod inde constat; quia si sibi ipsi relinqueretur, statim pristinum suum statum naturalem repeteret, ut patet in aqua calefacta: sed peccatum est contra inclinationem naturæ rationalis: Ergo nequit esse perpetuum, & consequenter poterunt aliquando bonum operari.

Respondet 1. Doctor distinguendo majorem: Nullum violentum est perpetuum in causis merè naturalibus, concedit: in causis partim naturalibus, partim liberis, negat: *Verum equidem est*, inquit, *quod in agentibus merè naturalibus, cessantibus inpedimentis, reditur ad dispositionem naturalem, non prohibente actione violenta. Et ratio est, quia principium intrinsecum est necessarium respectu bonitatis naturalis quantum est ex se; & ideo semper causat eam nisi vincatur per dominans. Hoc modo voluntas non est causa respectu suæ bonitatis in actu suo, sed tantum habet inclinationem quandam naturalem, quasi passivam ad bonitatem in actu; quam licet possit dare actui, non tamen inclinatur ad dandum eam necessitate naturali, sicut grave ad descendendum deorsum.*

Respondet 2. distinguendo minorem: Peccatum est contra inclinationem naturæ; quatenus est contra actum rectum ad quem inclinatur natura, concedo: quatenus ipsa natura secundum se non haberet inelinationem aliquam secundum affectionem commodi ad peccatum, nego.

Dices quarto: Dammati in inferno pœnitentiam agunt de ante actis peccatis, juxta illud Sapientiæ 1. ubi dammati pœnitentiam agentes, & præ angustia Spiritus gementes, &c.

Confirmatur: nam ille dives epulo qui sepultus fuit in inferno, desiderabat ut Abrahamus mitteret aliquem ad fratres in sæculo viventes, quatenus eos moneret de agenda pœnitentia, ne post mortem cum ipso ruerent in locum tormentorum; sed hoc erat opus honestum, & bonum: Ergo revera dammati possunt aliquod opus bonum operari.

Nego consequentiam, & ad auctoritatem Scripturæ dico, quod dammati in inferno pœnitent de ante actis peccatis, non ex bono fine, sed ex malitia: ubi talis pœnitentia nihil aliud significat quàm quemdam remorsum conscientie, qui semper est in omnibus dānatis vindicans peccata præterita, qui remorsus non est peccatum, sed pœna peccati.

Ad Confirmationem, Dico, quod illa compassio divitis non fuit orta ex pietate naturali, neque ex amore fratrum, sed ex amore proprio: verebatur namque ne gravius ipse puniretur, si fratres simul cum ipso damnarentur propter peccata quæ ipso vel instigante, vel malum exemplū præbente cōmiserant.

Obicies quinto: Nullus intellectus ita potest esse perversus, nec in eo statu constitutus, ut non possit intelligere, prima principia proposita: Ergo nec voluntas potest esse ita corrupta, ut finem ultimum non possit velle: sed volendo finem ultimum, bonum actum eliciet, volitio namque finis ultimi est operatio recta: Ergo damnatorum voluntas poterit aliquando bene velle.

Probatur sequela majoris: Sicut se habet principium in speculabilibus, sic se habet finis in moralibus. *Deinde*, Omnis malus est ignorans: Ergo nulla potest esse malitia in voluntate, nisi præviis sit error in intellectu, & consequenter ubi potest non esse error talis in intellectu, quin intelligat objectum quatenus est intelligibile, etiam poterit voluntas ita non perverti, quin possit bonum rectè velle.

Respondet Doctor negando sequelam

lam, quæ, inquit, tantum urgere potest Thomistas asserentes intellectum esse motivum sufficiens voluntatis; inde, namque sequitur quod intellectus primi Angeli nullum principium practicum possit recte concipere, quin moveat voluntatem conformiter, adeoque ad recte volendum. Ad primam sequelæ probationem, dico illam propositionem sic esse intelligendam; quod quemadmodum principia se habent ad conclusiones in speculabilibus; ita finis ad media in operabilibus: non quidem quantum ad omnia, sed quantum ad hoc, quod sicut non potest quis assentiri conclusioni quin assentiatur principiis, & propterea prius debet assentiri principio quam conclusioni: ita etiam non possit velle media nisi velit finem; & propterea prius debet velle finem, quam media: non autem sensus est, quod si non possit haberi error in intellectu circa principium, non possit etiam haberi error in voluntate circa finem. Ratio autem cur possit voluntas errare circa finem, quamvis non possit intellectus errare circa prima principia, est manifesta: quia intellectus est causa naturalis, & naturaliter determinatur à principio proposito ad cognitionem rectam, unde illam necessario habere debet; voluntas vero est causa libera, & non determinatur à fine proposito ad ad actum rectum: ideo, inquit Doctor, potest esse ita averfa, quod quantumcumque bonum sibi ostensum non moveat ipsam ad amandum ipsum, saltem ordinatè. unde non sequitur: Intellectus nequit errare circa prima principia; Ergo nequit voluntas peccare: quamvis enim non possit esse error in intellectu, non minus potest voluntas deficere; alias sequeretur, quod voluntas pro ullo statu non posset errare.

Obicies sexto: Si Dæmones, & damnati necessario male velint, sequitur, quod semper sunt in actu male volendi: Ergo in infinitum augent malitiam

suam, & consequenter semper augerunt pœnam, ita, quod sicut nunquam erunt in termino malitiæ, sic nec usquam habebunt terminum pœnæ.

Confirmatur: Si posset augeri pœna, & malitia semper in damnatis, similiter posset augeri bonitas, & præmium in beatis: Sed consequens est absurdum; sequeretur enim inde, quod beati nunquam forent in termino beatitudinis: Ergo, &c.

Negat majorem Doctor nu. 17. quia, inquit, quando habitus est in summo, & habet id omne, quod requiritur ad suum complementum in tali subiecto, vel secundum terminum sibi præfixum à sapientia divina, omnes actus sequentes nihil augent: sed tantum procedunt ex habitu jam generato; quemadmodum actus Angeli non augent habitum charitatis ejus, nec effectivè, nec meritorie, quia ille est in termino, vel secundum naturam habitus, vel secundum capacitatem subiecti, vel saltem secundum terminum sibi præfixum à Deo, sed omnes illi actus procedunt ex plenitudine illius habitus sic perfecti: Ita autem est in proposito: perfectio namque, seu complementum malitiæ damnatorum est in termino secundum regulam divinæ sapientiæ, quæ non permittit eos crescere in malitia intensivè: Et ideo actus sequentes non augent præfatum habitum, sed se habent sicut effectus illius. Ita Doctor, quibus significat, quod quamvis damnati semper velint malè, non tamen propterea augent malitiam suam intensivè, quia nempe illorum malitia est in termino.

Unde sequitur, quod pariter non sit augenda eorum pœna, sicut nec augetur beatorum gloria: Quia, inquit, numero 28. sicut præmium substantiale in primo instanti in quo aliquis Angelus est beatus, determinatum est, nec ex tunc crescit, quia actus boni qui sequuntur, non sunt meritorii licet sint boni; ita in Angelo damnato in primo in-

instanti suæ damnationis determinatur ad certam pœnam, quæ non crescit intensivè: nec tamen mali actus quos elicit erunt impuniti, sicut nec boni Angeli actus boni erunt irremunerati: Quemadmodum enim Angeli sancti actus includuntur in primo actu, quia procedunt ex perfectione actus beatifici; sed quantum ad accidentale præmium, quod possunt habere, quilibet actus est sibi præmium: Ita etiam mali actus quos elicit damnatus includuntur in prima pœna sibi certitudinaliter determinata: Unde quilibet, sicut posset habere pœnam accidentalem, & propriam, ita habet seipsum pro pœna, juxta illud S. Augustini lib. primo Confessionum cap. 12. *Iussisti Domine, & ita est, ut sit sibi pœna omnis peccator*: potissima enim, & maxima pœna est privatio maximi boni, qualis est formaliter in actu malo malitiæ culpæ peccatorum avertente à Deo. Crescet ergo pœna eorum in infinitum extensivè, sicut, & malitiæ, neutrum verò intensivè. Ita Doctor.

Iustitias: Actus damnatorum sunt demeritorii quia sunt mali: Ergo debent habere pœnam sibi correspondentem.

Respondet Doctor, concedi posse quòd actus damnati possit esse culpabilis, non tamen propriè demeritorius: quia non elicitur à viatore, cujus solius est mereri, & demereri: unde magis propriè actus ille dici potest actus damnati quàm demerentis: sicut ex alia parte actus beati, licet sit acceptabilis Deo, non tamen propriè est meritorius, sed magis dicitur actus beatificus, vel actus beati, vel de beatitudine procedens.

Ad evidentiorē autem hujusce prostræ difficultatis solutionem, placet adscribere quæ docet Seraphicus Doctor, *diff. 7. art. 1. quæst. 2.* ubi loquens de mala voluntate Dæmonum, ait Illam „ posse considerari tripliciter: scilicet „ quantum ad deformitatem, quantum „ ad pronitatem, & quantum ad actua-

litatem. Quantum ad deformitatem „ est in mala voluntate Diabolus con- „ tinuè, ita, quòd nulla intervenit va- „ riatio per deformitatis defitionem, „ sive minorationem: quia ita adhæsit „ macula peccati voluntati Diaboli, ut „ nullo modo possit ab ea separari. „ Quantum ad pronitatem, est conti- „ nuatio ejusdem: ita tamen, quod in- „ tervenit variatio quantum ad mo- „ dum inclinandi; Diabolus enim ad „ ipsum, quod primò appetiit, etiam „ nunc pronitatem habet, sed disse- „ renti modo quàm prius: Prius enim „ appetiit, cum proposito obtinendi, „ unde dixit, *Ponam sedem meam,* „ *ad aquilonem,* &c. nunc verò appetit „ quantum in se est, sicut ambitiosus „ qui sperat obtinere Episcopatum, etsi „ non obtineat, non recedit ambitio, „ sed modus ambiendi variatur: sic, & „ in Diabolo est. Quantum ad actua- „ litatem, est continuatio in actu pec- „ candi; tamen intervenit variatio „ quantum ad genus, quia non peccat „ continuè peccato unius generis, cùm „ non moveatur simul motibus diver- „ sis; modò enim peccat superbiâ, mo- „ dò invidia, &c. tamen voluntas ejus „ nunquam requiescit; quia nunquam „ lassatur, cùm sit incorruptibilis; & „ cùm in ea regnet perversitas, semper „ omnem actum quem elicit deformat „ & depravat, & ita continuè peccat. „ *Qualiter* autem Dæmonum malitiæ „ augeatur, aperit quæstione sequenti „ docendo, illam semper augeri quantum „ ad vim administrativam, videlicet com- „ paratione ad hominem: non verò quan- „ tum ad vim contemplativam, quæ est „ simpliciter, & necessariò averso à „ Deo, unde concludit Dæmonis de- „ meritum non augeri. Ad incremen- „ tum enim inquit, voluntatis malæ, „ sive demeriti, non sufficit inordinata „ affectio, quia hæc est in damnatis, „ & erit in sempiternum: sed requiri- „ tur ultra tempus meriti, & statim me-

merendi, & demerendi: Diabolus autem est in statu demerendi quantum ad vim administrativam, non vero quantum ad contemplativam. Ratio autem hujus est, quia Deus sic condidit universon, ut major, & potentior minorem adjuvet, ideo non tantum Angelo dedit vim contemplativam, quâ mereretur, & ad Deum converteretur, sed etiam administrativam, quâ homini suffragaretur. Quia ergo vis contemplativa erat ipsius Angeli in se: quantum ad illam præfixum est illi spatium merendi, & demerendi usque ad primam conversionem, vel aversionem. Sed quia administrativa respectum habet ad hominem; ideo præfixum est Angelo spatium merendi, & demerendi; usquequò homines assumerentur totaliter ad gloriam: Mansit ergo quantum ad istam, status merendi, & demerendi, & manet usque ad diem judicii; Sed quoniam meritum, & demeritum non est in vi administrativa, nisi per vim contemplativam, & in bonis contemplativa ita est conversa in bonum, quod non potest, averti ideo administrativa non habet nisi locum merendi: è contrâ, quia in malis ita est aversa contemplativa, quod non potest converti; ideo quantum ad administrativam non habet nisi locum, & spatium demerendi. Et in hoc patet, quod divinum decretum manet justum, & inviolatum; quia tempus quod à conditione præfixerat non debuit auferre, nec bonis, nec malis; & illis quidem diligentibus Deum spatium illud conversum est in bonum, impiis autem, & peccatoribus Angelis conversum est in malum, & ideo patet quo modo crescit mala voluntas in malis, scilicet quantum ad vim administrativam solum, Hæc Seraaphicus Doctor, quibus idem docet quod Subtilis, nempe Dæmonum demeritum

augeri extensivè, non intensivè quia nempe augetur eorum malitia per varios actus erga homines quos infestant, non verò augetur ratione aversionis quam habent erga Deum, quem ab initio summo odio prosequuntur.

QUÆSTIO QUARTA.

An, & quali pœna Dæmones cruciuntur?

Conveniunt omnes Theologi duplicem esse damnatorum pœnam: unam quam appellant *damni*, alteram quam *sensus* pœnam nominant. *Prima* consistit in carentia visionis, & fruitionis summi boni ad quod rationalis creatura naturali suapte inclinatione, tanquam ad suum finem ultimum tendit: & idcirco pœna damni nuncupatur, quia nempe hæc carentia maximum creaturæ damnum affert, ut pote quæ ipsum omni sua perfectione, quiete, ac voluptate spoliatur. *Pœna* verò sensus seu accidentalis, dicitur illa quæ consistit in privatione cujuscumque alterius boni præter visionem beatificam, atque in dolore seu cruciatu, quem ab igne infernali, seu etiam aliunde percipiunt. Latè autem hic *sentiendi* vocabulum, sumitur, ut non solum ad animalium appetitum sensibilem se extendat, sed etiam ad appetitum rationalem seu intellectualem, & voluntatem creatam: in Dæmonibus autem hic appetitus omnium consensu admittitur, sicut etiam in animabus separatis; & hinc fit, ut nullius delectationis, & gaudii sint capaces. Quod autem detur utraque pœna, docet Christus Matth. 25. in extremo siquidem judicio dicit Reprobis. *Discedite à me maledicti*, ecce pœna damni; *in ignem æternum*, ecce pœna sensus.

Hæc porro duplex pœna correspondet duplici inordinationi quæ est in peccato mortali; nam per peccatum mortale avertimur à Deo, & convertimur

mut ad creaturam; itaque pœna damni correspondet averſioni à Deo; & propterea conſiſtit in carentia ipſius Dei; pœna ſenſus correspondet converſioni ad creaturam, & ideo inſiſtitur à creatura: qui enim inordinatè appetit res creatas, dignus eſt ut ab eis crucietur. Et quoniam Dæmones, ſuo Conditore ſpreto, ab eo ſe averterunt, ut ad creaturas ſe converterent; hoc eſt, ad Luciferum, & ſeipſos, ſeſe nimium, & inordinatè diligentes, & ſibi ipſis ac propriè excellentiæ complacentes, libertatem ſuam, pulchritudinem, nobilitatem, cæteraque Dei dona intemperanter diligentes, & in ſumma, res creatas ſuo Creatori præferentes; meritò ex divinæ juſtiæ decreto, à creatura, hoc eſt, ab igne cruciantur in perpetuum, ſicut eorum, ſcelera perpetuò manēt; *Superbia enim eorum aſcendit ſemper* ut ait Pſaltes Regius: & ſic Deus res creatas ad eorum reprimendam ſuperbiam, uſurpat, & horrendam deformitatem inducendam, eoſque ſempiterno carcere claudendos.

In præcedenti quæſt. ſatis declaravimus Dæmonum pœnam damni; jam eorum pœna ſenſus eſt inquirenda: idcirco.

Notandum 1. eam fuiſſe plurimis & ſanctis Patribus communem ſententiam, Dæmones poſt peccatum ſuum, non ſtatim ad ima Tartara præcipitatos fuiſſe; ſed eos in aere, ac ſupra terras degere, donec extremus mundi occaſus ac judicij dies adveniat. Ita in primis Athenagoras in legatione pro Chriſtianiſm, ubi poſtquam docuit Angelos mulierum cupiditate in libidinem exaſiſſe, & ex iis propagatos fuiſſe gigantes, ſtatim addit: *Hi igitur Angeli, qui cum Cælis excidiſſent, circum aerem, & terram oberrantes, non amplius eveli ſupra reſtos poſſunt, &c.* Subſcripſit Tertullianus in *Apologetico* cap. 22. ubi Dæmones aeris incolas fatetur: *Habent, inquit, de incolatu aeris, & de vicinia ſyderum, &*

de commercio nubium celeſtes ſapere Creaturas.

Hoc ipſum cenſuiſſe S. Auguſtinum colligi poteſt ex varijs ejus ſcriptis, maximè verò ex *Enarratione in Pf. 149.* ubi ait, *Propterea ad iſtam caliginofam regionem, id eſt, ad hunc aerem, tanquam ad carcerem damnatus eſt Diabolus de apparatu ſuperiorum Angelorum lapſus cum Angelis ſuis: Nam Apoſtolus hoc de illo dicit Ephęſiorum 1. Secundum principem poteſtatis aeris hujus, qui nunc operatur in filiis diſſidentię; Et alius Apoſtolus dicit (nempe S. Petrus 2. Epiſtola cap. 2.) Si enim Deus Angelis peccantibus non peperit, ſed carceribus caliginis Inferni retrudens tradidit in judicio puniendos ſervari: Infernum hoc appellans, quòd inferior pars ſit mundi.*

Non diſſentit etiam S. Hieron. Nam in *Comment. ad Epiſtolam Pauli ad Ephęſios* explicans illa verba cap. 6. *CONTRA SPIRITUALIA NEQUITIÆ IN COELESTIBUS*, vocabulum coeleſtium, de aere interpretatur, *Hæc autem, inquit, omnium Doctòrũ opinio eſt, quod aer iſte qui Cælum, & terram medijs dividens, inane appellatur, plenus ſit contrarii fortitudinibus.*

His conſentit Rupertus lib. 1. in *Gen. cap. 17.* ubi docet Dæmones omnes in aerem dejectos, uſque ad diem ſupremi judicii in eo permanere: *Ille, inquit, terribiliter indignatione Dei, trementibus cunctis Angelorum ordinibus, & Cælo excuſſus in hunc aerem miſer cecidit, & ab omni luce extinguitur, & jam in æternum lucem Dei non viſurus; & nunc quidem in hunc aerem eſt dejectus, & omnes ſatellites ejus quos æthereas catervas dicimus, paſſim in Scripturis habemus: Verbi gratia in Apoſtolo dicente: NON EST NOBIS COLLUCTATIO, &c. Futurum eſt autem at in Infernum inferiorem videntibus cunctis præcipiter in ignem, æternum qui paratus eſt ei & Angelis ejus.* His concinit Alcimus Avitus qui lib.

libro 1. de peccato originali Diabolum sic de homine loquentem inducit.

Sit comes excidii, subeat consortia pene.

Et quos prævideo nobiscum dividat ignis.

Hinc Cassianus collatione 8. cap. 12. ait, quod tanta spirituum densitate conspersus est aer ille qui inter Cælum, terramque diffunditur, in quo non quieti, nec otiosi pervolitant; ut satis utiliter humanis aspectibus eos providentia divina absconderit, atque subtraxerit. Aut enim terrore concursus eorum, vel horrore vultuum in quos: pro voluntate sua cum libitum fuerit transformant atque convertunt, intolerabili formidine homines conserrarentur atque desicerent, nequaquam valentes hæc carnalibus oculis intueri: aut certe nequiores quotidie redderentur exemplis eorum jugibus, & imitatione vitiosi: & per hoc inter homines, & immundas, atque aereas potestates feret noxia quadam familiaritas atque perniciofa conjunctio. Quæ Cassiani verba sic exponenda sunt, ut Deus non permittat Dæmonibus horrida corpora sibi fingere, ut spectris, & imaginibus illudant mortalium oculis, & illos è vicino perterrefaciant.

Notandum 2. plures similiter ex antiquioribus Patribus cum Origene sensitisse ignem qui jam additi, vel addicendi sunt Dæmones, non esse corporeum, nec aliud significare, quàm peccatorum stimulantem conscientiam, ut ipse docet Origenes lib. 2. Periarthron cap. 11. ubi hæc Isayæ verba cap. 51. *Ambulate in lumine ignis vestri, ac flammæ quam accendistis*; sic declarans ait; *Per hos sermones hoc videtur indicare peccator, ut flammam sibi ipse proprii ignis accendas*; & non in aliquem ignem qui antea fuerat accensus ab alio, vel ante ipsum subsisteret, demergatur. Hanc quoque Origenis fuisse sententiam scribit S. Hieron. *Apologia 2. contra Rus-*

sum, ubi ait; Ignis autem æternos quod intelligere solet Origenes, puto, quod te non fugiat, conscientiam, videlicet peccatorum, pœnitundinem interna cordis urentem, de qua Isayas loquitur cap. 66. VERNIS EORUM NON MORIETUR ET IGNIS EORUM NON EXTINGUETUR. Quod fusius explicat Epistola 69. ad Avitum, ubi de Origene loquens ait; Ignis quoque gehennæ, & tormentum quæ Scripturæ sacra peccatoribus comminatur, non ponit in suppliciis, sed in conscientia peccatorum: quando Dei virtute, & potentia omnis memoria delictorum ante oculos nostros ponitur: & veluti ex quibusdam sentinibus in anima derelictis universa vitiorum seges exoritur: & quidquid feceramus in vita vel turpe, vel impium, omnis eorum in conspectu nostro piliura describitur, ac præteritas voluptates mens intuent, conscientiaë puniuntur ardore, & pœnitundinis stilliculis confunditur.

Eandem sententiam Theophilactus amplectitur in 9. caput Marci: *Vernis autem, inquit, & ignis, qui peccatores puniunt, uniuscujusque conscientia est, & memoria eorum, quæ in hac vita turpia commissa sunt: quæ tanquam vermis consumit, & sicut ignis incendit.* Huic pariter interpretationi favet S. Ambrosius lib. 7. in Lucam cap. 14. ubi sententiam suam illisdem pene verbis, quibus utitur Origenes aperit: *Ergo, inquit, neque corporalium stridor aliquis dentium, neque ignis aliquis perpetuus flammarum corporalium, neque vermis est corporalis; sed hæc ideo, quia sicut ex multa cruditate, & febres nascuntur, & vermes: ita si quis non decoquat peccata sua, velut quadam interposita sobrietate abstinentiæ; sed miscendo peccata peccatis tanquam cruditatem quandam contrabat veterum, & recentium, delictorum, igne aduretur proprio, & suis vermibus confuetur.*

Notandum 3. eam pariter Origeni adscri-

scribi erroneam sententiam, quod docuerit Demones, & Reproborum animas tandem aliquando ab omni pœna solvendas, & pristinam in sanctitatem restituendas, ut de ipso Origene affirmat Epiphanius Epistola quam adversus Origenem scripsit ad Joannem Hierosolymitanum, ubi ipsi Origeni adscribit, quod docuerit, *Diabolum id rursus futurum esse, quod fuerat, & ad eandem rediturum dignitatem, & consequens regna Cætorum.* Hieronym. item in *Epist. 51. ad Pammachium*, eundem Origenem ait existimasse, post multa sæcula, atque unam omnium restitutionem, idipsum fore Gabrielem, quod Diabolum, Paulum quod Caiapham, Virgines, quod prostitutas. Idem dogma Origeni adscripsit S. Augustinus libro de Hæresibus; ubi ait, *Sunt, & alia hujus Origenis dogmata, quæ Catholica Ecclesia omnino non recipit: In quibus nec ipsum falso arguit; nec potest ab ejus Defensoribus excusari, maxime de purgatione, & de liberatione, ac rursus post longum tempus ad eadem mala revolutione rationalis universæ creaturæ. Quis enim Catholicus Christianus, vel doctus, vel indoctus, non vehementer exhorreat eam, quam dicit purgationem malorum, id est etiam eos, qui hanc vitam in flagitiis, & facinoribus, & sacrilegiis, atque impietatibus quamlibet maximis finierunt; ipsum etiam postremo Diabolum, atque Angelos ejus; quamvis post longissima tempora purgatos, atque liberatos, regno Dei, lucique restitui: & rursus post longissima tempora omnes qui liberati sunt, ad hæc mala denuo relabi, & reverti: & has vias alternantes beatitudinem, & miserrimum rationalis creaturæ semper fuisse, semper fore.*

Hoc ipsum de Origene constat ex quinta Synodo, in qua damnati sunt Origenis errores, inter quos hic recensetur, quod diceret: *Omniū impiorum boninum, ipsorumque etiam Daemonum*

Toni. IV.

tormenta finem habitura: atque Impios, & Demones in priorem suum statum restitutum iri. Præterea Christum oportere pro Daemonibus crucifigi, & idipsum sæpius per futura sæcula perpeti à spiritibus nequitie, qui sunt in cælestibus.

Origeni videtur subscripsisse S. Gregorius Nyssenus lib. *Catechistico*, ubi incarnationis beneficia refereqs ait; *Hæc, & ejusmodi alia tradit magnum divinæ Incarnationis mysterium. Hoc enim ipso, quod cum humanitate mixtum est, per omnes naturæ proprietates generationem, & educationem, & incrementum, & ad mortis experimentum usque transiens omnia illa, quæ diximus, effecit; ut & hominem à malitia liberaret, & ipsummet inventorem malitiæ sanaret: Aegritudinis enim sanatio est morbi purgatio, tam etsi laboriosa sit. Idem lib. de Anima, & resurrectione significat, ubi expendens illa verba Epistolæ ad Philipp. In nomine Jesu omne genuflectatur: triplex distinguit genus ratione præditorum, nempe *Angelos, Homines, & Demones*; quos in humanæ naturæ detrimentum, & perniciem incumbere dicit, quam nempe Demonum naturam, *Quidam, inquit, ajunt Apostolum inter subterranea, & inferna numerare, id illo sermone significentem, quod vitiositate longis sæculorum anfractibus, & circuitionibus aliquando abolita, nihil extra bonum relinquitur, sed etiam Demones, concorditer dominationem Christi constabuntur.**

Accedere etiam videtur huic opinioni Ambrosius in *Psal. 118. Oïson. 20.* ubi docet, Diaboli æterna fore supplicia, ideoque pœnam illius post judicium, discerni, ut sempiterna sit; hominum verò, quia misericordia temperari, ac circumscribi supplicia debent, statim post obitum ordinari, & infligi. *Diabolus enim, inquit, & ministri ejus cum hominibus non flagellabuntur, separata est pœna ubi distat, & culpa.* Hinc, & divitem illum, qui Lazari opem implor-

X x

ra-

ravit evasurum aliquando putat: Verba illius hæc sunt: *Si hoc operatur humanum examen*, (ut iudicis misericordiam impetrent rei, ac relegatis non in perpetuum intercludatur reditus) quanto magis Christi iudicium est omnibus expectandum? Dissertur Diaboli iudicium, ut sit semper in pœnis reus; semper improbitatis suæ innexus cathena conscientie suæ, ut in perpetuum subeat ipse iudicium. Ideo dñes ille in Evangelio; licet peccator pœnālibus urgetur ærumnis, ut citius possit evadere: Diabolus autem nequaquam puniri ad iudicium demonstratur, nequaquam adhuc pœnis esse subiectus, nisi quas ipse tantorum conscius scelerum solvit timore perpetuo, ne aliquando sit securus. Certum est tamen hos S. Patres ab Origenis sententia esse alienos.

His ita prænotatis tria sunt in præsentī questione resolvenda. Primum, An omnes Dæmones statim post peccatum fuerint in Infernum detrusi. Secundum, An revera igne corporeo torqueantur. Tertium, An eorum pœna sit aliquando finiēda.

CONCLUSIO PRIMA.

Dæmones revera post suum peccatum in Infernum fuerunt detrusi, ac precipitati. Probatur primò ex Scriptura sacra, quæ apertis verbis declarat Dæmones omnes in Tartarum precipitatos esse. *Mayæ 14. Detrahit eam ad Inferos superbia tua.* Et infra, *Verumtamen ad Inferos detraberis usque ad profundum lacus.* Sic S. Petrus in Epistola Canonica 2. cap. 2. scribit: *Si enim Deus Angelis peccantibus non pepercit; sed rudentibus Inferni detractis in Tartarum tradidit cruciandos in iudicium reservari.* Cui S. Judas consonat in Canonica ver. 6. *Angelos verbò, ait, quia non servaverunt suum principatum, sed deliquerunt suum domicilium, in iudicium magni dñi, vineulis æternis sub caligine reservavit.* Quamquam autem S. August. in *Psal. 149.* Tartarum, &

Infernum à S. Petro nominatum, pro inferiori parte aeris accipi putet, non est tamen probabilis hæc interpretatio. Quippe Tartarus, & infernus, & caligo, perspicue inferos significant; quibus tamen sic addictos esse, & affixos Dæmones non puto, ut inde tanquam è carcere nunquam exeant; siquidem S. Apostolus Ephesiorum 2. Diabolum vocat, *Principem potestatis aeris huius*: Cui scilicet obsequuntur, & subiecti sunt Dæmones, qui in aere degunt.

Probatur hæc eadem veritas ex Concilio Florentino, ubi definitur: *Animas illorum, qui post baptismum susceptum nullam omnino peccati maculam incurrerant, eas etiam animas, quæ post contritiā peccati maculant, vel in suis corporibus, vel tisdem exules corporibus sunt purgate, in Cælum nulla mora recipi, & intueri clarè ipsum Deum Trinum, & Unum sicut est; meritum tamen diversitate alium alio perfectius: Illorum autem animas, qui in actuali mortali peccato, vel solo originali decedunt mox in Infernum descendere, pœnis tamen disparibus puniendas.* Quamquam autem de Dæmonibus ibi nihil definiat; tamen idem de ipsis, ac de Animabus sentiendum esse, ratio ipsa suadet: Tum quia Dæmones, qui sunt impugnatores hominum, sunt etiam eorum tortores; & ideo necesse est ut ad torquendum homines damnatos, quos vicerunt, sint in eodem loco. Tum quia illa pœna fuit à principio debita eorum superbiæ; ideoque à principio ad illam definitiva sententia fuerunt damnati: at in principio non fuit necessarium illam suspendi, vel differri; & ideo convenientius fuit, statim, ut sic dicam, in ejus possessionem mitteri, donec creatis hominibus propter eorum bonum, & propter alias rationes Providentiæ divinæ, licentiam inde exeundi acceperunt. Quia ergo præsentia Dæmonum in inferno est quasi ordinaria lex, & regula, ut sic dicam;

ab-

absentia verò est ex dispensatione, & propter extrinsecum finem; ideo per se credibile est infernum numquam spoliari Dæmonibus omnibus: sed in eo numero permitti exire, qui ad exercitium hominum sufficiat. Tum denique quia animæ damnatæ non sunt peioris conditionis, quàm Dæmones: sed illæ sine intermissione illam penam patiuntur: Ergo à fortiori Dæmones. Minor constat ex præfata definitione Concilii Florentini, necnon, & ex illo Job. 21. *Ducunt in bonis dies suos, & in puncto ad Inferna descendunt*: Et Luc. 16. *Mortuus est Dives, & sepultus est in Inferno*.

Insuper eadem ratio ultimi præmii, & pœnæ in Angelis intervenit; Sicut ergo sancti Angeli completam beatitudinem receperunt in termino viæ, à qua non recedunt, quando in hunc mundum veniunt, nisi solum quoad distantiam à loco cœlesti; ita omnino cum proportionem de Dæmonibus, & eorum pœna sentiendum est.

Hoc ipsum edocet S. Gregorius lib. 4. Dialog. cap. 29. dicens: *Si esse Sanctorum animas in Cælo sacri eloqui satisfactione credidisti; oportet ut per omnia esse credas, & iniquorum animas in Inferno, quia ex retributione æternæ iustitiæ, ex qua iusti iam gloriantur, necesse est per omnia, ut & iniusti eruantur. Nam sicut Elector beatitudo lætificat, ita credi necesse est, quod à die exitus sui, ignis Reprobos exurat. Quocirca vix concipere possum qualiter censeat lib. 4. Moral. cap. 10. Dæmones nondum in Tartarum fuisse præcipitatos, cum eadem de ipsis, ac de Reprobis animabus videatur esse ratio.*

Ut autem hæc sententia cum dictis SS. Patrum in primo. Notabili laudatorum concordet, censeferem dicendum, nec omnes prorsus Dæmones forè in inferorum claustris fuisse reſeratos, nec qui ibidem reclusi fuerunt, vinculis igneis perpetuo detineri; Sed eorum

plerosque in Tartarum fuisse deturbatos, reliquos in aere, & vicinisque locis stationem habere; cum vicissim mutare sedes, & qui in inferis erant illinc emergere; & ad inferos, terræ, aerisque penetrare incolas; atque ultro citroque commeari; uti docuit Eusebius lib. 7. de præparatione Evangelicæ, ubi declarat Angelorum multitudinem supra terram constituisse: plerosque autem in ima detruſos esse Tartara: *Innumerabile est, inquit, aliud genus illi subiectum, iisdem delictis obnoxium: quod propter impietatem à piorum sorte cecidens, splendens, ac diviniore, quo dudum circumdatum erat, ornatu, & honoris gradu, quem in regio Palatio sortitum erat quum inter beatos Angelorum eboros degebat, consentaneum impiis domicilium, & Tartari habitationem, quam abyssum divina Scriptura nominant, ac tenebras nequaquam noſtrarum similes, sed cuiusmodi sacra litteræ significant, permutare compulsum est iusto magnæ Dei iudicio, ac sententia, quorum per exigua particula ad Athletarum pietatis exercitium, circa terram, & sublimarem aerem reſiſta, superſtitioſi illius erroris, qui Deorum multitudinem aſciſcit, nec ab omnimoda Divinitatis ignoratione, contemptuque diſcrepat, eandem hominibus attulit.* Hoc ipsum cauſaderi poteſt ex illo Lucæ 8. ubi Dæmones rogabant Christum, ne imperaret illis, ut in abyssum irent; exinde namque liquet, quod Dæmones aliqui è corporibus humanis ejecti, Tartarum non reperiunt nisi divino mandato urgeantur.

CONCLUSIO SECUNDA.

Dæmones igne vero, & corporeo in Inferno cruciantur: Non physice, sed intentionaliter, ita Dæmonis intellectum detinendo, & afficiendo, ut ad alia objecta pro suo arbitrio non possit ipsum convertere.

Hæc conclusio duas habet partes, quarum probatur prima. Illud maximè asserendum est, quod Scriptura sacra

disertè indicat, & SS. Patres constanter affirmant: sed Scriptura sacra sæpe pronuntiat homines, & Dæmones damnatos igne cruciari, & ita frequenter hoc repetit, ut metaphoricè non videantur accipienda: Ergo fatendum est, eos torqueri igne corporeo. Probatur minor, variis ejusdem Scripturæ textibus, maxime ex illo Deut. 22. *Ignis succensus est in furore meo, & ardebit usque ad Inferni novissima; Et Judith 16. Dominus omnipotens vindicabit in eis, in die iudicii visitabit illos; dabit enim ignem, & vermes in carnes eorum.* Psal. 10. *Pluet super peccatores laqueos ignis, & sulfus, & spiritus procellarum pars calicis eorum.* Ecclesiast. 7. *Vindicta carnis impii ignis, & vermis.* Et cap. 21. *Stupra collecta Synagoga peccantium, & consumatio illorum flamma ignis.*

Idem constat ex Novo Testamento. Sic Matth. 3. *Omnis arbor quæ non facit fructum bonum excidetur, & in ignem mittetur.* Et idem 5. 14. & 18. infernus, Gehenna ignis vocatur, & damnati dicuntur mitti in ignem æterni. Marc. 9. *In ignem inextinguibilem, ubi vermis eorum non moritur, &c.* Tam constans autem modus loquendi Scripturæ solùm metaphoricum sensum non redoleret; nam juxta regulam à S. August. traditam, lib. 3. de Doctrina Christiana cap. 10. Scriptura sacra ad litteram est accipienda, quoties literalis sensus, nec ullam contradictionem, nec absurditatem aliquam præsefert, quæ regula maxime locum habet, quando usus est frequens, & uniformis, & quando proprius sensus non solùm inconueniens non habet, sed etiam ad bonos mores utilior est: utrumque autem in præsentis reperitur.

Idem constanter docent SS. PP. In primis sanctus Cyprianus lib. de laudibus Martyrii cap. 12. ubi Infernum sic eleganter describit: *Sevens locus cui gehenna nomen est, magnus plangentium murmure, & gemitu, & eruantibus*

flammis per horrendam spissa caliginis noctem sæva semper incendia camini fumantis expirat, globus ignium arbutus obstruitur, & in varios pæne exitus relaxatur. Tunc seviendi plurima genera, tum in seipso convolvit, quidquid ardoris emissæ edax flamma cruciavit ora. Idem serm. de Ascensione Domini, In corruptibiles flammæ, ait, nudum corpus allambent: ardebit purpuratus dives. . . In proprio adipe fixæ libidines bullient, & inter sartagine, & flammis miserabilia corpora cremabuntur.

Hanc veritatem disertè expendit S. Augustinus. lib. 21. de Civit. cap. 10. ubi cum inquisivisset, quod si ignis Inferni non sit spiritualis, qualiter in eo possunt Dæmones cruciari: Si verò non sit corporeus, quomodo hominum corpora torquere poterit, idem quippe ignis erit supplicio hominum attributus, & Dæmonum, dicente Christo Matth. 25. *Discedite à me maledicti in ignem æternum, qui paratus est Diabolo, & Angelis ejus;* ita respondet, *Nisi quia sunt quædam sua etiam Dæmonibus corpora, sicut doctis hominibus visum est, ex isto aere crasso, atque humido, cuius impulsus vento flante sentitur. Quod genus elementi si nihil igne perpeti possit, non ureret servescit in balneis: ut enim urat, prius utitur, facitque quod patitur. Verum licet incorporei sint Dæmones, nihilominus ab igne affici, cruciarique mox asserit. Si autem quicquam nulla habere corpora Dæmones asseverat, non est de hac re aut laborandum operosa inquisitione, aut contentiosa disputatione certandum. Cur enim non dicamus, quamvis miris, tamen veris modis etiam spiritus incorporeos posse pæna corporalis ignis affici, si spiritus hominum etiam ipsi proscisso incorporei, & nunc potuerunt includi corporalibus membris, & tunc poterunt corporum suorum vinculis insolubiliter alligari? Adhærebunt ergo, si nulla sunt eis corpora spiritus Dæmonum; imò spiritus De-*

Dæmones, licet incorporei, corporeis ignibus cruciandi: Non ut ignes ipsi, quibus adhererent, eorum junctura inspirentur; & animalia fiant, quæ consent spiritui, & corpore: sed ut dixi, miris, & ineffabilibus modis adherendo, accipientes ex ignibus pœnam, non dantes ignibus vitam.

Eandem veritatem luculenter explicat S. Gregorius lib. 4. Dialog. cap. 28. ubi sic inquit: *Sicut Electos beatitudo latificat, ita erudi necesse est, quod à diæ exitus sui, ignis Reprobos exurat.* Petrus verò discipulus interrogat; *Et quæ ratione credendum est, quod rem incorpoream tenere ignis corporeus possit?* quod capite 29. prosequitur, & tandem disertè interrogat, *An ignis Inferni corporeus sit?* & respondet Gregorius, *corporeum esse non ambigo.*

Secundam verò nostræ conclusionis partem, quod ignis ille non realiter, sed intentionaliter Dæmones cruciet, idem Greg. ibidem edocet. Petro enim sciscitanti, *Quomodo rem incorpoream tenere ignis corporeus possit?* in hunc modum occurrit: *Si viventis hominis incorporeus spiritus tenetur in corpore, cur non post mortem, cum incorporeus sit spiritus, etiam corporeo igne teneatur?* Deinde cujusmodi sit ea pœna, declarat. *Teneri autem spiritum per ignem dicimus, ut tormento ignis, videntis, atque sentiendo puniatur. Ignem namque eo ipso patitur, quod videt; & quia cremari se aspicit, crematur. Sicque fit, ut res corporea incorpoream exurit, tum ex igne visibili ardor, ac dolor invisibilis trahitur, ut per ignem corporeum, mens incorporea etiam incorporea flamma crucietur. Quamvis colligere ex dictis Evangelicis possumus, quia incendium anima non solum videntis, sed etiam experiendo patitur.*

Qualiter autem hæc pœna ab igne corporeo spiritibus inferatur, docet Doctor in 4. dist. 43. quæst. 2. ubi supponens num. 5. quod secundum S. Aug.

14. de Civit. cap. 15. *Dolor carnis tantummodo est offensus animæ ex carne, & quædam ab ejus possessione dissensio, sicut animæ dolor, qui nuncupatur tristitia, est ab his rebus, quæ nobis nolentibus accidunt.* Ex hoc, inquit Doctor, apparet quod dolor est passio consequens apprehensionem sensitivam, & in appetitu sensitivo: Tristitia autem est propriè in appetitu intellectivo, aut in voluntate, & consequens apprehensionem eventus aliquis objecti noliti. Deinde declarat num. 7. quod ignis Inferni est objectum disconveniens Dæmonibus, idque dupliciter. *Primo*, ut detineat spiritum definitivè. *Secundo*, ut immutans objectivè, & utroque modo cruciat Dæmones: *Primo* quidem; quia nolunt detineri ab igne, & ad istud nolle, inquit Doctor, inclinatur affectio commodi secundum quam appetit liberum usum potentie; ut sicut natura sua est indifferens ad quodcumque corpus; sic posset se facere præsentem cuicumque corpori. Promovet autem superbia propter quam appetit uti propria potestate: consummat invidia propter quam nunquam vellet determinatè esse propter sententiam, vel actionem divinam. Istud nolle præcedit detentio, & apprehensio detentionis: Isto autem nolle licet inordinatè posito in voluntate ejus, sequitur apprehensio certa de eventu istius noliti: & ex hoc tertio, vel quinto computato ista duo quæ præcedunt nolle, sequitur tristitia.

Observat deinde, quod ignis Angelum non detinet, nec effectivè, nec formaliter per se. *Non quidem effectivè*, quia, inquit, nullus locus corporeus detinere potest spiritum; quia quod non locat effectivè, nec impedit ipsum moveri, neque effectivè ipsum detinet: *Non etiam formaliter* necessariò; spiritus enim corpore solutus, à nul-

„ à nullo corporeo loco clauditur, &
 „ ambitur; Cum enim materiæ, ac
 „ quantitatis sit expertus, nullam habet
 „ ambientem superficiem, nec conse-
 „ quenter formalem locum. Sed tan-
 „ tum detinetur formaliter ab ipso
 „ igne secundum ordinationem divi-
 „ nam, ita quod Deus effectivè ipsum
 „ Dæmonem in igne, velut in carcere
 „ detineat; ignis autem ex Dei ordi-
 „ natione ipsum, ut carcer detineat, &
 „ alligat; ita ut ab eo exire nequeat.
 „ Unde summè tristatur; non enim
 „ tantum odit detentionem activam
 „ Dei, & suam passivam à Deo: sed
 „ etiam, inquit Doctor, num. 9. odit
 „ detentionem formalem perpetuam
 „ ab illo igne: & per consequens de
 „ illa detentione formali tristatur.
 „ Cum autem tristiari, sit formaliter
 „ cruciari, sequitur quod ignis ut for-
 „ maliter detineat Diabolum, etiam
 „ aliquatenus effectivè ipsum cruciet.
 „ Nec refert, quod ipsum non detineat
 „ effectivè: Inde namque non sequitur,
 „ quod non possit ipsum etiam effecti-
 „ vè cruciare; quia ut detineat forma-
 „ liter, est objectum nolitum, & ap-
 „ prehensum, ut disconveniens; Ob-
 „ jectum autem nolitum effectivè in-
 „ fert tristitiam.

Idipsum docet S. Thomas quæst. de
 anima art. 21. *Qualibet*, inquit, *spiri-*
tualis substantia quantum est de sua na-
tura, non est alligata alicui loco; sed
transcendit totum ordinem corporalium;
Quod ergo alligetur alicui, & determi-
natur ad aliquem locum per quandam
necessitatem, est contra ejus naturam, &
contrarium appetitui naturali.

Deinde docet Doctor num. 11. quo-
 modo etiam intellectus Angeli perpe-
 tuo determinetur ab igne objectivè, &
 ut sic ipsum etiam Dæmonem cruciet.
 „ *Primò* namque, inquit, intellectus
 „ Angeli determinatur perpetuò ad
 „ intensè considerandum ignem in ra-
 „ tione objecti. *Secundò*, apprehendit

„ istam determinationem ad talem
 „ considerationem. *Tertiò*, odit, &
 „ sicut prius istud odium oritur ex af-
 „ fectione commodi, ex qua vult quod-
 „ cumque objectum, prout sibi dele-
 „ tabile fuerit, considerare nunc hoc,
 „ & nunc illud: & promovetur ex su-
 „ perbia, ex qua vult uti intellectiva
 „ sua secundum imperium voluntatis
 „ propriæ: & consummatur ex invidi-
 „ dia, propter quam odit determinari
 „ à Deo ad aliquam considerationem
 „ unicam. *Quartò*, sequitur apprehen-
 „ sio, non tantum nuda istius conside-
 „ rationis, sicut in secundo, sed ap-
 „ prehensio certa de eventu istius con-
 „ siderationis intensæ, & perpetuæ.
 „ *Quintò* ex hoc sequitur tristitia.

Et si quæras, inquit Doctor, quo-
 modo illa possit competere igni, cum
 nullum corpus possit intelligentiam
 spiritus ita efficaciter movere, quin
 ipsa intelligentia, & operatio intel-
 lectus subit voluntati ipsius spiritus,
 ut pro libito eam ab objecto discon-
 venienti revocet, & ad aliud con-
 vertat? *Respondet*, quod istud non
 convenit igni virtute propria, quia
 tota virtute activa ignis posita, An-
 gelus ibi dimissus, posset ignem, vel
 aliud corpus indifferenter considera-
 re pro imperio voluntatis suæ. Ideo
 necessum est, quod illa detentio in
 consideratione ignis intensæ, & per-
 petua, & contra voluntatem An-
 geli, sit effectivè à Deo principaliter,
 & ab igne activè quidem, sed minus
 principaliter. Quemadmodum enim
 intellectus agens, & phantasma se
 habent ad movendum intellectum
 passibilem in nobis: ita Deus se ha-
 bens ad modum intellectus agentis,
 & ignis ad modum phantasmatis,
 movent efficacissime intellectum
 passibilem Angeli, contra volunta-
 tem ejus. Nec obstat, inquit Doctor,
 quod principale agens, & instrumen-
 tum non sunt hic in eodem supposi-
 to,

„to, sicut intellectus agens, & phantasma sunt in eodem homine. Hoc, inquit, non obstat; quia ordo agentium illorum non requirit identitatem suppositi.

Ex his infert Doctor *num. 13.* quod multò gravius, & acerbius cruciuntur Dæmones per illam perpetuam detentionem suæ intelligentiæ in intensâ consideratione ignis, quàm per detentionem formalem sui localiter ab igne. Quia, inquit, longè liberiores sunt Angeli secundum suam intelligendi virtutem, quàm circa vim sui motivam; siquidem pro imperio voluntatis suæ circa quodcumque objectum occupari deberet eorum intellectus, juxta exigentiam perfectionis suæ naturæ, quod certè longè nobilior est in ipsis perfectio, quàm sit ea qua pro libito ex natura sua locum mutare possunt. Illa autem detentio in consideratione intensissima ignis, impedit primam libertatem; ita namque per eam detinetur intellectus in consideratione illius ignis vindicis, ut nullatenus considerare possit alia objecta: detentio autem localis ab igne solum impedit liberum usum potentiæ motivæ, ut non possit se præsentem sistere cuicumque corpori; ex quo sequitur, quod multo major erit tristitia ex detentione illa objectiva, quàm locali; quia ubi est major nolitio, & æque certa apprehensio de eventu, sequitur major tristitia. *Adde*, quod ignis objectivè detineus intellectum Angelum, magis effectivè ipsum cruciat, quàm quatenus ipsum detinet localiter: nam ut detinens localiter, tantum affligit Dæmonem effectivè quatenus est objectum nolitum: ut vero ipsum detinet objectivè, causat effectivè primam apprehensionem ad quam determinatur intellectus, quæ est nolitio: & ita hæc ultima detentio habet quasi duplicem actionem in intellectum Dæmonis; prior vero ha-

bet tantum simplicem, & unicam.

Dicit: Per id Dæmones formaliter, & effectivè cruciantur, per quod inæqualiter torquentur: sed non torquentur inæqualiter per illam detentionem localem, aut objectivam: Ergo, &c. Major constat, & eam apertè tradit S. Aug. 11. de Civit. c. 10. *Nequaquam*, inquit, *negandum est ipsum æternum ignem aliis leviorē, aliis futurum esse graviorem; sive ipsius ardor pro pœna digna cujuscumque varietur, sive equaliter ipse ardeat, sed non equali molestia sentiat*. Deinde, si ignis tantum, intelligibiliter suam impressionem in Dæmones faciat, tantum abest, ut eos cruciet, imò ipsos delectat; illa namque impressio conveniens est potentiæ intellectivæ. *Denique*, si Dæmon non nolit, vel non odiat sic detineri, aut ab objecto sic immutari, non tristabitur: sed in potestate ejus est non nolle: Ergo in potestate ejus erit etiam non cruciari. *Adde* quod æquè posset affligi in lapide, in Sole, vel in Cælo Empyreo, si ab ipsis definitivè detineretur, & mutaretur objectivè.

Respondet Doctor ad primum, negando minorem: & ad ejus probationem dicit, quod detentio formalis Dæmonum ab igne, est quidem æqualis, sed ipsorum nolle non est æquale: imò longè intensior est illa nolitio in his, qui magis peccaverunt, & ideo longè major est in eis tristitia. *Ad secundum* dicit, quod non sit in potestate Dæmonum hanc nolitioem non habere; quippe illa continuatur per causam superiorem agentem, & eos ita perpetuò in igne alligantem, ac eorum intellectum in ignis consideratione detinentem. Unde sequitur, quod non possit aliquis Dæmonum remissius aliquando nolle, quàm modo nolit; quia sicut non est in potestate ejus actus; ita nec modus actus: & sicut causa superior uniformiter agit ad illud nolle producendum cum voluntate Dæmonis, ita, quod

quòd hæc non poſſit aliter operari; ſic etiam uniformiter agit ad intenſionem huius nolle, ita, quod non poſſit remiſſius aliquid nolle.

Quòd ſi dixeris, inquit Doctòr, quòd prima illa apprehenſio ignis ab intellectu Dæmonis ſaltem in primo inſtanti cauſabat ipſi in eo delectationem. *Reſpondet*, id dici non poſſe, quia eodem inſtanti, quo intellectus Dæmonis ignem apprehendit, concepit triſtitiã vehementem, quæ omne gaudium non tantum contrarium, ſed, & omnino impertinens excludit.

Si urgeas, dicendo, quòd cauſa delectationis eſt prior naturaliter quàm cauſa triſtitiæ.

Reſpondet, quòd in habentibus tantum ordinem naturæ, & quæ ſimul tempore exiſtunt, efficacius excludit minus efficax, licet efficacius ſit poſterius natura: Nec mirum, inquit, quia impediens ſive prohibens aliquando eſt poſterior naturaliter; agens tamen primum impeditur per contra actionem ejus, ſe enim generatio uniùs eſt corruptio alterius. Ita Doctòr.

Inſtabis: Si tota Dæmonum pœna in detentione tum formali, tum objectiva conſiſteret, ſequeretur, quòd Dæmones ab inferno exeuntes, & per aera aut terram volitantes, non torquerentur; ſiquidem ab ipſo infernali igne nec formaliter, nec objectivè ſic detinerentur: ſed falſum conſequens; Ergo, & antecedens.

Nego majorem, nam, ut inquit Rupertus lib. 4. de victòria Verbi Dei, quocumque ſe vertat Diabolus, ſecum deſert cruciativum ignem. *Sciendum*, inquit, interea, quia quocumque ſe vertat, pœnam ſuam ſecum portat, & plaga ignis ignitorum lapidum, quæ ſemel eſt fulminatus, intrinſecus in ipſo perſeverat. Hæc ejus pœna ex illis Domini dictis ad beatum Job, ſalvo ſacraſiore intellectu; valet intelligi. De ore ejus lampades procedunt, ſicut tædæ ignis accenſæ;

denariis ejus procedit ſumus, ſicut olæ ſuccenſæ: atque ſervens balitus ejus prunas ardere facit, & flamma de ore ejus egreditur. Idipſum ſupra diſertè explicabat S. Auguſtinus lib. 22. de civit. cap. 10. ubi cum dixiſſet, Si ſpiritus hominum, etiam ipſi proſectio incorporei, & nunc poſuerunt includi corporalibus membris, & tunc poterunt corporum ſuorum vinculis inſolubiter alligari: concludit, Adhærebunt ergo, ſi nulla ſunt eis corpora, ſpiritus Dæmonum, imò ſpiritus Dæmones, licet incorporei, corporeis ignibus cruciandi.

Hoc ipſum egregiè explicat Beda in Comment. ad caput 3. Epistolæ Jacobi. Ubicumque, inquit, vel in aere volitant, vel in terris, aut ſub terris vagantur, ſive detinentur, ſuarum ſecum ſerunt ſemper tormenta flammarum; inſtar ſtribitantis, qui eſt in lectis eburneis, & ſi in locis ponatur aprieis fervorem tamen, vel frigus inſit ſibi languoris evitare non poſſet. Sic ergo Dæmones, eſt in templis colantur auratis: & ſi per aera ſua diſcurrant, igne ſemper ardent gebennali: & ex ipſa ſua pœna commoniti, deceptis quoque hominibus ſomitẽm vitiatorum, unde, & ipſi pereant, invidendo ſuggerunt.

Obijeis autem contra primam partem, nempe, quòd Dæmones torqueantur igne reali, & corporeo; Primò quidem varios Scripturæ textus, quibus ſignificatur ignem, quo Dæmones cruciantur, non realiter, & propriè, ſed metaphorice eſſe accipiendum. Quod utique ſuadetur, primò ex illo Luc. 16. ubi Dives ille, qui dicebat crucior in hac flamma, poſt modum dicitur elevaſſe oculos ſuos, & viſiſſe Abraham à longè, eique dixiſſe, Mitte Lazarum, ut intingat digitum ſuum in aquam, & refrigeret linguam meam: Sed manifeſtum eſt, quod oculi, digitus, & lingua, non niſi per metaphoram animabus tribuantur; Ergo pari modò flamma illa in qua cruciantur, etiam metaphorice debet

debet accipi. *Secundò*, idem suadetur ex illo Job. 24. *Ad nimium calorem transeat ab aquis nivium, & usque ad inferos peccator illius*: Sed si hæc intelligantur de frigore peccatorum hujus vitæ ad calorem pœnarum inferni; si de visciditudine pœnarum in ipso inferno, semper illæ aquæ nivium metaphorice accipiuntur: Ergo pari ratione ignis tantum est metaphorice dicendus. *Denique*; Eo modo ignis damnatos torquere accipiendus est, quomodo vermes eos corrodescentes: Sed vermes in inferno sunt tantum metaphorice, nempe stimuli illi conscientiæ quibus pungitur, & veluti corroditur damnatorum animus: Ergo, &c. Major patet, nam Scriptura sacra eodem modo de igne ac de vermibus loquitur, sic *Isaya 66. Vermis eorum non morietur, & ignis eorum non extinguetur*: quæ verba de pœnis damnatorum interpretatus est Christus Dominus dicens: *bonum est ibi debilem introire in vitam, quam duos pedes habentem mitti in gehennam, in ignem inextinguibilem, ubi vermis eorum non moritur, & ignis non extinguitur*: Pari ergo ratione ignis, & vermis sunt accipiendi, adeoque cum vermibus tantum metaphorice usurpetur, etiam, & ignis tantum metaphorice accipiendus est.

Nego has omnes consequentias; & ad primum textum dico, quod quamvis in ea Divitis narratione, siue historica, siue parabolica, plura sint metaphorice accipienda, tamen non constat, quod ignis ibi commemoratus, sit etiam metaphorice accipiendus; cum aliunde constet Scripturam sacram constanter asserere ignem esse in inferno; sufficienterque etiam patcat, non nisi metaphorice oculos, manus, & linguam separatis animabus posse tribui: Unde non idem de flamma in qua cruciabatur dives ille, ac de cæteris ferendum est iudicium. *Ad secundum autem dico*, dubium esse an sicut ignis, ita, & nix aut aqua frigida torquens sit in inferno:

Tom. IV.

sunt enim plurimi Authores, qui putant utrumque reverà in inferno existere, ut ex alternante frigoris, & caloris cruciatu acerbis damnati torqueantur, ut in primis docet S. Hieronymus in *caput 10. Matthæi* ex præfatis verbis *Job*, ubi explicando nomen gehennæ, concludit: *Duplicem autem esse gehennam, nimis ignis, & frigoris in Job plenissime legitur*. Et in illud Matthæi 22. *Ibi erit fletus, & stridor dentium*, addit, *Ut stridor dentium de rigore frigoris oriatur*. Idem sentiunt Beda in dictum locum *Job*, & Hugo victorinus *lib. 4. de anima cap. 13*.

Nihilominus præfata sententia prorsus est incerta, imò minùs videtur in Scriptura fundata: Tum quia Christus Dominus pœnam ignis perpetuam, & irremissibilem, & quasi unicam expressè comminatur; de alia verò pœna nivium, & aquarum, ne verbum quidem dicit. Tum quia si pœna frigoris esset in inferno, Dives ille non postulasset guttam aquæ, quæ cruciatum ignis mitigaret, siquidem pœnam aquæ seu frigoris sustinens, expertus fuisset ex ea nullum refrigerium posse accipi. Tum quia *Zacharie 9. dicitur, Eduxisti eos de lacu in quo non erat aqua*: Nam lacus illa locus est inferni, qui carere aqua dicitur; & consequenter nive, ac grandine. Tum denique quia præfatus ille Jobi contextus alium potest habere sensum: nam S. Gregorius *lib. 16. Mor. cap. 27. per aquas nivium, & calorem nivium, non pœnas, sed culpas præfatis vitæ intelligit quia peccatores de quibusdam vitiis ad alia extremè contraria feruntur, ut ab infidelitate gentium ad errores hæreticorum, vel à rigore avaritiæ, circa subsidium pauperum ad nimium calorem prodigalitatis in vanos, vel luxuriosos sumptus. Postest etiam dici, quod illis verbis Job, pœnas hujus vitæ impræcetur peccatori; nam versu proximè præcedenti, de peccatore dixerat: *Maledicta sit pars**

Y y ejus

ejus in terra, nec ambulet per viam vinearum: quibus verbis imprecatur sterilitatem terræ, & carentiam omnis solatii ac refrigerii; unde cum statim adjungat, *Ad nimium calorem transeat ab aquis nivium*, significat se optare, ut peccator non inveniat in hac vita refrigerium, sed ab una miseria ad alteram extremam transeat. Vel etiam posset ita exponi, ut ab aquis nivium peccatorum ad nimium calorem futurum in inferno transeat.

Ad tertium autem respondeo, non idem dicendum de vermibus ac de igne; Tum quia Christus singulariter, & quasi per antonomasiam de igne dixit, *qui paratus est Diabolo, & Angelis ejus*, tum quia de ignis veritate, & proprietate est communis sanctorum Patrum sententia. Tum denique quia sufficienter apparet, quod vermes non possint rodere spiritum, nec ejus substantiam laniare; quia ille dolor non causatur à vivente, nisi per actionem vitalem ipsius vermis, qui aliquid de substantia alterius subtrahit, cujus subtractionis, & quasi divisionis non est capax substantia spiritalis, & consequenter repugnat vermem talem actionem circa spiritum exercere. Et in hoc est magnum discrimen inter ignem, & vermem; quia ignis agit actione merè extrinseca, & immittendo qualitates, vel aliquid ejusmodi; non subtrahendo nec dividendo substantiam, & ideo non est necessaria metaphora, quæ in verme respectu Dæmonis, vel animæ separatæ necessaria est.

Non abnuo tamen reverà in inferno materiales ac viventes esse illos vermes voraces, qui hominum damnatorum corpora perpetuò corrodam: sic enim ad litteram interpretamur illud Isayæ dictum cap. 66. ubi cum Deus dixisset; *Videbunt cadavera virorum, qui prævaricati sunt in me*, statim subdit, *Vermis eorum non morietur*, quasi diceret, vermes victuros semper, & insatiabili

morfu damnatorum cadavera corrofur. Similia sunt illa verba Iudith. 16. *Dabit ignem, & vermes in carnes eorum.* Unde S. Maximus Epistola ad Cubicularium de reprobis ait, quod homines ad sinistram locati ignem æternum sortientur, ac tenebras exteriores ac vigilem vermem, & fridorem dentium.

Dices secundò: Sanctus Aug. lib. 12. de civit. Dei cap. 10. inducens pro veritate ignis inferni verba illa Divitis, *erucior in hac flamma*; ait, *Dicerem utique flammam illam esse corpoream, nisi congruenter responderi posset, totum esse illam flammam, quales oculi, qualis lingua, qualis digitus, ubi erant sine corporibus animæ.* Unde concludit, *Sic ergo incorporalis est illa flamma quæ exarsit, & illa guttula quam poposcit, qualia etiam sunt visa dormientium, sive in extasi cernentium res incorporeales habentes tamen similitudinem corporum.* Ergo censet S. Augustinus ignem illum non esse reverà corporeum.

Negò consequentiam, præfatis enim in objectione verbis, dubius quidem videtur; nihilominus statim suam mentem aperiens ait, *At verò gehenna illa, quod etiam STAGNUM IGNIS, ET FULGURIS dictum est. Apoc. 20. corporeus ignis erit, & cruciabit corpora damnatorum, aut hominum, & Dæmonum; solida hominum, aerea Dæmonum, aut tantum hominum corpora cum spiritibus; Dæmones autem spiritus sine corporibus hærentes, sumendo penam, non impertiendo vitam corporalibus ignibus: unus quippe utriusque ignis erit, sicut veritas dixit.* Adde quod quamquam S. Augustinus hic anceps videretur, alibi tamen constanter affirmat ignem gehennæ esse corporeum, maximè verò serm. 181. de tempore &c.

Dices tertio: Ignis corporeus vel nullo modò, vel non nisi maximò miraculo potest spiritus cruciari: sed miracula non sunt affirmanda nisi vel evidenter pateant in Scriptura, vel aliente

cer-

certò consent: apertè autem non constat, nec ex Scriptura, nec aliunde, ignem illum esse corporeum: ergo talis non est affirmandus.

Respondeo concessa majore, negando minorem: ad id enim affirmandum, videlicet ignem inferni esse corporeum, nos inducit non solum divina Scripturæ sacræ autoritas, per Ecclesiam, ejusque Doctores sufficienter proposita: sed etiam sanctorum Patrum, ac communis Theologorum sententia, quâ constat ignem inferni reverà corporeum esse, & Dæmones, licet omnino spirituales, illo verè ac realiter cruciari, vel physicè, ut volunt Thomistæ, vel quod verius apparet, solum intentionaliter, ut supra cum Doctore subtili docuimus.

CONCLUSIO TERTIA.

DÆMONUM supplicia nullum unquam finem habebunt. Hæc est de fide, & evidenter colligitur ex Scriptura sacra, quæ quoties damnatorum pœnas commemorat, toties illas æternas fore significat. Sic Matth. 25. *Discedite maledicti in ignem æternum, qui paratus est Diabolo, & Angelis ejus.* Et infra subdit, *Ibunt hi in supplicium æternum, isti autem in vitam æternam.* Sic Danielis 12. cap. *Et multi, inquit, qui dormiunt in terra pulvere evigilabunt, alii in vitam æternam, alii in opprobrium, ut videant semper.* Innumeri sunt ejusmodi textus, qui damnatorum pœnas æternas, sicut, & beatorum perpetuam felicitatem declarant. Nec valet dicere ignem fore æternum non verò combustionem æternam, inquit S. Aug. lib. de fide cap. 15. *Neque illud dici hic potest, in quo nonnulli scipso seducunt, ignem æternum dictum, non ipsam combustionem æternam.* Per ignem quippe, qui æternus erit, transiuros arbitrantur eos quibz propter fidem mortuam per ignem promittunt salutem: ut videlicet ipse ignis æternus sit; combustio vero eorum, hoc est operatio ignis,

non sit in eos æterna: Cum, & hoc prævidens Dominus sententiam suam conclusit ita dicens: SIC IBUNT ILLI IN COMBUSTIONEM ÆTERNAM: JUSTI AUTEM IN VITAM ÆTERNAM: erit ergo æterna combustio sicut ignis.

Hinc S. Fulgentius lib. de fide ad Petrum cap. 43. *Firmissime, inquit, tene, & nullatenus dubites, ex ore Dei justis æternique judicis sempiterna atque incommutabili prolata sententia, iniquos omnes ituros in combustionem æternam; justos autem in vitam æternam: iniquos semper arduos cum Diabolo; justos autem regnaturus sine fine cum Christo.* Eadem est cæterorum SS. PP. de perpetuitate pœnarum sententia. Sic Irenæus lib. 4. cap. 67. *Quibuscumque, inquit, dixerit Dominus, DISCEDITE A ME MALEDICTI IN IGNEM ÆTERNUM, isti erunt semper damnati: & quibuscumque dixerit, VENITE BENEDICTI PATRIS MEI, PERCIPITE HEREDITATEM REGNI, QUOD PRÆPARATUM EST VOBIS IN SEMPERITERNUM, hi semper percipient regnum, & in eo proficient semper.*

Sic S. Clemens Romanus à S. Damasceno cicitatus in *Eglogis*, impiarum animarum sempiternas pœnas ita prædicat. *Immortales, inquit, omnes animæ sunt, & impiorum, quibus melius foret non incorruptibiles esse. Nam pœnâ sempiternâ ab inextinguibili igne puniuntur, neque morientes, magno suo malo nullum finem obtinere possunt.* Eandem veritatem diserte explicat S. Hylarius Canone 5. in Matth. *Igitur, inquit, requies nulla gentibus, neque mortis, ut volunt, compendio quies dabitur; sed corporalis, & ipsi æternitatis destinabitur ut ignis æterni sit in ipsi æterna materiet, & in universis sempiternis exerceatur ultio sempiterna.* Si igitur Gentibus, ideirco tantum indulgetur æternitas corporalis, ut mox igni judicii destinentur; quam prophanum est Sanctos de gloria æternitatis abigere, cum iniquis æternitatis opus præstetur ad pœnam?

Inferorum autem cruciatus tam in puniendo Diabolo, & Dæmonibus, quam hominibus, sempiternos fore, eleganter testatur Minutius Fælix his verbis: *Nec tormentis, aut modus ullus, aut terminus. Illic sapiens ignis membra urit, & reficit, carpit, & nutrit. Sicut ignes fulminum corpora tangunt nec absumunt; sicut ignes Ætne, & Vesuvij montis, & ardentium ubique terrarum flagrant, nec erogantur; Ita pœnale illud incendium non damni ardentium pascitur, sed inextensa corporum laceratione nutritur.*

Dices: Non videtur justum, ut pro peccatis quantumlibet magnis parvo scilicet tempore perpetratis, pœnâ quisque damnetur æternâ: gravitas enim supplicij peccatorum gravitati respondere debet: sed peccatum temporaneum vit, imo, & momentaneum: ergo non perpetua debet esse illius pœna.

Nego majorem: nam, inquit, S. Aug. lib. 21. de civit. Dei, nulla unquam justitia nec lex decrevit, ut tanta morâ temporis quisque puniatur, quanta mora unde puniretur admisit. Oïto, inquit, genera pœnarum in legibus esse scribit Tullius, DAMNUM, VINCULA, VERBERA, TALIONEM, IGNOMINIAM, EXILIUM, MORTEM, SERVITUTEM. Quid horum est, quod in breve tempus pro cuiusque peccati celeritate coarctetur, ut tanta vindicetur morula, quanta deprehenditur perpetratum, nisi forte talio? id enim agit, ut hoc patiatur quisque, quod fecit. Unde illud est legis: Oculum pro oculo, DENTEM PRO DENTE. Fieri enim potest, ut tam brevi tempore quisque amittat oculum severitate vindictæ, quàm tulit ipse alteri improbitate peccati.

Porro autem si alienæ semina osculum infixim rationis sit verberare vindicare, nonne qui illud puncto temporis fecerit, incomparabili horarum spatio verberatur, & suavis voluptatis exiguae diuturno dolore punitur? Quid in vinculis; numquid ibi tamdiu quisque judi-

candus est esse debere, quandiu fecit unde meruit alligari, cum justissime annosas pœnas servus in compediibus pendeat, qui verbo aut ibi celerime transeunt, vel lacessivit dominum vel plagavit? Iam vero damnum, ignominia, exilium, & servitus cum plerumque sic insiguntur, ut nulla venia relaxentur, nonne pro hujus vitæ modo similia pœnis videntur æternis? Ideo quippe æterna esse non possunt, quia nec ipsa vitæ, quæ his plebitur, porrigitur in æternum; & tamen peccata quæ vindicantur longissimi temporis pœnis, brevissimo tempore perpetrantur; nec quisquam extitit qui censuerit tam cito nocentium finienda esse tormenta, quàm citò factum est, vel homicidium, vel adulterium, vel sacrilegium, vel quodlibet aliud scelus, non temporis longitudine, sed iniquitatis, & impietatis magnitudine metiendum, Qui vero pro aliquo grandi crimine morte multatur, nunquid mora quæ occiditur, quæ per brevis est, ejus supplicium leges æstimant: & non quod cum in sempiternum auferunt de societate viventium? Quid est autem de ista civitate mortali homines supplicio primæ mortis, hoc est de civitate illa immortalis homines supplicio secundæ mortis auferre. Sicut enim non efficiunt leges hujus civitatis ut in cam quisque revocetur occisus; sic nec in illius, ut in vitam revocetur æternam, secunda morte damnatus. Quomodo ergo verum est, inquiunt, quod ait Christus vester: IN QUAM MENSURA MENSI FUERITIS IN EA REMETIETUR VOBIS, si temporale peccatum supplicio punitur æterno? Nec attendunt, non propter æquale temporis spatium, sed propter vicissitudinem mali, id est, ut qui mala fecerit, mala patiatur, eandem diuam fuisse mensuram: quomodo hoc in ea re proprie possit accipi, de qua Dominus cum hoc diceret loquebatur, id est de judicii, & condemnationibus. Proinde qui judicat, & condemnat injuste, si judicatur, & condemnatur juste, in eadem mensura recipit, quamvis non hoc, quod

de

- *dedit. Iudicio enim fecit, iudicio patitur: quamvis fecerit damnatione, quod iniquum est, patitur damnatione, quod iustum est.*

Hanc eandem veritatem disertè tradit sanctus Gregor. lib. 34. Mor. cap. 18. *At inquit, ait, sine fine non debet puniri culpa cum fine: iustus nimirum est omnipotens Deus, & quod non aeterno peccato commissum est, aeterno non debet puniri tormento. Quibus respondemus, quod rectè dicerent, si iudex iustus, discretusque veniens, non corda hominum, sed facta pensaret. Iniqui enim ideo tum cum fine deliquerunt; quia cum fine vixerunt. Voluissent quippe sine fine vivere, ut sine fine potuissent in iniquitatibus permanere, nam magis appetunt peccare quam vivere, & ideo hic semper vivere cupiunt, ut nunquam desinant peccare cum vivunt. Ad discreti ergo iudicis iustitiam pertinet, ut nunquam careant supplicio, quorum mens in hac vita nunquam voluit carere peccato, & nullus detur iniquo terminus ultionis, qui quandiu valuit noluit habere terminum criminis. Licet autem hæc verba de solis damnatis hominibus intelligantur; nihilominus etiam demonibus miseris aptari possunt, quippe quandiu steterunt in via, ita pertinaciter peccato adhaeserunt, ut ab eo resilire noluerint, & in ea prava ac perduelli voluntate perpetuò stetissent, si perpetuus eorum viæ status fuisset.*

Alias etiam rationes divinam æquitatem suadentes in hac decernenda, poenarum æternitate subieciemus, dum nobis erit sermo de quatuor hominum novissimis. Priusquam autem huic manum ultimam adhibeamus, aliqua de Daemonum in homines malitia, & sævitia, in sequenti Appendice sunt determinanda.

APPENDIX.

De infestatione, & eruenda Daemonum in humanum genus, & vitia.

QUANTA sit, quamque dira Daemonum in homines infestatio, & sævitia, nec mens quantumvis perspicax, nec lingua etiam disertissima, cogitare, aut eloqui fuisse. Nam inquit Tertullianus Apologetico ca. 22. *Operatio eorum, est hominis everso: se malitia spiritualis à primordio auspicata est in hominum exitium. Itaque corporibus quidem, & valetudines insignunt, & aliquos casus acerbos; animæ verò repentinus, & extraordinarios per vim excessus. Suppetit illis ad utramque substantiam hominis adeundam subtilitas, & tenuitas sua; multum spiritualibus viribus licet, ut invisibiles, & insensibiles in effectus potius, quam in actu suo appareant: Si poma, fruges, nescio, quod ore latens vitium in flore præcipitat, in germine examinat, in pubertate convulserat, ac si cæca ratione tentatus aer pestilentes hauritus suos affundit. Eadem igitur obscuritate contagionis adspiratio Daemonum, & Angelorum, mentis quoque corruptelas agit furoribus, & amentitiis sædis, aut sævis libidinibus cum erroribus variis: quorum ille potissimus, quod eos ipsos captis, & circumscriptis hominum mentibus comedat, ut, sibi pabula propria nidoris, & sanguinis procurret simulacbris, imaginibus oblata; & que illi accuratior pascua est, hominem à cogitatu veræ Divinitatis avertat præstigiis falsi.*

Hinc egregiè sanctus Chrysolog. serm. 11. *Diabolus mali author, nequitie origo, rerum hostis, secundi hominis semper inimicus; ille laqueos tendit, lapsus parat, foveas fodit, aptat ruinas, stimulat corpora, pungit animas, cogitationes suggerit, immittit iras, dat virtutes, odia, vitia dat amoris, errores fert,*

rit, discordias parit, pacem turbat, affectus dissipat, confcindit unitatem, sapientiam malum futis; bonum nihil, violat divina, humana tentat. Et ferm. 16. expendens illa verba Matt. 8. OCCURRUNT EI DUO DÆMONIA HABENTES, DE MONUMENTIS EXEUNTES ait. In monumentis sedem fecerant mortis auctores, attendite quæ scævitia, quis furor, quæ rabies Dæmonum erga humanum genus? quamvis breve tempus hominem ferre non possunt: Contenti non sunt mori homines, sed vivos homines gessunt sepelire: se sepulchris mandant, ut homines redigant in sepulchra: pascuntur cadaveribus, putredine saginantur; deliciantur fetore, quibus tota voluptas est homines interire: sed sentiantus quid machinantur fraudibus, quid moliantur malis, quorum crudelitas modum non habet in aperto. Prorsus ita est, nullæ namque sunt induciæ, pax nulla: ubi nec odii, nec invidiæ modus, aut finis ullus. Hostium Dei SUPERBIA ASCENDIT SEMPER; augetur malitia, crudelitas invalescit: amat sibi tribulos mittere, dum nobis spinas ferat: Gaudet suas ungere penas, & supplicia propria exacerbare, dummodo in cruciatus æterni partem quam plurimos asciat, & divine huic illudenti imagini pretioso Christi sanguine dealbatam decoloret, assertamque in libertatem, pristinae mancipet servituti; & Cadente a planè victoria prodant periculis, perque latus hostile in suamet ferrum viscera convertat.

Nam inquit idem sanctus Chryl. ferm. 17. Diaboli culpa hominis redundabat ad penam; & prædæ miseris prædæ saginabatur inclusus: nec facientem, sed patientem miserabilis exponit invidia; mille nocendi artes habet, innumeris utitur telis nihil sinit inausum, nihil intentatum relinquit, videt animum inbecillum, pavidumque, circum ut leo, ac vim intentat; novit imperterritum constantemque, vulpem induit, exuvias ponit leoninas: Hec quam multi partes vulpium sunt, & suæ? Quot lustrator

dolosus pellacis, & technis irretitos supplantavit? Præcipui autem ejus doli, tribus maximè acutantur; homines enim impetit, vel spectris horrendis ut terreat, aut blandis ut alliciat, vel furore agitat eorum obtinens & possidens corpora, ut suam in eis scævitiā ostendat: vel denique ludificationibus dementat, ut sibi obsequentes, & in omnibus devotos constituat: Quocirca de tribus his Dæmonum infestationibus nonnulla sunt hic delibanda sub tribus sequentibus Paragraphis.

§. I.

De variis Apparitionibus, & Spectris.

DVO sunt apparitionum, nec non illusionum genera, quibus solito circumveniuntur ac luduntur homines. Aliud quidem Naturale; aliud verò Dæmoniacum. Naturale appello, illos omnes insolitos naturæ deviantis aut maleficiæ effectus, quibus plerumque terrentur homines, eosque pro spectris habent.

Quæ sit naturalium Spectrorum causa?

RESPONDEO eam maximè adscribendam sensuum alterationi; siquidem sensuum alteratio plerumque in causa est cur homines varia ac stupenda sese percipere arbitrentur, ut constat maximè exemplo ebriorum, de quibus optimè sanctus Ambrosius lib. de Elia, & jejuniō cap. 16. Hinc, ait, vane imagines ebriis, incerti visus, instabilis gressus, umbras transiunt sæpe sicut foveas, natat his cum facie terra, subito erigi, & inclinari videtur, & quasi vertatur, timentes in faciem ruant, & solum manibus apprehedunt, aut edcurrentibus montibus sibi videntur includi; murmur in auribus, tanquam maris fluctuantis fragor, & resonantia fluitu littora: Canes si viderint, leones arbitrantur, & fugiunt. Alii risu solvantur incondito, alii incon-

solabili mœnore deplorant; alii cernunt irrationabiles pavores, vigilantes somniant, dormientes litigant &c.

Contingit etiam interdum sensuum externorum læsione ut res aliter quàm reverà sint, appareant. Sic refert Aristot. de quodam qui suammet imaginem, sive simulachrum, in aere sibi quasi in speculo propter oculorum vitium semper observari existimabat. Idem testatur, eum qui diu in Solem oculos intenderit, & oculo alio celeriter averterit; primò ei cuncta iri visu gibba, mox rubea, & tandem nigra donec alteratio illa visus recedat. *Auditus* etiam læsus decipere consuevit, ut fit in his qui morbum imaginisum (sic vocant) patiuntur. Sic Cellius *lib. 3. cap. 18.* refert, quòd Theophilus Medicus cæterò prudens, opinabatur cum febrirer, prope lectulum tibicines, & cornicines assistere, & continuè auribus ejus cantum insonare: idque jam sanus accidisse sibi pertinaciter contendebat, sed huic ista tædio erant, alteri quidam volutati.

Verùm crebrior, & major deceptio manat à *phantasia* corruptela, vel inordinata, & prava affectione, & agitatione; cujus rei exempla, & rationes subjiçit Guillelmus Parientis *2. partis de Univerf. parte. 2. cap. 35.* Exempla quidem, idque ex somniantibus febricitantibus, & melancholicis: Somniantes enim, inquit, indubitanter se credunt aliquando videre, & contrectare poma aurea, & massas argenteas. Disputant etiam interdum apud semetipsos, an veritas sit, an somnium, quod apud eos sic agitur. Tibi verò non est dubium veritatem pomorum aurcorum, aut massarum argentearum non esse apud ipsos. Ipsi tamen si interrogari tunc possent, & respondere durante somnio, cum juramento affirmarent rerum istarum veritatem se certissimè, & videre, & contrectare.

Secundum exemplum ponam tibi in febricitantibus qui patiuntur alienationes etiam vigilantes, & dicunt se videre latrones, vel alios homines, qui quærunt eos occidere, & clamant contra eos, & invocant auxilia circumstantium, & nituntur exurgere de lectis suis ut effugiant eos, quos dicunt se videre. Videtur eis etiam, quòd intrent per fenestras adeò parvas, per quas nullo modo intrare possent. In hoc exemplo manifestum est tibi, neque apud febricitantem, hoc est, neque in interioribus suis esse hujusmodi homines: neque, etiam in domo ubi dicunt se videre illos, sic etiam nonnumquam ut idipsum patiantur de mortuis. Manifestum igitur est solas imaginationes, seu phantasmata, quæ sunt apud animam febricitantis, sufficere per se ad apparitionem, sive ostensionem hominum hujusmodi, & non oportere, nullo modorum ut assumantur corpora ipsorum, vel alia corpora illis similia à quoquam: vel à quibuscunque.

Tertium exemplum ponam tibi in melancholicis quibusdam, qui videntur sibi videre multitudines hominum armatorum, & qui ascendunt muros civitatum; in quibus sunt, vel ingrediantur portas ipsarum, & quòd capiant eas. Unde, & ipsimet timentes ab eis capi, exclamant terribiliter, & cum tremore fugientes, quocumque, & quacumque possint. Nec potest eis suaderi ullo modo contrarium: propter quod non potest cessare in eis timor, nec tremor, neque etiam clamor; neque fuga, nisi teneantur. Memini me vidisse virum, bonum, & religiosum, qui cum mihi exponeret, & narraret ægritudinem quam patiebatur, etiam in ipsa narratione hujusmodi videbatur sibi videre mures magnos, & nigros, tentantes ascendere desuper vestimenta sua

„ sua ad caput suum, non cessabat
„ passio hæc in ipso, propter, quod erat
„ in horrore, & timore continuo.

„ Nec mirum est, si de rebus quæ
„ extra nos sunt nobis illudatur, quippe
„ cum de nobis ipsis in incredibiliores
„ opiniones, & apparitiones hujus-
„ modi phantasmata nos inducant.
„ Fuit namque tempore meo, vir qui
„ credebatur se esse gallum, adeo perti-
„ naci credulitate, quod ab ipsa nullo
„ modorum poterat averti: Et ad hoc
„ etiam deductus eras, quod loquela
„ humana nullatenus uti volebat, gal-
„ li vocem tantum pro viribus effigia-
„ bat. Fuit, & alius qui mortuum se
„ indissuasibiliter credebatur, & propter
„ hoc inter homines, vel cum homini-
„ bus viventibus, se nec debere, nec
„ posse comedere ullatenus delirabat,
„ donec quidam alius simulans se si-
„ militer, mortuum, suggestit ei quia
„ cum eo, & poterat, & debebat co-
„ medere, cum esset mortuus, sicut, &
„ ipse, cum viventibus neuter eorum.
„ Potuisti quoque audire, & scire, si re-
„ miniscaris de quodam, qui semper
„ putabat se videre aquam magnam
„ ante se, & propter hoc, nec passum
„ unum volebat ambulare huiusmodi
„ phantasia deterritus.

Hæ autem omnes læsæ facultatis ima-
„ ginativæ illusiones sunt in duplici dif-
„ ferentia, quoniam, ut subdit idem Guil-
„ ielmus, vel fixæ sunt, vel mobiles ad
„ instar somniorum: & mobiles quidem
„ sunt, quæ sunt ex fumis, sive vaporibus
„ ascendentibus ad cerebrum, & in eod-
„ em infectionem non imprimentibus,
„ atque relinquentibus, sed potius facile
„ recedentibus; propter quod, & cum ipso
„ somno vel evanescentes excutuntur,
„ & de ipsis infectionibus relictis, aliæ fa-
„ cile abolentur, propter, quod ipsa egri-
„ tudine cessante, & humore purgato, ex
„ quo erant, non faciunt amplius aliena,
„ vel videre; vel loqui, quod ante facie-
„ bant. Aliæ verò sunt intimioris infe-

„ ctionis, atque tenacioris, magisque
„ adherentis, & ideo difficiliter curantur, &
„ faciunt, ut quis videatur sibi rex esse; ut
„ vidi patientem qui putabat se esse
„ avem, quocunque vellet volentem,
„ & interdum putabat se esse Filium
„ Dei, interdum verò Spiritum sanctum,
„ quandoque verò Messiam Judæorum,
„ quem, & adhuc expectant, ipsumque
„ gens Christianorum nominat Antichri-
„ stum, & hoc ipsum ipse aperte dicebat:
„ videlicet, quod ipsemet erat Antichri-
„ stus. Cum ipso morbo interdum immi-
„ scet se suggestio Diabolica, quam gens
„ Christianorum vocat spiritum blasphem-
„ iæ; & est passio perniciosissima, quo-
„ niam intolerabilis, & horridæ vexatio-
„ nis est, & sola virtute divina curabilis:
„ fit ex morbo interdum, ut aliquis vide-
„ atur sibi esse lupus, & fit nihilominus
„ ex suggestionem diabolica.

De Spectris Dæmoniis.

Quamquam, ut supra diximus,
„ variae hominum delusiones, pleu-
„ rumque à malè affectis eorum
„ sensibus, nec-non, & inturbata
„ phantasiæ operatione suboriantur; ni-
„ hilominus certum est Diabolum hisce
„ naturalibus morbis sæpe se adungere,
„ & de hominum proclivitate, ac infir-
„ mitate in eorum infestationem abuti:
„ Nam, inquit S. Aug. lib. 18. quæstionum,
„ *serpit hoc malum Diaboli per omnes*
„ *aditus sensuales dat se figuris, accom-*
„ *modat se coloribus, adheret sonis, odo-*
„ *ribus se subijcit, insundit se vaporibus,*
„ *et quibusdam nebulis implet omnes me-*
„ *atus intelligentiæ; aliquando crudeliter*
„ *torquens dolore ac metu; aliquando jocose*
„ *distrahens vel subvertens ludicris.* Ut
„ autem varias Dæmonum infestationes,
„ & apparitiones ordine quodam recen-
„ sere valeamus;

Observandum est Dæmones alios dici
„ æreos, nonnullos aquos, aliquos terre-
„ stres, alios verò subteraneos, ut post Or-
„ pheum:

pheum notat Pfellus, lib. de *Dæmonum natura*. Aeris dicuntur qui, inquit Trithemius libro questionum ad Maximilianum quæst. 5. Deo permittente per aerem volitantes, aerē sæpius turbant, tonitrua, & tempestates concitant, & omnes simul in perniciem humani generis conspirant; variasque interdum induunt formas, easque sæpius mutant secundum varietatem affectionum, quibus vel occurrunt maleficarum carminibus evocati, vel impulsu perturbatione ad nocendum. Habent enim violentum omnino, & furiosum moremurbationibus plenum: Unde vehementer malefacti, & perturbati repentinas plurimum machinantur insidias, & dum suas agunt incurfiones partim latere volunt, partim inferunt violentiam. Maleficæ horum Dæmonum operatione suffultæ, tanto sunt ad maleficandum potentiores, quanto superiorem ex eorum ordine concurrentem fuerint affectu. Hæc omnia verò crediderim. In vita S. Antonii, S. Athanasii aerem plenum esse dixit Dæmonibus: quod Mercurius antedixerat ter maximus: Nullam videlicet mundi partem Dæmonum præsentia destitutam. Hæc Trithemius cujus ultima verba de sublunari mundo intelligenda, alioquin falsum esse docet S. Aug. cap. 3. de agone Christiano: & sic accipe quod subdit: *Siquoque præsul Ambrosius dixit: Plenus est mundus sanctorum virtutum, quia est plenus nequitiarum.*

Secundum genus dicitur *Dæmonum terrestrium*, quorum, inquit idem Trithemius. alii versantur in sylvis, atque nemoribus, qui venatoribus ponunt insidias: Alii verò putidis degunt in campis, qui nocte aberrare faciunt itinerantes; nonnulli demorantur in locis abditis, atque cavernis: reliqui cæteris minus furiosi ac perturbati, cum hominibus in obscuro commorari delectantur. Hi autem variis antiquitus donati fuerunt nominibus: Quorum no-

mina refert, & describit Saxo Grammaticus lib. 1. Saxonice historię, ubi inter alia hæc habet.

Trux Lemurum eborus aduchitur præcepitque per auras,

Curseat, & vasso: edit ad astra sonos, Accedunt Fauni Satyris, Panumque caterva

Manibus admixta militat ore fero; Sylvanis cocunt Aquili, Larveque nocentes,

Cum Lamiis callem participare fludent.

Saltu librantur Furæ, glomerantur iidem

Larvæ quas Simis Fantua juncta premit.

Has autem varias Dæmonum infestationes, & apparitiones, disertè explicat Guillelmus Parisiensis *ultima parte de Universo cap. 24.* ubi ait: Sunt, & aliæ ludificationes malignorum Spirituum, quas faciunt interdum in nemoribus, & locis amœnis, & frondosis arboribus; ubi apparent in similitudine puellarum, aut matronarum ornatu muliebri, & candido: interdum etiam in stabulis cum luminaribus cereis, ex quibus apparent distillationes in comis, & collis equorum, & comæ eorum diligenter tricatæ, & audies eos, qui talia se vidisse fatentur, dicentes veram ceram esse, quæ de luminaribus hujusmodi stillaverat. Manifestum autem est tibi; quia facile est malignis spiritibus ceram veram ex melle aggregasti, & ex operibus apum sylvestrium colligere, & inde luminare facere. A parte verò hominum nondum audivimus eos hujusmodi rapinam exercuisse: nec tamen dubitandum est, quin ex permissione Creatoris interdum hæc facere possint; quod autem non faciunt, vel hæc, vel alia mala hominibus, ex bonitate Creatoris est, qui tenet eos ligatos in istis immanissimarum belluarum, ut non

noceant hominibus quantum eum-
que velint.

De illis verò substantiis, quæ appa-
rent in domibus, quas dominas no-
cturnas, & Principem earum vocant
Dominam Abundiam, pro eo quòd
domibus quas frequentant, abun-
dantiam bonorum temporalium præ-
stare putantur, non aliud tibi scien-
dum est, neque aliter, quàm quem-
admodum de illis audivisti: quòd
enim comedere, & bibere videntur,
visio illusoria tantum est, cùm ma-
nifestum sit substantias spirituales
cibis, aut potibus corporalibus uti
non posse. Deinde nihil consumptio-
nis, aut diminutionis apparet in ci-
bis, & potibus corporalibus, de qui-
bus sumpsisse videntur, post recessum
eorum, vel potius postquam evanue-
rint, quapropter eo usque invaluit
stultitia hominum, & insania vetu-
larum, ut vasa vini, & receptacula
ciborum, discooperta relinquant, &
omnino nec obstruant, neque clau-
dant eis noctibus, quibus ad domos
suas eas credunt adventuras.

Idem, & eodem modo sentiendum
est de aliis malignis spiritibus, quos
vulgus *striges*, & *lamias* vocat, &
qui apparent de nocte in domibus,
in quibus parvuli nutriuntur, eos-
que de cunabulis raptos laniare, vel
igne assare videntur: Apparent au-
tem in specie vetularum, videlicet
quæ nec verè vetulæ sunt, nec verè
pueros devorare possibile est eis pro-
pter causam, quam dixi. Interdum
autem permittitur parvulos occidere
in pœnam parentum propter hoc,
quia parentes eò usque interdum di-
ligunt parvulos suos, ut Deum non
diligant. Utiliter igitur, atque sa-
lubriter cum ipsis parentibus agitur,
cùm causa offensæ Creatoris substra-
hitur. Insipientes autem more suo,
unde erudiri deberent, inde occa-
sionem detestabilioris stultitiæ assu-

munt, qua de causa factum est, ut
spiritus maligni sub nomine, & spe-
cie vetularum, in quibus apparere
credebantur, timorem, & honorem,
ac culturam idololatriæ sibi acqui-
verint, ea videlicet de causa, ut par-
vulis parcerent; hoc est, ut illos nec
laniarent, neque igni assarent. Ve-
tularum autem nostrarum desipien-
tia opinionem istam mirabiliter dis-
seminavit, & provexit, atque animis
mulierum aliarum penè ineradicabi-
liter infixit. Similiter, & de domina-
bus nocturnis, quòd bonæ dominæ
sint, & magna bona domibus, quas
frequentant, per eas præstantur, mu-
lieribus potissimum persuaserunt, &
ut ad unum dicam, penè omnes re-
liquias idololatriæ retinuit, & refer-
vavit, & adhuc promovere non ces-
sat anilis ista fatuitas.

Huc spectant omnia illa Dæmonum
spectra, quibus interdum militares
acies, & bellantium castra exhibent.
Legimus quidem in Scriptura *Gen. 32.*
& *4. Reg. cap. 6.* S. Angelos veluti mi-
litum cohortes apparuisse tum Patriar-
chæ Jacob, tum Eliæ Prophetæ. Hoc
ipsum de Dæmonibus innumere pro-
pemodùm historiæ referunt: Plures vi-
debis apud Niderium librò ultimò *for-
micariis*: Leholerium librò 4. &c.

Non abnuerem tamen spectra illa ali-
quando fieri ab animabus è corpore so-
lutis, quæ interdum sic Deo permitten-
te apparent, ut vivos à vitis revocent,
seu, ut loquitur *Guillelmus Parisiensis*
supra laudatus, sunt apparitiones
istæ, scilicet exercituum armatorum,
ad terrorem eorum, qui armis utun-
tur, ut per pœnas, quas abusores
armorum visionibus istis pati con-
spiciunt, deterreantur à similibus, &
ista sunt, quæ in apparitionibus suis
ipsi mortui referarunt. Permittuntur
igitur animæ mortuorum hominum
sic apparere hominibus ad deterren-
dos eos ab armorum abusionibus, &

„ rapinis, & sævitia, homines occiden-
 „ do. Verùm sicut prædixi, nec veri
 „ equi, nec vera sunt arma, quæ ibi
 „ apparent, nec vera hastiludia, nec
 „ vera prælia, nec veri discursus, aut
 „ equitationes, propter causas ante-
 „ dictas; sed signa tantùm rerum hu-
 „ jusmodi, tanquam in visione ap-
 „ parent ad commoveri faciendos
 „ homines, & deterrendos à malis
 „ prædictis, & ad sollicitandos eos
 „ de suffragando animabus defuncto-
 „ rum.

Hic pariter occurrunt illa spectra,
 quæ certis temporibus, & locis, aut
 domibus solent tumultus, & vexationes
 varias exhibere, quorum exempla
 hic supervacaneum esset referre, quippe
 cum notissima sint apud omnes.

Tales pariter Dæmones illi, de quibus
 scribit *Joannes Melleus* libro 3.
 „ cap. 11. & 12. In *Salmasia*, inquit,
 „ coluntur spiritus quidam visibiles,
 „ qui lingua *Ruthenica Coltri*, *Ger-*
 „ „ manicà *Koboldi* dicuntur, quos cre-
 „ dunt habitare in occultis ædium lo-
 „ cis, vel in congerie lignorum, nu-
 „ triuntque eos laute omni ciborum
 „ genere, eo quòd adferre soleant nu-
 „ tritoribus suis frumentum ex alienis
 „ horreis furto sublatum. Cùm verò
 „ alicubi illi spiritus habitare, & nu-
 „ triri cupiunt, hòc modò suam erga
 „ Patrem familias voluntatem decla-
 „ rant: in domum congerunt noctu
 „ segmenta lignorum, & mulctris im-
 „ ponunt lacte plenis varia stercora,
 „ animalium; quod ubi Pater-familias
 „ animadverterit, nec dissipaverit seg-
 „ menta, nec stercora è mulctris; sed
 „ de inquinato lacte cum omni fami-
 „ lia comederit, tunc illi apparere, &
 „ permanere ibi dicuntur.

Idem judicium de spectris *viruncu-*
lorum, ac *femellarum* speciei pigmei, vel
 pumilionis in domibus multorum exi-
 stentium; & domestica ferè cuncta mi-
 nisteria obeuntium. Putà equos curare,

domum verrere, & similia præstare ob-
 sequia, de quibus *Olaus magnus lib. 3.*
cap. 11. quos Galli antiquitus appella-
 bant *Desgoblins, des Folets, &c.*

Ultimo tandem loco sese offerunt
 spectra Dæmonum *subterraneorum*, qui
 thesauros custodire, necnon, & aurum
 effodere dicuntur, de quibus *Georgius*
Agricola cap. de animalibus subterra-
neis prodit: In Metallicis, inquit, fo-
 dinis, inveniuntur, & truculenti qui-
 dem, vel solo aspectu terribiles, ple-
 rumque Metallicis infesti, atque inimi-
 ci sunt. Talis fuit *Annebergius* Dæmon,
 qui operarios amplius duodecim statu
 interfecit in specu, qui corona rosacea
 appellatur, eo nomine relictus quan-
 tumvis argento dives esset. Platum
 verò emittebat ex rictu, cum equi spe-
 cie habente procerum collum, & truces
 oculos appareret. Ejusmodi etiam fuit
Snebergius nigrà cucullà vestitus, qui
 in fodina *Georgina* operarium è terra
 sublatum in superiore loco, maximè
 illius concavitationis quondam feracis ar-
 genti collocavit, non sine corporis at-
 tritu. Quætuosam admodum fodinam
 deferere apud Turcas cogebatur Ju-
 dæus à Dæmone metallico, hominibus
 frequenter in forma capræ aurea cor-
 nuæ gerentis apparente. At Sedatos il-
 los, Germanorum alii, ut etiam Græci
Cobalos vocant, quod hominem sint
 imitatores; nam quasi læticia gesticientes
 ridet, & multa videntur facere, nihil
 interim efficientes. Alii *virunculos mon-*
tanos vocant; quia plerumque apparent
 nani tres dodrantes longi: videntur
 autem esse seneciones, & vestiti more
 metallicorum, idest vitreto, indusio, &
 corio circa lumbos pendente. Innoxii
 sunt hi metallicis, etsi interdum glareis
 operarios laceßunt, rarissimè tamen
 eos lædunt, nisi cacinno, vel maledic-
 to laceßiti. Potissimum opus facere
 videntur in his specubus, in quibus me-
 talla jam effodiuntur, vel ea effodi posse
 spes est. Plura de his Dæmonibus sub-

terraneis refert *Kircherius* lib. de mundo subterraneo.

Hic referre prætermitto, varias animalium formas, necnon etiam, & hominum, quas Dæmon interdum induit, ut homines vel ludat, vel terreat, vel decipiat, de his enim apparitionibus: varia produnt, quorum sensa refert *Delrio*: Quando enim vult familiaritatis, & fidei specimen præbere, *Catti*, vel *Canis* fumit effigiem: De *Cattis* quotidiana, inquit, lamiarum confessio fidem facit, de quibus nonnulla *paraphrasto* 3. subiiciemus: De *Cane* compartum habuit *Cornelius Agrippa*. Si quis aliquò devehendus, sub specie equina ipsi apparet, ut testis est de *Hadingo* *Olaus* lib. 3. de *Comite Matiseonensi*, *Petrus Cluniacensis* lib. de *Miraculis*: Si per locum angustum, vel rimam subiturus sit, vel custodibus illufusus, sit *vespertillio*, *musculus*, vel *mustella*. Si ut gregem laceret, ut sæviat in animantes hominesque, induit *lupum*: Si quos terrere velit, aut turbare, nunc cantat, ut *gallus gallinae* magnus, & ferociens, ut *Pacomio*; ut *corvus*, aut *vultur* *S. Romualdo*; ut *vulpes*: *S. Hilarioni*, ut *serpens*; *Leonardo Corbejacenti*, ut *Draco* *S. Margaritæ*.

Si autem ad malum specie bonivelit inducere, apparet interdum in forma pietatem aliquam redolente: sic in figura *Dominus nostri Iesu Christi*; ornamentis aureis, & præfulgidis, necnon diademate coronatus, sancto Martino Turonensi Episcopo apparere est ausus, ut ipsum sanctum virum ad se adorandum, tanquam Christum ipsum induceret; at detecta illius fraude dixit ei, *Dominus Iesus Christus non purpuratum, aut diademate renitentem se venturum esse prædixit*, quò auditò disparuit. Alius quidam Pater cum se Dæmon ei in forma Christi offerre, clausis oculis dixit, *se nolle Christum videre in hac vita, sed in Cælis*. Alius sub simili specie

apparenti objecit, *Vide ad quem mitaris, neque enim is sum, qui Christum videre merear*.

Legitur quoque in legenda *S. Hieronymi* Dæmonem induisse speciem *Sancti Silvani* Episcopi Nazareni, qui charissimus erat *S. Hieronymo*, & in eadem specie fæminam quandam noctu in lecto jacentem aggressum fuisse, ut ad luxuriam provocaret, & cum ipsa acclamaret, cum in eadem forma sub lecto se abscondisse, ibique inventum, mentitum esse se *Silvanum* Episcopum, ut tantà infamiâ virum Dei notaret, & ita disparuisse; Talis autem de *Silvano* fuit multorum opinio, donec ipse Dæmon in obfesso corpore dolum, & fraudem detexit.

QVÆRES, Qualiter Dæmones spiritibus assumptis hominum oculos ludere possint?

R *Respondet* Seraphicus Doctor in 2. disp. 8. quæst. 3. hac de re variam, sed maxime triplicem esse Authorum sententiam: quidam namque putarunt, hanc delusionem fieri tripliciter: Potest enim, inquit, Dæmon, sensus nostros ludere, vel à superiori influendo; ab intrinseco phantasma movendo, ab extrinseco species obijciendo: Primò quidem à superiori influendo; dicunt hòc modò fieri posse, quòd cum Dæmon per naturam suam superior sit sensu corporeo, cumque superiora nata sint influere in inferiora, Dæmon potest species, quas habet in se sensui imprimere, tam interiori, quàm exteriori: quæ tamen minùs sunt spirituales in suscipiente, quàm in dante; quia quòd recipitur in aliquo, est per modum recipientis, non per modum recepti. Similiter ab interiori phantasmata movendo, dicunt sic posse accidere, sicut accidit homini ex motu phantasmatum, & de fluxu ab organo excitari virtutem, sen-

„ sensitivam interius, & fieri somnium
 „ in quo videtur homini, quod videat,
 „ vel audiat veritatem, cum phanta-
 „ sma rei pervenit ad organum visus,
 „ vel auditus. Sic, & in proposito,
 „ Dæmon potest phantasmata existen-
 „ tia in organo interiori facere dissiue-
 „ re ad organa sensuum: & sic videtur
 „ homini, quod videat, vel sentiat
 „ ipsam rem, dum ex rei phantasmate
 „ formatur organum: & intentio sen-
 „ sus super illud convertitur, judicat
 „ de similitudine ac si esset veritas. *Ab*
 „ „ exteriori verò species obijciendo, po-
 „ „ test hoc modò, sensum ludificare;
 „ „ unaquæque enim res nata est spe-
 „ „ ciem suam susceptibili dare; & si esset
 „ „ aliquid quod non tantum speciem,
 „ „ susciperet; sed etiam tenere posset,
 „ „ posset circumferri, & alicui pro ve-
 „ „ ritate afferri; sicut ostenditur Luna
 „ „ in puteo. Quia ergo non latet Dæ-
 „ „ monem naturæ specularis, non solum
 „ „ susceptiva specierum; sed etiam re-
 „ „ tentiva: mediante illa potest quam-
 „ „ cumque vult, & cuiuscumque rei
 „ „ vult speciem pro veritate sensibus
 „ „ nostris afferre; quam cum pro verita-
 „ „ te accipiunt, ludificantur.

„ Hanc autem sententiam improbat
 „ Seraphicus Doctor: Non enim, inquit,
 „ videtur possibile, quod substantia
 „ „ spiritualis, quæ habet in se species
 „ „ omnino immateriales, possit eas sen-
 „ „ sibus imprimere; cum omnino sit vir-
 „ „ tus improporcionabilis. Nec etiam
 „ „ videtur, quod species ab organo in-
 „ „ teriori regrediantur, cum iste sit or-
 „ „ do retrogradus. Preterea mirum est
 „ „ valde si Dæmon ita invenit magnum
 „ „ adeò speculum, in quo in magnitu-
 „ „ dine sua, & latitudine possit osten-
 „ „ dere unum castrum, sicut pluribus
 „ „ aliquando est ostensum. Mirum est
 „ „ etiam, si videt quis ita rem, quod non
 „ „ potest videre speculum. Mirabilis est
 „ „ etiam natura talis rei corporalis, quæ
 „ „ potest speciem suscipere, & tenere:

„ cum videamus speciem ab objecto
 „ „ speculo simpliciter separari non
 „ „ posse.

„ *Secundam sententiam* subjicit, eam-
 „ „ que probabiliorē affirmat; nempe,
 „ „ quod Dæmon potest ludificare sen-
 „ „ sus, sive ostendendo, præsens esse,
 „ „ quod non est, sive aliter ostendendo
 „ „ quàm est, sive abscondendo, quod
 „ „ præsens est. *Primum* quidem facit
 „ „ species ostendo: *Secundum* facit,
 „ „ sensum, vel objectum variando. *Ter-*
 „ „ „ tium verò facit, impedimentum præ-
 „ „ stando. *Primum* potest intelligi sic,
 „ „ quando phantasmata existētia in-
 „ „ terius offeruntur forti oblatione ipsi
 „ „ virtuti interiori, vel virtus interior
 „ „ fortiter illis intenditur, similitudo rei
 „ „ videtur esse veritas. Hoc manifestum
 „ „ est per naturam; nam phrēnetico
 „ „ propter ascensum fumositatum ad
 „ „ cerebrum ex modica occasione exte-
 „ „ riori, videtur ei, quod videat multa,
 „ „ quæ non sunt sibi præsentia, vel quod
 „ „ audiat.

„ Similiter per sortem conversionem
 „ „ intentionis, phantasma videtur veri-
 „ „ ritas: sicut S. Augustinus exemplifi-
 „ „ cat in *lib. de Trinit.* quod quidam
 „ „ tanta conversione recogitabat cujus-
 „ „ dam mulieris imaginem, quod ei car-
 „ „ naliter commisceri videbatur etiam
 „ „ vigilando. Per hunc modum Dæ-
 „ „ mon potest, sive intentionem ad ima-
 „ „ ginem convertere, sive fumos aliquos
 „ „ immittendo spiritum animale m im-
 „ „ mutare, & phantasmata diversimodè
 „ „ variare, & intentioni offerre, & sic
 „ „ diversa homini facere apparere: &
 „ „ hoc modo utitur frequentissimè: &
 „ „ hujus signum est; quia numquam fa-
 „ „ cit hominem aliquid sentire, cujus
 „ „ imaginem non habeat in interiori
 „ „ organo virtutis imaginariæ; num-
 „ „ quam enim cæcos naturaliter facit
 „ „ somnare de coloribus, nec surdos do
 „ „ sonis, nec eis talia repræsentat in
 „ „ vigilia, vel in somnis.

„ *Secundum modum* possumus intel-
 „ ligere sic . Quod res alio modo , vel
 „ sub alia dispositione appareat sensui,
 „ quam sit naturaliter , potest contin-
 „ tingere propter variationem aliquam
 „ ex parte organi; sicut quando humor
 „ sanguineus, vel vapor igneus descen-
 „ dit ad oculos, videtur homini, quod
 „ ea quæ exterius sunt , sint rubea: vel
 „ propter variationem aliquam ex parte
 „ objecti; sicut contingit aliquando,
 „ quod expositione candellæ factæ de
 „ serpentis pinguedine, & dispositione
 „ palearum , videntur palæe serpentes
 „ esse operatione naturali. Simile est in
 „ aliquibus virtutibus quarumdam re-
 „ rum mineralium ; & quia iste modus
 „ non latet Dæmones, & sunt ministri
 „ veloces, potentes, quæ necessaria sunt
 „ ad hæc, statim asserre: ideo sensus nos-
 „ tros frequenter deludunt , osten-
 „ dentes rem aliter quam sit, dum eam
 „ faciunt aliter quam se habeat appa-
 „ rere : quod quidem fit per variatio-
 „ nem modicam inducendo eam circa
 „ organum, vel objectum: quæ quidem
 „ variatio non mutat formam ; sed so-
 „ lum est ex quadam accidentali ad-
 „ hærentia, & est ut passio, non passi-
 „ bilis qualitas .

„ *Tertium modum* sic possumus in-
 „ telligere ; Res siquidem , quæ præstò
 „ est sensum nostrum sine visibili ob-
 „ staculo potest dupliciter latere ; aut
 „ quia impeditur virtus sensus, ne per-
 „ veniat ad sensibile; aut quia impedi-
 „ tur species sensibilis, ne perveniat ad
 „ sensum ; & utrôque modo impeditur
 „ sensus, ne percipiat, quod sibi est præ-
 „ stò . Utrumque autem horum satis
 „ credendum esse possibile virtuti
 „ Dæmonis , & ideo dicitur posse fa-
 „ cere per hanc viam , ut hominem
 „ reddat invisibilem, quod tamen cer-
 „ tum non est ; si tamen est , hæc viâ
 „ posse fieri , non est multum incredi-
 „ bile .

§. II.

De energumenis, & Dæmoniis .

Dæmones interdum humana subi-
 re , & torquere corpora certò
 conitatur . Id quidem pluribus Scripturæ
 sacre textibus innoteſcit , his maxime
 quibus Christus Dominus Dæmonia
 ejecisse sacri Evangelistæ testantur . Sic
 Luc. xxi. postquam Christus Dominus
 Dæmonium , quod erat mutum ejecit,
 & loquutus est eger, invidia ducti Scri-
 bæ, & Pharisei dixerunt : *In Beelzebub*
Principe Dæmoniorum ejecit Dæmonia ;
 quibus verbis supponebant Dæmonia-
 cos dari, quinimo sciebant ipsum , qui
 curatus fuerat, Dæmoniacum fuisse. Nec
 ex illa fide quam habebant, ipsos re-
 prehendit , sed solum ostendit non in
 tali virtute, sed in digito Dei se ejicere
 Dæmonia . Sic pariter ipse Christus
 Dæmones ab humanis corporibus ple-
 rumque ejecit ; sic apud sanctos Evan-
 gelistas narratur illa insignis ejectio
 legionis Dæmoniorum , quæ unum ho-
 minem possederat ; & ab illis Evan-
 gelistis sæpe narrantur mirabilia à Chri-
 sto Jesu facta circa ejectionem Dæmo-
 num ab hominum corporibus, ipsis cla-
 mantibus, & testificantibus vim sibi in-
 ferri, eo quod à propriis habitaculis pel-
 lerentur. Et apud S. Lucam agebant Di-
 scipuli : *Etiā Dæmonia subjiciuntur*
nobis in nomine tuo, & apud SS. Lucam,
 Marcum , & Matthæum *Dæmoniacus*
lunaticus à Christo curatur : at verò
 Scripturæ illæ sacre non assererent Dæ-
 mones fuisse ab humanis corporibus
 ejectos, pulsosque, nisi reverà intus exti-
 tissent .

Deinde ipsa satis apertè dicit illos
 Dæmones corpora intrasse , & existiisse ,
 ac ejectos esse ; quæ nec possunt , nec
 debent explicari , nisi asserendo reverà
 intus extitisse , & inde fuisse pulsos : si
 enim Dæmones non ingrederentur cor-
 pora , & egrederentur , quorum voces

Domi-

Domini apud S. Marcum : *Exi spiritus immunde ab homine isto ?* Quorum petitio Daemonum dicentium , *Mitte nos in porcos , ut in eos introeamus ;* & illud *Exeuntes spiritus immundi intraverunt in porcos ?* Hanc autem facultatem ejiciendi Dæmonia Christus Dominus non solum suis Apostolis , sed etiam Ecclesiæ ministris , nec non , & fidelibus sanctitate præditis contulit . Hinc in ipsis nascentis Ecclesiæ cunis Innumeros prope-modum Dæmones ab hominum corporibus ejectos operâ exorcistarum narrant Ecclesiæ Patres , ac Historici . Sic in primis Tertullianus ad Scapulam cap. 2. *Dæmones , inquit , non tantum respuimus , verum , & revincimus , & quotidie traducimus , & de hominibus expellimus , sicut plerisque notum est .* Et sanctus Cyprianus Episcopa ad Demetrium Africæ Proconsulem , ita de Dæmonibus à se , & aliis Exorcistis depulsis loquitur : *O ! si audire eos velles , & videre , quando à nobis adjurantur , & torquentur spiritualibus flagris , & verborum tormentis , de obsessis corporibus ejiciuntur , quando ejulantes , & gementes voce humana , & potestate divina flagella , & verbera sentientes , venturum judicium consentiunt , &c.*

Diem 1. S. Ildegardis , ut legimus in libro 3. ejus vitæ cap. 20. testatur se vera visione vidisse quamdam Energumenum , & quod ipsa (inquit) permissione Dei quadam nigredine , & fumo Diabolicæ conglobositatis obsessa erat , „ & obumbrata , quæ totam sensuali-
 „ tatem rationalis animæ illius oppri-
 „ mebat , nec ex elevato intellectu su-
 „ spirare permittebat ; velut umbra ho-
 „ minis aut alterius rei , vel funus op-
 „ posita obtegit , & perfundit , unde
 „ hæc rectos sensus , & actus perdebat ,
 „ & inconvenienter sæpius clamabat
 „ ac faciebat . Et me cogitante , & sci-
 „ re volente quomodo Diabolica for-
 „ ma , idest substantia , hominem in-
 „ traret , vidi , & responsum habui , quod

„ Diabolus in sua forma , ut est , homi-
 „ nem non intraret , sed eum umbrâ ,
 „ & fumo suæ nigredinis obumbrat , &
 „ obtegit : si enim forma illius homi-
 „ nem intraret , citius membra illius
 „ solverentur , quàm stipula à vento di-
 „ spergatur . Quapropter Deus non
 „ permittit , ut hominem in sua forma
 „ intret , sed supradictis perfundens ad
 „ insaniam , & inconvenientia evertit ,
 „ & per eam quasi per fenestram voci-
 „ feratur , & membra illius exterius
 „ movet , cum tamen in eis in forma
 „ sua interiùs non sit , animâ interim
 „ quasi sopita , & ignorante quid caro
 „ corporis faciat : Ergo revera Dæmo-
 „ nes Energumenorum corpora non in-
 „ trant ,

Nec consequentiam : nulla namque ex præfata revelatione contra præsentis veritatis assertionem evincitur ; in ea namque revelatione plura peccare videntur . *Primo* , quia principio verè tantum describitur obsessio , non possessio . *Secundò* , quod inquisitio hæc parum erat necessaria , & satis curiosa . *Tertiò* quia suspectum est quod ait , Deum non permittere , ut Diabolus secundum suam essentiam , ut solet esse in suo loco , corpora possideat . Communis enim Theologorum distinctio hoc discrimen statuit inter *obsessos* , & *possessos* , quod in his sit Dæmon , ut erat nonnumquam in statuis idolorum , & hoc indicant infestationes , & multa alia , quæ in possessis cernuntur . *Quartò* , quia ratio nulla est ; nec enim forma Dæmonis sive substantia ejus spiritualis ipsi corpori contraria sic est , ut illud statim destruat , etiam si nolit , solo ingressu . *Quintò* , quia non semper anima sopita est , quando Dæmon Energumenum , vel obsidet , vel possidet , ut apparet ; quia videmus sæpe illos omnium recordari , quæ egerint . Denique sancti Theologi omnes sic semper loquuti , & opinati fuere , ut dicerent Dæmonem corpus arreptitij intrare , & ab eo exire , non qui-

quidem id subire, ut informet, vel tanquam pars ejus, quod vocant, corpus integret; sed tantum ut loco vel instrumento organico usurus.

Dices secundò: Duo spiritus nequeunt eundem locum definitivum occupare; sed anima totum corpus occupat: ergo Dæmon non potest ipsum occupare.

Distinguo majorem: Non possunt eundem locum occupare secundum eundem existendi modum, concedo: secundum diversum, nego. Anima autem est in corpore, non ut in loco, sed velut forma ipsum corpus informans, & vivificans; Dæmon verò in ipso est, ut motor assistens, illudque corpus movens; quapropter anima, quæ est spiritus conjunctus, & Dæmon, qui est spiritus separatus diversas in eodem corpore habere possunt operationes: Anima quidem poterit corpus vegetare, nutrire, & sensitivum efficere: Dæmon verò illud movere localiter, atque vexare.

Potes quibus de causis Dæmones corpora possideant? Respondeo id fieri maxime quinque de causis. Dæmones hominum corpora invadunt, & possident, ut exponit *Joannes Nider* in suo *Formicario* cap. 11. aliquando pro proprio majori possessi merito, aliquando pro alieno levi delicto, aliquando pro suo veniali delicto; aliquando pro gravi peccato alieno, & aliquando pro magno facinore proprio. *De primo* patet in *Dialogo Severi, S. Martini* charissimi discipuli, ubi fertur quædam Patrem sanctissime vitæ, tantum dotatum in gratia expellendi Dæmones, ut hi nedum verbis suis propriis fugarentur, sed etiam ejusdem Patris epistolis, & cilicio. Cum autem coram mundo Pater esset celeberrimus, se tentari sensit vana gloria. Cui vitio licet viriliter resisteret, tamen ut humiliaretur amplius, totis precoribus Deum precabatur, quatenus quinque mensibus à Dæmone possideretur; quod & factum. Nam cum

statim possessum vinculari oportebat, & omnia applicare sibi Dæmoniis communia: finito autem quinto mense, prorsus, & ab omni vana gloria, & à Dæmone liberatus est.

De secundò, quomodo ex alieno levi delicto, aliquis possideatur, ponit exemplum beatus Gregorius de B. Eleutherio Abbate, viro simplicissimo, qui cum prope monasterium virginum pernoctaret, ei ignoranti ordinaverunt ad suam cellam ponit parvulum puerum, qui omni nocte vexabatur à Dæmone, sed eadem nocte à Dæmone liberatus est per Patris præsentiam. Hic cum rem didicisset gestam, & puer jam positus esset in monasterio sancti viri, & transactis multis diebus paulo immoderate lætus de liberatione pueri, ait ad confratres suos: Fratres, Diabolus sibi cum illis Sororibus jocabatur. Sed ubi ad servos Dei venit, puerum hunc accedere non præsumpsit. Et ecce statim Diabolus puerum vexare coepit, & per lachrymas, & jejunia sancti viri, & confratrum difficulter, sed eadem die liberatus est.

De tertio, videlicet de proprio veniali peccato; patet per *Cassianum*, collatione Abbatis Sereni 1. dicentem de Moysè. Moyses, inquit, in eremo cum singularis, & incomparabilis vir esset, ob reprehensionem unius sermonis, quem contra Abbatem Macharium disputans paulò durius protulit, quadam scilicet opinione præventus, tam diro confestim traditus est Dæmoni, ut humanas egestionis ori suo ab eo suppletas ingereret; quod flagellum purgationis gratia se Dominus intulisse, ne scilicet in eo, vel momentanei delicti macula resideret, velocitate curationis ejus, auctore medio demonstravit. Nam continuo Abbatem Machario in oratione submisso dicto

„ dicto citius nequaquam spiritus ab
 „ eo fugatus abscessit . Simile videtur
 „ huic quod dialogorū 6. S. Gregorius
 „ refert de quadam Dei famula in Mo-
 „ nasterio Virginum, quæ hortum ibi-
 „ dem ingressa, lactucam conspiciens,
 „ & concupiscens, quam signo crucis
 „ benedicere oblita, avide momordit,
 „ arrepta à Dæmone cecidit, & vexa-
 „ batur, quo usque statim vocato beato
 „ ibidem Patre Equitio, per eundem
 „ liberata est .

De quarta causa, qua dictum est
 „ pro alieno gravi peccato aliquem
 „ possideri; patet ibidem per B. Gregor.
 „ nam ut refert, Fortunatus Episcopus
 „ Diabolum ab obsessio homine pepu-
 „ lerat. Sero igitur Dæmon idem in
 „ specie peregrini per plateas civitatis
 „ clamare cepit. O virum sanctum
 „ Fortunatum, ejecit de ospitio pere-
 „ grinum: quem quidam vir invitavit
 „ suum ad hospitium. Et querendo
 „ causam expulsionis, gavisus est su-
 „ per derogatione sancti viri, quam à
 „ peregrino ficto audivit. Exinde au-
 „ tem Diabolus puerum invasit, &
 „ prunis injecit, ac animam ejus ex-
 „ cussit, sicque pater miser primum,
 „ quem receperat hospitio, intellexit.

De quinta vero causa proprii facino-
 „ ris, & magni communiter, tum in sacra
 „ scriptura cum in Sanctorum passionali-
 „ bus legimus, nam sic 1. Reg. 15. Saul
 „ inobediens Deo, possessus est. Ita Joan-
 „ nes Nider.

Qualiter autem, & quam ob rationem
 „ Dæmon humana corpora subeat, docet
 „ S. Bonaventura in 2. dist. 8. 1. parte,
 „ art. 2. quæst. 7. Dicendum, inquit, quod
 „ sicut innuit textus Evangelicus, & Au-
 „ gustinus, etiam in libro de divinatione
 „ Dæmonum, Demones per naturam suæ
 „ subtilitatis, & spiritualitatis, possunt
 „ quæcumque corpora penetrare, & in eis
 „ sine aliquo obstaculo, & impedimento
 „ subsistere; ratione verò suæ potestatis
 „ possunt ea corpora, in quibus sunt,

Tom. IV.

commovere, & conturbare; sicut enim
 „ spiritus spiritui penetrabilis esse non
 „ potest, sic nec corpus potest resistere
 „ spiritui: ideo Dæmones quantum est de
 „ potestate, & subtilitate naturæ, possunt
 „ corpora humana intrare, possunt etiam
 „ ea vexare nisi prohibeantur à superiori
 „ virtute: & cum permittantur introire,
 „ & vexare, tunc dicuntur corpora obse-
 „ dere. Permittit autem hoc Dominus si-
 „ ve ad gloriæ suæ ostensionem, si ve ad
 „ peccati punitionem, si ve ad peccantis
 „ correptionem, si ve ad nostram eruditio-
 „ nem: sed ex qua istarum causarum de-
 „ terminatè permittat, latet hoc huma-
 „ nam industriam, propter hoc, quod oc-
 „ culta sunt Dei judicia: hoc tamen pla-
 „ num est, quod non fiant injustè, &
 „ ideo non permittit talia sine causa.

Quæ autem sint signa, quibus certò
 „ dignosci possit Dæmonem aliquod cor-
 „ pus invadere, & agitare, non ita faci-
 „ le determinatur. Contingit enim inter-
 „ dum, ut qui Energumeni apparent, ta-
 „ les reverà non sint, in illisque plura fi-
 „ cta, aliqua à morbo, nulla sint à Dæmo-
 „ ne. Quocirca, ut judicari possit, an
 „ Dæmon reverà corpus inhabitet, &
 „ torqueat, indaganda est in primis, in-
 „ quit Herinx. *Disputatione 4. quæst. 9.*
 „ obsessionis origo, & ingrediendi modus,
 „ & maxime ipsius ingressus effectus, &
 „ signa, cujusmodi sunt, absente miraculi
 „ divini suspicione, subita notitia linguae
 „ peregrinæ, artis legendi, aut similis,
 „ locutio de rebus sublimibus, quas affli-
 „ ctus numquam didicit; absentium no-
 „ titia, revelatio occultorum, operatio-
 „ nes vires hominum excedentes. Item,
 „ quod afflictus non patiatur reliquias sac-
 „ ras, nomina Sanctorum, & potissimum
 „ Jesu; & sanctissimæ Trinitatis, exorci-
 „ smos &c. præsertim quando ipso homi-
 „ ne infcio adhibentur. Item si prohi-
 „ beatur omnino loqui, vel sancta nomi-
 „ na proferre, confiteri, communicare,
 „ &c. His accedunt indicia, quæ ex su-
 „ bita mutatione status corporis, vultus,

A a a

mo-

morum, vel ex modo afflictionis externæ prudenter desumi possunt. Facilius autem fertur de oblesione iudicium; quando omnia, vel præcipua ex allegatis signa concurrunt: maximè verò quando aliquo idiomate prius ignoto, absentia, & occulta revelat, &c.

Qualiter autem expellendi sint Dæmones ab Exorcistis, quibusve mediis, & precibus utendum sit, in longum, proferunt varii Authores, maximè verò noster Hieronymus Mengo Vitellianensis, in suo Flagello, Dæmonum, brevius verò in fuisse Dæmonum; duobus nempe libris ab eo editis, nec-non, & Antonius Stampæ Clavenensis, Lib. de fuga Satanae. Sed præ cæteris consulenda sunt Rituale Romanum, nec non, & Pastorale Diocesæsanum.

Exorcista autem in primis curare debet, ut viva fide, & in Deum fiducia sit præditus, purâ conscientia, animique humilitate, jejuniis, & oratione armatus, non inanis gloriæ captandæ, aut turpis alicujus temporalis lucri cupidus, sed sola necessitatis, vel charitatis causa rem hanc arduam aggredi, & auspicari debet. Quocirca in primis ipsi cavendum est à vocis contentione, nec non passionum, aut affectuum concitatione, quibus interdum nonnulli se frustra fatigant: sed potius adlaboret in eliciendis actibus fidei, spei, & charitatis: Cavendum pariter ab inutilibus, vanis, & curiosis quæstionibus, & interrogationibus, &c.

Exorcizandus verò in primis monendus ut, per salutarem confessionem, conscientiam suam ab omni peccato, quâ poterit diligentia, & pietate mundet, sacra sinaxi muniatur, frequenter oret, jejundet, & signum crucis, aquam benedictam, sanctorum reliquias in cæra benedicta consignatam Agni Dei figuram, aliaque sacra amuleta usurpet, fidem ac fiduciam in Deum excitet; nec si curatio differatur, animo cadat, paratus semper sese Dei ordinationi sub-

jacere; eâ maximè consolatione fretus, quòd hac temporali Dæmonum agitatione, æternum ab eis insigendum, reprobis tormentum vitabit. Ita Herinx.

§. III.

De Lamiis, Strigibus, & Sortiariis.

PRÆTER perditissimos homines, qui cum Dæmone sædus ineunt, ut ejus opæ futura aut abdiici renuntiare, & dijudicare valeant, præterque nefandos illos Magos, & incantatores, qui pactum cum Dæmone ferunt, ut illi operante ac juvante, quæ optant, mira ac stupenda præstare valeant, & implere, de quibus opportunior nobis erit sermo, cum de Divinatione ac Magia in *disputatione de fide* tractabimus; sunt, & alii, prædictis non minus execrandi, qui omnem divinam prorsus religionem exeuntes, omniaque quantumvis sacra horrenda impietate conculcantes, omnino se Dæmonis subdunt imperio, ut ad ejus autum, quidquid malitiæ aut scelcris, vel infidelitatis apud alios homines, qui Diabolo quomodolibet devoentur excogitari possent, id totum ipsi exerceant, & perficiant.

Hi autem perditissimi vario donantur nomine; sed communiori ac usitatiori *Sortiarij*, non solum à *sortibus* cum Dæmone initis, sed etiam à procuratis maleficiis appellantur. Cum autem inter hos pessimos Diabolice artis professores longè plures sint mulieres quàm viri; propterea, quod sexus iste ob nimiam credulitatem facilius sit ad deceptionem, nec non ad libidinem pronior, inde solitò fæmineum nomen ipsis execrandis hominibus etiam tribuitur: dicuntur namque *Lamiae*, & *Strigis*; propter ea quod Lamia sit animal quoddam crudele nimium, faciem prætendens muliebrem, equinos vero pedes habens, de quibus Lamiis loquitur

tur

tur Jeremias in *Trenis*, dicens, *Lamiae nudaverunt mammas, lactaverunt catulos suos*. Strix autem avis quædam est nocturna, & importuna, sic dicta à stridore quem facit; de qua Lucanus lib. 6. *quod trepidus bubo, quod strix nocturna queruntur*. Hæc inquam avis pueros adhuc lactentes aggredi tentat, ut ex illorum corpusculis vitalem sanguinem sorbeat. Qua de causa perditissimæ illæ mulieres, quæ Dæmonibus devoentur, *Striges* appellantur; propterea quod sub felis, seu catti larvata specie plerumque dormitantes puerulos aggrediuntur, & per inguinem eorum sanguinem sugunt. Lamie vero cum ex Philostrato in *vita Apollonij* advenirem propensissimæ sint, & carnes humanas devorare cupiant; quo circa formosos homines, quos habent obviam, ad libidinem provocant, quò facilius eis mortem inferant, & postmodum eorum carnibus exsaturentur. Hac etiam ratione id nomen nefandis illis Diaboli sectatoribus inditatur. De his autem nonnulla hic breviter referenda duxi ex Doctioribus quibusque authoribus, penes quos infra dicendorum sola sit fides.

Sciendum itaque in primis, ut referunt Paulus Grillandus tractatu de Sortilegiis num. 26. Delrius disquisitionum magicarum lib. 2. quest. 16. Laurentius Anianus de natura Dæmonum lib. 4. c. 4. nec non, & noster Alphonsus à Castro lib. de impia Sortilegarum Hæresi cap. 4. quòd quisque hanc Diabolicam sectam profiteri vult, adducitur primò ab eo à quo docetur ante tribunal Dæmonis: in solio quodam ad regis iustas sedentis. Dæmon enim se illis in figura quadam visibili, & corporea ostendit, ut falsam majestatem suam, & imperium ementito quodam signo illis persuadeat. Coram illo itaque adductus, is, qui hanc sectam profiteri paratur, statim debet abnegare

baptismum, & omnia Christianæ fidei documenta relinquere. Deinde oportet, ut omnia Ecclesiastica sacramenta rejiciat, crucem, intemeratæ Virginis, & aliorum quorumcumque sanctorum imagines proscindere debet, pedibusque propriis conculcare. Hanc tamen conculcationem imaginum non est opus coram ipso Dæmone statim efficere, sed satis est, ut postea se facturum promittat, cum primum sese obtulerit occasio.

His peractis, Dæmoni velut principi aut regi perpetuò sese obligatum ac devinctum reddit vovens in manibus ejus se perpetuo futurum illi fidelem, & omnibus illius mandatis paritum. Post hæc, tactis scripturis superquodam libro obsecras quasdam, & ignotas paginas continente, jurejurando promittit se numquam ad fidem Christi rediturum, ac divina præcepta servaturum; sed solum ea, quæ per ipsum principem, Dæmonem videlicet, mandabuntur.

Promittit insuper se venturum, quoties vocatus fuerit ad congregationes nocturnas, & sacrificia se facturum, quæ horis illis nocturnis fieri viderit; preces emissurum, ac orationis cultum se illi exhibiturum; omnia denique alia, quæ ab aliis ibidem fieri viderit se facturum. Quo voto, & juramento per illum emissò, statim Dæmon, qui in solio sedens velut regem se illi ostenderat, hilarem frontem prætendens, promittit illi sic stanti se daturum, quam in se non habet, perpetuam felicitàtem, & gaudia immentia; & quascunque in hoc mundo cupierit habere voluptates, & tandem post hanc vitam, multo majora se daturum spondet. Deinde unum Dæmonem constituit ad illius custodiam, & doctrinam, qui illum perpetuò comitetur, & illi

„ per omnia serviat, & omnia tribuat,
 „ quæ ille cupiet .

„ Huic Dæmoni ad custodiam desti-
 „ natò, inter alia hoc peculiare officium
 „ commissum est, ut quotiescumque
 „ opportuerit ad ludos accedere no-
 „ cturnos, ille hoc denuntiet suo clien-
 „ tulo, & illum deferat ad locum con-
 „ gregationis. Hunc Dæmonem, qui ve-
 „ lut patronus ad custodiam datus est,
 „ ipsi homines hujus Diabolicæ artis pro-
 „ fectores vocant *Magistrum*, *Martine-*
 „ *tum*, aut *Martincillum*. Ita Alphon-

„ Addit Delrius, quod ubi omnes Dæ-
 „ moni Regis instar in folio sedenti sua
 „ præstiterunt obsequia: omnes ad con-
 „ vivium evocantur. Notatque, quòd
 „ soleant diversæ mensæ instrui tribus,
 „ vel quatuor ciborum generibus, inter-
 „ dum delicatissimorum, interdum valde
 „ insulso- rum onustæ, quibus pro dignita-
 „ te sua, aut opibus singuli locantur.
 „ Aliquando suus cuique Dæmon adsi-
 „ det: Aliquando malefici una ex parte,
 „ & suus cuique Dæmon ex adverso. Nec
 „ mensæ suæ deest benedictio, cæterum hoc
 „ digna, verbis constans planè blasphem-
 „ is, quibus ipsam Beelzebub, & crea-
 „ torem, & datorem, & conservatorem
 „ omnium profitentur. Eadem est actio
 „ gratiarum quàm subdunt mensis subla-
 „ tis. Convivio intersunt facie interdum
 „ aperta, interdum velata linteo, vel alio
 „ velamine, aut persona sic etiam perso-
 „ nati. Post convivium quisque Dæmon
 „ suam quam custodit discipulam manu
 „ prehendit, & ut omnia fiant ritu quam
 „ possunt absurdissimo, dorsis invicem
 „ obversis, & in orbem junctis manibus,
 „ jactantes capita more fascinatorum,
 „ choreas ducunt; nonnumquam can-
 „ delas accensas manu tenentes, quibus
 „ cum ante Dæmonem osculantes ado-
 „ rant, & cantant se fecerunt in hono-
 „ rem Dæmonis obsequiosissimos. Vel ad
 „ tympanum fistulamve sedentis alicujus
 „ in bifida arbore saltant, omniaque ri-

diculæ, & contra cæterorum morem pe-
 „ ragunt. Tum suis amasiis Dæmonibus
 „ fœdissimè commiscuntur.

„ Quando sacrificia fiunt, fieri solent
 „ statim initio, peracta adoratione: Sa-
 „ crificia tamen etiam extra conventum
 „ sæpè faciunt. Denique addunt, quem-
 „ que narrare sua ab ultimo facinora,
 „ quæ quòd graviora, & magis execranda
 „ fuerint, eò collaudari uberius: si nulla
 „ sint, vel non satis atrocita, verberari se-
 „ gnes atrocissimè à Dæmone, vel à quo-
 „ dam malefico seniore: Ultimo pulveri-
 „ bus (quos aliqui scribunt esse cinerea
 „ hirci illius quem Dæmon assumpserat,
 „ & quem adorant, subito coram illis
 „ flammâ absumptis) vel venenis aliis
 „ acceptis sæpe etiam indicto cuique no-
 „ cendi penso; & pronuntiato pseudothei
 „ Dæmonis decreto *ulciscimini vos: alio-*
 „ *qui moriemini*, ut agnoscas legem cha-
 „ ritatis legi contrariam; suas quemque
 „ domos, si propè sint, pedibus, sin di-
 „ stantiores, advechi, repetunt.

„ Conventicula, ut plurimum ineuntur,
 „ vel noctis mediæ silentio, quando viget
 „ potestas tenebrarum: vel interdum me-
 „ ridie, quòd sunt qui referant illud Pal-
 „ mistæ notum de Dæmonio meridiano.
 „ Et Aben-Esra scribit à Magis certos
 „ dies, & horas observari. Striges viden-
 „ tur in diversis regionibus varios habere
 „ statos dies. In Italia frequentant no-
 „ ctem, quæ feriam sextam præcedit, idque
 „ circa noctis medium, Lotharingicæ
 „ Striges conveniunt noctibus, quæ præ-
 „ cedunt feriam quintam, & diem Domi-
 „ nicum, teste Remigio *lib. 1. cap. 14.*
 „ apud alios legi noctem, quæ præcedit
 „ feriam tertiam.

„ Quod autem Dæmon eas striges non
 „ transferat nisi unguento prius oblini-
 „ tas; id præstat variis de causis vel, ut
 „ unguento magis audeant, vel quia te-
 „ nuioribus sunt ad horribilem illum Sata-
 „ næ contactum in corpore assumpto fe-
 „ rendum; horum enim unctione sensum
 „ obstupefacit aliquando, & miseris, per-
 „ suadet

suadet vim unguento inesse maximam. Aliàs autem id facit, ut sacrosancta à Deo constituta sacramenta mimicè adumbret. & per has quasi cæremonias suis orgiis reverentiam, & venerationem conciliet. Nihil verò ad translationem conferre vim unguenti, vel inde patet, quòd etiam si, qui statuto conventus tempore ex curiositate quadam cupientes conventui interesse se unguento illiniant, revera per aerem eò devehantur (Deo id, ut multoties probatum, ad puniendam incredulam curiositatem tam temerariæ audaciæ permittente) tamen si quis fide firmus, charitate armatus, ad fraudes Dæmonis revincendas, dissipandasque ad veræ fidei confirmationem, eo se unguento inungeret; proculdubio, ut rectè infert Binsfeldius, nulla sequeretur translatio; quia hic omne pactum cum Dæmone cessat, neque id Deus esset permittens. Et propterea, quando extra conventui destinata tempora, sese inungerent Sagæ, non avolarent, nec auferrentur, eò quòd id pactæ non fuerunt. Sciunt hoc, & id eò non ungunt nisi audito conventus signo. Aliquando monentur à suo Martinello, aliquando à vocibus prætervolantis comitatus Sagarum Reginæ, aliquando aliter, juxta Spineum cap. 30. Sunt tamen quidam malefici, qui ex peculiari pacto ad certum quoddam signum, sive unctionem, sive pilei, aut pallii posituram, sive quod aliud, quando volunt aliò deferuntur: sed quod dixi, frequenter est.

Quæres an reverà Strigēs à Dæmone ad conventicula deportentur.

Respondeo id videri probabilius viris gravissimis qui de hac materia scripserunt. Ita namque censent Laurentius Ananias libro 4. de natura Dæmonum; Joannes Franciscus Leonis Episcopus Thelesinus libro de Sortilegiis;

Alphonfus à Castro opus. de Sortilegiis; Gillandus lib. 2. de Sortilegiis. quæst. 7. Delrius lib. 2. quæst. 16. & alii plures, quos ipse ibidem laudat.

*Probat*ur itaque hujusce responsionis veritas; Idcirco negaretur realis illa strigum deportatio; vel quia id non posset Diabolus exequi; vel quia Deus non permetteret; vel denique quia nullo testimonio fide digno potest suaderi: sed neutrum ex iis potest affirmari. Ergo revera Striges ad suum Diabolicum, conventum dicendæ sunt realiter deportari. Probat^{ur} minor quantum ad primam partem, nempe quod Dæmon possit strigum corpora motu velocissimo in remotissima quæque loca deportare; supra namque probavimus Angelos movere posse corpora, quod non solum sanctis, sed etiam perveris tribuitur; Dæmones namque nativas dotes retinuerunt; adeoque eandem nativam virtutem quam sancti Angeli habent erga corpora: Constat autem ex Scriptura S. Angelos varia corpora deportasse. Legimus namque apud Daniele c. 14. quod Propheta Habacnc capillò per Angelum à Judæa in Babylonem brevi temporis spatio deportatus fuerit, & inde reportatus. Similiter Actorum 8. Philippus Diaconus à spiritu ex deserto in Azotum delatus est. Testatur etiam S. Marcus cap. 5. quod Dæmones ab hominis corpore Christi Domini imperio ejecti, & porcos ingressi, eos in mare precipitaverint. Possunt ergo revera Dæmones corpora deportare.

Confirmatur ipsamet experientia variorum exemplorum, quæ sine protervia nullus negare potest. Primò namque gravissimi sanctissimique Patres referunt Simonem magum coram S. Petro alarum Dæmoniacarum remigio in aerem sublato volitare visum fuisse. Ita cum Clemente Romano lib. 6. Constitutionum Apostolicarum refert Egesippus lib. 3. Cyrillus Jerosolymitanus Catechesi 6. & cæteri; id ipsum de Abari Sey;

Scythia testantur Origenes *lib. 3. contra Celsum*, & Nazianzenus *epist. 22*. Proponit etiam Anglorum Historia Badudum Britanniae Regem hac arte volandi, sed infelici exitu parem. Idem de Erico Suecorum Rege testatur Joannes Magnus *lib. 17*. nempe, quod ille Rex in quam partem pileum verteret, in eam subito Dæmonum ope asportaretur regionem; Nangiacus in *Chronico* affirmat Berengarium Hæreticum, & magum eadem nocte Romæ interfuisse, nec non, & Turonensi Ecclesiæ, in qua lectionem decantavit. Similia de Matifconensi Comite refert Petrus Cluniacensis: quod nempe equo nigro impositus per aerem subvectus fuerit. Constat ergo Dæmonem revera corpora deportare posse, constat pariter iisdem exemplis Deum idipsum interdum permittere.

Probatur etiam tertia pars ejusdem minoris; nempe quod hoc ipsum constet testimoniis fide dignis. *Primò* quidem illis omnibus attestationibus, & confessionibus, quas ab ipsis strigibus exceperunt, tum Inquisitores, tum iudices ad earum juridicam interrogationem, & damnationem deputati; quorum varia exempla proferunt Paulus Grillandus *lib. 2. de Sortilegiis quest. 7*. Alphonsus à Castro *cap. 15*. addens se multa posse alia afferre testimonia, quæ per fidelissimos testes in Hispania contigisse noverat: Bartholomæus Spinetus sacri Palatii Apostolici magister *quod de strigibus cap. 17*. Nicolaus Remigius *lib. 1. Demonolatriæ cap. 14*. quæ omnia brevitatis causa hic exscribere non lubet. Quibus omnibus exemplis constat reverà Striges de loco in locum remotum deferri. Quod utique.

Confirmatur primò, ex eo quod nonnunquam conventu subito dissoluto, repertæ sint mensæ, & suppellex argentea, quæ postmodum à dominis agnita, confessæ sunt eorum uxores se illa secum ad conventum detulisse. *Deinde*

Sortiarij illi, & Striges locos omnes, & cibos, & vicina omnia diligenter notant; arbores, flumina, agros, domos discernunt, obvios quoque quos in via habuerint sæpe salutant, & alloquuntur: cernuntur etiam non rarò ab aliis viris Catholicis, & mente sanis ad conventum euntes, vel à conventu redeuntes; interdum etiam visæ, & nudæ deprehenduntur. *Denique* hoc ipsum etiam constat per ea quæ vel ante cursum suum, vel post eursum striges ipsæ referunt. Siquidem ex processu earum damnationis constat, quod interdum priusquam ad diabolicum conventum accedant, reservatam ab eis sacratissimam hostiam secum deportant ad determinatum locum, quam, ait Bartholomæus Spinetus, Diabolo offerunt, variis coram eo injuriis, & ludibriis lacestant, pedibus conculcant, nec non, interdum eam, vel muribus, canibus, imò etiam quod est horrendum dictum, busonibus comedendam tradunt: quæ omnia per somnium contingere non possunt; siquidem evigilantes quam prius habebant hostiam non inveniunt; quod signum est eam revera ab ipsis execrandis Strigibus, ut referunt, fuisse laniatam, & conculcatam, & vilissimis animalibus traditam.

Idem convincunt alia itidem oblata munera, putà, umbilici puerorum, galli, gallinæ, & alia hujusmodi, quæ communiter requirunt Dæmones sacrilegis eorum sacrificiis. Quod autem res ita se habeant, & isthæc ençonia Dæmonum post oblationem non compareant, millies comprobatum esse testantur varij processus hæc de re à iudicibus editi.

Eisdem Strigibus referentibus constat, quod dum primò deportantur ad cursum, & negatis coram Domina cursus fide Christi atque baptismo, faciunt homagium Dæmoni; accipiunt tradente sibi eodem Dæmone pugillum terræ, quâ secum portatâ, & realiter apud se inventâ colervatâque, totâ vitæ suæ tem-

tempore utuntur personæ istæ pessimæ ad maleficiandum , non solum pueros , verum etiam viros mulieres cujuscunque ætatis , projecto terræ illius modico super eas quas volunt personas perdere . Si autem hæc omnia in somnis contingerent , vel delusoriè , nequaquam apud se postmodum vigilantes inveni-
rent .

Confirmat 3. ex eo quod illæ perditissimæ Striges qualibet hebdomadâ duobus diebus languescant , manè videlicet diei , Veneris , & diei Lunæ , propterea quòd ex velocissima reportatione quâ illæ noctibus præviis à cursu recipiuntur in propria , patiuntur depositæ quasi vertiginem , & ob hoc lecto decumbentes toto penè illo manè quiescunt . Quo etiam affectu , quasi apertissimo , & clarissimo signo noti earum , suspectas easdem habent vehementissimæ , quòd sint Striges : ubi præcipuè præstigiousis operibus alioquin intendunt .

Confirmat 4. ex eo quod testentur in dictis , & factis dum in Diabolico illo residet conventu , & se invicem cognovisse , & comitatas fuisse : fecisse quunque , simulque dixisse , dum sunt in cursu , quæ postmodum concorditer referunt , sicut in referendo conveniunt qui vigilant , ea quæ simul vigilantes fecerunt , aut dixerunt , signum autem est apertissimæ veritatis , quòd ista non in somnis perficiantur ; nam si unus somnietur , aut deluderetur , vel etiam ambo , nullatenus ita mutuo convenirent : non enim experimur , imò impossibile judicatur , & contra naturam , quòd duobus contingat eadem in somnis videre putare quòd hæc , vel illa fecerint , vel dixerint , absque ulla penitus differentia , ut talibus accidere comprobatur . Siquidem sæpe plures earum simul ire , redireque ; ut nulla sit jam negandi ratio , vel apparentia , quòd hæc corporaliter fiant , & invigilia .

Eadem docet , & probat Bernardus

Penna Comensis *tractatu de Strigibus* . Ex eo quod , inquit , omnes hujus pestiferæ Sectæ sive mares , sive feminae quasi uno ore , & unâ linguâ fatentur , se eundem modum per omnia , uniformiter observare ubique locorum , in abnegando fidem , ac baptismam , & Dominum Deum , ac beatam Virginem Mariam , ac in conculcando , crucem , & adorando ipsum Diabolum , & faciendo fidelitatem tangendo ei manum cum manu earum sinistra post tergum , & in omnibus aliis , & singulis , quæ in tali ludo , seu congregatione fieri contingunt : itaut omnes in idem conveniant , & semper convenerunt à principio illius sectæ usque in præsens tempus , ut ex earum omnium confessionibus ubique locorum per totam Italiam in manibus Inquisitorum nostrorum factis , & scriptis in processibus contra eas formatis liquidè constat : Quod esse non posset , & non ita in omnibus se conformarent , si phantasticè , & in somniis eis ista contingerent , præcipuè cum phantasmata , & somnia secundum varietatem causarum , & qualitatem personarum pro loco , & tempore variantur .

Confirmat secundò ex eo quod tales personæ pluries pluribus in locis eundo , vel redeundo de dicto suo ludo per personas Catholicas sunt realiter , & veraciter visæ , cognitæ , & deprehensæ : Nam , inquit , ut de his quorum ego certior habeo notitiam loquar , cum ego superioribus annis in Valle telina , in terra scilicet de Ponte Diaceis nostræ *Comensis* contra harum Strigum pestiferum genus inquirendo procederem , dictum mihi à fide dignis , quod cum quadam nocte paulisper ante lucem quidam fuisset à duobus personis Catholicis visus , & cognitus in predicto Strigum ludo , juxta quosdam vineas prope dictam terram de Ponte versus Abduam

„ duam, relicto dicto ludo, veniens
 „ cum illis duabus personis domum,
 „ rogabat eos ne eum apud me accusa-
 „ rent, neque quòd in tali ludo vidif-
 „ sent eum, propalarent, ut in proces-
 „ sibus quos ibidem tunc feci legitimè
 „ constat, quod quidem non phanta-
 „ sticè, neque in somniis, sed realiter,
 „ & corporaliter fuisse evidenter ap-
 „ pareret. Quandam insuper puellam,
 „ octo vel decem annorum Antoniam
 „ nomine pater, & mater ejus ad me,
 „ conduxerunt in dictam terram de
 „ Ponte, quæ in præsentia illorum, &
 „ plurium aliorum retulit mihi quali-
 „ ter, quadam nocte vocata à quadam
 „ avita sua nomine Magdalena, sur-
 „ rexit de lecto, & portata fuit cum
 „ ipsa avita sua ad certum locum à di-
 „ ctà terrà de ponte, satis distantem,
 „ ubi vidit, & cognovit plures perso-
 „ nas in uno prato choreizantes eum
 „ prædicta avita sua: cumque postea
 „ iterum reportata fuit ad dictam ter-
 „ ram de ponte in domum habitatio-
 „ nis suæ: quæ omnia seriòse confessi
 „ fuit mihi postea Magdalena existens
 „ in manibus officii mei, & interrogata
 „ à me, an personam aliquam ad ipsum
 „ ludum conduxisset, prout ex proces-
 „ su contra eam formato legitimè con-
 „ stat. Plures etiam aliæ personæ, & in
 „ dicta terra de Ponte, & in terra Bar-
 „ beni dictæ vallis, ac etiam in terrâ
 „ Clavenæ, prædictæ nostræ Diocesis,
 „ cognita, & deprehensa fuerunt à di-
 „ versis personis in præfato ludo cum
 „ Diabolo existentes, prout hi qui vi-
 „ derunt mihi juridicè retulerunt, &
 „ ipsamet visa, & deprehensa confes-
 „ sæ sunt in processibus contra eas for-
 „ matis, ut in eis apparet. Quæ omnia
 „ si quis benè consideret, nequaquam
 „ videri neque deprehendi ita clarè po-
 „ tuisse ab aliis, si in somniis, aut
 „ phantasticè ipsis Strigibus contigif-
 „ sent.

Confirmatur denique ex eo quòd

Ecclesia Catholica non punie crimina,
 nisi certa, & manifesta, nec habet pro
 hæreticis, nisi qui in hæresi manifestè
 sunt deprehensi. *Cap. consuluiſti 2. qu. 5.*
 Striges autem jam à plurimis annis pro
 hæreticis habet, & jubet per Inquisito-
 res puniri, & brachio seculari tradi, ut
 patet ex libris *Sprengeri, Nideri, Iac-
 querij*, & docet experientia. Ergo vel
 Ecclesia errat, vel isti errant qui ista per-
 negant: sed Ecclesia in re ad fidem per-
 tinentem errare qui dixerit: *Anathema
 maranatha* sit.

Narrat Cumanus exemplum hujus
 delationis veritatem declarans. In Men-
 „ drioſo, inquit, oppido Comensi con-
 „ tigit jam serò annis quinquaginta,
 „ elapsis, ut cum ibi quidam Inquisitor
 „ nomine *Magister Bartholomæus de
 „ Nomate, Dominus Laurentius de Con-
 „ coreſto, Potestas, & Ioannes de Fossato
 „ Notarius*, contra has Striges proce-
 „ derent: una die ista potestas quadam
 „ curiositate ducta volens experiri, an
 „ verè, & corporaliter Striges irent
 „ ad ludum, facta conventionè acces-
 „ sit quodam die Jovis serò cum Nota-
 „ rio suo, & quodam alio extra op-
 „ pidum ad quemdam locum, sicut illi
 „ Strix prædixerat: & dum ibi prope
 „ essent illi tres: viderunt ibi plures
 „ personas congregatas coram quo-
 „ dam, qui erat Diabolus in forma hir-
 „ ci, ad modum cujusdam magni Do-
 „ mini sedente: & ecce subito omnes
 „ illæ personæ ibidem congregatæ jussu
 „ Diaboli, adeò illum Officialem, &
 „ omnes ejus socios, Deo ob eorum
 „ curiositatem permittente, baculis per-
 „ cusserunt, quod ex talibus percussio-
 „ nibus ille Officialis, & Notarius, &
 „ tertius alius infra quindecim dies
 „ mortui sunt. Hæc ille; quo facto suf-
 „ ficienter probatur hæc ipsa realis ac
 „ personalis deportatio. Nihilominus
 „ qui eam in dubium revocant.

Obijciunt primò Canonem Concilij
 Ancyran quibus ordinatur Episcopis
 eo-

eorumque Ministris, ut in sacrilegos, & Striges animadvertant his verbis, *Episcopi eorumque Ministri omnibus viribus elaborare studeant, ut perniciosam, & à Diabolo inventam fortilegam, & maleficam artem penitus ex suis parochiis eradiceant, & si aliquem virum, aut feminam huiusmodi sceleris sceleratorem invenerint turpiter debonestatum, de parochiis suis ejiciant: ait enim Apostolus ad Titum 3. HÆRETICUM HOMINEM POST SECUNDAM ET TERTIAM CORREPTIONEM DEVITA, SCIENS QUIA SUBVERSUS EST, QUI EIUSMODI EST, subversi sunt enim, & à Diabolo capti tenentur, qui derelicto Creatore, suo à Diabolo suffragia quaerunt, & ideo à tali peste mundari decet sanctam Ecclesiam.*

Illud etiam non est omittendum quoddam scelera: Mulieres retrò post Satanam converse: Demonum illusionibus, & phantasmatibus seductæ, credunt, & profitentur se nocturnis horis cum Diana Paganorum Dea, vel cum Herodiade, & innumera multitudo Mulierum equitare super quasdam bestias, & multa terrarum spatia intempeste noctis spatio pertransire, ejusque jussionibus velut Dominae obedire, & certis noctibus, ad ejus servitium revocari. Deinde declarat quòd hæc omnia operetur Dæmon per phantasmatum illusionem, somnij tempore, unde subdit, Et cum solius spiritus hoc patitur, infidelis mens hæc non in animo, sed in corpore opinatur evenire, Quis enim non in somniis, & nocturnis visionibus, extra se educitur, & multa videt dormiendo, quæ numquam videret vigilando? Quis verò tam stultus, & hebes est, qui hæc omnia, quæ in solo spiritu fiunt, etiam in corpore accidere arbitretur? Deinde infra: Omnibus itaque annunciandum est publicè, quòd qui talia, & similia credit; fidens perdit, & qui fidem rectam in Domino non habet, hic non est ejus, sed illius in quem credit, id est, Diaboli.

Respondet Franciscus Penna; decre-
Tom. IV.

tum præfatum eis quæ in confirmationem realis deportationis Strigum dicta sunt non adversari; *Ibi enim; inquit, non agitur de Lamiis, & Strigibus, sed de quibusdam hæreticis qui credebant quòd Diana fuit in Deam conversâ, & quòd creatura mutari, aut transformari potest ex una substantia in aliam: unde subdit præfatus Canon. Quisquis ergo credit posse fieri aliquam Creaturam, aut in melius, aut in deterius mutari, aut transformari in aliam speciem vel similitudinem, nisi ab ipso Creatore, quòd omnia fecit, & per quem omnia facta sunt, proculdubio infidelis est, & Paganus deterior.*

Respondet Alphonsus à Castro, & Delrius, dato quòd ille Canon reverè sit Concilij Ancyran, quòd tamen plerique pernegant, quia in Concilij hujus exemplaribus Græcis aut Latinis hodie non extat. Respondent, inquam, quædam in illo Canone narrari quæ per naturam rerum à Dæmone perfici non possunt; ut equitare cum Diana, vel Herodiade, cum ne ulla sit Diana Dea, nec Herodias illa ullibi in terris equitet, siquidem in inferno cruciatur. Item, quòd equitent super ulla bestias quæ tanta spatia tam citò, & per aerem conficere nequeunt. Item cognoscere aliquam naturam divinam præter Deum, reverè hæreticum est. Quocirca illa meritò à Canone proferuntur, & damnantur: non verò damnat Canon tanquam hæreticum, quòd quis credat ea fieri à Dæmone, quæ ipsius vires non superant, qualis est illa Strigum deportatio.

Vera itaque Canonis explicatio est, eos hæreticos esse censendos, qui credunt, Primò, quòd aliqua sit Dea, quæ vocetur Diana, vel Herodias. Secundò, quòd aliqua deportetur ad serviendum alicui tali Deæ. Tertiò, quòd aliquis possit ab alio, quàm à Deo in alteram speciem converti. Non autem censet Canon eos esse Hæreticos, qui contem-

dunt Striges, & Sortiarios personaliter ad longè distita loca deportari.

Obijciunt secundò varia exempla, quibus constat, quòd inuinctæ Mulieres, quæ Striges dicebantur, non fuerint ita deportatæ, sed eodem in loco repositæ fuerint jacentes gravi somno sopitæ; in cujus rei veritatem quatuor exempla profert Bartholomæus Spi-neus.

Respondeo primò, hæc equidem interdum contingere varias ob causas, tum ex parte Dei, tum ex parte Dæmonis: *Ex parte quidem Dei* aliquando impediens pactacum Magis inita servari; ad nempe revincendam hominum curiositatem; maxime verò Inquisitorum, & Judicum, qui inutiles, & vana curiositate ducti interdum experiri volent, num reverà Striges taliter inuinctæ alibi personaliter deportentur? *Ex parte verò Diaboli*, qui interdum Sagas decipit, eas loco non movendo, ut sic Judicibus, & Principibus suadeat falsa esse, quæ de talibus transvectionibus feruntur, atque ita justitiæ executionem impediat. Pactum ergo frustratur; quando majorem humano generi perniciem inde sperat.

Respondeo secundò, quòd interdum, etiam Dæmon simulachra quædam Striges, & Sortiarios referentia in eorum locum substituit, ut putentur non translati, sed illic remansisse.

Instat, Longè facilius Dæmon singula hæc cum singulis Strygibus sigillatim ageret: Nulla ergo apparet causa, cur Striges ad conventiculorum frequentiam deportet.

Nego consequentiam, multa enim, inquit Delrius, hinc ille comoda percipit. *Primò* varique, per hanc societatem, & plurium consortium vehementius in malitia foventur, & indurantur. *Secundò*, hoc pacto criminis participatione singulorum peccata aggravantur. *Tertiò*, talibus illicibus, & variis, quæ illic fiunt, inductionibus, plures

facilius implicat. *Quartò*, multitudo facit audaciores ad malum; tollit Dei, hominumque timorem, & musua imitatione ad majora facinora inflammat, ut solent carbonæ juncti. *Quintò*, voluptas nefaria major videtur, quò pluribus innotescit. *Sextò*, difficilius convertuntur, quo pluribus testibus se Dæmoni adixerunt, & actuum frequentatione quasi quidam habitu occuluerunt.

Addit Delrius has translationes, de quibus queritur; posse quatuor modis contingere. *Primò*, sola cogitatione, quod Scriptura sacra vocat *transferrè in spiritum*; Similis fuit illa visio Ezechielis, cap. 8. ubi ita: *Et emissit similitudo manus apprehendit me, & in cinis capitis mei, & elevavit me spiritu inter terram, & caelum, & adduxit me in Jerusalem &c. &c. &c. &c.* Ultimum enim veterum, modum præcedentibus ponit verbis, ne putemus hanc similem fuisse translationem illi quæ deportatus fuit Abacuc, de qua Daniel cap. 14. *Aliquando* suis pedibus committunt ad conventus, ut narrat Remigius, & Binsfeldius. *Tertiò*, à Dæmone reverà secundum corpus, & motum localem transferuntur. *Quartò*, aliquando potest contingere, ut ipsi ignorent corporaliter, an opinione dumtaxat translati fuerint.

Proditum invenio in quibusdam P. Joannis Maldouati scriptis de Dæmonibus, quod quando volunt corporaliter transferri, tum se inungunt unguento ex infantilis corpusculi adipi: Quando conventicibus per somnium, dumtaxat interesse volunt, tum in sinistram cubare latus: quando verò malunt vigilantes quæcumque in conventu fieri cernere, ut coram se geri; tum operà Dæmonis ex ore vaporem quemdam crassum evomunt, in quo gestorum Imagines, ut in speculo intueantur.

Quæst. 1. An, & quæ mala Diabolus per Striges hominibus inferat?

Respondeo innumera præpmodum, & infestissima quæque à Dæmone per excrandos illos Sortiarios, nefandasque Striges interdum hominibus inferri. *Primo* namque horum perditissimorum ope puerulis adhuc in cunis vagientibus inidiatur, ut evacuato, & epotato eorum sanguine vitam eis adimat. Quamobrem plerumque Sortiarii, & Striges felis, ac cati larvatam figuram induunt, ut maximè nocturno tempore pueros in lectulo jacentes adoriantur, eorumque sanguinem per umbilicum exsugant. Hujus veritatis plurima exempla profert Bartholomeus Spineus cap. 18. & 19. quorum unum hic exscribo. Quidam, inquit, cap. 18. Andreas Magnatius Bergomensis habitator Ferrariæ hac hyeme mihi narravit, quod à quodam suo affine Venetiis commorante, cognovit hoc quod contigit superioribus annis: quandam, inquam, puellam quæ cum Matre Bergomi morabatur, inventam fuisse nocte Venetiis in thalamo dicti sui affinis, quam manè repertam nudam, recognitamque, quia consobrina erat, cum interrogassent, quomodo illuc venisset, aut ibi esset, & quare? Plorans illa postquam vestita ab eis fuit, hæc quæ inferius infero narravit dicens: Hac nocte cum in lecto vigilarem, vidi matrem meam, quæ me dormire putabat surgentem de lecto, & exutam camisia, se quodam unguento, quod ex vasculo assumpsit de sub asseribus extracto perungentem corpus. Et statim in assumpto baculo quodam ibi preparato, in modum equitantis ascendens, extra fenestram deportata est, & à me nequaquam ex tunc ibi visa. Cumque ipsa quoque de lecto surgens, meum, ut mater fecerat, perunxissem corpus, extra fenestram edu-

cta, statim in hunc locum deportata sum, ubi matrem puero huic lecto decumbenti insidiantem vidi: ex quo ego territa cum matrem etiam ob meum adventum conturbatam vidissem, & comminantem, nomen Domini Jesu, & Beatæ Virginis invocavi, & ex tunc matrem non vidi, & ego hic nuda, solaque remansi. His auditis à puella, scripsit omnia hæc Affinis ille, narravit Inquirenti Bergomensi, à quo capta mulier, & tormentis expedita, cuncta confessæ est: & addit se à Dæmone plusquam quinquagesies deportatam, ut puerum illum filium prædicti Affinis occideret: sed tamen prævaluerat numerum, eò quod semper cum inveniret signo Crucis, & sanctis orationibus a parentibus bene munitum. Aliud huic simile ex eodem à nobis exscriptum habes supra quæst. 3. de activitate Dæmonum.

Quare autem Deus permittat, ut sic nefandæ Striges puerulis insidiantur; varias causas profert Delrius libro 2. quæst. 5. *Primo* quidem Deus id permittit quoad baptizatos; quia, inquit, sic à multis peccatis præservati in cælum, rapiuntur scilicet æternum victuri, & securi, quod malitia non mutabit intellectum eorum. Permittit hoc etiam Deus in pœnam parentum, aut ad eorum probationem, teste S. Augustino lib. 21. de Civit. Dei cap. 14. Ante baptismum verò perceptum non rarò permittit Deus illos occidi, ne propter actualia peccata, quæ commissuros videbat si viverent, graviolem sibi damnationem acquirant: Neque Deus propterea crudelis erit, aut non iustus: quia propter solum originale peccatum mortem merebantur. Sanè nondum ablutis undà sacra videmus, ut plurimum Dæmones insidias frueri, & eorum nece gaudere. Quia tunc, qui necant malefici longe gravius peccant, & atrocius Deum offendunt, nam pla-

nè innocentes, atque innocuſ animâ ſimul, & corpore perdunt, præſertim ſi liberos proprios occidant, quos & Dæmoni offerre, & occidere sæpè ſolent Striges: ſicut olim faciebant Chanaanæ, & cultores Molochi.

Cur verò potiſſimum tam teneræ ætati noceant, multæ ſunt cauſæ. Hæc ætas eſt imbecillior ad reſiſtendum, eſt incautior ad cavendum, nequit earum conatum deprehendere, vel revelare, vel accuſare: Petunt etiam ab his inſtrumenta maleficiorum; nam perſuafum habent, ſi certò numero corda infantium exiderint, & comederint, ſe patientiam omnium tormentorum conſequuturas, adeò ut ad confeſſionem criminum perducere non queant. Conſciunt quoque ex corpusculis infantium occiſorum horrendum illud unguentum ſuum, quod Grillandus dicit vocari in Italia *unguentum pagani*.

Addit Sprengerus parte 2. quæſt. 1. cap. 13. obſtetrices maleficas maximè puerulis recenter natis inſidiari; quæ de re varia præfert exempla, quorum unum, aut alterum exſcribo. Contigit, inquit, in Diœceſi Baſileenſi in oppido *Nann*, ut mulier quædam, quæ uſtulatione periit, fateretur ſe ultra quadraginta pueros necaſſe per modum talem, ut quando ex utero egrediebantur, acum capitibus eorum, per verticem uſque in cerebrum inſingeret. Altera etiam in Diœceſi Argentinenſi, pueros abſque numero, putà quia de numero non conſtabat, ſe intermiſſe ſaſta fuerat. Taliter autem fuit deprehenſa: nam ubi ex uno oppido in aliud cauſa obſtetricandi mulierem quamdam vocata fuiſſet, officio ſuo completo, dum ad propria redire volebat, ubi portam oppidi exivit, caſu brachium pueri recenter nati ex linteò quo præcincta erat, cui & involutum brachium fuerat ad terram cecidit. Quo viſo

ab eis, qui infra portam ſedebant; dum illa præteriſſet, levatum è terra, ut putabant petiam carnis, cautius intuebantur, & cum non petiam carnis, ſed brachium pueri per articulos membrorum agnoviſſent, conſilio cum præſidentibus habito, & invento, quòd infans ante baptiſmum deceſſerat, brachioque careret, malefica capitur, quæſtionibus exponitur, & crimen detegitur: ſicque, ut prædictum eſt, abſque numero ſe infantes interfeciſſe recognovit.

Sed & hoc horrendum facinus ſilentio prætereundum in deteſtationem tanti criminis non eſt; Nam, ubi infantes non interimunt, tamen illos Dæmonibus execrandum per hunc modum offerunt. Nato enim infante, obſtetrices, ubi puerpera malefica per ſe non exiſtit, tunc quæſt quid operis pro infantis reſocillatione actura, ipſum extra cameram deportat, & ſurſum elevans principi Dæmoniorum, ſcilicet Lucifero, & omnibus Dæmonibus immolat; & hoc in loco coquinæ ſuper ignem, apponit.

Reſpondeo 2. Dæmonum ope Striges innumera, ingentiaque mala interdum hominibus procreare: idque conſtat variis hiſtoriis, & exemplis, ut videre eſt apud ſupra laudatos Authores; nam ut miſſa faciam maleficiam inſomnii, amatorii, veneſici, aborſus, ligaminis, odii, incendii, & alia huiusmodi; certum eſt Striges, & Sortiarios varia morborum genera hominibus procreare. Cuius veritatis multa ſuppetunt exempla, quæ in longum referunt præfati Authores, maximè verò Sprengerus parte 2. *mallei maleficarum* qu. 1. cap. 11. necnon, & Delrius lib. 3. par. 1. quæſt. 4. ſect. 5. Grillandus, & alii: quam utique nefariam virtutem, Deo ita permittente, in cuiuſvis ſtatûs homines exercent, ut fuſè demonſtrat Delrius quæſt. 5. etiam interdum in ipſos Judi-

cēs,

ees, qui eos pœnis, & suppliciis adjudicant. Quod enim vulgò fertur, Striges nullam habere amplius maleficiandi virtutem statim, ac in manus justitiæ incidunt, id tantùm Laurentius Ananias *lib. 4. de natura Dæmonum* restringit ad eos Judices, qui Deum præ oculis habentes, rectè, riteque suo funguntur officio: nam quos avaritia excœcat, quos trahit ambitio, quos crudelitas, vel vindictæ amor stimulat, crebro sic à Dæmone excipiuntur, & appetuntur, ut aliquando necem non evadant. Quamobrem cum præfatis Authoribus veris dicendum arbitror, hoc immunitatis privilegium solis concessum Judicibus, qui firmitatem fidei, & justitiæ zelum cum pietate jungunt, quæ quia plurimis defunt, idcirco hoc peculiari Dei auxilio carentes à Dæmonum, & Strigum incurſibus non sunt immunes.

Quænes denique qua de causa Deus permittat Dæmonem per Sortiariorum maleficia in homines innocentis grassari?

R *Espondeo* variis de causis Deum hæc maleficia permittere. *Primò* namque exinde Dei gloria summopere augetur per gloriosam quorumdâ suorum attributorum manifestationem. *Primò* quidem apparet ejus *suavitas* in gubernando; quia cum Dæmoni liberum arbitrium dederit, ipsi violentiam perpetuam non esse inferendam judicat, impediendo nempe ne perficiat illud quod summopere exoptat, videlicet in humanum genus grassari. *Clementia* pariter hinc elucet in humanum genus; quia si quantum vult, & potest Diabolus nocere permetteretur, nemo foret illæsus; ideo frequentius illi Deus facultatem nocendi denegat, nec quantum nocere optaret, sinit; ut inde appareat ipsum humanæ naturæ curam

gerere. *Sapientia* etiam exinde emicat, quia cum Diabolus Deus naturalibus suis viribus uti permittat; gratiâ tamen sua interdum efficit, ut ab hominibus, quos laceſcere, & dejicere Diabolus intendebat patientia superetur, ac vincatur. Sicque fit, ut Strigum peccata aliis hominibus vertantur in merita. *Justitia* denique probatur, sed misericordia temperata, quia nempe delicta in hominum vita sic puniunt, ut nihil superſit solvendum in altera.

Apparet etiam exinde summa hominum utilitas; nam quibus maleficio nocitum, eorum *primò* patientia exercetur, constantia roboratur, devotio accenditur, & homines à pietate deviantes, ad pœnitentiam, & sacramenta Ecclesiæ usurpanda, ac frequentanda revocantur. *Secundò* exinde constat num Deum reverà diligant, necne; tunc enim qui Deum non diligunt, ad veritas artes, confugiunt; qui Deum amant, illi patienter ferunt, & se divinæ voluntati, atque præsidio committunt. *Tertiò*, hi Dæmonem insultus viam faciem ad omne opus virtutum sternunt, afflictio enim intellectum dare solet, & animas à peccatis, & exitio servare, necnon ab admissis revocare. Plures alias hujusce divinæ permissionis causas refert, & expendit Delrius *lib. 3. quæst. 7.*

Hic superessent adjicienda remedia quibus & caveri, & depulſari possint omnia illa Dæmonis, ac Strigum maleficia: Verùm congruentiori ordine ista proferemus, dum de maleficiis, & incantationibus nobis erit terminus in Tractatu de Virtutibus, & Vitiis, maxime Fidei vivæ, ac perfectæ oppositis. Interim fidem illam spe firmatam, charitate successam habere velim (amicus Lector: *Fides enim clypeus est* (inquit S. Paulus ad Ephesios 6.) *in quo possumus omnia tela nequissimi ignea extingui* -

gue-

Lucæ; Nam ais Christus Dominus Marci 16. Signa eos, qui crediderint hæc ejicient: linguæ loquentur novis, serpentes tollent; & si mortiferum quid biberint, non eis nocebit.

*Finis quartus Tomus Theologia nostra
de Angelis.*



I N D E X

RERUM, ET SENTENTARUM,

Quæ in hoc Quarto Volumine continentur .

Prior numerus significat paginam, posterior vero columnam .

A

Absolutum .

O Mne Absolutum, ab altero realiter distinctum, potest existeret sine ipso, saltem divinitus . 195. 2.

Actus .

Actus meritorius non potest elici ab Angelis, & hominibus damnatis . 336. 1.

Actus moralis bonus potest absolute haberi ab Angelis, & hominibus damnatis, licet non quando habeant propter obstinatam in eis malitiam . 338. 1.

Ideo actus, quo Dæmones credunt non est bonus, quia oderunt creditum . 338. 2.

Quomodo aliquod potest esse in actu, & in potentia simul . 162. 7.

Ad rationem actus vitalis sufficit, quod per ipsam potentiam vitaliter objectum suum percipiat, nec aliud requiritur . 109. 2.

Actus vitalis quomodo producat . 110. 1.

Equalitas .

Equalitatem cum Deo appetierunt Angeli secundum se spectatam . 323. 1.

Equalitas Angeli cum Deo qualiter sit non ens . 325. 1.

Equalitas cum Deo potuit ab Angelo apprehendi sine errore . 327. 1.

Equalitatem cum Deo appetere potest creata Voluntas appetitu inefficaci . 326. 2.

Eternitas .

Eternitas triplicem importat negationem . 186. 2.

Eternitas differt ab ævo, & tempore . ibid.

Eternitas .

Eternitas differt ab æternitate dupliciter . 187. 1.

Eternitas non est successiva . 188. 1.

Eternitas primi Angeli est notior quoad se æternitatibus aliorum Angelorum . 198. 1.

Ævum .

Ævum primi Angeli est simplicius, & invari-

billius, quam ævum aliorum Angelorum . 198. 2.

Angeli substantia, & operationes conveniunt in ratione ævi, quævis in ratione talis, vel talis ævi discrepent . 200.

Amor .

Amor duplex, naturalis, & supernaturalis . 126. 2.

Amor naturalis multipliciter accipitur . 127. 1.

Amor alicujus fieri potest major tripliciter . ibid. 2.

Amor naturalis inest Angelo . 128. 7.

Angelus potest cessare ab amore sui . 132. 2.

Amare .

Potest dici Angelum se amare necessarii quoad specificationem, non verò quoad exercitium . 129. 7.

Angelus naturaliter Deum amare potest . 129. 2.

Angelus .

Angelorum quanta sit dignitas . 3. 1.

Angelorum naturam, quam difficile sit explicare . 6. 1.

Angeli nomen officium non naturam explicat, ibidem .

Angeli sunt agiles in exequendis Dei mandatis . 5. 1.

Angelici nominis triplex acceptio . 5. 2.

Angeli nomen iis omnibus tribuitur qui à Deo delegantur . 6. 1.

Angeli nomen solum substantiam intellectuales creatam, & materiæ expertem designat, sive bona sit, sive mala . ibid.

Angeli nomen significat eas sanctas, ac beatas mentes, quæ tertium ordinem ultimæ Hierarchiæ celestis implent . ibid.

Angelorum existentia .

Angelorum existentia tribus effectibus probari potest . ibid. 2.

Angelorum existentia non ita colligitur ex motu Cælorum . ibid.

Angelos existere Si Scriptura pluribus in locis foveat . 7. 1.

Angelorum existentiam probat Concilium La-

122.

INDEX RERUM;

reranense, ibid. 2
 Angelus, qualiter dicatur esse propter hominem,
 & homo propter Angelum. 2. 1
 Angelorum existentia sufficienti ratione probatur
 ab operibus Magorum, & Energumeno-
 rum. 9. 1
 Angeli revera sunt à Deo conditi. 12. 2
 Angeli fuerunt à Deo creati propter triplicem
 finem. ibid.
 Angeli non sunt ab æterno creati, nec post com-
 pletum mundi formationem, sed unà cum
 ipsius orbis formatione, ut suadent Concilia
 Lateranense, Constantinopolitanum, sacra
 Scriptura, & sancti Patres. 13. 2
 Angelos creare non debuit Deus ante mundi
 formationem. 16. 2
 Angeli non moventur necessarii ad motum
 Cœli. 17. 2
 Angeli creati fuerunt in Cœlo sydereo. ibid. 1
De Angelorum Natura
 De Angelorum natura varie sunt sententiæ.
 ibid. 2.
 Angelus variam habet compositionem. 19. 2
 Angelos omnino incorporeos sacra Scriptura,
 Concilium Lateranense, & SS. PP. insinuant,
 & ratio suadet. 20. 1
 Angeli qualiter dicantur operationes corporeas
 exercere, & poenas pati. 23. 2
 Angelorum corporeitatem propugnant plurimi
 & SS. Patribus, maxime sanctus Angulinus,
 verum anceps, & dubius loquitur. 25. 1
 Angeli non constent ex materia, & forma phy-
 sicis. 27. 1
 Angeli nusquam deficiunt. 29. 2
 Angeli sunt incorruptibiles absolute. 30. 2
 Angelus licet non habeat repugnantiam, ut à
 Deo possit destrui, non tamen ad id habet
 potentiam naturalem, sed obedientialem.
 33. 2.
 Angeli secundum naturalia præstant homini-
 bus. 26. 1
 Angeli specie differunt ab anima rationali. 25. 2
 Angeli omnes non ampliori beatitudine donan-
 tur, quam homines. 32. 2
Angelorum numerus, & ordinis.
 Angelorum numerum, & ordinem explicare
 difficile est. 39. 1
 Angelorum numerus maximus est, non tamen
 infinitus. 40. 1
 Angelorum numerus Deo est determinatè co-
 gnitus, non verò nobis. 41. 2
 Angeli sunt plures, quam nobiliora specierum
 corporearum individua. 42. 2
 Angelorum numerus longe excedit hominum
 numerum. 43. 2
 Angelus non est natura simplex, nec purus
 actus sicut Deus. 44. 2
 Inter Angelos est distinctio specifica. 45. 1

Angeli cur potius distinguantur specie, quam
 homines. 46. 2
 Angeli nulli sunt speciei ejusdem. 47. 2
 Angelica natura est communicabilis pluribus
 specie diversis. 48. 2
 Angelus annihilari potest, & alius ejusdem spe-
 ciei reproduci. 50. 1
Angelorum operationes.
 Angelus nunc quomodo dicatur ab alio purgari.
 60. 2.
 Angeli habent specialia nomina. 61. 1
 Angelorum septem sunt Principes, septemque
 Demonum. 62. 2
 Angelus non cognoscit per suam substantiam.
 65. 2.
 Angeli qualiter dici possint actus puri, & esse in
 actu. 66. 2
 Angelus dependet à rebus corporeis, ut ab eis
 accipiat species, quarum opera illas corporeas
 intelligat. 70. 2
 Angeli discurrere possunt, quia cognoscunt, &
 deducunt conclusiones ex præmissis. 71. 2
 Angelorum virtus ad intelligendum repeti de-
 bet, ex eo quod evidenter res intelligant,
 quam naturæ intellectivæ sibi inferiores. 80. 1
 Angeli possunt aliquid de novo cognoscere. 81. 1
 Angelus sua sola essentia, & intellectu habet
 totalem causam suæ intellectiōis. 85. 2
 Angeli in entitate sua supernaturalia cogno-
 scere nequit naturæ vitibus. 91. 1
 Angelus quavis naturaliter cognoscat Christi
 Domini humanitatem propria substantia
 spoliari, inde non sequitur, quod cognoscat
 mystetium Incarnationis naturaliter. 92. 2
 Angelus nequit occultare alteri Angelo mentis
 affectum, sicut nec essentiam. 96. 1
 Angelus habet facultatem executivam ab in-
 tellectu, & voluntate distinctam. 136. 1
 Angelos producere posse aliquid lumen
 magis perfectiatur innatus Cœli splendor, in-
 certum est, & fictum. 143. 2
 Angelum Deus non potest annihilare pro quo-
 libet instanti in sensu composito, licet possit
 in sensu diviso. 29.
 Angeli interdum apparent hominibus in corpo-
 ribus visibilibus. 206. 1
 Angelorum alii assistentes, alii administrato-
 res. 261. 1
 Angeli præstant Ecclesiis, Templis, & Religio-
 nis. 392. 1
 Angelus potest sui conceptus notitiam in An-
 gelo distante producere absque eo quod pro-
 ducat aliquid in medio. 112. 2
 Angeli cur non possunt efformare corpora per-
 fectè organizata. 204. 1
 Angeli non efformant sibi corpus ex Cœli sub-
 stantia, nec putè elementari, sed ex substan-
 tia mixta. 209. 1
 An-

ET SENTENTIARUM:

Angeli cum corporibus assumptis possunt corpora hominum subire. 211. 2

Angelus ut verè dicatur corpus assumere, oportet ut ipsum moveat motu progredivo, qui sit vitæ indicium. 215. 2

Angeli possunt in corporibus assumptis abulare. 216. 2

Angeli non possunt corpora sic assumpta vegetare. 217. 2

Angeli in corporibus assumptis verè non loquuntur. 219. 2

Angelus potest seipsum per sui speciem cognoscere. 226. 2

Angelus non potest per eandem speciem cognoscere rem existentem, ut non existentem. 227. 2

Angeli per suæ propriæ substantiæ intuitum nequit alterum Angelum cognoscere. 228. 1

Angeli non cognoscunt secreta cordium. 24. 2

Angelus cognoscere potest entia supernaturalia quoad modum naturæ viribus. 232. 2

Angeli cognitione connaturali multa secreta cordium cognoscunt. 235. 2

Angelus tam potest cognoscere cogitationes nostras, quàm suas, quas utique cognoscit, licet sint ordinis morales. 236. 2

Angeli potest recipere cognitionem ab alio, quàm à se formatam, nec inde sequitur, quod possit producere visionem beatificam. 242. 1

Angeli habuerunt distinctam, & evidentem cognitionem mysteriorum sanctissimæ Trinitatis, & Incarnationis ex parte attestantis, non verò ex parte rei revelatæ. 255. 1

De custodia Angelorum.

Angeli reverà ad hominum custodiam deputantur. 281. 1

Angelos ad homines mitti decet ordinem divinæ Potestatis, & Sapientiæ, & dulcedinem divinæ Misericordiæ. 282. 1

Angelica custodia non detrahit hominum libertati. 285. 1

Angelus unus plurium hominum nequit esse custos. 286. 2

Angeli custodes deputantur hominibus ab instanti illorum natiuitatis. ibid.

Angelos custodes largitur Deus etiam reprobis. 287. 2

Angeli custodes non deserunt homines quantumvis peccent. 288. 1

Angelum custodem habebit Antichristus. 289. 2

Angelum custodem non habuit Christus Dominus. 290. 1

Angelum custodem habuit beata Virgo. 291. 1

Angeli non solum hominum, sed & aliarum rerum sunt custodes, & administratores. 292. 1

Angelorum custodiæ sex sunt effectus. 295. 2

Angeli custodes ob impenam nobis ministeria gloriæ accidentalem suscipiant. 289. 2

Tom. IV.

Angelos nostros custodes debemus venerari. 291. 2

Angeli quomodo ceciderunt. 292. 1

Angelorum Gratia, & Gloria.

Angelus potest conferre ad beatitudinem alterius per modum alicujus appendicis, manifestando nempe aliquam veritatem ipsi prius ignotam. 226. 1

In Angelis duplex est beatitudo, naturalis, & supernaturalis. 231. 2

Angeli fuerunt creati in statu beatitudinis naturalis. 232. 1

Angeli non fuerunt in beatitudine supernaturali conditi. 234. 2

Angeli creati potuerunt in statu beatitudinis. 235. 1

Angelorum existentia æternitate mensuratur. 238. 1

Angelus non potest naturaliter homines in extasim rapere per visionem intellectualem. 239. 1

Angeli immobiliter adhæret fini ultimo per determinationem extrinsecam, non autem per intrinsecam. 234. 1

Angeli possunt cognoscere futura contingentia cognitione conjecturali, idque quatuor modis. 230. 1

Angeli non cognoscunt futura contingentia à causis liberis pendencia, illa tamen cognoscere possunt. 232. 1

Angeli duos fines, & media habent duplicis generis. 230. 1

Angeli opus habuerunt quadruplici gratia. 239. 2

Angeli omnes fuerunt gratia sanctificante aliquando illustrati. 241. 2

Angeli omnes in gratia sanctificante conditi sunt. 242. 2

Angelos creati in gratia sanctificante præstantius fuit, quàm post creationem recipere. 246. 2

Angeli an gratiam receperint juxta naturam perfectionem. 247. 2

Angeli lese disposuerunt ad gratiam sanctificantem. 251. 1

Angelos non necessariò se intelligit quantum ad exercitium; & si necessariò se intelligeret, non propterea ideò se amaret necessariò. 252. 2

Angelus potest accendere intellectum humanum tripliciter. 274. 2

Angeli quinquam tenaces sint in eo quod semel elegerunt, non tamen propterea dicuntur immobiles. 246. 2

Angelus illuminatus merè passivè se habet ad illuminationem ab illuminante tota iter in se productam. 216. 2

Angeli statim post suum peccatum fuerunt ad in-

C c o

INDEX RERUM,

- Inferos detruſi, & præcipitati. 246. 1
De libertate Angelorum.
 Angeli ſunt libero arbitrio donati. 220. 1
 Angelus tam remanet indifferens, & liber poſt electionem, quam ante ipſam. 222. 1
 Angelus ab ipſo ſuæ creationis exordio ſuerunt liberi. 227. 2
 Angelus ſuit liber libertate contradictionis, & exercitii in primo ſuæ formationis inſtanti. 202. 2
De loco Angelorum.
 Angelum eſſe in pluribus locis continuis, & adequatis conſentiunt omnes. 149. 2
 Angelus non poteſt eſſe naturaliter in duobus locis adequatis, nec continuis. 153. 1
 Angelus locum indiſiſibilem occupare poteſt. 150. 1
 Angelus poteſt ſe ſiſtere in loco minimo, & indiſiſibili. 151. 2
 Angelus ita determinatur ad locum, ſicut anima ad informandum corpus. 154. 1
 Angelus poteſt eſſe in pluribus locis tam adequatis, quam inadéquatis ſupernaturaliter. ibid. 2
 Angeli poſſunt eſſe naturaliter in eodem loco, ſi non omnes, ſaltem plures. 155. 2
 Angelus poteſt totum aliquem locum deferere, & immediate poſt, aliquem totum acquirere ſimul per ſimplicem mutationem, non verò per localem motum. 157. 1
 Angelus poteſt tranſire ab uno loco ad alium in inſtanti per ſimplicem mutationem. 182. 2
 Angelus non poteſt tranſire ab uno loco ad alium impertranſito medio communicante. 182. 1
 Angelus poteſt velle ſe eſſe in loco remoto impertranſito medio voluntate inefficaci, non verò efficaci. 184. 2
 Angelus poteſt præſentiam ſuam reſtringere ad minimum loci ſui adequati partem. 186. 1
 Angelorum ſpiritualitas non impedit quin verò ſint in loco. 178. 1
 Si Angelus eſſet in loco per operationem dumtaxat, ſæpe nuſquam eſſet. 142. 1
 Angelus poteſt eſſe in loco abſque ulla operatione. 184. 2
 Angelus tam copax eſt loci definitivi ratione quantitatis virtutis, quam ſubſtantia corporis ſuæ quantitatis molis. ibid. 2
 Angelus habet determinationem ad unum locum occupandum potius, quam ad alterum caſualiter à ſua virtute motiva, & fundamentaliter à ſua ſubſtantia. 146. 1
 Angelica ſubſtantia ſecundum ſe eſt invariabilis: variari tamen poteſt per reſpectum ad locum cui applicatur. 147. 2
 Angelus non ſemper determinatur ad exiſtentium in equali loco. 128. 2
 Angelorum locus eſt duplex, adequatus, & inadéquatus. 149. 1
De locutione Angelorum.
 Angeli ſibi invicem loquuntur manifefſtando ſuos conceptus. 101. 2
 Angeli ſibi invicem non loquuntur per ſigna corporea. 102. 1
 Angeli aliquando dicuntur loqui nutibus, & ſignis, in quantum ſcilicet ad ſe invicem dirigunt ſuos conceptus. 104. 2
 Angelica locutio non fit per ſimplicem conceptus manifefſtationem. ibid. 2
 Angelus unus ut dicatur alteri loqui, non ſufficit quod illi mentis ſuæ conceptum aperiat: ſed requiritur ut Angelus ille ad quem talis conceptus dirigitur, recipiat aliquid quo moveatur, & exciteſcat, ut advertat Angelum illum, qui vult ipſi ſuos conceptus manifefſtare. 107. 1. 2
 Angelum alteri loqui producendo in eo conceptum objecti de quo loquitur, egregie probat Scotus. 107. 2
 Angelus alteri loquens poteſt ſui conceptus notitiam ingerere in audientem tribus modis. 109. 2
 Angelus loquens debet prius formare in ſeiſpo notitiam objecti, quam in intellectu audientis. 110. 2
 Angelus loquens alteri Angelo poteſt mentiri. 111. 1
 Angelus poteſt loqui alteri Angelo in maxima diſtancia poſito. ibid.
De merito Angelorum.
 Angeli potuerunt primo inſtanti eſſe miſeri miſeria pœnæ. 238. 2
 Angeli meruerunt beatitudinem. 244. 1
 Angeli gloriam meruerunt prius tempore, quam ipſam habuerint. 255. 1
 Angeli potuerunt habere majus meritum in tenèrè, quam pluriſimi homines; eſti modico tempore fuerit comparatum. 256. 1
 Angeli meruerunt beatitudinem per actum Fidei, Spei, & Charitatis. 256. 2
De motu Angelorum.
 Angelus non movetur motu per accidens, ſed motu per ſe. 164. 2
 Angelus ſeiſpum movet localiter. 167. 2
 Angelorum motus eſt verus, & realis. 182. 1
 Angelo nō eſt fruſtranea potentia motiva. 162. 1
 Angeli potentia loco motiva non diſtinguitur realiter ab ipſo Angelo. ibid. 2
 Angelus qualiter moveri poſſit à ſolo Deo. 169. 1
 Angelus unus quomodo alterum movere poteſt. 169. 2
 Angelus moveri poteſt motu continuo, & ſucceſſivo. 170. 2
 Angelus non poteſt naturaliter moveri motu di-

INDEX RERUM,

discreto. 174. x
 Angelus non potest moveri in instanti ab uno loco ad alium motu proprio dicto. 180. x
 Angeli possunt mutare locum tripliciter. 181. x
 Angelus per mutationem instantaneam potest transferri de loco adequato in alterum adequatum continuum, & priori contiguum. 185. x
De missione Angelorum.
 Angelorum missio duplex est, interna, & externa. 261. x
 Angeli quandoque ad homines mittuntur. 262. x
 Angeli, etiam mali, interdum ad homines mittuntur à Deo. 271. x
 Angelorum missionis tres sunt effectus. 272. x
 Angelorum novem esse ordines probant SS. Patres. 286. x
De peccato Angelorum.
 Angelus non fuit peccator in primo instanti suae creationis. 297. x
 Angelus peccare potuit in primo instanti suae creationis. 302. x
 Angelus habuit duas condiciones, quae requiruntur ad peccandum, in primo instanti suae creationis. ibid. x
 Angeli in primo instanti suae creationis licet peccarent, illud tamen peccatum Deo non esset adscribendum. 304. x
 Angelus quamvis potentia peccare potuit in primo instanti. 327. x
 Angelus nequit producere novum phantasiam in phantasia hominis, nisi mediante objecto naturaliter illius causativo. 280. x
De cognitione Angelorum.
 Angeli in instanti suae creationis habuerunt rerum saltem universalium species sibi concretas, ut docet Scriptura sacra. 74. x
 Angeli indigent speciebus impressis ad cognitionem abstractivam rerum possibilem, ut docet Doctor, & probat ratio. 74. x
 Angelus non debet necessarii ferri in ea objecta quorum habet species, nisi in eo actu relocate. 76. x
 Angelus potest recipere illas objectorum species à Deo, vel à rebus ipsis. ibid. x
 Angelus non indiget speciebus ad cognitionem rerum praesentium. 77. x
 Angelus posset praesentius cognoscere per speciem particularem quicquid cognoscit per universalem. 79. x
 Angelus posset seipsum cognoscere per suam essentiam, & nulla mediante specie intelligibili. 85. x
 Angeli possunt cognoscere divinam essentiam per speciem ipsius distinctè representativam, quae quidem species esset naturalis quod substantiam. 88. x
 Angelis in primo statu suae creationis concreta

est species abstractiva Deum distinctè representans. 222. x
 Angeli sunt in determinato spatio. 127. x
 Angeli inviderunt homini propter unionem hypostaticam. 328. x
 Angeli affectaverunt unionem hypostaticam, ibidem.
 Angeli non sunt oblique. 138. x
 Angeli sunt voluntate donati.
 Angelica voluntas non est immutabilis. var. x
 Angeli primum velle non est à Deo, sed à se. 306. x
 Angeli per virtutem suam limitatam quantitati infinitae praesentes esse nequeunt. 150. x
Anima.
 Anima rationalis non habet vim assumendi corpora, quia non habet vim administrativam sicut Angelus. 307. x
 Anima triplex habet operationum genus in corpore, sicut in eodem triplicem habet unionis modum. 216. x
 Animam rationalem quare Deus infundat in corpore à Dæmone genita. 324. x
 Animae defunctorum interdum apparent. 263. x
 Anima rationalis potest seipsum per suam substantiam cognoscere dum separatur à corpore. 87. x

Appetitus.
 Appetitus etiam si feratur in obiectum ad quod naturaliter inclinatur, potest tamen esse inordinatus, & malus. 318. x
 Apperitus divinitatis hypostaticus non est culpabilis, talis autem non fuit Angelicus. 328. x
Acquisitio.
 Acquisitio quando fit per verum motum localem, partes viciniores prius sunt acquiribiles, quam remotiores, non verò quando fit per simplicem mutationem. 185. x

B

Beatitudo.
 Beatitudo duplex est, essentialis, & accidentalis. 296. x
 Beatitudo naturalis non est inanimabilis. 232. x
 Beatitudinem non potest non velle Angelus, sed potest velle inordinatè propter finem bonum. 219. x
 In ordine ad Beatitudinem Deus eodem modo se habet erga homines, & Angelos. 254. x
Beatificare.
 Beatificare essentialiter tam obiectivè, quam effectivè ad solum Deum pertinet. 116. x
Bonitas.
 Bonitas triplex assignatur, cui opponitur triplex malitia. 221. x

INDEX RERUM,

C

Christus.

- C**hristus post resurrectionem suam manducando vertere potuit cibum in suam substantiam. 218. 1
 Christus licet beatus cur mereri potuit, non verò Angeli. 238. 1
 Christus Dominus Dæmones ejiciendi potestatem suis Ministris, & Viris sanctitate præditis reliquit. 366. 2
 Christi intentio quænam fuerit dum post resurrectionem se palpandum Discipulis exhibuit. 214. 2

Cælum.

- Cælum, & stellæ non sunt diversæ naturæ. 17.

Cognitio.

- Cognitio duplex est, intuitiva scilicet, & abstractiva. 72. 1

Conservatio.

- Conservatio est actio Dei positiva. 192. 1
 Conservatio non est actio distincta à prima productione quantum ad positivum utriusque; quævis nam qua talis importet aliquem respectum, quem non importat alia. ibid. 2.

Continens.

- Continens per modum causæ debet esse ætænale contento, non verò continens per modum loci. 149. 1

Corpus.

- In corporibus ab Angelis assumptis colores sunt verè reales. 211. 2
 Corporum assumptio sit ab Angelo propria virtute. ibid.

Corruptio.

- Quid sit corruptio, & quomodo aliquid dicatur corruptibile. 29. 2
 Triplex est corruptionis genus. 30. 2

Creatura.

- Creaturæ triplici ordine distinguuntur. 1
 Creaturis quibusdam Deus utitur ad alias servandas. 270. 2

Culpa.

- Culpa Dæmonum, & Dæmnatorum non est demeritoria, quia non sunt viatores. 341. 1

D

Dæmon.

- D**æmones non appetunt sui non esse nisi per accidens. 132. 1
 Dæmones cur mulieres pulchris donatas capillis maximè infestent. 222. 1
 Dæmon qualiter conferat ad generationem. 224. 1
 Dæmones quibus cum rebus corporeis videntur habere antipathiam. 26. 1
 Dæmon licet sit mortis origo, vitam tamen

- per accidens producere potest, etiam humanam, licet ab homine specie differat. 224. 1
 Dæmones feruntur multis exemplis parvulos aliunde genitos quasi se genitos subintrare. 232. 1
 Dæmones possunt interdum animalia imperfecta per se producere, & perfecta per accidens. 226. 1
 Dæmones, & damnati sunt ita in malo obdormati, ut nonquam possint resipiscere. 322. 1
 Dæmones juxta varias formas, quas induunt, & loca, quæ incolunt, varias obtinent appellationes. 360. 2
 Dæmones aliqui dicuntur subterranei. 362. 2
 Dæmones varias hominum, ac brutorum formas induunt. 364. 2
 Dæmones Sanctorum, imò & Jesu Christi formas induunt. ibid.
 Dæmones qualiter hominibus illudant. ibid. 2
 Dæmones lorciarios convivis alliciunt; quis ritus in eis observatus. 372. 1
 Dæmones cur non nisi unguento sagas deferant, & quid præstet unctio. 372. 2
 Quod Dæmones deportent homines ad conventus locum, variis confirmatur exemplis. 372. 2
 Dæmones non potuerunt naturæ viribus cognoscere Mysterium Incarnationis. 92. 1
 Dæmones non possunt estringere corpora ita perfecta, quin facile dignosci possint. 213. 2
 Dæmones interdum vera assumunt corpora hominum, vel animalium. 212. 1
 Dæmones in corporibus assumptis per se generare nequeunt, sed tantum per accidens, & per semen aliunde acceptum. 120. 1
 Dæmones qualiter uni homini in corporibus assumptis noceant, non vero alteri. ibidem.
 Dæmones non possunt corpora in aliam speciem mutare. 226. 2
 Dæmones qualiter eandem partem corporis cum anima occupare possint. 368. 1
 Dæmones subire corpora Deus permittit variis ibid.
 Dæmonis peccatum concupiscentiam esse, seu libidinem corpoream affirmavit Tertullianus, sed minus bene. 23. 2
 Dæmonum sevitia quàm dira sit in homines. 258. 2
 Dæmonum infestatio multiplex est. 369. 2
 In Dæmonibus quænam integra steterunt, quænam verò fuerunt immutata. 224. 2
 Dæmonum detentio est æqualis. 251. 2
 Dæmonum demeritum, & dæmnatorum augmentum extensivè, non verò intensivè. 341. 2
 A Dæmone aliquem possideri quibus signis cognosci possit. 269. 2

ET SENTENTIARUM:

Delectio.
Quid intelligatur per delicias Paradisi, quas
Lucifer dicitur degustasse. 237. 2

Dependentia.
Dependentiam includit creatura ad Deum, ut
causam non solum sui ipsius, sed & totius
Universi. 130. 2

Deus.
Deus non vult omnia per seipsum efficere, licet
possit; ita non vult creaturas omnes intelle-
ctuales per seipsum illuminare. 114. 2

Deus qualiter dicitur in Angelis reperisse pra-
ritatem, vel non posuisse laudem. 245. 1
Dei posteriora quænam à Moysè dicantur. 1.

Diabolus.
Diabolus plerumque laetetur, ut creaturis tribua-
tur malum, cuius ipse est artifex. 12. 1
Quod Diabolus ab initio fuerit peccator, quo-
modo accipiendum est. 244. 1

Differentia.
Differentia duplex, specificativa, & indivi-
dualis. 44. 2
Differentia formalis duplex est. 52. 1

Difficultas.
Difficultas fuit in Angelo per se prosequendi bon-
nam oriunda ex proportionem objecti circa
quod tendere debebat. 256. 2

Dispositio.
Dispositio præcedit formam instanti nature,
non temporis. 253. 2
Dispositio ad formam debet ipsam præcedere,
quando ex sua speciali ratione habent ali-
quam incompatibilitatem, ratione cuius non
possunt simul subsistere. 255. 2

Draco.
Quid intelligendum sit per Draconem, qui
terram partem stellarum & cælo in terras
traxit. 44. 1

Duratio.
Duratio creata non potest habere simul esse,
fuisse, & fore, quatenus se tenet ex parte crea-
turæ; potest tamen quatenus se tenet ex parte
Dei. 191. 2
Duratio Angeli etiam indivisibilis non est infini-
ta, quamvis in æternum sit duraturus. 194. 2
Duratio Angeli ab ipso realiter non distingui-
tur. 195. 1

Non eodem modo ratiocinandum est de dura-
tione respectu rei durantis, quomodo ratio-
cinamur de tempore respectu motus. ibid. 2
Durationis Angelorum tria fuerunt instantia.
258. 1

E

Electio.
Electiois mutatio ex triplici cupite prove-
nit. 125. 1

Potest aliquis indirectè, & imperfectè velle
suum non esse. 327. 2

F

Facultas.
Facultas eadem efficere potest duos actus,
quando sunt subordinati. 253. 2

Filius.
Quid intelligendum sit per Filios Dei jubilan-
tes. 15. 2

Per Filios Dei Filiabus hominum conjunctos
intelliguntur, vel posteri Seth, & Enos, vel
homines stirps proceri, vel Filii Principum,
& Magnatum. 23. 2

Finis.
Aliquid habere potest rationem finis, vel ad
supplendam indigentiam, vel ad suscipien-
dum influentiam prioris modus perfectionem,
posterior verò imperfectionem denotat. 9. 1

Forma.
Formæ separatæ à materia non debent habere
omnem perfectionem sui speciei. 52. 2
Ut potentia dicatur formæ susceptiva, sufficit,
quod naturaliter illa forma destitui possit.
70. 1

Futura contingentia.
Futura contingentia Dæmonibus Deus aliquan-
do revelavit, vel per se immediate, vel per
bonos Angelos. 100. 1
Futura contingentia quando prænuntiant Dæ-
mones, hæc cognoscunt ex conjecturis, &
syderum influentiis. ibidem.

G

Generatio.
Generatio ex Dæmone succubo, & homine
fieri potest. 225. 1

Gratia.
Gratia trisariam usurpatur. 239. 1
Cum minori gratia potest aliquis plus mereri,
quam alius cum majori. 249. 2

H

Habitatio.
Habitatio non necessitat potentiam, sed tan-
tùm eam inclinât, & faciliat ad operan-
dum. 123. 1

Hierarchy.
Hierarchy triplex est, divina, Angelica, & hu-
mana. 54. 1
Hierarchy non est promptè in Deo. ibid. 2
Hierarchy Angelorum triplex. ibid.
Tres sunt operationes Hierarchy, ex quibus
tres Hierarchy concluduntur. 60. 1

C c c 3

1911

INDEX RERUM

I

Ignis .

Ignis Inferni an sit corporeus, & materialis .

344. 1

Ignis, quo Dæmones torquentur est verus, & corporeus . 347. 2

Ignis Inferni realiter, & intentionaliter exercit . 349. 1

Ignis Inferni est disconveniens dæmonis dupliciter . ibid.

Ignis Damnatorum, & Dæmonum non est metaphoricè accipiendus . 353. 1

Ignem cruciantem semper secum deferit Diabolus . 352. 1

Ex Ignis apprehensione statim concipit Dæmon tristitiam . ibidem .

Illuminatio .

Illuminatio fit per productionem conceptus illuminantis in illuminato . 215. 1

Illusio .

Illusio num duo sunt genera . 358. 360. 1

Immortalitas .

Immortalitatis genus triplex est . 30. 1

Impeccabilis .

Non in unquam exiit creatura, ant existere potest, quæ sit intrinsecè, & ex natura sua impeccabilis . 298. 1

Creatura, quæ primo instanti suæ creationis foret impeccabilis, posset in sequentibus talis non conservari . 301. 2

Inclinatio .

Inclinatio duplex est in Angelo, & homine, una generalis, quatenus creatura est, & altera specialis, quatenus est talis creatura . 131. 2

Inclinationem naturalem ad bonum habet creatura rationalis . 132. 1

Individuatio .

Qualiter materia est principium Individuationis . 51. 2

Indulgentia .

Indulgentia anticipata indulgere dicitur Deus impediendo peccata, non verò condonando, & parcendo jam commissis . 332. 1

Inferiora .

Inferiora per superiora regi debent . 114. 2

Infernus .

Inferni elegans descriptio . 348. 1

In Inferno non videntur esse aqua, aut nix . 352. 2

In Inferno sunt vermes voraces . 354. 1

Instanti .

Duo Instantia immediatè sibi succedere nequeunt .

Intellectus .

Intellectus Angelicus, & humanus specie differunt ex parte fundamenti, etiam non differant ex parte objecti . 38. 1

Intellectus agens, & patiens duobus modis usurpantur . 65. 1

Intellectus Angelicus ab Angelo, & humanus ab homine, ant anima realiter non discrepat . 66. 2

Intellectus agens, & patiens reperitur in Angelis . 67. 1

Intellectus agens requiritur in Angelo ut intelligat objecta sensibilia . 69. 2

Intellectus possibilis est in Angelo . 70. 1

Intellectus agens, & possibilis non solum ita nominantur per comparisonem ad phantasmatum . 71. 1

Esse imaginabile est esse medium inter sensibile, & intelligibile quantum ad intellectum humanum, non verò quantum ad Angelicum . 84. 1

Intellectus Angelici activitatem superat aliquod ens creatum . 67. 1

Intelligere .

Triplex est modus intelligendi . 67. 1

Intellectio .

Intellectio in quo consistat, & per quid completa sit . 65. 2

Invigilare .

Propter tria maxime nobis invigilant Angeli . 281. 1

Iustitia .

Iustitia distributiva, & commutativa quid sit 250. 1

L

Libertas .

Libertas triplex; à coactione scilicet, à peccato, & à miseria . 118. 1

Libertas rursus triplex, contrarietatis, contradictionis, & essentialis . ibid.

Libertas essentialis unde colligatur . ibid. 2

Liber .

Creatura rationalis nequit creari non libera . 120. 1

Locus .

Locus superior rei nobiliori non semper tribuitur . 17. 2

Locus corporeus duplex est . 137. 2

Locus Angelorum duplex, adæquatus, & inadæquatus . 149. 1

Locus triplicem habet ad locatum habitudinem, & operationem . 136. 2

In corporibus contactus physicus requiritur, ut sint realiter in loco, quia sunt in eo divisibiles; secus verò in substantiis spiritualibus . 145. 1

Corpora divinitus possunt esse in loco sine quantitate . 145. 2

Substantia corporea est in loco divisibili per commensurationem totius quantitatis cum

to-

ET SENTENTIARUM.

soto loco, & partium ejusdem cum partibus loci. 147. 1

Substantia Angelica non semper determinatur ad existendum in æquali loco. 148. 2

Ad veram determinationem loci, & locati sex desiderantur conditiones. 149. 1

Aliquid potest esse in loco circumscriptivè, & definitivè. 149. 1

Ideo duo corpora non possunt esse in eodem loco, quia utrumque replet locum, cui præsens est. 149. 2

Ideo corpus non potest esse in pluribus locis, quia secundum suam entitatem limitatam ita determinatur ad unum, ut simul plura habere nequeat. 154. 2

Duo corpora gloriosa possunt simul esse in eodem loco. 157. 2

Vt res sit in loco debet ei aliquid advenire præter conservationem, ut verò duret non debet aliquid aliud à conservatione ei advenire. 196. 2

Locutio.

Locutio tribuitur Deo, & Angelis. 101. 1

Locutio præter determinationem conceptus, exigit ut dirigatur physicè in audientem, quo nempe de non audiente fiat audiens. 107. 2

Locutio, & illuminatio Angelica inter se distinguuntur. 112. 2

Lucifer.

Lucifer alios Angelos ad peccandum induxit. 397. 2

Lucifer aliquando cæteris Angelis sanctior fuit. 248. 2

Lumen.

Lumen majus minus non extinguit, sed auget. 116. 2

M

Malignitas.

Malignitas Dæmonum, & Damnatorum est summa, & attingit terminum, ac proinde non augentur eorum peccata, nec potest. 340. 2

Materia.

Materiam qualiter usurpaverit Aristoteles, dum eam esse principium individuationis asseruit. 51. 2

Medium.

Medium inter terminum à quo, & ad quem duplex est, scilicet communicans, & non communicans. 181. 1

Mensura.

Mensura, & mensuratio quid sit. 187. 1

Mensura duplex est, entitativa scilicet, & quantitativa. ibid. 2

Mensura aliqua non reperitur in Angelo, quæ mensuret ipsius existentiam. 196. 2

Mensura æterna potest poni in Angelo, quæ mensuret ipsius existentiam, quæ sit extra genus, erit Deus, si verò in genere erit existentia primi Angeli. 197. 1

Mensuræ genus quadruplex est. 187. 2

Mensurare.

Nulla creatura mensurator æternitate. 199. 2

Operationes Angelorum mensurantur tempore nostro. 202. 2

Meritum.

Meritum quid sit. 250. 1

Meritum triplex, congrui, digni, & condigni. 250. 1

Meritum majus requirit majus præmium intensivè, non verò extensivè. 256. 1

Ad meritum præstandum tria concurrunt. 250. 2

Meri.

Ad merendum tria concurrunt ex parte Dei, totidem ex parte creaturæ rationalis. 251. 1

Ad merendum necessariò requiritur status virtutis. 255. 1

Meritorium.

Opera bona sunt meritoria trium meritorium. 251. 1

Mysterium.

Mysterium Sanctissimæ Trinitatis Angelis revelatum est. 257. 1

Motus.

Motus est accidens divisibile successivum non permanens, adeoque non repugnat Angelo. 162. 1

Motus duplex est, circumscriptivus, & definitivus. ibidem.

Motus est quadruplex, scilicet continuus, discretus, successivus, & instantaneus. 169. 1

Motus Angeli ut excedat in velocitate motum quemlibet corporis, non est necesse, quod fiat in instanti. 180. 2

Motus successio ex triplici capite repetenda est. 169. 1

Motus spectari potest vel in specie, vel in genere. ibidem.

In motu organico una pars movet aliam non in alio, v.g. motus gravium, & levium. 167. 2

Ad motum Angeli mensurandum non requiritur tempus à tempore nostro distinctum. 179. 1

Discrimen inter simplicem motionem, & motum. 181. 2

Quod sit discrimen inter motum per medium communicans, & non communicans. 183. 1

Quid tandem discriminis inter motum localem, & motum cogitationum nostrarum. 183. 1

Moveri.

Aliquid potest moveri tripliciter. 159. 2

Indivisibile etiam quantitativum non potest moveri. 180. 2

INDEX RERUM

moeri continet . 172. 2
 Quid sit moveri motu discreto ? 173. 1
 Deus non potest facere corpus, quod secundum
 suam naturam intrinsecam non possit divini-
 cetur à suo motu impediti . 200. 1

N

Natura.

Natura intendit multiplicationem indivi-
 duorum, quæ sunt actu numero finita .

52. 2

Natura quamvis non intendat productionem
 rei ut deficiat, potest tamen aliunde deficere . 202. 1

Naturæ speciei diversæ possunt habere opera-
 tiones ejusdem speciei . 28. 1

O

Objectum.

Objectum intellectus Angeli quodnam sit . 69. 1

Objectum ut moveat potentiam non debet esse
 illi præsens substantialiter, sed tantum per
 intuitum sui motionem . 28. 1

Objectum ut causet intellectiorem non debet
 necessario esse forma intellectus . ibid.

Obstinatio.

Obstinatio Dæmonum in malum non oritur ab
 infuso in eis habitu malo, & vicioso, nec
 ab aliquo actu à Deo producto in eorum vo-
 lontate, sed à voluntate, & denegata gratia
 conjunctum . 336.

P

Paradisus.

Paradisus in quo stetit Lucifer, quid sit ? 17. 2

Peccatum.

Peccatum Angeli fuit amor sui, quo sibi ipsi,
 & in seipso nimium complacebat . 315. 2

Peccatum primum Angeli fuit superbia, non
 quatenus superbia est, sed quatenus significat
 nihilam sui complacentiam, & amorem inor-
 dinatum . 321. 2

Peccatum primum Angelorum fuit nimius, &
 inordinatus sui amor . 313. 2

Peccatum primum Angelorum melius ad luxu-
 riam, quam ad quodlibet aliud est reducen-
 dum . 323. 1

Peccatum Luciferi gravius multo fuit, quam
 peccatum ejus sequacium . 311. 1

Peccatum dividitur inadæquatè, & incongruè
 in septem genera . 222.

Peregrinatio.

Peregrinatio duplex est, beatitudinis, & alia
 peccati . 227. 1

Perfectio.

Aliquid potest habere perfectionem sibi com-
 paratam tribus modis . 68. 2

Quando aliquid habet perfectionem comparatam
 sibi ex beneplacito auctoris naturæ, quam
 aliunde posset sibi vindicare, debet habere
 facultates intrinsecas, quibus ipsam compa-
 rare possit . 62. 1

Omnis perfectio in inferioribus non dicens
 imperfectionem attribui debet naturæ supe-
 riori . 82. 1

Omne perfectivum non debet esse perfectius
 suo perfectibili . 152. 2

Permanentia.

Circa rei permanentiam quinque considerari
 possunt . 200. 2

Phantasia.

Varia spectra immutant, & corrumpunt phan-
 tasiæ . 219. 1

Pœna.

Pœna damnatorum duplex est, damni, & sen-
 sus . 344. 2

Pœna damni, & pœna sensus respondent dupli-
 ci deordinationi, quæ est in peccato mortali .
 ibidem .

Elegans de poenarum eternitate sententia .
 356. 1

Pœnitentia.

Pœnitentia Dæmonum, & Damnatorum inutilis,
 & infructuosa est . 239. 2

Pœnitentia.

Quare homini, & non Angelo concessum est
 pœnitendi tempus, & auxilium . 324. 1

Ideo Damnati, & Dæmones non possunt pœ-
 nitere, quia denegatur eis sufficiens auxi-
 lium . ibid. 2

Populus.

Quid significet distributio populorum juxta
 numerum filiorum Dei . 42. 1

Potentia.

Potentia loco motiva Angeli superiotis quomo-
 do sit præstantior . 173. 2

Præceptum.

Præceptum de Deo amando est iuris natura-
 lis . 121. 1

Promissio.

Quid intelligendum sit per promissionem ante
 tempora secularia . 15. 1

Propositio.

Propositiones non sunt contradictoriæ, nisi sint
 de eodem, eodem modo spectato . 27. 2

ET SENTENTIARUM:

Q

Quantitas.

Quantitas non est ratio formalis fundans ubificationem corporum in loco. 145. 2

R

Relatio.

Relationum genus triplex est. 168. 2
Substantia Angelica fundare potest relationem præfentiz in loco, non quatenus est substantia Angelica, sed quatenus est hic, & non alibi. 146. 2

Res.

Res non censentur esse in statu violento, nisi quando earum virtus præpeditur. 98. 2

S

Sacerdos.

Sacerdotes potestatem habent in Corpus Christi naturale, mylticum, & morale. 34. 2

Sensatio.

Sensatio tribus modis fit, & accipitur. 215. 2

Spatium.

Spatium reale se habet ad corpora per modum continentis, & spatii repleti; at quantum ad spiritus se habet quidem per modum loci, sed non per modum spatii. 159. 2

Species.

Species accipitur duobus modis, propriè scilicet, & impropiè. 35. 2

Species objecti representativa duplex est, impressa scilicet, & expressa. 73. 2

Species ab objecto materiali desumere potest creatura rationalis. 83. 2

Species representativa substantiæ Angeli potest dari absque eo quod representet gradum illius existentie. 87. 1

Species rerum univversalium quas habent Angeli, non ab eorum substantia emanant. 88. 2

Species rerum Angelis inditæ, sunt supernaturales quoad modum, non quoad substantiam. Ibid. 2

Spectra.

Spectra sensus externos lædunt. 359. 1

Spiritus.

Spiritus nominis quintuplex est acceptio, & significatio. 18. 1

Spirituale.

Spiritualis substantiæ multiplex acceptio. 18. 2

Status.

Assertur discrimen quod est inter visorum, damnatorum, & comprehensorum status. 330. 1

Ex parte status repetenda est impossibilitas reparandæ salutis. 333. 2

Striges.

Striges revera ab ipso Dæmone ad cætus locum deferuntur. 373. 2

Non est certum, quod iudicibus occidere non valeant Striges. 380. 1

Cor Deus homines innocentes à Strigibus vexari permittat. Ibid. 2

Striges quomodo noceant. 375. 2

Strigum depertatio quod modis fiat. 378. 2

Substantia.

Substantiæ spirituales habent aliquam velamina, quibus occultari possint, sicut corporeæ. 91. 1

Successio.

Successio non est de essentia motus. 180. 1

Successio requiritur in abiectione termini à quo, & in acquisitione termini ad quem. 185. 2

Supplicium.

Supplicia Damnatorum sunt æterna. 355. 2

T

Theologia.

Theologia non deprimitur dum creaturæ in ordine ad Deum contemplantur. 2

V

Ubificatio.

Ratio formalis ubificationis sumitur bifariam; 137. 2

Verbum.

Verbum mentis quid est. 65. 2

Via.

Via Angelorum fuit valde brevis. 250. 2

Visio.

Visio beatifica mensuratur ævo. 200. 2

Visio beatifica dicitur æterna, ex eo quod in æternum fit duratura cum formaliter. 202. 1

Ideo Deos dicitur invisibilis naturæ viribus, quia ejus visio intuitiva non est intra lineam ordinis naturalis. 98. 1

Videre.

Aliquid videri potest in Verbo dupliciter. 215. 2

Vita.

Vitæ actiones sunt duplicis generis. 215. 2

Univversale.

Univversale in conceptu nihil esse potest, quia idem sit in re. 49.

Univversum.

Non omnes modi, & gradus entis ad Univversum perfectionem spectant. 26. 2

Volitio.

Volitio distinguitur in Amorem amicitie, & concupiscentie. 312. 2

Vo-

INDEX RERUM.

Volitio inefficax potest versari circa impossibi-	ea quodlibet objectum .	339. 1
le .	Voluntas si determinaretur necessariò ad agen-	336. 1
<i>Voluntas .</i>	dum, dictamen recte rationis non haberet	
Voluntas eth tendat necessariò in finem, non	rationem voluntatis .	302. 1
ita tendit in media .	Voluntas Angelica, si non esset immutabilis in	
Voluntas errare potest circa finem ultimum,	proposito, potest naturaliter reddi impecca-	
licet intellectus nequeat errare circa prima	bilis in futurum .	323. 1
principia .	Voluntas Angelica libera est quantum ad exer-	
Voluntas remanet libera quoad exercitium cir-	citium .	326. 1

FINIS.







